


Xti'idza' Diuzi



New Testament in Zapotec, Choapan (MX:zpc:Zapotec, Choapan)

Xti'idza' Diuzi

New Testament in Zapotec, Choapan (MX:zpc:Zapotec, Choapan)

copyright © 1986 Wycliffe Bible Translators, Inc.

Language: Zapotec, Choapan

Translation by: Wycliffe Bible Translators, Inc.

Zapoteco, Choapan [zpc], Mexico

Copyright Information

© 1986, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Choapan

© 1986, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
f44721e8-d767-55bd-8bcb-f1eb4965c7c2

Contents

San Mateo	1
San Marcos	58
San Lucas	96
San Juan	159
Hechos	204
Romanos	263
1 Corintios	288
2 Corintios	311
Gálatas	326
Efesios	335
Filipenses	344
Colosenses	349
1 Tesalonicenses	354
2 Tesalonicenses	359
1 Timoteo	362
2 Timoteo	369
Tito	374
Filemón	377
Hebreos	379
Santiago	398
1 Pedro	404
2 Pedro	410
1 Juan	414
2 Juan	420
3 Juan	421
Judas	422
Apocalipsis	424

DI'IDZA' LA'ITYA BZU SAN MATEO LĒ'Ē GUICHI

Ni rnĕn quie xuzixta'o Jesucristo
(Lc. 3.23-38)

¹ Ni rguixogue'n quie ja xuzixta'o Jesucristo. Naca Abraham len rey David xuzixta'o Jesucristo. ² Abraham guquĕ' xuzi Isaac, na' Isaac guquĕ' xuzi Jacob, na' Jacob guquĕ' xuzi Judá len ja bichinĕ'. ³ Na' Judá guquĕ' xuzi Fares len Zara, na' lao zna'jĕ' Tamar. Na' Fares guquĕ' xuzi Esrom, na' Esrom guquĕ' xuzi Aram. ⁴ Na' Aram guquĕ' xuzi Aminadab, na' Aminadab guquĕ' xuzi Naasón, na' Naasón guquĕ' xuzi Salmón. ⁵ Na' Salmón guquĕ' xuzi Booz, na' lao zna'nĕ' Rahab. Na' Booz guquĕ' xuzi Obed, na' lao zna'nĕ' Rut. Na' Obed guquĕ' xuzi Isai. ⁶ Na' Isai guquĕ' xuzi rey David, na' rey David lĕnĕ' zgula Urias gucajĕ' xuzi zna' Salomón.

⁷ Na' Salomón guquĕ' xuzi Roboam, na' Roboam guquĕ' xuzi Abías, na' Abías guquĕ' xuzi Asa. ⁸ Na' Asa guquĕ' xuzi Josafat, na' Josafat guquĕ' xuzi Joram, na' Joram guquĕ' xuzi Uzías. ⁹ Na' Uzías guquĕ' xuzi Jotam, na' Jotam guquĕ' xuzi Acáz, na' Acáz guquĕ' xuzi Ezequías. ¹⁰ Na' Ezequías guquĕ' xuzi Manasés, na' Manasés guquĕ' xuzi Amón, na' Amón guquĕ' xuzi Josías. ¹¹ Na' Josías guquĕ' xuzi Jeconías len ja bichinĕ' tiempo cati unita' ben' Babilonia cati yahua'ajĕ' preso ben' Israel lao yedyi quiejĕ'.

¹² Te beyudyi na', Jeconías guquĕ' xuzi Salatiel, na' Salatiel guquĕ' xuzi Zorobabel. ¹³ Na' Zorobabel guquĕ' xuzi Abiud, na' Abiud guquĕ' xuzi Eliaquim, na' Eliaquim guquĕ' xuzi Azor. ¹⁴ Na' Azor guquĕ' xuzi Sadoc, na' Sadoc guquĕ' xuzi Aquim, na' Aquim guquĕ' xuzi Eliud. ¹⁵ Na' Eliud guquĕ' xuzi Eleazar, na' Eleazar guquĕ' xuzi Matán, na' Matán guquĕ' xuzi Jacob. ¹⁶ Na' Jacob guquĕ' xuzi José, ben' quie María, na' María guquĕ' zna' Jesús, ben' naca Cristo.

¹⁷ Lao tiempo uzu Abraham hasta bdyinnan tiempo uzu rey David, udaohue chida' tiempo unita'jĕ'. Lĕscan' lao tiempo uzu rey David hasta bdyinnan tiempo yehua'a ben' Babilonia ben' Israel preso yedyi quiejĕ', udaohue itu chida' tiempo unita'jĕ'. Lĕscan' lao tiempo yehua'a ben' Babilonia ben' Israel preso yedyi quiejĕ' hasta bdyinnan tiempo golo Cristo, udaohue itu cue' chida' tiempo unita'jĕ'.

Ni rnĕn cati golo Jesucristo
(Lc. 2.1-7)

¹⁸ Caora cati golo Jesucristo guca caniga: Zna'nĕ' María napĕ' compromiso utzagana'lĕnĕ' José. Pero antes binesi' laguedyijĕ' sujĕ' tuze, caora na' gucabĕ' José banu'a María xcuidi'. Pero por nun quie Bichi Be quie Diuzi nu'anĕ' xcuidi'. ¹⁹ José naquĕ' ben' huen bire'ennĕ' gaohuĕ' María xquia lao yedyi. Re'ennĕ' usannĕ' lĕnĕ' sin que inezi ja benĕ'. ²⁰ Tu racanĕ' pensari bi huenĕ', cati ptilalao tu ángel quie Diuzi lĕnĕ' lao bichi gala quiĕ'. Na'ra una ángel rĕbinĕ' lĕbĕ':

—José, ži'i suba David luĕ', bidzebo' siu' María gacanĕ' žgulo', porque nun quie Bichi Be quie Diuzi banu'anĕ' xcuidi'. ²¹ Lĕbĕ' su tu ži'inĕ', na' huelo' laobi' JESUS. Cana' huelo' laobi' porque ži'inĕ' ute uselabi' dula' xquia quie ben' yedyi quiebĕ'.

²² Yugulu cabĕ' guca na', bzunan di'idza' quie Diuzi cabĕ' una Diuzi lao na'a tu ben' udxogue' xti'idza'nĕ' tiempote. Cani unĕ' dza na':

²³ Huazu tu nigula cuidi', ben' binesulë be'mbyu, hua'anë' tu ži'inë'.

Na' si' laobi' Emanuel.

Ta inaro xti'idza'ro: Zëlë Diuzi ra'o.

²⁴ Cati udelebë José lao bichi gala quienë', bënë' cabë' gudyi ángel quie Diuzi lëbë'. Aoji'në' María para žgulanë'. ²⁵ Pero biuzulënë' lëbë' cabë' rzulë ja benë' žgulažë' hasta que golo ži'inë' nëro. Na' bënë' lao ži'inë' JESUS.

2

Uyo ben' psëdi quie bélo yena'jë' Jesús

¹ Cati golo Jesús lao yedyi Belén ga nebaba Judea, caora na' uzu tu ben' lao Herodes naquë' rey. Na'ra bdyin ja ben' za' zaca' ga rlë obidza, bdyinjë' ciudad Jerusalén. Nacajë' ben' psëdi quie bélo. ² Na'ra unabajë':

—¿Gaži zu rey quie ben' Israel, ben' zagolo? Nita'ndo' zaca' ga rlë obidza blë'ëndo' bélo ta naca seña golobi'. Quie lena' za'ndo' ta gapala'nndo'bi'.

³ Cati unezi rey Herodes cabë' unayaquë', lega ptëbi pensari quienë' lëbë'. Lëscan' yugulu ja ben' ciudad Jerusalén, lega ptëbi pensari quiejë' lëjë'. ⁴ Na'ra guži rey Herodes yugulu ja xan' pxuzi len ja ben' rusëdi ja ley rnao ben' Israel. Na' unabanë' rëbinë' lëjë':

—¿Gan' galo ben' naca Cristo?

⁵ Na' ra unajë' rëbijë' lëbë':

—Galoguë' yedyi Belén ga nebaba Judea, porque caní rnën lë'ë guichi bë profeta dza na'te:

⁶ Le'e ben' yedyi Belén quie yu nebaba Judá, ba'ala'cazi naca yedyi quiele yedyi dao', hualo ladole tu ben' inabë'ra, ben' inabë' ben' Israel, ben' quie Diuzi.

Cana' rnën lë'ë guichi.

⁷ Na'ra balarazi guži rey Herodes yaca ben' psëdi quie bélo. Unabanë' lëjë' dyë'di bi tiempo golo bélo. ⁸ Na' use'ela'në' lëjë' Belén rëbinë' lëjë':

—Uletzio Belén inabale dyë'di bi raca quie xcuidi'. Cati babedzelelebi' nadetixogue'le në'ëdi' tacuenda guidaria' gapala'na'bi'. —Cana' unanë' rëbinë' lëjë'.

⁹ Te beyudyi una rey Herodes gudyijë' lëjë' cana', na'ra zio ben' psëdi quie bélo. Na'ra lëbélo blë'ëjë' caora nita'jë' zaca' ga rlë obidza, udyialaona laojë' hasta que bdyinnan laohue ga zu xcuidi'. ¹⁰ Cati blë'ëjë' ga bdyin bélo, lega bedaohuetzeguejë'. ¹¹ Caora uyu'ujë' lu'u yu'u, blë'ëjë' xcuidi' lëbi' zna'bi' María. Na'ra uditzužibijë' udapala'një' bdao' na'. Na'ra laosalotejë' caja quiejë' nu'ajë', bë'jë'bi' regalo ta nu'ajë', bë'jë'bi' oro len yalo len ja aceite žio.

¹² Beyudyi na', guca tu chopa dza nita'jë' na' cati uxusajë' de que bireya'ala' yeyojë' gan' uza'jë', gan' re' rey Herodes. Quie lena' uži'jë' neza tula zeyojë' yedyi quiejë'.

Bzuno José lënë' familia quienë' yedyi tula

¹³ Ude beyudyi beza' ja ben' psëdi quie bélo yena'jë' xcuidi', na'ra uxusa José blë'ënë' tu ángel quie Diuzi rëbinë' lëbë':

—Uyasabachi' udë'ëla' bdao' na' len zna'bi'. Užunolëlo'bi' tziola'obi' yu nebaba Egipto. Na' yega'nla'obi' hasta que inia' luë' gala tzio', porque rey Herodes hueguiloguë'bi' ta gutië'bi'.

¹⁴ Na'ra udelebë José, uyananë', uži'në' xcuidi' len zna'bi' lao rëla ziojë' yu nebaba Egipto. ¹⁵ Na'zi bega'një' ulezajë' uzujë' hasta que bdyin hora guti rey Herodes. Cana' guca tacuenda bzu di'idza' quie Diuzi cabë' gudyinë' profeta rëbinë' lëbë' caní: “Yu nebaba Egipto babeyëža' ži'ina' yerobi'.”

Na'ra bē rey Herodes mandado gati ja xcuidi'

¹⁶ Cati gucabē' rey Herodes uzi' ja yē' ben' psēdi quie bélo, na'ra bdza'nē', bēnē' mandado gati ja xcuidi' de chopa iza huio para žanle, bi' necua' Belén len ja bi' necua' yedyi rega'n ga'ala'. Cana' bēnē' mandado según cabē' tiempo una ja ben' psēdi quie bélo gudyijē' lēnē'. ¹⁷ Cana' bzu di'idza' quie profeta Jeremías caora unē':

¹⁸ Yero tu rchi' ja ben' yedyi Ramá, rbedyijē' rnaya'jē'. Na' rbedyi ja nígula quie ja ben' Israel por nun quie ži'ijē'. Bireyudyicazi cuedyijē' ta yezujē' gusto dan' aguti ži'ijē'.

¹⁹ Pero bē' beyudyi guti rey Herodes, caora na' ptilalao tu ángel quie Diuzi lao bichi gala quie José ga zunē' yedyi nebaba Egipto. Na'ra gudyinē' lēbē':

²⁰ —Uyasa, uzi'lē xcuidi' len žna'bi'. Uleyozi lao yedyi nebaba Israel, porque aguti yaca ben' re'en guti xcuidi'.

²¹ Na'ra uyasa José uzi'nē' xcuidi' len žna'bi', ziolēnē' lēbi' lao yedyi ga nebaba Israel. ²² Pero cati unezi José rnabē' Arquelao lao laza xuzinē' Herodes, na'ra bdzebinē' yeyonē' na'. Bdzebinē' como dan' aoxusanē' ta bitzionē' estado Judea. Quie lena' zionē' estado Galilea. ²³ Caora bdyinnē' na', na'ra zionē' tzesunē' yedyi Nazaret. Cana'ra bzu di'idza' quie ja profeta ca unajē' de quie ina ja benē' naca Jesús ben' yedyi Nazaret.

3

Udixogue' Juan bautista xti'idza' Diuzi lao lato dachi ga bidyia yu'u (Mr. 1.1-8; Lc. 3.1-9, 15-17; Jn. 1.19-28)

¹ Na'ra uyo Juan bautista yu nebaba Judea ga naca lato dachi. Uyonē' yetixogue'nē' ja benē' xti'idza' Diuzi. ² Na'ra nē' rēbinē' lējē':

—Reya'ala' utza'le pensari quiele usanle ca tamala ruele, porque baruen bago dza inabē' Diuzi lao yedyi layu.

³ Quie Juan unē' profeta Isaías caora unē': Huazu ben' na' lao lato dachi ga bidyia yu'u. Huanē' zidzo rēbinē' laguedyiné' caniga:

“Huele hueluba neza quiele cuenda huida ben' naca xa'nro, usalole tu neza li.”

⁴ Guco Juan la'ari' de guitza' quie žaba camello. Na' tu cincho guidi bdze'nē' lē'ēnē'. Udaonē' bēchi'zu, hue'enē' bdyin'dao' quie bezu cera ta rdzela guixi' dao'. ⁵ Na' rio ja ben' Jerusalén rena'jē' ruzēnagajē' quienē'. Lēzi rio ja ben' yedyi nebaba Judea len ja ben' nita' ga'ala' ga de yao Jordán. ⁶ Caora na' cati uxubalēpijē' dula' xquia quiejē', na'ra bē' Juan laojē' lu'u yao Jordán.

⁷ Cati blē'ē Juan bdyin ja ben' partido fariseo len ja ben' partido saduceo za'jē' gan' ru'e Juan lao ja benē', na'ra nē' rēbinē' lējē':

—¡Ca bēla rgui'idyi' benē' nacale! ¿Nuži udixogue' le'e ta te ilale cabē' castigo quie Diuzi baza' ga'ala'zi? ⁸ Ulehue dya'a ta ulu'en nacan li aotza' pensari quiele, aruele quie Diuzi. ⁹ Bihuele pensari bihue Diuzi le'e castigo por nun quie nacale ži'i suba Abraham. Porque rnia' le'e hasta yo huaca hue Diuzi ben' gaca ži'i Abraham. ¹⁰ Ca quie yebandyo baden listo para ichugon yaga ta birbia tazixi ta tzeina, cana' nacarēn quiele. Chi bihue quiele xti'idza' Diuzi ca rnēnē', huata' castigo quiele tzirole lao gui' gabila. ¹¹ Nē'ēdi' tali ru'a lao benē' conlē nisa yela' gacajē' seña de que aotza' pensari quiejē' aruejē' quie Diuzi. Pero baza' tu ben' zaza'ra ženao nē'ēdi'. Lēbē' udze'nē' Bichi Be quie Diuzi lu'u guicho laxta'o ja ben' rale quienē'. Lēzi huenē' mandado

tzei yaca ben' birale quienè' lao gui' gabila. Nacarè' ben' ze ca nè'èdi'. Tanto nacarè' ben' ze ca nè'èdi', ni siquiera biyeyazoga' cuioga' guidi yu'u ni'anè'.
¹² Bazènè' becue' ta ucha'anè' trigo len bèbi quien. Na'ra yezi'chi'nè' trigo lu'u lidyin. Yeyudyin na' uzeinè' bèbi quien lao gui' ta biyeyulacazi.

Bè' Juan lao Jesús

(Mr. 1.9-11; Lc. 3.21-22)

¹³ Na'ra uza' Jesús yu nebaba Galilea bdyinnè' ga de yao Jordán ga zu Juan cuenda hue' Juan laonè' lèbè'. ¹⁴ Na' bigu'un Juan hue'nè' lao Jesús. Lena' unè' gudyinè' Jesús:

—Luè'la reya'ala' hue'lo' laohua'. ¿Na' como bazao' niga ta hua' laolo'?

¹⁵ Na'ra una Jesús rëbè' Juan:

—Reya'ala'cazi hue'lo' laohua', porque cana' re'ennan huero ta uzuro duze cabè' una Diuzi.

Na'ra guca Juan de acuerdo, bè'nè' lao Jesús. ¹⁶ Na'ra beyudyi bè' Juan lao Jesús, bero Jesús lu'u nisa. Caora na' laoyalote guibá blè'è Jesús uyèzi Bichi Be quie Diuzi ca quie ga rèzi paloma. Bdyinnè' ga zè Jesús. ¹⁷ Na'ra unè' Diuzi ga zuè' guibá unè':

—Lèzi'ina' ni, nedyè'èda'bi'. Redaohueda' zua' gusto conlè lèbi'.

4

Gu'un xan' taxi'ibi' iquixi Jesús huenè' tamala

(Mr. 1.12-13; Lc. 4.1-13)

¹ Na'ra guca dza uquiè' Bichi Be quie Diuzi Jesús lao lato dachi ga bidyia yu'u. Na' lao lato na' bdyinrè xan' taxi'ibi' gu'unna iquixi Jesús huenè' tamala.

² Lègan' na' bega'n Jesús chopa galo dza len chopa galo yela, biudaohuè'. Bè' guca lao chopa galo dza, na' uduenè'. ³ Na'ra ubiga' xan' taxi'ibi' gan' zè Jesús rëbina lènè':

—Chi naco' zi'i Diuzi, bè mandado iyaca yo niga yèta xtila.

⁴ Na'ra una Jesús rëbinè' taxi'ibi':

—Lè'è guichi la'iya quie Diuzi nan ca niga: “Quele tuzi yela' huao gaoro yezi'ro fuerza, den' lèscan' ruen dyiabè' hue quiero ca na Diuzi ta yezi'ro fuerza.”

⁵ Na'ra uquiè' taxi'ibi' Jesús lao yedyi la'iya Jerusalén. Na'ra pcuëna lènè' guicho idao' rnabè'ra. ⁶ Na' rëbinan lènè':

—Chi tali naco' zi'i Diuzi, uquino cuinlo' guicho idao'. Bibi zi' gaquelo', como dan' na guichi la'iya quie Diuzi ca niga:

Ise'ela' Diuzi yaca ángel quienè' ta gapajè' luè'.

Huidajè' idehuia ina'jè' luè' cuenda ni lè'èti' bigaco' zi' chan' na' ga re' yo.

⁷ Na'ra una Jesús gudyinè' xan' taxi'ibi':

—Lèzi narè lè'è guichi la'iya quie Diuzi: “Bihuenèle Diuzi bizinaquezi chi uzunè' di'idza' cabè' unè', chi biuzunè' di'idza' cabè' unè'.”

⁸ Tatula uquiè'cazi taxi'ibi' lènè' lao ya'a sibi gula. Blu'enan lènè' duzete yedyi de lao yedyi layu. Blu'enan lènè' cabè' naca yela' ze quien. ⁹ Na'ra una xan' taxi'ibi' rëbin lènè':

—Duzeten guna' quio' chi quitzo' žibo' tzionla'adyo' nè'èdi'.

¹⁰ Cana'ra una Jesús rëbinè' lènan:

—Beyo, Satanás, porque lè'è guichi la'iya quie Diuzi nan caniga: “Tzionla'adyi'ro tuzi Diuzi quiero. Tuzi lèbè' huero ca mandado ruenè' quiero.”

¹¹ Na'ra zeyo taxi'ibi' gan' zë Jesús. Na' laza'te ja ángel, gualajë' lëbë' ta yezi'në' fuerza.

*Uzulao Jesús ruenë' dyin quie Diuzi estado Galilea
(Mr. 1.14-15; Lc. 4.14-15)*

¹² Cati unezi Jesús de Juan lu'u dyiguiba, bebi'në' zeyoguë' yu nebaba Galilea. ¹³ Pero bibega'nnë' yedyi Nazaret, uyoguë' yesunë' yedyi lao Capernaum ga re' ru'a lagun ga naca beza' quie yu nebaba Zabulón len yu nebaba Neftalí. ¹⁴ Cana' guca ta bzu di'idza' quie Diuzi bzu profeta Isaías lë'ë guichi tiempote. Cani rnën:

¹⁵ Lao yu nebaba Zabulón len yu nebaba Neftalí, ga de neza zion ru'a lagun itzala' yao Jordán, ga re' yu nebaba Galilea, lao yu na' nita' ben' binaca ben' Israel.

¹⁶ Lëja ben' na' rdajë' lao lato lao chula, pero aose'ela' Diuzi ben' gacalë lëjë' cabë' racalë xni' gui' lëjë' ta ilë'ëjë' ga naca chula.

Lëja ben' na' rdajë' lao lato lao chula, pero use'ela' Diuzi ben' gacalë lëjë' cabë' racalë xni' gui' lëjë' ta ilë'ëjë' ga naca chula.

¹⁷ Caora na' uzulao Jesús udixogue'në' benë' xti'idza' Diuzi unë':
—Reya'ala' utza'le pensari quiele, porque baruen bago dza inabë' Diuzi lao yedyi layu.

*Blidza Jesús tapa ben' rze bela
(Mr. 1.16-20; Lc. 5.1-11)*

¹⁸ Zio Jesús yu'unë' neza zaca' ru'a lagun Galilea. Na' blë'ënë' chopa ben' rze bela. Tunë' laonë' Simón, ben' laorë Pedro. Na' itunë' laonë' Andrés. Naca Andrés bichi Simón. Na' yu'ujë' rulëtojë' yëxo lu'u nisa. ¹⁹ Na'ra una Jesús gudyinë' leyaquë':

—Ulenao në'ëdi'. Cabë' ruele cuiole bela yu'u lu'u nisa, cana' ulu'ena' le'e cuiole ben' nao xneza Diuzi.

²⁰ Laohue na'tezi lapsantejë' yëxo quiejë' ziolëjë' Jesús.

²¹ Lë'ëti'zi ude Jesús zioquë' mazara cati blë'ënë' ichopa ja benë' naca bichë'. Tunë' laonë' Santiago, itunë' laonë' Juan. Nacayaquë' zi'i Zebedeo. Yu'ujë' lao barco len xuzijë' ruda'jë' yëxo quiejë'. Na'ra blidza Jesús lëjë' ta unaojë' lëbë'. ²² Na'ra lapsanrëtejë' barco len xuzijë' ziolëjë' Jesús.

*Bzioñë'e Jesús ben' zë
(Lc. 6.17-19)*

²³ Zio Jesús yugulu yedyi nebaba Galilea. Ruzioñë'enë' benë' lu'u idao' quiejë' laonan sinagoga tu tu yedyi ga rdenë'. Udixogue' Jesús ca naca tahuen quie xti'idza' Diuzi baruen bagozi dza inabë' Diuzi yedyi layu. Lëscan' beyue Jesús yugulu cue' yela' hue' yu'u ja benë'. ²⁴ Nezijë' quie Jesús yugulu ben' nita' yedyi nebaba Siria. Na' uquië'jë' yaca ben' redzagalaoja bitezi yela' hue', len ben' yu'u ja taxi'ibi', len ben' raca žuguti, len ben' naži. Na'ra beyue Jesús lëjë'. ²⁵ Zë ja ben' unao Jesús. Unao ben' yedyi nebaba Galilea, len ben' yedyi nebaba Decápolis, len ben' ciudad Jerusalén, len ben' yedyi nebaba Judea, len ben' nita' yedyi re' itzala' yao Jordán. Tu cana' ja yedyi udaojë' lënë'.

5

Zu Jesús tu lao ya'a ruzioñë'enë' benë'

¹ Cati blë'ë Jesús babegu'udi' ben' zë, na'ra urënë' tu lao ya'a ure'në'. Na'ra beyëcho ja ben' quienë' lënë'. ² Cana' uzulao Jesús ruzioñë'enë' lëjë'.

Ni rnēn quie nu ja ben' huaca huen quie lao Diuzi
(Lc. 6.20-23)

Na' una Jesús:

³—Yedaohue nu yaca ben' raca yēchi' ca naca dula' xquia quie, dan' naque quiejē' ga rnabē' Diuzi. ⁴Yedaohue nu yaca ben' raque bayēchi' quie dula' xquia ta raca lao yedyi layu, dan' yeyuezelala'adyi' Diuzi lējē'.

⁵Yedaohue nu yaca ben' gaxo, dan' gaque quieyaquē' layu gan' una Diuzi hue'nē' lējē'.

⁶Yedaohue nu yaca ben' re'en inao xneza Diuzi cabē' re'en gao yo'o nu ben' rdue rbili, dan' Diuzicazi gacalēnē' lējē' ta inaoyaquē' xnezē'.

⁷Yedaohue nu yaca ben' reyēchi'la'adyi' ben' tula, dan' yeyēchi'la'adyi' Diuzi lējē'.

⁸Yedaohue nu yaca ben' anaca yēri laxta'ohue, dan' hualē'ēyaquē' Diuzi.

⁹Yedaohue nu yaca ben' rue dyiabē' cue' chizi laxta'o benē', dan' huēbi Diuzi leyaquē': "Zi'ina' le'e."

¹⁰Yedaohue nu yaca ben' racatzegue tamala quie por nun quie ruejē' ca re'en Diuzi, dan' naque quiejē' ga rnabē' Diuzi.

¹¹Yedaohuele le'e cati inaya' benē' le'e huenējē' le'e bizinaquezi, si'jē' le'e yē', inējē' quiele por nun quie naole xneza'. ¹²Yedaohuele sule gusto como dan' huata' tu tahuen gula quiele gun Diuzi le'e guibá. Yaca ben' profeta, ben' use'ela'Diuzi, bizinaquezi psaca'rē ja benē' lējē' dza tiempote tu binenita'le.

Ca quie zedi', ca quie gui', naca ben' nao xneza Jesús
(Mr. 9.50; Lc. 14.34-35)

Na' una Jesús:

¹³—Ca quie nu zedi' naca quiele. Pero chan' na' abeyula zedi', ¿bizi huero ta huen dyin tatula? Bira guē'ennan huenan dyin. Anacan zi ta chu'unron ta utzutzu ulio benē' len.

¹⁴'Ca quie nu gui' ta ilē'ē benē' ga naca chula, cana' naca quiele. Tu yedyi re' lao ya'a, bigaca igüi'onan ta biilē'eron. ¹⁵Nunu rusē gui' candil uzulen ta iseni'na lu'u cajón. Reya'ala' uzēron tu lu'u yu'u ga naca sibi cuenda ilē'ē ja yugulu ben' yu'u lu'u yu'u. ¹⁶Cana' naca quiele, reya'ala' tale dyē'ēdi lao ja benē' tacuenda ilē'ējē' ruele tadya'a ca re'en Diuzi huele. Cana' hue ja benē', huejē' ben' ze Xuziro Diuzi, ben' zu guibá.

Udixogue Jesús cabē' naca lao ley

Na' una Jesús:

¹⁷—Bigaquele chi za'a chu'una' ley quie Diuzi ta bē'nē' Moisés. Quele za'a chu'una' cabē' ta una ja profeta, dechan' za'a ta uzua' di'idza' cabē' bzujē' lē'ē guichi la'iya quie Diuzi. ¹⁸Tali ca rnía' le'e, tu lala nede guibá len yedyi layu, ni lē'ēti' ta rna lao ley biten cana'zi. Uzu di'idza' quien yugulute ca rnan. ¹⁹Quie lena' nu ben' birue bala ruzu di'idza' ca mandado rue lē'ē guichi la'iya quie Diuzi, lēscan' rusēdijē' ben' tula ta bihuejē' bala ca mandado ruen, nacajē' ben' latoquiēzi ga rnabē' Diuzi guibá. Pero nu ben' rue bala ruzu di'idza' ca mandado rue lē'ē guichi la'iya quie Diuzi, lēscan' rusēdijē' ben' tula ta huejē' bala ca mandado ruen, nacajē' ben' bala'ana ga rnabē' Diuzi guibá. ²⁰Porque rnía' le'e, chi bihue quiele quie Diuzi dya'ara, quele cabē' rue ja ben' rusēdi ley quie Moisés len ja ben' partido fariseo, bisaque' yeyole ga rnabē' Diuzi guibá.

Una Jesús quie yela' rdza'
(Lc. 12.57-59)

Na' una Jesús:

²¹ —Banezile ca gudyi Moisés xuzixta'oro: “Bireya'ala' gutile benè'. Nutezi ben' ruti benè', reya'ala' ichugobè'le quiè'.” ²² Pero nè'èdi' rnia' le'e, nutezi ben' idza' bichi laguedyi, huachugobè' Diuzi quiè'. Lèscan' nutezi ben' inaya' bichi laguedyi, huarugobè' quiè' ga reyudyi yela' rnabè'. Lèscan' nutezi benè' idza' bichi laguedyi yèbinè' lèjè': “Ben' raca loco luè” žudyizi ruen quienè' tzionè' lao gui' gabila.

²³ ‘Chi zio' nu'alo' gun quio' ru'aba lu'u idao', na' yeza'la'adyo' de ta de quie bichi laguedyo' conlè luè', ²⁴ na'ra pca'n gun quio' lao ru'aba na'zi, zatzio' tzeguè'žela'adyo' bichi laguedyo'. Na'tera yebi'lo' hue'lo' gun quio' lao ru'aba.

²⁵ ‘Chi nu ben' rao xquia le'e, iquiè'jè' le'e lao juzgado, tu neziote tu neza, bè'lè di'idza' bichi laguedyile, a ver nacala yega'nle yela' bitziole lao juez. Porque si no, hue juez mandado policía quiè', udze'jè' le'e lu'u dyiguiba. ²⁶ Di'idza' li rnia' le'e, biyerole lu'u dyiguiba hasta que udyiale dumi ca ta inaba juez le'e.

Una Jesús quie ben' rda'le nigula tula, ben' binaca zgule

Na' una Jesús:

²⁷ —Banezile cabè' una xuzixta'oro Moisés cana'te: “Bireya'ala' talèle nigula tula.” ²⁸ Pero nè'èdi' rnia' le'e, nutezi ben' rebane ja nigula re'ennè' bi huenè' lènè' nigula, na' lu'u guicho laxta'ohuè' nacan ca quie bagusilècazinè' lènè'.

²⁹ ‘Pues ugunro chi tu laolo' yebè ruhua'n luè' dula' xquia, reya'ala' cuiolo'n chu'unlo'n zitu', como dan' dya'alan' initi tu laolo', quele ca ta tzio' dužetio' lao gui' gabila. ³⁰ Lèzi ugunro chi na'alo' yebè ruhua'n luè' dula' xquia, reya'ala' ichugo'n uru'unnan, como dan' dya'alan' initi tu na'alo' quele ca ta tzio dužetio' lao gui' gabila.

Una Jesús quie ben' rusan ja nigula quie

(Mt. 19.9; Mr. 10.11-12; Lc. 16.18)

Na' una Jesús:

³¹ —Lèscan' una xuzixta'oro Moisés dza na'te: “Nutezi ben' re'en usan nigula quie, reya'ala' ichisanè' guichi ga ru'en di'idza' bira re'ennè' sulènè' nigula. Reya'ala' hue'nè'n nigula quienè', na'tera huazaquè' usannè' nigula quienè'.” ³² Pero nè'èdi' rnia' le'e, chi nu ben' rsan žgulè, na' bezi' žgulè' be'mbyu tula, nacan xquia quie nigula na' lao Diuzi. Solamente chan' udalè žgulè' be'mbyu tula, cana'ra huazaque' usan be'mbyu na' žgulè'. Lèscan' nutezi ben' bezi' nigula psan xquiuhue, nacan xquia quienè' lao Diuzi.

Bireya'ala' ugunro Diuzi ca cuendazi

Na' una Jesús:

³³ —Lèscan' banezile ca una Moisés gudyinè' xuzixta'oro: “Reya'ala' uzulo' di'idza' cabè' unao' huelo' bguntio' Diuzi.” ³⁴ Pero nè'èdi' rnia' le'e, bireya'ala' ugunle Diuzi ca cuendazi. Biugunle nu guibá, porque dan' ga re' Diuzi rnabè'nè'. ³⁵ Cana'rè biugunrèle nu yedyi layu, porque dan' ga ruzu ni'a Diuzi. Biugunrèle ciudad Jerusalén, porque dan' ciudad quie Diuzi. ³⁶ Lèzi biugunrèle guichole, porque quele huacale utza'le gacan bezèri gaso ni tu guitza' guichole. ³⁷ Tuzi iquèbile inale tali. Chi inèro ugunro Diuzi ca cuendazi, quie taxi'ibi' za'n dan' rnèro cana'.

Una Jesús quie ben' yeyue laohue quie laguedyijè'

(Lc. 6.29-30)

Na' una Jesús:

38 —Lëscan' banezile cabè' una xuzixta'oro Moisés dza na'te: “Chi nu ben' bdyiagui'nè' tu laolo', o tu leilo', o bi ta de quio', napo' derecho udyiagui'lo' tu laohuè', o tu leiyè', o bi ta de quiè' tacuenda iyaca laohue quiè'.” 39 Pero nè'èdi' rnia' le'e: Biyeyuele laohue quie ja ben' rue mala quiele. Chi nu ben' aodapa xago', bè'le lato capè' itzala' xago'. 40 Chi nu ben' hueja cuenda luè' lao ja ben' rnabè' ta si'nè' camisa quio', bè'rè'nè' len chamarra quio'. 41 Chi nu ben' ruegadyi luè' hua'alo' yua' quienè' tu legua, bi'alan chopa legua. 42 Chi nu ben' rnabayèchi' luè' bi cosa, bè'nè'n. Chi nu ben' rnaba presta bi ta de quio', bihuelo' zidi, bè'nè'n ta rnabè'.

Una Jesús quie yaca ben' rudie ra'o

(Lc. 6.27-28, 32-36)

Na' una Jesús:

43 —Lëscan' banezile ca una xuzixta'oro dza na'te: “Edyè'ële amigo quiele, udiele ben' rudie le'e.” 44 Pero nè'èdi' rnia' le'e: Edyè'ëlale ben' rudieja le'e. Inabale tahuen lao Diuzi quie ja ben' rudze'de' le'e. Huele dya'a quie ja ben' rudie le'e. Ulehue'lè Diuzi di'idza' inabale tahuen quie ja ben' rnaya' dilalè le'e. 45 Cana' gacale dugalo zi'i Xuziro Diuzi zu guibá. Cana' rue Diuzi lènè' obidza quiè'. Useni'nan duzete yedyi layu ga nita' ja ben' mala len ja ben' huen. Na' rse'ela'rè' nisa yo quiè' lao ja benè', la'acazi ben' rue tadya'a, la'acazi ben' rue tamala. 46 Chi rapachi'le tuzi ben' rapachi' le'e, biugunle rlè'è Diuzi le'e ben' laxta'o yèri por nun quie ruele cana'. Porque cana' ruerè hasta ben' malaja, ben' binao xneza Diuzi. 47 Chi rda rnè'ële tuzi ja ben' nubè'zile, biugunle tadya'a gula ruele. Porque hasta ben' binuebè' Diuzi ruerèjè' cana'. 48 Reya'ala' gacale ben' laxta'o yèri cabè' naca Xuziro Diuzi zu guibá ben' laxta'o yèri.

6

Bzioñe'e Jesús ra'o cabè' re'ennè' huero

1 Na' una Jesús:

—Reya'ala' huele cabè' re'en Diuzi huele du guicho du la'adyi'le, pero bi-huelen tacuendazi ta ilè'è benè' le'e nacale ben' huen. Chi huelen tacuendazi ta ilè'è benè' le'e nacale ben' huen, bigata' quiele ta gun Xuziro Diuzi le'e ga rnabè' guibá. 2 Lena' cati gacalèle ben' rdziogue bi cosa, biulu'etele ladza inale cani bia' cabè' rue ja ben' rionla'adyi' Diuzi de ladzazi caora riojè' lu'u idao', caora rdajè' tu neza. Cana' ruejè' tacuenda inè benè' quiejè' dya'a. Pero tali ca rnia', tana'zi de babèjè' gan, bibira de hue' Diuzi lèjè' ga rnabè' guibá. 3 Pero le'e cati gacalèle ben' rdziogue bi cosa, biulu'etele ladza yela' binezi ja benè' chi bi ruele, ba'ala'cazi ben' naca bichile. 4 Dya'alan' gacalèle benè' balarazi. Na' Xuziro Diuzi rlè'ènè' cabè' tadya'a ruele balarazi, lènè' gunnè' quiele ga rnabè' guibá.

Bzioñe'e Jesús ra'o cabè' reya'ala' huero hue'lèro Diuzi di'idza'

(Lc. 11.2-4)

Na' una Jesús:

5 —Cati hue'lèle Diuzi di'idza', bihuele ca rue ja ben' rionla'adyi' Diuzi de ladzazi. Lega raxejè' hue'lèjè' Diuzi di'idza' zètela lu'u idao'. Cana' ruejè' con ga ziojè' zaca'lao ja benè'. Pero tali ca rnia', tana'zi de babèjè' gan'. Bibira de hue' Diuzi lèjè' ga rnabè' guibá. 6 Pero cati hue'lèle Diuzi di'idza', reya'ala' ucu'ole tu tule tu ga negachi'. Tuzile conlè Xuziro Diuzi hue'lèlènè' di'idza'. Na' Xuziro Diuzi rlè'ènè' cabè' tadya'a ruele balarazi, lènè' gunnè' quiele ga rnabè' guibá.

⁷ 'Cati hue'lèle Diuzi di'idza', biinale di'idza' ladzazi, bihuele zètela di'idza' cabè' rue ben' binuebè' Diuzi. Ruejè' pensari chi uzènaga Diuzi quiejè' nun quie dan' ru'elèjè' Diuzi di'idza' zètela. ⁸ Bihuele cabè' rue lèjè', porque dan' Xuziro Diuzi banezinè' bidan' rdzioguele cati zainabale laohuè'. ⁹ Lena' reya'ala' hue'lèle Diuzi di'idza' cani:

Xuzindo' Diuzi zulo' guibá, naca la'ia laolo'.

¹⁰ Rbezando' guida dza inabè'lo' lao yedyi layu cabè' r nabè'lo' guibá ga zulo'.

¹¹ Guno' ta gaondo' quie na'adza cabè' ta rdzioguendo'.

¹² Bezi'ze quiendo' cabè' tamala babèndo' cabè' rezi'zendo' tamala bè ja benè' len nètò'.

¹³ Gacalao' nètò' ta biiguinondo' lao tamala, ucuasa ucu'olo' tamala za' gaca quiendo'.

Porque tuzo' luè' naco' ga zelaozi yela' r nabè' quio', ga zelaozi yela' huaca quio', ga zelaozi yela' ze quio' tuzioli. Amén.

¹⁴ 'Cana' rnia' le'e porque chi le'e rzi'zele quie ja ben' rueja tamala quiele, lèscana' huazi'zerè Xuziro Diuzi zu guibá quiele. ¹⁵ Pero chi bisi'zele quie laguedyile, bisi'zerè Xuziro Diuzi dula' xquia quiele.

Bzioñe'e Jesús ra'o cabè' reya'ala' huero ubasi

Na' una Jesús:

¹⁶ —Cati huele ubasi, bihuenèlaole bayèchi' cabè' rue ben' rionla'adyi' Diuzi de ladzazi. Lèjè' ruzutelaojè' bayèchi' tacuenda ilè'è ja benè' ruejè' ubasi. Pero tali ca rnia', tana'zi de babèjè' gan, bibira hue' Diuzi lèjè'. ¹⁷ Pero le'e cati huele ubasi, ulequibi laole, ulequin guichole dya'a. ¹⁸ Cana' huele tacuenda bigacabè' ja benè' de que ruele ubasi. Tuzi Xuziro Diuzi zulènè' le'e, gunnè' tadya' ga gula quiele guibá ga r nabè'nè'.

Udixogue' Jesús quie lao yela' uña'a
(Lc. 12.33-34)

Na' una Jesús:

¹⁹ —Bireya'ala' uzule guichole huele cuinle ben' uña'a lao yedyi layu ga reyulazin, ga rbiagu'zin, ga rban benè' len. ²⁰ Reya'ala' uzule guichole huele quie Diuzi tacuenda utupale yela' uña'a quiele guibá ga bireyulazin, ga birbiagu'zin, ga bisaque' cuan benè' len. Chi huele cana', nacale ca quie yela' uña'a lao Diuzi. ²¹ Pues ga rutupa ja benè' yela' uña'a quiejè', chi lao yedyi layu, chi guibá, lena' ulu'en ca bi pensari raquejè', chi quie cuinzijè', chi quie Diuzi.

Una Jesús quie pensari yani' quiero
(Lc. 11.34-36)

Na' una Jesús:

²² —Chi ru'ele lato raca guicho laxta'ole pensari dya'a, cana' sí, ruele tadya'a, neyani' pensari quiele rlè'èle racalèle benè'. ²³ Pero chi ru'ele lato zu guicho laxta'ole yela' zè', cana' sí, huele tamala, nechula pensari quiele, birlè'èle gacalèle benè'. Chi lao laza yu'ule pensari dya'a, na' ru'ele lato su guicho laxta'ole yela' zè', lena' naca mala gula quiele, nechulatzegue pensari quiele.

Ni rnèn cabè' naca quie Diuzi len dumi
(Lc. 16.13)

Na' una Jesús:

²⁴ —Nitu nunu saque' uzu chopaxa'ne, porque dan' udienè' tunè', na' itunè' idyè'èné', uzunè' di'idza' quie tunè', na' quie itunè' biuzunè' di'idza'.

Cana' naca quiero len Diuzi. Chi nuzu guichoro rza'la'adyi'ro dumi, bisaque' uzuro guichoro Diuzi.

Diuzi gunnë' yugulute ta rdzioguero
(Lc. 12.22-31)

Na' una Jesús:

²⁵ —Rnia' le'e, bidëbile quie ta yo'ole, quie ta gaole, quie ta tebanle, ni quie žaba quiele ta gacole. ¿Quele zaca'ra yela' neban quiero quele ca ta gaoro? ¿Quele zaca'ra cuinro quele ca žaba quiero? ²⁶ Ulena'cara cabë' rue ja bguini rdajaba' ladza. Birazajaba', birezi'jaba' usecho udze'tza'ojaba' gaojaba', nechan' Xuziro Diuzi zu guibá rugaonë'jaba'. ¿Binezile zaca'ra le'e quele ca lëjaba'? ²⁷ ¿Nuži ca le'e huaca huezu huele cuinle igatzó metro yela' huego' nun quie rdëbile quie ta rdzioguele?

²⁸ ¿Bixquien' rdëbile nacala gaca idzela žaba quiele? Ulena'cara cabë' re'eni ja yo guixi'. Biruejan dyin, biruejan la'ari' ta gaca žabajan. ²⁹ Nechan' rnia' le'e, ni rey Salomón, ba'ala'cazi guquë' ben' uña'a gula, bibdyinnë' sutza'ohuë' cabë' zutza'o ja yo guixi' badan gula. ³⁰ Ulena' cabë' rugaco Diuzi žaba guixi' badanzi ta de na'adza, ba'ala'cazi du uxezi uzei benë' len, ¿biži binezile ruetera Diuzi tadya'a quiele quele ca nu ja yo guixi'? Le'e rdzioguele sudyi'ilële Diuzi dyë'ëdi. ³¹ Lena' bireya'ala' idëbile inale: “¿Ga za' ta gao ta yo'oro? ¿Ga za' žaba quiero?” ³² Le'e bireya'ala' huele cana', porque dan' can' rue ja ben' binuebë' Diuzi. Rdëbijë' rdajë' quilojë' ga idzelejë' ta gaojë' len ta yo'ojë'. Pero cabë' le'e, zu Xuzile ben' zu guibá, nezinë' yugulute bidan' rdzioguele. ³³ Hue'le lato inabë' Diuzi le'e, huele ta yu'u ni'a xnezi quie Diuzi ca raxenë'. Na'tera gunnë' yugulute ta rdzioguele. ³⁴ Bidëbile chi bi tazëdi za' quiele du uxe du huidzo, porque durpende chan' du uxezi za'rë cuëchilile gacan' reglo. Tu dza tu dza rdëbile quien, huele pensari bi gaca ta cue'lina.

7

Bireya'ala' inëro quie laguedyiro
(Lc. 6.37-38, 41-42)

¹ Na' una Jesús:

—Bireya'ala' inële quie laguedyile, yela' biinë Diuzi quiele ca ruele. ² Con cabë' rlë'ële laguedyile, chi ben' huen, chi ben' mala, cana'rë ilë'ë Diuzi le'e. Con cabë' inële quie laguedyile, cana'rë inë Diuzi quiele ca ruele. ³ ¿Cómo nezile yegunni'ale bigazi tadao' mala rue benë', na' binezile yegunni'ale ca tamala gulatera ruele cuinle? ⁴ ¿Cómo yëbile laguedyile: “Bencara lato cuioga' bëbi dao' yu'u laolo’”, na' birnao' cuinlo' bichu yaga yu'u laolo'? ⁵ Le'e ben' rnë di'idza' ladzazi, zaolio bichu yaga yu'u laolo', na'tera ilë'ëlo' yebiolo' bëbi dao' yu'u lao laguedyile.

⁶ Bireya'ala' hue'le ja beco' ta naca la'iya quie Diuzi, porque biži chan' lalëžiba' yegui'imba' le'e. Lëscan' bireya'ala' chu'unle ta naca tatzao' quie Diuzi lao ja cuchi, porque biži chan' utzutzu ulioba'n.

Ni nan cabë' reya'ala' huelëro Diuzi
(Lc. 11.9-13; 6.31)

Na' una Jesús:

⁷ —Chi inabaro Diuzi bi cosa, gunnë'n. Chi rguiloro ta naca tali quie Diuzi, huadzeleron. Chi ulidzaronë', huequëbinë' quiero. ⁸ Cana' rnia' le'e, porque nu ben' rnaba lao Diuzi bi cosa, hue'në'n lënë'. Lëscan' nu ben' rguilo ta naca tali quie Diuzi, huadzelenë'n. Nu ben' rulidza Diuzi, huequëbinë' quienë'.

⁹ ¿Nuži le'e rna'le hue'le yola ži'ile lao laza ta rnababi' pan? ¹⁰ ¿Nuži le'e rna'le

hue'le bēlala zi'ile lao laza ta rnababi' bela? ¹¹ Chi le'e nacale ben' žē'ē, pero nezile hue'le tahuen zi'ile, iβizira Xuzi Diuzi zu guibá neziterē' hue'nē' tahuen ben' rnaba len laohuē'!

¹² Cabē' re'enle huelēle laguedyile le'e, cana' reya'ala' huerēle len laguedyile. Cana' ruen mandado quiele huele lē'ē guichi ley pca'n Diuzi lao na'a Moisés len guichi bē ja ben' uidxogue' xti'idza' Diuzi tiempote.

Quie lao chopa neza uidxogue' Jesús

(Lc. 13.24)

Na' una Jesús:

¹³ —Taguizi naca ru'a yu'u quie guibá. Lēru'a yu'u na' reya'ala' tzu'ule. Tažera naca ru'a yu'u quie gabila. Lēscan' tala'aga'ra nacarē neza quien. Ben' zē gulara reyu'ujē' ru'a yu'u na', rezi'jē' neza na'la. ¹⁴ Pero taguizi naca ru'a yu'u quie guibá. Lēscan' taguizi nacarē neza quien. Lē'ēti'zija naca ja ben' ruzuja di'idza' quia' cabē' rnia'. Lēzijē' redzelejē' neza zeyo guibá.

Cabē' rue benē', cana' yezaquero ca nacayaquē'

(Lc. 6.43-44)

Na' una Jesús:

¹⁵ —Gapale cuidado quie ja ben' huizi' yē', ben' rnaja quie Diuzi rnējē'. Nacajē' ben' za'zija ruejē' gaxo gula cabē' rue beco' ži'ila'. Pero bē' ruezjē', dechan' lu'u laxta'olajē' yu'u yela' snia quiejē', ruejē' ca rue coyote. ¹⁶ Huezuyezaquale cabē' ruejē' chi balejē' nacajē' ben' quie Diuzi. Bicua bedzuli' lao luba yēchi'. Lēscan' bicua higo lao yaga yēchi'. Lēcana' rue ja ben' binaca ja ben' quie Diuzi. Birlē'ēro huejē' tadya'a cabē' rue Diuzi. ¹⁷ Yugulu yaga huen rbian tažixi naca dya'a, pero nu yaga median, birbian tadya'a. ¹⁸ Tu yaga huen bisaque' cuian tažixi binaca dya'a. Lēzi tu yaga median bisaque' cuian tažixi naca dya'a. ¹⁹ Yugulu yaga birbia ta gaoro ichuguron ibidyin uzeiron. ²⁰ Na'ra rnia' le'e, segūn cabē' ruejē', cana' yezaquale cabē' nacajē', chi nacajē' cabē' quie tu yaga huen, o chi nacajē' cabē' quie tu yaga median.

Quele yugo ja benē' yeyojē' guibá

(Lc. 13.25-27)

Na' una Jesús:

²¹ —Quele yugo ja ben' na nē'ēdi': "Señor, Señor", yeyojē' guibá ga rnabē' Diuzi, dechan' yaca ben' ruzu di'idza' quie Xuza', ben' zu guibá, lēzijē' yeyojē' guibá. ²² Cati idyin dza hue Diuzi juicio, cana' ina ben' zē nē'ēdi': "Señor, Señor, laolo' bzētondo' uidxogue'ndo' benē' xti'idzo'. Lēscana' bzētondo' laolo' uliondo' taxi'ibi' yu'u ja benē'. Lēscan' bzētondo' laolo' bēndo' tazē yela' huaca quio'." ²³ Pero cana'ra yēpa'jē': "Binubē'cazida' le'e. Ulebiga' tzala'la, le'e ben' bē ja tamala."

Pxi'idze' Jesús quie chopa ben' bē yu'u

(Lc. 6.47-49; Mr. 1.22)

Na' una Jesús:

²⁴ —Cani nacan quie yaca ben' ruzēnaga ruzu di'idza' quia'. Naca quienē' ca quie tu ben' rionē'e, ben' bē yu'u quie tu lao lachi' ga re'rara yu. ²⁵ Na'ra ben nisa yosiu', uyala yao, ben be bedun', pero bibyalan, porque re'n tu lao lachi' ga naca yu huala. ²⁶ Pero ben' ruzēnaga, na' birue quienē' ca rnia', naca quienē' ca quie tu ben' tondo, ben' bē yu'u quie tu lao yu yolo, yu bire'ra. ²⁷ Bē' ben nisa yosiu', bē' uyala yao, bē' ben be bedun', na'ra byala yu'u. Tu casion ze gula guca quiē'.

²⁸ Cati beyudyi unë Jesús, rebane ja ben' zë nita'ja na' cabë' ruë' rusëdië'.
²⁹ Porque rusëdinë' lëjë' ca quie ben' de yela' r nabë' quie, quele cabë' rusëdi ja ben' rusëdi ley pca'n Diuzi lao na'a Moisés dza na'te.

8

Beyue Jesús tu ben' raca yela' hue' ca pindo *(Mr. 1.40-45; Lc. 5.12-16)*

¹ Cati beyëzi Jesús lao ya'a, ben' zë beyao lënë'. ² Caora na' laobiga'te ga'ala' tu ben' raca yela' hue' ta ruzudzo' cuerpo quienë'. Laoditzute žibë' lao Jesús rëbinë' lënë':

—Señor, chi gue'enlo', huu' cule yeyuelo' yela' hue' raca'.

³ Na'ra udan Jesús na'anë' lënë' rëbinë' lënë':

—Hue'enda' iyaco' yëri.

Cana'zi ta una Jesús, labeyacate yela' hue' racanë'. ⁴ Na'ra una Jesús rëbinë' lënë':

—Ni tu ganu quixogue'lo' bi guca beyaco'. Tu uyotezi cuinzo' lao pxuzi. Na' hue'lo' gun quie Diuzi cabë' mandado bë Moisés yela' inezi ja benë' abeyaco' yela' hue' raco'.

Beyue Jesús tu mozo quie tu capitán ben' romano *(Lc. 7.1-10)*

⁵ Na'ra zio Jesús ciudad Capernaum. Lëzi laoyote tu ben' naca capitán quie ja soldado quie ciudad Roma ga zë Jesús. Caora na' unabayëchi'në' ⁶ rëbinë' Jesús:

—Señor, de tu mozo quia' raca žhue'bi' žan yu'u. Nesecobi', redza-galaolëbi'n, rlatzeguen.

⁷ Na'ra rëbi Jesús lënë':

—Uletza' yeyu'abi'.

⁸ Na'ra rëbi capitán lënë':

—Señor, binaca' zi ta huelo'në' že guidatiu' žan yu'u quia'. Tu bë'zi di'idza', bë mandado yeyaca mozo quia'. Nezda' huazaque' huelo' tu mandadozi inao', ⁹ porque lëzi cana' naca quia'. Zu xa'na', ben' belao r nabë'në' në'ëdi'. Lëscana' naparia' soldado ben' rnabi'a. Cati rëpa' tujë': "Tzio' niga", huayonë'. Cati rëpa' ifunë': "Uda", huidë'. Cati rëpa' mozo quia' bi ta huebi', ruebi'n. Cana' nacarë quio'.

¹⁰ Cati be Jesús cabë' una capitán rëbinë' lënë', tu rebanezinë' rëbinë' ja ben' zenaolja lënë':

—Tali rnia' le'e, lao yugu ja ben' Israel, binedila' ni tujë' ben' rioñe'e cabë' rioñe'e ben' niga. ¹¹ Rnia' le'e, ben' zë, ben' binaca ben' Israel, yedyinjë' gatezi parte yedyi layu cue'lëjë' tuže len xuzixta'oro Abraham, len xuzixta'oro Isaac, len xuzixta'oro Jacob ta gaolëjë' lëjë' guibá ga r nabë' Diuzi. ¹² Pero zë ben' Israel, ben' reya'ala' yeyoja guibá ga zu Diuzi, naca quiejë' tzegu'unjë' lao lato lao chula ga cuedyijë' zi'laza gula, ga gaojë' lejë'.

¹³ Na'ra rëbi Jesús capitán na':

—Beyo žan yu'u quio'. Huacacazi cabë' azela'adyo'.

Caora na'tezi labeyacate mozo quie'.

Beyue Jesús ben' gula quie Pedro *(Mr. 1.29-31; Lc. 4.38-39)*

¹⁴ Na'ra uyo Jesús žan yu'u quie Pedro. Na' blë'ënë' žna' nigula quie Pedro denë' žla, raca žhue'në'. ¹⁵ Na'ra caora uže Jesús në'ë, labedubaten. Na'ra labeyasatë' uzulaohuë' ru'enë' laze ta gaojë'.

Beyue Jesús ben' zē, ben' raca zhue'

(Mr. 1.32-34; Lc. 4.40-41)

¹⁶ Cati aochula, uquiē'jē' lao Jesús ben' zēja raca zhue', ben' yu'uja bichi be quie taxi'ibi'. Con tu la'anazi di'idza' rebioquē' tzala'la taxi'ibi' yu'ujē'. Cana' beyuerēnē' yuguja ben' raca zhue'. ¹⁷ Cana' bzun di'idza' cabē' una profeta Isaiás caora unē' cani: "Lēbē' begubē' yela' tzen quiero, beyuenē' yela' hue' quiero."

Ni rnan quie ja ben' nao Jesús

(Lc. 9.57-62)

¹⁸ Cati blē'ē Jesús ben' zē baneyēcholēnē', bēnē' mandado udelēnē' ja ben' quienē' itzala'la lagun. ¹⁹ Na'ra bdyin tu maestro, ben' rusēdi ley quie Moisés. Na'ra gudyinē' Jesús:

—Maestro, re'enda' inaohua' luē' con gatezi zio'.

²⁰ Na'ra bequēbi Jesús quienē':

—Yaca be'eza', zu beló quiejaba'. Lēscan' ja bguini, dya lidyijaba'. Pero nē'ēdi' naca' bichi yugulu benē', bizu litya' ga idyina' sua'.

²¹ Itu ben' nacarēcazi ben' quienē' unē' rēbinē' Jesús:

—Señor, ben lato tzetapa' xuzā', porque bagatinē'. Na'tera yeguida' inaohua' luē'.

²² Na'ra bequēbi Jesús gudyinē' lēnē':

—Unaozi nē'ēdi'. Bē lato ucachi' yaca ben' birue quie xti'idza' Diuzi xuzo'.

Ulēchi Jesús chizi be bedun' len nisa

(Mr. 4.35-41; Lc. 8.22-25)

²³ Na'ra uyu'u Jesús lu'u barco len ja ben' quienē'. ²⁴ Caora na' bēnan tu be bedun' huala gula, rudyigaten nisa rudzon lu'u barco. Pero rasila Jesús cati ruen cana'. ²⁵ Na'ra uyo yaca ben' quienē' yesebējē' lēnē', rēbijē' lēnē':

—¡Señor, psela nēto'! ¡Are'en yēto barco lu'u nisa!

²⁶ Na'ra unē Jesús rēbinē' lējē':

—¿Bixquien' lega rdzebile? ¡Biralele ucuasa ucui'o Diuzi ra'o!

Na'ra uyananē', udilalēnē' be bedun' len nisa. Caora na' bguenan ure'n chizi. ²⁷ Na'ra rebane ja ben' quienē' najē':

—¿Ca nuži naca ben' niga? Lente be bedun', lente nisa ralen quienē'.

Bebio Jesús taxi'ibi' yu'u chopā ben' Gadara

(Mr. 5.1-20; Lc. 8.26-39)

²⁸ Cati bdyin Jesús itzala' lagun ga lao yu nebaba Gadara, caora na' labdyinte chopā ben' bro lu'u yerobá dya na'. Rupatejē' yu'ujē' taxi'ibi'. Na' bdyinjē' lao Jesús. Tantozi nacajē' ben' snia gula, ni tu ganu rerugue te tu neza zaca' ga yu'ujē'. ²⁹ Na'ra uzulaojan rbedyiya'zijan najan rēbijan Jesús:

—¿Bi de quio' conlē nēto' zao' niga, Jesús ži'i Diuzi? ¿Quele baodyialaolalo' bla'lo' huelo' nēto' castigo, na' binedyn hora?

³⁰ Ga'ala'zi ga zē Jesús yu'u ja cuchi zē. Lēgan' na' la'adyi'jaba' rguilojaba' ta raojaba'. ³¹ Na'ra bē ja taxi'ibi' zēdi rēbijan Jesús:

—Chi yebiolo' nēto' tzala'la, ben lato tzu'undo' lu'u cuchila.

³² Na'ra rēbi Jesús lējan:

—Uletzu'ujaba'.

Na'ra bero ja taxi'ibi' yu'u ja benē' yetzu'ujan lu'u cuchila. Tu chi'zi raca cana', yequinojaba' cuinjaba' tu ru'a ya'a ga naca stēbi. Laga lu'u lagun yetzu'ujaba' uyēpijaba' gutijaba'.

³³ Quie lena' yaca ben' rapa lējaba' bežunojē' dan' bdzebijē' bedyinjē' yedyi quiejē'. Na'ra uzulaojē' ru'ejē' di'idza' cabē' guca quie ja ben' bero ja taxi'ibi'.

³⁴ Na'ra bro ja ben' zē yedyi na', ziojē' gan' zē Jesús. Laonabayēchi'tejē' rēbijē' lēnē':

—Yerolo' yeyo' lao yu quiendo'.

9

Beyue Jesús tu ben' zi

(Mr. 2.1-12; Lc. 5.17-26)

¹ Beyu'u Jesús tatula lu'u barco. Bela'guē' itzala' lagun, bedyinnē' lao yedyi quiē'. ² Na' bi'ajē' tu benē' zi, ben' zuba lao belaga nu'a ja benē' lēnē'. Caora blē'ē Jesús cabē' zela'adyi'yaquē' yeyuenē' lēnē', na'ra unē' rēbē' ben' raca zhue':

—Bidzebo', bicha'. Cabē' quie ja dula' xquia quio', aozi'zia'n.

³ Na'ra bala ja maestro, ben' rusēdija ley quie Moisés, bējē' pensari lu'u guicho laxta'ojē' cani: “Huadza' Diuzi ben' niga cabē' di'idza' unē'.” ⁴ Pero como dan' anezi Jesús cabē' pensari racajē', na'ra unē' rēbē' lējē':

—¿Bixquien' racale pensari cana'? ⁵ ¿Ca nurlan nacaran yalo hua' quie ben' zi niga? ¿Nacaran yalo chi yēpa'nē': “Aozi'zia' xquia quio'”, o chi nacaran yalo yēpa'nē': “Uyasa, bezi' belaga quio', beyo'”? ⁶ Pero como naca' bichi yugulu benē', lena' re'enda' inezile de yela' rnabē' quia' ta si'zia' dula' xquia quie ja ben' nita' lao yedyi layu.

Na'ra unē' rēbinē' ben' zi:

—Beyasa, beyu'a belaga quio'. Beyo žan yu'u.

⁷ Na'ra beyasē' zeyoguē' žan yu'u quiē'. ⁸ Caora blē'ē ja benē' cabē' bē Jesús, tu bebanezijē'. Na'ra uzulaojē' rapala'njē' Diuzi por nun quie dan' babē'nē' yela' huaca quienē' Jesús.

Guzi Jesús Mateo

(Mr. 2.13-17; Lc. 5.27-32)

⁹ Na'ra beza' Jesús ga beyuenē' ben' zi, caora na' blē'ēnē' tu ben' lao Mateo, re'nē' tu ga ruquizunē' quie impuesto. Na'ra unē' rēbē' lēbē':

—Uda, unao nē'ēdi'.

Na'ra uyasa Mateo bēlēnē' lēnē' tuže.

¹⁰ Biži guca na' tu re'nē' raohuē' žan yu'u, cati bdyin ja ben' zē, ben' huequizu, lenrē ja ben' cacuendazi. Udaolējē' Jesús tuže len ja ben' quienē'.

¹¹ Pero bē' blē'ē yaca ben' partido fariseo tužezi udaolē Jesús len lējē', na'ra unabajē' ben' quie Jesús rēbijē' lējē':

—¿Bixquien' raolē maestro quiele tužezi len ja ben' huequizu len ja ben' cacuendazi?

¹² Bē' be Jesús cana', na'ra unē' rēbinē' lējē':

—Ca quie ben' zu dya'a, birnaban ben' yeyue lēnē'. Pero ben' raca zhue', rnaban ben' yeyue lēnē'. ¹³ Uletzio huele pensari yela' tzioñe'ele bi nan lē'ē guichi la'iya quie Diuzi ga rnan caniga: “Raxera Diuzi yeyēchi'la'adyi'ro benē', quele ca ta hue'ro Diuzi gun.” Quele za' rēža' ben' na “bibi xquia naca quia'”, sino que za' rēža' ben' nezi de dula' xquia quie tacuenda yetza'jē' pensari quiejē' inaojē' xneza Diuzi.

Unabajē' Jesús quie ubasi

(Mr. 2.18-22; Lc. 5.33-39)

¹⁴ Bdyin ja ben' quie Juan bautista lao Jesús rnabajē' lēnē':

—¿Bixquien' nēto' len ja ben' partido fariseo ruetzeguendo' ubasi, na' ja ben' quio' biruejē' ubasi?

¹⁵ Na'ra bequēbi Jesús rēbinē' lējē':

—Yaca ben' zioja ga raca lani quie huetzagana', bireya'ala' sujè' bayèchi' tu nezu ben' rutzagana' len lèjè'. Pero cati idyin dza birazulè ben' rutzagana' len lèjè', caora na' sí, huazujè' bayèchi' huejè' ubasi.

¹⁶ 'Bisaque' yeda'ro la'ari' cubi binetzèri lè'è la'ari' gula, porque huetzere'nan igan ru'a la'ari' gula, ichezan len mazara. ¹⁷ Lèscan' bisaque' ca'ro nupi zixi lu'u bolsa guidi gula, porque bè' sulao ilèbin, huedza'n ichezan len. Lao rupertelan cuiagui'. Lena' reya'ala' ca'ron tu lu'u guidi cubi. Cana' sí, bibi gaca quie lao ruperten.

Beyue Jesús tu nigula raca zhue', besebanrèné' itu nigula baguti
(Mr. 5.21-43; Lc. 8.40-56)

¹⁸ Tu raca nerue' Jesús di'idza' len ja benè', cati bdyin tu ben' rnabè' quie ja ben' Israel gan' zè Jesús. Na' gutanè' uzuru'ala lao Jesús rèbinè' lènè':

—Zabeyudyi guti tu zi'ina' nigula. Pero chan' na' luè' guido' ixubalo' nao' lèbi', huebambi' tatula.

¹⁹ Na'ra uzi'nè' ziolènè' ja ben' quienè'. ²⁰ Na'ra tu neziojè' tu neza, cati ubiga' tu nigula raca zhue' xcu'udzula Jesús, uzenè' diba zu ni'a zabè'. Aziote lao chipchopa iza ruzun lènè' uba'a. ²¹ Cana' bènè' porque guquenè' chi tu guxuzè' zaba Jesús, yeyaquè'. ²² Cati beyècho Jesús rnè'è ga zè nigula, rèbinè' lènè':

—Bidzebo', zana'. Como dan' rzudyi'ilèlo' nè'èdi', abeyaco'.

Caora na'tezi labeyacatè'.

²³ Na'ra uzi'nè' zioquè' bdyinnè' zan yu'u quie ben' rnabè', ben' nequiè' lènè'. Na' blè'èné' bala yu'ute ja músico listo ta tzecachi'jè' lèbi'. Lèzi cana' blè'èrèné' ru'be gula bayu'uja benè'. ²⁴ Na'ra unè' rèbinè' lèjè':

—Ulero ga yu'ule niga. Para nè'èdi' quele natibi', dechan' tu rasizibi'.

Na'ra bzidyijè' Jesús cabè' unè'. ²⁵ Cati beyudyi betzatanè' lèjè', na'ra uyu'unè' ga de nigula baguti, uzenè' na'abi' besebannè'bi'. Caora na' beyasabi'. ²⁶ Na' tzadi unezi ja ben' quie ja yedyi na' cabè' bè Jesús besebannè' nigula dao' de baguti.

Beyue Jesús lao chopa ben' laochula

²⁷ Lazune Jesús yeza'nè' gan' na' cati unao chopa ben' laochula lènè'. Rbedyiya'zìjè' rèbijè' Jesús:

—¡Beyèchi'la'adyi' nètò', luè' zi'i rey David!

²⁸ Cati uyu'u Jesús lu'u yu'u, na'ra ubiga'ja ben' laochula laohuè', na'ra unabè' lèjè':

—¿Rzudyi'ilèle nè'èdi' huaca' yeyua' le'e na'?

Na'ra najè':

—Rzudyi'ilèndo' luè', Señor.

²⁹ Na'ra udèbi Jesús laojè' rèbinè' lèjè':

—Yeyacale con cabè' rzudyi'ilèle nè'èdi'.

³⁰ Na'ra labeyacate laojè' dyè'èdi. Na'ra bè Jesús mandado gudyinè' lèjè':

—Nitu nitu biquixogue'le cabè' bia' quiele.

³¹ Pero lapencara brojè' cati uzulaojè' rguixogue'jè' tu tu yedyi cabè' bè Jesús quiejè'.

Beyue Jesús tu ben' birnè

³² Na'ra zeza'jè' zeyojè' cati za' bala ja ben' nequiè' tu ben' birnè lao Jesús, ben' yu'u taxi'ibi'. ³³ Na'ra bebio Jesús tzala'la taxi'ibi' yu'unè'. Caora na' beyacanè' benètenè'. Na'ra rebane ja benè' rnajè':

—Binèlè'ècaziro gaca lao ja yedyi quie ben' Israel cabè' raca niga na'a.

³⁴ Na'ra na ja ben' partido fariseo:

—Ben' niga rebioque' taxi'ibi' yu'u ja benë' lao na'a xan' taxi'ibi'.

Guque Jesús bayëchi' cabë' rue ja benë'

³⁵ Na'ra rda Jesús yugulu yedyi yela len ja yedyi dao', ruxi'dze'në' lëjë' lu'u idao' sinagoga quiejë'. Rguixogue'në' lëjë' xti'idza' Diuzi, ben' rnabë' lao yedyi layu. Na'ra beyuenë' bitezi yela' hue' yu'u ja benë'. ³⁶ Bë' rlë'ë Jesús ja benë', guquenë' bayëchi' quiejë', dan' redzagalaojë' rëpi reyëzjìë' ca quie ja beco' zi'ila' bizu ben' rapa ja lëba'. ³⁷ Na'ra unë' rëbinë' ja ben' quienë':

—Tali rnia', lega de dyin quiero gacalëro usëdiro ja benë' cabë' re'en Diuzi huejë', pero biyu'ute ja ben' zë, ben' gacalë usëdi lëjë'. ³⁸ Quie lena' na', reya'ala' inabale lao Diuzi ta ise'elë' ja ben' gacalë ra'o usëdi lëjë'.

10

Betupa Jesús lao chipchopa ben' quienë'

(Mr. 3.13-19; Lc. 6.12-16)

¹ Na'ra betupa Jesús lao chipchopa ben' quienë'. Bë'në' lëjë' yela' huaca quienë' ta cuiojë' tzala'la taxi'ibi' yu'u ja benë', lëscan' ta yeyuerëjë' bitezi yela' hue' yu'u ja benë'.

² Cani lao ja chipchopa ben' quie Jesús: tunë' laonë' Simón, ben' laorë Pedro, len bichinë' Andrés, len Santiago, len bichinë' Juan zi'i Zebedeo, ³ len Felipe, len Bartolomé, len Tomás, len Mateo, ben' huequizu, len Santiago, zi'i Alfeo, len Tadeo, ⁴ len Simón, ben' partido cananista, len Judas Iscariote, ben' psedyin Jesús lao na'a ben' rnabë', ben' bëti lënë'.

Use'ela' Jesús ben' quienë' ta tzetixogue'jë' benë' xti'idza' Diuzi

(Mr. 6.7-13; Lc. 9.1-6)

⁵ Na'ra use'ela' Jesús lao chipchopa ben' quienë' ta tzetixogue'jë' benë' xti'idza' Diuzi. Na'ra zagudyinë' lëjë' cabë' huejë', unë' rëbinë' lëjë' caniga:

—Tziole puro yedyi quie ja ben' Israel. Bitziole yedyi quie ja ben' tula. Bitziorële ja yedyi quie ja ben' Samaria. ⁶ Uletziotezi yedyi quie ja ben' Israel. Ben' na' naca quiejë' ca quie beco' zi'ila' neniti xa'ne. Cana' naca quiejë' lao Diuzi. ⁷ Uletzio tzetixogue'lejë' baruen bagozi dza guida ben' ise'ela' Diuzi ta inabë'në' lao yedyi layu. ⁸ Uleyue yaca ben' raca yela' hue' ta rutao cuinjë' len ja ben' raca zhue'. Uleseban ben' bagutija. Ulebio tzala'la taxi'ibi' yu'u ja benë'. Runa' le'e yela' huaca quia' ta yeyuele ja benë', pero bihuelenan de lazo.

⁹ Bihua'ale dumi, ni oro, ni plata, ni cobre. ¹⁰ Ni tu bihua'ale ga udze'le dumi. Tuzi cue' žabale nacole. Tuzi huaracho nulirole tziole. Ni xaga bisele. Nu ben' racalële, lëben' na' naca cuenda quiejë' gunjë' ta rdzioguele.

¹¹ 'Cati idyinke tu yedyi ze o chi tu yedyi dao', quilole ga zu tu ben' dya'a. Na' yega'nle hasta que idyin hora yeza'le. ¹² Bë' tzu'ule žan yu'u quienë', gapala'nlejë' yëbilejë': "Huela'iya Diuzi le'e ta sule chizi." ¹³ Chi ben' naca xa'n yu'u ruenë' zi žela'adyi', inabarale lao Diuzi sunë' chizi. Pero chi binaquë' zi ben' rue žela'adyi', bira inabale lao Diuzi ta sunë' chizi. ¹⁴ Chi nu ja ben' bisi'jë' le'e dyë'ëdi, na' chi bire'enjë' uzënarajë' quiele, yerozile žan yu'u o chi yedyi ga bire'enjë' le'e. Usisile bëxte dyia ni'ale cati yerole ta nacan seña binacan dula' quiele chi baodyiagu'jë' hue Diuzi lëjë' castigo.

¹⁵ Tali cabë' rnia' le'e, cati idyin dza gaca juicio, huera Diuzi castigo fuertera quie ja yedyi ga bibejë' le'e bala, quiele cabë' bë Diuzi quie ciudad Sodoma len ciudad Gomorra. Bzei Diuzi lao rupate yedyi na' besulatë'n.

Unë Jesús cabë' huenë yaca benë' yaca ben' quië'

¹⁶ Na' una Jesús:

—Ulena'cara ca nia' le'e. Rse'ela' le'e ca quie beco' zi'ila' lado ja lobo. Lena' rnaban huele listo ca quie nu bëla. Rnabarën huele zëla'adyi' gaxo ca paloma. ¹⁷ Gapale cuidado, porque huetzehua'arëjë' le'e lao na'a ja ben' rnabë'. Gunrëjë' le'e zi' ga regu'udi'jë' lu'u idao' sinagoga. ¹⁸ Hasta huetzehua'ajë' le'e lao ja ben' gobierno, len lao ja rey, len lao ja ben' rnabë'tera, porque dan' biraxejë' nacale ben' quia'. Cana' sí, huacale inële quia' lao ja ben' Israel len lao ja ben' binaca ben' Israel. ¹⁹ Cati tzehua'ajë' le'e lao na'a ja ben' rnabë', bidëbile quie bizidan' yëbilejë', bidëbile bi huele yëbilejë'. Porque cati babbayin hora saca'le cana', Diuzcazi gunnë' ta inale. ²⁰ Porque quele le'ecazi cuinle inële, Bichi Be quie Diuzila, inëcazinë' le'e.

²¹ 'Cani hue yaca benë', usedyinjë' benë' bi' bichinë' lao na'a ja ben' rnabë' ta gutijë'bi'. Lëzirë ja be'mbyu usedyinrëjë' zi'ijë' lao na'a ja ben' rnabë' ta gutirëjë'bi'. Na' lazi'izi ja benë' yeyëchojabi' tilajabi' xuzijabi', quilojabi' bihuejabi' ta gutiyacabi' lëjë'. ²² Ben' zë tzu'uja udie le'e nun quie dan' baralele quia'. Nu ben' sue inao në'ëdi' la'acazi bitezi raca quienë', ben' na' sí, huade ilanë' gaquë' ben' quia'. ²³ Cati baruenë ja benë' quie tu yedyi le'e bizinaquezi, layëzunotele yeyole yedyi tula. Tali ca rnia', bicala nedu lao yedyi quie ja ben' Israel tzetale tzetixogue'lejë' xti'idza' cati yeguida' në'ëdi', bichi yugulu benë'.

²⁴ 'Ca ruenë ja benë' tu maestro, cana' huenërëjë' yaca ben' rusëdinë'. Lëscan' ca ruenëjë' tu ben' napa mozo, cana' huenërëjë' mozo quienë'. ²⁵ Nu ben' rsëdi, reya'ala' sunë' dispuesto usaca yaca benë' lëbë' con cabë' rsacajë' maestro quienë'. Lëscan' nu ben' naca mozo, reya'ala' sunë' dispuesto usaca ja benë' lëbë' cabë' rusacajë' xa'nnë'. Chi ina yaca benë' yëbijë' tu ben' necua' familia: "Naco' xan' taxi'ibi'", lëscan' yëbijë' zi'inë': "Naco' zi'i xan' taxi'ibi'."

Bireya'ala' idzebiro bi ruenë ja benë' ra'o

(Lc. 12.2-7)

²⁶ Na' una Jesús:

—Quie lena' bireya'ala' idzebile bi ruenë ja benë' le'e. Rnia' le'e ni tu ta rue yaca benë' balarazi yega'nnan cana'zi biyezaca'laona, decazi de huanezan. Lëzi ni tu ta nezi yaca benë' de negachi' yega'nnan cana'zi biyezaca'laona, decazide huanezan. ²⁷ Cabë' di'idza' ru'elia' le'e bë' baochula, lëdi'idza' na' yëbile ja benë' bë' baoyani'. Lëzi cabë' di'idza' ru'elia' le'e xcu'udzu yu'u, lëdi'idza' na' yëbile ja benë' zaca'laojë'. ²⁸ Bidzebile bi hue ja benë', porque dan' ba'ala'cazi gacajë' gutijë' le'e, bigacajë' gutijë' bichi be quiele. Reya'ala' idzebile Diuzi, ben' gaca udyiagui' le'e len bichi be quiele ise'elë' le'e len bichi be quiele lao gui' gabila.

²⁹ 'Na' ledao'zi zaca' chopa bguini dao' ga ruti'jë'ba', pero ni tu bguini dao' bižu biiguinuba' sino que binezi Xuziro Diuzi biguca bguinuba' layu. ³⁰ Hasta len guitza' guichoro nezi Diuzi balan naca. ³¹ Lena' bireya'ala' idzebile, porque zaca'ra le'e quele ca ja bguini dao'.

Ni nan quie ben' rnëja cule Jesucristo lao ja benë'

(Lc. 12.8-9)

³² Na' una Jesús:

—Nutezi ben' rnë cule në'ëdi' lao ja benë', cana'rë inia' cule lëjë' lao Xuza' Diuzi zu guibá. ³³ Pero nu ben' rnë condre në'ëdi' lao ja benë', cana'rë inia' condre lëjë' lao Xuza' Diuzi zu guibá.

Guta' tazēdi quie ben' nao xneza Jesús

(Lc. 12.51-53; 14.26-27)

³⁴ Na' una Jesús:

—Biinale bigalo dila quie ja ben' tanun quie dan' bida' lao yedyi layu, sino que hualo dila. ³⁵ Por nun quie dan' chi gale nu ben' quia', huazu zi'ijē' condre xuzijē', huazu zi'ijē' nigula condre zna'jē', huazu žualidyijē' condre ben' gula quiejē'. ³⁶ Cana' tzu'ujē' hasta quie udiejē' familiazi quiejē'.

³⁷ Nu ben' nedyē'era nu xuzi žnē'ē quele cabē' nē'ēdi', binaquē' zi gacanē' ben' quia'. Lēzi nu ben' nedyē'era ži'ine, quele cabē' nē'ēdi', binacarē' zi gacanē' ben' quia'. ³⁸ Nu ben' bire'en usacayudyi cuinnē' inaonē' nē'ēdi', binaquē' zi gaquē' ben' quia'. ³⁹ Nu ben' bire'en izane cuine gatinē' por nun quia' nē'ēdi', lēben' na' initilanē' yela' neban ta hue' Diuzi lēnē' guibá. Pero ben' rzane cuine, ben' zu puesto gati por nun quia' nē'ēdi', hue'la Diuzi yela' neban quienē' guibá.

Unē Jesús cabē' di'idza' zela'adyi' ru'e Diuzi benē'

(Mr. 9.41)

⁴⁰ Na' una Jesús:

—Chi nu ben' rezila'adyi' le'e, lēscan' nē'ēdi'cazirē rezila'adyi'rējē'. Chi nu ben' rezila'adyi' nē'ēdi', lēscan' rezila'adyi'rējē' Diuzi, ben' use'ela' nē'ēdi'. ⁴¹ Nu ben' rezila'adyi'rē ca una yaca profeta, porque dan' nacayaquē' ben' za'lao Diuzi, na'ra con cabē' hue' Diuzi ben' profeta ben' že, cana' huerē Diuzi lēbē' ben' že. Nu ben' rezila'adyi'rē ca una tu ben' quie Diuzi, porque dan' naquē' ben' quie Diuzi, na'tera con cabē' hue' Diuzi ben' quienē' ben' že, cana' huerē Diuzi lēbē' ben' že. ⁴² Nu ben' hue' chan' tu vasozi nisa zaga ben' quia', porque dan' naquē' ben' quia', decazide hue' Diuzi lēbē' ben' že. —Cana' una Jesús gudyinē' leyaquē'.

11

Use'ela' Juan bautista ben' quienē' yena'jē' Jesús

(Lc. 7.18-35)

¹ Cati beyudyi pxi'idze' Jesús lao chipchopa ben' quiē', caora na' zeyoguē' tzetixogue'nē' ja benē' yu'uja yedyi rega'n ga'ala' gan' rdē'.

² Na' dyiguiba yu'u Juan na' cati unezinē' cabē' barue Cristo. Na'ra use'ela'nē' bala ben' quienē' ta tzena'jē' Jesús. ³ Na'ra unajē' rēbijē' lēnē':

—¿Naco' ben' na Diuzi ise'ela'nē' o chi ben' tula reya'ala' cuezando'?

⁴ Na'ra bequēbi Jesús rēbinē' lējē':

—Uletzio uletzeguēdyi Juan cabē' rlē'ēle rele. ⁵ Ulehue' lēnē' di'idza' yēbilenē' cabē' babeyaca ja ben' laochula, barelē'ējē'. Na' ja ben' ži, babeyacajē', baredajē'. Na' ja ben' yu'u yela' hue' ta rutaō lējē', babeyacajē', babežijē'. Na' ja ben' bireja, babeyacajē', bareyejē'. Na' ja ben' bagutija, babebanrējē'. Na' ja ben' yēchi', rguixogui'ajē' ca na xti'idza' Diuzi ta inezijē' bi huejē' ta yeyojē' guibá. ⁶ Huaca huen quie ben' biusan sudyi'ilē nē'ēdi'.

⁷ Cati beza' ja ben' quie Juan, na'ra uzulao Jesús ru'elēnē' benē' di'idza' rēbinē'jē' ca naca quie Juan. Cani unē':

—¿Bidan' uyole yena'le lao lato dachi ga bidyia yu'u? ¿Uyole yena'le tu yaga yēto ru'a be ni'nila? ⁸ Quele lena' uyole yena'le. ¿Bizidan' uyole yena'le chi quele lena' uyole yena'le? ¿O chi uyole yena'le tu ben' zē žabe tzao'? Na' nu ben' zē žabe tzao' bitajē' lao lato dachi ga bidyia yu'u. Quele lena' uyole yena'le. ⁹ ¿Cabiži uyole yena'le? ¿Uyole yena'le tu ben' naca profeta? Talicazi

naca Juan profeta. Nacarë' ben' tza'o'ra ca ja profeta. ¹⁰ Lëquie Juan na', ben' cuialao laohua', quie lëbë' rguixogue' guichi la'iya quie Diuzi cani:

Ise'ela' Diuzi tu ben' cuialao neza ga tza' cuenda tzetixogue'në' yaca benë' huida' në'ëdi'. ¹¹ Tali rnìa' le'e, lao yugu ja benë' baoyu'uja yedyi layu hasta na'a, nitujë' binegacajë' ben' ze ca Juan bautista. Dechan' nu ben' binacate ze ga rnabë' Diuzi guibá, nacacazirë' ben' žera ca Juan.

¹² 'Desde cati bida Juan bautista hasta na'a, raca ja benë' dila condre yela' rnabë' quie Diuzi. Du rdilajë' rguilojë' bi huejë' ta useyudyi usedujë' lëbë'.

¹³ Yugulu ja ben' uduxogue' tiempote cabë' na Diuzi, len cabë' na di'idza' bzu Moisés lë'ë guichi hasta cati bla' Juan, unëjë' quie dza zaza'ra cati inabë' Diuzi lao yedyi layu. ¹⁴ Chi ralele ca nia' quie Juan, huanezile babilalanë' lao laza profeta Elías, ben' yeguidacazi. ¹⁵ Reya'ala' tzu'u guicho nagale ca nia'.

¹⁶ '¿Cabi di'idza' inia' le'e ta tzioñe'ele cabë' naca yela' zidi quie ja ben' nita' na'a? Ruejë' ca quie xcuidi' re' lao ye'eya bire'enjabi' quitulëjabi' laguedyi xcuidi'jabi'. ¹⁷ Na'ra laguedyi xcuidi'jabi' rucuedyijabi' bdyio tacuenda uya'a ja xcuidi' bire'en quitu. Pero bire'enjabi' uya'ajabi'. Lena' laguedyi xcuidi'jabi' bilajabi' canción bayëchi' tacuenda cuedyi ja xcuidi' bire'en quitu. Pero ni cana' biuredyijabi'. ¹⁸ Na'ra bë' bida Juan, biudaotza'onë' bihue'enë' vino. Na' le'e unale quie' yu'unë' taxi'ibi'. ¹⁹ Na'ra bë' bida' në'ëdi', bichi yugulu benë', raohua' ri'oga' cabë' ta ri'o rao ja benë'. Na' rnële quia' ben' ri'o raolë'ëna', ben' rda'le ja ben' mala len ja ben' huequizu. Lena' nia' le'e, yela' sin' quie Diuzi nenacazi nacan huen.

Begunni'a Jesús yaca ben' yedyi birale quienë'
(Lc. 10.13-15)

²⁰ Na' ra uzulao Jesús regunni'anë' ja ben' yedyi gan' babërë' yela' huaca quienë' como ja benë' yu'u na' biptza'jë' pensari quiejë' cabë' gudyinë' lëjë'. Na'ra unë' rëbinë' lëjë':

²¹ —¡Bayëchi'zi gaca quie le'e ben' ciudad Corazín! ¡Bayëchi'zi gaca quie le'e ben' ciudad Betsaida! Chan' na' guca milagro lao ciudad quie ja ben' Tiro, len lao ciudad quie ja ben' Sidón cabë' milagro guca lao yedyi quiele tiempote, babetza'jë' pensari quiejë', babeyacajë' ben' quie Diuzi chan' na'. Lëzi cana', chan' cana'cala bagucojë' la'ari' ta nena yu'ujë' bayëchi', na' bda'rëjë' de guichojë' cabë' costumbre guta' quiejë' cati renabajë' perdón quiejë' lao Diuzi. ²² Pero nia' le'e, cati idyin dza gaca juicio, castigo hualara gata' quiele, quele ca castigo gata' quie ja ben' ciudad Tiro len ja ben' ciudad Sidón. ²³ Lëscana' le'e ben' ciudad Capernaum, bigaquele chi huapala'n Diuzi le'e yeyole guibá, dechan' lao gui' gabilala tzirole, porque chan' na' gucarë milagro lao ciudad Sodoma cabë' milagro guca lao ciudad quiele, nere' ciudad Sodoma nedian hasta na'a chan' cana'cala. ²⁴ Lëzi cana' rnìa' le'e, cati idyin dza gaca juicio, huata'rë tu castigo hualara quiele, quele ca castigo gata' quie ja ben' ciudad Sodoma.

Ben Jesús yela' huezila'adyi' quiero
(Lc. 10.21-22)

²⁵ Lëlao tiempo na' una Jesús rëbinë' Xuzinë' caniga:

—Ben' ze naco' luë' Xuza'. Naco' xan' guibá len yedyi layu. Diuxcalelo' por nun quie dan' bablu'elo' ca naca tali quio' lao yaca ben' nezi rdzioguejë' inezijë'n. Pero pcachi'lo' ca naca tali quio' lao ja ben' na rioñe'ejë', pero bë' nazijë' birioñe'ejë'n. ²⁶ Cana' nacan Xuza', porque cana' re'enlo' gacan. —Cana' una Jesús rëbinë' Xuzinë'.

Na' una Jesús rëbinë' ben' quie':

²⁷ —Yugulute ta de baben Xuza' nē'ēdi'. Tuzi Xuza' Diuzi nubē'nē' nē'ēdi' naca' zi'inē'. Na' ben' re'en huebē' cabē' naca Diuzi, nē'ēdi' uzioñe'eda' lējē' ta huebē'jē' cabē' naca Diuzi. Tuza' nē'ēdi'lia' lējē' nubē'ndo' Diuzi. ²⁸ Uleda gacalēle nē'ēdi' tuze, yugulu le'e, ben' barexaque quie dula' xquia quie, ben' barexaque cabē' tazēdi' raca quie. Nē'ēdi' guna' huezila'adyi' quiele. ²⁹ Ulehue quiele di'idza' quia' cabē' rnia' le'e. Ulesēdi cabē' naca quia' como dan' naca' ben' zela'adyi', ben' laxta'o gaxo. Chi hue quiele cabē' nia' le'e, huata' yela' huezila'adyi' quiele. ³⁰ Ca naca dyin re'enda' huele, binacatigan zēdi. Ca naca yua' re'enda' hua'ale, binacatigan zi'i.

12

Bezi' ja ben' quie Jesús trigo dza huezila'adyi'

(Mr. 2.23-28; Lc. 6.1-5)

¹ Na'ra guca dza na' tu dza huezila'adyi', uza' Jesús ziolēnē' yaca ben' quienē' udejē' ga nazajē' trigo. Na' nun quie udue yaca ben' quie Jesús, sulaojē' ralojē' dao quie trigo raojē'n. ² Cati blē'ē ja ben' fariseo cabē' rue ja ben' quie Jesús, na' unējē' rēbijē' Jesús:

—Una'cara, barue ja ben' quio' dyin ta biru'en lato huejē' dza huezila'adyi'.

³ Na' unē Jesús rēbinē' lējē':

—¿Binelabale cabē' bē rey David lēnē' yaca ben' quiē' bē' uduejē' dza na'? ⁴ Uyu'unē' lu'u idao' rnabē'ra udaohuē' yēta xtila naca gun quie Diuzi ta biru'en lato gaohuē', ni lēbē', ni ben' quiē'. Tuzi ja pxuzizi ru'en lato gaojē'n. Pero cala xquia bēnē', bēnē' cana'. ⁵ ¿Lēzi binena'le lē'ē ley quie Moisés ga rguixogue'n quie ja pxuzi, ben' rue dyin lu'u idao' rnabē'ra? Bibezilla'adyi'jē' dza huezila'adyi', pero bējē' dyin lu'u idao' rnabē'ra, dechan' quele xquia bējē', bējē' cana'. ⁶ Na'ra rnia' le'e, nacara' nē'ēdi' balaora ca idao' rnabē'ra. ⁷ Le'e binetzioñe'le cabē' na lē'ē guichi la'iya quie Diuzi ga una Diuzi: “Re'enda' yeyēchi'la'adyi'le benē'. Lena' nacaran belao quele ca ta udyiale nu bia naca gun quia' ru'aba.” Chi uyoñe'le cabē' na Diuzi, bigaole xquia ben' bide falta quie. ⁸ Nē'ēdi', bichi yugulu benē', rnabi'a quie yugulute ta raca dza huezila'adyi'.

Beyue Jesús tu ben' neseco nē'ē

(Mr. 3.1-6; Lc. 6.6-11)

⁹ Na'ra uza' Jesús zioquē' uyu'unē' lu'u idao' quieyaquē' laona sinagoga. ¹⁰ Na' zu tu be'mbyu neseco nē'ē. Na'ra yaca ben' zu na' rguilola'adyi'jē' gaojē' Jesús xquia. Lena' unabajē' lēbē':

—¿Ru'en lato yeyuero benē' dza huezila'adyi'?

¹¹ Na'ra bequēbi Jesús rēbinē' lējē':

—¿Chi nu le'e zu tu beco' zi'ila' quiele bguinuba' lu'u pozo dza huezila'adyi', quele seguro na' huayole tzeliroleba'? ¹² ¿Como binezile zaca'ra tu be'mbyu quele ca tu beco' zi'ila'? Quie lena' ru'en lato yeyuero benē' dza huezila'adyi'.

¹³ Na'ra una Jesús rēbinē' ben' neseco nē'ē:

—Bli nao'.

Na' cati belinē' nē'ē, beyacan cabē' naca itzala' nē'ē dya'a. ¹⁴ Na' uza' ja ben' fariseo ziojē' uzulaojē' rusaque'jē' bi huejē' ta gutijē' Jesús.

Desde tiempote udixogue' Isaías cabē' hue Jesús

¹⁵ Cati unezi Jesús gu'unjē' gutijē' lēbē', uzē'ē zioquē' tatula. Na' ben' zē gula zio zenao lēbē'. Reyuenē' yugulu yaca ben' raca zhue'. ¹⁶ Na'ra bē Jesús lējē'

mandado ta biquixogue'jě' cabě' bënë' quiejě'. ¹⁷ Cana' bē Jesús tacuenda su di'idza' cabě' una profeta Isaías dza na'te caora u dixogue'ně' ca una Diuzi caniga:

¹⁸ Ben' niga ben' rue dyin lao laza', ben' ulioga', nedyě'ěda'ně' redaohueda' cabě' rueně'.

Udza' Bichi Be quia' lu'u guicho laxta'oně'.

Huaguixogue'ně' yaca ben' nita' lao yedyi layu ca tali rchugubi'a quiejě'.

¹⁹ Bihueně' hueně', biině'ně' snia, bihueně' zědi tu neza.

²⁰ Xela'adyi'ně' ben' raca bayěchi' quie, yeyěchi'la'adyi'ně' ben' re'en usan xquia quie.

Cana' hueně' hasta que idyinně' inabě'ně' hueně' tali lao yedyi layu.

²¹ Sudyi'ilě yaca ben' nita' lao yedyi layu lěně'.

Cana' u dixogue' Isaías tanun quie Diuzi dza na'.

Udaojě' Jesús xquia najě' yu'uně' taxi'ibi'

(Mr. 3.19-30; Lc. 11.14-23; 12.10)

²² Na'ra uquie'jě' tu ben' laochula, ben' birně, lao Jesús. Ben' na' uyu'u taxi'ibi' lu'u laxta'oně'. Beyue Jesús lěně', belě'ěně', beně'ně'. ²³ Na' bebane ja ben' zě unajě' rěbijě' laguedyijě':

—¿Quele ben' niga ži'i David, ben' use'ela' Diuzi?

²⁴ Na' cati be yaca ben' partido fariseo cabě' una ja beně', na'ra unajě' rěbijě' lějě':

—Yela' huaca quie Beelzebú xan' taxi'ibi' rbio ben' niga yaca taxi'ibi' yu'u laxta'o beně'.

²⁵ Na' gucabě' Jesús cabě' pensari racajě'. Quie lena' uně' rěbině' lějě':

—Chi zu tu gobierno nacajě' zě cue' rdilalějě' laguedyijě', na'ra bisibě'jě' zidza. Lěscan' nu yedyi, o nu familia, chi rdilalějě' laguedyijě', huadzatza'jě', bira tzu'ujě' tzaže. ²⁶ Cana' nacarěn quie Satanás. Chi Satanás rbionan yaca taxi'ibi' quienan, chi rdilalěnan laguedyinan, bisuenan inabě'nan zidza.

²⁷ Na' le'e nale rbio'ga' taxi'ibi' yu'u laxta'o beně' tanun quie yela' huaca quie Beelzebú. Na'ra nia' le'e chi nacan cana', ¿nuži ru'e yela' huaca quie ja ben' quiele rbiojě' taxi'ibi'? Na'zi rulu'en quiele nequixile cabě' nale. ²⁸ Ně'ědi' rbio'ga' yaca taxi'ibi' conlě yela' huaca quie Bichi Be quie Diuzi. Lena' rulu'en abdyin yela' huaca quie Diuzi laole, pero birezaquele abdyinnan.

²⁹ 'Bisaque' tzu'u beně' žan yu'u quie tu ben' tzutzu huala ta si'ně' ta de quieně' chi biuquioně' lěně'. Chi uquioně' lěně', na'ra huazaque' si'ně' ta de quieně'. Cana' rua' quie xan' taxi'ibi', ruquioga'nan tacuenda bira inabě'nan.

³⁰ 'Nu ben' bizělě ně'ědi' tzaže, naca quieně' ca quie ben' rudie ně'ědi'. Nu ben' biracalě ně'ědi' rua' dyin quie Diuzi, naca quieně' ca quie ben' rchugu dyin quia'.

³¹ 'Tana' lena' rnia' le'e, zu Diuzi dispuesto si'ženě' yugulu xquia quie ja beně', yugulu di'idza' mala rnějě', pero chi rna ja beně': "Dyin quie taxi'ibi'" na' dyin quie Bichi Be quie Diuzi na', chi cana' rutasi runiojě' lěbě', bide yela' huazi'že quiejě' lao Diuzi. ³² Nutezi ben' rně condre ně'ědi', ben' naca bichi yugulu beně', zu Diuzi dispuesto yezi'ženě' dula' xquia quiejě'. Pero nu ben' rně: "Dyin quie taxi'ibi'" na' dyin quie Bichi Be quie Diuzi na', biyezi'že Diuzi dula' xquia de quiejě' dan' unajě' cana'. Tuziofi huanao dula' xquia quiejě' lějě'.

Uně Jesús quie ben' mala len quie ben' dya'a

(Lc. 6.43-45)

³³ Na' una Jesús:

—Nu yaga dya'a rbian tazixi dya'a, pero nu yaga mala birbian tazixi dya'a. Según cabè' naca tazixi dyia yaga, lena' rlu'en chi yaga dya'a, chi yaga mala. Ca nu yaga rbian tazixi dya'a, cana' nacarèn quia' como dan' rua' dyin dya'a racalia' benè'. Lena' ruquixile inale dyin quie taxi'ibi' rua'. Birue taxi'ibi' tadya'a. ³⁴ Ben' mala gula nacale! Bisaque' inale tadya'a como dan' binacale ben' dya'a. Ca naca di'idza' yu'u ru'ale, cana' nacan ta yu'u lu'u guicho laxta'ole. ³⁵ Ben' dya'a rnajè' tadya'a, dan' yu'u tadya'a lu'u guicho laxta'ojè'. Pero le'e rnale tamala, dan' yu'u tamala lu'u guicho laxta'ole. ³⁶ Na'ra rnìa' le'e, yugulu di'idza' mala rnè ja benè', huezaca'laon lao Diuzi. ³⁷ Según bi naque di'idza' rnèle dza rdale lao yedyi layu, huachugobè'cazi Diuzi quiele, chi de dula' xquia quiele, chi bide dula' xquia quiele.

Ben' malaja unabajè' ta hue Jesús tu milagro
(Mr. 8.12; Lc. 11.29-32)

³⁸ Na'ra yaca ben' partido fariseo len yaca ben' rusèdi ley quie Moisés, unajè' rëbijè' Jesús:

—Maestro, re'enndo' ilè'èndo' huelo' tu milagro tacuenda inezindo' chi naco' ben' use'ela' Diuzi.

³⁹ Na' una Jesús rëbinè' lèjè':

—Yaca ben' yu'u tamala lu'u guicho laxta'ohue, ben' rudyiga Diuzi tzala'la, re'entejè' ilè'èjè' tu milagro ta gaca seña ta inezijè' chi tali use'ela' Diuzi nè'edi'. Pero tuzi milagro ilè'èjè', hualè'èjè' ca milagro bè Diuzi dza uda profeta Jonás lao yedyi layu. ⁴⁰ Ca guca quie Jonás dza na', uyu'unè' lu'u lè'è tu bela ze tzona dza len tzona yela, cana' gacarè quia' nè'èdi', ben' naca bichi yugulu benè'. Huayu'a lu'u yu tzona dza len tzona yela. ⁴¹ Na'ra rnìa' le'e, huezuli yaca ben' yedyi Nínive gaojè' le'e xquia dza gaca juicio como dan' lèjè' sí, ptza'jè' pensari quiejè' caora udixogue' Jonás lèjè' di'idza' quie Diuzi dza na'. Pero le'e, biruzè'nagale quia' ba'ala'cazi nacara' ben' zera ca Jonás. ⁴² Lèscana' huezuli reina quie yaca yedyi nebaba Arabia gaohuè' le'e xquia dza gaca juicio como dan' lèbè' sí, uza'nè' yedyi quienè' zionè' zitu' gula ta uzè'naguè' ca di'idza' unè rey Salomón, ben' rioñe'e. Pero le'e, biruzè'nagale quia' ba'ala'cazi nacara' ben' zera ca rey Salomón.

Unè Jesús quie tu taxi'ibi' rero redyin guicho laxta'o benè'
(Lc. 11.24-26)

⁴³ Na' una Jesús:

—Cati rero bala ja taxi'ibi' lu'u guicho laxta'o ja benè', rdana ga naca bidyì rguilona ga suna. Caora biredzelena ga suna, na'ra rnèna: ⁴⁴ “Hueya'a ga beza'a.” Cati abedyinnan beyu'unan lu'u laxta'o ben' na' tatula gan' bronan, caora na' rlè'èna naca ben' na' ca quie tu yu'u dachi neluba dyè'èdi. ⁴⁵ Na'ra uyonan yexi'nan igadyi laguedyin ta nacara mala ca lèna. Cana' yu'ujan yugujan lu'u laxta'o ben' na'. Cana' racatera mala quienè' quele cati yu'un tuzin lu'u laxta'onè'. Cana' gacarè quiele nun quie dan' yu'u tamala lu'u guicho laxta'ole.

Bdyin zna' Jesús lènè' bi' bichinè' gan' zènè' rusèdinè' benè'
(Mr. 3.31-35; Lc. 8.19-21)

⁴⁶ Na' neru'elè Jesús benè' di'idza' cati bdyin znè'è lènè' yaca bi' bichinè'. Bega'njè' lali'a regulojè' lèbè' ta hue'lèjè' lèbè' di'idza'. ⁴⁷ Na'ra unè tu ben' zèlè Jesús rëbinè' Jesús:

—Babla' znao' len ja bi' bicho'. Nita'jè' lali'a, re'enjè' hue'lèjè' luè' di'idza'.

⁴⁸ Na' una Jesús rëbinè' ben' udixogue' lèbè' cati bdyin znè'è:

—Babla' zna'a len ja bi' bicha'. Pero nia' le'e, nita'rë ben' naca ca quie zna'a, len ben' naca ca quie bi' bicha' niga.

⁴⁹ Na' blu'e Jesús gan' zë ja ben' quienë' unë' rëbinë' ben' na':

—Ja ben' rale quia', nacajë' ca quie zna'a, ca quie bi' bicha'. ⁵⁰ Con nutezi ben' rue quie xti'idza' Xuza', ben' zu guibá, lëlëjë' nacajë' ca quie bi'bicha', ca quie bi' zana', ca quie zna'a.

13

Unë Jesús tu di'idza' quie ben' bë guza

(Mr. 4.1-9; Lc. 8.4-8)

¹ Na'ra guca dza na' uza' Jesús zan yu'u uyoguë' yeque'në' ru'a nisa lagun.

² Na' como dan' begu'udi' ben' zë gan' re'në', uyu'unë' lu'u barco ure'në'. Na' bega'n ja benë' ru'a nisa lagun. ³ Na'ra conlë di'idza' ta nacan irupa iyunala unë Jesús psëdinë' leyaquë' cani:

—Uyo tu be'mbyu guza trigo. ⁴ Na' ca rüeje' quie trigo, tu ruziozijë'n layu. Na'ra bala bini trigo yeque'jan tu neza. Na' bdyin bguini aodaoba'n. ⁵ Ibalan yeque'jan lado yo ga bižubatica yu. Na' laolëtejan dan' zuban yu lasi. ⁶ Cati bena oba, na' ubidyin dan' biyu'u luena zitu'. ⁷ Ibalan yeque'jan lado yëchi'. Na' bibë yëchi' lato gue'enin dyë'ëdi. ⁸ Ibalan yeque'jan ga naca yu dya'a. Na' bë'jan tsecho dya'a quien. Balan udyian tu gayuhua žuba' quien. Ibalan udyian zona galo žuba' quien. Ibalan udyian galobeche žuba' quien. ⁹ Chi babele dyë'ëdi', ulezënaga can' rnia' na'.

Una Jesús ga huen dyin di'idza' rusëdinë' benë'

(Mr. 4.10-12; Lc. 8.9-10)

¹⁰ Na'ra ubiga' ja ben' quie Jesús ga zënë' unabajë' lëbë':

—¿Bixquien' puro di'idza' ta nacan irupa iyunala rusëdio' benë'?

¹¹ Na' una Jesús rëbinë' lëjë':

—Ruzioñe' Diuzi le'e bi' re'en ina di'idza' rguixogue'n quie yela' r nabë' quie Diuzi. Pero yaca ben' binaca ben' quia', biuzioñe'e Diuzi lëjë'. ¹² Nu ben' ruzënaga cabë' rnia', huacalë Diuzi lëbë' ta tzioñe'enë' dyë'ëdi. Pero nu ben' biruzënaga cabë' rnia', huala'adyi'jë' cabë' tadao' abejë'. ¹³ Tana' lena' rguixogui'a benë' conlë yaca di'idza' ta nacan irupa iyunala, como dan' ba'ala'cazi rlë'ëjë' cabë' rua', ruezijë' ca ben' birlë'ë, ba'ala'cazi rejë' cabë' rnia', ruezijë' ca ben' bire. ¹⁴ Cana' naca quiejë' cabë' una profeta Isaías dza na' unë':

Ruzënagajë' dyë'ëdi, pero birioñe'ejë'.

Rlë'ëjë' dyë'ëdi, pero biracabë'jë'.

¹⁵ Cana' rüeje' dan' yu'u tazidi lu'u guicho laxta'ojë'.

Ruezijë' ca ben' bire, ruezijë' ca ben' netzudi' laohue.

Bire'enjë' ilë'ëjë', nica re'enjë' guejë'.

Bire'enjë' tzioñe'ejë', nica re'enjë' guidajë' ta inaojë' xneza Diuzi yela' na' yezi'ženë' dula' xquia quiejë'.

Cana' una Isaías dza na'.

¹⁶ Pero le'e sí, raca tahuen gula quiele dan' tali re'enle ilë'ële ca rue Diuzi, tali re'enle guele ca rna Diuzi. ¹⁷ Tali ca rnia' le'e, ben' zë, ben' unita' dza na', gu'unjë' ilë'ëjë' cabë' ta rlë'ële, gu'unjë' guejë' cabë' ta rele, pero biužaque'.

Udixogue' Jesús ca bi re'en inë di'idza' quie ben' bë guza

(Mr. 4.13-20; Lc. 8.11-15)

¹⁸ Na' una Jesús:

—Uzēnagale ta inia' le'e ca bi re'en inē di'idza' quie ben' bē guza. ¹⁹ Nu ben' ruzēnaga ca naca yela' rñabē' quie Diuzi, pero biralejē' bihue quieyaquē' xti'idza' Diuzi, hue xan' taxi'ibi' ta gala'adyi'jē' cabē' bejē'. Cana' raca quiejē' ca quie bini trigo yeque'jan tu neza. ²⁰ Lēscan' nu ben' redaohue ruzēnaga xti'idza' Diuzi, ²¹ pero bihue quieyaquē'n zidza, naca quiejē' ca quie bini trigo yeque' lado yo ga bižubatica yu biyu'u luena zitu'. Cati raca zēdi quiejē', cati rusaca benē' lējē' bizinaquezi tanun quie dan' rue quieyaquē' xti'idza' Diuzi, na'ra rusanjē'n, bira rue quieyaquē'n. ²² Lēscan' nu ben' ruzēnaga xti'idza' Diuzi, pero rdēbijē' bi raca quiejē' lao yedyi layu, rza'la'adyi'jē' yela' uña'a, naca quiejē' ca quie bini trigo yeque'n lado yēchi'. Dan' rdēbijē' bi raca quiejē' rza'la'adyi'jē' yela' uña'a, quie lena' biru'en lato huejē' dyin quie Diuzi. ²³ Pero nu ben' ruzēnaga xti'idza' Diuzi, na' ralejē'n hue quieyaquē'n, naca quiejē' ca quie bini trigo yeque'n yu dya'a bē'n usecho. Balan rbian tu gayuhua žuba'. Ibalan rbian tzona galo žuba'. Ibalan rbian galobechi žuba'. Cana' nacajē' ca quie bini trigo. Cana' gacarajē' mazara ben' nao xneza Diuzi.

Unē Jesús tu di'idza' quie guixi' mala len quie trigo

²⁴ Na'ra udixogue' Jesús itu di'idza', unē' rēbinē' lējē' cani:

—Rnia' le'e naca yela' rñabē' quie Diuzi ca quie tu ben' guza bini trigo layela quie. ²⁵ Pero du rēla caora rasinē', uyo tu bi' rudie lēbē' guzanē' bini quie guixi' mala lado trigo layela quie'. Na' beza'nē' zeyoguē' žan yu'u. ²⁶ Na'ra gu'uni guixi' mala lēbi len trigo. ²⁷ Na' uyo ja mozo quienē' yetixogue'jē' lēbē', najē' rēbijē' lēbē': “Señor, baguzando' puro bini trigo layela quio', ¿ga za' guixi' mala den lado trigo quio'?” ²⁸ Na' una xa'njē' rēbinē' lējē': “Tu ben' rudie nē'ēdi' bē cana'.” Na' una mozo quienē' rēbijē' lēbē': “¿Re'enlo' tziundo' tzeguelondo' guixi' mala?” ²⁹ Pero unē xan' mozo rēbinē' lējē': “Bihuele cana', dan' hualorēle trigo chan' na' galole guixi' mala. ³⁰ Ulesannan gue'enigaran lēbi. Cati yezi'a usecho quie trigo, cana' hua' mandado zagalo mozo quia' guixi' mala uquiojē'n manojō ibidyin tzeina. Na'tera yezi'jē' trigo yezi'tza'ojē'n žan lidyā'.”

Unē Jesús tu di'idza' quie tu bini mostaza

(Mr. 4.30-32; Lc. 13.18-19)

³¹ Na'ra udixogue' Jesús itu di'idza', unē' rēbinē' lējē' cani:

—Naca yela' rñabē' quie Diuzi ca quie tu bini mostaza ta guza be'mbyu layela quie'. ³² Tali naca bini mostaza tadao' bicu' ca yaca los demás ja bini. Pero cati re'enin racan tu yaga že, caora na' rdyin bguini rueba' lidyiba' lao taca'n.

Unē Jesús tu di'idza' quie lē'ēti' levadura

(Lc. 13.20-21)

³³ Lēscan' udixogue' Jesús itu ejemplo, unē' rēbinē' lējē' cani:

—Naca yela' rñabē' quie Diuzi ca quie lē'ēti' levadura. Rutupe nigula levadura len tzona medida yēzo trigo ta tzu'un duže cuba, na' chēžin. —Cana' una Jesús rēbinē' lējē'.

Con puro di'idza' ta nacan irupa iyunala udixogue' Jesús ja benē'

(Mr. 4.33-34)

³⁴ Na' con puro di'idza' ta nacan irupa iyunala udixogue' Jesús ja benē'. Biudixogue'nē' lējē' con di'idza' binaca di'idza' ta nacan irupa iyunala. ³⁵ Cana' bēnē' tacuenda uzu di'idza' ca di'idza' udixogue' profeta Isaías cabē' rnēn lē'ē guichi la'iya cani: Huaguixogue'nē' ja benē' zē di'idza' ta nacan irupa iyunala. Huanēnē' tu ta bineye ja benē' desde dza cati udiXu Diuzi yedyi layu.

Udixogue' Jesús cabè' re'en inè di'idza' quie guixi' mala ulè lado trigo

³⁶ Na' gudyi Jesús ja benè':

—Abeyudyi di'idza'.

Na' bedzatzajè' beza'rè Jesús beyu'unè' žan yu'u. Caora na' bebiga' ja ben' quienè' rëbijè' lëbè':

—Re'ennò' huu' cule yexi'idzo' nètò' quie di'idza' rnèn quie guixi' mala ulè lado trigo.

³⁷ Na'ra una Jesús rëbinè' lëjè':

—Nè'èdi' naca' bichi yugulu benè', naca quia' ca quie ben' raza bini trigo.

³⁸ Na' dyilayu ni naca quien ca quie layela ga raza' bini trigo. Na' yaca ben' rue quie xti'idza' Diuzi, naca quiejè' ca quie bini trigo. Na' ben' rue cabè' re'en xan' taxi'ibi', naca quiejè' ca quie guixi' mala. ³⁹ Na' xan' taxi'ibi' naca quien ca quie ben' guza guixi' mala. Bè' rezi'a usecho, lena' rnèn quie dza cati iyudyi dyilayu. Na' yaca ángel nacajè' ca quie mozo quia' rezi'jè' usecho.

⁴⁰ Cabè' hue ja mozo uzejjè' guixi' mala, cana' gaca quie ben' rue cabè' re'en taxi'ibi' bè' iyudyi dyilayu. ⁴¹ Nè'èdi', bichi yugulu benè', huase'ela' yaca ángel quia' txexi'jè' yugulu ben' rudze'yela laguedyi, len yugulute yaca los demás ben' napa dula' xquia. ⁴² Na' udze'jè' lëjè' lu'u gui' gabila cuedyiya'jè'. Tanto rei rlajè' gaojè' lejè'. ⁴³ Pero yaca ben' rue quie xti'idza' Diuzi, huata' xni' quiejè' ca tu rna' xni' oba. Cana' gaca quiejè' zujè' ga rnabè' Xuziro Diuzi tuzioli. Ulehue pensari cabè' nia' le'e, dan' ruen zi tziõe'ele.

Unè Jesús tu di'idza' quie tu tatzao' negachi'

⁴⁴ Na' una Jesús:

—Yela' rnabè' quie Diuzi nacan ca quie tu tatzao' zaca'n za'ala' gula ta negachi' lu'u yu. Na' caora bedzele tu be'mbyu len, becachi'nè'n tatula lu'u yu ga bedzelenè'n. Na'ra redaohuetzeguenè' tzionè' tzegueti'nè' yugulu ta de quienè' ta yeya'ohuè' layu na' ga bedzelenè' tu tatzao'.

Unè Jesús tu di'idza' quie tu perla zaca'n za'ala' gula

⁴⁵ Na' una Jesús:

—Yela' rnabè' quie Diuzi nacan ca quie tu ben' re'en ga'o tu perla zaca'n za'ala' gula. ⁴⁶ Caora abdzelenè' perla na', na'ra tzionè' tzegueti'nè' yugulu ta de quienè' ta yeya'ohuè' perla na'.

Unè Jesús tu di'idza' quie du yëxo

⁴⁷ Na' una Jesús:

—Yela' rnabè' quie Diuzi nacan ca quie du yëxo rudze' benè' lu'u nisadao' ga tzu'u yugu cue' bela. ⁴⁸ Caora abedza' bela du yëxo, na'ra rebiojè'n ru'a yu bidyi. Na' rbe'jè' rsërejè' bia dya'a, redze'jè'ba' lu'u ga'. Na' reru'unjè' tzala'la bia binaca dya'a. ⁴⁹ Cana' gaca cati iyudyi quie dyilayu. Huayo ja ángel ta tzesëryaquè' ben' mala len ben' dya'a. ⁵⁰ Na' huaru'unyaquè' yaca ben' mala lu'u gui' gabila cuedyiya'jè'. Tanto rei rlajè' gaojè' lejè'.

Unè Jesús tu di'idza' quie tu tagula len tu tacubi

⁵¹ Na'ra unabá Jesús rëbinè' lëjè':

—¿Baoyoñe'ele yugulu cabè' ta aonia' le'e?

Na' unajè' rëbijè' Jesús:

—Aja' Señor, aoyoñe'endo' yugun.

⁵² Na' una Jesús rëbinè' lëjè':

—Tahuen na' aoyoñe'ele, dan' nu ben' rsèdi guichi la'iya quie Diuzi, na' rioñe'enè' cabè' nan, naca quienè' ca quie ben' xan' yu'u, ben' gabi rdziogue

quie. Aozi'nè' tagula ta pca'n xuzinè' quienè'. Lèscan' bènè' gan tazëra tacubi. Tana' lena' bibi rdzioguenè' zan yu'u quienè'.

Cabè' bē Jesús cati bedyinnē' yedyi quienē' Nazaret

(Mr. 6.1-6; Lc. 4.16-30)

⁵³ Cati beyudyi bēllē Jesús leyaquē' di'idza', na' bezē'ē zeyoguē'. ⁵⁴ Na' bedyinnē' yedyi quiē', uzulaohuē' rusēdiē' ja benē' lu'u idao' sinagoga. Na'ra beban ja benē' rēbijē':

—¿Ga uyo ben' niga huesēdi como rioñe'enē' ta zē? ¿Cómo raquē' rue milagro? ⁵⁵ Na' zi'i carpintero naquē'. Znē'ē naca María. Naca bichinē' Santiago, len José, len Simón, len Judas. ⁵⁶ Lèscana'rē bi' zannē', nita'jabi' ladoro niga. ¿Ga psēdinē' cabē' dan' rnēnē' ra'o? —Cana' unajē' quie Jesús.

⁵⁷ Pero bibējē' lēbē' casa cabē' unē'. Na' una Jesús rēbinē' lējē':

—Con gatezi tzio ben' rguixogue' di'idza' quie Diuzi, nita' ben' hue lēbē' casa. Pero ben' lao yedyi quiē' len ben' naca familia quiē', bihuejē' lēbē' casa. —Cana' una Jesús rēbinē' lējē'.

⁵⁸ Tana' lena', bibē Jesús zē milagro gan', dan' bibējē' casa quienē'.

14

Cabè' guca cati bētijē' Juan bautista

(Mr. 6.14-29; Lc. 9.7-9)

¹ Na'ra guca dza na' naca Herodes gobernador, ben' r nabē' estado Galilea. Na' udixogue' yaca benē' Herodes cabē' rue Jesús. ² Na'ra una Herodes rēbinē' laguedyinnē':

—Ben' rue cana' naquē' Juan bautista. Bebannē' bezē'ē ga yu'u ja ben' huati. Tana' de fuerza quiē' ruenē' milagro.

³ Na' aozi' Herodes žgula bichinē' Felipe. Lēnigula na' laohuē' Herodías. Na' tanun quie Herodías bē Herodes mandado bēxuyaquē' Juan, bdze'jē' lēbē' lu'u dyiguiba, pquiojē' lēbē' cadēn. ⁴ Cana' bē Herodes como dan' una Juan gudyinnē' lēbē':

—Bireya'ala' huēla'onē' ca nigula quio'.

⁵ Na' gu'un Herodes gutinē' Juan, pero bdzebinē' ja benē' dan' rlē'ējē' Juan ben' rnē' lao laza Diuzi. ⁶ Na' cati uzu dza lani quie Herodes, uyo zi'i nigula Herodías ta bya'abi' lao ja ben' yu'u ja ga raca lani. Lega yaxē Herodes cabē' bēbi'. ⁷ Tanto yaxenē' cabē' bēbi' unē' rēbinē' lēbi':

—Con bitezi ta inabo' nē'ēdi', naguncaza'n, ruguntia' Diuzi.

⁸ Na'ra como dan' abega'nlēbi' zna'bi' di'idza' cabē' inababi' lēbē', na'ra unabibi' rēbibi' Herodes:

—Re'enda' gunlo' nē'ēdi' guicho Juan bautista dyian tu lu'u plato.

⁹ Cati bē rey Herodes cabē' una nigula dao', guquenē' bayēchi'. Pero bēnē' mandado huejē' cabē' unababi' lēbē', como dan' cana' abgunnē' Diuzi, babe ben' yu'uja lani ca di'idza' bē'lēnē' nigula dao'. ¹⁰ Na'ra bēnē' mandado yechugojē' luba' Juan ga yu'unē' lu'u dyiguiba. ¹¹ Na' yechugojē'n yesanjē' guicho Juan dyian lu'u plato. Bezi' nigula dao' len, beyu'ebi'n zna'bi'.

¹² Na' bdyin ben' quie Juan bezi'jē' cuerpo quienē' ta pcachi'jē'n. Ude na', uyojē' yetixogue'jē' Jesús.

Bgao Jesús ga'yo' mila benē'

(Mr. 6.30-44; Lc. 9.10-17; Jn. 6.1-14)

¹³ Na' cati unezi Jesús cabē' guca quie Juan, na'ra uzē'ē zioquē' cuinzē' lu'u barco bdyinnē' ru'a lagun ga bizu ja benē'. Pero cati unezi ja benē'

gan' zio Jesús, na' uza'jè' ziojè' ru'a yu bidyi yetilajè' lèbè'. ¹⁴ Cati bero Jesús lu'u barco, blè'èné' nita' ja ben' zè rbezajè' lèbè'. Na' beyèchi'la'adyi'nè' lèjè', beyuenè' ja ben' raca zhue' nu'ajè'. ¹⁵ Como dan' barala, na' uyo ja ben' quie Jesús yeguèdyijè' lèbè':

—Baodze' na'a. Gabi yu'u dyia niga. Na' gudyijè' yeyojè' ja yedyi re' ga'ala' ta ga'ojè' ta gaojè'.

¹⁶ Na' una Jesús rëbinè' lèjè':

—Biruen zi yeyojè'. Ulehue'jè' ta gaojè'.

¹⁷ Na' unajè' rëbijè' Jesús:

—Ga'yo'zi yèta xtila len chopazi bela de. Gabira bide.

¹⁸ Na' una Jesús rëbinè' lèjè':

—Uleguncaran niga.

¹⁹ Na'ra bē Jesús mandado cue' ja benè' lao guizi. Na' aozi'nè' ga'yo' yèta xtila len chopa bela. Na' bēxunè'n unè'è guibá rëbinè' Diuzi: “Diuxcalelo'.” Na' bzuzunè' yèta xtila, bē'nè'n ja ben' quienè', udisijè'n bē'jè'n benè'.

²⁰ Yugulujè' udaøjè' belojejè' dyè'èdi. Beyudyi bedaojè', bedza' chipchopa ga' naga ta yozo bega'n. ²¹ Ga'yo' mila be'mbyu udaoja, apartela ja nígula len ja xcuidi'.

Uza' Jesús lao nisa

(Mr. 6.45-52; Jn. 6.16-21)

²² Na'ra bē Jesús mandado tzu'u ja ben' quienè' lu'u barco ta cuialaojè' lèbè' tziojè' itzala' lagun. Na' bega'n Jesús ta yese'elè' ja benè' yeyojè' žan yu'u quiejè'. ²³ Bē' beyudyi bese'elè' ja benè' žan yu'u quiejè', na'ra zio Jesús urènè' lao ya'a tzegue'lènè' Diuzi di'idza' cuinzinè'. Cati uxin, nezu Jesús na' cuinzinè'. ²⁴ Na' nezu Jesús lao ya'a cati abdyin barco gatzo lagun. Na'ra uzulao rda be bedun', bda'n nisa lè'è barco, redyigan len guzu xcu'udzula, biru'en lato tenan. ²⁵ Na' du balara rza' Jesús lao nisa ubiguè' ga'ala' ga re'jè' lu'u barco. ²⁶ Cati blè'è ja ben' quienè' lèbè' rza'nè' lao nisa, na'ra bdzebijè' urediyia'jè' unèjè':

—iLudza' ben' huati rza' na'!

²⁷ Na' unè Jesús rëbinè' lèjè':

—iNè'èdi' Jesús! iBidzebile!

²⁸ Na' una Pedro rëbinè' Jesús:

—Señor, chi luè' na', ben lato sa' lao nisa guida' gan' zao'.

²⁹ Na' una Jesús rëbinè' lèbè':

—Uda, chi'.

Na' uyèzi Pedro lao barco uzulaohuè' rza'nè' lao nisa ta idyinnè' ga zè Jesús.

³⁰ Caora gucabè' Pedro rda be bedun' fuerte gula, na' bdzebinè' uzulaohuè' bëtoguè' lu'u nisa. Lena' urediyia'nè' rëbinè' Jesús:

—Psela nè'èdi', Señor.

³¹ Na'ra labèxute Jesús nè'è rëbinè' lènè':

—iBiži ledao'zi zudyi'ilèlo' nè'èdi'! ¿Bixquien' rdzebo'?

³² Cati beyu'ujè' lu'u barco, na' uleza be. ³³ Na'ra yaca ben' yu'u lu'u barco, uditzužibijè' lao Jesús rëbijè' lèbè':

—Luè' sí, tali naco' ži'i Diuzi.

Bebye Jesús ben' raca zhue', ja ben' quie yu nebaba Genesaret

(Mr. 6.53-56)

³⁴ Na' udejè' lao lagun bdyinjè' itzala' lagun ga nebaba Genesaret. ³⁵ Caora bezaque ja ben' nita' na' Jesús na', na'ra use'ela'jè' di'idza' lao yugulu ben' yedyi nita'ja na'. Na' nu'ajè' ben' raca zhue' bdyinjè' ga zè Jesús. ³⁶ Na'

unabajë' chi bihue'në' lato guxujë' siquiera diba zu ni'a žabë'. Na' yugulu ja ben' bëxuja len, beyacajë'.

15

Unë Jesús quie ta nuen benë' badza' lao Diuzi

(Mr. 7.1-23)

¹ Na'ra uza' bala ben' partido fariseo len bala ben' rusëdi ley quie Moisés, uza'jë' ciudad Jerusalén bdyinjë' ga zu Jesús. Na' ubiga'jë' rëbijë' lëbë':

² —¿Bixquien' birue ja ben' quio' cabë' naca costumbre quie xuzixta'oro? Birguibijë' na'ajë' cati zagaojë' tacuenda ilë'ë Diuzi lëjë' nacajë' yëri.

³ Na' una Jesús rëbinë' lëjë':

—¿Bixquien' reru'unle tzala'la cabë' mandado bë Diuzi huero, na' nenaole costumbre ruele ta biuna Diuzi? ⁴ Dza tiempote una Diuzi: “Gapala'nle xuzi žna'le.” Lëscan' una Diuzi: “Nu ben' rnaya' quie xuzi žnë'ë, reya'ala' gatinë'.”

⁵ Pero le'e rnale ru'en lato ina benë' yëbijë' xuzi žna'jë': “Bibi de guna' le'e, dan' yugulu ta de quia' babi'a Diuzi gacan gun quienë'.” ⁶ Le'e rnale chi yëbiri xuzi žna'ro cana', bira nacan cuenda quiero gacalëro xuzi žna'ro. Cana' rudyigale tzala'la cabë' mandado bë Diuzi huero, na' nenaole costumbre ruele ta biuna Diuzi. ⁷ ¡Le'e ben'rnë di'idza' de ladzazi! Dyë'ëdi udixogue' ben' profeta Isaías cabë' raca quiele caora bzunë' di'idza' lë'ë guichi la'iya quie Diuzi dza na'. Lëdi'idza' na' rnën caniga:

⁸ Lëben' niga rionela'adyi'jë' Diuzi de di'idza'zi, birionela'adyi'jë' në'ëdi' du guicho du la'adyi'jë'.

⁹ Bibi sirve gapala'një' Diuzi.

Ta racazi la'adyi'jë' rusëdijë' benë', yë' rzi'jë' rnajë' cana' una Diuzi.

¹⁰ Na'ra guzi Jesús ja benë' rëbinë' lëjë':

—Ulezëcara nagale ta tzioñe'ele: ¹¹ Ca ta tzu'u lu'u ru'a benë' gaojë', binacajë' badza' lao Diuzi. Pero di'idza' mala rero lu'u ru'ajë', lena' nuen benë' badza' lao Diuzi. —Cana' una Jesús rëbinë' lëjë'.

¹² Na'ra ubiga' ja ben' quie Jesús ga zënë' rëbijë' lëbë':

—¿Bigucabë'lo' bdza' ja ben' partido fariseo cabë' unao' bachi?

¹³ Na' una Jesús rëbinë' lëjë':

—Nacajë' ca quie guixi' mala. Na' biži puro bini dya'a raza Xuza' Diuzi zu guibá. Yugulu ta biguza Xuza' Diuzi, huadolon len luenan. ¹⁴ Ulesan quiejë'. Nacajë' ca quie ben' laochula, ben' tzhua'a itu ben' laochula. Chi tzhua'a tu ben' laochula itu ben' laochula tu neza, rupatejë' iguinujë' lu'u yëro.

¹⁵ Na' una Pedro rëbinë' Jesús:

—Yexi'idzo' nëto' bi re'en ina di'idza' baonao'.

¹⁶ Na' una Jesús rëbinë' lëjë':

—¿Lente le'e biuyoñe'erële? ¹⁷ ¿Binezile yugu ta rao benë' zion lu'u lë'ëjë', te na' yeguichijë'n binuen lëjë' badza' lao Diuzi? ¹⁸ Pero di'idza' mala rero lu'u ru'ajë', len ulën laxta'ojë'. Lena' nuen lëjë' badza' lao Diuzi. ¹⁹ Cati rero pensari mala lu'u laxta'ojë', caora na' rutijë' laguedyijë', rdalëjë' nigula quie ben' tula, rdalëjë' nigula cuidi', rbanjë' quie laguedyijë', rzi'jë' yë' laguedyijë', ru'ejë' di'idza' bizo. ²⁰ Chi ruejë' cana', nacajë' badza' lao Diuzi. Pero chi raojë' du bineyëri na'ajë', lena' binuen lëjë' badza' lao Diuzi. —Cana' una Jesús rëbinë' lëjë'.

Tu nigula binaca ben' Israel gulënë' quie Jesús

(Mr. 7.24-30)

²¹ Na' uza' Jesús zioquë'. Na' ga bdyinnë' nacan ga'ala' ga re' ciudad Tiro len ciudad Sidón. ²² Na' uza' tu nigula Cananea, ben' nita' ciudad na', zioquë' bdyinnë' ga zu Jesús. Rbediyi'a'në' unë' rulidzanë' Jesús:

—Señor, ži'i rey David luë', beyëchi'la'adyi' në'ëdi'. Yu'u taxi'ibi' lu'u laxta'o ži'ina' nigula. Lega ruluquen lëbi'.

²³ Pero ni tu di'idza' biunë Jesús. Na' ubiga' ja ben' quië' unajë' rëbijë' lëbë':

—Ulaolo' nigula ni, dan' za'në' zenaonë' ra'o, rbediyi'a'në'.

²⁴ Na' una Jesús rëbinë' lëbë':

—Lao ja ben' Israelzi aose'ela' Diuzi në'ëdi'. Nacajë' ca quie beco' ži'ila' aoniti tu neza.

²⁵ Na' ubiga' nigula ga zë Jesús, uditzunë' žibinë' laohuë' unë' rëbinë' lëbë':

—Señor, gualë në'ëdi'.

²⁶ Na'ra una Jesús rëbinë' lëbë':

—Bireya'ala' si'ro yela' huao ta rega'n rao yaca xcuidi', tzechu'unron ta gao yaca beco' dao'.

²⁷ Pero na' una nigula na' rëbinë' Jesús:

—Sí, Señor, pero lente yaca beco' dao' raoyacaba' yaca pedazo rguino layu ga rao yaca xcuidi'.

²⁸ Na' una Jesús rëbinë' lëbë':

—Zana', dan' rzudyi'ilëlo' në'ëdi' dyë'ëdi gula, huacan cabë' re'enlo'.

—Cana' una Jesús rëbinë' lëbë'.

Na'ra lëhora na'tezi, beyaca ži'inë' dya'a.

Beyue Jesús ja ben' zë, ben' raza mala quiejä

²⁹ Na' uza' Jesús zioquë' udenë' ru'a lagun quie Galilea, bdyinnë' urënë' ure'në' tu lao ya'a. ³⁰ Na' bdyin ja ben' zë ga zë Jesús. Nu'ajë' nu ben' ži, len ben' laochula, len ben' biraca rnë, len ben' neseco në'ë, len ben' neseco ni'e. Nu'ajë' zë ben' raza žhue'. Na' udixojë' lëjë' laohuë', beyuenë' lëjë'.

³¹ Cana' beban ja benë' cati blë'ëjë' cabë' bë Jesús quie ben' naca mala quie. Blë'ëjë' benë ben' biraca inë, blë'ëjë' abelë'ë ben' laochula. Na'ra unajë' rëbijë' laguediyijë': "Naca Diuzi quie ben' Israel ben' že." Cana' unajë'.

Bgao Jesús tapa mila benë'

(Mr. 8.1-10)

³² Na' guži Jesús yaca ben' quienë' unë' rëbinë' lëjë':

—Reyëchi'la'adya' yaca ben' niga, dan' baguca tzona dza zulëjë' në'ëdi' niga, abeya ta gaojë'. Bireya'ala' yesë'ela'jë' žan yu'u quiejë', dan' binegaojë' usu'unan lëjë' tu neza.

³³ Na' una ja ben' quienë' rëbijë' lëbë':

—Biži huero idzeleroyela' huao ta gao ja ben' zë niga. Gabi yu'u dyia ni.

³⁴ Na' una Jesús rëbinë' lëjë':

—ŽBala yëta xtila de quiele?

Na' unajë' rëbijë' Jesús:

—Gadyizin len tu chopazi bela dao'.

³⁵ Na' ra bë Jesús mandado cue' ja benë' layu. ³⁶ Na' uži'në' bëxunë' gadyi yëta xtila len ja bela, unë' rëbinë' Diuzi: "Diuxcalelo". Na'ra bžuzunë'n bë'në'n ben' quië', udisijë'n bë'jën yaca benë'. ³⁷ Na' aodaojë' yugulujë' belojë'. Ude beyudyi na', bedza' gadyi chicuiti tayožo bega'n. ³⁸ Na' aodao tapa mila be'mbyu, apartela nigula len xcuidi'. ³⁹ Ude beyudyi udaojë', bese'ela' Jesús lëjë' žan yu'u quiejë'. Na' uyu'unë' lu'u barco uza'në' zionë' yu nebaba Magdala.

16

Ja ben' partido fariseo len ja ben' partido saduceo gu'unjè' hue Jesús tu milagro ta ilè'ejè'

(Mr. 8.11-13; Lc. 12.54-56)

¹ Na'ra uyo ben' partido fariseo, len ben' partido saduceo yena'jè' Jesús ta huejè' trampa quienè' ta gaojè' lèbè' xquia chi bihue ca ta inabajè' huenè'. Cana' unabajè' huenè' tu milagro quie žan guibá ta ilè'ejè'. ² Pero na' una Jesús rëbinè' lèjè':

—Como dan' rna' žna guibá du zadze', na'ra inale: “Huen dya'a uxe.”

³ Lëscan' cati zè beo žna guibá du ziladao', na'ra inale: “Bihuen dya'a na'a.” Pero rnia' le'e, ben' tondo nacale. Banezile bi ta ilè'ële ta yezaque'le chi huen dya'a, chi bihuen dya'a, du na'a, du uxe. Pero binezile bi ta ilè'ële ta yezaque'le bi raca lao yedyi layu dza quiele. ⁴ Yela' ben' mala quiele, yela' psanla'adyi' Diuzi quiele, rnabale hua' milagro ilè'ële. Pero rnia' le'e, tuzi milagro ilè'ële, huelè'ële gaca quia' cabè' milagro guca quie ben' profeta Jonás.

Te beyudyi una Jesús cana', psannè' lèjè' uza'nè' zioguè'.

Bireya'ala' gacaro pensari ca pensari raca ja ben' partido fariseo len ja ben' partido saduceo

(Mr. 8.14-21)

⁵ Na' uza' Jesús lënè' yaca ben' quienè' ziojè' itzala' lagun. Na' agula'adyi' ja ben' quie Jesús hua'ajè' yèta xtila. ⁶ Na'ra una Jesús rëbinè' lèjè':

—Cani rnia' le'e, gapale cuidado quie levadura quie ben' partido fariseo len ben' partido saduceo.

⁷ Na' uzulao ja ben' quie Jesús rëbijè' laguedyijè':

—Quie dan' binu'aro yèta xtila unè' ra'o cana'.

⁸ Caora na' gucabè' Jesús cabè' pensari racajè', na'ra unè' rëbinè' lèjè':

—¿Bixquien' rdèbile quie yèta xtila? ¡Binegalele dyè'èdi quia'! ⁹ ¿Binezioñe'ele cabè' naca quia'? ¿Agula'adyi'le cabè' bia' quie lao ga'yo' yèta xtila? ¿Bireza'la'adyi'le bala ga' naga ta yožo bega'n bezi'le? ¹⁰ ¿Lëzi bireza'la'adyi'le cabè' bia' quie gadyi yèta xtila bžožoga'n udao ja tapa mila ja benè'? ¿Bireza'la'adyi'le bala chicuiti ta yožo bega'n bezi'le? ¹¹ ¿Bixquien' biuyoñe'ele quele quie yèta xtila unia' caora unia' le'e ta gapale cuidado quie levadura quie ben' partido fariseo len ben' partido saduceo?

¹² Na'ra uyoñe'ejè' biunè' Jesús quie levadurazi ta rudze'jè' yèta xtila. Unèrë Jesús quie pensari raca ja ben' partido fariseo len ja ben' partido saduceo. Unè' reya'ala' gapajè' cuidado ta bigacajè' pensari ca pensari raca ja ben' partido fariseo len ja ben' partido saduceo.

Unè Pedro naca Jesús Cristo, ben' use'ela' Diuzi

(Mr. 8.27-30; Lc. 9.18-20)

¹³ Cati bdyinlë Jesús yaca ben' quienè' yu nebaba Cesarea de Filipino, na'ra unè' rëbinè' ja ben' quie':

—¿Biži rna ja benè' naca' nè'èdi', bichi yugulu benè'?

¹⁴ Na'ra una ja ben' quie Jesús rëbinè' lèbè':

—Balajè' rnajè' naco' Juan bautista. Ibalajè' rnajè' naco' profeta Elías, o chi profeta Jeremías. Ibalajè' rnajè' naco' tu ben' profeta tula, ben' unita' dza na'la.

¹⁵ Na' una Jesús rëbinè' lèjè':

—¿Cabizi ina le'e naca' nè'èdi'?

¹⁶ Na'ra una Simón Pedro rëbinè' lèbè':

—Luè' naco' Cristo, ži'i Diuzi, ben' neban tuzioli.

¹⁷ Na'ra una Jesús rëbinë' Pedro:

—Tahuen gula baonao', Simón, ži'i Jonás. Quele benë' bzioñe'enë' luè' cabë' naca' në'edi', dechan' Xuza' Diuzi zu guibá. ¹⁸ Nè'edi' rnia' luè' naco' Pedro, ta inaro xti'idza'ro “yo”. Con cabë' unao' quia' unao' naca' ži'i Diuzi, cana' cuioga' yaca ben' gale quia', yaca ben' rue quie xti'idza'. Ba'ala'cazi chi yugulu taxi'ibi' huejan dila ta udyiagui'jan ja ben' rale quia', bisuejan huejan gan. ¹⁹ Guna' luè' yela' r nabë' quia' ta tzetixogue'lo' ja benë' bi huejè' ta tzu'ujè' ga r nabë' Diuzi. Con cabë' yëbo'jè' huejè', nacan zi huejè'n, na' huazu Diuzi puesto con ca inao'. Lëscan' con cabë' yëbo'jè' bihuejè', nacan zi bihuejè'n, na' lëscan' huazu Diuzi puesto con ca inao'.

²⁰ Na' ra gudyi Jesús lëjè' ta biquixogue'jè' benë' de que lëbë' naquë' Cristo.

Udixogue' Jesús cabë' gaca quie cati gatinë'

(Mr. 8.31—9.1; Lc. 9.22-27)

²¹ Na'ra uzulao Jesús ruxi'idze'në' yaca ben' quie' de que ruen zi yeyonë' ciudad Jerusalén. Ruxi'idze'në' lëjè' cabë' usaca yaca benë', len ja ben' r nabë', len ja xan' pxuzi, len ja ben' rusëdi ley quie Moisés lëbë', na' gutijè' lëbë', pero huebannë' lao tzona dza. ²² Na'ra uquië' Pedro Jesús tzala'la uzulaonë' rdilanë' Jesús rëbinë' lëbë':

—¡Bigue'en Diuzi gaca quio' cabë' nao', Señor! ¡Nica gacazi quio' luè' cana'!

²³ Na'ra uyëcho Jesús ta inë Pedro laohué' rëbinë' lëbë':

—Bebiga' tzala'la, Satanás. Tazëdi gula ruelo' quia'. Biraco' pensari quie Diuzi. Pensari quie benë' yu'ulo'.

²⁴ Na'ra una Jesús rëbinë' ja ben' quienë':

—Chi nu ben' re'en inao në'edi', re'ennan bira inaoyaquë' ca rna pensari quieyaquë'. Re'ennan bidzebiyaquë' naoyaquë' në'edi' yugu dza, ba'ala'cazi ruen žudyi guti benë' leyaquë'. ²⁵ Nu ben' rdzebi inao në'edi', dan' rdzebinë' gatinë' tanun quia', bihue' Diuzi lëbë' yela' neban tuzioli. Pero nu ben' inao në'edi' birdzebinë' gatinë' tanun quia', hue' Diuzi lëbë' yela' neban tuzioli.

²⁶ ¿Biži gan de quie nu benë' anaca quie lao yugulute ta de lao yedyi layu, chi bigata' yela' neban quie' tuzioli? ¿Ca gacala dumi re'ennan ta ga'o yaca benë' yela' naban tuzioli? ²⁷ Naca' bichi yugulu benë'. Huaya'a, pero na' yeguida' tatula lao yedyi layu, zeyu'a yela' r nabë' quie Xuza'. Caora na' yeguidalia' yaca ángel quienë' ta ichugulia' quie ja benë', quižoga'jè' cabë' bëjè' dza udajè' lao dylayu, chi bëjè' tahuen, chi bëjè' tamala. ²⁸ Tali rnia' le'e, binegati bala le'e nita' niga len në'edi' tu binelë'ë inabi'a lao yedyi layu, në'edi' bichi yugulu benë'.

17

Ca guca bë' betza' cuin Jesús zaca'lao lao yaca ben' quienë'

(Mr. 9.2-13; Lc. 9.28-36)

¹ Na'ra guca lao xopa dza, uquië' Jesús Pedro, len Santiago, len Juan bi' bichi Santiago, uza'jè' ziojè' tu lao ya'a sibi. ² Na' zë Jesús laojè' cati betza' cuinnë', una' laohué' ca xni' oba. Na' žabë' betza'n una'n bezëri gula ca xni' gui'. ³ Na'ra blë'ëjè' labdyinte Moisés len Elías ru'elëjè' Jesús di'idza'. ⁴ Na' una Pedro rëbinë' Jesús:

—Señor, tahuen na' nita'ndo' niga. Chi re'enlo', huendo' tzona yu'u guizidao'. Huendo' tun quio', huendo' itun quie Moisés, len itun quie Elías.

⁵ Na' tu raca zë Pedro nanë' cana', cati za' tu beo bezëri gula bdubin lëjè'. Na' lu'u beo na' bejè' tu rchi' benë' unënë' në':

—Lëzi'ina' niga, lega nedyë'ëda'në'. Lega rexeda' ca ruenë'. Ulezënaga cabë' rnanë'.

⁶ Na' cati be ja ben' quie Jesús cana', na' udze'jè' gutajè' layu guzu ru'ala dan' bdzebitzeguejè'. ⁷ Na'ra bebiga' Jesús gan' dejè' na' blapanë' lèjè' unë' rëbinë' lèjè':

—Uleyasa, bidzebile.

⁸ Na' cati beyasajè', rna'jè' tuzi Jesús zënë' na'. Ganura nita' len lëbë'.

⁹ Na' bè' zeza'jè' zeyëzije' lë'ë ya'a na', una Jesús rëbinë' lèjè':

—Bi quixogue'le ja benë' cabë' ta blë'ële guca quia', në'ëdi', ben' naca bichi yugulu benë'. Caora agutia' bebana', na'ra huazaque' quixogue'lejè'.

¹⁰ Na'ra una ja ben' quie Jesús rëbijè' lënë':

—Rna yaca ben' rusëdi ley quie Moisés de que za' guida Elías tanëro, na'ra guida ben' ise'ela' Diuzi. ¿Ta balejè' rna'jè' cana'?

¹¹ Na' una Jesús rëbinë' lèjè':

—Tali na' za' guida Elías tanëro, ucuezanë' duzete cuenda guida itu ben' ise'ela' Diuzi. ¹² Pero në'ëdi' rnia' le'e, abida Elías, pero bibezaque ja benë' chi lëbë'. Psacajè' lëbë' bizinaquezi. Lëscan' në'ëdi', ben' naca bichi yugulu benë', usacajè' në'ëdi' bizinaquezi.

¹³ Na'ra gucabë' ben' quie Jesús unënë' quie Juan bautista caora unë': "Tali na' za' guida Elías tanëro."

Beyue Jesús tu xcuidi' byu yu'ubi' taxi'ibi' mala gula

(Mr. 9.14-29; Lc. 9.37-43)

¹⁴ Cati bediyin'jè' ga negu'udi' ja benë', na'ra ubiga' tu be'mbyu gan' zë Jesús uditzunë' zibinë' laohuë' unë' rëbinë' lëbë':

¹⁵ —Señor, ¿biyeyëchi'la'adyo' zi'ina'? Racabi' zuguti. Lega rusacan lëbi'. Tazë lasa babzalan lëbi' lao gui' len lu'u nisa. ¹⁶ Ni rdehua'abi' lao ja ben' quio', pero birzaque'jè' yeyuejè'bi'.

¹⁷ Na' una Jesús rëbinë' ben' zu na':

—Le'e biralele quia'. Biyu'ule pensari dya'a. ¿Gaca tu tiempo sulia' le'e, na' bigalele quia'? ¿Gaca tu tiempo sulia' le'e, na' birioñe'ele? Yexi'bi' niga.

¹⁸ Na'ra udila Jesús taxi'ibi' yu'u lu'u laxta'o xcuidi' byu. Na' bebioguë' lenan. Cana' labeyacatebi'.

¹⁹ Ude beyudyi na', uquië' ben' quie Jesús lëbë' tzala'la unajè' rëbijè' lëbë':

—¿Bixquien' biuzaque'ndo' yebiondo' taxi'ibi'?

²⁰ Na' una Jesús rëbinë' lèjè':

—Biuzaque'le dan' binegalele dyë'ëdi. Tali rnia' le'e, naca bini mostaza tu bini dao' bicu'zi. Na' chi hue quiele xti'idza' Diuzi la'acazi lë'ëti'dao' bicu'zi ca tadao' bicu' naca bini mostaza, huazaque' yëbile tu ya'a: "Beyo yesu na'la", na' huayon. Pues huazaque' huele yugulute. ²¹ Pero ca naca taxi'ibi' bebioga' na'a, chi biulidzale Diuzi, chi bihuele ubasi, bisaque' cuiolen yeyon.

Udixogue' Jesús tatula cabë' gaca quië' bè' gatinë'

(Mr. 9.30-32; Lc. 9.43-45)

²² Tu raca rdalë Jesús ben' quienë' estado Galilea, udixogue'në' lèjè' cabë' gaca quienë' dan' naquë' bichi yugulu benë'. Unë' usedyin ja benë' lëbë' lao na'a ja ben' rudie lëbë' ²³ ta gutijè' lëbë', pero huebannë' tatula gaca lao tzona dza. Cati be yaca ben' quienë' cabë' unë', guque'jè' bayëchi' gula.

Unë Jesús quie impuesto quie idao' rna'bë'ra

²⁴ Na'ra uza' Jesús lënë' ja ben' quië' ziojè' bdyin'jè' ciudad Capernaum. Na' uyo ben' huequiizu quie idao' rna'bë'ra yena'jè' Pedro unajè' rëbijè' lëbë':

—¿Biquiizu maestro quiele impuesto quie idao' rna'bë'ra?

²⁵ Na' una Pedro rëbinë' lëjë':

—Aja', huaguižunë'n.

Na' uza' Pedro zionë' žan yu'u. Cati bdyinnë' žan yu'u, na' una Jesús rëbinë' lëbë':

—¿Bi ca inao', Simón? ¿Cati ruquižu ja rey impuesto, nuži ruquižujë'?

¿Ruquižujë' ben' yedyi quiejë' o chi ruquižojë' ben' za' yedyi tula?

²⁶ Na' una Pedro rëbinë' lëbë':

—Ruquižujë' ben' za' yedyi tula.

Na' una Jesús rëbinë' lëbë':

—Tana' lena' biruen zi quižu ben' yedyi quie rey impuesto. ²⁷ Pero ta biidza' nitujë' ra'o, quizoro quie impuesto. Na' uyo ru'a lagun, bdze' yëchi' lu'u nisa. Cati guëbi bela len, yeya'ala'n len lëba', caora na' ixa'lo' ru'aba' yedzelelo' centavo ta quizulo' para luë' len në'ëdi' quie impuesto. Na' uyo yetižo'n na'a.

18

¿Nuži ben' nacara ben' belao?

(Mr. 9.33-37; Lc. 9.46-48)

¹ Na'ra bebiga' yaca ben' quie Jesús unajë' rëbijë' lëbë':

—¿Nuži ben' nacara ben' belao entre nëto'?

² Na' guži Jesús tu xcuidi' byu bzunë'bi' gatzo la'ojë'. ³ Unë' rëbinë' lëjë':

—Tali rnia' le'e, chi biutza'le pensari quiele, galele quie Diuzi ca rale nu xcuidi' quie xuzibi', bisaque' tzirole guibá ga rnabë' Diuzi. ⁴ Nu ben' rzudyi'ilë Diuzi cabë' rzudyi'ilë xcuidi' xuzibi', lëben' na' nacara ben' belao guibá ga rnabë' Diuzi. ⁵ Nu ben' rzi' xcuidi' ca bi' niga tanun quia', nuen quienë' lente në'ëdi' rzi'rënë'.

Unë Jesús nacan zudyi gula huero tamala

(Mr. 9.42-48; Lc. 17.1-2)

⁶ Na' una Jesús:

—Nu ben' rudze'yela tu xcuidi' rale quia' ta huebi' tamala, hue Diuzi lëbë' castigo že gula. Tadya'acala quienë' erio tu yo že luba'në' tzechu'unjë' lëbë' lu'u yao že ga naca zitu' gula, quele ca castigo hue Diuzi lëbë'. ⁷ Nacan bayëchi' gula quie ja ben' nita' lao yedyi layu, dan' birdziogue nu rudze'yela lëjë' huejë' tamala. Nita'cazi nu rudze'yela ja benë' huejë' tamala, pero hue Diuzi castigo že gula nu ben' rudze'yela benë' huejë' tamala.

⁸ 'Quie lena', chi rnën le'e huelële ni'a na'ale tamala, nacalan dya'a ichugulen chu'unlen zitu' tzirole guibá ca ben' nedyipa ni'a në'ë, quele ca ta tzirole gui' gabila tuzioli len ni'a na'ale. ⁹ Lëscan' chi rnën le'e huelële laole tamala, nacalan dya'a cuiolen chu'unlen zitu' tzirole guibá ca ben' nero yolaohue, quele ca ta tzirole gui' gabila len rupa la'a yolaole.

Unë Jesús tu di'idza' quie beco' zi'ila', bia uniti

(Lc. 15.3-7)

¹⁰ Na' una Jesús:

—Bireya'ala' ilë'ële zi' nu xcuidi' rale quia'. Rnia' le'e zu ángel, ben' rapa ja xcuidi', zujë' lao Xuza' Diuzi zu guibá yugu dza. ¹¹ Në'ëdi', ben' naca bichi yugulu benë', uza'a bida' lao dylayu tacienda ute usela' yugu ben' nita' lao yedyi layu como dan' yela' napa xquia quiejë' tzirojë' lao gui' gabila.

¹² ¿Bica nale? Chi rapa tu be'mbyu tu gayuhua beco' zi'ila', na' aoniti tuba', ¿quele uca'nnë'jaba' na'azi tu tzediloguë' bia uniti? ¹³ Chi yedzelenë'ba', lega

yedaohuenë' biunitiba'. Redaohuenë' quie yaca bia biuniti, pero redao-hueteranë' quie bia uniti bedzela. ¹⁴ Lëscan' Xuzi Diuzi zu guibá, bire'ennë' initi ni tu xcuidi'.

*Cabë' reya'ala' huero si'zero quie laguedyiro
(Lc. 17:3)*

¹⁵ Na' una Jesús:

—Chi bë tu ben' rue quie xti'idza' Diuzi tu tamala quio', reya'ala' hue'lao'në' tu di'idza' rupazile ta inezinë' ca tamala bënë' quio'. Cana' gacalëlo'në' usannë' tamala, huenë' tadya'a. ¹⁶ Pero chi bihuenë' casa quio', na' reya'ala' guëzo' ichopa tzona ben' rue quie xti'idza' Diuzi ta gacajë' testigo. Cana' inita' chopá tzona ben' naca testigo quio' cabë' naca di'idza' hue'lao'në'. ¹⁷ Chi bihuenë' casa quie ja testigo quio', na'ra yëbo' ja yugulu ben' rue quie xti'idza' Diuzi cabë' dan' bënë' quio'. Na' chi bihuenë' casa quie ja yugulu ben' rue quie xti'idza' Diuzi, na'ra reya'ala' ilë'ëlenë' ca nu ben' binuebë' chi zu Diuzi, ilë'ëlenë' ca nu ben' mala gula.

¹⁸ 'Tali rnia' le'e, con cabë' yëbile yaca ben' rue quie xti'idza' Diuzi ta hueyaquë' quie ben' bë tamala, nacan zi hueyaquë'n, huazu Diuzi puesto con ca inale. Lëzi con cabë' yëbile yaca ben' rue quie xti'idza' Diuzi ta bihueyaquë' quie ben' bë tamala, nacan zi bihueyaquë'n, lëscan' huazu Diuzi puesto con ca inale.

¹⁹ 'Lëzi rnia' le'e, chi chopá le'e bega'nle de acuerdo hue'lële Xuza' Diuzi zu guibá di'idza', inabale bi ta re'enle huenë', na' huenë' ca ta unabale huenë'.

²⁰ Lëzi rnia' le'e, ga regu'udi' chopá tzona ben' rale quia', rulidzajë' në'ëdi', nazua' gatzo la'ojë'.

²¹ Na'ra bebiga' Pedro ga zë Jesús unë' rëbinë' lëbë':

—Señor, ¿bala lasa ruen zi si'zia' quie ben' rue quie xti'idza' Diuzi ca tamala ruenë' quia'? ¿Lao gadyi lasazi si'zia' quienë'?

²² Na'ra una Jesús rëbinë' Pedro:

—Quele lao gadyi lasazi si'zelo' quienë', pero con balatezi lasa inabanë'n si'zelo' quienë'.

Bzu Jesús tu ejemplo quie tu mozo, ben' bigu'un si'ze quie laguedyi

²³ Na' una Jesús:

—Na' rnia' le'e cabë' rnabë' Diuzi. Ruenë' ca nu rey, ben' blë ja mozo quienë' cuenda gaca tu reya'ala'jë' quienë'. ²⁴ Uzulaonë' ruenë' cuenda len ja mozo quie' cati yexi'në' tunë', ben' reya'ala' quienë' dumi ze gula. ²⁵ Pero como bide dumi ta yeguižuguë' quie rey, na'ra bë rey mandado guti'në' yugulu ta de quienë', huenë' dyin sin lažu len nigula quienë' len zi'inë' ta yela' ta reya'ala'në' quie rey. ²⁶ Na'ra uditzužibi mozo na' lao rey na', unabayëchi'në' rëbinë' rey: "Señor, uži'ze quia'. Nayequizuga'n duženan." ²⁷ Na' beyëchi'la'adyi' rey na' lëbë', unë' rëbinë' lëbë': "Huazi'zia' quio', gabi reya'alo' quia'. Anaco' libre." ²⁸ Cati beronë' gan' zu rey na', na'ra bedilanë' itu mozo laguedyinë', ben' reya'ala' quienë' tu chopá tzona dumi dao'. Na' aoženë' du luba'në' rëbinë' lënë': "¡Udižu ta reya'alo' quia'!" ²⁹ Na'ra uditzužibi laguedyinë' unabayëchi'në' rëbinë' lënë': "Señor, uži'ze quia'. Nayequizuga'n duženan." ³⁰ Pero bigu'unnë', na' uyonë' yedze'në' lënë' lu'u dyiguiba ta yeguižunë'n. ³¹ Cati blë ja mozo tula cabë' bënë' quienë', lega beyëchi'la'adyi'jë' lënë' uyojë' yegüedyijë' rey na' ca ta užacanë'. ³² Na'ra guzi rey na' mozo quie' unë' rëbinë' lënë': "¡Ben' mala gula naco'! Në'ëdi' uži'zia' quio' ca ta reya'alo' quia' como dan' unabayëcho' laohua'. ³³ Reya'ala' yeyëchi'la'adyi'rao' laguedyilo' cabë' bia' në'ëdi', beyëchi'la'adya'

luè'." ³⁴ Na'ra bdza'tzegue rey na' lènè'. Bènè' mandado udze'lè' lènè' lu'u dyiguiba ta yeguižunè'n ta reya'ala'nè' quienè'.

³⁵ Na' bè' beyudyi di'idza' una Jesús, unè' rëbinè' ben' quienè':

—Cabè' bè' rey na', cana'rè' hue Xuza' Diuzi zu guibá conlè'le'e, chi bisi'zele quie lagueidyile du guicho du la'adyi'le cabè' tamala bènè' quiele, lëscan' bisi'ze Diuzi le'e cabè' tamala ruele. —Cana' una Jesús rëbinè' lèjè'.

19

Unë Jesús cabè' naca quie ben' rusan lagueydi
(Mr. 10.1-12; Lc. 16.18)

¹ Te beyudyi una Jesús cana', uza'nè' estado Galilea, ziolènè' yaca ben' quiè' estado Judea itzala' yao Jordán. ² Na' unao ja ben' zè' lèbè' ga zioğuè' beyuenè' ja ben' raca žhue'.

³ Na'ra bebiga' chopa tzona ben' partido fariseo ga zè' Jesús ta huejè' lèbè' trampa gaojè' lèbè' xquia. Tana' unajè' rëbijè' lèbè':

—¿Ta bala nitu nitu biru'en lato usanjè' nigula quiejè'?

⁴ Na' una Jesús rëbinè' lèjè':

—¿Binena'le cabè' rnè' lè'è' la'ya guichi quie Diuzi? ¿Binenezile cabè' bènè' cati ulëchinè' dyilayu, bzaloguè' tu be'mbyu len tu nigula?

⁵ Lëscan' una Jesús rëbinè' lèjè':

—Quie lena' rusan be'mbyu xuzi žnè'è' ta sulènè' nigula quienè', gacajè' tuzi. ⁶ Cati banacajè' tuzi, bira naca quiejè' ca quie chopa benè'. Dyin quie Diuzi nuelèjè' tuzi. Tana' lena' biru'en lato usanjè' lagueydi'.

⁷ Na' unajè' rëbijè' lèbè':

—¿Bixquien', chi', bè' Moisés lato ichisa be'mbyu guichi ga rue'n di'idza' bira re'ennè' sulènè' nigula? Na' hue'nè' nigula guichi ta usannè' lènè'.

⁸ Na' una Jesús rëbinè' lèjè':

—Yela' zidi quie ja benè' bè' Moisés lato usanjè' nigula quiejè'. Pero dza ulëchi Diuzi dyilayu, bigu'unnè' hue yaca benè' cana'. ⁹ Nè'èdi' rnia' le'e, chi rusan be'mbyu nigula quiè', na' uzi'nè' nigula tula, lena' nacan xquia quiè' lao Diuzi. Chi psannè' lèbè' dan' udalènè' be'mbyu tula, lena' binacan xquia quiè' lao Diuzi. Lëscan' chi yezi' be'mbyu tu nigula psan xquihue, lena' nacan xquia quiè' lao Diuzi.

¹⁰ Na' una ben' quie Jesús rëbinè' lèbè':

—Chi nacan cabè' rnao' quie be'mbyu len nigula quienè', bisi'calanè' nigula.

¹¹ Na' una Jesús rëbinè' lèjè':

—Quele yugu ja benè' rioñe'ejè' cabè' rnè' lè'è' guichi la'ya quie Diuzi. Yaca ben' bè' Diuzi yela' rioñe'e quie, lèjè' rioñe'ejè'n. ¹² Bala ja be'mbyu binaca quiejè' sulèjè' nigula. Cana' naca quiejè' cati golotejè'. Ibala ja be'mbyu binaca quiejè' sulèjè' nigula, dan' ulio benè' bini quiejè'. Ibala ja benè' bisulèjè' nigula tachuenda huejè' puro dyin quie Diuzi. Nu ben' ruzènaga cabè' rnia', reya'ala' uzënagajè' dyè'èdi.

Bëla'ya Jesús ja xcuidi'
(Mr. 10.13-16; Lc. 18.15-17)

¹³ Na'ra nequiè' ja benè' bala ja xcuidi' ga zè' Jesús ta guxonè' guichojabi' ta huela'iyane' lëjabi' hue'lènè' Diuzi di'idza' tanun quiejabi'. Pero ja ben' quienè' uzulaojè' rdilajè' ja ben' nequiè' ja xcuidi'. ¹⁴ Na' una Jesús rëbinè' ben' quiè':

—Ulesan quiejë'. Guidagara ja xcuidi' sulëjabi' në'ëdi'. Nu ben' tzio ga rñabë' Diuzi ruen zi sudyi'ilëjë' Diuzi cabë' rzudyi'ilë xcuidi' len xuzijabi'.

¹⁵ Na' bëxonë' guicho ja xcuidi' ta bëla'iyane' lëjabi'. Ude na' uzë'ë zioquë'.

*Tu ben' ru'abe nacanë' ben' uña'a bë'lënë' Jesús di'idza'
(Mr. 10.17-31; Lc. 18.18-30)*

¹⁶ Na'ra uyo tu ben' ru'abe yena'në' Jesús. Na' unanë' rëbinë' lëbë':

—Maestro, ben' huen naco'. ¿Ca bi reya'ala' hua' ta gata' yela' neban quia' tuzioli'?

¹⁷ Na' una Jesús rëbinë' lënë':

—Ben' huen unao' në'ëdi'. Tahuen na' unao' në'ëdi' cana', como dan' tuzi Diuzi naquë' ben' huen. Na' chi re'enlo' tzio' guibá gata' yela' neban quio' tuzioli, ruen zi hue quio' cabë' naca mandamiento quie Diuzi.

¹⁸ Na' unanë' rëbinë' Jesús:

—¿Ca bi mandamiento reya'ala' hue quia'?

Na' una Jesús rëbinë' lënë':

—Bigutio' benë', bitalao' žgula ben' tula, bicuanlo' quie benë', bisiu' yë'.

¹⁹ Gapala'nlo' xuzi žnao', edyë'ëlo' benë' ca nedyë'ëlo' cuinlo'.

²⁰ Na' una ben' ru'abe rëbinë' Jesús:

—Yugulute cabë' nao', rua'nan cati nacatia' xcuidi'. ¿Bizira ta rdziogueda' hua'?

²¹ Na' una Jesús rëbinë' lënë':

—Chi re'enlo' huelo' yugulu ca re'en Diuzi huelo', uyo yeguëti' ta de quio', bë' ja ben' yëchi' centavo quien. Chi huelo' cana', na'ra gata' tadya'a quio' ga zu Diuzi guibá. Na' guido' inaolo' në'ëdi'.

²² Pero cati be ben' ru'abe ca una Jesús, na'ra zeyonë' raquenë' bayëchi' dan' nacanë' ben' uña'a gula.

²³ Na'ra una Jesús rëbinë' ja ben' quië':

—Tali rnia' le'e, zëdi gula nacan tzio yaca ben' uña'a guibá ga zu Diuzi.

²⁴ Rnia' le'e tatula, cabë' nacan zëdi gula te tu camello lu'u ni'a yëchi', cana' nacarën zëdi quie ben' uña'a tzionë' ilë'ënë' ga zu Diuzi guibá.

²⁵ Na' bë' be ja ben' quie Jesús cabë' unë', tu bebanzijë' unajë' rëbijë' laguedyijë':

—¿Ca nuži saque' tzio guibá ga zu Diuzi?

²⁶ Na' una' Jesús rëbinë' lëjë':

—Ca ta bigaca ja benë' huejë', Diuzi sí, racanë' ruenë'n como dan' raca rue Diuzi yugulute.

²⁷ Na'ra una Pedro rëbinë' Jesús:

—Señor, nusando' yugulu ta de quiendo' ta inaondo' luë'. ¿Ca biži ta gaca quiendo' guibá?

²⁸ Na' una Jesús rëbinë' lëjë':

—Tali rnia' le'e, cati idyin dza yecubi yugulute ta de na'a, cati cui'a në'ëdi', ben' naca bichi yugulu benë', xlatoga', na'ra le'e, ben' unao' në'ëdi', caora na' cue'rële lao chipchopa xlatole ta ichugulile lao chipchopa cue' ben' Israel.

²⁹ Rnia' le'e, yugu ben' psan žan yu'u quie, o chi nu biche, o chi nu zane, o chi nu xuze žnë'ë, o chi nu žgule, o chi nu ži'ine, o chi nu layu quie tanun quia' në'ëdi', hue'ra Diuzi lëbë' tu gayuhua lasa mazara ca ta psannë'. Lëzi hue' Diuzi lënë' yela' neban quienë' tuzioli. ³⁰ Pero bala ben' naca ben' belao niga lao yedyi layu, bira gacajë' ben' belao dza yedyinjë' ga zu Diuzi. Lëscan' bala ben' binaca ben' belao niga lao yedyi layu, huacajë' ben' belao dza yedyinjë' ga zu Diuzi.

20

Unë Jesús tu di'idza' quie ja ben' bë dyin

¹ Na' una Jesús:

—Na' rnia' le'e cabè' rue Diuzi. Ruenè' ca nu ben' xan' layela, ben' uyo balara yeguelè' benè' di'idza' ta yezi'jè' usecho quie bedzuli' quienè'. ² Na' bè'lènè' ben' hue dyin quienè' di'idza' ta quizuguè' lèjè' tu dumi plata tu dza. Ude na' use'elè' lèjè' tzeguejè' dyin layela quienè'. ³ Ude na' uzè'è' zioguè' ca du las nueve quie zila. Na' blè'ènè' bala ben' rda cana'zi la'o yedyi. ⁴ Na' unè' rëbinè' lèjè': "Uletziorè le'e, tzeguele dyin yezi'le usecho quia'. Naquizuga' le'e quie tu dza quiele." Na' uyojè' hue dyin quienè'. ⁵ Na' uzè'è' zioguè' tatula ca du la'odza, bënë' cabè' bënë' zila quie ben' hue dyin quienè'. Lèzi uzè'è' zioguè' tatula ca du las tres quie zadze', bënë' cabè' bënë' la'odza quie ben' hue dyin quienè'. ⁶ Na'ra uzè'è' zioguè' la'o yedyi tatula ca du las cinco quie zadze'. Na' bedilanè' ibala ja ben' rdaja cana'zi. Na' unè' rëbinè' lèjè': "¿Bixquien' rda le'e niga cana'zi bedu dza, gabi dyin ruele?" ⁷ Na' unajè' rëbijè' lèbè': "Rdando' cana'zi como dan' nitu nunu bida ina nètò' huendo' dyin." Na'ra unè' rëbinè' lèjè': "Uletziorè le'e tzeguele dyin layela quia'. Naquizuga' le'e quie tu dza quiele." ⁸ Cati baodze', na'ra unè' xan' layela rëbinè' ben' quizu mozo: "Guzi ja mozo na', quizulo'jè'. Tanëro quizulo' ben' uyu'u cati beyudyite dyin. Na'ra quizulo' ben' uyu'u tanëro." ⁹ Na'ra ude ja ben' yu'u ja dyin ca du las cinco quie zadze'. Na' aodizuguè' lèjè' quie bedu dza quiejè' tu huio dumi plata. ¹⁰ Na'ra ude ja ben' yu'u ja dyin tanëro. Na' guquejè' huaguizugue' lèjè' mazara. Pero udizuguè' lèjè' tu huiocazi dumi plata. ¹¹ Bè' uzi'jè' xlažujè' rnèjè' rdza'jè' rëbijè' xa'n layela: ¹² "Ja ben' uyu'u cati beyudyite dyin, ca tu horazi bëjè' dyin. Na' udizulo'jè' lèbi len nètò' bëndò' dyin bedu dza aozuendo' tala bedu dza." ¹³ Na' una xan' layela rëbinè' tu ben' uyu'u dyin tanëro: "Bicha', quele tamala bia' quio'. ¿Quele bega'nro di'idza' quizuga' luè' tu dumi plata quie tu dza quio'? ¹⁴ Ni de xlažulo', beyo. Chi re'enda' quizuga' ben' uyu'u cati beyudyite dyin lèbi cabè' aodizuga' luè', abihuena quio'. ¹⁵ ¿O chi bire'enlo' hua' ca re'enda' len dumi quia'? ¿O chi raquežè'lo' nè'èdi' dan' rua' tadya'a?" ¹⁶ Na' una Jesús rëbinè' lèjè':

—Na'ra nè'èdi' rnia' le'e, bala ben' binaca ben' belao niga lao yedyi layu, huacajè' ben' belao dza yedyinjè' ga zu Diuzi. Lëscan' bala ben' naca ben' belao niga lao yedyi layu, bira gacajè' ben' belao dza yedyinjè' ga zu Diuzi. Rëzi Diuzi ben' zè, ben' inao xnezè', pero balazijè' guida inao xnezè'.

Unë Jesús tatula cabè' gaca cati gatinè'

(Mr. 10.32-34; Lc. 18.31-34)

¹⁷ Na' uza' Jesús lènè' chipchopa ben' quienè' ziojè' ciudad Jerusalén. Na' tu neza gužinè' lèjè' tzala'la unè' rëbinè' lèjè':

¹⁸ —Ablè'ële bazioro ciudad Jerusalén gan' usedyin benè' nè'èdi' lao na'a xan' pxuzi, len lao na'a ben' rusèdi ley quie Moisés. Na' rusaque'jè' nè'èdi' nacala ca huejè' gutijè' nè'èdi', ben' naca bichi yugulu benè'. ¹⁹ Na' lèjè' usedyinjè' nè'èdi' lao na'a ben' za' yedyi tula ta utitujè' nè'èdi', gunjè' nè'èdi' zi', uda'jè' nè'èdi' lè'è yaga cruzo gatia'. Pero huebana' lao tzona dza.

Unaba zna' Santiago len Juan tu cule lao Jesús

(Mr. 10.35-45)

²⁰ Na'ra bebiga' rupa zi'i Zebedeo, Juan len Santiago, len zna'jè' ga zè Jesús. Na' uditzu zna'jè' žibinè' lao Jesús ta inabè' lèbè' tu cule. ²¹ Na'ra una Jesús rëbinè' lèbè':

—¿Bizi dan' re'enlo' hua' quio'?

Na' unë' rëbinë' Jesús:

—Chi bihuu' cule, huelo' mandado cue' zi'ina' niga cuëto' cati bare'lo' xlatolo' rnabë'lo'. Rnaba' huu' mandado cue'bi' tubi' zaquë' yebë, itubi' cue'bi' zaquë' yega'.

²² Na'ra una Jesús rëbinë' lëjë':

—Binezile cabë' dan' aonabale në'ëdi'. ¿Huazuele sacale cabë' usaca benë' në'ëdi'? ¿Huazuele yedzagalaole cabë' yedzagalaohua'?

Na' unajë' rëbijë' lëbë':

—Aja', huazuendo'.

²³ Na' una Jesús rëbinë' lëjë':

—Tali ca nale. Usaca benë' le'e cabë' usacajë' në'ëdi', na' yedzagalaole cabë' yedzagalaohua'. Pero quele në'ëdi' hua' mandado ta cue'le cuëta' tzala' huio. Xuza' Diuzi huenë' mandado nu ben' cue' cuëta' tzala' huio.

²⁴ Cati be ichi ben' quie Jesús cabë' unaba Santiago len bichinë' Juan, na'ra bdza'jë' lëjë'. ²⁵ Pero guzi Jesús lëjë' unë' rëbinë' lëjë':

—Le'e nezile dyë'ëdi cabë' rue ja ben' naca gobierno, rnabë'jë' zi'laza. Redaohuejë' huejë' mandado zëdi hue ja benë'. ²⁶ Pero le'e, bireya'ala' huele cana'. Nu ben' rnabë' quie ja ben' rue quie xti'idza' Diuzi, ruen zi gacalëjë' laguedyijë'. ²⁷ Lëscan' nu ben' belao quie ja ben' rue quie xti'idza' Diuzi, ruen zi huejë' pensari bi huejë' ta gata' tadya'a quie laguedyijë'. ²⁸ Huele cabë' rua' në'ëdi', ben' bichi yugulu benë'. Quele bida' ta hue ja benë' tadya'a quia'. Bida' ta hua' tadya'a quiejë', gatia' lao lazajë' gacajë' libre, bira inao dula' xqua quiejë' lëjë'.

Beyue Jesús chopa ben' laochula

(Mr. 10.46-52; Lc. 18.35-43)

²⁹ Cati uza'jë' yedyi Jericó, unao ben' zë gula Jesús. ³⁰ Na' ga udejë' re' chopa ben' laochula cuëta neza. Cati bejë' za' Jesús, na'ra urediyia'jë' unajë' rëbijë' Jesús:

—Señor, zi'i suba xuzixta'oro rey David luë'. Beyëchi'la'adyi'nëto'.

³¹ Na' udila ja benë' lëjë' rëbijë' lëjë' ta cue'jë' chizi. Pero urediyia'rajë' zidzo gula unajë' rëbijë' Jesús:

—Señor, zi'i suba xuzixta'oro rey David luë'. Beyëchi'la'adyi'nëto'.

³² Na'ra uleza Jesús guzinë' ja ben' laochula, unë' rëbinë' lëjë':

—¿Bizi dan' re'enle hua' quiele?

³³ Na' unajë' rëbijë' Jesús:

—Señor, re'enndo' yelë'ëndo'.

³⁴ Na'ra beyëchi'la'adyi' Jesús lëjë', uženë' laojë' labelë'ëtejë' unaojë' Jesús.

21

Cabë' guca cati bdyin Jesús ciudad Jerusalén

(Mr. 11.1-11; Lc. 19.28-40; Jn. 12.12-19)

¹ Na' bdyinjë' yedyi Betfagé ga nacan ga'ala' ga re' ciudad Jerusalén. Lëscan' nacan ga'ala' ga re' tu ya'a laona ya'a Olivos. Na'ra use'ela' Jesús chopa ben' quienë' ² rëbinë' lëjë':

—Uletzio yedyi na'. Na' yedzelele tu burra nerioba' lëba' zi'iba'. Ulexëdyiba' ulequie'ba' niga. ³ Chi ina benë' rëbijë' le'e: “¿Bixquien' iquie'leba'?” na' yëbilejë': “Re'en Señor na' lëba'. Na' laidesantendo'ba' itu chi'.” —Cana' una Jesús rëbinë' lëjë'.

⁴ Cana' guca ta uzu di'idza' quie Diuzi ta bzu ben' profeta lë'ë guichi. Lëdi'idza' nan caniga:

⁵ Uleyëbi ben' ciudad Jerusalén caniga:

“Le'e ben' ciudad Jerusalén, ulena', aza' rey quiele, naquë' ben' gaxo, dyianë' tu burra, zi'i bia ru'a yua'.”

⁶ Na'ra uyo ja ben' quië', bëjë' cabë' mandado bë Jesús huejë'. ⁷ Na' uquië'tjë' burra len zi'iba' uxubajë' zabajë' xcu'udzuba', na' udyia Jesús lëba', ziojë' bdyinjë' ciudad Jerusalén. ⁸ Ben' zë nita'jë' tu neza udixujë' zabajë' ga ude Jesús. Ibalajë' uchugujë' taca' palma udixurëjë'n tu neza ga udenë'. ⁹ Na' ja ben' zioja dyialao lao Jesús len ja ben' zioja zenao lëbë', uzulaojë' rnëjë' zidzo rnajë':

—jBen' ze luë', zi'i rey David! La'iya naco' zao' lao na'a Diuzi. jBen' ze Diuzi!

¹⁰ Cati uyu'u Jesús ciudad Jerusalén, na' bebane ja benë' unajë' rëbijë' laguedyijë':

—¿Nuži ben' niga?

¹¹ Ibalajë' unajë' rëbijë' lëjë':

—Ben' profeta Jesús, ben' yedyi Nazaret quie estado Galilea.

Belao Jesús ja ben' yu'u huëti' lu'u idao' rnabë'ra

(Mr. 11.15-19; Lc. 19.45-48; Jn. 2.13-22)

¹² Ude na' uyu'u Jesús lu'u idao' rnabë'ra belao huë' ja ben' yu'u huëti' lu'u idao' rnabë'ra na'. Bzalë' ja mesa quie ja ben' rutza' dumi. Lëscan' bzalë' silla quie ja ben' yu'u huëti' paloma. ¹³ Na' unë' rëbinë' lëjë':

—Lë'ë guichi la'iya quie Diuzi rnan caniga: “Idao' rnabë'ra quia' nacan ga hue'lë ja benë' Diuzi di'idza'. Pero le'e abetza'len ruelen ca beló ga regu'udi' ben' uban.”

¹⁴ Na' lu'u idao' rnabë'ra ga zë Jesús, ubiga' bala ben' laochula len ben' zi, na' beyuenë' lëjë'. ¹⁵ Pero ja xan' pxuzi len ja ben' rusëdi ley quie Moisés, bdza'jë' cati blë'ëjë' cabë' milagro bë Jesús. Lëscan' bdza'jë' cati bejë' rnë ja xcuidi' zidzo lu'u idao' rnabë'ra najabi': “Ben' ze luë', zi'i rey David.” ¹⁶ Na' bdza'jë' unajë' rëbijë' Jesús:

—¿Abelo' cabë' na ja xcuidi'?

Na' una Jesús rëbinë' lëjë':

—Aja', beda' cabë' rnajabi'. Pero le'e, ¿cómo binelabale cabë' nan quiejabi' lë'ë guichi la'iya quie Diuzi? Rnën nan caniga:

Dyín bë Diuzi rula ja xcuidi' dao', bi' nera'adyi', alabanza huen gula.

¹⁷ Na'ra psan Jesús lëjë' uza'në' ciudad Jerusalén ziolënë' yaca ben' quië' yedyi Betania. Na' bega'një' tu yela.

Bdze'de' Jesús yaga higo dan' bidyian tazixi

(Mr. 11.12-14, 20-26)

¹⁸ Na' beteyu zila, uzë'ë ziolënë' yaca ben' quië' ciudad Jerusalén. Na' tu neza zioquë' cati uduenë'. ¹⁹ Na' blë'ënë' zu tu yaga higo cuëta neza. Na' udenë' unë'ë ta yedzelenë' tazixi quien, pero gabi bedzelenë'. Na' una Jesús:

—Bira cuiacazi yaga ni tazixi.

Na' laobidyite yaga higo. ²⁰ Cati blë'ë ja ben' quië' cabë' guca quie yaga higo, na'ra bebanejë' unajë' rëbijë' Jesús:

—¿Cabizi guca quie yaga higo laobidyiten?

²¹ Na' una Jesús rëbinë' lëjë':

—Tali rnia' le'e, chi rzudyilële Diuzi du guicho du la'adyi'le, huazaque' huele cabë' bia' quie yaga higo. Na' quele tuzi quie len huele, pero lëscan' huazaque'rë huele mandado te tu ya'a tzion lu'u nisadao', na' huayonan.

²² Con bita inabale lao Diuzi hue'lëlenë' di'idza', chi rzudyi'ilële Diuzi du guicho du la'adyi'le, gunnë'n quiele.

Cabë' naca quie yela' rnabë' quie Jesús

(Mr. 11.27-33; Lc. 20.1-8)

²³ Na'ra beyu'u Jesús lu'u idao' rnabë'ra tatula. Na' tu zunë' rusëdinë' benë' cati ubiga' ja xan' pxuzi, len ja ben' rnabë' quie ja ben' Israel, unajë' rëbijë' Jesús:

—¿Bi yela' rnabë' de quio'? ¿Nu quie yela' rnabë' blaolo' ben' yu'u huëti' lu'u idao' rnabë'ra?

²⁴ Na' una Jesús rëbinë' lëjë':

—Lëscan' re'enda' inaba' le'e tu di'idza'. Chi iquëbile quia' dyë'ëdi, na'ra inia' le'e nu quie yela' rnabë' blaohua' ben' yu'u huëti' lu'u idao' rnabë'ra.

²⁵ ¿Nuži use'ela' Juan ta hue'në' lao benë'? ¿Use'ela' Diuzi lëbë'? ¿O chi ta racazi la'adyi'në' bidë'?

Na' uzulaojë' najë' rëbijë' laguedyijë':

—Chi yëbironë': "Diuzi use'elë' lëbë'", na' huanë' ra'o: "¿Bixquien' bigulele quienë'?" ²⁶ Pero chi yëbironë': "Ta racazi la'adyi'në' bidë'", caora na' huadza' ja ben' yedyi ra'o, dan' najë' rnë Juan tanun quie Diuzi.

²⁷ Na'ra unajë' rëbijë' Jesús:

—Binezindo' nu ben' use'ela' lëbë'.

Na' una Jesús rëbinë' lëjë':

—Lëscan' në'ëdi', biinia' le'e nu quie yela' rnabë' blaohua' ben' yu'u huëti' lu'u idao' rnabë'ra.

Unë Jesús tu di'idza' quie ben' zu chopa zi'ine

²⁸ Na' una Jesús lëjë':

—¿Bi ca inale ca naca di'idza' inia' le'e? Uzu tu be'mbyu zu chopa zi'inë'. Na' yëbë' tubi': "Zi'ina', tzio' na'a yeziu' usecho quie bedzuli' quia'." ²⁹ Na' una zi'inë' rëbinë' lëbë': "¿Binan quia' tza'a!" Pero ude na' beyuebi' pensari uyocazibi' hue dyin. ³⁰ Na' uyo xuzijabi' yaguëdyinë' itu zi'inë': "Zi'ina', tzio' na'a yeziu' usecho quie bedzuli' quia'." Na' unabibi' rëbibi' xuzibi': "Hue'encazi tza'a." Pero biuyobi'. ³¹ Na' inaba' le'e: ¿Nula zi'inë' bë cabë' re'ennë' huejabi' lao rupatejabi'?

Na' unajë' rëbijë' Jesús:

—Bi' gudyë' tanëro.

Na'ra una Jesús rëbinë' lëjë':

—Tali rnia' le'e, ja ben' nale ben' mala gula, len ja nigula ruti' gusto quie, za' lëjë' yeyu'ujë' ga rnabë' Diuzi ca le'e. ³² Bida Juan bautista udixogue'në' le'e cabë' reya'ala' huele ta hue quiele xti'idza' Diuzi, na' bigulele quienë'. Pero yaca ben' mala gula len ja nigula ruti' gusto quie, lëjë' sí, gulejë' quienë'. Pero le'e ba'ala'cazi blë'ële cabë' bë Juan, biptza'le pensari quiele ta galele quienë'.

Unë Jesús tu di'idza' quie ben' mala, ben' hue dyin

(Mr. 12.1-12; Lc. 20.9-19)

³³ Na' una Jesús:

—Uzënagale ca naca itu di'idza' inia' le'e. Uzu tu xan' layela, ben' guza bedzuli'. Bënë' tu li'o psioguë'n. Lëzi udixunë' tu yo laga' ga usinë' nisa bedzuli'. Bërenë' tu yu'u sibi de yo ga cuia ben' rapa bedzuli'.

'Na' pca'nnë'n lao na'a ben' hue dyin, uza'në' zionë' zitu'. ³⁴ Cati bdyin tiempo quie usecho quie bedzuli', na'ra use'elë' ja mozo quienë' tzenabajë' ben' hue dyin quie usecho ta redu'ula' ben' xan' layela yezi'në'. ³⁵ Pero bëxo

ben' hue dyin ja ben' uyo. Na' bē'jē' quie tunē', bētijē' itunē', na' udijē' yo itunē'. ³⁶ Na' use'ela' xan' layela ja mozo tula. Pero bēcazi ben' hue dyin quiejē' lēbi ca ben' uyo tanēro.

³⁷ 'Abeyudyi bējē' cana', use'elē' zi'inē', guquenē' chi huaparajē' zi'inē' bala'ana. ³⁸ Pero cati blē'ē ja ben' hue dyin abdyin zi'i xan' layela, na'ra unajē' rēbijē' laguedyijē': "Bi' za' ni, lēbi' gaque quiebi' layela. Uletza' gutirobi' ta gaque quiero layela de niga." ³⁹ Cana' bējē', bēxojē' lēbi', bebiojabī' layela, bētijē' lēbi'.

⁴⁰ Na' una Jesús unabanē' lējē':

—Cati yedyin xan' layela, ħbizi reya'ala' huenē' quie ja ben' hue dyin?

⁴¹ Na' unajē' rēbijē' Jesús:

—Yela' ben' mala quiejē', reya'ala' gutinē' lējē', biyēchi'la'adyi'nē' lējē'. Reya'ala' uca'nnē'n lao na'a ben' hue dyin, ben' tula, ben' tzesan quie usecho ta redu'ula' ben' xan' layela yezi'nē' tiempo quienan.

⁴² Na' una Jesús rēbinē' lējē':

—ĤBinelabale cabē' nan lē'ē guichi la'iya quie Diuzi? Rnan caniga:

Yo laga' uru'un ben' rue huecua', lēyo na' bezi' Diuzi, bzunē'n ga rzulao besu. Dyin dya'a bē Diuzi beyuenē'n yo belao ta guxu'n besu.

⁴³ Tana' lena' inia' le'e, como dan' biralele quia', cana' naca quiele ca quie ben' rue huecua', ben' uru'un yo. Quie lena' bicuio Diuzi le'e gacale ben' hue dyin quienē'. Na' huabio Diuzi ben' tula, ben' tzesan ca quie usecho ta reya'ala' Diuzi yezi'nē'. ⁴⁴ Nu ben' bire'en gale quia', gaca quienē' ca quie ben' bguino lao yo, guquē' hue' ze. Lēscan' nu ben' chu'un nē'ēdi' tzala'la, huachugulia' quienē'. Gaca quienē' ca quie ben' pxa'da' yo lēnē'.

⁴⁵ Na' cati be ja xan' pxuzi len ja ben' partido fariseo cabē' na ejemplo unē Jesús, na'ra gucabē'jē' rnē Jesús quiejē'. ⁴⁶ Na' gu'unjē' guxujē' Jesús, pero bdzebijē' idza' ja ben' yedyi, dan' na ja ben' yedyi rnē Jesús tanun quie Diuzi.

22

Unē Jesús tu di'idza' quie lani quie huetzagana'

¹ Na' bzu Jesús itu di'idza' unē' rēbinē' lējē':

² —Na' rnīa' le'e cabē' rue Diuzi rnabē'nē'. Ruenē' ca nu rey, ben' bē tu lani cati ptzagana' zi'inē'. ³ Na' use'ela' rey ben' tzelidza ja ben' guida lao lani, pero bigu'unjē' guidajē'. ⁴ Na' use'ela' rey na' ben' tula ta tzelidzajē' ja ben' guida lao lani unē' rēbinē' lējē': "Uleyēbijē' abētia' ja bēdyihuaga quia', bīa naca ja re'ene, bapsiña'a ta gaojē'. Yugun nacan puesto laguidatejē'." ⁵ Pero bibida ben' reya'ala' guida. Tunē' uyonē' layela quienē'. Itunē' uyonē' huēti' quie'. ⁶ Na' los demás, bēxujē' ben' use'ela' rey tzalidza lējē', bē'jē' lējē' zi', bētijē' lējē'. ⁷ Na'ra bdza'tzegue rey na'. Use'elē' soldado quienē' tzequētijē' lējē', tzezejē' yedyi quiejē'. ⁸ Na' una rey rēbinē' ben' tzelidza: "Yugun nacan puesto guida ja benē'." Pero ben' blidzajē' guidaja, bigu'un rey na'. Na' unē': ⁹ "Uletzio tzetale tu neza tzelidzale con nu ben' yedzagale ta guidajē' lani quie huetzagana'." Cana' unē' gudyinē' ben' tzelidza. ¹⁰ Na' uza'jē' yetajē' tu neza utupajē' ben' bedzagajē', la'acazi ben' mala, la'acazi ben' dya'a. Cana' bedza' ja benē' zan yu'u quie rey.

¹¹ 'Na'ra uyu'u rey lu'u yu'u ta inē' ben' bdyinja. Na' blē'ēnē' re' tu be'mbyu, pero binaconē' zabanē' ca naca zaba ben' bdyin ga raca lani quie huetzagana'. ¹² Na' una rey rēbinē' lēnē': "Bicha', ħbizi guca uyu'ulo' re'lo' ni, binacolo' zabo' ca naca zaba ben' bdyin ga raca lani quie huetzagana'?" Na' ure'nē' chizi. ¹³ Na' una rey rēbinē' ben' ru'e laze: "Ulequio ni'a na'anē'.

Ulechu'unñé' lao lato chula ga cuedyiné' gao leiné'." ¹⁴ Rēzi Diuzi ben' zē, ben' inao xnezé', pero balazijé' guida inao xnezé'.

Unabajé' Jesús ca naca quie impuesto
(Mr. 12.13-17; Lc. 20.20-26)

¹⁵ Na'ra uyo ja ben' partido fariseo bega'njé' di'idza' len laguediyijé' huejé' trampa quie Jesús ta quilojé' di'idza' ta gaojé' lèbè' xquia. ¹⁶ Na' use'ela'jé' ibala ben' naca partido quiejé' tuze len bala ben' naca partido Herodes, unajé' rēbijé' Jesús:

—Maestro, nezindo' rnao' tali, rusēdio' bené' ca naca xneza Diuzi. Tuzicazi ca ru'elao' bené' di'idza'. ¹⁷ Unacara cabé' naca tu pensari quio': ¿Rnabando' luè' chi run Diuzi lato quizoro impuesto lao rey quie ben' romano?

¹⁸ Na'ra gucabé' Jesús cabé' modo reguirojé' ta huejé' tamala quie'. Na' uné' rēbiné' lējé':

—Ben' huizi' yé' nacale. ¿Bixquien' re'enle huele trampa quia'? ¹⁹ Ulelu'ecara nē'ēdi' bi naque dumi ruquizole impuesto.

Na' blu'ejé' lèbè' tu dumi denario. ²⁰ Bē' blē'ē Jesús len, na' unabané' lējé':

—¿Nu ben' zu laohue lē'ē dumi? ¿Bi na letra dyia lē'ēn?

²¹ Na' unajé' rēbijé' Jesús:

—Lao rey quie ben' romano zu lē'ēn.

Na'ra una Jesús rēbiné' lējé':

—Ulehue' ben' naca gobierno ta redu'ulané' si'né'. Lēscan' ulehue' Diuzi ta redu'ulané' si'né'.

²² Cati bejé' cabé' una Jesús, na'ra tu bega'nzije' rebanejé'. Na' psanjé' quie' zeyojé'.

Unabajé' Jesús cabé' raca quie ben' baguti yeban
(Mr. 12.18-27; Lc. 20.27-40)

²³ Lēdza na'tezi uyo bala ja ben' partido saduceo yena'jé' Jesús. Na'ra birale ja ben' partido saduceo chi hueban ben' huati. Tana' lena' unajé' rēbijé' Jesús:

²⁴ —Maestro, una Moisés chi guti tu be'mbyu zu zgule, na' ganu zi'iné' zu, reya'ala' yezi' ben' bichiné' xcula ben' guti tacuenda su zi'ijé' lao laza zi'i ben' guti. ²⁵ Na' guca dza na' uzu gadyi bichi be'mbyu yedyi quiendo'. Na' ptzagana' ben' nēro, pero gutiné' ganu zi'iné' uzu. Lena' abezi' ben' bichiné', ben' urupe, nigula quiené'. ²⁶ Lēscan' guti ben' urupe ganu zi'iné' uzu. Lena' abezi' ben' bichiné', ben' uyune, nigula quiené'. Pero cabé' guca quie ben' nēro len ben' urupe, lēscana' guca quie ben' uyune len los demás yaca bichiné' hasta lao gadyi bichijé'. ²⁷ Ude na' gutiré nigula quiejé'. ²⁸ Na'ra inabando' luè', cati yeban ja ben' baguti, ¿nula'jé' naque' quiejé' lèbè' lao gadyijé' como yugujé' uzulējé' lèbè'?

²⁹ Na' una Jesús rēbiné' lējé':

—Le'e sí, nequixile como dan' binezile cabé' rnan lē'ē guichi la'iya quie Diuzi. Lēscan' binezile ca naca yela' huaca quiené'. ³⁰ Cati babeban ja ben' baguti, bisulējé' laguediyijé' ca zgulajé' ca xquiujé'. Gaca quiejé' ca quie yaca ángel quie Diuzi, ben' yu'uja guibá. ³¹ Na' quie ben' baguti yeban, ¿binelabale lē'ē guichi la'iya quie Diuzi cabé' uné' le'e? Uné' caniga: ³² “Naca' Diuzi quie xuzixta'olo' Abraham, len quie xuzixta'olo' Isaac, len quie xuzixta'olo' Jacob.” Cana' una Diuzi. Lena' nia' le'e, Diuzi lē'ēnē' lējé' ca ben' neban, como dan' rlē'ē Diuzi tuzicazi ca ben' neban len ben' aguti.

³³ Cati be ja bené' cabé' una Jesús quie ben' guti beban, na'ra tu bebanezije' cabé' di'idza' rusēdiné' ja bené'.

Unë Jesús quie chopa mandamiento belao

(Mr. 12.28-34)

³⁴ Cati unezi ben' partido fariseo cabè' bē Jesús quie ben' partido saduceo, biubinjë' binajë' yëbijë' Jesús, na'ra begu'udi'jè' ga zē Jesús. ³⁵ Na' tu ben' quiejë', ben' rusëdi ley quie Moisés, gu'unnë' huenë' trampa quie Jesús. Cana' unë' rëbinë' lëbë':

³⁶ —Maestro, ¿nula mandamiento nacaran belao quie ley pca'n Diuzi lao na'a Moisés?

³⁷ Na' una Jesús rëbinë' lëbë':

—“Idyë'ëro xa'nro Diuzi du guicho du la'adyi'ro.” ³⁸ Lëlena' nacaran mandamiento belao. ³⁹ Derë itu mandamiento nacarën belao. Ilë'ëti'zi birnën lëbi ca mandamiento belao. Len rnan caniga: “Idyë'ële lagueyile cabë' nedyë'ële cuinle.” ⁴⁰ Na' nia' le'e duze ca na ley pca'n Diuzi lao na'a Moisés len duze ca una ja ben' profeta dza na', nacan quie chopa mandamiento belao.

Unaba Jesús: ¿Nu ži'inë' naca Cristo?

(Mr. 12.35-37; Lc. 20.41-44)

⁴¹ Tu raza nenegu'udi' ja ben' partido fariseo, ⁴² na' una Jesús rëbinë' lëjë':

—¿Bi ca nale quie ben' naca Cristo? ¿Nu ži'inë' naquë'?

Na' unajë' rëbijë' lëbë':

—Ži'i rey David naquë'.

⁴³ Na' una Jesús rëbinë' lëjë':

—¿Ca bizi guca caora una rey David, du yu'unë' Bichi Be quie Diuzi, unë' naca Cristo Señor quienë'? Porque cana' una David caora unë' caniga:

⁴⁴ Una Diuzi rëbinë' ben' naca Señor quia':

“Ure' cuëta' zaquë' yebë niga, hasta idyin dza cuëcha' xni'alo' yaca ben' rudie luë'.”

Cana' una rey David. ⁴⁵ Na' rnaba' le'e, ¿cómo naca Cristo ži'i suba rey David, chi cuin rey David unë' naca Cristo Señor quienë'?

⁴⁶ Na' ni tu di'idza' biubinjë' yëbijë' lëbë'. Desde dza na', bira beyažojë' inabarajë' lëbë' bi di'idza'.

23

Udao Jesús ben' partido fariseo len ben' rusëdi ley quie Moisés xquia

(Mr. 12.38-40; Lc. 11.37-54; 20.45-47)

¹ Na'ra una Jesús rëbinë' ja benë' nita' na' len ja ben' quienë':

² —Ja ben' rusëdi ley quie Moisés, len ja ben' partido fariseo, nacan dyin quiejë' rusëdijë' benë' cabë' nan lë'ë guichi ley ta pca'n Diuzi lao na'a Moisés.

³ Na' reya'ala' hue quiele ca inajë', pero binaole huele cabë' ruejë', como dan' biruejë' tuzi ca najë'. ⁴ Ruejë' ca quie ben' rugua'a yua' zi' gula lagueydi, tu ta bisueyaquë'. Pero biyeyëchi'la'adyi'jè' yaca benë' ni siquiera ledao'zi ta gacalëjë' lëjë'.

⁵ Tuzi ta ilë'ë benë' lëjë' dya'a ruejë', pero bë' ruezijë' raxejë' uda'jè' tu guichi dao' quie Diuzi zbasijë'. Raxejë' utubijë' itu guichi quie Diuzi žichojë'. Raxejë' gacojë' žabajë' tona. ⁶ Re'enjë' cue'jè' ga naca tza'o' cati raojë' ga raza lani. Lëscan' re'enjë' cue'jè' ga rbe' ben' bala'ana lu'u idao' sinagoga.

⁷ Re'enjë' gapala'n benë' lëjë' dyë'ëdi du tu neza. Raxejë' yëbi ja benë' lëjë': “Maestro.

⁸ Bihuele lato ta ina ja benë' le'e: “Maestro”, porque yugulule naca tuzi bichile, lëscan' tuzi në'ëdi' naca' maestro quiele. ⁹ Lëzi nitu nitu ben' nita' lao yedyi layu, bihuele lato yëbilejë': “Xuza”, porque tuzi Xuziro zu, ben'

zu guibá. ¹⁰ Lëscan' bihuele lato ta ina ja benë' le'e: "Xa'na' luë'", porque tuzi në'èdi' naca' xa'nle. ¹¹ Na' rnia' le'e, con nu ben' racalë laguedyi, lënë' nacarë' ben' belao ladole. ¹² Porque nu ben' rue ze cuine, lëben' na' nacarë' ben' yëchi' lao Diuzi. Pero nu ben' birue cuine ben' ze, lëben' na' nacarë' ben' ze lao Diuzi.

¹³ ¡Le'e ben' rusëdi ley quie Moisés, len le'e ben' partido fariseo, nacan bayëchi' gula quiele! Biruele tuzi ca nale. Ruza'agale hue quie benë' xti'idza' Diuzi. Le'e birue quiele xti'idza' Diuzi, lëscan' bire'enle hue quie ben' tula xti'idza' Diuzi.

¹⁴ ¡Le'e ben' rusëdi ley quie Moisés, len le'e ben' partido fariseo, nacan bayëchi' gula quiele! Biruele tuzi ca nale. Rgubale yu'u quie ja nigula guti xguiuhue, pero ta ilë'ë ja benë' le'e ben' rue quie ca rna Diuzi, na' ru'elële Diuzi di'idza' zë.

¹⁵ ¡Le'e ben' rusëdi ley quie Moisés, len le'e ben' partido fariseo, nacan bayëchi' gula quiele! Biruele tuzi ca nale. Ratale con gatezi ta quilole nu ben' hue quie cabë' ruele. Pero nu ben' usëdile ta hue quie cabë' ruele, huacaterajë' ben' malara ta tziojë' gui' gabila ca le'e.

¹⁶ ¡Huaca bayëchi' quiele! Re'enle ulu'ele ben' tula ga tzionë', pero ben' laochula le'e. Na' le'e nale: "Chi ruguntero Diuzi ruzëtoro idao' rna'bë'ra chi bi tu ta huero, biruen zi huero. Pero chi ruguntero Diuzi ruzëtoro oro re' lu'u idao' rna'bë'ra, lenan sí, ruen zi huero." ¹⁷ ¡Pero inia' le'e, ben' tondo, ben' laochula le'e! Binaca la'ya oro cuinzin. Tanun quie re'n lu'u idao' rna'bë'ra, tana' naca la'yan. Naca idao' rna'bë'ra la'iyaran ca oro re' lu'un. ¹⁸ Lëscan' rnarële: "Chi ruguntero Diuzi ruzëtoro ru'aba chi bi tu ta huero, biruen zi huero. Pero chi ruguntero Diuzi ruzëtoro gun dyia ru'aba, lenan sí, ruen zi huero." ¹⁹ Pero inia' le'e, ¡ben' tondo, ben' laochula le'e! Binaca la'ya gun cuinzin. Tanun quie dyian ru'aba, tana' naca la'yan. Naca ru'aba la'iyaran ca gun dyia laonan. ²⁰ Chi ruguntero Diuzi ruzëtoro ru'aba chi bi tu ta huero, quele tuzi ru'aba ruzëtoro como dan' tuzi naca ru'aba len gun. ²¹ Chi ruguntero Diuzi ruzëtoro idao' rna'bë'ra chi bi tu ta huero, quele tuzi idao' rna'bë'ra ruzëtoro como tuzi naca idao' rna'bë'ra len Diuzi, ben' zu lu'un. ²² Lëscan' chi ruguntero Diuzi ruzëtoro guibá chi bi tu ta huero, cana' ruzëtorëro Diuzi lënë' xlatoguë' ga re'në'.

²³ ¡Le'e ben' rusëdi ley quie Moisés, len le'e ben' partido fariseo, nacan bayëchi' gula quiele! Biruele tuzi ca nale. Lente ja la'aga' ta ruen zi' yela' huao quiele ru'ele Diuzi tu cue'na quie lao chi cue'na, pero biruele bala quie ta naca belaoa quie mandamiento quie Diuzi. Biruele tali. Bireyëchi'la'adyi'le benë'. Birue quiele quie Diuzi du guicho du la'adyi'le. Tanëro reya'ala' huele ta nacara belao quie Diuzi, na'tera hue'le Diuzi tu cue'na quie lao chi cue'na quie ta de quiele. ²⁴ ¡Le'e re'enle ulu'ele ben' tula ga tzionë', pero ben' laochula le'e! ¡Le'e ruele ze ta naca lë'ëti'zi, na' biruele ze ta naca belao!

²⁵ ¡Le'e ben' rusëdi ley quie Moisés, len le'e ben' partido fariseo, nacan bayëchi' gula quiele! Biruele tuzi ca nale. Rguibile dyë'ëdi xcu'udzula taza len plato. Na' rudze'le lu'un ta rbanle quie benë' rzi'lejë' yë'. ²⁶ Le'e ben' partido fariseo, nacale ca ben' laochula. Nacale ca taza plato neyëri xcu'udzun, pero yu'u lu'un ta bayatza. Uletza' pensari yu'u lu'u guicho laxta'ole, na'tera gacale yëri duzele lao Diuzi.

²⁷ ¡Le'e ben' rusëdi ley quie Moisés, len le'e ben' partido fariseo, huaca bayëchi' gula quiele! Biruele tuzi ca nale. Nacale ca quie ta rucual'jë' ga de ben' huati. Rudze'jë'n ta bezëri xcu'udzun, pero lu'unan yu'u chita quie ben' huati len ta bayatza. ²⁸ Cana' naca quie le'e. Rlë'ë ja benë' le'e ben' huen, pero bë' ruezile biruele tuzi ca nale, yu'u pensari mala lu'u guicho laxta'ole.

²⁹ 'JLe'e ben' rusëdi ley quie Moisés, len le'e ben' partido fariseo, huaca bayëchi' gula quiele! Biruele tuzi ca nale. Le'e rucua'le ba quie ben' huati, ben' udirxogue' xti'idza' Diuzi dza na'te. Lëzi ruetza'ole ba quie ja ben' bë quie xti'idza' Diuzi dza na'te. ³⁰ Na' lëzi rnale rëbile laguedyile: "Chan' ra'lo nita'ro dza unita' xuzixta'oro, bigu'unro guti xuzixta'oro ja ben' udirxogue' xti'idza' Diuzi." ³¹ Ca di'idza' rnële rulu'en dyë'ëdi nezile bëti xuzixta'ole ben' udirxogue' xti'idza' Diuzi dza na'te. ³² Na' le'e re'enle useyudyile huele cabë' uzulao xuzixta'ole.

³³ 'JLe'e ruele ca rue bëla rgui'idyi' laga cabë' bë xuzixta'ole! ¿Bizi ca huele ta bihue Diuzi le'e castigo tzirole gui' gabila? ³⁴ Quie lena' ise'ela' laole ja ben' quixogue' xti'idza' Diuzi, ben' nezi rusëdi quie Diuzi. Pero le'e gutile balajë', na' ibalajë' uda'le lëjë' lë'ë yaga cruzo. Na' ibalajë' hue'le zi' lu'u idao' sinagoga quiele ulaolejë' tu tu yedyi. ³⁵ Cana' hue Diuzi dula' quiele, dan' bëtle ja ben' quienë', desde dza cati ure' dyilayu caora bëti Caín Abel, hasta dza bëtijë' Zacarías, ben' naca zi'i Berequías. Bëti xuzixta'ole lëbë' ru'a idao' rnabë'ra ga'ala' ga zu ru'aba. ³⁶ Tali rnia' le'e, huida dula' xquia quie xuzixta'ole, ben' bëti ben' quie Diuzi, gacan zba'aga' le'e.

*Gucayëchi' Jesús cabë' rue yaca ben' ciudad Jerusalén
(Lc. 13.34-35)*

³⁷ Na' una Jesús:

—Ben' ciudad Jerusalén, ben' ciudad Jerusalén, le'e rutila ja ben' rguixogue' xti'idza' Diuzi. Le'e rguile yo ja ben' rse'ela' Diuzi laole. Zë lasa gu'unda' gapa' le'e ca rapa biu zi'iba' zan xilaba', pero bigu'unle. ³⁸ Ilë'ëti'zi idachi ciudad quiele yega'nnan cana'zi. ³⁹ Tana'rnia' le'e, ilë'ëti'zi bira ilë'ële në'ëdi'. Cati idyin dza inale: "Naca la'iya ben' use'ela' Diuzi", na'tera ilë'ële në'ëdi' tatula. —Cana' una Jesús rëbinë' lëjë'.

24

*Una Jesús huabiagui' idao' rnabë'ra
(Mr. 13.1-2; Lc. 21.5-6)*

¹ Na'ra bero Jesús lu'u idao' rnabë'ra, uza'në' zioquë' cati bebiga' ben' quienë' ga zënë'. Na' uzulaojë' rebanejë' ca naca idao' rnabë'ra. ² Na' una Jesús rëbinë' lëjë'.

—Ulena' cabë' naca idao' rnabë'ra. Pero tali rnia', huabiagui'n dužeten, ni tu yo bira yega'nnan xcu'udzu laguedyin.

*Pxi'idze' Jesús cabë' gaca cati idyin dza iyudyi dyilayu
(Mr. 13.3-23; Lc. 21.7-24; 17.22-24)*

³ Na'ra uza'jë' ziojë' ga zu tu ya'a laona ya'a Olivos. Na' ure' Jesús cati bebiga' ja ben' quie' ga re'në' tu ganu dyila', unajë' rëbijë' lëbë'.

—Re'enndo' inao' nëto' bata cuiagui' idao' rnabë'ra. Lëzi re'enndo' inao' bizi gaca cati yeguido' tatula, na' lëscana'rë cati iyudyi quie dyilayu.

⁴ Na' una Jesús rëbinë' lëjë'.

—Gapale cuidado ta bisi' benë' le'e yë'. ⁵ Huida ben' zë inajë' napajë' yela' rnabë' quia'. Lëscan' inajë': "Naca' Cristo". Pero huazi'jë' yë' ben' zë. ⁶ Ina ja benë' ga raca dila, ga sulao dila, pero bidzebile, dan' ruen zi gacacazi cana'. Nerdziogue idyin dza iyudyi dyilayu. ⁷ Dila zë gaca tu yedyi conlë ja ben' yedyi tula. Na' yedyi zë gaca ubin, gaca yela' hue', gaca užu'. ⁸ Cana' gaca cati sulao yedzagalao ja benë'.

⁹ Na' usedyin benë' le'e lao na'a ja ben' rnabë' ta usacajë' le'e bizinaquezi, gutijë' le'e. Udie benë' le'e dan' nacale ben' quia'. ¹⁰ Lëdza na' usan ben'

zë bira galejè' quia'. Udiejë' laguedyijè', usedyinjè' laguedyijè' lao na'a ben' r nabè'. ¹¹ Huida ben' zë, ben' huezi' yè', inajè' rnèjë' tanun quie Diuzi, pero ben' zë si'jè' yè'. ¹² Tantozi gaca tazèdi, bira idyè'ë yaca benè' laguedyijè'. ¹³ Pero nu ben' sue biusan inao nè'èdi' dza zunè' lao dyilayu, huazi' Diuzi lèjë' yeyojè' guibá. ¹⁴ Huayo ja benè' tzetixogue'jè' xti'idza' Diuzi duže yedyi layu ta inezijè' zu Diuzi dispuesto yeyojè' tzasulèjë' lèbè' ga r nabè'nè'. Te na', yeyudyi quie dyilayu.

¹⁵ 'Bzu profeta Daniel di'idza' lè'ë guichi cabè' naca tu ta udyiagui' benè', ratza Diuzi len. Reya'ala' tzioñe'ele cabè' nia' le'e. Caora ilè'ële badyia tu ta udyiagui' benè', ratza Diuzi len lu'u idao' r nabè'ra, ¹⁶ na'ra reya'ala' yežuno ja ben' nita' estado Judea yeyojè' guixi' dao'. ¹⁷ Chi nita'jè' lali'a, tanto ruguinte yežunojè', bireya'ala' yeyu'ujè' lu'u yu'u quiejè' si'jè' bi ta de. ¹⁸ Lëscana' chi zujè' layela, reya'ala' yežunojè' biyeza'jè' yeyojè' tzeži'jè' žabajè'. ¹⁹ Gaca bayèchi' quie ja nigula nu'a ži'ine len ja nigula zu xcuidi' ra'adyi' dza na'. ²⁰ Reya'ala' hue'lèle Diuzi di'idza' ta gacalènè' le'e ta biužunole tiempo ruen zaga, nica dza huezila'adyi'. ²¹ Cana' lega yedzagalao yaca benè'. Desde dza cati ure' dyilayu, binedzagalao yaca benè' cabè' yedzagalao ben' yežuno dza zeza'. Lëscan', bè' yeyudyi bedzagalaojè', ganura ben' tula yedzagalao cabè' lèjë'. ²² Chi biichugu Diuzi dza yedzagalaojè', biilajè'. Pero huachugu Diuzi dza na' cuenda gacalènè' yaca ben' ulionè'.

²³ 'Chi ina ja benè' yèbijè' le'e: "Ulena", ni zu Cristo", chi yèbijè' le'e: "Ulena", na' zu Cristo", bigalele quiejè'. ²⁴ Huida ja ben' huizi' yè' huejë' cuinjè' Cristo, huejë' cuinjè' ben' inè tanun quie Diuzi. Huejë' milagro tacuenda si'jè' yè' len ben' ulio Diuzi, pero bihuejë' gan si'jè' ben' ulio Diuzi yè'. ²⁵ Baonia' le'e huaca tu ta binegaca. ²⁶ Tana' lena' chi ina benè' yèbijè' le'e: "Ulena", na' zu Cristo lao lato dachi", bitziole na'. Chi yèbijè' le'e: "Ulena", na' zu Cristo lu'u yu'u", bigalele quiejè'. ²⁷ Bigalele quiejè' como dan' cati yeguida' nè'èdi', bichi yugulu benè', hualè'ë yaca benè' nè'èdi' cabè' ilè'ë benè' xni' yesa cati rëpin ga rlè obidza rdi xni'n hasta ga reyen obidza. ²⁸ Caora rlè'ële recho ja bëchi ladza, cana' inezile de tazigo raojaba'. Lëcana' gaca inezile gan' gaca can' baonia'.

Ni nan cabè' gaca cati yeguida Cristo tatula

(Mr. 13.24-37; Lc. 21.25-33; 17.26-30, 34-36)

²⁹ Na' una Jesús:

—Layeyudyite dza yedzagalaojè', na'ra yechula obidza, bira ina' xni' biu', huaguinu bélo gan dyian, huažisi yugulu ta dyia guibá. ³⁰ Hualè'ë benè' tu ta binelè'ëjë' guibá. Lena' ulu'en abdyin dza yeguida' nè'èdi', bichi yugulu benè'. Na' huabedyi yugulu ja ben' nita' lao yedyi layu, hualè'ëjë' nè'èdi', bichi yugulu benè', za'a lu'u beo. Hualè'ëjë' taže de yela' huaca quia', taže de yela' r nabè' quia'. ³¹ Na'ra ise'ela' yaca ángel quia' ta cuedyijè' trompeta quiejè' zidzo gula. Caora na' yegu'udi' ja ben' ulioga' nè'èdi' sa'jè' duže yedyi layu guidajè' ga zua'.

³² 'Ulehue pensari ca raca quie yaga higo. Cati naca taca'n re'ene, na' rasi la'aga' quien, na' nezile bazeza' biu' uba. ³³ Lëscan' cati ilè'ële araca cabè' baonia' le'e, reya'ala' inezile baruen bagozi dza iyudyi quie dyilayu. ³⁴ Tali rnia' le'e, tu bineya ži'i suba ben' nita' na'a, bè' gaca cabè' baonia' le'e. ³⁵ Huade quie ta dyia guibá len lao dyila yu cana'zi, pero quie di'idza' rnia', biten cana'zi. Decazide gacan.

³⁶ 'Nunu nezi bata idyin dza iyudyi dyilayu. Binezi ja ángel dyia guibá, binezda' nè'èdi' ži'i Diuzi. Tuzi Xuza' Diuzi nezinè'.

³⁷ 'Cabè' guca dza uzu Noé dyilayu, lëscana' gaca cati yeguida' nè'èdi', bichi yugulu benè', tatula. ³⁸ Na' dza na' cati baruen bago gaca juicio nisa, bigulejè'. Nita'jè' ri'o raojè', rutzagana' ja zi'ijè' hasta bdyin dza cati uyu'u Noé lu'u barco quienè'. ³⁹ Na' bigucabè'jè' bi gaca quiejè' hasta dyin dza guca juicio nisa, cana' bi'a nisa yugulujè' gutijè'. Lëscana' gaca cati yeguida' nè'èdi', bichi yugulu benè', tatula. ⁴⁰ Cati idyin dza na', chi zu chopa benè' layela, na' yequiè' ja ángel tunè', itunè' yega'n. ⁴¹ Lëscana' chi zu chopa nigula hueto, na' yequiè' ja ángel tunè', itunè' yega'n.

⁴² 'Ulesu listo como dan' binezile bi hora yeguida' nè'èdi' naca' xa'nle. ⁴³ Ulehue pensari can' nia' le'e. Chi nezi xa'n yu'u bi hora guida ben' uban du rëla, huazunè' listo ta ina'nè' bihuenè' lato tzu'u ben' uban lu'u yu'u quienè' cuannè'. ⁴⁴ Quie lena', sule listo, como dan' cati ruele pensari biguida', huida', lëhora na' cati guida' nè'èdi', bichi yugulu benè'.

Unë Jesús tu ejemplo quie tu mozo (Lc. 12.41-48)

⁴⁵ Na' una Jesús:

—Rnia' le'e tu ejemplo quie tu mozo, ben' rioñe'e ruzu di'idza'. Na' pca'n xa'nnè' lënë' ta ugaonè' ja ben' mozo quienè'. Na' uza'nè' zioquè'. ⁴⁶ Na' huatzaxe xa'nnè' lënë' cati yedyinnè' ilè'èné' rue mozo za' cabè' ta bënë' lëbè' mandado. ⁴⁷ Tali rnia' le'e, uca'n xa'nnè' lao na'anè' yugulu ta de quienè'. ⁴⁸ Pero chi biruenè' tahuen, chi raquenè' biyedyinneza xa'nnè', ⁴⁹ chi usacanè' ja mozo quienè' bizinaquezi, chi rdalënë' ben' žudyi tuže hue'e, ⁵⁰ na' yedyin xa'nnè' cati raquenè' biyedyin xa'nnè', ⁵¹ na'ra hue xa'nnè' lëbè' castigo ca castigo hue Diuzi ben' birue tuzi ca nayaquè'. Huayojè' gul' gabila ga cuedyiya'jè', ga gaojè' leijè'.

25

Unë Jesús tu di'idza' quie chi nigula cuidi'

¹ Na' una Jesús:

—Re'enda' inia' le'e tu di'idza' cabè' rue Diuzi inabè'nè' cati idyin dza na'. Nacan ca quie chi nigula cuidi', ben' uza'ja zioja ga raca huetzagana'. Nu'ajabi' lámpara yudzo aceite ta tziojabi' lidyí bibyu utzagana' ta tzelezajabi' lëbi' guidabi'. ² Na' guca ga'yo' nigula listo. Na' iga'yo'jabi' bigucajabi' listo. ³ Na' ja nigula binaca listo bibi'ajabi' tu frasco huio aceite ta yeyudzo lámpara bè' bebidyi aceite quien. ⁴ Pero ja nigula listo bi'ajabi' tu frasco huio aceite len lámpara quiejabi'. ⁵ Na' udzè bi'byu utzagana' guidabi'. Na' unan gasijabi' gusijabi'. ⁶ Na'ra ca du gatzo yela bejabi' rbedyiya' ja benè' unajè': "¡Baza' bi'byu utzagana'! ¡Ulero gapala'nlebi'!" ⁷ Na' uyasa ja nigula cuidi' yugujabi' bga'ala'jabi' lámpara quiejabi'. ⁸ Na' lao ga'yo'jabi' biguca listo gudyijabi' iga'yo'jabi' naca listo rëbijabi' lëjabi': "Ulegun ledao' aceite quiele nêto', dan' bareyula lámpara quiendo'." ⁹ Na'ra una ga'yo'jabi' listo rëbijabi' lëjabi': "Bigunndo'n, dan' chi gunndo'n, bigaquen quiendo' lente le'e. Uletzio tzegue'len ga ruti'nè'n ta gata' quiele." ¹⁰ Na' tu zio ja ga'yo'jabi' biguca listo tzegue'jabi' aceite, tu na' bdyin bi'byu utzagana'. Na' uyu'u iga'yo'jabi' de aceite quie conlè bi'byu utzagana' lu'u yu'u ga raca huetzagana'. Na' besiojè' yu'u. ¹¹ Ude na' bdyin iga'yo'jabi' unajabi' rëbijabi' bi'byu utzagana': "¡Señor, Señor, usalu yu'u tzu'undo'!" ¹² Na' una bi'byu utzagana' rëbibi' lëjabi': "Tali binubè'da' le'e."

¹³ Na' una Jesús rëbinè' ben' quienè':

—Ulehue listo, dan' binezile bi dza, bi hora, yeguida' në'edi', bichi yugulu benë', tatula.

Unë Jesús tu di'idza' quie tu xan' mozo, ben' pca'n dumi lao na'ajë'

¹⁴ Na' una Jesús:

—Re'enda' inia' le'e itu di'idza' cabë' rue Diuzi rnabë'në'. Ruenë' ca tu ben' re'en tzio yedyi tula. Tu zaza'në' tzione' guzinë' ja mozo quienë' ta pca'nnë' centavo quienë' lao na'ajë'.

¹⁵ 'Na' biži tu ben' mozo quië' bënë' cadu ga'yo' mila dumi plata. Itunë' bënë' cadu chopa mila dumi plata. Itunë' bënë' cadu tu mila dumi plata. Bënë' quie quiejë' dumi cabë' nezinë' rueljë' dyin dumi. Na'ra uzë'ë zioquë'.

¹⁶ Ben' mozo, ben' uzi' ga'yo' mila na', bëlënë'n dyin bënë' gan iga'yo' mila ži'inan. ¹⁷ Lëscan' ben' uzi' chopa mila, bëlënë'n dyin bënë' gan ichopa mila ži'inan. ¹⁸ Pero na' ben' uzi' tu mila, uyonë' yecachi'nënë' yeguenë' tu yero ga bdze'nënë' lu'u yu.

¹⁹ 'Bë' guca zë dza, na' bedyin xan' ja ben' mozo guzinë' lëjë' beyuelënë' lëjë' žubaba. ²⁰ Na' tanëro bdyin ben' uzi' ga'yo' mila yesannë' dumi. Na' unë' rëbinë' xa'nnë': "Señor, benlo'në' ga'yo' mila. Na' ni de iga'yo' mila ži'inan ta bia' gan." ²¹ Na' una xa'nnë' rëbinë' lëbë': "Tahuen gula cabë' bao'. Mozo dya'a naco', ruzulo' di'idza' quia'. Tadya'a bëlao' tadao' pca'na' lao nao', tana' uca'na' lao nao' tažera, idaohuero suro tuže." ²² Na' taorupe bdyin ben' uzi' chopa mila yesannë' dumi. Na' unë' rëbinë' xa'nnë': "Señor, benlo'në' chopa mila. Na' ni de ichopa mila ži'inan ta bia' gan." ²³ Na' una xa'nnë' rëbinë' lëbë': "Tahuen gula cabë' bao'. Mozo dya'a naco', ruzulo' di'idza' quia'. Tadya'a bëlao' tadao' pca'na' lao nao', tana' uca'na' lao nao' tažera, idaohuero suro tuže." ²⁴ Pero na' taoyune bdyin ben' uzi' tu mila. Na' unë' rëbinë' xa'nnë': "Señor, nezda' naco' ben' re'en mozo quie ta huejë' dyin gaca ži'inan dumi quio'. Huetzagao' mandado ja mozo quio' ta yezi'jë' usecho gaca ži'inan quio'. ²⁵ Lena' bdzeba' udyiaya'a dumi quio'. Tana' yecacha'n lu'u yu. Na' ni de dumi quio'. Gabi guca quien." ²⁶ Na' una xa'nnë' rëbinë' lënë': "Mozo mala žan huëdi naco'. Nezilo' huetzagua' mandado ja mozo quia' ta yezi'jë' usecho gaca ži'inan quia'. ²⁷ Tana' reya'ala' huelao' dyin dumi quia' ta gaca ži'inan cuenda cati yela' tatula yezi'a dumi quia' len ži'inan." ²⁸ Na' una xa'nnë' rëbinë' ben' nita'ja na': "Uleguba tu mila dumi nezi'në'. Ulehue'n ben' nezë chi mila. ²⁹ Nu ben' ruelë dyin ta pca'na' lao në'ë, hue'ra'lënë' tazëra gacaran sobre. Pero nu ben' biruelë dyin ta pca'na' lao në'ë, hueguba' ta pca'na' lao në'ë. ³⁰ Na'ra uledze' mozo žan huëdi niga lao lato chula ga cuedyinë', ga yedzagalaonë', ga gao leinë'." —Cana' una Jesús rëbinë' lëjë'.

Unë Jesús cabë' huenë' dza gaca juicio

³¹ Na' una Jesús:

—Cati yeguida' në'edi', bichi yugulu benë', huabi'a xlatoga'. Hueguidalia' ja ángel quia'. Huapala'n ja benë' në'edi'. ³² Na' yegu'udi' yugulu ben' tu tu yedyi de lao dylayu laohua'. Useria' ja benë' cuioga'jë' chopa cue' cabë' rue ben' rapa beco' ži'ila', rbioguë' beco' ži'ila' tzala'la, na' rbioguë' chivo itzala'la. ³³ Cana' huabioga' ben' nao xneza' zaquë' yebë, pero huabioga' ben' binao xneza' zaquë' yega'. ³⁴ Na' inia' yëba' ja ben' zu zaquë' yebë: "Uleda le'e, ben' neyëri laxta'ohue lao Diuzi. Uletzu'u guib'a ga arnabë' xuxa', ga pceuanë' desde dza cati ure'te dylayu. ³⁵ Lena' naca quiele, como dan' cati udua', benle në'edi' ta udaohua'. Cati ubilida', benle në'edi' ta hua'a. Cati uza'a yedyi tula bla'a žan yu'u quiele, benle posada quia'. ³⁶ Cati bdziogueda'

zaba', benle në'èdi' ta gucua'. Cati guca' zhui'a, cati guta' dyiguiba, bidale bedena'le në'èdi'." Cana' yëba' lëjè'. ³⁷ Na'ra ina ben' neyëri laxta'ohue lao Diuzi yëbijè' në'èdi': "Señor, ¿bata blë'èndo' luè' uduelo', na' benndo' ta udaolo'? ¿Bata blë'èndo' luè' ubililo', na' benndo' ta hue' elo'? ³⁸ ¿Bata blë'èndo' luè' uzao' yedyi tula blao' zan yu'u quiendo', na' benndo' posada quio'? ¿Bata blë'èndo' bdzioguelo' zabo', na' benndo' gucolo'? ³⁹ ¿Bata blë'èndo' luè' guta'lo' lu'u dyiguiba, na' bedena'ndo' luè'?" ⁴⁰ Na'ra inia' yëba'jè': "Tali rnia' le'e, yugute ta babële beyëchi'la'adyi'le bicha', ben' nao xneza', la'acazi ben' yëchi' gula, cana' beyëchi'la'adyi'le në'èdi'."

⁴¹ Na'ra inia' yëba' ja ben' nita' zaquè' yega': "Ulebiga' tzala'la le'e ben' yu'u de' lao Diuzi. Uletzio gui' gabila ta bireyula tuzioli ta pcueza Diuzi quie xan' taxi'ibi' len ja ángel quienan. ⁴² Lena' gaca quiele tziole, como dan' cati udua', bibenle në'èdi' ta gaohua'. Cati ubilida', bibenle në'èdi' ta yo'oga'. ⁴³ Cati uza'a yedyi tula bla'a zan yu'u quiele, bibenle posada quia'. Cati bdziogueda' zaba', bibenle ta gacua'. Cati guca zhui'a, guta' lu'u dyiguiba, bibidale bedena'le në'èdi'." Cana' yëba' lëjè'. ⁴⁴ Na'ra inajè' yëbijè' në'èdi': "Señor, ¿bata blë'èndo' luè' uduelo'? ¿Bata blë'èndo' luè' ubililo'? ¿Bata blë'èndo' luè' uzao' yedyi tula blao' zan yu'u quiendo'? ¿Bata blë'èndo' luè' bdzioguelo' zabo'? ¿Bata blë'èndo' luè' guca zhue'lo'? ¿Bata blë'èndo' luè' guta'lo' lu'u dyiguiba, na' bibeyëchi'la'adyi'ndo' luè'?" ⁴⁵ Na' inia' yëba'jè': "Tali rnia' le'e, yugute ta bibële bibeyëchi'la'adyi'le ja ben' nao xneza', la'acazi ben' yëchi' gula, cana' bibeyëchi'la'adyi'le në'èdi'." ⁴⁶ Caora na' tziøjè' gui' gabila ta bireyula tuzioli. Pero ja ben' neyëri laxta'ohue lao Diuzi, huayojè' tzesuljè' Diuzi guibá tuzioli. —Cana' una Jesús rëbinè' lëjè'.

26

Cabè' bëjè' psaque'jè' ta guxujè' Jesús

(Mr. 14.1-2; Lc. 22.1-2; Jn. 11.45-53)

¹ Cati beyudyi una Jesús cana', na' unè' rëbinè' ben' quienè':

² —Como banezile, ichopa dzazi idyin ga'ala' lani pascua. Na' usedyin benè' në'èdi', bichi yugulu benè', lao na'a ben' r nabè' ta uda'jè' në'èdi' lè'è yaga cruzo. —Cana' una Jesús.

³ Na'ra caora na', begu'udi' ja ben' naca xan' pxuzi, len yaca los demás ben' rusèdi ley quie Moisés, len ben' r nabè' quie ben' Israel, begu'udi'jè' lali'a palacio quie Caifás, ben' naca xan' pxuzi r nabè'ra iza na'. ⁴ Na' psaque'jè' bi hue'jè' ta guxujè' Jesús balarazi gutijè' lëbè'. ⁵ Cana' unajè' rëbijè' laguedyijè': —Bireya'ala' gutironè' tu neraca lani ta biidza' ja benè' ra'o.

Tu nigula blatonè' aceite tzao' guicho Jesús

(Mr. 14.3-9; Jn. 12.1-8)

⁶ Na'ra uza' Jesús lënë' yaca ben' quiè' ziojè' yedyi Betania uyu'ujè' yu'u quie Simón, ben' guca yela' hue' ta ruzudzo' cuerpo quienè' dza na'. ⁷ Na' ubiga' tu nigula ga re' Jesús lao mesa. Nu' anè' tu frasco yo alabastro yudzo aceite tzao' ta rla'n zixi zeo. Na' blatonè'n guicho Jesús. ⁸ Cati blë'è ja ben' quie Jesús cabè' bë nigula, na'ra bdza'jè' unajè' rëbijè' laguedyijè':

—¿Bixquien' beditoguè' aceite cana'? ⁹ Reya'ala' guti'nè'n zaca'n dumi ze tacuenda gacalënë' ben' yëchi'.

¹⁰ Na' be Jesús cabè' r najè', na' unè' rëbinè' lëjè':

—¿Bixquien' ruele zèdi nigula niga? Tadya'a bënë' quia'. ¹¹ Nita'cazi ben' yëchi' ladole yugu dza. Pero në'èdi', baruen bago dza bira sulia' le'e. ¹² Lena'

blatonë' aceite rla'n zixi žeo guichoga', dan' baruen bago dza gatia' udze'jè' cuerpo quia' lu'u beló yo. ¹³ Tali rnia' le'e, con gatitezi tzetixogue' benë' xti'idza' Diuzi inajë' cabë' re'en Diuzi gata' yela' neban quie yaca benë' tuzioli, quixogue'rejë' cabë' bë nigula niga quia'. Cana' yeza'la'adyi'jè' cabë' bënë' quia'.

Psaque' Judas ta usedyinnë' Jesús lao na'a ben' r nabë'
(Mr. 14.10-11; Lc. 22.3-6)

¹⁴ Na'ra uyo tu ben' quie Jesús, ben' lao Judas Iscariote, yegue'lënë' ja xan' pxuzi di'idza'. ¹⁵ Na' una Judas rëbinë' lëjë':

—¿Gaca gunle në'ëdi' chan' usedyina' Jesús lao na'ale?

Na' udižujë' lëbë' galobechi dumi plata. ¹⁶ Na'ra rusaque' Judas nacala huenë' ta usedyinnë' Jesús lao na'a ja xan' pxuzi.

Udao Jesús rtze' lani pascua
(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Dza nëro uzu dza lani, dza rao ja ben' Israel yëta xtila biyu'un levadura, bebiga' ja ben' quie Jesús ga zënë' unajë' rëbijë' Jesús:

—¿Ga re'enlo' usiña'ndo' ta gaoro quie lani pascua?

¹⁸ Na' una Jesús rëbinë' lëjë':

—Uletzio ciudad Jerusalén tzena'le tu ben' zu na'. Na' yëbilenë': "Cani una maestro: Baruen bago dza gatia'. Quie lena' gaolia' ja ben' quia' quie lani pascua žan yu'u quio'."

¹⁹ Na' bë ja ben' quie Jesús cabë' bënë' lëjë' mandado. Uyojë' psiña'jè' ta gaojë' rtze' quie lani pascua.

²⁰ Cati bagula, bdyin Jesús ure'lënë' ja chipchopa ben' quië' lao mesa. ²¹ Tu raca neyu'ujë' raojë', una Jesús rëbinë' lëjë':

—Tali rnia' le'e, ladole zu tu ben' usedyin në'ëdi' lao na'a ben' r nabë'.

²² Na' guquejë' bayëchi' gula. Na' unë tu huiojë' rëbijë' Jesús:

—Señor, ¿quele në'ëdi' hua' cabë' unao'?

²³ Na'ra una Jesús rëbinë' lëjë':

—Nu ben' udyilë në'ëdi' tuže yëta quie lu'u plato dyia niga, lëbë' usedyinnë' në'ëdi' lao na'a ben' r nabë'. ²⁴ Decazide gaca quia' në'ëdi', bichi yugulu benë', cabë' rnën lë'ë guichi la'iya quie Diuzi. Pero bayëchi' gula ta za' gaca quie ben' usedyin në'ëdi' lao na'a ben' r nabë'. Tadya'acala quienë' chan' biuzunë' lao yedyi layu.

²⁵ Na' una Judas, ben' usedyin Jesús lao na'a ben' r nabë', rëbinë' lëbë':

—Maestro, ¿quele në'ëdi' hua' cabë' unao'?

Na' una Jesús rëbinë' lëbë':

—Aja', luë' na'.

²⁶ Na' tu raca neraojë', bëxu Jesús yëta xtila unë rëbinë' Diuzi: "Diuxcalelo'." Na' bžuzunë'n bë'në'n ja ben' quië' unë rëbinë' lëjë':

—Ulegao, lëlen nacan ca quie cuerpo quia'.

²⁷ Ude na', bëxunë' tu copa vino nisa bedzuli', unë rëbinë' Diuzi: "Diuxcalelo'." Na' bë'në'n ja ben' quienë' unë rëbinë' lëjë':

—Uleyo'on yugulule. Lëlen nacan ²⁸ ca quie ren quia'. Lena' ilatoga' gatia' cuenda yega'ntza'olë Diuzi le'e tacubi, lëscan' cuenda gata' yela' huezi'ze quie yaca ben' zë. ²⁹ Pero rnia' le'e, bira yo'oga' vino nisa bedzuli' tatula. Hasta que idyin dza zulële në'ëdi' ga r nabë' Xuza' Diuzi, na'tera yo'oga' tacubi tatula.

Una Jesús cabè' hue Pedro usannè' lèbè'

(Mr. 14.26-31; Lc. 22.31-34; Jn. 13.36-38)

³⁰ Na' ude beyudyi bilajè' tu himno, uza'jè' ziojè' ya'a Olivos. ³¹ Na' una Jesús rëbinè' ja ben' quienè':

—Huasanle nè'èdi' yugulule na'ayela. Gaca quiele ca rnan lè'è guichi la'iya quie Diuzi: “Hue' Diuzi lato guti ja benè' xan' beco' zi'ila', na'tera huedzatza ja beco' zi'ila' quienè'.” ³² Pero iyudyi guti ja benè' nè'èdi', huebana' tatula, huabialaohua' laole tzirole estado Galilea.

³³ Na'ra una Pedro rëbinè' Jesús:

—Ba'ala'cazi yugulujè' usanjè' luè', pero nè'èdi', biusancaza' luè'.

³⁴ Na' una Jesús rëbinè' Pedro:

—Tali rnia' luè', tu binecuedyi biu na'ayela, huèbo' benè' binubè'lo' nè'èdi' tzona lasa.

³⁵ Na' una Pedro rëbinè' Jesús:

—Ba'ala'cazi chi gutirèjè' nè'èdi' len luè', biyèpa' ja benè' binubè'da' luè'.

Cana'rè una yaca los demás ben' quie Jesús.

Bè'lè Jesús Diuzi di'idza' tu ga lao Getsemaní

(Mr. 14.32-42; Lc. 22.39-46)

³⁶ Na'ra bdyinlè Jesús ja ben' quienè' ga lao Getsemaní, na' unè' rëbinè' lèjè':

—Ni ulecue' tu raca tza'a ni' tzegue'lia' Diuzi di'idza'.

³⁷ Na' uquieh' Jesús Pedro len chopa zi'i Zebedeo, udyialaorajè' ilè'èti' ga uzulao guque Jesús bayèchi' gula. ³⁸ Na' una Jesús rëbinè' lèjè':

—Tanto raqueda' bayèchi' gula, re'ennan gutin nè'èdi'. Le'e yega'nle niga, pero bigasile huele nè'èdi' tuze.

³⁹ Na'ra udyialaoranè' ilè'èti' gutanè' guzu ru'ala layu, bè'lènè' Diuzi di'idza' unè' rëbinè' Diuzi:

—Xuza' Diuzi, chi saque' ucachi' ucui'olo' nè'èdi' ca naca tazèdi gula baza' gaca quia'. Nacan ca quie tu tasla' gula yo'oga'. Pero bihuelo' cabè' re'enda', huelo' cabè' re'encazo' gaca.

⁴⁰ Na' zeza'nè' bedyinnè' ga nita' ja ben' quienè'. Cati blè'ènè' arasijè', na'ra unè' rëbinè' Pedro:

—¿Quele biuzaque'le bigasile ni tu hora ta huele nè'èdi' tuze? ⁴¹ Bigasile. Ulehue'lè Diuzi di'idza' tacuenda bihue xan' taxi'ibi' le'e gan huele xquia ca tazèdi gula baza' quiele. Tali re'enle huelèle nè'èdi' tuze, pero nerdzioguele fuerza quie Diuzi ta huele cabè' re'enle huele.

⁴² Na' taorupe zio Jesús yegue'lènè' Diuzi di'idza' unè' caniga:

—Xuza' Diuzi, chi bisaque' te cana'zi ca naca tazèdi gula baza' gaca quia', na'ra gacacazi ca re'enlo'.

⁴³ Na'ra zeza'nè' bedyinnè' tatula ga nita' ja ben' quienè', pero nerasijè', dan' lega yu'u bichi gala laojè'. ⁴⁴ Na' psannè' lèjè' zioquè' taoyune lasa yegue'lènè' Diuzi di'idza'. Unè' rëbinè' Diuzi cabè' unè' taorupe. ⁴⁵ Na'ra zeza'nè' tatula bedyinnè' ga nita' ja ben' quienè'. Na' unè' rëbinè' lèjè':

—Na'a sí, gasile yezi'la'adyi'le. Abdyin hora usedyin benè' nè'èdi', bichi yugulu benè', lao na'a ben' napaja dula' xquia. ⁴⁶ Ulehasa, tziro. Baza' ben' usedyin nè'èdi' lao na'a ben' rnabè'.

Bèxujè' Jesús preso

(Mr. 14.43-50; Lc. 22.47-53; Jn. 18.2-11)

⁴⁷ Na' nezè Jesús ru'enè' di'idza' cati bdyin Judas, ben' naca ben' quienè' lao chipchopajè'. Bdyinlènè' ja ben' zè nu'ajè' macheta, nu'ajè' yaga. Bdyinjè' use'ela' ja xan' pxuzi len ja ben' rnabè' lèjè'. ⁴⁸ Na' Judas, ben' usedyin Jesús lao na'ajè', bega'nlènè' lèjè' di'idza' dza na' caora gudyinè' lèjè' caní:

—Con ben' gaohua' tu situ xa'ague, lëben' na' guxule preso.

⁴⁹ Na' ubiga' Judas ga zë Jesús unë' rëbinë' lëbë':

—¡Padiux, Maestro!

Caora na' udaohuë' Jesús tu situ.

⁵⁰ Na' una Jesús rëbinë' lëbë':

—Padiux, bicha'. ¿Bi ruelo' zao' niga?

Na'ra ubiga'jë' bëxujë' Jesús preso uquië'jë' lëbë'. ⁵¹ Caora na' ulio tu ben' quie Jesús macheta quienë', uchugunë' naga ben' naca mozo quie xan' pxuzi.

⁵² Na' una Jesús rëbinë' lënë':

—Bedze' macheta quio' lu'u lidyin. Nu ben' rdilaja conlë macheta, lëlëcazin gutin lënë'. ⁵³ ¿Binezo' ca huelëcazi Xuza' në'ëdi'? Chan' inaba' xuza', ise'elë' matla tzona galo chi mila ja ángel ta gacalëjë' në'ëdi'. ⁵⁴ Pero chi inaba' xuza' ta ise'elë' ja ángel, na' bisaque' gaca quia' cabë' rnën lë'ë guichi la'iya quie Diuzi ca reya'ala' gaca quia'.

⁵⁵ Na'ra una Jesús rëbinë' ja ben' bdyin bëxu lëbë':

—¿Abrole nu'ale macheta, nu'ale yaga, ta guxule në'ëdi'? ¿Raqule në'ëdi' ben' uban? Yugu dza rbi'a lu'u idao' rnabë'ra rusëdia' benë', pero bibëxule në'ëdi' caora na'. ⁵⁶ Pero cana' guca tacuenda uzu di'idza' cabë' di'idza' quie Diuzi bzu ben' profeta lë'ë guichi dza na'te.

Na'ra psanla'adyi' ja ben' quie Jesús lëbë' bzunojë'.

Psedynjë' Jesús lao na'a ben' rnabë'

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Na' uquië' ben' bëxu Jesús preso lao Caifás, ben' naca xan' pxuzi rnabë'ra. Lena' negu'udi' ja ben' rusëdi ley quie Moisés, len ja ben' rnabë'. ⁵⁸ Pero zio Pedro naohuë' lëjë' zitu'la, bdyinnë' lali'a yu'ute quie xan' pxuzi rnabë'ra. Na' uyu'unë' ure'në' lado ja policía ta ilë'ënë' cabizi gaca iyudyin.

⁵⁹ Na' rusaque' ja xan' pxuzi, len yugu ja ben' rnabë' quie idao' rnabë'ra bi huejë' ta gaojë' Jesús xquia ta gutijë' lëbë', ba'ala'cazi tafalso gaojë' lëbë' xquia. ⁶⁰ Pero bibedzelejë' ca inajë', ba'ala'cazi unë ja ben' zë di'idza' falso contra lëbë'. Na' beyudyite bdyin chopa testigo falso. ⁶¹ Na' unajë' rëbijë' ben' nita'ja na':

—Lëben' niga unë': "Udyiaya'a idao' rnabë'ra, na' yelisa'n tatula lao tzona dza."

⁶² Na'ra uzuli xan' pxuzi rnabë'ra, unë' rëbinë' Jesús:

—¿Bixquien' birequëbo'? ¿Bi ca nao' dan' rnëjë' cabë' unao'?

⁶³ Pero chizi bega'n Jesús. Na' una xan' pxuzi rnabë'ra rëbinë' Jesús:

—Rguntia' Diuzi zu guibá, guenë' chi rnao' tali. Unë nëto' chi tali naco' Cristo, zi'i Diuzi.

⁶⁴ Na' una Jesús rëbinë' lëbë':

—Tali naca' Cristo, zi'i Diuzi, cabë' unao'. Lëscan' inia' le'e, hualë'ële në'ëdi', bichi yugulu benë', cati cui'a zaquë' yebë cuëta Diuzi, ben' de yela' rnabë' ze quie. Lëscan' hualë'ële në'ëdi' cati yeguida' tatula lao beo zë zan guibá.

⁶⁵ Na'ra tantozi bdza' xan' pxuzi rnabë'ra, uchezanë' žabë' unë' rëbinë' ja ben' nita' na':

—Rnaya' ben' niga Diuzi cabë' rnë'. Bira rnaban testigo tula. Abele cabë' di'idza' unë' rnaya'në' Diuzi. ¿Bi ca nale huero quienë'?

⁶⁶ Na' unajë' rëbijë' xan' pxuzi rnabë'ra:

—Napë' dula' xquia, reya'ala' gatinë'.

⁶⁷ Na'ra bda'jë' žen' laohuë', bëjë' lëbë' zi'. Ibalajë' udijë' laohuë', ⁶⁸ unajë' rëbijë' lëbë':

—Chi naco! Cristo, unacara nu udi luë'.

Una Pedro binubë'në' Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Tu neraca cana!, ure! Pedro lali'a. Na' ubiga! tu nigula rue dyin lao xa'ne ga re! Pedro unanë' rëbinë' lëbë':

—Lëscana! luë', rdalërao! Jesús, ben' estado Galilea.

⁷⁰ Na'ra una Pedro rëbinë' lënë':

—Binubë'da! nu ben' nao!.

⁷¹ Na' zio Pedro zënë' ru'a puerta cati blë'ë itu nigula zë na'. Na'ra una nigula na' rëbinë' ja ben' zë na':

—Lëscan! lëben! na' rdalërenë' Jesús, ben' yedyi Nazaret.

⁷² Na' una Pedro rëbinë' lëjë':

—Ruguntia! Diuzi binubë'da! ben' na'.

⁷³ Tu chi'zi ude beyudyi na', ubiga! ja ben' nita'ja na' ga zë Pedro, unajë' rëbijë' Pedro:

—Tali luë' nacarao! ben' quie ben' na' como dan' nenate cabë' ruelo! ru'elo! di'idza'.

⁷⁴ Na'ra rugunte Pedro Diuzi hue Diuzi lëbë' castigo chi binacan tali cabë' rnë'. Na' unë' rëbinë' ja ben' nita' na':

—Binubë'da! nu ben' nale cana'.

Caora na' laoredyite tu biu. ⁷⁵ Na' beza'la'adyi! Pedro cabë' una Jesús gudyinë' lëbë': "Tu binecuedyi biu na'ayela, na' tzona lasa yëbo' benë' binubë'lo' në'ëdi'." Na' bero Pedro zionë' uredyinë' zi'laza gula.

27

Psedyinjë' Jesús lao na'a Pilato

(Mr. 15.1; Lc. 23.1-2; Jn. 18.28-32)

¹ Na' cati uyan! na', bega'n yugu ja xan! pxuzi, len ja ben' r nabë' quie ben' Israel di'idza' bi huejë' ta gutijë' Jesús. ² Na'ra nuquiojë' Jesús psedyinjë' lëbë' lao na'a Poncio Pilato, ben' naca gobernador.

Cabë' guca guti Judas

³ Cati blë'ë Judas cabë' ruejë' quie Jesús gutijë' lëbë', na'ra beyaquenë' cabë' bënë'. Na' uyonë' yesannë' lao ja xan! pxuzi, len ja ben' r nabë' galobechi dumi plata ta udizujë' lëbë'. ⁴ Na' unë' rëbinë' lëjë':

—Abia! tu xquia, psedyina! tu ben' bibi dula! xquia quie de lao na'ale, na' gutilenë'.

Pero na' unajë' rëbijë' lëbë':

—¿Bi cuenda quie nëto'? Nacan cuenda quio! luë'.

⁵ Na'ra bzala Judas dumi plata lu'u idao' r nabë'ra uyoguë' bdze'në' du quienë' uzë ladza ta gutinë'.

⁶ Na' bezi! ja xan! pxuzi dumi plata unajë' rëbijë' laguedyijë':

—Bireya'ala! udze'ro dumi niga lu'u caja ga yu'u gun quie Diuzi, como dan' xlažo quie ben' bëti benë' na'.

⁷ Na'ra labega'ntejë' di'idza' bi huejë' conlë dumi yeya'ojë' tu cue' layu ga ucachi'jë' ben' binaca ben' Israel. Na' layu beya'ojë' laona layu quie ben' rue taza plato dza na'. ⁸ Pero na'a biralaona cana'. Anexuba ja benë' laona layu quie ren. Cana' laona hasta na'adza. ⁹⁻¹⁰ Cana' uzu di'idza' cabë' una profeta Jeremías dza na'. Lëdi'idza' na' rnën caniga: "Aodizu ben' Israel galobechi dumi plata precio quienë'. Lëdumi aozi'jë' beya'ojë' tu cue' layu quie ben' rue taza plato. Cana' una Diuzi gudyinë' në'ëdi'." Cana' una profeta Jeremías.

*Zë Jesús lao Pilato**(Mr. 15.2-5; Lc. 23.3-5; Jn. 18.33-38)*

¹¹ Na'ra uquiè'jè' psedyinjè' Jesús lao na'a ben' naca gobernador. Na' una ben' naca gobernador rëbinè' Jesús:

—¿Naco' rey quie ben' Israel?

Na' una Jesús rëbinè' lëbè':

—Naca' rey quiejè' cabè' unao'.

¹² Cati rao ja xan' pxuzi, len ben' r nabè' Jesús xquia, bibequëbinè'. ¹³ Na' una Pilato rëbinè' Jesús:

—¿Quele birelo' cabè' najè' raojè' luè' xquia?

¹⁴ Pero bibequëbi Jesús tatula. Tana' lena' lega beban gobernador.

*Pchugulijè' gati Jesús**(Mr. 15.6-20; Lc. 23.13-25; Jn. 18.38—19.16)*

¹⁵ Na' de tu costumbre quiejè' yebio gobernador tu ben' preso yu'u lu'u dyiguiba tu raca lani pascua. Na' yebio gobernador nutezi ben' re'en ja benè' yero. ¹⁶ Na' yu'u tu ben' lao Barrabás lu'u dyiguiba. Nezi ja benè' dyè'edi naquè' ben' mala. ¹⁷ Na'ra bè' begu'udi' ja benè', na' una Pilato rëbinè' lëjè':

—¿Ca nuzilajè' re'enle yebioga' lu'u dyiguiba? ¿Re'enle yebioga' Barrabás? ¿O chi re'enle yebioga' Jesús, ben' na use'ela' Diuzi lëbè'?

¹⁸ Cana' unè' rëbinè' lëjè' dan' gucabè'nè' yela' zè' quie ben' r nabè' psedyinjè' Jesús lao na'anè'.

¹⁹ Na'ra tu ure' Pilato ga ruenè' justicia, caora use'ela' žgulè' di'idza' gudyinè' lëbè': "Usanlo' quie ben' na', dan' bibi xquia napè'. Uxusa' udiyele cabè' raca quienè'. Lega rdëbida' quio' chi biusanlo'nè'."

²⁰ Pero bè'lè ja xan' pxuzi len ja ben' r nabè' ja benè' di'idza' ta inabajè' ta yero Barrabás, pero ta gutijè' Jesús. ²¹ Na' una gobernador rëbinè' lëjè' tatula:

—¿Nulajè' lao rupajè' re'enle yebioga' lu'u dyiguiba?

Na' unajè' rëbijè' lëbè':

—Barrabás.

²² Na' unaba Pilato rëbinè' lëjè':

—¿Bizi hua' quie Jesús, ben' na use'ela' Diuzi lëbè'?

Na' yugutejè' unajè' rëbijè' Pilato:

—¿Uda'lo'nè' lè'è yaga cruzo!

²³ Na' una Pilato rëbinè' lëjè':

—¿Bizi xquia bënë'?

Pero na' unajè' zidzo rëbijè' lëbè':

—¿Uda'lo'nè' lè'è yaga cruzo!

²⁴ Cati gucabè' Pilato bisaque' gaca areglo, lëzi blë'ënè' bdza' ja benè', na' bënë' mandado yexi'jè' nisa udibinè' nè'è lao ja benè', unè' rëbinè' lëjè':

—Binaca cuenda quia' nè'èdi' dan' gatinè'. Rnia' le'e gabi xquia bënë'. Nacan cuenda quiele.

²⁵ Na' una yugujè' rëbijè' lëbè':

—Cuenda quiendo' len ži'indo' nacan dan' gatinè'.

²⁶ Na'ra bebio Pilato Barrabás lu'u dyiguiba. Bënë' mandado udi ja soldado Jesús guidi, na' uda'jè' lëbè' lè'è yaga cruzo.

²⁷ Na' uquiè' ja soldado Jesús lao palacio. Caora na' begu'udi' yugu ja laguedyi soldado quiejè', bzujè' lëbè' gatzò la'ohue. ²⁸ Na' ulëchojè' zabè', bgacojè' lëbè' tu la'ari' žna. ²⁹ Na' bdze'jè' guichoguè' tu coron yëchi', psejè' lëbè' tu xaga zaca' nè'è yebè. Na'ra uditzujè' žibijè' laohuè' rutitujè' lëbè' unajè' rëbijè' lëbè':

—¡Viva luè!, Rey quie ben' Israel!

³⁰ Lëscan' bda'jè' lèbè' zen'. Na' begubajè' xaga zenè' udijè'n guicho Jesús.
³¹ Ude beyudyi ptitujè' lèbè', belèchojè' tu la'ari' zna guconè', begacojè' lèbè' zabacazè'. Na' uquiè'jè' lèbè' ta uda'jè' lèbè' lè'è yaga cruzo.

Cabè' guca bda'jè' Jesús lè'è yaga cruzo
(Mr. 15.21-32; Lc. 23.26-43; Jn. 19.17-27)

³² Na' du tu neza bedilajè' tu ben' yedyi Cirene laonè' Simón. Na' bējè' mandado hua'anè' yaga cruzo.

³³ Cana' bdyinjè' ga laona Gólgota, ta inaro xti'idza'ro: Ya'a chita guicho ben' huati. ³⁴ Na' bē'jè' ta yo'oguè' vino nequixi tasla' gula. Bè' hue'enè'n ledao' bicu', bigu'unnè' yo'oguè'n.

³⁵ Na' ude beyudyi bda' soldado lèbè' lè'è yaga cruzo, na'ra bējè' suerte bē'jè' laze žabè'. Cana' uzu di'idza' bzu ben' profeta lè'è guichi dza na'. Lèdi'idza' rnan caniga: “Bējè' suerte bē'jè' laze žaba.” ³⁶ Na'ra ure' soldado ta rapajè' lèbè'. ³⁷ Na' guicho cruzo bdyiajè' tu letrero ga rguixogue'n ca bi xquia bēnè' dan' bētijè' lèbè'. Lè'è letrero unan caniga: “Jesús, Rey quie ben' Israel.”

³⁸ Lëscan' bda'rējè' chopa ben' uban lè'è ichopa yaga cruzo. Bzujè' tun zaquè' yebè cuèta Jesús, itun bzujè' zaquè' yega'. ³⁹ Na' ude ja benè' ptitujè' lèbè' ruta guicho laojè'. ⁴⁰ Unajè' rēbijè' lèbè':

—Luè' unao' udyiaguillo' idao' rna'bè'ra, na' yeyuelo'n lao tzona dza, psela cuinlo' na'a. Chi tali ži'i Diuzi luè', beyēzi lè'è yaga cruzo.

⁴¹ Lëscan' ja xan' pxuzi, len ja ben' rusēdi ley quie Moisés, len ja ben' partido fariseo, len ja ben' rna'bè' ptitujè' lèbè'. Na' unajè' rēbijè' laguedyijè':

⁴² —Pte pselanè' ben' tula, nechan' biuzaque'nè' uselanè' cuinnè'. Chi tali naquè' Rey quie ben' Israel, hueyēzè' lè'è yaga cruzo ta galero quienè'.

⁴³ Lëscan' unè' zudyi'ilènè' Diuzi. Ca rusela Diuzi lèbè' na'a chi tali raque Diuzi lèbè' como dan' unè' naquè' ži'i Diuzi.

⁴⁴ Na' lente ben' uban, ben' bda'rējè' lè'è yaga cruzo, ptturējè' lèbè'.

Cabè' guca guti Jesús
(Mr. 15.33-41; Lc. 23.44-49; Jn. 19.28-30)

⁴⁵ Na' bechula lao duže ciudad na'. Cadu la'odza uzulaon, na' beyudyin ca du las tres quie zadzè'. ⁴⁶ Lèhora na'tezi uredyia' Jesús zidzo unè':

—Elí, Elí, ¿lama sabactani? —ta inaro xti'idza'ro: Kuza' Diuzi, Kuza' Diuzi, ¿bixquien' apanla'adyo' nē'è'di?

⁴⁷ Na' be ja ben' nita' na' cabè' una Jesús. Na' unajè' rēbijè' laguedyijè':

—Profeta Elías rēzi ben' niga.

⁴⁸ Caora na' laziote tu ben' zu na' yexi'nè' tu ta naca yun' ca ži'ila' laona esponja. Na' bdze'nè'n lu'u vino sla' bzunè'n lao yaga ta bdyinnan sibi ga da' Jesús ta supinè'n. ⁴⁹ Pero una ibala ja ben' zè na' rēbijè' lèbè':

—Psan na'. Ya' ina'ro chi guida Elías uselanè' ben' niga.

⁵⁰ Na' uredyia' Jesús zidzo tatula, gutinè'. ⁵¹ Lèhora na'tezi bre'eza la'ari' zè gatzo lao' idao' rna'bè'ra. Babre'ezan gucan chopla' la'a. Lëscan' guca užu' ula'an yo yela. ⁵² Na' beyalo beló yo ga yu'u ben' huati. Beban ja zè ben' baguti, ben' bē quie xti'idza' Diuzi dza užujè'. ⁵³ Cati abeban Jesús, na'ra brojè' lu'u beló yo, uyojè' ciudad naca la'ia Jerusalén. Na' blè'è ja ben' zè lējè'.

⁵⁴ Na' cati blè'è xan' soldado lēnè' ja soldado quienè' cabè' guca užu' len itu ta guca, na'ra bdzebijè' unajè' rēbijè' laguedyijè':

—Tali naca ben' ni ži'i Diuzi.

⁵⁵ Na' nita' ja nigula zê zitu' rna'jê' cabê' raca quie Jesús. Gucalêjê' unaojê' lèbê' desde dza uza'nê' estado Galilea. ⁵⁶ Na' zêlê lèjê' María Magdalena, len María žna' Santiago, len José, len žna' yaca ži'i Zebedeo.

Pcachi'jê' Jesús lu'u beló yo

(Mr. 15.42-47; Lc. 23.50-56; Jn. 19.38-42)

⁵⁷ Cati agula, bdyin tu ben' uña'a, ben' yedyi Arimatea laohuê' José. Naquê' ben' nao xneza Jesús. ⁵⁸ Na' uyonê' yena'nê' Pilato unabanê' cuerpo quie Jesús ta tzeachi'nê'n. Na' bê Pilato mandado ta hue'jê' lèbê' cuerpo quie Jesús. ⁵⁹ Na' uži' José cuerpo quie Jesús, bdubinê'n tu la'ari' yêri. ⁶⁰ Na' yehua'anê'n bdze'nê'n lu'u tu beló yo ta zabeyudyi bënë'. Na' zaotacorê' ru'a beló yo tu yo ze gula ta naca laga'. Ude beyudyi na', bezê'è zeyoguê'. ⁶¹ Na' ru'a beló yo na' ure' María Magdalena lënë' itu María tula.

Pca'njê' ja soldado ga pcachi'jê' Jesús

⁶² Na' beteyu na' dza saodo, dza huezila'adyi' quiejê', uyo ja xan' pxuzi, len ja ben' partido fariseo yena'jê' Pilato ⁶³ unajê' rëbijê' lèbê':

—Señor, nêto' reza'la'adyi'ndo' cabê' una ben' huizi' yê' na' cati uzuê', unê' hueza'nê' ga de ben' huati huebannê' tatula lao tzona dza. ⁶⁴ Tana' lena' ruen zi huelo' mandado gapa ja soldado ru'a beló yo lao tzona dza. Cana' bisaque' tzio ja ben' quienê' du rêla tzelanjê' cuerpo quienê' tacuenda yëbijê' ja benê': “Beza'nê' ga de ben' huati bebannê'.” Chi huaca hue ben' quienê' cana', mazara yê' si'jê' benê'.

⁶⁵ Na' una Pilato rëbinê' lèjê':

—Ni nita' tu cue' soldado, ben' gapa ja ru'a beló yo. Ulequiê'jê' ta gapajê' dyê'êdi ru'a beló yo.

⁶⁶ Na'ra uyojê' uquiê'jê' soldado. Pquichijê' tu sello ga nedila ru'a yo ta nutacojê' ru'a beló. Na' pca'njê' ja soldado, ben' rapa ru'a beló yo.

28

Cabê' guca cati beban Jesús

(Mr. 16.1-8; Lc. 24.1-12; Jn. 20.1-10)

¹ Cati uyani' dza tula du bala dza domingo, uyo María Magdalena lënë' itu María tula yena'jê' ru'a beló yo. ² Caora na' lagucate tu užu' nun quie uyêzi tu ángel quie Diuzi guibá, bdubanê' yo nutacojê' ru'a beló, ure'nê' laonan. ³ Na' ruseni' laohuê' ca xni' yesa. Lëscan' žabê' rna'n raca titi' bezêri gula. ⁴ Cati blê'ê ja soldado ángel, na' lega bdzebijê' užizan lèjê' byalajê' layu, gutajê' ca quie ben' huati. ⁵ Na' una ángel rëbinê' ja nigula:

—Bidzebile. Nezda' reguilole Jesús, ben' guti lêtê yaga cruzo. ⁶ Bira zunê' niga. Abebannê' cabê' unê' gaca quienê'. Uledacara, ulena' ga bdze'jê' cuerpo quienê'. ⁷ Uletzio tzeguedyile ja ben' quienê' abeza'nê' ga de ben' huati, abebannê'. Huabialaohuê' le'e tu neza Galilea. Na'te hualé'êle lèbê'. Lena' ruen zi quixogu'i le'e.

⁸ Na' du rdzebi ja nigula, uza'jê' taria gan de beló yo, ziojê' redaohuejê' tzeguedyijê' ja ben' quie Jesús cabê' guca. ⁹ Na' ptilalao Jesús lèjê' tu neza ugapé' diuzi lèjê'. Na' ibiga'jê' gan zê Jesús gutajê' layu bda' ru'ajê' uyonela'adyi'jê' lèbê'. ¹⁰ Na' una Jesús rëbinê' lèjê':

—Bidzebile. Uletzio tzeguedyile ja bicha' ben' quia' ta tziojê' Galilea. Na'te ilê'jê' nê'êdi'.

Cabë' una ja soldado guca quie cuerpo quie Jesús

¹¹ Tu raca nezio ja nigula tu neza, uza' bala ja soldado uyojè' ciudad Jerusalén yeguëdyijè' ja xan' pxuzi cabè' guca quiejè'. ¹² Na' uyo ja xan' pxuzi yeguëdyijè' ja ben' rnabè' ta yega'njè' di'idza' bi huejè'. Na' bè'jè' ja soldado dumi ze. ¹³ Na' unajè' rëbijè' ja soldado:

—Canì yëbile benè'. Du rëla du rasile, bida ja ben' quie Jesús, bedelanjè' cuerpo quienè'. ¹⁴ Chi inezi gobernador cabè' guca quiele, nêto' gacalêndo' le'e ta bibi zëdi gaca quiele.

¹⁵ Na'ra uzi' ja soldado dumi, uyojè' yeguëdyijè' ja benè' cabè' gudyi xan' pxuzi len ja ben' rnabè' lëjè'. Cabè' una ja soldado guca quie cuerpo quie Jesús, cana' na ja benè' guca quien hasta na'adza.

Use'ela' Jesús ben' quienè' tzetixogue'jè' benè' xti'idzè'

(Mr. 16.14-18; Lc. 24.36-49; Jn. 20.19-23)

¹⁶ Na' uza' ja chiptu ben' quie Jesús ziojè' estado Galilea. Na' bdyinjè' ga zu tu ya'a, ga gudyi Jesús lëjè' tziojè' dza na'te. ¹⁷ Lëgan' na' blëtëjè' Jesús uyonela'adyi'jè' lëbè'. Na' nita' ja ben' quienè' biralejè' chi lëbè'. ¹⁸ Na' ubiga' Jesús gan' nita' ja ben' quienè' unè' rëbinè' lëjè':

—Apcan' Diuzi lao na'a inabi'a lao duze guibá len duze dyilayu. ¹⁹ Tana' lena' inia' le'e, uletzio duze yedyi layu tzetixogue'le ja benè' xti'idza', usëdilejè' inaojè' xneza'. Ulehue' lao ja ben' nao xneza' uzëtole Diuzi, uzëtole nê'ëdi', uzëtole Bichi Be quienè'. ²⁰ Na' usëdilejè' huejè' duze cabè' baonia' le'e. Bigala'adyi'le sulia' le'e tuzioli hasta iyudyi dyila yu. Amén.

DI'IDZA' LA'TYA BZU SAN MARCOS LĒ'Ē GUICHI

Udixogue' Juan bautista xti'idza' Diuzi
(Mt. 3.1-12; Lc. 3.1-9, 15-17; Jn. 1.19-28)

¹ Cani guca dza na' cati uzulao Juan udixogue'nē' quie Jesucristo, ben' naca zi'i Diuzi.

² Azio zēra iza bzu profeta Isaías xti'idza' Diuzi lē'ē guichi. Cana' udixogue' Diuzi dan' rnēn caniga:

Huase'ela' tu ben' cuialao neza ga tzio' cuenda tzetixogue'nē' yaca benē' huido' luē'.

³ Huazu ben' na' lao lato dachi ga bidyia yu'u, huanē' zidzo yēbinē' laguedy-inē' caniga:

“Huele' hueluba neza quiele cuenda huida ben' naca xa'nro, usalole tu neza li.”

⁴ Cana' guca bida Juan lao lato dachi ga bidyia yu'u, bē'nē' lao yaca benē'. Cana' unē' gudyinē' leyaquē' de quie reya'ala' utza'yaquē' pensari quieyaquē', hueyaquē' lato ta hue' Juan laoyaquē' cuenda yezi'ze Diuzi dula' xquia quieyaquē'. ⁵ Uyo yaca ben' quie estado Judea len yaca ben' ciudad Jerusalén, bdyinyaquē' ga zē Juan. Caora uxubalēpiyaquē' ca tamedian bēyaquē', na'ra bē' Juan laoyaquē' lu'u yao Jordán.

⁶ Guco Juan la'ari' de guitza' quie žaba camello. Lēscan' tu cincho guidi bdze'nē' lē'ēnē'. Udaonē' bēchi'zu, hue'enē' bdyin'dao' quie bezu cera ta rdzela guixi' dao'. ⁷ Na'ra udixogue'nē' yaca ben' uyo ga zēnē' gudyinē' leyaquē':

—Ben' zeza'ra zenao nē'ēdi', nacarē' ben' ze ca nē'ēdi'. Tanto nacarē' ben' ze ca nē'ēdi', ni lē'ēti' bibi zaca' ni siquiera biyeyažoga' cuioga' guidi yu'u ni'anē'. ⁸ Nē'ēdi' ru'a laole conlē nisa, pero ben' zeza'ra zenao nē'ēdi', udze'nē' Bichi Be quie Diuzi lu'u guicho laxta'ole.

Bē' Juan lao Jesús
(Mt. 3.13-17; Lc. 3.21-22)

⁹ Na'ra uza' Jesús yedyi Nazaret quie estado Galilea zionē' bdyinnē' ga zē Juan. Lēgan' na' bē' Juan laonē' lu'u yao Jordán. ¹⁰ Cati bero Jesús lu'u yao, blē'ēnē' uyalogo guibá, blē'ēnē' uyēzi Bichi Be quie Diuzi ca rēzi biu bdyinnē' ga zē Jesús. ¹¹ Na'ra unē' Diuzi ga zuē' guibá unē':

—Luē' naco' ži'ina', nedyē'ēda' luē'. Lega redaohueda' ca ruelo'.

Gu'un xan' taxi'ibi' iquixi Jesús huenē' tamala
(Mt. 4.1-11; Lc. 4.1-13)

¹² Na'ra uquiē' Bichi Be quie Diuzi Jesús lao lato dachi ga bidyia yu'u.

¹³ Lēgan' na' uzunē' lao chopa galo dza ga uzurē yaca bia guixi'. Na'ra bdyinrē Satanás ga zē Jesús gu'unnan iquixi Jesús huenē' tamala. Pero na'a use'ela' Diuzi yaca ángel quienē' ta gacalēyaquē' Jesús.

Uzulao Jesús udixogue'nē' yaca benē' xti'idza' Diuzi
(Mt. 4.12-17; Lc. 4.14-15)

¹⁴ Caora baode bdze'yaquē' Juan lu'u dyiguiba, na'ra uza' Jesús zionē' yaca yedyi nebaba Galilea ta tzetixogue'nē' xti'idza' Diuzi. ¹⁵ Na'ra una Jesús gudyinē' leyaquē':

—Babdyin hora cati inabë' Diuzi lao yedyi layu. Reya'ala' utza'le pensari quiele, hue quiele xti'idza' Diuzi.

Guži Jesús tapa yaca ben' rze bela

(Mt. 4.18-22; Lc. 5.1-11)

¹⁶ Na'ra uza' Jesús zioquë' ru'a lagun Galilea. Na' blë'ënë' Simón len bichinë' Andrés. Rueyaquë' dyin quieyaquë' rudze'yaquë' du yëxo lu'u nisa ta tzu'u yaca bela. ¹⁷ Na'ra una Jesús rëbinë' leyaquë':

—¡Ulenao në'ëdi'! Cabë' ruele cuirole bela yu'u lu'u nisa, cana' ulu'ena' le'e cuirole ben' nao xneza Diuzi.

¹⁸ Caora na' lapsanteyaquë' du yëxo quieyaquë', bira užeyaquë' bela, ziolëyaquë' lëbë'.

¹⁹ Bizi cati uza'ra Jesús ilë'ëti', blë'ënë' chopa zi'i Zebedeo, tunë' laonë' Santiago, itunë' laonë' Juan. Re'yaquë' lu'u barco dao' quieyaquë' reguibayaquë' du yëxo quieyaquë'. ²⁰ Na' caora guži Jesús leyaquë', pca'nyaquë' barco dao' quieyaquë' lao na'a xuziyaquë' len itu mozo, ziolëyaquë' Jesús.

Bebio Jesús tu bichi be mala

(Lc. 4.31-37)

²¹ Na' uza'yaquë' zioyaquë' bdyinyaquë' yedyi Capernaum. Cati bdyin dza saodo, dza huezila'adyi' quieyaquë', uyu'u Jesús lu'u idao' quieyaquë' laona sinagoga ta usëdinë' yaca ben' bedupa na'. ²² Na'ra tu bebanziyaquë' ca gudyi Jesús leyaquë', como dan' rusëdinë' leyaquë' ca ben' de yela' rnabë' quie cuinzë', cala ca yaca ben' rusëdi ley pca'n Diuzi lao na'a Moisés. ²³ Na' lu'u idao' ga zë Jesús bdyin tu ben' yu'u bichi be mala lu'u laxta'onë'. Caora na' urediya' bichi be mala yu'u ben' na' rëbinan Jesús:

²⁴ —¿Bixquien' zao' niga ga zundo', luë' Jesús, ben' yedyi Nazaret? ¿Quele zao' niga ta tilalao' udyiaguï'lo' nëto'? Nubë'da' luë', naco' ben' la'iya, ben' use'ela' Diuzi.

²⁵ Na'ra udila Jesús lëbin, rëbinë' bichi be mala:

—¡Bira inëlo'! ¡Bero gan' yu'ulo' lu'u laxta'o ben' niga!

²⁶ Caora na' tu rzizizi ben' na' zënë' yu'unë' bichi be mala, na'ra urediya'n beronan gan' yu'un zeyonan. ²⁷ Cana' tu bebanzi yaca benë', du rdzebiyaquë' inëyaquë' rëbiyaquë' laguediyaquë':

—¿Nuži naca ben' niga? ¿Bizi huesëdi cubi ruenë'? ¿Como hasta yaca bichi be mala raleyacan quienë'?

²⁸ Cana' guca luegozi unezi yaca ben' nita' yedyi nebaba Galilea cabë' rue Jesús.

Byue Jesús ben' gula quie Simón Pedro

(Mt. 8.14-15; Lc. 4.38-39)

²⁹ Na'ra cati beroyaquë' idao' sinagoga, uza' Jesús zioquë' len Santiago len Juan bdyinyaquë' lidyí Simón len Andrés. ³⁰ Na' de ben' gula quie Simón lao belaga yu'unë' žla. Quie lena' gudyiyaquë' Jesús cabë' raca quienë'. ³¹ Caora na' ude Jesús gan' de nigula na' lao belaga. Ca bdyin Jesús na', bëxunë' na'a nigula, uchisanë' lëbë'. Ca uyasë', caora na' bero tala yu'unë'. Na'ra bë nigula na' ta udaoyaquë'.

Byue Jesús yaca ben' zë, ben' raca zhue'

(Mt. 8.16-17; Lc. 4.40-41)

³² Na'ra caora gula uxin banaca chula, uquië' yaca benë' nu ben' raca zhue', len nu ben' yu'u bichi be mala lu'u laxta'ohuë', bdyinyaquë' gan' zë Jesús. ³³ Na' bedupa yugulu ben' yedyi na' lali'a yu'u ga zë Jesús. ³⁴ Na'

nacala yela' hue' racayaquë', beyue Jesús leyaquë', bebionë' bichi be mala yu'uayaquë'. Bibë'në' lato inëyacan como neziyacan nu naquë'.

*Udixogue' Jesús xti'idza' Diuzi yaca yedyi nebaba Galilea
(Lc. 4.42-44)*

³⁵ Na'ra du bala cati nenaca chula, uyasa Jesús zionë' ru'a yedyi ta hue'lënë' Diuzi di'idza'. ³⁶ Caora uyasa Simón len yaca compañero quienë', blë'ëyaquë' ganu Jesús dyila', caora na' uza'yaquë' yediloyaquë' lëbë'. ³⁷ Na' cati bedze-leyaquë' lëbë', unëyaquë' rëbiyaquë' lëbë':

—Ben' zë za', rguiloyaquë' luë'.

³⁸ Na'ra una Jesús rëbinë' leyaquë':

—Tzioro lao yedyi tula gan' nacara ga'ala' cuenda quixogue'ria' leyaquë' xti'idza' Diuzi. Tana' lena' bida' lao yedyi layu.

³⁹ Cana' uyo Jesús yugulu yedyi nebaba Galilea, uyu'unë' lu'u idao' sinagoga quieyaquë' udixogue'në' yaca ben' nita' na' xti'idza' Diuzi, bebionë' yaca bichi be mala yu'uayaquë'.

*Beyue Jesús tu ben' yu'u yela' hue' ca pindo
(Mt. 8.1-4; Lc. 5.12-16)*

⁴⁰ Na'ra bebiga' tu ben' yu'u yela' hue' ca pindo gan' zë Jesús, uditzu zibinë' lao Jesús unëyëchi'në' rëbinë' Jesús:

—Uzi'ze quia'. Chi re'enlo', huaca yeyuelo' në'ëdi'.

⁴¹ Na'ra beyëchi'la'adyi' Jesús lëbë'. Blinë' në'ë bëxunë' lëbë' unë' rëbinë' lëbë':

—Re'enda' hua' ca nao'. Hueyua' luë' na'a.

⁴² Caora na' lapsante yela' hue' quië' lëbë', labeyacatë'. ⁴³ Na'ra unë Jesús rëbinë' ben' na':

⁴⁴ —Ni tu nunu yëbo' can' babia' quio'. Tuzi ta rnia', uyo yalu'e cuinlo' lao pxuzi. Na' bë'në' tu ta reya'ala' hue'lo'në' cabë' rnë lë'ë ley quie Moisés dan' babeyëri'lo'. Cana' huelo' ta inezi yaca benë' babezi yela' hue' yu'ulo'.

⁴⁵ Pero zio ben' na' udixogue'në' laguedyinë' cabë' guca quië'. Quie lena' bira uzaquë' tzeta Jesús zaquë'lao la'o yaca yedyi. Puro ru'a yedyi ga bidyia yu'u udanë'. Pero uza' yaca benë' quie quie yedyi quieyaquë' zioyaquë' bdyinyaquë' ga rda Jesús.

2

*Beyue Jesús tu ben' zi
(Mt. 9.1-8; Lc. 5.17-26)*

¹ Bë' baode chopa tzona dza, na' bedyin Jesús ciudad Capernaum. Tzadi unezi yaca benë' bedyin Jesús zan yu'u quienë'. ² Quie lena' bedupa yaca ben' zë gan' zë Jesús. Tanto bedupa yaca ben' zë, lente lali'a bedza'yaquë'. Na' udixogue' Jesús leyaquë' xti'idza' Diuzi. ³ Na'ra bdyinra itapa benë' len belaga ga zuba tu ben' zi. ⁴ Pero biuzaquë' tzu'ulëyaquë' ben' zi lu'u yu'u gan' zë Jesús, dan' nita' ben' zë. Quie lena' urëyaquë' lun yu'u, udubayaquë' yaga daco' lun yu'u, bzuyaquë' tu yëro ta pchizayaquë' belaga layu ga zuba ben' zi. ⁵ Caora blë'ë Jesús cabë' bëyaquë' rzudyi'ilëyaquë' lëbë' de que huacanë' yeyuenë' ben' zi, na'ra unë Jesús rëbinë' ben' zi:

—Bicha', baozi'zia' dula' xquia quio'.

⁶ Bizi bago ure' chopa tzona ben' rusëdi ley ta pca'n Diuzi lao na'a Moisés. Na'ra bëyaquë' pensari unayaquë': ⁷ “¿Bixquien' una ben' niga cana'? Bar-naya'në' Diuzi unë' cana' como dan' tuzi Diuzi huaca si'ze dula' xquia quiero,

quele ben' ni.” ⁸ Pero gucabè' Jesús ca naca pensari quieyaquè'. Lena' una Jesús rëbinè' leyaquè':

—¿Bixquien' ruele pensari cana'? ⁹ ¿Ca nurlan nacaran yalo hua' quie ben' zi niga? ¿Nacaran yalo chi yëpa'nè': “Aozi'zia' dula' xquia quio”, o chi yëpa'nè': “Uyasa, bezi' belaga quio', beza' beyo”? ¹⁰ Pues naca' bichi yugulu benè'. Na'ra ulu'ena' le'e de yela' r nabè' quia' lao yedyi layu ta yezi'zia' dula' xquia quie yaca benè'.

Na'ra una Jesús rëbinè' ben' zi:

¹¹—Rnia' luè', uyasa, bezi' belaga quio', beyo žan yu'u quio'.

¹² Caora na' uyasa ben' zi, bezi'nè' belaga quie', zeyoguè', udenè' gan' nita' yaca benè'. Na' bëyaquè' Diuzi ben' že unayaquè':

—Ni tu lasa binelè'ëro cabè' bè ben' ni.

Guzi Jesús Levi

(Mt. 9.9-13; Lc. 5.27-32)

¹³ Na' uyo Jesús ru'a lagun Galilea tatula. Caora babedupa ben' zè ga zè Jesús, na'ra psëdinè' leyaquè'. ¹⁴ Bè' beyudyi na', uza' Jesús zionè' udenè' blè'ënè' Leví, ži'i Alfeo, re'nè' ga re' ben' huequižu. Na' una Jesús rëbinè' lëbè':

—Unao nè'ëdi'.

Na'ra uza'nè' ziolënè' Jesús.

¹⁵ Bè' baode chopa tzona dza, uyo Jesús yetaonè' žan yu'u quie Leví. Lëscan' uyorè zè ben' huequižu len zè ben' de dula' xquia quie, ure'rëlëyaquè' Jesús lënè' yaca ben' quienè'. Guca ben' zè, ben' unao lëbè'. ¹⁶ Pero caora blè'ë yaca ben' rusëdi ley quie Moisés len yaca ben' partido fariseo cabè' rue Jesús, raonè' tzaže len ben' huequižu len ben' de dula' xquia quie, na'ra unayaquè' rëbiyaquè' ben' quie Jesús:

—¿Bixquien' ri'o rao maestro quiele tzaže len ben' huequižu len ben' de dula' xquia quie?

¹⁷ Na' cati babe Jesús cabè' unayaquè', na'ra unënè' rëbinè' leyaquè':

—Yaca ben' biraca žhue', biruen zi guida médico ta yeyuenè' leyaquè'. Pero nu ben' raca žhue', sí ruen zi guida médico. Quele za' rëža' ben' nazi bibi xquia rue, dechan' za' rëža' ben' re'en yezi dula' xquia quie.

Unabayaquè' Jesús quie ubasi

(Mt. 9.14-17; Lc. 5.33-39)

¹⁸ Na'ra guca tu dza rue ben' quie Juan bautista len ben' partido fariseo ubasi, na' bdyin chopa tzona benè' ga zè Jesús unayaquè' lëbè':

—¿Bixquien' birue yaca ben' quio' ubasi cabè' rue ben' quie Juan len ben' partido fariseo?

¹⁹ Na' una Jesús gudyinè' leyaquè':

—¿Rnaba' le'e chi rue yaca ben' bdyin ga raca huetzagana' ubasi tu nezu bi' utzagana' len leyaquè'? Tu nezu bi' utzagana' len leyaquè', birueyaquè' ubasi. ²⁰ Pero chi guida ben' rudie ben' utzagana', chi guxuyaquè' lëbi', hueyaquè' lëbi' ži', tzhua'ayaquè' lëbi' ga tula, na'ra hue yaca amigo quie bi' utzagana' ubasi.

²¹ Lëscan' una Jesús rëbinè' leyaquè':

—Bisague' ta' la'ari' cubi lë'ë la'ari' gula chi binetzërin, porque huetzere'nan icanan ru'a la'ari' gula, na' ichezan len mazara. ²² Lëscan' bisague' ca'ro nupi žixi lu'u bolsa guidi gula, porque bè' sulao ilëbin, huedza'n ichezan len. Cana' huabiagui' lao rupa cue'ten. Quie lena' ruen zi ca'ro nupi žixi lu'u bolsa guidi cubi.

Na' aoditzu yaca ben' quie Jesús dao trigo dza huezila'adyi'
(Mt. 12.1-8; Lc. 6.1-5)

²³ Na'ra bdyin tu dza saodo, dza huezila'adyi' quieyaquë', uza' Jesús lënë' yaca ben' quie' udeyaquë' layela ga neduza trigo. Na' uditzu yaca ben' quie Jesús dao trigo ta gaoyaquë'n. ²⁴ Na'ra una yaca ben' partido fariseo rëbiyaquë' Jesús:

—¿Bixquien' rue yaca ben' quio' dyin rguitzuyaquë' dao quie trigo dza huezila'adyi', dza bireya'ala' huero dyin?

²⁵ Na' una Jesús rëbinë' leyaquë':

—¿Binulabale lë'ë guichi cabë' bë rey David dza uduenë' lënë' yaca ben' quie'? ²⁶ Uyu'u rey David lu'u idao' r nabë'ra cati naca Abiatar xa'n pxuzi r nabë'ra, uzi'në' yëta xtila naca la'ya ta ru'eyaquë' Diuzi. Na' udaonë'n bënë'n len yaca ben' dzaganë', udaoyaquë' ta bireya'ala' gaoyaquë', ta reya'ala' gao yaca pxuzizi.

²⁷ Na' unë' rëbinë' leyaquë':

—Udixu Diuzi dza huezila'adyi' ta gacalën yaca benë'. Quele udixu Diuzi dza huezila'adyi' ta gaca xa'nyaquë'. ²⁸ Naca' bichi yugulu benë'. De yela' r nabë' quia' hua' mandado bi hue yaca benë' dza huezila'adyi'.

3

Beyue Jesús tu ben' neseco në'ë
(Mt. 12.9-14; Lc. 6.6-11)

¹ Na'ra uyu'u Jesús tatula lu'u idao' sinagoga. Lëgan' na' zë tu ben' neseco në'ë. ² Biži na' rbë'nao yaca benë' Jesús chi hueyuenë' ben' neseco në'ë dza saodo, dza huezila'adyi', tacuenda gaoyaquë' lëbë' xquia. ³ Na' unë' Jesús gudyinë' ben' neseco në'ë:

—Uda uzë gatzo la'o niga.

⁴ Na'ra una Jesús rëbinë' yaca ben' nita' na':

—¿Biži reya'ala' huero dza huezila'adyi'? ¿Reya'ala' huero tadya'a o tamala? ¿Reya'ala' uselaro benë' o gutiro benë'?

Pero bega'nyaquë' chizi, bibi unayaquë'. ⁵ Na'ra du rdza'në' una'në' leyaquë' dyë'ëdi. Guquenë' bayëchi' nun quie yela' zidi quieyaquë'. Na' unë' rëbinë' ben' neseco në'ë:

—Bli na'alo'.

Biži ca blinë' në'ë beyacaten dya'a. ⁶ Na'ra uza' yaca ben' partido fariseo zioyaquë' ta hue'lëyaquë' ben' partido Herodes di'idza' bi hueyaquë' ta gutiyaquë' Jesús.

Bdyin yaca ben' zë ru'a lagun ga zë Jesús

⁷ Pero uza' Jesús zionë' ru'a lagun Galilea. Lëscan' ziorë yaca ben' zë, ben' uza' yedyi nebaba Galilea, unaoyaquë' Jesús. ⁸ Cati unezi yaca benë' cabë' tahuen gula bë Jesús, na'ra uza'yaquë' yedyi nebaba Judea, len ciudad Jerusalën, len yedyi nebaba Idumea, len yedyi re' itzala'la yao Jordán, len yedyi Tiro, len yedyi Sidón, bdyinyaquë' ga zënë' ta ilë'ëyaquë' lëbë'. ⁹ Quie lena' bë Jesús mandado yaca ben' quie' ta tzioyaquë' tzexi'yaquë' tu barco ga tzu'unë' como dan' ben' zë pquiyaquë' lëbë'. ¹⁰ Cana' guca quienë' como dan' tanto beyuenë' yaca ben' raca zhue', pquiyaquë' bëxuyaquë' lëbë' ga zë'.

¹¹ Na' caora blë'ë yaca bichi be mala lëbë', uditzu zibiyacan urediyi'ya'acan unayacan Jesús:

—Zi'i Diuzi luë'.

¹² Pero udila Jesús leyacan ta biyëbiyacan benë' naquë' zi'i Diuzi.

Bë Jesús nombrar chipchopa ben' quienë'

(Mt. 10.1-4; Lc. 6.12-16)

¹³ Na'ra uza' Jesús zionë' ga zu tu lë'ë ya'a. Lëgan' na' guzi Jesús ben' re'ennë' gaca nombrar ben' quienë'. Na' uza'yaquë' zioyaquë' bdyinyaquë' ga zë Jesús. ¹⁴ Na'ra bënë' nombrar chipchopa ben' gaca ben' quienë', ben' rue lëbë' tuze, ben' ise'ela' ta quixogue'yaquë' xti'idza' Diuzi. ¹⁵ Lëscan' bënë' yela' rnabë' ta yeyueyaquë' ben' raca zhue', lëscan' ta cuioyaquë' yaca bichi be mala yu'u yaca benë'. ¹⁶ Cani naca lista quie chipchopa ben' ulionë': Ulionë' tu ben' lao Simón, ben' uxubanë' laohuë' Pedro. ¹⁷ Ulionë' tu ben' lao Santiago len bichinë' Juan. Nacayaquë' zi'i Zebedeo. Uxubanë' laoyaquë' Boanerges, ta inaro xti'idza'ro: Zi'i hueziu' como dan' nacayaquë' ben' rgüin'. ¹⁸ Lëscan' ulionë' tu ben' lao Andrés, len tu ben' lao Felipe, len tu ben' lao Bartolomé, len tu ben' lao Mateo, len tu ben' lao Tomás, len itu ben' lao Santiago, zi'i Alfeo, len tu ben' lao Tadeo, len itu ben' lao Simón, ben' naca partido cananeo. ¹⁹ Lëscan' ulionë' Judas Iscariote, ben' psedyin Jesús lao na'a yaca ben' rnabë'.

Unayaquë' yu'u Jesús taxi'ibi'

(Mt. 12.22-32; Lc. 11.14-23; 12.10)

Beyudyi ulio Jesús chipchopa ben' quienë', ziolënë' leyaquë' bdyinyaquë' zan yu'u. ²⁰ Na' tantozi bedupa ben' zë tatula ga zënë', bibë'n lato ni siquiera ta gaoyaquë'. ²¹ Cati unezi yaca familia quienë' cabë' raca quienë', uza'yaquë' tzexi'yaquë' lëbë', como dan' nayaquë' naquë' ben' luco.

²² Lëscan' yaca ben' rusëdi ley quie Moisés, ben' uza' ciudad Jerusalén, unayaquë' rëbiyaquë' laguediyaquë':

—Bayu'u ben' ni Beelzebú, ben' naca xan' yaca bichi be mala. Yela' huaca quie xan' taxi'ibi' raca rbionë' yaca bichi be mala.

²³ Na'ra guzi Jesús leyaquë' unë' gudyinë' leyaquë' cani.

—¿Bizi hue xan' taxi'ibi' Satanás ta yebionë' laguedyi taxi'ibi'? ²⁴ Chan' tu cue' gobierno gaca zë cue' partido, chan' tilälëyaquë' laguediyaquë' ben' naca partido, bisue gobierno huen dyin zidza. ²⁵ Lëscan' chi tu cue' familia raca rdilälëyaquë' familia quieyaquë', bisueyaquë' tzu'uyaquë' zan yu'u tzaže zidza. ²⁶ Chi cuin Satanás rdyiaguin'nan dyin quienan, bisaque' sue dyin quienan zidza, hueyudyi huedu quien.

²⁷ 'Bisaque' tzu'u benë' lu'u yu'u quie tu ben' tzutzu huala ta cubayaquë' ta de quienë' chi zuë' zan yu'u. Tanëro rnaban uquioyaquë' lëbë', na'ra huazaquë' cubayaquë' ta de quienë'.

²⁸ 'Tu ta naca li rnia' le'e, zu Diuzi dispuesto si'zenë' bitezi tamala rue yaca benë'. Lëscan' zuë' dispuesto si'zenë' bitezi di'idza' mala rnë yaca benë', ²⁹ pero nu ben' na di'idza' contra Bichi Be quie Diuzi, biyezi'ze Diuzi leyaquë', huanao dula' xquia quieyaquë' leyaquë' tuzioli.

³⁰ Cana' una Jesús gudyinë' leyaquë', dan' unayaquë' yu'unë' bichi be mala.

Ga zë Jesús bdyin znë'ë len bi' bichinë'

(Mt. 12.46-50; Lc. 8.19-21)

³¹ Na' beyudyi una Jesús, bdyin znë'ë len yaca bi' bichinë' yu'u ga re'në', pero bega'nyaquë' lali'a dan' nadza' benë' lu'u yu'u. Na' gudyiyaquë' ben' ulidza lëbë'. ³² Bizi yaca ben' re' neyëcho ga re' Jesús unayaquë' rëbiyaquë' Jesús:

—Abdyin znao' len yaca bi' bicho', rguiloyaquë' luë'.

³³ Na' una Jesús rëbinë' leyaquë':

—¿Nuži naca zna'a? ¿Nuži naca bi' bicha'?

³⁴ Caora na' una' Jesús yaca ben' re' neyëcho ga re'në', unënë' rëbinë' leyaquë':

—Yugu le'e ben' re' niga, nacale ca quie zna'a, nacale ca quie bi' bicha'.

³⁵ Në'ëdi' rnïa' nutezi ben' rue quie cabë' re'en Xuza', naquë' ca bi' bicha', ca bi' zana', ca zna'a.

4

Bzu Jesús tu di'idza' quie ben' raza bini trigo

(Mt. 13.1-9; Lc. 8.4-8)

¹ Bezulao Jesús tatula usëdinë' yaca benë' ru'a lagun Galilea. Tanto bdupa ben' zë, uyu'u Jesús tu lu'u barco dao' zën lao nisa. Na' ure' Jesús lu'u barco na', pero bega'n yaca benë' ru'a lagun. ² Con di'idza' ta nacan irupa iyunala psëdi Jesús leyaquë'. Cani unë' psëdinë' leyaquë':

³ —Uzëcara nagale ca nia' le'e. Uyo tu ben' raza bini trigo. ⁴ Según ca razayaquë' bini trigo, ruzalë' bini trigo layu. Na'ra bala bini trigo yaque'n tu neza ga bdyinte yaca bguini besa'oba'n udaoba'n. ⁵ Ibala bini trigo yaque'n ga de yo, ga binacan tubelaozi yu. Na'ra lëbini na' laolënezaten dan' yaque'n ga binacan tubelaozi yu. ⁶ Pero cati bena oba zi', na'ra byëtzona ubidyin como dan' biuyu'u luena zitu' lu'u yu. ⁷ Ibala bini trigo yaque'n ga ilë guixi' yëchi'. Na' bë' gu'unin, bibë guixi' yëchi' lato gue'eni bini trigo dyë'ëdi. Quie lena' bibi usecho bë'nan. ⁸ Pero ibala bini trigo yaque'n ga naca tubelaozi yu ga ulëna gu'unin dyë'ëdi bë'nan usecho dya'a. Bala dyigo' bi'an galobechi bini, ibalan bi'an tzona galo bini, ibalan bi'an tu gayuhua bini.

⁹ Na'ra una Jesús:

—Le'e babe ulezë nagale can' unia'.

Una Jesús ga hue dyin di'idza' rusëdinë' benë'

(Mt. 13.10-17; Lc. 8.9-10)

¹⁰ Na' cati ude beyudyi na', bega'n Jesús lënë' chipchopa ben' quienë' len itu chopa ben' zë ga'ala' ga zë'. Na'ra unabayaquë' Jesús bi re'en ina di'idza' gudyinë' leyaquë'. ¹¹ Lena' unë' Jesús rëbinë' leyaquë':

—Ruzioñë' Diuzi le'e bi re'en ina di'idza' rguixogue'n quie yela' rnabë' quienë'. Pero quie yaca ben' biruzënaga cabë' rnïa', rnïa' leyaquë' conlë puro di'idza' ta naca irupa iyunala ¹² como dan' ba'ala'cazi rlë'ëyaquë' dyë'ëdi, rueziaquë' ca ben' birlë'ë, ba'ala'cazi reyaquë' dyë'ëdi, rueziaquë' ca ben' bire, como dan' bire'enyaguë' utza'yaquë' pensari quieyaquë' yezi'ze Diuzi dula' xquia quieyaquë'.

Ga bexi'idzë' Jesús bi re'en ina di'idza' quie ben' guza bini trigo

(Mt. 13.18-23; Lc. 8.11-15)

¹³ Na' una Jesús rëbinë' leyaquë':

—¿Biuyoñë'ele bi re'en ina di'idza' ta nacan irupa iyunala quie ben' guza bini trigo? ¿Biži huele ta tzioñë'ele bi re'en ina di'idza' binenia' le'e? ¹⁴ Naca ben' raza bini trigo ca quie ben' rguixogue' xti'idza' Diuzi. ¹⁵ Bala benë' nacayaquë' ca quie bini trigo yaque'n tu neza bezi' bguini aodaoba'n. Ruzënegayaquë' xti'idza' Diuzi, pero beyudyi bzënegayaquë'n, lardyinte xan' taxi'ibi' ta cuionë' ca di'idza' uyu'u lu'u guicho laxta'oyaquë'. ¹⁶ Ibala benë' nacayaquë' ca quie bini trigo yaque'n lao yo ga binacan tubelaozi yu. Ruzënegayaquë' raxeyaquë' xti'idza' Diuzi. ¹⁷ Pero binacayaquë' ca quie bini trigo yu'un luena zitu' lu'u yu. Birega'n xti'idza' Diuzi lu'u guicho laxta'oyaquë'. Cati rue yaca benë' leyaquë' bizinaquezi nun quie ruzënegajë' xti'idza' Diuzi, na'ra rusanyaquë' bira rue quieyaquë' xti'idza'

Diuzi. ¹⁸ Ibala benè' nacayaquè' ca quie bini trigo yaque'n ga rlè guixi' yèchi'. Ruzènegayaquè' xti'idza' Diuzi. ¹⁹ Pero rza'la'adyi'yaquè' ta de lao yedyi layu. Nun quie rzi' dumi quieyaquè' leyaquè' yè', lega re'enyaguè' gata' quieyaquè' zè cosa. Quie lena' binacayaquè' ca quie bini trigo ru'en usecho. ²⁰ Pero ibala benè' ruzènegayaquè' xti'idza' Diuzi, rue quieyaquè' len. Nacayaquè' ca quie bini trigo yaque'n ga naca tubelaozi yu. Balayaquè' nacayaquè' ca quie dyigo' bi'an galobechi bini, ibalayaquè' nacayaquè' ca quie dyigo' bi'an tzona galo bini, ibalayaquè' nacayaquè' ca quie dyigo' bi'an tu gayuhua bini.

Bzu Jesús tu di'idza' quie tu lámpara
(Lc. 8.16-18)

²¹ Lèscan' una Jesús rëbinè' leyaquè':

—Nunu uga'ala' lámpara ta utacaron caja, ni ta ucachi'ron žan belaga. Ruen zi uzuro lámpara sibi ta cuèchin žni' dužete. ²² Cana' nacarèn quie yaca benè'. Yugulu ta pcachi' yaca benè', huadyin dza yebio Diuzi ta pcachi'yaquè', na' cuionè'n zaca'lao ta ilè'e ja benè' len. Lèscan' yugulu di'idza' negachi' rnè yaca benè', huadyin dza quixogue' Diuzi ca di'idza' negachi' unayaquè'. ²³ Ulezènaga ca rnia'.

²⁴ Lèscan' unè' rëbinè' leyaquè':

—Ulehue quiele cabè' babele baonia'. Cabè' ruele racalèle laguedyile, cana' hue Diuzi iyacalènè' le'e. Na' mazara iyacalè Diuzi le'e, ben' ruzènaga xti'idzè'. ²⁵ Nu ben' hue quie ta tzioñe'enè' bi na xti'idza' Diuzi, uzioñe'era Diuzi lèbè' mazara. Pero nu ben' bihue quie ta tzioñe'enè' bi na xti'idza' Diuzi, hueguba Diuzi hasta tadao' lè'èti' baoyoñe'enè'.

Bzu Jesús tu di'idza' cabè' rlè bini trigo

²⁶ Lèscan' una Jesús rëbinè' leyaquè':

—Naca yela' r nabè' quie Diuzi ca quie bi raca quie bini trigo cati raza benè' len lu'u yu. ²⁷ Bè' beyudyi bènè' guza, caora na' rezè'è redyinnè' žan yu'u ratanè' rasinè' quie rtze', rasanè' quie zila. Cana' ruenè' rdè dza tu rlè bini trigo re'enina, binezi ben' na' birue bini trigo ta ilèna gue'enina. ²⁸ Na'ra tu cuinzi yu rsegulan bini. Tanèro rlèn len la'aga' dao' quien. Na' bè' banacan tahuala, ilè dao quien. Bè' bardzatza dao quien, cana' cuian trigo. ²⁹ Cati aobidyi trigo, na'ra rchugujè'n rezi'jè'n, dan' babbidin dza quie usecho quien.

Bzu Jesús tu di'idza' quie tu bini dao' bicu'
(Mt. 13.31-32; Lc. 13.18-19)

³⁰ Lèscan' una Jesús rëbinè' leyaquè':

—¿Con bidan' utitalèbi yela' r nabè' quie Diuzi? ¿Con bi di'idza' re'ennan ta uzioñe'eda' le'e? ³¹ Naca yela' r nabè' quie Diuzi ca quie tu bini mostaza ta raza benè' lu'u yu. Naca bini mostaza bini dao' bižu gula. ³² Pero cati bayu'un lu'u yu, hualèna hue'enina gacan tu yaga že gula. Tanto naca tona xu'uzan quien, hasta huida yaca bguini, bia dyia xile, ta yezila'adyi'ba' ga zè zula quien.

Puro lao na'a di'idza' ta nacan irupa iyunala psèdi Jesús yaca benè'
(Mt. 13.34-35)

³³ Cana' una Jesús psèdinè' yaca benè' xti'idza' Diuzi. Bzunè' zè di'idza' ta gacalèn leyaquè' ta tzioñe'eyaquè'. ³⁴ Puro lao na'a di'idza' ta nacan irupa iyunala psèdi Jesús yaca benè', pero cati zuè' tuzinè' len yaca ben' quie', caora na' pxi'idze'nè' leyaquè' bi re'en ina di'idza' ta nacan irupa iyunala.

*Udila Jesús be bedun' len nisa**(Mt. 8.23-27; Lc. 8.22-25)*

³⁵ Cati bagula uxin banaca chula, na' una Jesús rëbinë' yaca ben' quië':

—Ya' tziore itzala' lagun.

³⁶ Na'ra udeyaquë' ga zë yaca ben' na', uyu'uyaquë' lu'u barco ga ure' Jesús uza'yaquë' zioyaquë' itzala' lagun. Lëscan' ziorë ichopa tzona barco nu'an benë' len leyaquë'. ³⁷ Binedyinyaquë' itzala' lagun cati uzulao rda tu be bedun' fuerte gula. Tanto raca be bedun', ben gan uyudzo nisa lu'u barco, ilë'ëti'zi bibeza' nisa lu'u barco. ³⁸ Na' zaquë' zbam barco ure' Jesús rasinë' lao xcugonë'. Pero psebë yaca ben' quië' lëbë', unayaquë' rëbiyaquë' lëbë':

—¡Maestro! ¿Birdëbilo' gala' gatiro lu'u nisa?

³⁹ Na'ra uyasa Jesús udilanë' be bedun'. Lëscan' unë' gudyinë' nisa:

—¡Ure' chízi! ¡Bira huu' zëdi!

Caora na' uleza be bedun', bega'n chízi lao lagun. ⁴⁰ Na'ra una Jesús rëbinë' yaca ben' quië':

—¿Bixquien' rdzebile? ¿Bixquien' biralele ute usela Diuzi ra'o?

⁴¹ Pero bega'n yaca ben' quienë' rdzebiyaquë' unayaquë' rëbiyaquë' laguedyiaquë':

—¿Nuži naca ben' niga como hasta be bedun' len nisa ralen quienë'?

5*Beyue Jesús tu ben' yu'u bichi be mala**(Mt. 8.28-34; Lc. 8.26-39)*

¹ Na'ra bdyin Jesús lënë' yaca ben' quienë' itzala' lagun gan' nita' yaca ben' Gadora. ² Ca bro Jesús lu'u barco, labdyinte tu ben' yu'u bichi be mala gan' zë Jesús. Babronë' ga dyia yaca beló ga rucachi'yaquë' ben' huati. ³ Yugu dza, yugu yela, zunë' na' ga dyia beló. Ni tu ben' nita' na' biuzueyaquë' uquiyoaqué' lëbë' con cadén. ⁴ Zë lasa pquiyoaqué' lënë' con cadén na'anë' len ni'anë', pero uchugunë'n bžužu pquinonë'n. Nitu nunu uzue ucaxo lëbë'. ⁵ Yugu dza, yugu yela, udanë' ga dyia beló du lë'ë ya'a, rbedyia'në' rzi'në' yo rguinë' cuinnë'. ⁶ Caora blë'ënë' Jesús zitu'la, na'ra uyu'unë' be zionë' yeditzu žibinë' lao Jesús. ⁷ Na' uredyia' bichi be mala yu'unë' rëbina Jesús:

—¿Bixquien' zao' niga? Luë' Jesús, ži'i Diuzi zu sibi. Rnabayëcha' luë' lao Diuzi ta biutzagalaolo' në'ëdi'.

⁸ Cana' una bichi be mala rëbina Jesús como dan' gudyi Jesús len:

—Bichi be mala luë', bero ben' ni.

⁹ Na' unabá Jesús rëbinë' len:

—¿Bi laolo'?

Na' bequëbina rëbina Jesús:

—Xopa mila laohua' dan' nacando' zë.

¹⁰ Lëscan' unabayëchi'në' Jesús ta biuse'ela' Jesús leyacan ga naca zitu'.

¹¹ Biži ga'ala' gan' zë Jesús nita' yaca cuchi zë lao leda'. Rqui'nyacaba' ta yedzeleyacaba' bi gaoyacaba'. ¹² Na' unabayëchi' yaca bichi be mala rëbiyacan Jesús:

—Huu' cule ise'elo' nëto' gan' nita' yaca cuchi. Ben lato tzu'undo' leya-caba'.

¹³ Na'ra bë' Jesús lato ta tzu'uyacan lu'u yaca cuchi. Cana' beroyacan be'mbyu beyu'uyacan yaca cuchi. Na' nita' cadu chopa mila cuchi lao leda' na'. Caora beyu'u yaca bichi be mala lu'u yaca cuchi, na' uxitiyacaba' beyëziyacaba' lë'ë leda' uyu'uyacaba' lu'u nisa ga gutiyacaba'.

¹⁴ Na' bizi bżuno yaca ben' rapa cuchi. Du rdzebiyaquë' yetixogue'yaquë' du tu neza len la'o yedyi bi guca. Lena' bdyin yaca benë' ta ina'yaquë' na'.
¹⁵ Na' caora bdyinyaquë' ga zë Jesús, blë'ëyaquë' ben' babero yaca bichi be mala. Blë'ëyaquë' are'në' chizi, banaconë' žabanë', babeyu'unë' pensari. Na' lega bdzebiyaquë'.
¹⁶ Na' yaca ben' blë'ë cabë' bë Jesús, udixogue'yaquë' yaca ben' bdyin na' cabë' guca quie ben' uyu'u bichi be mala, lëscan' cabë' guca quie yaca cuchi.
¹⁷ Na'ra unabayëchi'yaquë' Jesús ta biyega'nnë' yu nebaba yedyi quieyaquë'.

¹⁸ Caora beyu'u Jesús lu'u barco, unaba ben' bero yaca bichi be mala chi bigun Jesús lato ta tziolënë' Jesús gan' tzioguë'.
¹⁹ Pero bibë' Jesús lëbë' lato. Lena' unë' gudyinë' ben' na':

—Beyo žan yu'u quio' yetixogue' familia quio' cabë' guca quio' beyëchi'la'adyi' Diuzi lüë'.

²⁰ Na'ra zeyonë' tzetixogue'në' yaca ben' nita' gan' de chi yedyi quie yu laona Decápolis yugulu cabë' bë Jesús quienë'. Na'ra caora be yaca benë' can' unë', bega'nyaquë' bebanziyaquë'.

Beseban Jesús ži'i Jairo, beyuenë' nigula bda' zbe zabë'

(Mt. 9.18-26; Lc. 8.40-56)

²¹ Na'ra beyu'u Jesús lu'u barco uzë'ë zionë' itzala' lagun. Caora bdyinnë' na', babedupa ben' zë gan' zënë'. Na' bega'n Jesús ru'a lagun na'.
²² Na' bdyin tu xan' idao' sinagoga laonë' Jairo gan' zë Jesús. Caora blë'ënë' Jesús, uditzu žibinë' laohuë'.
²³ Na' unabayëchi'në' rëbinë' Jesús:

—Barati ži'ina'. Chi huu' cule, žbisao' ta ideda'lo' nao' ži'ina' cuenda yeyuelo'bi' ta bigatibi'?

²⁴ Na'ra ziolë Jesús lëbë', pero lëscan' ziorë yaca ben' zë pqui'yaquë' Jesús.

²⁵ Na' entre yaca ben' ziolë Jesús uzu tu nigula raca quie biu' quienë' chopa tzona lasa tu biu'. Bazio chipchopa iza ruen quienë' cana'.
²⁶ Uyonë' yenë' zë ben' médico, beya dumi quienë' bënë' gasto, pero biuži' yela' hue' quienë' remedio. Na' remedio uži'në', bigucalën lëbë', bdyiaqui'n mazara lëbë', izi'ra bëna.
²⁷ Na'ra babe nigula na' cabë' reyue Jesús ben' raca žhue'. Quie lena' yesënë' xcu'udzu Jesús ga zë yaca benë', bda'në' žbenë' žabë'.
²⁸ Cana' bë nigula na' como dan' guquenë': "Chi uda' žbia' žaba Jesús, hueyaca'."
²⁹ Na'ra caora bda'në' žbenë' žaba Jesús, bebidyi ren, bero yela' hue' yu'unë', gucabë'në' babeyacanë'.
³⁰ Lëscan' gucabë' Jesús babeyuenë' nu ben' raca žhue' conlë yela' huaca quienë'. Quie lena' beyëchoguë' rnë'ë yaca ben' zë xcu'udzë', unë' rëbinë' leyaquë':

—ŽNuži bda' zbe žaba'?

³¹ Na'ra una yaca ben' quie' rëbiyaquë' lëbë':

—Rlë'ëlo' ruqui' yaca benë' luë', na'ra nao', "ŽNuži bda' zbe në'ëdi'?"

³² Pero una' Jesús yaca ben' zë na' ta idzelenë' nu ben' bda' zbe lëbë'.

³³ Na'ra unezi nigula bi guca quienë'. Quie lena' du rzizinë', du rdzebinë', bebiga'në' uditzu žibinë' lao Jesús, gudyinë' lëbë' cabë' guca quienë'.
³⁴ Na' una Jesús rëbinë' nigula na':

—Žana', babeyaco' nun quie rzudyi'ilëlo' në'ëdi'. Beyo žan yu'u quio', bira idëbo'. Apsan yela' hue' quio' luë'.

³⁵ Neru'elë Jesús nigula na' di'idza' cati bdyin chopa tzona ben' uza' yu'u quie ben' naca xan' idao' sinagoga. Na' unayaquë' rëbiyaquë' xan' sinagoga:

—Baguti ži'ilo'. Bira cule huelo' maestro žëdi.

³⁶ Pero bibë Jesús casa ca unayaquë'. Na' unë' rëbinë' xan' sinagoga:

—Bidzebo'. Šudyi'ilëlo' në'ëdi'.

³⁷ Na'ra bibè' Jesús lato tziolè yaca ben' zè na' len lèbè'. Na' uquiè'nè' Pedro, len Santiago, len Juan bichi Santiago. ³⁸ Catì bdyinyaquè' ru'a yu'u quie xan' sinagoga, blè'è Jesús nita' ben' zè, yu'uyaquè' ru'be, rbedyiya'yaquè'. ³⁹ Caora uyu'u Jesús lènè' tzona ben' quiè' lu'u yu'u na', unè' rëbinè' yaca ben' nita' na':

—¿Bixquien' ru'ule ru'be rbedyiya'le? Ba'ala'cazi agutibi', raca quiebi' ca quie bi' rasizi.

⁴⁰ Pero bzidyiaquè' ca una Jesús. Caora na' bè Jesús mandado yeroyaquè' lu'u yu'u. Na' uquiè' Jesús tzona ben' quiè' len xuzi zna' bidao' huati. Uyu'uyaquè' lu'u cuarto ga de bi' huati. ⁴¹ Na' bëxu Jesús na'abi' unè' rëbinè'bi':

—Talita cumi —ta inaro xti'idza'ro: Zana', rnìa' luè', uyasa.

⁴² Caora beyudyi una Jesús cana', uyasa nigula dao' bedabi'. Baozubi' chipchopa iza. Na' bega'n xuzi zna' bidao' tu bebanzitzegueyaquè'. ⁴³ Pero gudyi Jesús leyaquè' ta biquixogue'yaquè' yaca benè' cabè' bènè' quie bidao' huati. Lëscan' bènè' mandado ta hue'yaquè'bi' ta gaobi'.

6

Ca guca cati uda Jesús yedyi Nazaret (Mt. 13.53-58; Lc. 4.16-30)

¹ Na'ra uza' Jesús zionè' bedyinnè' yedyi quienè' lènè' yaca ben' quienè'. ² Caora guca dza saodo, dza huezilla'adyi' quieyaquè', uyu'u Jesús lu'u idao' sinagoga ta usèdinè' yaca ben' bdupa na'. Na' tu rebanzi yaca ben' bzënaga can' unè'. Lena' unayaquè' rëbiyaquè' laguedyiyaquè':

—¿Gazi yesèdi ben' niga? ¿Biži bènè' banaquè' ben' de yela' rioñe'e quie? ¿Biži ruenè', ruenè' ta binel'èro? ³ Pues naca ben' niga ben' rcha'a yaga. Zi'i María naquè'. Naca Santiago, len José, len Judas, len Simón bi' bichinè'. Ni nita' ladoro yaca bi' zannè'.

Quie lena' bibèyaquè' casa quienè'. ⁴ Lena' una Jesús rëbinè' leyaquè':

—Nu ben' rguixogue' xti'idza' Diuzi, rapala'ncazi yaca benè' lèbè'. Pero ben' yedyi quienè', len familia quienè', len ben' zu zan yu'u quienè', bira-pala'nyaquè' lèbè'.

⁵ Quie lena' bibè Jesús yela' huaca quienè' ladoyaquè'. Tu chopazi ben' raca zhue' bda'nè' nè'è beyuenè' leyaquè'. ⁶ Na' bebanzi Jesús dan' tu bzënaziaquè' can' unè', na' bibèyaquè' lèbè' casa. Na'ra uza' Jesús zioquè' yaca yedyi nita' ga'ala', uzulaonè' rguixogue'nè' yaca ben' nita' yaca yedyi na' xti'idza' Diuzi.

Use'ela' Jesús yaca ben' quienè' ta tzetixogue'yaquè' xti'idza' Diuzi (Mt. 10.5-15; Lc. 9.1-6)

⁷ Caora na' betupa Jesús chipchopa ben' quienè', bè'nè' yela' huaca quienè' ta yebioyaquè' yaca bichi be mala yu'u benè'. Na'ra chopa huiyaquè' use'elè' leyaquè' tu tu yedyi. ⁸ Na'ra bènè' mandado bihua'ayaquè' bi cosa tu neza. Bènè' mandado tuzi xaga hua'ayaquè'. Bihua'ayaquè' ni yëxo, ni yëta, ni dumi. ⁹ Reya'ala' udeyaquè' huaracho, reya'ala' gacoyaquè' tu cue'zi zabayaquè'. ¹⁰ Na' una Jesús rëbinè' leyaquè':

—Lu'u yu'u gan' idyinle, na' yega'nle hasta que yeza'le yeyole yedyi tula.

¹¹ Caora abdyinle tu yedyi, chi bire'en yaca benè' si'yaquè' le'e dyè'edi, chi bire'enyaguè' uzëzagayaquè' quiele, na'ra yerole gan', usisile ni'ale ta gasi bëxte dyia ni'ale ta ulu'en quieyaquè' dula' quieziyaquè' nena' dula' xquia quieyaquè' leyaquè'. Nacan tali ca rnìa' le'e, catì abdyin dza gaca juicio,

huedzagalaora ben' bibzēnaga quiele mazara ca ben' ciudad Sodoma len ben' ciudad Gomorra.

¹² Na'ra zioyaquē' tzetixogue'yaquē' benē' gudyiyaquē' leyaquē' ca re'en Diuzi utza'yaquē' pensari quieyaquē'. ¹³ Lēscan' bebioyaquē' yaca bichi be mala yu'u yaca benē', bzuyaquē' aceite guicho yaca ben' raca zhue', beyacayaquē'.

Ca guca cati guti Juan bautista
(Mt. 14.1-12; Lc. 9.7-9)

¹⁴ Na'ra bdyin dza be rey Herodes cabē' rue Jesús nun quie ru'e yaca benē' di'idza' cabē' ruenē'. Na' guque rey Herodes pensari nē':

—Babeban Juan bautista. Quie lena' ruenē' milagro. —Cana' una rey Herodes na'.

¹⁵ Na' una bala benē' rēbiyaquē' laguediyaquē':

—Naquē' Elías, ben' udixogue' xti'idza' Diuzi dza na'.

Na' ibala yaca benē' unayaquē':

—Naquē' ben' rguixogue' xti'idza' Diuzi cabē' bē ben' unita' tiempote.

¹⁶ Caora be rey Herodes cabē' una yaca benē', na'ra unē':

—Ben' na' naquē' Juan, ben' bia' mandado uchuguyaquē' luba'nē'. Na'ra babebannē' tatula. —Cana' una rey Herodes na'.

¹⁷ Lēcana' bē rey Herodes, bēnē' mandado bēxo yaca soldado Juan bdze'yaquē' lēbē' lu'u dyiguiba. Nun quie žgulanē' Herodías bēnē' mandado pquioyaquē' lēbē' con cadē lu'u dyiguiba. Pues guca Herodías žgula ben' tula, ben' lao Felipe. Pero baoži' rey Herodes žgula Felipe, bazulēnē' lēbē'.

¹⁸ Quie lena' una Juan dza na'te gudyinē' rey Herodes:

—Bireya'ala' sulao' nigula quie bi' bicho' Felipe.

¹⁹ Quie lena' lega udie Herodías Juan gu'unne' gutinē' lēbē', pero biubinnē' bi huenē' ta gutinē' lēbē'. ²⁰ Cana' guca quie Herodías como dan' nezi rey Herodes naca Juan ben' huen, ben' la'iya. Quie lena' bdzebi Herodes bibē'nē' lato hue nigula na' tamala Juan. Lēscan', ba'ala'cazi biuyoñe' rey Herodes dyē'edi cabē' gudyi Juan lēbē', bzēnaguē' quienē' con gusto. ²¹ Pero bdyin dza rbē'nidyi Herodías cabē' huenē' ta gati Juan. Lēdza na' bē rey Herodes tu lani quie dza cumpleaños quienē'. Bē'nē' ta gao yaca ben' rnabē' lao na'anē', len yaca ben' naca xan' soldado quienē', len yaca los demás ben' belao, ben' nita' yedyi nebaba Galilea. ²² Na' uyu'u tu nigula dao', bi' naca ži'i Herodías, gan' raca lani na' ta uya'abi' zaquē'lao lao yaca ben' na'. Caora na' lega yaxē Herodes len yaca ben' raolēnē' rtze' cabē' bya'a nigula dao' na'. Na' una Herodes rēbinē' bi' nigula dao':

—Con bitezi ta inabo' nē'ēdi', naguna'n.

²³ Na'ra bguntēnē' Diuzi hue'nē' nigula dao' con ta inababi', ba'ala'cazi inababi' gatzo yedyi ga rnabē'nē'. ²⁴ Na' bero nigula dao' yeguēdyibi' žna'bi' rēbibi' lēbē':

—ŽBiži inaba' rey na'?

Na' una žna'bi' rēbinē' lēbi':

—Unaba guicho Juan bautista.

²⁵ Na'ra beyu'u nigula dao' ga re' rey na', na' gudyibi' lēnē':

—Re'enda' laguntegazo' guicho Juan bautista tu lu'u plato.

²⁶ Na' guqueyēchi' rey Herodes dan' unaba nigula dao' guicho Juan. Pero como babguntēnē' lao Diuzi, babe yaca ben' zē lao lani quienē' ca ta unē' gudyinē' nigula dao', biuzaque' yēbinē'bi' bihue'nē'n. ²⁷ Quie lena' luegozi bēnē' mandado uyo tu soldado ta tzexi'nē' guicho Juan. ²⁸ Na' uyo soldado

uyu'unë' lu'u yu'u dyiguiba, uchugunë' luba' Juan, zeyu'anë'n tu lu'u plato ga raca lani, bë'në'n nigula dao' na'. Na' uyo nigula yesambi'n lao zna'bi'.

²⁹ Cati unezi yaca ben' quie Juan agutinë', caora na' uza'yaquë' yexi'yaquë' cuerpo quienë' ta pcachi'yaquë' lëbë'.

Bgao Jesús lao ga'yo' mila benë'

(Mt. 14.13-21; Lc. 9.10-17; Jn. 6.1-14)

³⁰ Bë' beyudyi na', bedyin yaca ben' quie Jesús gudyiyaquë' lëbë' yugulu ta bëyaquë' psëdiyaquë' yaca benë'. ³¹ Na' una Jesús rëbinë' leyaquë':

—Ületza' tzioro ru'a yedyi ga binita' benë' cuenda yezila'adyi'ro.

Cana' una Jesús dan' tantozi rdyin ben' rdyin, zaza' ben' zaza', ni siquiera bibë'nan lato ta gaoyaquë'. ³² Na'ra uza' Jesús lënë' yaca ben' quië', uyu'uyaquë' lu'u barco ta tzioyaquë' ru'a yedyi ga nunu nita'. ³³ Pero blë'ë yaca ben' zë azio Jesús bezaqueyaquë' lëbë'. Quie lena' uyu'uyaquë' be, uza'yaquë' quie quie yedyi quieyaquë' zioyaquë' bdyinyaquë' rbezayaquë' ga idyin Jesús. ³⁴ Caora bdyin Jesús na', blë'ënë' nita' ben' zë rbezayaquë' lëbë'. Na' beyëchi'la'adyi'në' leyaquë', como dan' naca quieyaquë' ca quie yaca beco' zi'ila' neniti xa'ne. Na'ra bezulao Jesús rusëdinë' leyaquë' di'idza' zëra. ³⁵ Caora baoya' dza, baza' rdze', una yaca ben' quië' rëbiyaquë' lëbë':

—Bardze' barala, quele biyu'u dyia niga. ³⁶ Mejorla yese'elo' yaca benë' yeyoyaquë' la'o yedyi ga'ala' ta ga'oyaquë' ta gaoyaquë', porque bide ta gaoyaquë' niga.

³⁷ Na' una Jesús rëbinë' yaca ben' quië':

—Ulehue' ta gaoyaquë'.

Na' unayaquë':

—¿Re'enlo' tzegue'endo' chopa gayuhua dumi denario yëta xtila ta gaoyaquë'?

³⁸ Na' una Jesús rëbinë' leyaquë':

—¿Bala yëta xtila nu'ale? Ületzio tzena'le.

Na'ra caora uneziyaquë' unayaquë' Jesús:

—Ga'yo' yëta xtila len chopa bela.

³⁹ Na' bë Jesús mandado ure' yaca benë' tu cue' huioyaquë' lao guizi. ⁴⁰ Na' gan' ure'yaquë', ure' ben' ure' tu gayuhua. Na' re' ben' ure'rë igatzo gayuhua.

⁴¹ Caora na' uzi' Jesús lao ga'yo' yëta xtila len chopa bela. Bë' bazënë'n, unë'ë ladza rëbinë' Diuzi diuxcalelo'. Na' bzužunë'n bë'n laze. Bë'në'n yaca ben' quië' ta udisiyaquë'n gao yaca benë'. Lëscan' bzužurënë' yaca bela ta gaoyaquë'. ⁴² Na' udao yuguluteyaquë', udaya'yaquë' ca tu beloyaquë'.

⁴³ Bega'nra ichipchopa ga' naga yëta xtila yužo len bela yužo ta bezi'yaquë'n.

⁴⁴ Naca yaca ben' udao ca du ga'yo' mila be'mbyu, apartela nigula len xcuidi'.

Uza' Jesús lao nisa

(Mt. 14.22-27; Jn. 6.16-21)

⁴⁵ Na' bë Jesús mandado yeyu'u yaca ben' quienë' lu'u barco cuenda cuialaonezayaquë' lëbë' idyinyaquë' gan' de ciudad Betsaida, tu rëbi Jesús yaca benë' ta yeyoyaquë' žan yu'u quieyaquë'. ⁴⁶ Caora bedzatza yaca benë', uza'në' zionë' lë'ë ya'a ta hue'lënë' Diuzi di'idza'. ⁴⁷ Biži barala uxin zio yaca ben' quie Jesús bega'nyaquë' gatzo la'o lagun. Na' bega'n Jesús nezënë' ru'a yu bidyi quie lagun. ⁴⁸ Na' blë'ë Jesús raca rdilalë ben' quienë' be bedun', biru'en lato ta usa'yaquë' barco lao lagun. Na' ilë'ëti'zi tzeni', bebiga' Jesús ga re'yaquë' lu'u barco rza'në' lao nisa ta tenë' ga re' barco na'. ⁴⁹ Cati blë'ëyaquë' zio Jesús rzë'ë tu lao nisa, guqueyaquë' chi ludza' ben' huati. ⁵⁰ Na' lega bdzebiyaquë' urediya'yaquë'. Pero una Jesús rëbinë' leyaquë':

—Bidzebile, në'ëdi' za' niga.

⁵¹ Caora uyu'u Jesús lu'u barco gan' yu'uyaqué', na' lapsante be bedun'. Pero lega rebanetzegueyaqué'. ⁵² Cana' guca quieyaqué', como dan' binet-zioñe'eyaqué' cabè' yela' huaca bē Jesús quie yēta xtila. Nenacan zidi lu'u guicho laxta'oyaqué'.

Byue Jesús yaca ben' raza zhue' yu nebaba Genesaret
(Mt. 14.34-36)

⁵³ Na'ra zioyaqué' bdyinyaqué' ru'a lagun ga de yaca yedyi nebaba Genesaret. Lēgan' na' pquioyaqué' barco quieyaqué' ru'a lagun. ⁵⁴ Caora broyaqué' lu'u barco labezaquete yaca ben' nita' na' Jesús na'. ⁵⁵ Na' uyu'uyaqué' be, uyoyaqué' yugu yedyi de na', yexi'yaqué' yaca ben' raza zhue', uxubayaqué' leyaqué' lao belaga, yesanyaqué' leyaqué' ga neziyaqué' zu Jesús. ⁵⁶ Con ga ude Jesús, chi yedyi dao', chi yedyi ze, chi ciudad, udixoyaqué' belaga gan' zuba ben' raza zhue' du tu neza, unabayaqué' cule hue' Jesús lato ta uda'yaqué' siquiera tacayaqué' ni'a zabanē'. Na' yugu ben' bda' taque zabanē', bero yela' hue' yu'uyaqué'.

7

Una Jesús quie ta nuen benē' badza' lao Diuzi
(Mt. 15.1-20)

¹ Na'ra guca dza bdyin bala ben' naca partido fariseo len bala ben' rusēdi ley quie Moisés, ben' uza' ciudad Jerusalén, bebiga'yaqué' ga zē Jesús. ² Na' blē'ëyaqué' rao bala ben' quie Jesús du binequibi na'ayaqué'. Quie lena' udaoyaqué' leyaqué' xquia. ³ (Cani rue yaca ben' naca partido fariseo len yaca los demás ben' Israel. Nenaoyaqué' costumbre quie xuzixta'oyaqué', bigaoyaqué' chi binequibi na'ayaqué' zē lasa. Pero quele rguibi na'ayaqué' dan' nacan besu, dechan' dan' inayaqué' cana' yeyēri laxta'oyaqué' lao Diuzi. ⁴ Lēscan', caora rioyaqué' lao ye'eya redyinyaqué' zan yu'u, bigaoyaqué' chi binegazuyaqué' yao. Lēscan' dera zē costumbre nenaoyaqué', rguibiyaqué' nu taza, nu candi, nu yaca traste de guíba. Lente belaga quieyaqué' rguibiyaqué' como dan' inayaqué' cana' yeyērin lao Diuzi.) ⁵ Na'ra una yaca ben' naca partido fariseo len yaca ben' rusēdi ley quie Moisés, rēbiyaqué' Jesús:

—¿Bixquien' binao yaca ben' quio' costumbre quie xuzixta'oro? Raoyaqué' du binequibi na'ayaqué'.

⁶ Na'ra una Jesús rēbinē' leyaqué':

—Dyē'ëdi una Moisés cabē' ruele, biruele cabē' nale. Cana' una Moisés caora bzunē' di'idza' lē'ë guichi nan' ca niga:

Yaca ben' niga rapala'nyaqué' Diuzi de di'idza'zi, birapala'nyaqué' lēbē' du guicho du la'adyi'yaqué'.

⁷ Bibi sirve rionla'adyi'yaqué' Diuzi.

Puro mandado quie benē' rusēdiyaqué' nayaqué' mandado quie Diuzi na'.

⁸ Lēscan' unarē Jesús:

—Le'e rutele di'idza' quie Diuzi tzala'la tacuenda huele costumbre quie xuzixta'ole. Lena' rguibile candi quiele, rguibile vaso quiele. Lena' dera costumbre ta naca lēbizi quiele ruele quie xuzixta'ole.

⁹ Lēscan' unaranē':

—Rutele tzala'la ca naca mandamiento quie Diuzi ta inaole costumbre quiele. ¹⁰ Dyē'ëdi rnēn lē'ë guichi bē Moisés: “Reya'ala' gapala'nle xuzile len zna'le.” Lēscan' rnēn: “Nu ben' rudze'de' xuzi znē'ë, reya'ala' gatinē'.”

¹¹ Pero le'e nale chi yēbi benē' xuzi znē'ë: “Bide ta gacalia' le'e, como dan'

yugulu ta de quia' nacan gun quie Diuzi." ¹² Na'ra le'e nale chi yëbi benë' xuzi žnë'ë cana', biruen zi gacalënë' xuzi žnë'ë. ¹³ Cana' rutele tzala'la ca naca mandamiento quie Diuzi ta inaole costumbre quiele. Lëscan' rusëdile ži'ile ta inaorëyacabi' hueyacabi' cabë' ruele. Lëscan' zëra costumbre de quiele nacan lëbi ca costumbre naole quie xuzixta'ole.

¹⁴ Na'ra beyëži Jesús yaca benë' tatula unë' rëbinë' leyaquë':

—Ulezëcara nagale ta tzioñe'ele cabë' rnia'. ¹⁵ Quele ta gao yaca benë' nuen leyaquë' badza' lao Diuzi, dechan' pensari median rero lu'u guicho laxta'oyaquë', lëlena' nuen leyaquë' badza' lao Diuzi. ¹⁶ Nu le'e re'en ye, ulezë nagale.

¹⁷ Na'ra uza' Jesús zionë' bdyinnë' zan yu'u quienë'. Caora na' unaba yaca ben' quië' lëbë' ca bi re'en ina di'idza' unë' bachi. ¹⁸ Na' unë' rëbinë' leyaquë': —¿Lëscan' le'e birioñe'ele? ¿Binezile ta rao yaca benë' binuen leyaquë' badza' lao Diuzi, ¹⁹ como biru'un lu'u laxta'oyaquë', dechan' ru'un lu'u lë'ëyaquë', te na' rguichiyaquë'n?

Cana' una Jesús pxi'idze'në' ra'o yugulu yela' huao nacan ta gaoro, binuen ra'o badza' lao Diuzi. ²⁰ Lëscan' una Jesús cani:

—Yaca pensari median rero lu'u guicho laxta'o benë', lëlena' nuen leyaquë' badza' lao Diuzi. ²¹ Nun quie pensari median rero lu'u guicho laxta'o benë', quie lena' rtilyaquë' nigula cuidi', rbanyaquë' quie laguediyaquë', rutiyaquë' laguediyaquë', rtilyaquë' žgula laguediyaquë', ²² rza'la'adyi'yaquë' ta de quie laguediyaquë', rueyaquë' tabayatza, rzi'yaquë' yë', rgulloyaquë' nigula yugu dza, racazë'jë' laguediyaquë', rueyaquë' ze cuinyaquë', biyu'uyaquë' gracia. ²³ Cana' naca tamala rero lu'u guicho laxta'o yaca benë' nuen leyaquë' badza' lao Diuzi.

Bebio Jesús bichi be mala yu'u ži'i nigula, ben' Sirofenicia (Mt. 15.21-28)

²⁴ Na'ra uza' Jesús gan' zioquë' bdyinnë' ga naca yu nebaba ciudad Tiro len ciudad Sidón. Bdyinnë' tu lu'u yu'u zu na', pero bigu'unnë' inezi yaca benë' gan' bdyinnë', pero bedzelecazi yaca benë' gan' bdyinnë'. ²⁵ Lëscan' laonezite tu nigula yu'u ži'inë' bichi be mala ga bdyin Jesús. Quie lena' uza'në' bdyinnë' ga zë Jesús uditzu žibinë' laohuë'. ²⁶ Na'ra lënigula na' binaquë' ben' Israel, naquë' ben' Sirofenicia. Bidë' unabë' chi biyebio Jesús bichi be mala yu'u ži'inë'. ²⁷ Na' una Jesús rëbinë' nigula na':

—Tanëro ruen zi gacalia' yaca ben' Israel, ben' naca ca quie ži'ina', como dan' binacan huen si'ro yela' huao ta gao yaca xcuidi', na' tzechu'unro'n ta gao yaca beco' dao'.

²⁸ Na' una nigula rëbinë' Jesús:

—Laga can' nao', Señor, pero lente yaca beco' dao' raoyacaba' yaca pedazo rguino layu ga rao yaca xcuidi'.

²⁹ Na'ra una Jesús rëbinë' lëbë':

—Tahuen baonao'. Beyo zan yu'u quio'. Babero bichi be mala yu'u ži'ilo'.

³⁰ Caora na' bezë'ë zeyoguë' bdyinnë' zan yu'u, blë'ënë' žuba ži'inë' nigula lao belaga, babero bichi be mala yu'ubi'.

Reyue Jesús tu ben' xcuedzo, ben' rcaca ru'e

³¹ Na'ra uza' Jesús yu nebaba ciudad Tiro, len yu nebaba ciudad Sidón. Udenë' ga re' chi yedyi bdyinnë' ru'a lagun Galilea. ³² Lëgan' na' ga bdyinnë', bdyin yaca ben' nequië' tu ben' xcuedzo, ben' rcaca ru'e. Unabayaquë' chi biudë'ë në'ë ben' na'. ³³ Na'ra ubiga' Jesús tzala'la len ben' na', pqui Jesús

zbenë' lu'u naga ben' na', blëpinë' žen' quienë' zbenë' bda'në'n lao ludyi ben' xcuedzo, ben' rcaca ru'e. ³⁴ Caora na' unë'ë guibá, uzi'la'adyi'në' unë' rëbinë' ben' na':

—¡Efata! —ta inaro di'idza' quiero: ¡Beyalo!

³⁵ Caora na' beyalo naga ben' na' barenë'. Lëscan' beyaca ludyinë' benënë' dyë'ëdi. ³⁶ Na'ra bë Jesús mandado yaca ben' quië' ta biyëbiyaquë' can' bënë' quie ben' na'. Pero ca bënë' leyaquë' mandado, cana' mazara gudyiyaquë' yaca benë' cabë' bë Jesús quie ben' na'. ³⁷ Lega bega'nyaquë' bebanyaquë' cabë' ruenë' unayaquë' rëbiyaquë' laguediyaquë':

—Yugulu ta rue Jesús nacan dya'a. Hasta yaca ben' xcuedzo, reyuenë' leyaquë' reyeyaquë', lëscan' hasta yaca ben' birnë, reyuenë' leyaquë' renëyaquë'.

8

Bgao Jesús tapa mila benë' (Mt. 15.32-39)

¹ Guca dza na' bedupa yaca ben' zë gan' zë Jesús. Na' babeya ta nu'ayaquë' ta gaoyaquë'. Lena' guzi Jesús yaca ben' quienë', unë' rëbinë' leyaquë':

² —Bareyëchi'la'adya' yaca ben' nita' niga, dan' bazio tzona dza na' nita'lëyaquë' në'ëdi, na' babeya ta nu'ayaquë' ta gaoyaquë'. ³ Chan' yese'ela'yaquë' zan yu'u quieyaquë' binegaoyaquë', usu'unan leyaquë' tu neza, dan' balayaquë' uza'yaquë' zitu'.

⁴ Na' una yaca ben' quie Jesús rëbiyaquë' lëbë':

—¿Pero biži huero ta gao yaca ben' nita' niga ga bidyia yu'u?

⁵ Na' una Jesús rëbinë' leyaquë':

—¿Bala yëta xtila nu'ale?

Na' bequëbiyaquë':

—Gadyin nu'ando'.

⁶ Na'ra bë Jesús mandado ure' yaca benë' layu, uzi'në' yëta xtila nu'a yaca ben' quië', blidzë' Diuzi rëbinë' lëbë': "Xcalelo'." Na' bzuuguë'n bë'në'n yaca ben' quië' ta udisiyaquë'n bë'yaquë'n yaca benë'. ⁷ Lëscan' nu'a ben' quienë' chopa tzona bela dao'. Na' uzi' Jesús lëba', blidzë' Diuzi ta bëla'iyane'ba', bënë' mandado ta udisi yaca ben' quienë' leyacaba', bë'yaquë'ba' yaca benë'. ⁸ Na' udaoyaquë' hasta beloyaquë'. Biži tayuzo bega'n sobre igadyi chicuiti gucan.

⁹ Na' yaca ben' udao gucayaquë' cadu tapa mila. Na' bë Jesús mandado yedzatzayaquë' zeyoyaquë' zan yu'u quieyaquë'. ¹⁰ Caora na' uyu'unë' lu'u barco lënë' yaca ben' quië' uza'yaquë' zioyaquë' yu nebaba Dalmanuta.

Unabayaquë' ulu'e Jesús tu yela' huaca quienë' (Mt. 16.1-4; Lc. 12.54-56)

¹¹ Na'ra bdyin yaca ben' naca partido fariseo gan' zë Jesús, uyu'ulëyaquë' lëbë' huenë. Na' ta hueyaquë' lëbë' prueba unabayaquë' ulu'enë' leyaquë' tu yela' huaca quienë' ladza ta ilë'ëyaquë'. ¹² Na' uzi'la'adyi' Jesús unë' gudyinë' leyaquë':

—¿Bixquien' re'en yaca ben' nita' na'a ilë'ëyaquë' hua' tu yela' huaca quia' ladza? Tali rnia' le'e, bihua' tu yela' huaca quia' ladza ta ilë'ëyaquë'.

¹³ Na' pca'n Jesús yaca ben' naca partido fariseo, beyu'unë' lu'u barco lënë' yaca ben' quië', zioyaquë' itzala' lagun.

Una Jesús quie levadura quie ben' naca partido fariseo (Mt. 16.5-12)

¹⁴ Bizi gula'adyi' yaca ben' quie Jesús ta nu'ayaquë' ta gaoyaquë'. Tuzi yëta xtila bi'ayaquë' lu'u barco na'. ¹⁵ Na' una Jesús rëbinë' leyaquë':

—Huele pensari. Gapale cuidado cabë' naca levadura quie ben' naca partido fariseo, len ben' naca partido Herodes.

¹⁶ Na' una yaca ben' quie Jesús rëbiyaquë' laguedyiaquë':

—Dan' rdzioguero yëta xtila ta gaoro, lena' unë' cana'.

¹⁷ Pero gucabë' Jesús ca naca pensari quieyaquë' biuyoñe'eyaquë' cabë' unë'. Cana' unë' rëbinë' leyaquë':

—¿Bixquien' nale rdzioguele yëta xtila ta gaole? ¿Bixquien' binetzioñe'ele, nica reyuele pensari? ¿Bixquien' naca zidi lu'u guicho laxta'ole? ¹⁸ ¿Quele birlë'ële dyë'ëdi cabë' rua'? ¿Quele birele dyë'ëdi cabë' rnia'? ¿Quele agula'adyi'le? ¹⁹ Cati bzužuga' ga'yo' yëta xtila bia' laze ta gao ga'yo' mila be'mbyu, ¿bala ga' naga ta yužo bega'n?

Na' unayaquë':

—Chipchopa ga' naga.

²⁰ Na' una Jesús rëbinë' leyaquë':

—Lëscan' cati bzužuga' gadyi yëta xtila bia' laze ta gao tapa mila be'mbyu, ¿bala chicuiti nadza' bega'n?

Na' unayaquë':

—Gadyi chicuiti.

²¹ Na'ra una Jesús rëbinë' leyaquë':

—¿Binetzu'ule pensari ca naca yela' huaca quia'?

Beyue Jesús tu ben' laochula, ben' yedyi Betsaida

²² Na'ra bdyinyaquë' yedyi Betsaida ga uquië' yaca ben' yedyi na' tu ben' laochula ga zë Jesús. Na' unabayaquë' Jesús tu cule ta udë'ë në'ë lao ben' laochula. ²³ Na' uže Jesús na'a ben' laochula uquië'në' lëbë' ru'a yedyila. Tanëro bda'në' zen' lao ben' laochula, na'tera bda'në' në'ë lao ben' na', unabané' lëbë' chi barelë'ënë'. ²⁴ Na' una ben' laochula rëbinë' Jesús:

—Barelë'ëda' yaca benë'. Rna'yaquë' ca quie yaca yaga, pero rza'yaquë'.

²⁵ Na'ra beda' Jesús në'ë lao ben' laochula tatula. Con cana' bena' ben' na' dyë'ëdi, beyaca laohuë', belë'ënë' dyë'ëdi. ²⁶ Na' bë Jesús mandado zeyo ben' na' zan yu'u quië', unë' rëbinë' lëbë':

—Bitzatao' la'o yedyi. Biyëbo' benë' cabë' bia' quio' beyaca laolo'.

Una Pedro naca Jesús ben' Cristo, ben' use'ela' Diuzi

(Mt. 16.13-20; Lc. 9.18-21)

²⁷ Na' uza' Jesús ziolënë' yaca ben' quië' yedyi Cesarea de Filipo. Na' du tu neza unaba Jesús rëbinë' leyaquë':

—¿Cabizi rna yaca benë' naca' në'ëdi'?

²⁸ Na' una yaca ben' quië' rëbiyaquë' Jesús:

—Rna balayaquë' naco' Juan bautista, babebanlo' tatula. Ibalayaquë' rnayaquë' naco' Elías, na' ibalayaquë' rnayaquë' naco' itu ben' udixogue' xti'idza' Diuzi tiempote.

²⁹ Na'ra una Jesús rëbinë' leyaquë':

—Na' le'e, ¿nuži nale naca'?

Na' una Pedro rëbinë' Jesús:

—Luë' naco' ben' Cristo, ben' use'ela' Diuzi.

³⁰ Pero bë Jesús mandado ta nitu nunu yëbiyaquë' nu naquë'.

Una Jesús ca gaca bë' bagatinë'

(Mt. 16.21-28; Lc. 9.22-27)

³¹ Na'ra uzulao Jesús rusëdinë' yaca ben' quië' cabë' gaca quienë' yedza-galaotzeguenë' gatinë' dza zaza'ra. Gudyinë' leyaquë' naquë' bichi yugulu benë', usebi'n yaca ben' gula, len yaca xan' pxuzi, len yaca ben' rusëdi ley quie Moisés lëbë'. Lëscan' gudyinë' leyaquë' gutiyaquë' lëbë', pero huebannë' tatula gaca lao tzona dza. ³² Cana' una Jesús gudyinë' leyaquë'. Na'ra uquië' Pedro Jesús tzala'la tu neza uzulaonë' rdilanë' Jesús, dan' una Jesús can'. ³³ Pero beyëcho Jesús unë'ë dyë'ëdi yaca ben' quië', udilë' Pedro rëbinë' lëbë': —Ubiga' tzala'la Satanás. Biraco' pensari quie Diuzi, raco' pensari quie benë'zi.

³⁴ Na'ra guzi Jesús yaca ben' quië' len yaca los demás ben' nita' na', unë' gudyinë' leyaquë':

—Chi nu yaca benë' re'en inao në'ëdi', ruen zi bira inaoyaquë' ca rna pensari quieyaquë'. Ruen zi bidzebiyaquë' inaoyaquë' në'ëdi' yugu dza, ba'ala'cazi ruen žudyi guti yaca benë' leyaquë'. ³⁵ Nu ben' rdzebi inao në'ëdi', dan' rdzebinë' gatinë' tanun quia', bihue' Diuzi lëbë' yela' neban tuzioli. Pero nu ben' inao në'ëdi', birdzebinë' gatinë' tanun quia' len tanun quie xti'idza' Diuzi, hue' Diuzi lëbë' yela' neban tuzioli. ³⁶ ¿Biži gan de quie nu ben' anaca quië' lao yugulute ta de lao yedyi layu, chi bigata' yela' neban quienë' tuzioli? ³⁷ ¿Ca gacala dumi re'ennan ta ga'o yaca benë' yela' neban tuzioli? ³⁸ Chi nu ben' chu'unla'adyi' në'ëdi' yedue'yaquë' hue quieyaquë' can' rnia' zaca'lao lao yaca ben' nita' lao yedyi layu, ben' birue quie xti'idza' Diuzi, ben' rue xquia, lëscan' në'ëdi', bichi yugulu benë', huaru'unla'adya' leyaquë' cati yeguida' inabi'a lao yedyi layu ca rey. Zeyu'a yela' huaca quie Xuza' Diuzi len yaca ángel naca la'ia quienë'.

9

¹ Lëscan' una Jesús rëbinë' leyaquë':

—Tali rnia' le'e, binegati bala le'e nita' niga len në'ëdi' tu binelë'ële ca naca yela' rnahe' quie Diuzi.

Cabë' guca bë' betza' cuin Jesús zaca'lao lao yaca ben' quienë'
(Mt. 17.1-13; Lc. 9.28-36)

² Guca lao xopa dza, uza' Jesús uquië'në' Pedro, len Santiago, len Juan zioyaquë' urëyaquë' lao leda' ga zu tu ya'a že. Caora badyiayaquë' laona, na' bazë Jesús zaca'lao lao yaca ben' quië' cati betza' cuinnë'. ³ Na' guca žabanë' tu la'ari' bezëri di. Ni tu yaca ben' rguibi la'ari' bisaque'yaquë' quibiyaquë' la'ari' gacan bezëri ca guca žabanë'. ⁴ Na' blë'ëyaquë' abdyin Elías len Moisés ru'elëyaquë' Jesús di'idza'. ⁵ Na'ra una Pedro rëbinë' Jesús:

—Maestro, tahuen na' nezëndo' lëndo' luë' niga. Ben lato huendo' tzona yu'u dao' de guizi. Huendo' tun quio', itun quie Moisés, itun quie Elías.

⁶ Na' bega'n ben' quie Jesús rdzebiyaquë'. Pero dan' unë Pedro na', binezinë' bi në'. ⁷ Na'ra bdyin tu beo bdubin leyaquë' gan' nita'yaquë'. Biži lado beo na' beyaquë' rchi' Diuzi unë' rëbinë' leyaquë':

—Lëži'ina' niga, lega nedyë'ëda'në'. Ulezënaga cabë' rnanë'.

⁸ Caora na' blë'ëyaquë' ituži Jesús zënë', ganura blë'ëyaquë'.

⁹ Na' cati reyëziyaquë' lë'ë ya'a, bë Jesús mandado nitu nunu yëbiyaquë' cabë' blë'ëyaquë' hasta quie gatinë' na' yebannë' lëbë', ben' naca bichi yugulu benë'. ¹⁰ Quie lena' nitu nunu gudyiyaquë' cabë' blë'ëyaquë' gan', pero bë'yaquë' di'idza' entre lëziyaquë' como dan' biuyoñe'eyaquë' bi na di'idza' quië' caora unë' gatinë' na' yebannë' tatula. ¹¹ Na' unayaquë' rëbiyaquë' Jesús:

—¿Tabala na' ca ina yaca ben' rusëdi ley quie Moisés de que tanëro ruen zi yeguida Elías, na'tera guida ben' ise'ela' Diuzi?

12 Na'ra una Jesús rëbinë' leyaquë':

—Tabala na' hueguida Elías tanëro ta yecubinë' yugulute. ¿Quele binezile dan' rna lë'ë guichi la'iya quie Diuzi cabë' gaca quia' në'ëdi', bichi yugulu benë'? Rnën lë'ë guichi na' dan' yedzagalaohua' usaca' yaca benë' në'ëdi' bizinaquezi. 13 Pero rnia' le'e, babida ben' naca Elías, pero na' psaca'yaquë' lëbë' bizinaquezi laga con ca rna lë'ë guichi la'iya quie Diuzi.

Beyue Jesús tu bi'byu yu'u bichi be mala

(Mt. 17.14-21; Lc. 9.37-43)

14 Ude beyudyi na', zeza'yaquë' bdyinyaquë' ga nita' yaca los demás ben' quie Jesús. Na' blë'ëyaquë' nita' ben' zë gan'. Na' nita'rë yaca ben' rusëdi ley quie Moisés uyu'yaquë' huenë len yaca ben' quie Jesús. 15 Caora blë'ëyaquë' Jesús, bega'nyaquë' bebanziyaquë', uyu'yaquë' be, bdyinyaquë' ga zë Jesús, gapayaquë' lëbë' diuzi. 16 Na' una Jesús gudyinë' yaca ben' quie':

—¿Bizi una ben' rusëdi ley quie Moisés uyu'yaquë' huenë len le'e?

17 Caora na' una tu ben' zë ga'ala' rëbinë' Jesús:

—Maestro, nequi'a tu zi'ina' byu niga. Yu'ubi' bichi be mala, biraca inëbi', biraca yebi'. 18 Con gatezi rede yela' hue' xi'ibi' da'abi', rguinlëbi' yu. Bë' debi' layu, rulio rulibibi', rao leibi', raca bdyin' ru'abi'. Dan' raca quiebi' cana', bayëchi' gula raca quiebi'. Aonaba' yaca ben' quio' chi biyebioyaquë' bichi be mala yu'ubi', pero biuzaque'yaquë'.

19 Na' una Jesús rëbinë' yaca ben' nita' na':

—¡Ay, le'e ben' birale! ¿Bala iza re'ennan yega'nlia' le'e hasta que galele cabë' rnia'? ¿Bala iza re'ennan sueda' sulia' le'e? Uletexi'bi' guidabi' niga.

20 Na' yexi'yaquë'bi'. Caora blë'ë bichi be mala Jesús, bë' na' guca quie bi'byu ca zuguti. Na' bgu'umbi' layu, rzizibi', rdulabi', raca bdyin' ru'abi'.

21 Na' unaba Jesús rëbinë' xuzibi':

—¿Gaca bazio na' ulëna?

Bizi unë xuzibi':

—Nenacatebi' xcuidi' ulëna. 22 Zë lasa babzalan lëbi' lagui', babzalan lëbi' lu'u yao ta udyiaqui'n lëbi', pero birzaque'n. Na' chan' gaco' yeyuelo'bi', yeyëchi'la'adyo' nëto' gacalëlo' nëto'.

23 Na'ra una Jesús gudyinë' lëbë':

—Binao' chan' gaco'. Chi rzudyi'ilëlo' në'ëdi', huaca huelo' yugulute.

24 Bizi na' unë xuzi xcuidi' na' zidzo rëbinë' Jesús:

—Rzudyi'ilia' luë', gacalao' në'ëdi' ta sudyi'ilia' luë' mazara.

25 Caora blë'ë Jesús bdupa yaca ben' zë ga zënë', na' udilanë' bichi be mala unë rëbinë'n:

—Dyin quio' bire birnë bi' niga. Rnia' luë', bero gan' yu'ulo' na', bira huelao'bi' tatula.

26 Na' urediya' bichi be mala pxizin bi'byu tatula, bega'mbi' debi' ca ben' huati. Lena' una yaca ben' nita' na':

—Bagutibi'.

27 Na'ra bëxo Jesús na'abi' ta bechisanë'bi', bezubi'.

28 Ude beyudyi na', caora uyu'u Jesús lënë' yaca ben' quie' lu'u yu'u, na' unayaquë' rëbiyaquë' Jesús:

—¿Bixquien' biuzaque'ndo' yebiondo' bichi be mala?

29 Na' una Jesús rëbinë' leyaquë':

—Ca naca bichi be mala bebioga', chi bihue'lële Diuzi di'idza', chi bihuele ubasi, biyerona.

Tatula una Jesús cabë' gaca quienë' bë' gatinë'

(Mt. 17.22-23; Lc. 9.43-45)

³⁰ Na' beza' Jesús lēnē' yaca ben' quiē' zioyaquē' yedeyaquē' estado Galilea. Na' bigu'un Jesús inezi yaca benē' yedeyaquē' gan' na', ³¹ dan' ruzioñe'enē' yaca ben' quienē', gudyinē' leyaquē' cabē' gaca quiē', ben' naca bichi yugulu benē'. Na'ra gudyinē' leyaquē' usedyin yaca benē' lēbē' lao na'a ben' rnabē' ta gutiyaquē' lēbē', pero gaca lao tzona dza huebannē' tatula. ³² Pero biuyoñe'e yaca ben' quiē' can' unē' gudyinē' leyaquē'. Na' bibeyažoyaquē' inabayaquē' lēbē'.

Unē Jesús quie ben' nacara belao
(Mt. 18.1-5; Lc. 9.46-48)

³³ Biži bdyin Jesús lēnē' yaca ben' quiē' ciudad Capernaum tatula, beyu'uyaquē' lu'u yu'u gan' uza'yaquē'. Na' una Jesús rēbinē' yaca ben' quiē': —¿Biži di'idza' ru'elēle laguedyile dan' zeza'le huenē' cati zeza'ro tu neza?

³⁴ Pero bibequēbiyaquē' bega'nyaquē' chizi dan' zeza'yaquē' rnēyaquē' tu neza quie nula leyaquē' nacara ben' belao. ³⁵ Na' ure' Jesús gudyinē' yaca chipchopa ben' quienē' ta ibiga'yaquē' gan' re'nē'. Na' unē' rēbinē' leyaquē': —Nu le'e re'en gaca ben' belaora entre le'e, ruen zi gaquē' ben' zenaote quie le'e, ben' gacalē laguedyi.

³⁶ Na'ra guži Jesús tu xcuidi' bzunē'bi' gatzo la'o gan' nita'yaquē'. Te na' uzi'nē'bi' bdyianē'bi' lazibinē' unē' gudyinē' leyaquē':

³⁷ —Nu ben' rzi' tu xcuidi' ca bi' niga lao laohua' nē'ēdi', rzi'rēnē' nē'ēdi'. Na' tu ben' rzi' nē'ēdi', quele tuza' nē'ēdi' rzi'nē', lēscan' rzi'rēnē' ben' pse'ela' nē'ēdi'.

Nu ben' birue condre ra'o, nacacazi quieyaquē' ca quie ben' rnēcule ra'o
(Lc. 9.49-50; Mt. 10.42)

³⁸ Na'ra una Juan rēbinē' Jesús:

—Maestro, bablē'ēndo' rda tu benē' rzētoguē' rnanē' laolo' rebioguē' bichi be mala yu'u benē'. Na'ra gudyindo'nē' bira huenē'n dan' binaquē' tu cue' quiero.

³⁹ Pero una Jesús rēbinē' leyaquē':

—Gabi yēbile nu ben' rue cana', como dan' chi nu yaca benē' rueyaquē' yela' huaca rzētoyaquē' laohua', quele condre nē'ēdi' rnēyaquē'. ⁴⁰ Nu ben' birue condre ra'o, nacacazi quieyaquē' ca quie ben' rnēcule ra'o. ⁴¹ Nutezi ben' gun le'e bi cosa siquiera tu vaso nisa nun quie nacale ben' quia', huaguižucazi Diuzi lēbē'.

Nacan zudyi gula chi huero xquia
(Mt. 18.6-9; Lc. 17.1-2)

⁴² 'Nutezi ben' rudze'yela tu xcuidi' rale quia' ta huebi' xquia, hue Diuzi lēbē' castigo huala gula. Tadya'acala quienē' irio tu yo ze len du luba'nē' tzechu'un yaca benē' lēbē' lu'u yao ze, quele ca castigo hue Diuzi lēbē'. ⁴³ Chi rnēn le'e huelēle na'ale tamala, nacaran dya'a ichugulen tzirole guibá ca ben' nedyipa nē'ē, quele ca zu rupa na'ale tzirole gui' gabila ga bireyulan, ⁴⁴ ga gao bēla benē' tuzioli, bireyula gui'. ⁴⁵ Lēscan' chi rnēn le'e huelēle ni'ale tamala, nacaran dya'a ichugurēlen tzirole guibá ca ben' nedyipa ni'e, quele ca zu rupa ni'ale tzirole gui' gabila bireyulan, ⁴⁶ ga gao bēla benē' tuzioli, bireyula gui'. ⁴⁷ Lēscan' chi rnēn le'e huelēle laole tamala, nacaran dya'a cuiolen tzirole guibá ca ben' nero yolaohue, quele ca ta tzirole gui' gabila len rupa la'a yolaole, ⁴⁸ ga gao bēla benē' tuzioli, bireyula gui'.

⁴⁹ 'Cabē' rudze' benē' zedi' lu'u bē'ēla', cana' udze' Diuzi gui' lu'u benē'.

⁵⁰ De ga hue zedi' dyin, pero chan' aodyiagui'n, bira huen dyin, ¿biži huero ta

iyacan huen dyin tatula? Quie lena' bigacale ca ben' aodyiagui', ben' birue dyin, mejorla nita'lêle laguedyile dyë'edi, bitilale.

10

Una Jesús quie ben' rsan laguedyi

(Mt. 19.1-12; Lc. 16.18)

¹ Na'ra uza' Jesús lënë' yaca ben' quië' ciudad Capernaum zioyaquë' estado Judea, lëscan' zioyaquë' tzala'la yao Jordán. Con ga zioyaquë' redupa yaca benë' gan' zë Jesús. Na' ca modo quie Jesús, bezulaonë' rusëdinë' yaca benë'.

² Bizi na' bdyin chopa tzona ben' naca partido fariseo gan' na' ta hueyaquë' trampa quie Jesús iguinonë' lao di'idza' quienë'. Quie lena' unabayaquë' lëbë' chi ru'en lato usan yaca benë' nigula quieyaquë'. ³ Na' una Jesús bequëbinë' leyaquë':

—¿Bi na lë'ë guichi bë Moisés?

⁴ Na' unayaquë' rëbiyaquë' lëbë':

—Bë' Moisés lato hue yaca benë' tu guichi ta usanyaquë' nigula quieyaquë'.

⁵ Na'ra una Jesús rëbinë' leyaquë':

—Yela' zidi quie yaca benë' bë' Moisés lato usanyaquë' nigula quieyaquë'.

⁶ Pero binacan cana' dza na' caora ulëchi Diuzi dylayu udixonë' yugulu ta de. “Lëdza na' bzaloguë' chopa benë', tu be'mbyu len tu nigula.” ⁷ Quie lena' rsan yaca be'mbyu xuzi znë'ë ta rzulënë' nigula quienë'. ⁸ Cana' naca quieyaquë' ca quie tuzi benë'. Bira nacayaquë' chopa, dechan' nacayaquë' ca quie tuzi benë'. ⁹ Quie lena' bireya'ala' usan yaca benë' laguedyiyaquë' como dan' bë Diuzi gacayaquë' tuzi.

¹⁰ Bizi caora bedyin Jesús lënë' yaca ben' quië' lu'u yu'u, na' unabarayaquë' Jesús quie ben' rsan laguedyi. ¹¹ Na' una Jesús:

—Nu ben' rsan nigula quie, na' rzulënë' nigula tula, nacan xquia quienë' lao Diuzi, bënë' yela' stu' quie nigula quienë'. ¹² Lëscan' chi rsan nigula be'mbyu quienë', na' rzulënë' be'mbyu tula, nacan xquia quienë' lao Diuzi, bënë' yela' stu' quie be'mbyu quienë'.

Bëla'iya Jesús yaca xcuidi'

(Mt. 19.13-15; Lc. 18.15-17)

¹³ Na'ra bdyin yaca benë' gan' zë Jesús nequië'yaquë' zi'iyaguë' ta uda'në' në'ë guichoyacabi' huela'yanë' leyacabi'. Pero udila yaca ben' quie Jesús yaca ben' nequië' zi'ine. ¹⁴ Caora blë'ë Jesús udila yaca ben' quië' leyaquë', na' bdza'në' unë' rëbinë' yaca ben' quië':

—Biudzunle yaca xcuidi'. Guidagarayacabi' ni como dan' ca naca quiey-acabi', rue quieyacabi' ca rna xuziyacabi', lëcana' nacarën quie ben' zio rue quie Diuzi. ¹⁵ Tali rnial' le'e, chi nu yaca ben' birue quieyaquë' xti'idza' Diuzi ca rue xcuidi' quie xuzibi', bisaque' yeyoyaquë' guibá gan' zu Diuzi.

¹⁶ Na' bdyia Jesús tu huio xcuidi' lazibinë' bdë'ë në'ë guichoyacabi' bëla'yanë' yuguluyacabi'.

Tu ben' uña'a bë'lënë' Jesús di'idza'

(Mt. 19.16-30; Lc. 18.18-30)

¹⁷ Na'ra caora beyu'u Jesús neza azeyolënë' yaca ben' quië', na' bdyin tu ben' uyu'u be, uditzu zibinë' lao Jesús unë' rëbinë' lëbë':

—Maestro, ben' huen naco'. Nainao', ¿ca bizi reya'ala' hua' ta gata' yela' neban quia' tuzioli?

¹⁸ Na' una Jesús:

—¿Bixquien' nao' naca' ben' huen? Tahuencazi nao' cana', como tuzi Diuzi naquë' ben' huen. ¹⁹ Luë' banezilo' ca rna lë'ë guichi la'iya quie Diuzi: "Biütilo' nigula quie ben' tula. Bigutio' benë'. Bicuanlo' quie benë'. Bisiu' benë' yë'. Udapala'n xuzo' len žnao'."

²⁰ Na'ra unë ben' na' rëbinë' Jesús:

—Yugulu ca rnao', rue quiecaza'n za'caza' naohua'n desde nacatia' xcuidi'.

²¹ Caora na' una' Jesús laohuë' nedyë'ënë' lëbë', unë' rëbinë' lëbë':

—De tu ta nerdzioguelo' huelo'. Bëti' yugulu ta de quio', na' uži' dumi na', bë' yaca ben' yëchi' len. Cana' gunra Diuzi tazera quio' bë' yedyinlo' guibá. Na' uda unao në'ëdi' gaco' ben' quia'.

²² Pero cati be ben' na' can' una' Jesús, na' bega'nnë' guquenë' beyëchi' gula, como dan' naquë' ben' uña'a huala gula.

²³ Na' una' Jesús yaca ben' quië' unë' rëbinë' leyaquë':

—Zëdi gula nacan quie ben' uña'a ta yeyoyaquë' guibá gan' zu Diuzi.

²⁴ Na'ra bebanzi yaca ben' quie Jesús cabë' unë' quie ben' uña'a. Pero tatula unë' rëbinë' leyaquë':

—Bicha', zëdi gula nacan ta yeyo ga zu Diuzi yaca ben' rzudyi'ilë dumi quieyaquë' ta gacalën leyaquë' yeyoyaquë' guibá. ²⁵ Nacaran yalo te tu camello naga yëchi', quele ca ta tzu'u ben' uña'a guibá gan' zu Diuzi.

²⁶ Na' bebanzi yaca ben' quie Jesús unayaquë' rëbiyaquë' laguedyiaquë':

—Chi nacan zëdi gula quie ben' uña'a, žnuži saque' yeyo guibá gan' zu Diuzi?

²⁷ Na' una' Jesús leyaquë' unë':

—Tu ta bisaque' hue yaca benë', Diuzi sí, huazaque'në' huenë'n, como dan' raca Diuzi ruenë' yugulute.

²⁸ Na' una Pedro rëbinë' Jesús:

—Señor, nëto' bapca'nndo' yugulu ta de quiendo' cuenda za'ndo' naondo' luë'.

²⁹ Na' una Jesús rëbinë' leyaquë':

—Nacan tali can' rnia' le'e. Con nuti'tezi ben' pca'n nu yu'u quieyaquë', nu bichi, nu zane, nu xuzi, nu žnë'ë, nu žgule, nu ži'ine, nu layelá quie, nun quie naoyaquë' në'ëdi' rue quieyaquë' xti'idza' Diuzi, ³⁰ hueyu'era Diuzi tu gayuhua mazara quieyaquë' dza rdayaquë' lao yedyi layu. Hueyu'era Diuzi quieyaquë' nu yu'u, nu bichi, nu zane, nu žnë'ë, nu ži'ine, nu layela quie, ba'ala'cazi rue yaca benë' lëyaquë' bizinaquezi. Lëscan' hue' Diuzi lëyaquë' yela' neban tuzioli bë' bayedyinyaquë' guibá gan' zu Diuzi. ³¹ Pero bala ben' naca ben' belao niga lao yedyi layu, bira gacayaquë' ben' belao dza yedyinyaquë' ga zu Diuzi. Lëscan' bala ben' binaca ben' belao niga lao yedyi layu, huacayaquë' ben' belao dza yedyinyaquë' ga zu Diuzi.

Una Jesús tatula cabë' gaca bë' gatinë'

(Mt. 20.17-19; Lc. 18.31-34)

³² Na' bë' beza' Jesús lënë' yaca ben' quië', zeyu'uyaquë' neza ta yedyinyaquë' ciudad Jerusalén. Na' udyialao Jesús lao yaca ben' quië'. Na' tu bebanzi yaca ben' quië' birdzebi Jesús tzionë' ciudad Jerusalén. Na' unao yaca ben' quienë' lëbë' du rdzebiyaquë' bi gaca quieyaquë'. Na' guži Jesús leyaquë' ta tzežeyaquë' lëbë' gudyinë' leyaquë' bi gaca quienë' ciudad Jerusalén. ³³ Cana' una Jesús rëbinë' leyaquë':

—Ulezëcara nagale. Tziro Jerusalén ga usaca' yaca benë' në'ëdi', ben' naca bichi yugulu benë', tamala. Usedyinyaquë' në'ëdi' lao na'a yaca xan' pxuzi len yaca ben' rusëdi ley quie Moisés. Huachugubë'yaquë' quia' inayaquë'

reya'ala' gatia'. Na' usedyinyaquë' në'ëdi' lao na'a yaca ben' uza' yedyi tula.
³⁴ Na' utitu yaca ben' uza' yedyi tula në'ëdi'. Hueyaquë' në'ëdi' zi', uda'yaquë' zen' laohua', gutiyaquë' në'ëdi'. Pero bë' gaca lao tzone dza, huebana' tatula.

Unaba Santiago len Juan tu cule lao Jesús

(Mt. 20.20-28)

³⁵ Na'ra Santiago len Juan, ben' zi'i Zebedeo, ubiga'yaquë' ga zë Jesús unayaquë' rëbiyaquë' lëbë':

—Maestro, re'enndo' gunlo' ca ta inabando' luë'.

³⁶ Na' una Jesús rëbinë' leyaquë':

—¿Bi'zi re'enle guna' le'e?

³⁷ Na' unayaquë' rëbiyaquë' Jesús:

—Re'enndo' guno' lato ta cue'ndo' tzala' huio cuëtalo' ga tzere'lo' inabë'lo' lao yedyi layu.

³⁸ Na' una Jesús rëbinë' leyaquë':

—Binezile cabizi inabale guna'. ¿Huazuele sacale cabë' usaca benë' në'ëdi'? ¿Huazuele yedzagalaole cabë' yedzagalaohua'?

³⁹ Na' bequëbiyaquë' rëbiyaquë' Jesús:

—Huazuendo'.

Na' bi'zi una Jesús rëbinë' leyaquë':

—Tali na' ca nale. Usacacazi benë' le'e cabë' usacayaquë' në'ëdi', lëscan' yedzagalaocazile cabë' yedzagalaohua'. ⁴⁰ Pero bisaque' guna' le'e lato cue'le tzala' huio cuëta' ga tzeri'a como dan' binaca parte quia' guna' le'e lato cue'le cuëta'. Naca parte quie Diuzi hue'në' lato nu ben' cue' cuëta' lë'ëna'.

⁴¹ Na'ra cati unezi yaca los demás ben' quie Jesús cabë' unaba Santiago len Juan hue'në' quieyaquë', na' bdza'yaquë' leyaquë'. ⁴² Pero guzi Jesús leyaquë' unë' rëbinë' leyaquë':

—Le'e nezile dyë'ëdi cabë' rue yaca ben' naca gobierno, rnabë'yaquë' zi'laza. Lega rueyaquë' mandado zëdi ta rue yaca benë'. ⁴³ Pero le'e bireya'ala' huele cana'. Nu le'e re'en gaca ben' ze entre le'e, reya'ala' gaquë' ben' gaxo, ben' gacalë laguedyi. ⁴⁴ Nu le'e re'en gaca ben' belao entre le'e, reya'ala' gaquë' ca quie mozo quiele. ⁴⁵ Hasta në'ëdi', ben' naca bichi yugulu benë', quele bida' ta gaca yaca benë' ca yaca mozo quia', bida' ta gaca' ca quie mozo quieyaquë'. Lëscan' bida' ta gatia' quizuga' quie xquia quieyaquë' cuenda gata' yela' neban quieyaquë' tuzioli.

Beyue Jesús ben' laochula, ben' lao Bartimeo

(Mt. 20.29-34; Lc. 18.35-43)

⁴⁶ Na' bdyin Jesús lënë' yaca ben' quië' yedyi Jericó. Caora udeyaquë' yedyi, na' bazëyaquë' ru'a yedyi, caora na' bdupa yaca ben' zë gan' zënë'. Bi'zi cuëta neza ure' tu ben' laochula, ben' lao Bartimeo. Naquë' zi'i Timeo, ure'në' tu neza rnabë' caridad. ⁴⁷ Na'ra caora benë' baza' Jesús, ben' yedyi Nazaret, uzulaonë' rnënë' zidzo rëbinë' Jesús:

—Jesús, zi'i suba rey David, yeyëchi'la'adyo' në'ëdi'!

⁴⁸ Na' udila yaca benë' lëbë' gudyiyaquë' ta cue'në' chizi, pero unërë' zidzora uredyiya'në':

—Zi'i suba rey David, yeyëchi'la'adyo' në'ëdi'.

⁴⁹ Na' bi'zi uleza Jesús unë' rëbinë' yaca ben' nita' na':

—Uleyëbi ben' na' guidë' ni.

Na' uyoyaquë' yexi'yaquë' lëbë' gudyiyaquë' lëbë':

—Bidzebo', uzuli, ya', como dan' rëzi Jesús luë'.

⁵⁰ Na' ulëchonë' gabán quienë', laozulitenë' zionë' ga zë Jesús. ⁵¹ Na'ra una Jesús rëbinë' lëbë':

—¿Bizi re'lenlo' hua' quio'?

Na' una ben' laochula':

—Maestro, re'enda' yeyuelo' laohua'.

⁵² Na' una Jesús rëbinë' lëbë':

—Dan' rzudyi'ilëlo' në'ëdi', quie lena' babeyaca laolo'. Baoca, yeyo.

Bizi caora una Jesús cana', beyaca laohuë' belë'ënë', ziolënë' Jesús tu neza.

11

Cabë' guca bë' uyo Jesús ciudad Jerusalén

(Mt. 21.1-11; Lc. 19.28-40; Jn. 12.12-19)

¹ Na'ra bdyinyaquë' ga zu tu ya'a laonan ya'a Olivos. Baruen bago ta idyinyaquë' ciudad Jerusalén. Lëscan' banacaten ga'ala' len yedyi Betfagé len yedyi Betania. Na' use'ela' Jesús chopa ben' quië' ² unë' rëbinë'yaquë':

—Uletzio yedyi re' ni'. Bë' zaidyinle ru'a yedyi, huadzelele tu burra dao' nerioba' nunu necuia lëba'. Na' ixëdyileba' yequië'leba' nila. Yeyudyi uhuenta'ba' dyin, natzesanleba'. ³ Chi inaba yaca benë' le'e bixquien' rexëdyileba', na' yëbilyaquë': Re'en xa'nndo' lëba'. Bë' yeyudyi uhuenë'ba' dyin, cana' idesanndo'ba'.

⁴ Na' uza'yaquë' bdyinyaquë' tu neza gan' zë burra dao' nerioba' cuëta ru'a yu'u. Na' pxëdyiyaquë'ba'. ⁵ Bizi na' unë yaca ben' nita' bago unayaquë' rëbiyaquë' ben' quie Jesús:

—¿Bixquien' rxëdyile burra dao' na'?

⁶ Na'ra bequëbiyaquë' gudyiyaquë' yaca ben' nita' na' cabë' gudyi Jesús leyaquë'. Na'ra psan yaca benë' leyaquë' yequië'yaquë' burra dao'. ⁷ Na' zëza'yaquë' bedyinlëyaquë' ga zë Jesús. Ulëchoyaquë' gabán quieyaquë' uxu-bayaquë'n xcu'udzu burra dao', udyia Jesús lëba'. ⁸ Na' uza'yaquë' zioyaquë' uduxu yaca benë' gabán quieyaquë' tu neza ta gapala'nyaquë' lëbë'. Lëscan' uchugo yaca benë' bena yaga dyia la'aga' uduxyaquë'n tu neza gan' te Jesús.

⁹ Na' yaca ben' zënao lëbë' tu neza len yaca ben' udyialao lao len lëbë', uzulaoyaquë' rbediya'yaquë' unayaquë':

—¡Naca Xuziro Diuzi ben' ze! ¡Ben' la'ia naco', bido' tanun quie Diuzi!

¹⁰ ¡La'ia naca xlato' ta zëza'ra lao xlato xuzixta'oro rey David! ¡Naca Xuziro ben' ze!

¹¹ Cana' bdyin Jesús ciudad Jerusalén, uyu'unë' lu'u idao' rnabë'ra zu na'. Te beyudyi una'në' duze cabë' naca na', na' zëza'lënë' lao chipchopa ben' quienë' zioyaquë' yedyi Betania dan' baza' rdze'.

Bdze'de' Jesús yaga higo ta bidyan tazixi

(Mt. 21.18-19)

¹² Na' beteyu zila, beza'në' Betania ziolënë' yaca ben' quië' cati uduenë'.

¹³ Na' blë'ë Jesús zitu' zu tu yaga higo badyian la'aga'. Na' uyoguë' ta inë'ë chi bidyan tazixi. Pero bibi tazixi dyian, puro la'aga' dyian dan' quele tiempo quien. ¹⁴ Na' unë Jesús gudyinë' yaga:

—Desde na'a bira cuälo' tazixi ta gao yaca benë'.

Bizi na' be yaca ben' quië' cabë' unë' rëbinë' yaga.

Blae Jesús yaca ben' yu'u huëti' ru'a idao' rnabë'ra

(Mt. 21.12-17; Lc. 19.45-48; Jn. 2.13-22)

¹⁵ Na'ra bdyinyaquë' ciudad Jerusalén, uyo Jesús tatula ru'a idao' rnabë'ra, blaohuë' yaca ben' yu'u huëti' gan'. Bzalanë' layu mesa quie yaca

ben' rutza' dumi. Bzalanë' silla que yaca ben' ruti' biu. ¹⁶ Bibë' Jesús lato ta te yaca benë' len yua' quieyaquë' ru'a idao' rnabë'ra na'. ¹⁷ Na' una Jesús rëbinë' yaca ben' yu'u huëti':

—Lë'ë guichi la'iya quie Diuzi rnan cani: “Lu'u idao' rnabë'ra ni nacan ga ulidza ben' quie yugulu nación Diuzi.” Pero le'e aptza'len ruelen ca quie beló ga yu'u ben' uban.

¹⁸ Na' yeguedyi yaca benë' yaca xan' xuzi len yaca ben' rusëdi ley quie Moisés cabë' bë Jesús quie yaca ben' yu'u huëti' ru'a idao' rnabë'ra. Na' uzulaoyaquë' reguilola'adyi'yaquë' bi hueyaquë' ta gutiyaquë' Jesús, dan' rdzebiyaquë' lëbë' nun quie raxe yaca benë' ca na Jesús rusëdinë' leyaquë'.

¹⁹ Na' baoya' dza, zeza' Jesús ziolënë' yaca ben' quie' zeyoyaquë' Betania.

Ca guca quie yaga higo aobidyin

(Mt. 21.20-22)

²⁰ Caora uyenì' dza tula, beza'yaquë' uyu'uyaquë' neza blë'ëyaquë' aobidyin yaga higo lente lue quien. ²¹ Na' beza'la'adyi' Pedro cabë' una Jesús quie yaga higo, na' unë' rëbinë' Jesús:

—Maestro, una'cara, aobidyin yaga higo bdze'de'lo'.

²² Na' una Jesús rëbinë' leyaquë':

—Sudyi'ilële Diuzi. ²³ Tali rnìa' le'e, con nutezi ben' yëbi ya'a niga: “Beyo, yeyu'u lu'u nisadao”, na' chi du guicho du la'adyi'yaquë' rzudyi'ilëyaquë' Diuzi, huenë' ca yëbiyaquë' ya'a, na'ra huaca quie ya'a ca yëbiyaquë'n. ²⁴ Quie lena' rnìa' le'e, cati hue'lële Diuzi di'idza' ta inabalenë' bi cosa, chi rzudyi'ilële Diuzi du guicho du la'adyi'le gun Diuzi ca ta inabalenë', na'ra guncazinë'.

²⁵ Lëscan' cati hue'lële Diuzi di'idza', chi nede tu tamala bë yaca benë' quiele, yezi'zele quieyaquë'. Cana' huezì'zerë Xuziro Diuzi zu guibá dula' xquia quiele. ²⁶ Pero chi biyezi'zele quieyaquë', lëscan' biyezi'ze Xuziro Diuzi zu guibá dula' xquia quiele.

Unabayaquë' Jesús nu ben yela' rnabë' quienë'

(Mt. 21.23-27; Lc. 20.1-8)

²⁷ Na'ra beza'yaquë' zioyaquë' bedyinyaquë' ciudad Jerusalén tatula. Na' caora uyu'u Jesús lu'u idao' rnabë'ra rdanë' na', caora na' bdyin yaca xan' pxuzi len yaca ben' rusëdi ley quie Moisés ga rdë'. ²⁸ Na' unayaquë' rëbiyaquë' Jesús:

—Una nëto', ¿nu ben yela' rnabë' quio', dan' bablaolo' ben' yu'u huëti' lu'u idao' rnabë'ra?

²⁹ Na' una Jesús gudyinë' leyaquë':

—Lëscan' re'enda' inaba' le'e tu di'idza'. Chi yequëbile ta inaba' le'e, na' inia' le'e nu ben yela' rnabë' quia' dan' bia' cana'. ³⁰ Na' inaba' le'e: ¿Nu'zi use'ela' Juan ta bënë' lao yaca benë'? ¿Use'ela' Diuzi lëbë' o ta racazi la'adyi'në' bidë'?

³¹ Na'ra uzulaoyaquë' rtzaloyaquë' ru'elëyaquë' laguedyiaquë' di'idza' nayaquë':

—¿Cabizi yëbironë'? Chan' yëbironë': “Diuzi use'elë' lëbë'”, tana' huanë' ra'o: “¿Bixquien' bigulele quienë'?” ³² Pero bisaque' yëbironë': “Ta racazi la'adyi'në' bidë'.”

Na' bdzebiyaquë' yëbiyaquë' Jesús can', como dan' neziyaquë' huadza' yaca benë' leyaquë' nun quie rna yaca benë' naca Juan ben' use'ela' Diuzi, ben' rguixogue' xti'idzë'. ³³ Quie lena' unayaquë' rëbiyaquë' Jesús:

—Binezindo'.

Na'ra una Jesús rëbinë' leyaquë':

—Lëscan' nê'edi', biinia' le'e nu ben yela' rnabê' quia', dan' bablaohua' ben' yu'u huêti' lu'u idao' rnabê'ra.

12

Bzu Jesús tu di'idza' quie yaca ben' hue dyin, yaca ben' mala
(Mt. 21.33-46; Lc. 20.9-19)

¹ Na'ra una Jesús di'idza' ni rëbinê' benê':

—Uzu tu ben' guza bedzuli' layela quienê'. Lëscan' psioguê'n ulëchinê'n corale, udixunê' tu yo laga' ga usinë' nisa bedzuli'. Lëscan' bënë' tu yu'u de yo ga cuia benê' ta gapayaquê' bedzuli' quienê'.

Na'ra bënë'n lao na'a yaca benê' naca ladyinë'ë, uza'nê' zioguê' zitu'.

² Bi'zi cati bdyin biu' quie usecho quie bedzuli', na' bese'ela' xan' layela tu ben' zu laohuê' ta tzenabanê' tu ta redu'ulanê' si'nê' quie bedzuli' quienê'.

³ Pero bela'cala bê'yaquê' zi' ben' use'ela' xa'nyaquê'. Na' beza'nê' gabi zeyu'anê'. ⁴ Na'ra bese'ela' ben' xan' layela ben' tula zioguê'. Pero lagazi udiyaquê' lëbê' yo, bê'yaquê' guicho ben' na' zi', ptasi bnioyaquê' lëbê'.

⁵ Na' bi'zi bese'ela' xan' layela ben' tula zioguê', pero bëtïyaquê' lënê'. Te na' bese'ela' xan' layela ben' zê, uyo tu huio tu huioyaquê'. Con bala ben' use'ela' xan' layela bê'yaquê' zi', ibalayaquê' bëtïyaquê'.

⁶ Bi'zi ga beyudyicala uzu tu zi'i xan' layela, lega nedyê'ënê' lëbê'. Na' use'elê' zi'inê' unê': "Decazide gapala'nyaquê' zi'ina'." ⁷ Pero bê' blê'ë yaca ben' naca ladyinë'ë layela babdyin zi'i xa'nyaquê', na'ra unayaquê' rëbiyaquê' laguedyïyaquê': "Bi' niga, gaca quiebi' layu niga cati bagati xuzibi'. Uletza' gutirobi' cuenda si'ro layu niga gacan quiero." ⁸ Na' bëxoyaquê'bi' bëtïyaquê'bi', ulioyaquê'bi' gan' de layela.

⁹ Na'ra unabá Jesús yaca benê' nita' na' unê':

—¿Cabizi' reya'ala' hue ben' naca xan' layela? Decazide huedyinnê' gan' de layela quienê' ta gutinë' yaca ben' nu'enê' ladyinë'ë, hue'nê' yaca ben' tula gaca ladyina'ayaquê' layela quienê'.

¹⁰ Lëscan' una Jesús rëbinê' leyaquê':

—¿Binena'le ca rnên lë'ë guichi quie Diuzi? Cani rnên:
Yo laga' ta baoru'un yaca ben' hue huecua', lëyo na' besi' Diuzi bzunê'n ga naca belao, ga rzulao bezu.

¹¹ Cana' bê Diuzi.

Nacan tadya'a gula.

Nacan zi' ta yebanziro.

¹² Na'ra gu'unyaquê' guxuyaquê' Jesús udze'yaquê' lëbê' lu'u dyiguiba como dan' gucabê'yaquê' unê Jesús di'idza' na' condre leyaquê'. Pero como dan' bdzebiyaquê' bi hue yaca benê' quieyaquê', psanyaquê' quienê', beza'yaquê' zeyoyaquê'.

Unabayaquê' Jesús ca naca quie impuesto
(Mt. 22.15-22; Lc. 20. 20-26)

¹³ Ude beyudyi na', use'ela'yaquê' chopa tzona ben' naca partido fariseo len ichopa tzona ben' naca partido quie rey Herodes ta tzenabayaquê' Jesús di'idza' ta huyaquê' trampa quienê' chi biguinonê' lao di'idza' quienê' ta saque' gaoyaquê' lëbê' xquia. ¹⁴ Quie lena' bdyinyaquê' gan' zê Jesús unayaquê' rëbiyaquê' lëbê':

—Maestro, banezindo' luê' rusêdio' yaca benê' di'idza' naca li. Na' biru' cuenda bi naque yaca benê' sino rusêdio' leyaquê' tali xneza Diuzi. Unacara nêto': ¿Ru'en lato quizoro quie impuesto quie ben' naca gobierno romano? ¿Reya'ala' quizoron o chi bireya'ala' quizoron?

¹⁵ Pero gucabè' Jesús ca naca pensari mala yu'uyaquè' birueyaquè' ca rnayaquè'. Na' unè' rëbinè' leyaquè':

—¿Bixquien' re'enle cuèchile trampa quia'? Uletzexi' tu dumi plata ta ina'a.

¹⁶ Na'ra yexi'yaquè' tu dumi plata. Na' caora blè'ën'n, unè' rëbinè' leyaquè':

—¿Nu guicho, nu laohue da' lè'ën?

Na' bequèbiyaquè' unayaquè' Jesús:

—Da' lè'ën guicho laohue ben' naca gobierno quie ben' romano.

¹⁷ Na'ra una Jesús rëbinè' leyaquè':

—Ulehue' ben' naca gobierno ta redu'ulanè' si'nè'. Lëscan' ulehue' Diuzi ta redu'ulanè' si'nè'.

Na' tu bebanziyaquè' can' unè'.

Unabayaquè' Jesús quie ben' baguti beban

(Mt. 22.23-33; Lc. 20.27-40)

¹⁸ Tana' uyorè yaca ben' partido Saduceo gan' zè Jesús. Na' leyaquè' rnayaquè' biyeban yaca ben' baguti. Quie lena' unayaquè' rëbiyaquè' Jesús:

¹⁹ —Maestro, ca naca di'idza' bzu Moisés lè'ë guichi, rnën chi baguti tu be'mbyu, na' bega'n žgulanè' tu cuinzè', nunu ži'iyaquè' uzu, reya'ala' yezi' bichinè' nigula quie ben' baguti tacuenda yezu xcuidi' yezi' lao ben' baguti.

²⁰ Na' ugunro guca gadyi bichiyaquè'. Na' ben' nëro uzi'nè' nigula quienè'. Pero ni tu ži'iyaquè' biuzu gutinè'. ²¹ Na' biži ben' urupe bezi'nè' nigula quie ben' bichinè', ben' baguti. Lëzi gutirènè', nunu ži'iyaquè' uzurè. Na' biži ben' uyune bezi'rènè' nigula quie ben' bichinè', ben' baguti. Lëzirè gutirènè' nunu ži'iyaquè' uzurè. ²² Cana' guca quie lao gadyityaquè', yaca ben' uzulè nigula. Gabeyudyicala quie nigula gutirènè'. ²³ Na'ra chi tali na' yeban yaca ben' huati, ¿ca nurlayaquè' naca žgulayaquè' nigula na', como dan' lao gadyi bichiyaquè' uzulëyaquè' lëbè'?

²⁴ Na' bequèbi Jesús rëbinè' leyaquè':

—Lega nequixile como dan' binezile cabè' rnën lè'ë guichi la'iya quie Diuzi. Lëscan' binezile cabè' naca yela' huaca quie Diuzi. ²⁵ Cati babeban yaca ben' baguti, na' bira sulëyaquè' laguediyi'yaquè' ca žgulayaquè', ca xquiuyaquè'. Gaca quieyaquè' ca quie yaca ángel quie Diuzi, ben' yu'uyaca guibá. ²⁶ Pero quie ben' baguti yeban, ¿binelabale lè'ë guichi la'iya quie Diuzi cabè' gudyi Diuzi Moisés dza na' caora uzè Moisés gan' re' yaga ra'ala' gui' birená? Lëgan' na' una Diuzi rëbinè' Moisés: “Naca' Diuzi quie xuzixta'olo' Abraham, len quie xuzixta'olo' Isaac, len quie xuzixta'olo' Jacob.” ²⁷ Cana' una Diuzi gudyinè' leyaquè', ba'ala'cazi bagutiyaquè' azio zè iza caora. Lena' rulu'en rlè'ë Diuzi leyaquè' ca ben' neneban, quele ca ben' baguti. Tana' lena' lega nequixile.

Una Jesús quie tu mandamiento r nabè'ra

(Mt. 22.34-40)

²⁸ Na'ra bdyinrè tu ben' rusèdi ley quie Moisés. Dyè'èdi babenè' cabè' di'idza' bequèbi Jesús yaca benè'. Na' como nezinè' dyè'èdi requèbi Jesús bi pregunta rnaba yaca benè', unè' rëbinè' lëbè':

—¿Ca nurla mandamiento r nabè'ran ra'o hue quiero len?

²⁹ Na' una Jesús rëbinè' lëbè':

—Cani naca mandamiento r nabè'ran ra'o: “Ulezëcara nagale, le'e ben' Israel. Tuzi Diuzi quiero zu, ganura Diuzi tula zu. ³⁰ Reya'ala' idyè'ëro Diuzi quiero du guicho du la'adyi'ro.” Lena' naca mandamiento r nabè'ran ra'o.

³¹ Lëscan' derè itu mandamiento nacan belao reya'ala' hue quiero. Cani

rnën: “Reya'ala' idyë'ëro laguedyiro cabë' nedyë'ëro cuinro.” Tuzi len naca mandamiento r nabë'ra quiero, hue quiero len.

³² Na'ra una ben' rusëdi ley quie Moisés rëbinë' Jesús:

—Tahuen gula na' cabë' unao', Maestro. Nacan tali unao' tuzi Diuzi zu, ganura Diuzi tula zu. ³³ Lëscan' zaca'ran lao Diuzi idyë'ëronë' du guicho du la'adyi'ro, lëscan' idyë'ëro laguedyiro ca nedyë'ëro cuinro. Lena' zaca'ran lao Diuzi quele ca yaca bia rutiro ruzeiro ru'aba ta hue'roba' Diuzi.

³⁴ Na'ra caora be Jesús cabë' di'idza' dya'a una ben' na', na' unë' rëbinë' lëbë':

—Ilë'ëti'zi nerdzioguelo' gaco' ben' tzu'u guibá ga r nabë' Diuzi.

Na'ra nitu yaca ben' nita' na' beyažoyaquë' inabayaquë' lëbë' di'idza' mazara.

Naca ben' Cristo Señor quie rey David

(Mt. 22.41-46; Lc. 20.41-44)

³⁵ Na'ra rusëdi Jesús yaca ben' bdupa lu'u idao' r nabë'ra, unë' rëbinë' leyaquë':

—¿Ca bizi ina yaca ben' rusëdi ley quie Moisés, como nayaquë' naca Cristo ži'isuba rey David? ³⁶ Porque cuin rey David, du yu'unë' Bichi Be quie Diuzi, unë' cani:

Una Diuzi rëbinë' ben' naca Señor quia': “Ure' cuëta' zaquë' yebë niga hasta idyin dza cuëcha' xni'alo' yaca ben' rudie luë'.”

³⁷ Quie lena' rnaba' le'e, ¿cómo naca Cristo ži'isuba rey David, chi cuin rey David unë' naca Cristo Señor quienë'?

Bizi lega redaohue yaca benë' can' una Jesús.

Udao Jesús xquia yaca ben' rusëdi ley quie Moisés

(Mt. 23.1-36; Lc. 11.37-54; 20.45-47)

³⁸ Na'ra ca rusëdi Jesús yaca benë', unë' rëbinë' leyaquë':

—Gapale cuidado bihuele ca rue yaca ben' rusëdi ley quie Moisés. Lega rexeyaquë' la'ari' naca tona. Lega rexeyaquë' gapala' naca benë' leyaquë' ga rdayaquë' tu neza. ³⁹ Lega rexeyaquë' cue'yaquë' ga rbe' ben' bala'ana chi lu'u idao' sinagoga, chi ga raca lani. ⁴⁰ Zidza rulidzayaquë' Diuzi cuenda ilë'ë yaca benë' leyaquë' ben' quie Diuzi, pero bë' rueziaquë' dan' regulola'adyi'yaquë' bi hueyaquë' ta cubayaquë' ta de quie yaca nigula baguti xquiuhue. Quie lena' huera Diuzi leyaquë' tu castigo huala gula.

Una Jesús quie tu nigula guti xquiuhue bdze'në' gun quie idao'

(Lc. 21.1-4)

⁴¹ Na' guca tu dza zë Jesús lu'u idao' r nabë'ra blë'ënë' rudze' yaca benë' dumi quieyaquë' lu'u caja ga yu'un gun quie idao'. Blë'ënë' rudze' zë ben' uña'a yalao dumi lu'u caja na'. ⁴² Lëscan' blë'ënë' bdze' tu nigula guti xquiuhue chopa dumi dao' lasi de cobre ta zaca'n ledao'zi lu'u caja na'.

⁴³ Na'ra guzi Jesús yaca ben' quië', unë' gudyinë' leyaquë':

—Tali rnia' le'e, nigula na' naquë' ben' yëchi' gula, aguti xquiuhue', pero ca naca dumi bdze'në' lu'u caja, nacaran dumi že quele ca ta bdze' yaca ben' uña'a. ⁴⁴ Ta bega'nnan sobre quieyaquë' bdze'yaquë' lu'u caja na'. Pero lënigula ben' yëchi', bdze'në' ca tu dumi dao' dezi quienë' ta ra'onë' ta raonë'.

13

Una Jesús huabiagui' idao' r nabë'ra

(Mt. 24.1-2; Lc. 21.5-6)

¹ Na'ra cati bro Jesús lu'u idao' r nabë'ra, unë' tu ben' quienë' rëbinë' lëbë':

—¡Maestro, una' ca naca badan yo necua' besu, una' ca naca badan idao' rñabè'ra.

² Pero na' una Jesús rëbinè' lëbè':

—Bablè'èlo' ca re' idao' rñabè'ra niga nacan taže. Pero huadyin dza ni tu yo bira yega'nnan lao laguedyin, huabiagui' dužeten.

Ga ru'en di'idza' cabè' gaca cati baruen bago iyudyi dyilayu
(Mt. 24.3-28; Lc. 21.7-24; 17.22-24)

³ Na'ra uza'yaquè' zioyaquè' ga zu ya'a Olivos tzala' berobayu gan' re' idao' rñabè'ra. Biži na' caora ure' Jesús gan', bebiga' Pedro, len Santiago, len Juan, len Andrés, beroyaquè' tzala'la len Jesús unayaquè' rëbियाquè' lëbè':

⁴ —Re'enndo' inao' nêto' bata gaca can' unao'. ¿Cabizi' seña gata' cati baruen bago iyudyi yedyi layu?

⁵ Na' una Jesús rëbinè' leyaquè':

—Gapale cuidado tacuenda nunu si' le'e yè', ⁶ porque huida ben' zë inayaquè' nun quia' bidayaquè', inayaquè' nacayaquè' Cristo, pero yè' rzi'yaquè'.

⁷ Pero cati rele rna yaca benè' raca dila yaca yedyi len yaca yedyi tula, rnyaquè' ruen žudyi gaca dila mazara yedyi, biidzebile, porque re'en ca re'ena gacan can', pero nezura ta gaca tu bineyudyi yedyi layu. ⁸ Huadila yaca yedyi conlë yaca yedyi tula, huadila yaca gobierno conlë yaca gobierno tula. Gaca užu' ni'nila. Lëzi huata' ubin, huata' zëdi lao yedyi layu. Pero cala beyudyi na' ta yedzagalao yaca benè', dechan' uzulaozin na' cabè' ta yedzagalao'yaquè'.

⁹ Gapale cuidado porque usedyin yaca benè' le'e lao na'a yaca ben' rñabè', lëscan' huaguiaquè' le'e lu'u yaca idao' sinagoga. Usedyinyaquè' le'e lao yaca ben' naca gobernador, len lao yaca ben' naca rey ta uquëpiyaquè' le'e dan' naole hue quiele xti'idza'. Cana' huaguixogue'leyaquè' xti'idza' Diuzi tanun quia' nê'èdi'. ¹⁰ Zayeyudyi quie yedyi layu, huaguixogue' yaca benè' xti'idza' Diuzi duže yedyi layu. ¹¹ Lëscan' cati tzehua'ayaquè' le'e lao na'a yaca ben' rñabè', bidëbile quie biži dan' yëbilyaquè', ni siquiera bihuele pensari. Yëbilyaquè' ca di'idza' udze' Diuzi guichole lëhora na', porque quele le'e cuinle inële, dechan' Bichi Be quie Diuzi gunnè' ta yeyëbilyaquè'.

¹² Lëscan' usedyin benè' hasta bi' bichiyaquè' lao na'a yaca ben' rñabè' ta gutiyaquè' leyaquè'. Lëzi usedyin benè' ži'iyaquè' lao na'a ben' rñabè', hasta usedyin yaca xcuidi' xuzi žna'yaquè' cuenda guti yaca ben' rñabè' leyaquè'.

¹³ Huadie yaca ben' nita' lao yedyi layu le'e, dan' naole xneza'. Pero nu ben' nao nê'èdi' du guicho du la'adyi', ben' biusan nê'èdi' hasta dza gatië', huata' yela' neban quienë' tuzioli.

¹⁴ Bzu profeta Daniel di'idza' lë'ë guichi dza tiempote rguixogue'n quie ta naca bayatza gula, ta rudyiagui' benè'. (Reya'ala' tzioñe'e nu ben' rulaba di'idza' ni.) Caora ilë'ële badyian ga bireya'ala' cuian, na' racate baguin izuno yaca ben' nita' estado Judea tzioyaquè' ga zu ya'a. ¹⁵ Lëscan' lëdza na', chi nita' yaca benè' lali'a quie yu'u quieyaquè', bireya'ala' yeyu'uyaquè' lu'u yu'u ta si'yaquè' bi cosa quieyaquè', reya'ala' laižunoteyaquè'. ¹⁶ Lëzi chi nita' yaca benè' layela quieyaquè' rueyaquè' dyin, bireya'ala' yeyoyaquè' žan yu'u ta si'yaquè' ni žabayaquè', reya'ala' laižunoteyaquè'. ¹⁷ Gaca beyëchi' gula quie yaca nigula nu'a ži'ine len yaca nigula ruga'adyi ži'ine dza gaca can' rnia'. ¹⁸ Ulidzale Diuzi ta bigaca quiele ižunole biu' zaga. ¹⁹ Cana' rnia' como dan' baza' dza lega huala gula yedzagalao yaca benè'. Na' yedzagalao'yaquè' quie ca yaca los demás benè'. Desde ulëchi Diuzi dyilayu, bibedzagalao yaca benè' cabè' yedzagalao yaca ben' nita' dza yeyudyi yedu

quie yedyi layu. ²⁰ Chi bihue Diuzi uchugunè' dza yedzagalaoyaquè', ni tuyaquè' bisueyaquè', huabiagui' yuguluyaquè'. Pero huachugu Diuzi dza na' nun quie nedyè'èné' yaca ben' quienè', ben' ulioguè' gaca ben' quienè'.

²¹ 'Chi ina yaca benè' rèbiyaquè' le'e: "Ulena'cara, ni zu Cristo", o "Ulena'cara, na' zu Cristo", bigalele quieyaquè'. ²² Huida yaca ben' huizi' yè' inayaquè' nacayaquè' Cristo, inayaquè' nacayaquè' ben' rguixogue' xti'idza' Diuzi. Hueyaquè' milagro, hueyaquè' seña tacuenda si'yaquè' yè' hasta yaca ben' ulio Diuzi. ²³ Pero le'e, ulehue listo. Lena' baonia' le'e ca ta binegaca quiele cuenda inezile sule listo.

Cabè' gaca bè' yeguida Jesús, ben' naca bichi yugulu benè'

(Mt. 24.29-35, 42-44; Lc. 21. 25-36)

²⁴ 'Pero lèdza na', cati beyudyi bedzagalaotzegue yaca benè', huechula obidza bira gata' xni' quie te dza, lèscan' huechula biu' bira gata' xni' biu'. ²⁵ Lèscan' huaguinu yaca beló dyian guibá. Huazisi yugulu ta dyia guibá huaguinun. ²⁶ Na'ra hualè'è yaca benè' nè'èdi', bichi yugulu benè'. Hualè'èyaquè' yeguida' lao beo zè ladza, zeyu'a yela' huaca quia'. ²⁷ Na' ise'ela' yaca ángel quia' ta tzetupayaquè' yaca ben' quia', yaca ben' ulioga', la'acazi nita'yaquè' zitu' lao yedyi layu, la'acazi nita'yaquè' zitu' guibá —Cana' una Jesús.

²⁸ Lèscan' una Jesús rèbinè' leyaquè':

—Ulehue pensari cabè' naca quie yaga higo. Caora badyia benue len la'aga' cubi quien, banezile baza' biu' yo. ²⁹ Lèscan' caora rlè'èle baraca lao yedyi layu cabè' rnía' le'e niga, huanezile baza' bago dza yeyudyi dyilayu, ilè'èti'zi rdziogue. ³⁰ Tali rnía' le'e, tu bineya zi'i suba ben' nita' na'a bè' gaca cabè' baonia' le'e. ³¹ Huade quie ta dyia guibá len lao yedyi layu cana'zi, pero ca naca di'idza' rnía', biten cana'zi. Decazide gacan.

³² 'Pero ca bi hora, ca bi dza yeguida' tatula, nitu nunu nezi. Binezi yaca ángel zu guibá, binezi ni siquiera nè'èdi', zi'i Diuzi. Tuzi Xuza' Diuzi nezinè' bè' gaca yeguida' tatula.

³³ 'Quie lena' ulesu listo, gapale cuidado, uleulidza Diuzi yugu dza como dan' binezile bè' yeguida' lao yedyi layu. ³⁴ Banaca quia' ca quie tu ben' uza' zio zitu'. Caora binetzionè', rca'nnè' mozo quiè' zan yu'u quiè' ta gapayaquè' ta de quienè', bè'nè' bi dyin hueyaquè'. Lèscan' pca'nnè' tu mozo ta sé' cuèta ru'a yu'u ta cuezè' bè' yela'nè'. ³⁵ Ulesu listo como dan' binezile bè' yeguida' tatula. Binezile chi yeguida' zadzè', chi yeguida' du gatzo yela, chi yeguida' cati rbedyi biu, chi yeguida' du zila. ³⁶ Gapale cuidado ta sule puesto caora yeguida'. ³⁷ Ca ta rnía' le'e, lèscan' rnèria' yugulu benè': Ulesu listo.

14

Beguilola'adyi'yaquè' bi hueyaquè' ta gutiyaquè' Jesús

(Mt. 26.1-5; Lc. 22.1-2; Jn. 11.45-53)

¹ Na'ra ichopa dza gala' lani pascua cati gaoyaquè' yèta xtila binequixi levadura. Na' beguilola'adyi' yaca xan' pxuzi len yaca ben' rusèdi ley quie Moisés bi hueyaquè' ta guxuyaquè' Jesús balarazi gutiyaquè' lèbè'. ² Na' unayaquè' rèbiyaquè' laguediyayaquè':

—Biguxuro Jesús tu raca lani cuenda na' biidza' yaca ben' yedyi bitilè'yaquè' ra'o.

Bdze' tu nigula aceite rla' zixi zeo guicho Jesús

(Mt. 26.6-13; Jn. 12.1-8)

³ Na'ra caora bedyin Jesús lēnē' yaca ben' quiē' yedyi Betania, na' uyu'unē' lidy tu ben' lao Simón, ben' yu'u yela' hue' ca pindo. Biži caora bare'yaquē' lao mesa gaoyaquē', bdyin tu nigula nu'ē frasco de yo laona alabastro. Lu'u frasco na' nedza'n tubelaozi aceite rla' žixi zeo laonan nardo. Na' aceite na' ruhueyaquē'n dyin rla'oyaquē'n yaca ben' huati. Na' ula' nigula frasco na' blatoguē' aceite guicho Jesús. ⁴ Na' bala ben' re' na' bdza'yaquē' unayaquē' rēbiyaquē' laguedyiaquē':

—¿Bixquien' bedito nigula ni aceite? ⁵ Mejorla chi bēti'nē'n como dan' zaca'n tzona gayuhua dumi denario tacuenda si'nē' dumi hue'nē'n yaca ben' yēchi'.

Na' udilayaquē' nigula na'.

⁶ Pero na' una Jesús rēbinē' leyaquē':

—Ulesan quie nigula. ¿Bixquien' ruelēlenē' zēdi? Tadya'a gula babēnē' quia'.

⁷ Nita'cazi yaca ben' yēchi' conlē le'e yugu dza. Con batatezi re'enle, huaca gacalēle leyaquē'. Pero nē'ēdi' bisua' len le'e tuzioli. ⁸ Ca ta huaca hue nigula ni, cana' bēnē' quia'. Badyialaonē' blatoguē' aceite rla' žixi zeo cuerpo quia' quie dza gatia' igacha'. ⁹ Tali rnīa' le'e, con gatatezi rguixogue' yaca benē' xti'idza' Diuzi duže yedyi layu, huanēyaquē' cabē' bē nigula ni para nē'ēdi', cana' yeza'la'adyi' yaca benē' cabē' bēnē' quia'.

Bega'nlē Judas di'idza' lenyaca xan' pxuzi ta usedyinnē' Jesús lao na'ayaquē' (Mt. 26.14-16; Lc. 22. 3-6)

¹⁰ Na'ra uyo Judas Iscariote yegue'lēnē' yaca xan' pxuzi di'idza' cuenda yega'nlēnē' leyaquē' di'idza' ta usedyinnē' Jesús lao na'ayaquē'. Na' naca Judas ben' quie Jesús entre chipchopa ben' naca ben' quienē'. ¹¹ Na' lega bedaohue yaca xan' pxuzi cabē' gudyi Judas leyaquē'. Bega'nlēyaquē' lēbē' di'idza' ta hue'yaquē' lēbē' dumi. Na'ra uzulao Judas beguilola'adyi'nē' bi huenē' usedyinnē' Jesús lao na'a yaca xan' pxuzi.

Udaoyaquē' rtze' quie lani pascua

(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Biži dza nēro quie lani pascua udaoyaquē' yēta xtila binequixi levadura, bētiyaquē' tu beco' ži'ila' ta beza'la'adyi'yaquē' ca guca quie xuzixta'oyaquē' dza uza'yaquē' nación Egipto. Lēdza na' una yaca ben' quie Jesús rēbiyaquē' lēbē':

—¿Gaži re'enlo' tziondo' tzaquendo' ta gaoro rtze' quie lani pascua?

¹³ Na'ra use'ela' Jesús chopa ben' quienē' gudyinē' leyaquē':

—Uleyo ciudad Jerusalén. Bē' baidyinle hualē'ēle tu be'mbyu zeyu'a tu re'e yudzon nisa. Lēben' na' reya'ala' inaole. ¹⁴ Catī babeyu'unē' lu'u yu'u, reya'ala' yēbile xan' yu'u ga beyu'unē': “Cani una Maestro: ¿Gaži zu lu'u cuarto ga gaolēnē' yaca ben' quiē' rtze' quie lani pascua?” ¹⁵ Na'ra hualu'e xan' yu'u le'e tu lu'u cuarto naca chopa xcuia. Lēgan' na' tzaquēle ta gaoro.

¹⁶ Na' uza' chopa ben' quie Jesús zioyaquē' ciudad Jerusalén. Caora bedyinyaquē' guca quieyaquē' laga ca gudyi Jesús leyaquē' gaca. Na' tu lu'u cuarto na' bēyaquē' ta gaoyaquē' rtze' quie lani pascua.

¹⁷ Caora bagula, bedyin Jesús lēnē' yaca ben' quiē' gan' gaoyaquē'. ¹⁸ Na' cati baore'yaquē' ta gaoyaquē', una Jesús rēbinē' yaca ben' quiē':

—Tali rnīa' le'e, ladoro ni re' tu ben' raolēro tuže, ben' usedyin nē'ēdi' lao na'a yaca ben' rnabē'.

¹⁹ Biži uzulao raqueyēchi'yaquē' uzulaoyaquē' rnabayaquē' tu huioyaquē' lēbē':

—¿Quele nē'ēdi' hua' cabē' nao' na'?

²⁰ Na' una Jesús rëbinë' leyaquë':

—Entre lao chipchopale niga, huario tu ben' laguedyiro hue can' rnia'. Tzaže rudylënë' në'ëdi' yëta xtila lu'u plato niga. ²¹ Pues cani gaca quia' në'ëdi', bichi yugulu benë', decazide gaca quia' cabë' na lë'ë guichi la'ia quie Diuzi. Pero bayëchi' gula gaca quie ben' usedyin në'ëdi' lao na'a ben' r nabë'. Nacaran dya'a quienë' chi bigolocalanë'.

²² Tu neraoyaquë' rtze', uzi' Jesús tu yëta xtila, bëla'ianë'n bzužunë'n udisinë'n bë'në'n yaca ben' quië'. Na' unë' gudyinë' leyaquë':

—Ulegaona. Naca yëta xtila niga ca quie cuerpo quia'.

²³ Lëzi uzi' Jesús tu vaso nisa bedzuli'. Beyudyi bëla'ianë'n, bë'në'n yaca ben' quië' tu huioyaquë' lao yuguluyaquë'. ²⁴ Na'ra una Jesús rëbinë' leyaquë':

—Naca nisa bedzuli' ni ca quie ren quia'. Lena' ilatoga' gatia' cuenda yega'ntza'olë Diuzi le'e tacubila. Lena' ilatoga' cuenda gata' yela' huezi'ze quie ben' zë lao Diuzi. ²⁵ Tali rnia' le'e, bira yo'oga' vino nisa bedzuli' tatula. Hasta idyin dza zulële në'ëdi' ga r nabë' Diuzi, na'tera yo'oga' tacubi tatula.

Unë Jesús cabë' hue Pedro huananë' binubë'në' lëbë'

(Mt. 26.30-35; Lc. 22.31-34; Jn. 13.36-38)

²⁶ Ude beyudyi bilayaquë' tu alabanza, na' uza'yaquë' zioyaquë' ga zu ya'a Olivos. ²⁷ Na'ra una Jesús rëbinë' leyaquë':

—Yugulule usanla'adyi'le në'ëdi' na'ayela. Cabë' rnën lë'ë guichi la'ia quie Diuzi cani: “Hua' mandado gati ben' naca xa'n ži'ila', na' yedzatza yaca beco' ži'ila' quienë'.”

²⁸ Pero cati bagutia' bebana', na'ra huabialaohua' laole tu neza Galilea.

²⁹ Na' una Pedro rëbinë' lëbë':

—Ba'ala'cazi usanla'adyi' yugulu benë' le'e, pero në'ëdi' biusanla'adya' luë'.

³⁰ Na' una Jesús rëbinë' Pedro:

—Tali rnia' luë'. Na'ayela, cati zacuedyi biu chopa lasa, huëbo' yaca benë' binubë'lo' në'ëdi' tzona lasa.

³¹ Biži unë Pedro du guicho du la'adyi'në' rëbinë' Jesús:

—Ba'ala'cazi re'ennan gatilia' luë' tuže, pero biyëpa' yaca benë' binubë'da' luë'.

Na' lëscan' cana' una yaca los demás ben' quië' con ca beyaquë' gudyi Pedro Jesús.

Bë'lë Jesús Diuzi di'idza' ga lao Getsemaní

(Mt. 26.36-46; Lc. 22.39-46)

³² Na' uza'yaquë' zioyaquë' bdyinyaquë' tu ga lao Getsemaní. Na' una Jesús rëbinë' leyaquë':

—Ulecueza ni. Huaya'a ta hue'lia' Diuzi di'idza'.

³³ Biži uquië'në' Pedro, len Santiago, len Juan, uza'yaquë' ilë'ëti'. Caora bdyinyaquë' na', lega uzulaon rutëbin lëbë', lega gucayëchi'tzeguenë'.

³⁴ Lena' una Jesús rëbinë' leyaquë':

—Lega raqueda' bayëchi'. Baruen gutin në'ëdi'. Ulecueza në'ëdi' niga. Bigasile.

³⁵ Na'ra udenë' ilë'ëti' gan' nita' yuna ben' quië', gutanë' ruzu ru'ala layu, blidzë' Diuzi chi bisaque' ucachi' ucui'o Diuzi ca tazëdi gula za' gaca quië'.

³⁶ Na' blidzë' Diuzi unë':

—Xuza' Diuzi, huaco' huelo' yugulute. Ucachi' ucui'olo' ca tazëdi gula za' gaca quia'. Pero bihuelo' cabë' re'enda' në'ëdi', huelo' cabë' re'encazo' gaca.

³⁷ Na'ra uyasa Jesús beza'nè' bedyinnè' gan' de yuna ben' quiè', blè'ënè' barasiyaquè'. Na' una Jesús rëbinè' Pedro:

—Simón, ¿barasio'? ¿Quele biuzuelo' ina'huialo' ni tu hora? ³⁸ Bigasile. Ruen zi ulidzale Diuzi tacuenda bihue taxi'ibi' le'e gan huele xquia ca tazèdi gula baza' quiele. Tali re'enle huelèle nè'èdi' tuze, pero nerdzioguele fuerza ta huele cabè' re'enle.

³⁹ Na'ra zio Jesús tatula gan' baoyoguè', na' blidzè' Diuzi tatula unè' gudyinè' lèbè' ca di'idza' unè' tanèro. ⁴⁰ Na' beza'nè' bedyinnè' tatula gan' de yuna ben' quiè'. Blè'ënè' nerasiyaquè' nun quie dan' yu'u bichi gula laojè'. Lena' bibequèbiyaquè' ca di'idza' gudyi Jesús leyaquè'. ⁴¹ Na' uza' Jesús zionè' tatula ta hue'lènè' Diuzi di'idza'. Caora bedyinnè' ta beyuna lasa gan' de yuna ben' quiè', unè' rëbinè' leyaquè':

—Na'a sí, tahuencazi gasile yezila'adyi'le. Zelao tu cana'zi. Babdyin hora usedyinyaquè' nè'èdi', ben' naca bichi yugulu benè', lao na'a yaca ben' de dula' xquia quie. ⁴² Ulechasa, tziuro. Baza' ben' usedyin nè'èdi' lao na'ayaquè'.

Bëxuyaquè' Jesús bëyaquè' lèbè' preso
(Mt. 26.47-56; Lc. 22.47-53; Jn. 18.2-11)

⁴³ Bizi bineyudyi ina Jesús cana', caora labdyinte Judas, ben' naca ben' quie Jesús lado chipchopa ben' quienè'. Na' bdyinlènè' ben' zè, ben' use'ela' yaca xan' pxuzi, len yaca ben' rusèdi ley quie Moisés, len los demás yaca ben' r nabè'. Nu'ayaquè' macheta len yaga. ⁴⁴ Na' bega'nè' Judas leyaquè' di'idza' huenè' seña ta ulu'enè' leyaquè' nu ben' naca Jesús. Lena' unè' gudyinè' leyaquè':

—Nu ben' gaohua' xague psitu, lèben' na' naca Jesús. Laguxutelenè' iquyè'lenè' dyè'èdi'.

⁴⁵ Na' ca bdyinnè' gan' zè Jesús bebiga'nè' unè' rëbinè' lèbè':

—Maestro, Maestro.

Na'ra udaohuè' psitu xaguè'. ⁴⁶ Caora na' bëxuyaquè' Jesús bëyaquè' lèbè' preso.

⁴⁷ Bizi ulio tu ben' quie Jesús macheta quienè' udinè'n uchugunè' naga criado quie ben' r nabè'ra quie yaca xan' pxuzi. ⁴⁸ Na'ra una Jesús rëbinè' yaca ben' nita' na':

—¿Barza'le nu'ale macheta, nu'ale yaga ta guxule nè'èdi' huele nè'èdi' preso ca quie ta guxule huele preso tu ben' uban? ⁴⁹ Yugu dza zulia' le'e lu'u idao' r nabè'ra psèdia' yaca benè', pero bibèxule nè'èdi' caora na'. Pero re'en ca re'ena uzun xti'idza' Diuzi ca rnèn lè'è guichi la'iya quie Diuzi.

⁵⁰ Na'ra yaca ben' quie Jesús psanla'adyi'yaquè' lèbè', bzunoyaquè'.

Bzuno tu ben' ru'abe du guidinè'

⁵¹ Bizi bdyin tu bi'byu gan'. Na' nadubinè' tu la'ari' yua' naonè' Jesús. Bizi na' bëxuyaquè' lèbè', ⁵² pero udubanè' la'ari' yua' nadubinè', bzunonè' dú guidinè'.

Zè Jesús lao yaca ben' r nabè'
(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Na'ra uquè'yaquè' Jesús ga re' ben' naca xan' pxuzi r nabè'ra. Na' begu'udi' yaca xan' pxuzi, len yaca ben' r nabè', len yaca ben' rusèdi ley quie Moisés. ⁵⁴ Bizi unao Pedro Jesús zitu'la. Bdyinnè' lali'a yu'u quie ben' naca xan' pxuzi r nabè'ra. Na' ure'nè' ru'a gui' len yaca policía ta yedze'enè'.

55 Na'ra yaca xan' pxuzi len yaca los demás ben' rnabë', beguilola'adyi'yaquë' ta gaoyaquë' Jesús xquia cuenda gata' causa guti'yaquë' lëbë', pero biuzaque'yaquë'. 56 Balayaquë' unëyaquë' di'idza' falso conlë Jesús, pero biunëyaquë' tuzi ca inëyaquë'. 57 Na' uzuli ibalayaquë' unëryaquë' di'idza' falso conlë lëbë' rëbiyaquë' laguedi'yaquë':

58 —Nëto' bendo' unë' udyiagui'në' idao' rnabë'ra quie xuzixta'oro, unë' cati gaca lao tzona dza, yeyuenë' idao' rnabë'ra tula, ta bibë yaca benë'.

59 Pero nica ca unayaquë' quie idao' rnabë'ra, biuyu'urë xnezi ca unayaquë'.

60 Na'ra uzuli ben' naca xan' pxuzi rnabë'ra unë' rëbinë' Jesús:

—¿Bixquien' birequëbo'? ¿Bi ca nao' quie di'idza' rnëyaquë' conlë luë'?

61 Pero uzë Jesús chizi, bibequëbinë'. Tatula una ben' naca xan' pxuzi rnabë'ra rëbinë' Jesús:

—¿Naco' ben' Cristo, zi'i Diuzi la'iya?

62 Na' una Jesús rëbinë' lëbë':

—Në'ëdi' ze. Lëscan' hualë'ële në'ëdi', ben' naca bichi yugulu benë', cati bari'a zaquë' yebë cuëta lë'ë Diuzi, ben' de yela' huaca quie. Lëscan' hualë'ële në'ëdi' cati yeguida' lao yedyi layu tu lao beo zë ladza.

63 Na'ra nun quie dan' lega bdza' ben' naca xan' pxuzi rnabë'ra, pchezë' zabë' unë' rëbinë' yaca ben' nita' na':

—¿Cabizira testigo re'ennan inë conlë ben' niga? 64 Babelë unë' di'idza' ta inaya'në' Diuzi. ¿Bizi huero quienë'?

Na' unayaquë' yuguluyaquë' de que reya'ala' gatinë'.

65 Na'ra uzulaoyaquë' bda'yaquë' lëbë' zen', pcachi'yaquë' laohuë' udyibiyaquë' lëbë' begoro, unayaquë' gudyi'yaquë' lëbë':

—¡Una nuzi udyibi luë' begoro!

Lëscan' udyibirë yaca policía lëbë' begoro.

Una Pedro binubë'në' Jesús

(Mt. 26.69-75; Lc. 22.56-62; Jn. 18.15-18, 25-27)

66 Ga zë Pedro lali'a bdyin tu criada quie ben' naca xan' pxuzi rnabë'ra.

67 Bizi caora blë'ë bi' criada re' Pedro redzë'ënë' cuëta gui', na' una'bi' lëbë' dyë'ëdi unabì':

—Lëzi luë' naco' ben' quie Jesús, ben' yedyi Nazaret.

68 Na' una Pedro gudyinë' lëbi':

—Binubi'a ben' na', nica nezda' bi inao'.

Na' beronë' zënë' cuëta ru'a yu'u. Caora na' uredyi biu tu. 69 Bizi tatula una' bi' criada Pedro unëbi' rëbibi' yaca ben' nita' na':

—Naca ben' ni tuze len leyaquë'.

70 Pero tatula unë Pedro binubë'në' Jesús. Na' guca itu chi' cati una yaca ben' nita' na' gudyi'yaquë' Pedro:

—Talicazi naco' tuze len leyaquë', como dan' naco' ben' Galilea rnëlo' ca rnë ben' Galilea.

71 Na' una Pedro bdze'de'në' cuinnë' bguntenë' Diuzi gudyinë' leyaquë':

—Binubi'a nu ben' nale cana'.

72 Caora na' laoredyite biu taorupe. Na'ra beza'la'adyi' Pedro cabë' gudyi Jesús lëbë' unë': “Ca zacuedyi biu chopa lasa, huëbo' yaca benë' binubë'lo' në'ëdi' tzona lasa.” Caora na' beyuenë' pensari cabë' una Jesús, na' uredyinë'.

15

Zë Jesús lao Pilato

(Mt. 27.1-2, 11-14; Lc. 23.1-5; Jn. 18.28-38)

¹ Caora baoyani' dza tula, bedupa yaca xan' pxuzi, len yaca ben' gula, len yaca ben' rusëdi ley quie Moisés, len yaca los demás ben' rnabë', bëyaquë' junta. Pquioyaquë' Jesús uquië'yaquë' psedyinyaquë' lëbë' lao na'a Pilato.

² Na' unaba Pilato rëbinë' Jesús:

—¿Tabala naco' rey quie ben' Israel?

Na'ra bequëbi Jesús rëbinë' Pilato:

—Ca unao', cana' naca' quia'.

³ Biži na' udao yaca xan' pxuzi Jesús xquia že. ⁴ Lena' una Pilato rëbinë' Jesús:

—¿Bixquien' birequëbo'? Huala rao yaca ben' niga luë' xquia.

⁵ Pero bega'n Jesús chizi, bibequëbinë'. Quie lena' biubin Pilato bi pensari huenë' quie Jesús.

Pchugubë'yaquë' gati Jesús

(Mt. 27.15-31; Lc. 23.13-25; Jn. 18.38-19.16)

⁶ Na' de tu costumbre quie Pilato yebionë' tu ben' preso yu'u lu'u dyiguiba tu raca lani pascua. Na' yebio Pilato nutezi ben' re'en yaca benë' yero. ⁷ Na'ra lu'u dyiguiba yu'u yaca ben' bëti benë', ben' udilalë gobierno. Na' yu'urë tu ben' lao Barrabás lu'u dyiguiba, ben' nuelë leyaquë' tuže. ⁸ Na' bdyin yaca benë' ga zë Pilato unabayaquë' chi biyebionë' tu ben' yu'u lu'u dyiguiba según ca naca costumbre. ⁹ Cana' una Pilato rëbinë' leyaquë':

—¿Re'enle yebioga' ben' na naquë' rey quie ben' Israel?

¹⁰ Cana' una Pilato, porque gucabë'në' yela' žë' quie yaca xan' pxuzi psedyinyaquë' Jesús laohuë'. ¹¹ Na' bega'n yaca xan' pxuzi di'idza' ta yëbiyaquë' yaca benë' ta inabayaquë' yebio Pilato Barrabás. ¹² Na' una Pilato rëbinë' yaca ben' nita' na':

—¿Biži re'enle hua' quie ben' na naquë' rey quie ben' Israel?

¹³ Na' urediya'yaquë' bequëbiyaquë':

—¡Uda'lo'në' lë'ë yaga cruzo!

¹⁴ Biži na' una Pilato gudyinë' leyaquë':

—¿Biži xquia bënë'?

Pero tatula urediya'yaquë':

—Uda'lo'në' lë'ë yaga cruzo.

¹⁵ Na'ra como bigu'un Pilato idza' yaca benë' lëbë', bzuë' di'idza' bebioguë' Barrabás lu'u dyiguiba. Lëscan' bënë' mandado qui yaca soldado Jesús guidi, na'tera uda'yaquë' lëbë' lë'ë yaga cruzo gatinë'.

¹⁶ Biži uquië' yaca soldado Jesús zioyaquë' bdyinyaquë' lali'a quie palacio (di'idza' quieyaquë' laona pretorio). Na' gužiyaquë' yaca los demás ben' naca soldado laguediyaquë'. ¹⁷ Caora na' bgacoyaquë' Jesús tu la'ari' morado, bdze'yaquë' tu coron yëchi' guichonë'. ¹⁸ Lëscan' urediya'yaquë' ptituyaquë' lëbë' unayaquë':

—¡Viva rey quie ben' Israel!

¹⁹ Caora na' udiyaquë' yaga guichonë', bda'yaquë' žen' laohuë', ptituyaquë' uditzu žibiyaquë' bëyaquë' ca quie ben' rapala'n lëbë'. ²⁰ Beyudyi ptituyaquë' lëbë', na' belëchoyaquë' la'ari' morado, begacoyaquë' lëbë' žabë', uquië'yaquë' lëbë' ta uda'yaquë' lëbë' lë'ë yaga cruzo gatinë'.

Bda'yaquë' Jesús lë'ë yaga cruzo

(Mt. 27.32-44; Lc. 23.26-43; Jn. 19.17-27)

²¹ Na' du tu neza gan' zioyaquë', bedzagayaquë' tu ben' yedyi Cirene laohuë' Simón, ben' xuzi Alejandro len Rufo. Bezë'ë layela ga uyoguë'. Na'ra bë yaca soldado mandado bi'anë' yaga cruzo nu'a Jesús.

²² Na' zioyaquë' bdyinyaquë' ga laona Gólgota (ta inaro xti'idza'ro: Ya'a chita guicho ben' huati). ²³ Bi'zi bë'yaquë' lëbë' vino nequixi tasla' gula laona mirra, pero bigu'unnë' yo'onë'n. ²⁴ Na'ra bda' yaca soldado lëbë' lë'ë yaga cruzo. Te beyudyi na', bëyaquë' sorteo ca nu xla'zoayaquë' gaca quieyaquë' zaba Jesús.

²⁵ Baruen las nueve te dza cati bda'yaquë' Jesús lë'ë yaga cruzo. ²⁶ Na' guicho cruzo bdyiayaquë' tu letrero ga rguixogue'n bi causa de quienë' dan' bëtiyaquë' lëbë'. Lë'ë letrero rnën caniga: "Rey quie ben' Israel." ²⁷ Lë'zi bda'rëyaquë' chopa ben' uban lë'ë yaga cruzo. Bzuyaquë' tun zaquë' yebë cuëta Jesús, itun bzuyaquë' zaquë' yega'la. ²⁸ Cana' guca quienë' bzun di'idza' ca rnën lë'ë guichi la'ia quie Diuzi cani: "Pscayaquë' lëbë' ca ben' mala."

²⁹ Na'ra ptasi bnio yaca ben' rede gan' neda' Jesús lë'ë yaga cruzo. Uredyiya'yaquë' tu rtulazi guichoyaquë' unayaquë' rëbiyaquë' Jesús:

—Luë' nao' huadyiagui'lo' idao' rnabë'ra, na'tera yecubo'n gaca lao tzona dza, ³⁰ psela cuinlo', beyëzi lë'ë yaga cruzo.

³¹ Lëscan' ptitu yaca xan' pxuzi len yaca ben' rusëdi ley quie Moisés lëbë', unayaquë' gudyiayaquë' laguedyiyaquë':

—Pselanë' ben' tula, na' bigaquë' uselanë' cuinnë'. ³² Chi Cristo luë', chi rey quie ben' Israel luë', beyëzi lë'ë yaga cruzo ilë'ëndo', na'tera galendo' quio'.

Hasta ichopa yaca ben' neda'lë yaga cruzo cuëta lë'ë Jesús, ptasi bniorëyaquë' lëbë'.

Ca guca cati guti Jesús

(Mt. 27.45-56; Lc. 23.44-49; Jn. 19.28-30)

³³ Caora baga'ala' la'odza, bechula lao duze ciudad na' hasta reda tzona.

³⁴ Caora na' uredyiya' Jesús unë':

—Eloi, Eloi, ¿lama sabactani? —ta inaro xti'idza'ro: Xuza' Diuzi, Xuza' Diuzi, ¿bixquien' bapsanla'adyo' në'ëdi'?

³⁵ Na'ra una yaca ben' nita' bago rëbiyaquë' laguedyiyaquë':

—Ulezë nagale, rëzinë' Elías.

³⁶ Na' laziole tu ben' nita' na' yexi'në' tu ta naca yun' ca zi'ila' laona esponja. Na' bdze'në'n lu'u vino sla' bzunë'n lao yaga ta bdyinnan sibi ga da' Jesús ta supinë'n. Pero una bala yaca ben' nita' na':

—Psan quienë'. Ya' ina'ro chi guida Elías ta uchizanë' lëbë'.

³⁷ Na'ra uredyiya' Jesús gutinë'. ³⁸ Caora na', bre'eza la'ari' na'alan lu'u idao' rnabë'ra, gucan chopla la'a. ³⁹ Na' uzë xan' yaca soldado zaquë'lao lao Jesús. Caora blë'ënë' cabë' uredyiya' Jesús gutinë', unë' rëbinë' laguedyinë':

—Tali naca ben' ni zi'i Diuzi.

⁴⁰ Lë'zi lëgan' na' nita'rë yaca nigula rna'yaquë' Jesús zitu'la. Ladoyaquë' na' zu María Magdalena, len María Zna' Santiago bi' nëchi', len José, len Salomé.

⁴¹ Lëleyaquë' unaoyaquë' Jesús cati udanë' lao yaca yedyi nebaba Galilea gualëyaquë' lëbë'. Lë'zi nita'rë yaca nigula tula, ben' uyolënë' Jerusalén.

Pcachi'yaquë' Jesús

(Mt. 27.57-61; Lc. 23.50-56; Jn. 19.38-42)

⁴² Na' gula rdze' dza bëyaquë' ta gaoyaquë' quie dza huezila'adyi'. ⁴³ Bdyin tu ben' yedyi Arimatea laonë' José. Naquë' tu ben' rnabë' entre yaca ben' rnabë' quie ben' Israel. Rbezë' dza inabë' Diuzi lao duze yedyi layu. Na'

beyažoguë' uyoguë' ga zu Pilato yenabanë' chi bihue'në' lato tzechachi'në' cuerpo quie Jesús. ⁴⁴ Na' bebanzi Pilato lagutite Jesús. Na' gužë' ben' naca xan' soldado unabanë' lëbë' chi tali baguti Jesús. ⁴⁵ Caora gudyi xan' soldado Pilato tali na' baguti Jesús, na'ra bë'në' lato ta yeyu'a José cuerpo quie Jesús. ⁴⁶ Na' uyo José yegue'në' tu la'ari' ta yetupanë' cuerpo quie Jesús. Na' bezi'në' cuerpo quie Jesús betubinë'n la'ari', bdze'në'n lu'u tu beló yo ta uqui'n yaca benë' según ca naca costumbre quieyaquë'. Na' uži'në' tu yo ta'a, bda'në'n ru'a beló yo. ⁴⁷ Biži María Magdalena, len María žna' José, blë'ëyaquë' gan' bdžë' José cuerpo quie Jesús.

16

Ca guca cati beban Jesús

(Mt. 28.1-10; Lc. 24.1-12; Jn. 20.1-10)

¹ Caora baode dza saodo, dza huezila'adyi' quieyaquë', uyo María Magdalena, len María žna' Santiago, len Salomé ta ga'oyaquë' aceite rla' žixi žeo ta ula'oyaquë' cuerpo quie Jesús. ² Na' caora uyan' žila dao' dza domingo, dza nëro quieyaquë', uyoyaquë' gan' zu beló yo gan' de cuerpo quie Jesús. ³ Na' unayaquë':

—¿Nuži yëbiro ta cubayaquë' yo ta'a da' ru'a beló?

⁴ Cati bdyinyaquë' gan', blë'ëyaquë' bira da' yo ta'a ru'a beló yo. ⁵ Na' uyu'uyaquë' lu'u beló yo, blë'ëyaquë' tu ángel nacanë' ca tu forma bi'byu ru'abe. Re'në' zaquë' yebë lu'u beló yo, naconë' tu la'ari' bezëri. Na' lega bdzebiyaquë'. ⁶ Na'ra unë' ángel na' rëbinë' leyaquë':

—Bidzebile. Baza'le dena'le Jesús, ben' yedyi Nazaret, ben' guti lë'ë yaga cruzo. Bira denë' niga, babebannë'. Ulena'cara ga uidxoyaquë' cuerpo quienë'. ⁷ Uleyo uletzeguëdyi Pedro len yaca los demás yaca ben' quie Jesús de que huabialaohuë' laole neza Galilea. Hualë'ëlenë' gan' con ca rnia'.

⁸ Biži na' bero yaca nigula lu'u beló yo. Du rdzebiyaquë' du ržiziyaquë' uyu'uyaquë' be. Nitu nunu ben' bedilayaquë' tu neza bigudyiyaquë' cabë' blë'ëyaquë' como can' rdzebiyaquë'.

Ptilalao Jesús María Magdalena

(Jn. 20.11-18)

⁹ Biži beyudyi beban Jesús dza domingo, dza nëro quieyaquë', tanëro ptilalaohuë' María Magdalena, ben' bebio Jesús gadyi bichi be mala. ¹⁰ Na'ra uyo María tzetixogue'në' yaca ben' unao Jesús dza na'. Bega'nyaquë' guqueyëchi'yaquë' urediyaquë' nun quie dan' guti Jesús. ¹¹ Na' cati beyaquë' cabë' gudyi María leyaquë' de que beban Jesús, blë'ë María lëbë', biguleyaquë' quienë'.

Ptilalao Jesús chopa ben' nao xnezanë'

(Lc. 24.13-35)

¹² Te beyudyi na', betza' cuin Jesús yetilalaohuë' chopa ben' zio layela, ben' nao xnezë'. ¹³ Na' lëscan' uyoyaquë' yetixogue'yaquë' yaca los demás ben' nao xneza Jesús de que babebannë', den' biguleyaquë' quieyaquë'.

Use'ela' Jesús yaca ben' quië' ta tzetixogue'yaquë' xti'idza' Diuzi

(Mt. 28.16-20; Lc. 24.36-49; Jn. 20.19-23)

¹⁴ Te beyudyi na', ptilalao Jesús yaca chiptu ben' quienë' tu re'yaquë' lao mesa neraoyaquë'. Na'ra udilanë' leyaquë' nun quie yela' zidi quieyaquë'

biguleyaquë' quie ben' gudyi leyaquë' blë'ëyaquë' lëbë' bebannë'. ¹⁵ Na' una Jesús gudyinë' leyaquë':

—Uletzio lao duže yedyi layu tzetixogue'le yugulu benë' xti'idza' Diuzi. ¹⁶ Na' nu ben' gale quia', ben' nao xneza', ben' si' laohue, huazi' Diuzi lëbë' guibá. Pero nu ben' bigale quia', ben' binao xneza', huachugubë' Diuzi quienë' yeyonë' gui' gabila. ¹⁷ Cani naca seña hue yaca ben' inao xneza'. Du rzëtoyaquë' laohua' huebioyaquë' yaca bichi be mala yu'u yaca benë'. Huacayaquë' inayaquë' di'idza' quie ben' tula. ¹⁸ Chi guxuyaquë' bëla rgu'i'idyí', bibi hueba' quieyaquë'. Chí yo'oyaquë' tu ta naca veneno, bibi huena quieyaquë'. Chi ùda' na'ayaquë' yaca ben' raca žhue', hueyacayaquë'.

Beyëpi Jesús ladza zeyonë' guibá

(Lc. 24.50-53)

¹⁹ Bë' beyudyi unë Señor quiero Jesús cana', beyëpinë' ladza zeyonë' guibá ga re'në' zaquë' yebë quie Diuzi. ²⁰ Na' uza' yaca ben' quie Jesús ta quixogue'yaquë' xti'idza' Diuzi duže yedyi layu. Guçalë Señor quiero Jesús leyaquë', bënë' yela' huaca quienë' ta ulu'en xti'idza' Diuzi na' rguixogue'yaquë'. Amén.

DI'IDZA' LA'TYA BZU SAN LUCAS LÈ'È GUICHI

Ga rzulao di'idza'

¹ Yaca ben' zē babzuyaquē' di'idza' lē'ē guichi ta yu'u ni'a xnezi con ca guca quiendo' dza na'. ² Bzuyaquē' di'idza' lē'ē guichi ca ta una yaca ben' blē'ē cabē' guca desde dza zasu Jesús. Lēleyaquē' udixogue'rēyaquē' di'idza' la'iya quie Diuzi. ³ Lēscan' nē'ēdi' unaba'yudya' dyē'ēdi cabē' guca desde dza ga uzulaon quie Jesús. Lēlena' raqueda' tahuen na' hua' itu guichi ni ta ise'ela'n laolo' bicha' Teófilo. ⁴ Lēlena' rua' cuenda inezile dyē'ēdi nacan di'idza' li ca ta udixogue'yaquē' luē'.

Ga rguixogue' tu ángel cabē' gaca bē' su Juan bautista

⁵ Lēdza na' uzu rey Herodes r nabē'nē' estado Judea, zurē itu ben' naca pxuzi laonē' Zacarías. Naquē' tu cue' len yaca ben' nao pxuzi lao Abías. Naca nigula quie Zacarías zī'i suba Aarón, ben' gucarē pxuzi dza na'te. Lēbē' laohuē' Elisabet. ⁶ Blē'ē Diuzi leyaquē' ben' dya'a. Bzuyaquē' di'idza' ca rna ley yu'u di'idza' la'iya quie Diuzi. Lēlena' nunu saque' gao leyaquē' xquia. ⁷ Pero nunu zī'iyaquē' uzu, dan' guca Elisabet ben' bidyi. Lao rupayaquē' nacayaquē' ben' gula.

⁸ Bizi bdyin dza babedula' turno quie tu cue' pxuzi ben' nacalē Zacarías tzaže. Babedula' turno rioyaquē' lu'u idao' r nabē'ra, dan' nacayaquē' pxuzi ta huel'ēyaquē' Diuzi di'idza'. ⁹ Ca costumbre quie yaca pxuzi bedula' Zacarías uyu'uguē' lu'u idao' r nabē'ra ta udze'nē' dzen yalo lao becugo. ¹⁰ Bizi caora rei dzen yalo lao becugo, na'ra nita' yaca ben' zē lali'a r lidza-yaquē' Diuzi. ¹¹ Caora na' ptilalao tu ángel quie Diuzi bazēguē' zaquē' yebē lao becugo. ¹² Bizi caora blē'ē Zacarías tu ángel, tu bdzebizinē', bira ubinnē' bi nē'. ¹³ Na'ra una ángel rēbinē' Zacarías:

—Zacarías, bidzebo', babe Diuzi ca naca oración quio' r nalo'. Nigula quio' Elisabet hua' zī'inē' huazu zī'ilo' ixubo' laobi' Juan. ¹⁴ Lega yedaohuela'obi'. Lēscan' yedaohuerē yaca ben' zē cati bazubi'. ¹⁵ Cana' gaca quiele dan' huacabi' ben' ze, huacabi' ben' bala'ana lao Diuzi. Biyo'obi' vino, biyo'obi' ta xudyibi'. Huayu'ubi' Bichi Be que Diuzi desde yu'utebi' lu'u lē'ē zna'bi'. ¹⁶ Huacalēbi' yaca ben' zē, ben' Israel, ta yetza'yaquē' pensari quieyaquē' ta yenaoyaquē' kneza Diuzi. ¹⁷ Lēbi' cuialaonezabi' ta quixogue'bi' benē' baza' ben' ise'ela' Diuzi. Con ca bē profeta Elías, bēnē' yela' huaca quie Diuzi, cana' huerē zī'ilo' yedze'bi' pensari quie Elías lu'u guicho laxta'o yaca benē' ta bitilalē xuziyaquē' len zī'iyaquē', lēscan' ta galerē yaca ben' birale quie Diuzi. Cana' huebi' tacuenda chezila'adyi' yaca benē' yezi'yaquē' ben' ise'ela' Diuzi.

¹⁸ Bizi na' unaba Zacarías ángel:

—¿Cabizi hua' ta inezda' gaca quia' cabē' baonao'? Porque nē'ēdi' banaca' ben' gula. Lēscana' ben' gula naca nigula quia'.

¹⁹ Na'ra una ángel rēbinē' lēbē':

—Nē'ēdi' laohua' Gabriel. Rua' mandado rue Diuzi. Use'elē' nē'ēdi' ta detixogui'a luē' ca tadya'a hue Diuzi quio'. ²⁰ Ca naca bigulelo' can' baonia' luē', huega'nlo' bira gaca inēlo' hasta que idyin dza galo xcuidi' quio'. Uzun di'idza' can' baonia' cati idyin dza.

²¹ Bizi yaca ben' nita' lali'a, rbezayaquē' ta yero Zacarías rebanyaquē' dan' rdzētzegue Zacarías lu'u idao' r nabē'ra. ²² Babero Zacarías lu'u idao' r nabē'ra

bedapa' ru'anè' bira guca inènè'. Bizi yaca benè' gucabè'yaquè' guca quiè' ca ben' uxusa. Blè'ènè' tu ta blè'ènè' lu'u idao' r nabè'ra. Bizi señazi ruenè' rlu'enè' benè' bira guca inènè'.

²³ Babeyudyi ca tu dza uzunè' lu'u idao' r nabè'ra, na' bezè' zeyoguè' zan yu'u quienè'. ²⁴ Ude beyudyi guca can', zgulè' Elisabet, banu'a zi'inè', bega'nnè' zunè' zan yu'u quienè' lao ga'yo' biu'. ²⁵ Na'ra unè': "Ca ta bacuan bè Diuzi quia' ta bira inè yaca benè' quia' bizinaquezi."

Udixogüe' tu ángel cabè' gaca galo Jesús

²⁶ Bizi bezu lao xopa biu' bè'lè' ángel Gabriel Elisabet di'idza', bese'ela' Diuzi lèbè' tatula lao yedyi Nazaret ga nebaba Galilea. ²⁷ Bese'elè' lèbè' ta tzanè'è tu nigula cuidi', ben' binehuebè' be'mbyu. Lèlèbi' laobi' María. Lènigula na' banapabi' di'idza' len bi' lao José ta utzagana'yacabi'. Naca José zi'i suba rey David. ²⁸ Bizi uyu'u ángel lu'u yu'u ga zu María, unè' rëbinè' lèbi':

—Padiux, raxetzagüe Diuzi ca ruelo'. Zucazi Diuzi rnè'è luè'. Huela'iya Diuzi luè' ca nurla yaca nigula tula.

²⁹ Na'ra cati blè'è María ángel, tu bebanzibi' cabè' gudyi ángel lèbi'. Cana' guquebi': "¿Bixquien' una ángel nè'èdi' cana'?" ³⁰ Na'ra una ángel rëbinè' lèbi':

—María, bidzebo' huacalècazi Diuzi luè'. ³¹ Na'ra huayu'u bdao' byu lu'u yu'u'zixo'. Na' ixubo' laobi' Jesús. ³² Huacabi' ben' ze lao Diuzi. Huacabi' zi'i Diuzi zu guibá. Hue' Diuzi yela' r nabè' quienè' ta inabè'nè' ca unabè' xuzixta'onè' rey David. ³³ Cana' inabè'nè' tuzioli yaca ben' Israel. Biyeyudyi yedu yela' r nabè' quienè'.

³⁴ Bizi unaba María ángel:

—¿Como gaca quia' con ca baonao', den' binesulia' be'mbyu?

³⁵ Bizi una ángel rëbinè' María:

—Huayèzi Bichi Be quie Diuzi ga zulo'. Ca idubi tu beo, cana' huadubi yela' huaca quie Diuzi zu sibi luè'. Lèbdao' su na', huacabi' ben' naca la'iya quie Diuzi, huacabi' zi'i Diuzi. ³⁶ Lèzi ben' diadza quio' Elisabet, huazurè' zi'inè' ba'ala'cazi banaquè' ben' gula, ben' una yaca benè' naquè' nigula bidyi. Bizi na'a lao xopa biu' banu'a zi'inè'. ³⁷ Para Diuzi bibi zèdi gaquenè' tu ta huenè'.

³⁸ Na'ra una María rëbibi' ángel:

—Nacacaza' ben' hue dyin quie Diuzi. Hue'encazi huegara Diuzi quia' cabè' baonao'.

Na'ra beza' ángel zeyoguè'.

Uyo María yeyubibi' Elisabet

³⁹ Lèdza na', laoza'te María ziobi' yedyi ga zu ya'a, yedyi nebaba Judea. ⁴⁰ Bizi cati bdyimbi' ga zu lidyí Zacarías, na' uyu'ubi' lu'u yu'u rgapabi' diuzi Elisabet. ⁴¹ Caora be Elisabet bgapa María lèbè' diuzi, cana' bda bdao' yu'u lu'u yu'u'zixinè'. Bizi caora na' uyu'u Bichi Be quie Diuzi lèbè'. ⁴² Na'ra unè' Elisabet zidzo rëbinè' María:

—Babèla'iya Diuzi luè' cala ca nurla yaca nigula. Lèzi babèla'iyane' zi'ilo'.

⁴³ ¿Nu'zi naca' nè'èdi' babido' idenao' nè'èdi'? Naco' luè' zna' ben' ise'ela' Diuzi. ⁴⁴ Ca naca bido' rgapo' nè'èdi' diuzi, caora na' bda bdao' yu'u lu'u yu'u'zixa' redaohuebi'. ⁴⁵ Tadya'a gula gaca quio' bagulelo' con can' baona Diuzi como dan' uzucazin di'idza' can' baonanè'.

⁴⁶ Na'ra una María:

Raxeda' rnía' naca Diuzi ben' ze gula.

⁴⁷ Redaohue guicho laxta'ohua' ca rue Diuzi, ben' ute usela nè'èdi'.

⁴⁸ Babeyèchi'la'adyi' Diuzi nè'èdi', naca' ben' hue dyin quienè'.

Huana yaca ben' zaza' zanita' tahuen gula guca quia'.

⁴⁹ Naca Diuzi ben' r nabè' lao yugulute.

Tadya'a gula bènè' quia'.

Naca Diuzi ben' la'ia.

⁵⁰ Tuzioli reyèchi'la'adyi'nè' yaca ben' rapala'n lèbè'.

⁵¹ Bènè' yela' huaca quienè'.

Pcaxonè' yaca ben' rue ze cuine.

⁵² Begubè' yela' r nabè' quie yaca ben' r nabè', bè'nè'n yaca ben' yèchi', ben' ruzu di'idza' quiè'.

⁵³ Yaca ben' udue, bipca'nnè' leyaquè' sin gaoyaquè', pero yaca ben' uña'a, bega'nyaquè' biguta' ta gaoyaquè'.

⁵⁴ Gucalènè' yaca ben' yedyi Israel, yaca ben' quienè'.

Bigulala'adyi'nè' leyaquè' beyèchi'la'adyi'nè' leyaquè'.

⁵⁵ Cana' bènè' ca naca di'idza' bega'nlènè' xuzixta'oro, bènè' ca naca di'idza' bega'nlènè' Abram len diadza quienè' para tuzioli.

⁵⁶ Biži guca lao tzona biu' uzu María lidyi Elisabet. Ude na' beza'bi' zeyobi' lidyibi'.

Ca guca cati baozu Juan bautista

⁵⁷ Biži bdyin uya' biu' ta su bdao' quie Elisabet, na' uzu tu bdao' byu quiè'.

⁵⁸ Bè' unezi yaca ben' diadza quienè', len yaca ben' lao yedyi baozu bdao' quienè', bdyinyaquè' dena'yaquè' lèbè' ca tahuen gula guca quienè'. ⁵⁹ Biži guca lao xuna dza, bdyin yaca ben' uzu tu xèdyidao' cuin bdao' según ca naca ley quieyaquè'. Cana' gu'unyaquè' yeyu'eyaquè' laobi' ca lao xuzibi' Zacarías. ⁶⁰ Na'ra una zna' bdao':

—Biyeu'ero laobi' lao xuzibi'. Hue'ro laobi' Juan.

⁶¹ Biži unayaquè' rëbiyaquè' lèbè':

—¿Bixquien' ilaobi' Juan? Ni tu yaca ben' diadza quio' bizu yaca ben' lao cana'.

⁶² Na'ra bëyaquè' seña unabayaquè' xuzi bdao' ta ineziyaquè' ca biži re'en xuzibi' ilaobi'. ⁶³ Na'ra unabanè' tu yaga ta'a bzuguè' letra bzunè': "Laobi' Juan." Biži tu bega'nziyaquè' bebanyaquè' can' guca. ⁶⁴ Biži caora na' benè' Zacarías, ruenè' Diuzi ben' ze. ⁶⁵ Bega'n yaca ben' lao yedyi tu bebanziyaquè'. Na' bè'lè yaca ben' nita' yedyi nebaba Judea laguediyyaquè' di'idza' cabè' guca quieyaquè'. ⁶⁶ Ca naca lao yugulu ben' unezi, gucayaquè' pensari unayaquè' rëbiyaquè' laguediyyaquè':

—¿Ca biži gaca quie xcuidi' na'?

Cana' unajè' dan' talicazi bèla'ia Diuzi lèbi'.

Bë Zacarías Diuzi ben' ze

⁶⁷ Na'ra Zacarías, ben' naca xuzi bdao', du yu'unè' Bichi Be quie Diuzi, unè' cabè' re'en Diuzi inènè'. Lèlena' unè' canì:

⁶⁸ Ben' ze naca Diuzi quie ben' ra'o, ben' Israel, como dan' babidè' len ra'o, nacaro ben' quienè', bapte pselanè' ra'o.

⁶⁹ Baose'elè' tu ben' ute usela ra'o, ben' de yela' huaca quie. Lèlèbè' naquè' zi'i suba rey David, ben' naca siervo quie Diuzi.

⁷⁰ Cana' naca di'idza' bega'nlè Diuzi xuzixta'oro tiempote.

Conlè yaca ben' udixogue' di'idza' la'ia quienè', cana' udixogue' Diuzi bin' huenè'.

⁷¹ Unè' ute uselanè' ra'o quie yaca ben' rudie rdza' ra'o.

⁷² Unè' yeyèchi'la'adyi'nè' yaca ben' naca xuzixta'oro.

Bigala'adyi'nè' huenè' cabè' di'idza' naca la'ia bega'nlènè' leyaquè'.

⁷³ Lëscan' para ra'o, bega'nlënë' ra'o di'idza'.

Cana' naca di'idza' bega'nlë Diuzi xuzixta'oro Abraham.

⁷⁴ Unë' ute uselë' ra'o bibi hue yaca ben' rudie rdza' ra'o para naoro xnezë' sin idzebiro.

⁷⁵ Cana' gacaro ben' hue quie lëbë', ben' naca la'iya quienë' dza rdaro lao yedyi layu.

⁷⁶ Na'ra luë' zi'ina', huaco' ben' quixogue' xti'idza' Diuzi zu guibá, como dan' huabialaonezo' lao ben' ise'elá' Diuzi ta tzetixogue'lo' benë' de que huida ben' ise'ela' Diuzi.

⁷⁷ Cana' huelo' cuenda inezi yaca ben' Israel cabë' bë Diuzi ta ute uselanë' ra'o, yezi'zenë' dula' xquía quiero.

⁷⁸ Tanun quie nedyë'ë Xuziro Diuzi ra'o reyëchi'la'adyi'në' ra'o, aose'elë' tu ben' uzioñe'e ra'o desde guibá ga zuë'.

⁷⁹ Cana' bë Diuzi cuenda tzioñe'e yaca ben' rda lao lato lao chula, yaca ben' ruen žudyi gatiyaca.

Cana' bë Diuzi quiero cuenda gacalënë' ra'o, yedzelerero naoro xnezë', cue' chizi lu'u guicho laxta'oro.

Cana' una Zacarías dza na'.

⁸⁰ Biži xcuidi' gu'unibi' labezi, gucabi' bi' huala, yu'ubi' Bichi Be quie Diuzi. Na'ra uzubi' lao lato ga bidyia yu'u hasta bdyin dza uzulaobi' rguixogue'bi' yaca ben' Israel xti'idza' Diuzi.

2

Ca guca bë' uzu Jesús

(Mt. 1.18-25)

¹ Biži lao dza na', uzu tu ben' naca gobierno, ben' r nabë'ra laohué' Augusto. Na' bënë' mandado ta guca censo quie lao duze yedyi con ga r nabë'në'.

² Lëcenso na' gucan tanëro caora uyo Cirenio gobernador quie yu nebaba Siria. ³ Gucan quie lao yugulute yaca ben' con gatezi nita'yaquë' de yeyoy-aquë' lao yedyi ga golo yaquë' tacuenda tzu'u laoyaquë' lao lista. ⁴ Cana' guca bero José yedyi Nazaret ga nebaba Galilea zioquë' yedyi Belén ga nebaba Judea. Lëgan' na' ga golo rey David como dan' naca José ben' diadza quie rey David. ⁵ Bedyin José len María Belén para tzu'u laoyaquë' lao lista. Naca María bi' banapalë di'idza' José ba'ala'cazi banu'a zi'ibi'. ⁶ Biži banita'yaquë' Belén na', bdyin dza golo bdao' quie María. ⁷ Biži golo bdao' nëro quie María. Beyudyi na' bezi'yaquë' bdao' betubiyaquë'bi' la'ari' bexubayaquë'bi' lao yaga žan yu'u ga yu'u bëdyihuaga. Cana' guca quieyaquë', dan' biguta' lato lu'u yu'u quie yaca benë' gasiyaquë'.

Ptilalao yaca ángel yaca ben' rapa beco' zi'ila'

⁸ Biži ga'ala' ga re' Belén nita' yaca ben' rapa beco' zi'ila'. Rega'nlëyaquë' beco' zi'ila' quieyaquë' layela ta rapayaquë'ba' yedu yela. ⁹ Lëcana' labdyinte tu ángel quie Diuzi gan' nita' yaca ben' rapa beco' zi'ila'. Caora na' bdyin yela' huaca quie Diuzi ulëchin xni' gan' nita'yaquë'. Lega bega'nyaquë' bdzebiyaquë'. ¹⁰ Na'ra una ángel rëbinë' leyaquë'.

—Bidzebile, porque në'ëdi' nu'a tu di'idza' dya'a nacan ta yedaohue lao yugulute benë'. ¹¹ Lëlena' rnía' le'e agolo tu bdao' yedyi Belén ga golo rey David. Lëbdao' na' ute uselabi' yaca benëchi'. Bagolo ben' naca Cristo, ben' use'ela' Diuzi. ¹² Ta inezile nacan tali ca rnía', huedzelele bdao' bdubibi' la'ari' žubabi' lao yaga žan yu'u ga yu'u bëdyihuaga.

¹³ Bizi yesazi bdyinra yaca ángel zëra, ben' za' guibá gan' zë ángel, ruejë' Diuzi ben' ze unayaquë':

¹⁴ ¡Ben' ze Diuzi zu sibi!

¡Huaca tadya'a gula quie yaca ben' nita' lao yedyi layu, ben' hue quie Diuzi!

¹⁵ Bizi babeyudyi na', beyëpi yaca ángel guibá. Na' bega'n yaca ben' rapa beco' zi'ila' nayaquë' rëbiyaquë' lagueyiyaquë':

—Huayoro tzena'ro can' guca yedyi Belén con ca baona Diuzi ra'o.

¹⁶ Cana' uza'yaquë' zioyaquë' taria bdyinyaquë' ga zu María len José len bdao' zubabi' lao yaga zan yu'u ga yu'u yaca bëdyihuaga. ¹⁷ Ca blë'ëyaquë' bdao', cana'ra bë'yaquë' di'idza' con can' gudyi ángel leyaquë' cabë' guca uzu bdao'. ¹⁸ Ca naca be lao yugulute yaca ben' nita' gan', lega bebanyaquë' can' una yaca ben' rapa beco' zi'ila'. ¹⁹ Bizi María nezizi lu'u laxta'onë' ca naca una yaca benë'. Cana' gucanë' pensari ca unajë'. ²⁰ Na' beza' yaca ben' rapa beco' zi'ila' zeyoyaquë' rueyaquë' Diuzi ben' ze ca ta beyaquë' len ca ta blë'ëyaquë'. Bzucazi Diuzi di'idza' con ca una ángel gudyinë' leyaquë'.

Blu'eyaquë' bdao' pxuzi lu'u idao' rnabë'ra

²¹ Guca lao xuna dza bzuyaquë' bdao' tu xëdyidao' ca costumbre quieyaquë'. Bizi na' pxubayaquë' lao bdao' JESUS cabë' una ángel ilaobi' tu binehua'a María bdao'. ²² Bizi baoya' dza ta yeyëri nigula según ca rna lë'ë guichi yu'u ley quie Moisés. Caora na' uza'yaquë' ziolëyaquë' bdao' ciudad Jerusalén ta ulu'eyaquë' bdao' pxuzi lu'u idao' rnabë'ra. ²³ Bëyaquë' cana' bzuyaquë' di'idza' con ca naca ley quie Diuzi yu'u lë'ë guichi. Cani rnan lë'ë guichi: “Naca yugulu bdao' byu nëro bi' naca la'iya lao Diuzi.” ²⁴ Lena' uyoyaquë' yehua'ayaquë' biu ta uzio pxuzi ren quieba' lao becugo ga zu idao' rnabë'ra. Bzuyaquë' di'idza' cabë' rguixogue'n lë'ë guichi la'iya quie Diuzi cani: “Reya'ala' tzehua'ale lao pxuzi tu pare biu lasi, na' chi bizu biu lasi, hua'ale chopa paloma dao'.” Cana' rnën lë'ë guichi.

²⁵ Lëtiempo na' uzu tu ben' lao Simeón zunë' Jerusalén. Naquë' ben' dya'a, rapala'nnë' Diuzi, rbezanë' dza guida ben' ise'ela' Diuzi, ben' ute usela ben' Israel. Yu'ucazi Simeón Bichi Be quie Diuzi. ²⁶ Babzioñe'e Bichi Be quie Diuzi lëbë' de que tu binegatinë' hualë'ënë' ben' naca Cristo, ben' ise'ela' Diuzi. ²⁷ Conlë Bichi Be quie Diuzi ziolë Simeón lu'u idao' rnabë'ra. Bizi cati ziolëyaquë' bdao' lu'u idao' rnabë'ra ta uzuyaquë' di'idza' con ca na lë'ë guichi ley. ²⁸ Lëhora na' uzi' Simeón bdao' bnidaguë' bdao' uxubanë'bi' lao zichonë' bëguë' Diuzi ben' ze unë':

²⁹ Xuza' Diuzi, huaca usanlo'në' gatia' cue' chizi lu'u guicho laxta'ohua', dan' babzulo' di'idza' con ca unao' në'ëdi', naca' ben' rue ca mandado re'enlo' hua'.

³⁰ Conlë laohua' bablë'ëda' ben' ute usela yaca benëchi'.

³¹ Aose'elo'në' bidë' lao yedyi layu cuenda ilë'ë yaca benëchi' lëbë'.

³² Naquë' ca xni' gui' usen' ta ilë'ë ben' rda lao lato lao chula, yaca ben' binaca ben' Israel.

Nun quienë' gapala'n yaca ben' nita' lao yedyi layu yaca ben' Israel, yaca ben' naca ben' quio'.

³³ Na' beban José len zna' bdao' cabë' una Simeón quie bdao'. ³⁴ Na'ra bëla'iya Simeón bdao' gudyinë' María zna' Jesús:

—Naca laza xcuidi' quio' usanla'adyi' Diuzi ben' Israel, yaca ben' bichezila'adyi' lëbi'. Lëzi nacarë lazabi' yezi' Diuzi ben' Israel, yaca ben' chezila'adyi' lëbi'. Huaca quiebi' bichezila'adyi' ben' zë lëbi'. ³⁵ Lëcana' ulu'en

ca naca pensari yu'u lu'u laxta'o quie quie yaca benë'. Den' para quio' luë', huacan bayëchi'. Huacan ca quie chezi tu espada huen chopa la'a laxta'olo'.

³⁶ Lëgan' na' uzu tu nigula laohuë' Ana. Udixogue'rënë' di'idza' la'iya quie Diuzi. Banaquë' ben' gula, naquë' zi'i Fanuel, ben' diadza quie Aser. Nenacatë' cuidi' tzi'i xquiuhuë' lëbë'. Uzulënë' xquiuhuë' lao gadyi iza, ude na' guti xquiuhuë'. ³⁷ Biži tu litza' bega'nnë' napë' tapa galo tapa iza. Pero bipsanla'adyi'në' quie idao' rnabë'ra. Zucazë' te dza len rtze' rulidzë' Diuzi ruenë' ubasi. ³⁸ Cana' bdyin Ana gan' zëyaquë' rëbinë' Diuzi diuxcalelo'. Na'ra uzulaohuë' rguixogue'në' ca naca quie bdao' Jesús para yaca ben' nita' rbeza dza guida ben' ise'ela' Diuzi, ben' ute usela yaca ben' Israel.

Bedyinyaquë' yedyi Nazaret

³⁹ Babeyudyi guca lao yugulute cabë' mandado rue ley quie Diuzi, na'ra beza'yaquë' zeyoyaquë' estado Galilea bedyinyaquë' yedyi quieyaquë' Nazaret. ⁴⁰ Na' biži gu'uni bdao', gucabi' bi' huala, bi' rioñe'e. Bëla'iya Diuzi lëbi'.

Cabë' guca bega'n Jesús lu'u idao' rnabë'ra

⁴¹ Yugu iza rio José len žna' Jesús ciudad Jerusalén ga ra'ala' lani pascua ta rezala'adyi' yaca ben' Israel dza uza' xuxixta'oyaquë' nación Egipto. ⁴² Cati uya' Jesús lao chipchopa iza, uyolëbi' xuzi žna'bi' lani ciudad Jerusalén con ca naca biu' benëbi' quieyaquë' rueyaquë' lani pascua. ⁴³ Biži babeyudyi lani, beza' José len žna' Jesús zeyoyaquë' bigucabë'yaquë' chi bega'n Jesús ciudad Jerusalén. ⁴⁴ Gucayaquë' pensari zeza' Jesús len yaca ben' zeza' uyorë lani. Cana' guca lao tu dza beza'yaquë'. Caora rna'yaquë' ganu Jesús zeza', udayaquë' rguiloayaquë'bi' lado diadza quieyaquë', len yaca ben' nubë'yaquë', den' ganu Jesús zeza' leyaquë'. ⁴⁵ Nunu bedzeleyaquë'. Na' beza'yaquë' zeyoyaquë' ciudad Jerusalén tatula ta yeguiloayaquë'bi'.

⁴⁶ Biži guca lao tzona dza na', bedzeleyaquë'bi' lu'u idao' rnabë'ra. Re'bi' lado yaca ben' rusëdi di'idza' yu'u lu'u guichi la'iya quie Diuzi. Ržëmagabi' ca rnayaquë' rnababi' leyaquë' tu chopa di'idza'. ⁴⁷ Ca naca yugulu ben' ržënaga can' nabi', tu bega'nziyaquë' bebanziyaquë' ca naca yela' rioñe'e quiebi', lëzi bebanziyaquë' ca naca di'idza' bedyi'ibi' gudyibi' leyaquë'. ⁴⁸ Biži caora blë'ë xuzi žna'bi' lëbi', tu bega'nziyaquë' bebanyaquë'. Na'ra unë žna'bi' rëbinë' lëbi':

—Ži'ina', žbixquien' bao' cana'? Rdëbindo' quio'. Aodalia' xuzo' reguilondo' luë'.

⁴⁹ Cana'ra una Jesús rëbinë' leyaquë':

—Žbixquien' rdale reguilole në'ëdi'? ŽBinezile ruen zi uzua' di'idza' hua' mandado quie Xuza'?

⁵⁰ Biži leyaquë' biuyoñe'eyaquë' can' una Jesús.

⁵¹ Cana' beza'yaquë' zeyoyaquë' yedyi Nazaret, pero ralecazi Jesús quie xuzi žna'bi'. Na' žna'bi' nudze'në' lu'u guicho laxta'onë' cabë' bë Jesús. ⁵² Ca naca Jesús na' gu'unibi' uya'abi' pensari. Blë'ë Diuzi lëbi' nacabi' bi' huen. Lëzi blë'ërë yaca benë' nacabi' bi' huen.

3

Udixogue' Juan bautista xti'idza' Diuzi lao lato ga bidyia yu'u (Mt. 3.1-12; Mr. 1.1-8; Jn. 1.19-28)

¹ Biži guca lao chi'inu' iza uzu tu ben' lao Tiberio, naquë' gobierno rnabë'ra. Caora na' uzurë itu ben' lao Poncio Pilato, naquë' gobierno quie estado Judea. Lëzi uzurë itu ben' lao Herodes, naquë' gobierno quie estado

Galilea. Lēzi uzurē tu bichi Herodes, ben' lao Felipe, naquē' gobierno quie yu nebaba Iturea len yu nebaba Traconite. Lēzi uzurē itu ben' lao Lisantias, naquē' gobierno quie yu nebaba Abilinia. ² Lēscan' lēza na', naca Anás len Caifás yaca pxuzi rnabē'ra. Biži Diuzi bē'nē' tu di'idza' Juan, ži'i Zacarías. Na' zu Juan lao lato ga bidyia yu'u. ³ Cana' uyo Juan lao duže ru'a yao Jordán unē' rēbinē' benē': "Reya'ala' yetza'le pensari quiele cuenda yezi'že Diuzi dula' xquia quiele, cana'ra hua' laole." ⁴ Gucan can' ca bzu Isaías di'idza' lē'ē guichi la'ia quie Diuzi dza na'. Naquē' ben' udixogue' xti'idza' Diuzi unē':

Huazu ben' na' lao lato dachi ga bidyia yu'u, huanē' zidzo rēbinē' laguedyinē' caniga: "Huele hueluba neza quiele cuenda huida ben' naca xa'nro, usalole tu neza li.

⁵ Yesedza'le ga naca pozo, yeyuele ba'a ga naca loma, yebiölile ga naca neza yuco, yupa'ale ga naca neza stēbi.

⁶ Cana' ilē'ē lao yugulute benēchi' ca hue Diuzi ta ute uselanē' leyaquē'."

⁷ Na'ra cati bdyin yaca benē' ga zē Juan ta hue'nē' laoyaquē', lēscan' bdyinrē yaca ben' rnabē' quieyaquē'. Cana' una Juan rēbinē' leyaquē':

—¿Ca naca bēla bia mala, cana' nacarēle! ¿Ca nuži udixogue' le'e ta ilale ca naca tu castigo huala gula baza' bago ilē'ēle? ⁸ Ulehue quiele tadya'a cuenda ulu'en talicazi aptza'le pensari quiele. Bira inale: "Bihue Diuzi ra'o castigo nun quie nacaro ži'i suba Abraham." Porque rnia' le'e, hasta len yo niga huazaque' hue Diuzi yaca ben' naca ži'isuba Abraham. ⁹ Ca naca quie yaga birbia tazixi, cana' naca quiele. Bade yebandyo puesto ta ichugon yaca yaga birbia tazixi tzu'un tzeina lagui'.

¹⁰ Na'ra unaba yaca benē' nayaquē':

—¿Cabizi re'enlo' huendo'?

¹¹ Na'ra una Juan rēbinē' leyaquē':

—Chi de chopa cue' žabale, ulesi' tu cue'n ulehue'n ben' bide žabe. Lēscan' nu yela' huao quiele, ulehue'n ben' bide ta gao.

¹² Biži bdyinrē yaca ben' huequižu ta hue' Juan laoyaquē'. Biži unayaquē' rēbiyaquē' Juan:

—Maestro, ¿cabizi ca huendo'?

¹³ Na'ra una Juan rēbinē' leyaquē':

—Ca tu ruezji mandado lao ley uquižule yaca benē', bira uquižuleyaquē' de mazara.

¹⁴ Lēzi unabarē bala yaca ben' naca soldado unayaquē':

—Biži nēto', ¿cabizi ca huendo'?

Na'ra una Juan rēbinē' leyaquē':

—Bicubale bicuanle quie benē'. Ni ta utzebile gaole leyaquē' xquia, chi bibi rueyaquē'. Lēscan' ulechezila'adyi' ca tu ta razule.

¹⁵ Na' biži yaca benē' raqueyaquē' Juan naquē' ben' Cristo. ¹⁶ Na'ra una Juan rēbinē' lao yuguluteyaquē':

—Tali nē'ēdi' ru'a laole con nisa, pero zaza'ra ben' udze' Bichi Be quie Diuzi lu'u guicho laxta'o ben' rue quie xti'idza' Diuzi. Pero ben' bīrue quie xti'idza' Diuzi, udze'nē' lējē' lao gui' gabila. Dera yela' rnabē' quie' ca nē'ēdi'. Tanto naquē' ben' belao, ni lē'ēti' bibi zaca' ni siquiera biyeyazoga' cuioğa' guidi yu'u ni'anē'. ¹⁷ Bazēnē' beladzo' ta ulubē' trigo. Te na' yetupē' trigo yezi'tza'onē'n. Lēzi utuparē' guixi' uzalanē'n lagui' ga tzeina lao gui' bireyula. —Cana' una Juan gudyinē' leyaquē':

¹⁸ Lēscan' gudyinē' leyaquē' di'idza' zēra unē' udixogue'nē' yaca benē' di'idza' la'ia quie Diuzi. ¹⁹ Lēzi udilarē' Herodes, ben' naca gobierno, dan' bezulēnē' Herodías žgula bichinē' Felipe. Lēzi udilarēnē' lēbē' dan' bēranē'

tamala. ²⁰ Na' biži Herodes, lao laza uzēnaguē' quie Juan, bērlē' mazara tamala, bdze'guē' Juan lu'u dyguiba.

Ca guca bē' Juan lao Jesús
(Mt. 3.13-17; Mr. 1.9-11)

²¹ Ca zatzio Juan lu'u dyguiba, cati nezēnē' ru'enē' lao benē', lēzi bē'nē' lao Jesús. Ca zē Jesús rldzē' Diuzi, cana' uyalo guibá. ²² Biži caora na' ga zē Jesús, uyēzi Bichi Be quie Diuzi ca rēzi biu. Na'ra unē Diuzi ga zuē' guibá unē':
—Zi'ina' luē'. Nedyē'ēda' luē'. Lega redaohueda' ca ruelo'.

Ga rguixogue'n quie xuxixta'o Jesucristo
(Mt. 1.1-17)

²³ Jesús bazunē' ca du galobechi iza cati uzulaonē' udixogue'nē' di'idza' la'iya quie Diuzi. Según ca una yaca benē' naquē' zi'i José, dechan' naquē' zi'i suba Elí, ben' naca xuzi María. ²⁴ Na' naca Elí zi'i Matat, na' naca Matat zi'i Leví, na' naca Leví zi'i Melqui, na' naca Melqui zi'i Jana, na' naca Jana zi'i José, ²⁵ na' naca José zi'i Matatías, na' naca Matatías zi'i Amós, na' naca Amós zi'i Nahum, na' naca Nahum zi'i Eslí, na' naca Eslí zi'i Nagai, ²⁶ na' naca Nagai zi'i Maat, na' naca Maat zi'i Matatías, na' naca Matatías zi'i Semei, na' naca Semei zi'i José, na' naca José zi'i Judá, ²⁷ na' naca Judá zi'i Joana, na' naca Joana zi'i Resa, na' naca Resa zi'i Zorobabel, na' naca Zorobabel zi'i Salatiel, na' naca Salatiel zi'i Neri, ²⁸ na' naca Neri zi'i Melqui, na' naca Melqui zi'i Adi, na' naca Adi zi'i Cosam, na' naca Cosam zi'i Elmodam, na' naca Elmodam zi'i Er, ²⁹ na' naca Er zi'i Josué, na' naca Josué zi'i Eliezer, na' naca Eliezer zi'i Jorim, na' naca Jorim zi'i Matat, ³⁰ na' naca Matat zi'i Leví, na' naca Leví zi'i Simeón, na' naca Simeón zi'i Judá, na' naca Judá zi'i José, na' naca José zi'i Jonán, na' naca Jonán zi'i Eliaquim, ³¹ na' naca Eliaquim zi'i Melea, na' naca Melea zi'i Mainán, na' naca Mainán zi'i Matata, na' naca Matata zi'i Natán, ³² na' naca Natán zi'i rey David, na' naca rey David zi'i Isaí, na' naca Isaí zi'i Obed, na' naca Obed zi'i Booz, na' naca Booz zi'i Salmón, na' naca Salmón zi'i Naasón, ³³ na' naca Naasón zi'i Aminadab, na' naca Aminadab zi'i Aram, na' naca Aram zi'i Esrom, na' naca Esrom zi'i Fares, na' naca Fares zi'i Judá, ³⁴ na' naca Judá zi'i Jacob, na' naca Jacob zi'i Isaac, na' naca Isaac zi'i Abraham, na' naca Abraham zi'i Taré, na' naca Taré zi'i Nacor, ³⁵ na' naca Nacor zi'i Serug, na' naca Serug zi'i Ragau, na' naca Ragau zi'i Peleg, na' naca Peleg zi'i Heber, na' naca Heber zi'i Sala, ³⁶ na' naca Sala zi'i Cainán, na' naca Cainán zi'i Arfaxad, na' naca Arfaxad zi'i Sem, na' naca Sem zi'i Noé, na' naca Noé zi'i Lamec, ³⁷ na' naca Lamec zi'i Matusalén, na' naca Matusalén zi'i Enoc, na' naca Enoc zi'i Jared, na' naca Jared zi'i Mahalaleel, na' naca Mahalaleel zi'i Cainán, ³⁸ na' naca Cainán zi'i Enós, na' naca Enós zi'i Set, na' naca Set zi'i Adán, na' naca Adán zi'i Diuzi.

4

Gu'un xan' taxi'ibi' iquixi Jesús huenē' tamala
(Mt. 4.1-11; Mr. 1.12-13)

¹ Du yu'u Jesús Bichi Be quie Diuzi zeyoguē' ru'a yao Jordán tatula. Pquiē' Bichi Be quie Diuzi lēbē' lao lato ga bidyia yu'u. ² Biži guca uzuguē' lao lato lao chopa galo dza. Na' uyo xan' taxi'ibi' gan' zēnē' re'ennan ta iquixi Jesús huenē' tamala. Ca tu lao dza uzunē' na', biudaonē' lega uduenē'. ³ Na'ra una xan' taxi'ibi' rēbin lēbē':

—Chi dula'adyo' naco' zi'i Diuzi, bē yo niga iyacan yēta xtila.

⁴ Na'ra rēbi Jesús len:

—Lê'ê guichi la'iya quie Diuzi rnan caniga: “Cala yela' huaenzi uteban yaca benê', lëscan' ca naca di'idza' rnê Diuzi, utebannan leyaquê'.”

⁵ Biži na'a, xan' taxi'ibi' uquiê'n lëbê' lao ya'a sibi, na' blu'en lëbê' lao duze yedyi layu. ⁶ Biži una xan' taxi'ibi' rëbin lëbê':

—Guna' luê' lao yugulu yela' rñabê' quie yedyi layu niga nun quie nacan ladyina'a. Na' hua'a len nu ben' raxeda' hua'a len. ⁷ Chi quitzo žibo' laohua' tziomla'adyo' nê'êdi', na' guna' lao yuguluten luê'.

⁸ Na'ra una Jesús rëbinê'n:

—Bebiga' tzala'la, Satanás, porque lê'ê guichi ga yu'u di'idza' la'iya quie Diuzi rnan caniga: “Tuzi Diuzi tziomla'adyi'ro uzuro di'idza' ca mandado ruenê'.”

⁹ Ude na' uquiê' xan' taxi'ibi' lëbê' ciudad Jerusalén, urêlêna lëbê' guicho lun idao' rñabê'ra. Na' unan rëbin lëbê':

—Chi dula'adyo' naco' ži'i Diuzi, uxiti gan' niga para layu. ¹⁰ Bigaco' ži' iğuinolo' layu como cana' rnan lê'ê guichi la'iya quie Diuzi nan: Ise'ela' Diuzi ángel quienê' ta ina'yaquê' luê' ta bibi gaca quio'.

¹¹ Hueyuxuyaquê' luê' ta bibi gaca quio', ni yo bihuenan ži' ni'alo'.

¹² Na'ra una Jesús rëbinê'n:

—Lêzi rnarên lê'ê guichi la'iya rnan: “Bihuenêle Diuzi bizinaquezi chi uzunê', chi biuzunê' di'idza' cabê' unê'.”

¹³ Biži bira ubin xan' taxi'ibi' bihuena ta iquixi Jesús huenê' tamala, cana' guca bebiga'n zeyon bibênan Jesús žedi tu chi'.

Uzulao Jesús psëdinê' yaca benê' estado Galilea

(Mt. 4.12-17; Mr. 1.14-15)

¹⁴ Biži Jesús, du yu'unê' Bichi Be quie Diuzi, zeyoguê' bedyinnê' estado Galilea. Cana' guca gudyi yaca ben' laguedyiaquê' quie quie yedyi re' ga'ala' cabê' rue Jesús. ¹⁵ Psëdinê' leyaquê' lu'u idao' con ga yedyi uyoguê'. Yuguluyaquê' udapala'njê' lëbê'.

Beyo Jesús yedyi Nazaret

(Mt. 13.53-58; Mr. 6.1-6)

¹⁶ Na'ra beyo Jesús yedyi Nazaret ga bgulanê'. Biži dza saodo, dza huezila'adyi' quieyaquê', uyu'unê' lu'u idao' sinagoga ca rionê' yugu dza huezila'adyi'. Na' uzulinê' rñabê' lê'ê guichi ga yu'u di'idza' la'iya quie Diuzi.

¹⁷ Na' bê'yaquê' lëbê' guichi la'iya ta bzu profeta Isaías. Caora blinê'n, na' yetilê' ga rnan cani:

¹⁸ Yu'ucazi Bichi Be quie Diuzi nê'êdi' nun quie dan' ulionê' nê'êdi' ta quixogui'a di'idza' la'iya quienê' yaca ben' yêchi'.

Lêzi use'ela'rê' nê'êdi' ta yeyuežia' yaca ben' raca bayêchi' quie, lêzi ta hua' libre ca ben' nao xquia quieyaquê' leyaquê', lêzi ta yelê'ê yaca ben' nechula laohue, lêzi ta ute usela' yaca ben' baožaca ži',

¹⁹ lêzi ta quixogui'a yaca benê' babdyin dza hue Diuzi tu cule že quieyaquê'.

²⁰ Ude na' betubinê' guichi yu'u di'idza' la'iya quie Diuzi, beyu'enê'n ben' naca cuenda lu'u idao' sinagoga, na' bebe'nê'. Biži yugulu yaca ben' yu'u lu'u idao' sinagoga, bega'nziyaquê' rebanyaquê' rna'yaquê' lëbê'. ²¹ Cana' unê' gudyinê' leyaquê':

—Ca naca na'a, babzun di'idza' lê'ê guichi bablaba' bele. —Cana' unê'.

²² Na'ra yugulu benê' unëyaquê' dya'a quienê', tu bega'nyaquê' be-banzyaquê' ca naca di'idza' dya'a gula unê' Jesús. Na' biži unayaquê' rëbiyaquê' laguedyiaquê':

—¿Cala bi' niga ži'i José?

²³ Na'ra una Jesús rëbinê' leyaquê':

—Tali huanale nē'ēdi' cani: “Chi tali naco' ben' rue milagro, bē itun nī ilē'ēndo'.” Lēscan' inale nē'ēdi': “Ca ta babendo' bao' milagro yedyi Capernaum, cana' bēre itun niga yedyi quio' ilē'ēndo'.”

²⁴ Biži nernē Jesús rēbinē' leyaquē':

—Tali ca rnia' le'e, con gatezi de yedyi rda ben' rguixogue' xti'idza' Diuzi, hualē'ē yaca benē' lēbē' dya'a. Na' biži ben' lao yedyi quienē' biilē'ēyaquē' lēbē' dya'a. ²⁵ Tali ca rnia' le'e, unita' zē nigula guti xquiuhue yedyi quie yaca ben' Israel dza na' caora uzu profeta Elías. Lēdza na' biben nisayo lao tzona iza yugatzo. Lega ubin huala gula guta' lao yedyi quiejē'. ²⁶ Pero biuse'ela' Diuzi Elías con garla nita' nigula guti xquiuhue. Tuzi yedyi Sarepta, na' uzu tu nigula guti xquiuhue, lēgan' na' use'ela' Diuzi Elías ga rega'nnan ga'ala' para yedyi Sidón. ²⁷ Lēzirē unita' zē ben' yu'u yela' hue' ca mal de pindo yedyi Israel caora uzurē ben' naca profeta Eliseo dza na'. Na'ra lēdza na' nurla nuyaca ben' yu'u yela' hue' ca mal de pindo beyaca. Tuzi Naamán, ben' za' yu nebaba Siria, lēben' na' beyaca.

²⁸ Ca naca yaca ben' yu'u lu'u idao' sinagoga, bdza'tzegueyaquē' babeyaquē' can' una Jesús. ²⁹ Na'ra uzuliyaquē' bēxoyaquē' lēbē' lao yedyi uquiē'yaquē' lēbē' lao ya'a zu cuēta yedyi ta utulayaquē' lēbē' žanle. ³⁰ Pero tu brozi Jesús ladoyaquē' žioquē' ga tula.

Beyue Jesús ben' yu'u bichi be xi'ibi'

(Mr. 1.21-28)

³¹ Biži na' bdyin Jesús yedyi Capernaum ga nebaba Galilea. Lēgan' na' uyu'unē' idao' sinagoga ta psēdinē' yaca benē' dza huezila'adyi'. ³² Biži yaca benē' tu bebanziyaquē' ca di'idza' rnē' rusēdinē' leyaquē' como dan' cabē' rna ben' rnabē', cana' unē'.

³³ Biži lu'u idao' sinagoga zē tu ben' yu'u bichi be xi'ibi'. Lēben' na' urediyya'nē' unē':

³⁴ —Psan nēto'. ¿Bixquien' zao' ta huelo' nēto' zēdi? Jesús ben' yedyi Nazaret luē'. ¿Cala zao' udyiaguī'lo' nēto'? Nubē'da' luē' naco' ben' la'iya, ben' use'ela' Diuzi.

³⁵ Na'ra udila Jesús bichi be xi'ibi' rēbinē'n:

—¿Chizi, bero ben' na' gan' yu'ulo'!

Caora na' bero bichi be xi'ibi' be'mbyu gan' yu'una, bgu'unnē' layu, denē' zaquē'lao yaca ben' nita' rna'. Na' beron zeyon, nī lē'ēti' bibi zi' guquē'. ³⁶ Na' bega'n yuguluyaquē' bdzebiyaquē' nayaquē' rēbiyaquē' lagueddyiyaquē':

—¿Cabizi una ben' niga? De yela' rnabē' quienē' rnabē'nē' yaca taxi'ibi' reron ga yu'uyacan benē'.

³⁷ Na' cana' guca unezi yaca benē' nita' lao duže yedyi rega'n ga'ala' cabē' bē Jesús.

Beyue Jesús ben' gula quie Simón Pedro

(Mt. 8.14-15; Mr. 1.29-31)

³⁸ Biži babero Jesús lu'u idao' sinagoga žioquē' žan yu'u quie Simón. Biži ben' gula quie Simón yu'unē' žla huala. Na'ra unabayēchi'yaquē' lao Jesús ta tzanē'ē lēbē'. ³⁹ Na'ra ude Jesús zionē' gan' de ben' yu'u tala huala. Caora udila Jesús xan' žla, cana' beron, laoyasatenē' bē' laze ta udaoyaquē'.

Beyue Jesús ben' zē, ben' raca žhue'

(Mt. 8.16-17; Mr. 1.32-34)

⁴⁰ Baza' rdze' yehua'a yaca benē' ben' yu'u nacala yela' hue' gan' zē Jesús. Na'ra caora bda' nē'ē quie quieyaquē', cana' beyacayaquē'. ⁴¹ Ca naca yaca

ben' raca žhuae', lëzirë bero bichi be xi'ibi' rbedyiya'yacan nayacan rëbiyacan Jesús:

—Luë' naco' zi'i Diuzi.

Biži udila Jesús leyacan bibë'në' lato inëyacan dan' neziyacan lëbë' naquë' Cristo, ben' use'ela' Diuzi.

Uda Jesús rguxogue'në' xti'idza' Diuzi estado Galilea

(Mr. 1.35-39)

⁴² Baoyani' dza tula, bro Jesús zioquë' ru'a yedyila ta sunë' tuzë'. Biži yaca benë' reguiloyaquë' lëbë' na' bedzeleyaquë' gan' zënë'. Re'enyaquë' yega'n Jesús sunë' lënë' leyaquë' gan'. ⁴³ Na'ra una Jesús rëbinë' leyaquë':

—De tza'a yedyi tula ta tzetixogui'a yaca benë' ca rnabë' Diuzi reya'ala' hue quieyaquë' xti'idzë'. Quie lena' use'ela' Diuzi në'ëdi'.

⁴⁴ Cana' uyo Jesús udixogue'në' xti'idza' Diuzi lu'u idao' sinagoga quie yaca yedyi estado Galilea.

5

Ca tu milagro bë Jesús con yaca ben' rze bela

(Mt. 4.18-22; Mr. 1.16-20)

¹ Biži bdyin dza uzëguë' ru'a nisa lagun Genesaret. Lega bdyin yaca ben' zë gula hasta rquidi'yaquë' lëbë' dan' re'enyaquë' uzënegayaquë' xti'idza' Diuzi.

² Na'ra blë'ë Jesús chopa barco dachi zën bago ru'a nisa. Bero yaca ben' rze bela lu'un, re'yaquë' ru'a lagun rguibiyaquë' duyëxo ta rzeyaquë' bela. ³ Na' uyu'u Jesús tu lu'u barco. Biži barco na' nacan quie Simón. Na' gudyinë' Pedro ta udyiganë'n ta bicue'n ga'ala' ru'a nisa. Na' ure'në' laona uzulaohuë' rusëdinë' yaca benë'. ⁴ Babeyudyi psëdinë' yaca benë', na' unë' rëbinë' Simón: —Ya'lë barco ni ga naca zitu' lao lagun niga. Na' uledze' yëxo quiele lu'u nisa tacuenda tzu'un bela.

⁵ Na' una Simón rëbinë' lëbë':

—Maestro, bedu yela uyu'undo' ta sendo' bela, pero ni tuba' bibdula' quiendo'. Den' chi luë' nao', udzi'a yëxo lu'u nisa.

⁶ Biži babdze'yaquë' yëxo lu'u nisa uyu'una bela zë gula. Tanto bedza'n uyu'un bela na', urugu du lëtë yëxo. ⁷ Cana' bëlëyaquë' na'ayaquë' seña ta guida ben' yu'u lu'u barco tula ta gacalëyaquë' leyaquë'. Na'ra zioyaquë' psedza'yaquë' bela lao rupate barco. Tanto yela' zi'i quieyacan, bare'en yetuyacan lu'u nisa. ⁸ Biži bë' blë'ë Simón Pedro can' guca, na' uditzu žibinë' ure'në' lao Jesús unë' rëbinë' lëbë':

—Bibi zaca' conlë luë', porque naca' ben' napa dula' xquia.

⁹ Una Simón can', dan' bdzebinë' lente yaca ben' zëlënë'. Blë'ëyaquë' can' guca užëyaquë' bela zë gula. ¹⁰ Lëzi Santiago len bichibi' Juan, ži'i Zebedeo, nacayaquë' tuzi len Simón, bdzebitzegueyaquë'. Na'ra una Jesús rëbinë' Simón:

—Bidzebo', desde na'a cabë' ruele cuiole bela yu'u lu'u nisa, cana' ulu'ena' le'e cuiole ben' nao xneza Diuzi.

¹¹ Biži babedyinyaquë' len barco quieyaquë' ru'a nisa, na' pca'nyaquë'n uži'yaquë' uza'yaquë' ziolëyaquë' Jesús.

Beyue Jesús ben' yu'u yela' hue' ca mal de pindo

(Mt. 8.1-4; Mr. 1.40-45)

¹² Biži bazu Jesús lao yedyi, bdyin tu ben' yu'u yela' hue' ca mal de pindo. Biži bë' blë'ënë' Jesús, uditzu žibinë' ure'në' bda'te laohuë' layu unabayëchi'në' rëbinë' Jesús:

—Señor, chi re'enlo' huaca yeyuelo' nē'ēdi'.

¹³ Na'ra bda' na'a Jesús ben' na' rēbinē' lēbē':

—Re'enda' yeyua' luē'.

Ca unē' cana', biži labežite yela' hue' naca ca mal de pindo yu'u ben' na'.

¹⁴ Na'ra bē Jesús mandado rēbinē' lēbē':

—Ni tu nunu yēbo' can' babia' quio'. Tuzi ta rnia' luē', uyo yalu'e cuinlo' lao pxuzi. Na' bē' pxuzi tu ta reya'ala' hue'lo'nē' ca ta rnabē' lē'ē guichi ley quie Moisés tanun quie babeyēriilo'. Huelo' can' ta inezi yaca benē' babeži yela' hue' uyu'ulo'.

¹⁵ Pero mazeru unezi yaca benē' cabē' rue Jesús. Bdyin ben' zē gula gan' zēnē' ta rzēnagayaquē' ca rnē', lēzirē ta yeyuerēnē' nacala yela' hue' yu'uyaquē'. ¹⁶ Biži zio Jesús lao lato ga binita' yaca benē'. Lēgan' na' rulidzē' ru'elēnē' Diuzi di'idza'.

Beyue Jesús tu ben' ži

(Mt. 9.1-8; Mr. 2.1-12)

¹⁷ Biži bdyin tu dza rusēdi Jesús yaca benē'. Lēgan' na' re' yaca ben' naca partido fariseo len yaca ben' rsēdi ley quie Moisés. Uza'yaquē' yedyi quie estado Galilea len yedyi quie estado Judea, len ciudad Jerusalén. Biži na'a, conlē yela' huaca quienē', gualē Diuzi Jesús, beyuenē' yaca ben' raca žhue'.

¹⁸ Lēscana' bdyin yaca ben' nu'a ben' ži lao belaga. Re'enyayquē' udze'yaquē' lēbē' lu'u yu'ute ta quixoyaquē' lēbē' lao Jesús. ¹⁹ Biži biužaque'yaquē' tzu'ulēyaquē' ben' ži lu'u yu'u dan' nita' ben' zē gula. Na' urēyaquē' lun yu'u udubayaquē' teja, bzuyaquē' tu yero cuenda pchizayaquē' belaga ga žuba ben' ži, psedyinayquē' lēbē' gatzo lao' ga nita' benē' zaquē'lao lao Jesús. ²⁰ Caora blē'ē Jesús rueyaquē' pensari huaca Jesús yeyuenē' ben' ži, na'ra unē' rēbinē' lēbē':

—Rnia' luē', aoži'žia' dula' xquia quio'.

²¹ Biži yaca ben' rsēdi ley quie Moisés, len yaca ben' naca partido fariseo, gucayaquē' pensari unayaquē': “¿Nuži ben' niga rnaya'nē' Diuzi rnē' can'? Ni tu benē' bisaque' yezi'žeyaquē' dula' xquia quie laguedyiaquē'. Tuzi Diuzi naquē' ben' yezi'že quiero.”

²² Na'ra banezi Jesús cabē' naca pensari racayaquē'. Na' una Jesús rēbinē' leyaquē':

—¿Bixquien' racale pensari cana'? ²³ ¿Ca nurlan nacaran yalo hua' quie ben' ži niga? ¿Nacaran yalo chi yēpa'nē': “Aoži'žia' dula' xquia quio'”, o chi nacaran yalo yēpa'nē': “Uyasa, beži' belaga quio', beza', beyo'”? ²⁴ Pues cani hua' ta ulu'ena' le'e de yela' rnabē' quia', naca' bichi yugulu benē', ta yezi'žia' dula' xquia quie yaca ben' nita' lao yedyi layu.

Na'ra unē' rēbinē' ben' ži:

—Rnia' luē', beyasa, beži' belaga quio', beyo žan yu'u quio'.

²⁵ Cana' labeyasate ben' ži zaca'lao yaca ben' nita' rna', beži'nē' yada quie' ga užubanē'. Na' bezē'ē zeyoguē' žan yu'u quie' ruenē' Diuzi ben' že. ²⁶ Biži lao yugulute yaca ben' nita' rna', bēyaquē' Diuzi ben' že. Tu bebanziyaquē' can' guca quie ben' ži. Du rdzebiyaquē' unayaquē' rēbiyaquē' laguedyiaquē':

—Tu ta binelē'ēro babē ben' niga.

Ulio Jesús Leví

(Mt. 9.9-13; Mr. 2.13-17)

²⁷ Ude beyudyi bē Jesús can', uzē'ē zioquē' blē'ēnē' tu ben' huequižu laonē' Leví. Lēben' na' re'nē' ga rquizuguē' benē'. Na' unē' rēbinē' lēbē':

—Uda, unao nē'ēdi'.

²⁸ Bizi uzuli Leví pca'nnë' ta de quienë' zioquë' naohuë' Jesús.

²⁹ Ude na', bë Leví tu lani ze zan yu'u quienë' ruenë' Jesús ben' ze. Lëzi bdyinrë mazara ben' huequizu, len yaca ben' tula ure'yaquë' lao mesa.

³⁰ Bizi yaca ben' naca partido fariseo, len yaca ben' rsëdi ley quie Moisés udilayaquë' ben' quie Jesús unayaquë' rëbiyaquë' leyaquë':

—¿Bixquien' raole ri'olële tzaže len yaca ben' huequizu, len yaca ben' de dula' xquia quie?

³¹ Na'ra una Jesús rëbinë' leyaquë':

—Ben' zu dya'a, ben' biraca zhue', biruen zi guida ben' yeyue lëbë'. Pero ben' raca zhue', ruen zi guida ben' yeyue lëbë'. ³² Cala bida' rbioga' yaca ben' raca pensari bibi dula' xquia quie de, dechan' bida' rbioga' yaca ben' nezi de dula' xquia quie tacuenda yetza'yaquë' pensari quieyaquë'.

Unabayaquë' Jesús quie ubasi

(Mt. 9.14-17; Mr. 2.18-22)

³³ Na'ra unabayaquë' rëbiyaquë' Jesús:

—Ablë'ëndo' yaca ben' quie Juan len yaca ben' naca partido fariseo, rueyaquë' ubasi rlidzayaquë' Diuzi yugu dza, na' yaca ben' quio', ¿bixquien' ri'o raoziyaquë', biruejë' ubasi?

³⁴ Na'ra una Jesús rëbinë' leyaquë':

—¿Re'enle hue yaca ben' naca amigo, yaca ben' babdyin gan' raca huetzagan' ubasi tu nezu ben' utzagana' len yaca amigo quienë'? ³⁵ Bizi rnia' le'e, huadyin dza cati bira zulë ben' utzagana' len yaca amigo quienë'. Lëscana'ra hue yaca amigo quienë' ubasi.

³⁶ Lëzi unë Jesús itu ejemplo cani:

—Bireya'ala' yeda' la'ari' cubi lë'ë la'ari' gula cati binetzëri la'ari' cubi. Huaza'laoran ichezan la'ari' gula, udyiagui'ran len, biyega'nnan lëbizi.

³⁷ Lëscan' bireya'ala' ca'ro nupi zixi tu lu'u guidi bolsa gula, porque chi ca'ro nupi zixi lu'u guidi bolsa gula, huachezan len huabiagui' lao rupa cue'n.

³⁸ Lena' re'ennan tzudzu nupi zixi lu'u bolsa guidi cubi ta sibe'n zi dza, birezan. Lëcana' bicuiagui' lao rupaten. ³⁹ Lëscan' quie nu ben' ri'o puro nupi huala bire'enyauquë' yo'oyaquë' nupi zixi. Huanayaquë': "Nupi huala nacaran huen ta yo'oro."

6

Uditzu ben' quie Jesús lao trigo dza huezila'adyi'

(Mt. 12.1-8; Mr. 2.23-28)

¹ Bizi guca tu dza huezila'adyi', uza' Jesús lënë' yaca ben' quienë' zioyaquë' udeyaquë' layela ga neduza trigo. Na' uditzu yaca ben' quienë' laon ta rchibiyaquë'n ta gaoyaquë'n. ² Na'ra una yaca ben' naca partido fariseo rëbiyaquë' Jesús:

—¿Bixquien' ruele dyin uditzule lao bini trigo na'a dza huezila'adyi', dza bireya'ala' huero dyin?

³ Na'ra una Jesús rëbinë' leyaquë':

—¿Binelabale lë'ë guichi la'ia quie Diuzi cabë' bë rey David dza uduenë' lënë' yaca benë' quienë'? ⁴ Uyu'unë' lu'u idao' rna'bë'ra, uzi'në' yëta xtila naca la'ia ta ru'e pxuzi Diuzi. Na' udao rey David len, lëscan' bë'në'n yaca ben' dzaganë'. Caora na' udaoyaquë' ta bireya'ala' gaoyaquë'. Udaoyaquë' ta reya'ala' gao pxuzi.

⁵ Na' unë Jesús rëbinë' leyaquë':

—Në'ëdi', bichi yugulu benë', de yela' rna'bë' quia' ta hua' mandado bi hue yaca benë' dza huezila'adyi'.

Beyue Jesús tu ben' neseco në'ë

(Mt. 12.9-14; Mr. 3.1-6)

⁶ Biži bezu itu dza, dza huezila'adyi', uyu'u Jesús lu'u idao' sinagoga bezulaohuë' rusëdiguë' benë'. Biži na'a zë tu ben' neseco në'ë yebë. ⁷ Lëzi zërë ben' rsëdi ley quie Moisés, len yaca ben' naca partido fariseo, rbe'naoyaquë' chi hueyue Jesús ben' neseco në'ë dza huezila'adyi' tacuenda ga gaoyaquë' lëbë' xquia. ⁸ Pero banezi Jesús ca naca pensari quieyaquë'. Na'ra unë' blidzë' ben' na'a bidyi:

—Rnia' luë', uzuli uda, desë gatzo lao' ni.

Na'ra ude ben' neseco në'ë, yasënë' gatzo lao'. ⁹ Na'ra una Jesús rëbinë' leyaquë':

—Re'enda' inabacara' le'e tu di'idza' ¿ca bidan' reya'ala' huero dza huezila'adyi'? ¿Ru'en lato huero tahuen o huero tamalá? ¿Ru'en lato ute uselaro benë' o chi gutiro benë'?

¹⁰ Biži Jesús una'në' yaca ben' nita' gan' zënë'. Ude na' unë' rëbinë' ben' neseco në'ë:

—Bli na'alo'.

Caora bli na'a ben' neseco në'ë, beyacaten dya'a. ¹¹ Biži yaca ben' nita' na', lega bdza'tzegueyaquë' unayaquë' rëbiyaquë' laguediyiaquë':

—¿Ca biži huero quie ben' niga ta bira huenë' ca ruenë'?

Ulio Jesús lao chipchopa ben' gaca ben' quienë'

(Mt. 10.1-4; Mr. 3.13-19)

¹² Biži bezu dza tula uza' Jesús uyoguë' ga zu tu ya'a ta hue'llënë' Diuzi di'idza'. Lao bedu yela bë'llënë' Diuzi di'idza'. ¹³ Biži baoyeni' dza tula, gužinë' yaca ben' quie', ulioguë' lao chipchopa yaca ben' gaca ben' quie', ben' gaca apóstol. ¹⁴ Lëyaca ben' rguixogue'n laohue niga: Ulioguë' Simón, na' uxuba Jesús laohuë' Pedro. Lëscan' ulioguë' Andrés, bi' bichi Simón, len Santiago, len Juan, len Felipe, len Bartolomé, ¹⁵ len Mateo, len Tomás, len Santiago ži'i Alfeo, len Simón, ben' naca tu cue' partido cananista, ¹⁶ len Judas, bi' bichi Santiago, len Judas Iscariote, ben' usedyin Jesús lao na'a yaca ben' rnabë'.

Psëdi Jesús yaca ben' zë

(Mt. 4.23-25)

¹⁷ Na' beyëzi Jesús lao ya'a len yaca ben' quienë'. Yazëyaquë' ga naca yu lachi'. Lëgan' na' nita' ben' zë. Lëgan' na' zërë ben' uza' estado Judea, len ben' nita' ciudad Jerusalén, len yaca ben' uza'rë bago ru'a nisadao' ga re' yedyi Tiro len yedyi Sidón. Lëleyaquë' bdyinyaquë' ta uzë'nagayaquë' bi na Jesús len ta yeyue Jesús yaca ben' raca zhue'. ¹⁸ Yaca ben' redzagalao, yaca ben' yu'u bichi be xi'ibi', beyue Jesús leyaquë' beyacayaquë'. ¹⁹ Lao yugulu yaca benë' re'enyacuë' uda' na'ayaquë' Jesús, dan' neziaquë' con yela' huaca quienë' yeyuenë' leyaquë' chi bi yela' hue' yu'uyaquë'.

Ca gaca ta yedaohuero len ca gaca ta biyedaohuero

(Mt. 5.1-12)

²⁰ Na'ra una' Jesús yaca ben' quienë' na' unë':

—Yedaohue le'e chi racayëchi'le ca naca dula' xquia babële, dan' naca quiele ga rnabë' Diuzi.

²¹ Yedaohue le'e chi re'enle gata' ta yu'u ni'a xnezi quie Diuzi cabë' gue'en ben' rdue gaohuë', porque dan' gata'cazi quiele ca re'enle gata'.

Yedaohue le'e chi racayëchi'le rbedyile ca dula' xquia de lao yedyi layu, porque dan' huadyin dza sule gusto užidyile.

²² 'Yedaohue le'e cati rudie benè' le'e, cati rbioyaquè' le'e tzala'la, cati utasi unioyaquè' le'e, cati inèyaquè' nacale ben' mala tanun quie dan' naole nè'èdi', ben' naca bichi yugulu benè'. ²³ Reya'ala' yedaohuetzeguele bè' gaca quiele cana', dan' huata' tu tadya'a gula quiele cati bazule guibá. Con can' psaca xuzixta'o yaca ben' nita' na'a, udila unèlèyaquè' yaca ben' udixogue' xti'idza' Diuzi, cana' usacarèyaquè' le'e.

²⁴ 'Beyèchi' gula nacan quie le'e, ben' uña'a, ben' binao xneza Diuzi, porque ca tu ta dezi lao dyilayu niga naca quiele, bira gata' mazara.

²⁵ 'Beyèchi' gula nacan quie le'e, ben' detzague ta gao, ben' birlidza Diuzi, porque huadyin dza tuele, bira gata' ta gaole.

'Beyèchi' gula nacan quie le'e, ben' redaohue ružidy, ben' birue quie xti'idza' Diuzi, porque huadyin dza cuedyile cabè' bayèchi' za' gaca quiele.

²⁶ 'Beyèchi' gula nacan quie le'e, chi ilè'è yugulu benè' le'e ben' dya'a, dechan' binacale ben' dya'a, porque cana' bè' xuzixta'o ben' niga, blè'èyaquè' ben' dya'a ben' nazi rguixogue'yaquè' xti'idza' Diuzi, den' ben' huizi' yè'.

Reya'ala' idyè'ero yaca ben' rudie ra'o

(Mt. 5.38-48; 7.12)

Na' una Jesús rëbinè' leyaquè':

²⁷ —Pero le'e ben' ruzènaga ca rnia', reya'ala' idyè'èle yaca ben' rdza' rgüin' le'e, huele tadya'a lèle ben' rudie le'e. ²⁸ Inabale tadya'a lao Diuzi quie ben' rudze'de' le'e, ulidzale Diuzi gaca tahuen quie ben' rutasi runio le'e. ²⁹ Chi nu benè' rgapa' xagale, ulehue'nè' itzala'n capanè'. Chi nu benè' rguba gabán quiele, ulehue'nè' lente camisa quiele. ³⁰ Ulehue' nutezi benè' ta inabayaquè' le'e. Chi nu yaca ben' aozi'yaquè' ta de quiele, biyenabalen. ³¹ Ulehuelè yaca benè' con cabè' re'enle huelè yaca benè' le'e.

³² 'Chi le'e nedyè'èle tuzi ben' nedyè'è le'e, bihuele pensari tadya'a ruele, porque lente yaca ben' mala ruerèyaquè' can'. ³³ Chi le'e ruele tadya'a len tuzi ben' rue tadya'a len le'e, bihuele pensari tadya'a ruele, porque lente yaca ben' mala ruerèyaquè' can'. ³⁴ Chi le'e hue'le presta tuzi ben' runrè le'e presta, bihuele pensari tadya'a ruele, porque lente yaca ben' mala ru'erèyaquè' presta tuzi ben' ru'erè presta leyaquè'. ³⁵ Pero le'e, reya'ala' idyè'èle ben' rudie le'e, reya'ala' huelèle yaca benè' dya'a, reya'ala' hue'leyaquè' ta inabayaquè' presta, biinabale yeyueyaquè' laohue quiele. Chi huele cabè' rnia', tazera gun Diuzi quiele. Chi huele cabè' rnia', lena' uli'en tali nacale ben' quie Diuzi zu sibi. Rnia' le'e, huele ca rue Diuzi, porque naca Diuzi ben' dya'a gula. Tuzi ca rue Diuzi ruenè' tadya'a lente yaca ben' birèbi lèbè' diuxcalelo', ben' birue tahuen. ³⁶ Reya'ala' idyè'èle yaca benè' cabè' nedyè'è Xuziro Diuzi yaca benè'.

Bireya'ala' inèbìzoro quie laguedyiro

(Mt. 7.1-5)

Na' una Jesús:

³⁷ —Biinèbìzole quie laguedyile, cana' biyeyue bizo Diuzi len le'e. Bi-udyiaguì'le laguedyile, yela' na' biudyiaguì'rè Diuzi le'e. Yezi'zele quie laguedyile, yela' na' yezi'zerè Diuzi quiele. ³⁸ Hue'le ta de quiele ben' bide quie, cana' yeyun Diuzi le'e ta de quiènè'. Ca rue Diuzi biyeyunnè' lè'èti'zin, hueyunnè' mazara ta yuña'a ta de quiènè'. Con ca huelèle laguedyile, cana' huelè Diuzi le'e.

³⁹ Na'ra una Jesús unè' tu chopá di'idza' ni:

—¿Huazaque' usa' tu ben' laochula itu ben' laochula? ¿Cala huaguinu lao rupateyaquè' lu'u ga naca stèbi? ⁴⁰ Nu ben' bineyudyi huesèdi quie,

binegaquë' ca raca maestro quienë'. Pero nu ben' babeyudyi huesëdi quie, na'ra gacanë' ca tu raca maestro quienë'.

⁴¹ '¿Como dyë'ëdi rna'le bëbi dao' yu'u lu'u lao bi' bichile? ¿Na' laole le'e, birna'le yu'un bicho yaga? ⁴² ¿Como reyažole rëbile bi' bichile: "Bicha', ben lato yebioga' bëbi dao' yu'u laolo'"? ¿Na' birezaquële quiele cuinle yu'un bicho yaga? ¡Le'e ben' birue tuzi ca nale! Tanëro ulebio bicho yaga yu'u lu'u laole, cana'ra hualë'ële dyë'ëdi ta yebiole bëbi dao' yu'u lao bi' bichile.

Según ca naca ta rbialao yaga, rlë'ëro chi yaga dya'a, chi yaga median
(Mt. 7.17-20; 12.33-35)

Na' una Jesús:

⁴³ —Birbia yaga dya'a tu ta naca sla'. Lëzirë birbia tazixi yaga median. ⁴⁴ Pues quie quie yaga rlë'ëro chi yaga dya'a, chi yaga median, según ca naca ta rbialaon. Bicuia higos lao yaga yëchi'. Lëscan' bicuia bedzuli' lao luba yëchi'. ⁴⁵ Lëzi be'mbyu huen, di'idza' huen rero lu'u laxta'onë' rnënë'. Na' bizi be'mbyu mala, di'idza' mala rero lu'u laxta'onë' rnënë'. Porque dan' según ca naca ta yu'u lu'u laxta'o benë', chi tahuen, chi tamala, cana' iron lu'u laxta'oyaquë' inëyaquë'.

Ga ru'en di'idza' quie lao rupa cue' ga bëyaquë' yu'u
(Mt. 7.24-27)

Na' una Jesús:

⁴⁶ —¿Bixquien' nale në'ëdi', "Señor, Señor", na' birue quiele ca rnìa'? ⁴⁷ Nia' le'e ca naca quie ben' nao në'ëdi', ben' rue quie ca nia'. ⁴⁸ Lëcana' naca quie ben' bë yu'u quie, pqui'nnë' zitu' lu'u yu ta pcua'në' besu quie yu'u. Caora baben tu yusiu' huala, biužaquë'n usuri'n besu, dan' yu'un zitu' yu. ⁴⁹ Na' bizi ben' re ca rnìa', pero biruenë' në'ëdi' casa ca rnìa', naca quie' ca quie ben' pcua' besu delao yuzi. Caora baben tu yusiu' huala, caora na' pquinun besu, bguinu yu'u, bega'nten lao lato.

7

Beyue Jesús ben' criado quie ben' romano, ben' naca xan' soldado
(Mt. 8.5-13)

¹ Bizi cati beyudyi unë Jesús gudyinë' yaca benë', na' bezë'ë zioquë' yedyi Capernaum. ² Lëgan' na' zu tu ben' romano, ben' rnabë' soldado, naquë' capitán. Bizi zu tu criado quienë', ben' nedyë'ënë', tahuala raca žhue'në', bagazi gatinë'. ³ Bizi cati be capitán babdyin Jesús gan', na' use'elë' tu ben' rnabë' quie yaca ben' Israel ta inabayëchi'në' chi biguida Jesús yeyuenë' ben' de raca žhue'. ⁴ Bizi bë' bdyinyaquë' ga zë Jesús, na' nënyëchi'yaquë' rëbiyaquë' lëbë':

—Ben' naca xan' soldado, naquë' ben' huen, zaca'në' huelo' ca cule re'ennë', ⁵ dan' rlë'ënë' yaca ben' yedyi quiero ben' huen. Lëlēbë' bënë' mandado bëyaquë' idao' sinagoga quiero.

⁶ Na'ra uza' Jesús ziolënë' leyaquë'. Bizi baidyinyaquë' bago žan yu'u quie xan' soldado, na' use'ela' xan' soldado yaca ben' nacalënë' amigo rëbiyaquë' Jesús:

—Señor, ni tu bigaco' zëdi, porque bibi zaca' ta guido' tzu'ulo' lu'u yu'u quia'. ⁷ Tana' lena' bibeyažoga' guida' cuina' dena'a luë'. Con tu di'idza'zi inao' iyaca criado quia' hueyacabi'. ⁸ Bizi zu ben' rnabë' në'ëdi'. Lëzirë nacaria' ben' rnabë' quie soldado. Cati hua' mandado ga tzioyaquë', huay-oyaquë'. Lëzi cati hua' mandado guidayaquë', huidayaquë'. Lëzi cati rueria' mandado criado quia', ruebi' yugute ta rua'bi' mandado.

⁹ Cati be Jesús ca una xan' soldado, tu bebanzi Jesús ca unè'. Na'ra una'nè' ga nita' yaca ben' nao lèbè', unè' rèbinè' leyaquè':

—Tali nacan. Ni tu yaca ben' Israel, binelè'èda' ben' hue quie cabè' rue ben' niga, rzudyi'ilènè' nè'èdi'.

¹⁰ Biži bē' bedyin yaca ben' use'ela' xan' soldado žan yu'u quiè', bedyinyaquè' rna'yaquè' babeyaca ben' criado, ben' raca žhue'.

Beseban Jesús ži'i nigula nati xquihue

¹¹ Baode guca can', na' uza' Jesús ziolènè' yaca ben' quienè' yedyi lao Naín. Lèzi ziorè ben' zè len leyaquè'. ¹² Biži cati bdyin Jesús bago ru'a yedyi, blè'ènè' banu'ayaquè' ben' huati ta tzacachi'yaquè' lèbi'. Biži bi' guti nacabi' ži'i nigula nati xquihue. Tuzi bi' na' uzu quienè'. Ziolè yaca ben' zè, ben' lao yedyi, len nigula na'. ¹³ Biži bē' blè'è Jesús nigula na', beyèchi'la'adyi'nè' lèbè', unè' rèbinè' lèbè':

—Bicuedyo'.

¹⁴ Na' ubiga' Jesús yeda' nè'è lè'è caja quie bi' huati. Cana' uleza yaca ben' nu'a lèbi'. Na'ra unè' Jesús rèbinè' bi' huati:

—Xcuidi', rnia' lué': ¡Beyasal!

¹⁵ Caora na' uyasabi' gan' debi' lu'u caja quiebi', are'bi', rnèbi'. Na'ra beyue' Jesús lèbi' žna'bi'. ¹⁶ Biži caora blè'è yaca ben' nita' na', lega bdzebiyaquè'. Bèyaquè' Diuzi ben' že unayaquè' rèbiyaquè' laguedyiyaquè':

—Babla' tu ben' rue yela' huaca, ben' use'ela' Diuzi ladoro gan' nita'ro.

Lèzi unarèyaquè':

—Diuzi baose'elè' ben' ni ta gacalènè' ben' Israel, ben' yedyi quienè'.

¹⁷ Cana' guca unezi yaca ben' quie estado Judea, len yaca ben' yedyi re' bago con can' bē' Jesús.

Aose'ela' Juan ben' quienè' ta yenabayaquè' Jesús tu di'idza' (Mt. 11.2-19)

¹⁸ Biži be Juan cabè' yela' huaca bē' Jesús nun quie gudyi ben' quienè' lèbè' cabè' rue Jesús. ¹⁹ Cana' gužinè' chopa ben' quienè' ta uyoyaquè' yenabayaquè' Jesús chi tali naquè' ben' una Diuzi ise'ela'nè', ben' rbezayaquè' guida, o chi cala lèbè'. ²⁰ Yaca ben' use'ela' Juan bdyinyaquè' ga zē' Jesús rèbiyaquè' lèbè':

—Use'ela' Juan bautista nètō' ta denabando' lué' chi naco' ben' una Diuzi ise'ela'nè', o chi reya'ala' nita'ndo' cuezando' guida ben' tula.

²¹ Biži caora nita'lèyaquè' Jesús, blè'èyaquè' beyue Jesús nacala yela' hue' mala yu'u yaca benè', beyacayaquè'. Lèzi blè'èyaquè' bebionè' bichi be xi'ibi' yu'u yaca benè', blè'èyaquè' beyuenè' yaca ben' laochula, ben' birlè'è, belè'èyaquè'. ²² Na'ra una Jesús rèbinè' yaca ben' quie Juan:

—Uleyo uletzetixogue' Juan ca ta babia' bablè'èle babele. Uleyèbinè' quie yaca ben' laochula, barelè'èyaquè', lèscan' quie yaca ben' ži, baredayaquè', lèscan' quie yaca ben' yu'u yela' hue' ca mal de pindo, areyèriyaquè', lèscan' quie yaca ben' xcuedzo, bareyeyaquè', lèscan' quie yaca ben' baguti, rebanyaquè' tatula. Na' biži yaca ben' yèchi', rguixogui'ayaquè' di'idza' la'iya quie Diuzi. ²³ Yedaohue yaca ben' biyeyati inao nè'èdi'. —Cana' una Jesús gudyinè' ben' quie Juan.

²⁴ Biži cati zeyo yaca ben' use'ela' Juan, na' uzulao Jesús rèbinè' yaca benè' ca naca quie Juan, unè' rèbinè' leyaquè':

—ŽNuži uyole yena'le lao lato ga bidyia yu'u? ŽUyole yena'le tu ben' yun'la'adyi' ca raca tu žisi ržizi rdan bē' rda be bedun'? ²⁵ Či biuyole yena'le ben' yun'la'adyi', žnuži uyole yena'le? ŽUyole yena'le ben' zutzao', ben' naco

la'ari' dya'a? Le'e dyë'ëdi banezile ben' naco la'ari' dya'a, ben' zu lu'u yu'u dya'a, nita'yaquë' lao' yedyi ga zu rey, binita'yaquë' lao lato ga bidyia yu'u.

²⁶ Pues ca rnia' le'e, ¿nuži uyole yena'le? ¿Uyole yena'le ben' rguixogue' di'idza' la'ia quie Diuzi? Talicazi rguixogue' Juan di'idza' la'ia quie Diuzi. Nacarë' ben' ze ca ben' udixogue' xti'idza' Diuzi dza na'tela. ²⁷ Lëquie Juan rnën lë'ë guichi la'ia quie Diuzi cani:

Huase'ela' ben' cuialao neza tzetixogue'në' yaca benë' yëbinë' leyaquë' cani: “Ca rue ben' rluba neza, ben' rue dya'a xnezi, cana' huele utza'le pensari quiele, dan' baza' ben' ise'ela' Diuzi.”

Cana' rnën lë'ë guichi la'ia quie Diuzi. ²⁸ Na'ra ca rnia' le'e, entre lado yaca ben' nita' lao yedyi layu niga, nunura ben' udixogue' xti'idza' Diuzi zu nacara ze ca Juan. Na' biži, ben' zu guibá, ben' birnabë'tica ga zu Diuzi, nacaranë' ze ca Juan.

²⁹ Na' biži yaca ben' huequižu, ben' bë' Juan laohue, len yaca los demás ben' bë' Juan laohue, caora beyaquë' ca una Jesús, bezaqueyaquë' naca Diuzi ben' rue tali, ben' rue ta yu'u ni'a xnezi. ³⁰ Na' biži yaca ben' partido fariseo, len yaca ben' rusëdi ley quie Moisés, yaca ben' bibë lato hue' Juan laohue, bigu'unyaquë' ca tadya'a gu'un Diuzi hue Juan quieyaquë'. ³¹ Na' una Jesús rëbinë' yaca ben' na':

—¿Ca bi ejemplo ulu'en cabë' naca pensari quie yaca ben' nita' na'a? ¿Ca bi ejemplo rnaban ta hua' di'idza' cabë' rueyaquë'? ³² Rue yaca ben' nita' na'a ca quie xcuidi' re' lao ye'eya rëbiyacabi' laguediyacabi': “Rcuedyindo' flauta, na'ra biquitule biuya'ale. Rulando' canción bayëchi', lëscan' biuredyile.”

³³ Cana' naca quiele, porque bida Juan bautista, biudaonë' pan, bihue'enë' vino, na' le'e unale yu'unë' bichi be xi'ibi'. ³⁴ Lëzi në'ëdi', bichi yugulu benë', bida' raohua' ri'oga', na' le'e unale naca' ben' ri'o raolë'ë, ben' naca amigo quie ben' de dula' xquia quie, len yaca ben' huequižu. ³⁵ Pero yaca ben' naocazi xneza Diuzi, lëleyaquë' rulu'eyaquë' ca naca quie yela' rioñe'e quie Diuzi.

Jesús unë'në' di'idza' ni zan yu'u quie Simón, ben' naca partido fariseo

³⁶ Biži gudyi tu ben' naca partido fariseo Jesús chi biguidë' zan yu'u quienë' ta gaohuë'. Na'ra bdyin Jesús uyu'unë' lu'u yu'u ure'në' lao mesa. ³⁷ Lëlao yedyi na' zu tu nigula mala. Caora unezinë' babdyin Jesús zan yu'u quie ben' naca partido fariseo, na'ra uzë'ë zan yu'u quië' nu'ë tu frasco alabastro yudzon aceite rla' žixi žeo. ³⁸ Na' ure'në' xni'a Jesús uzulaonë' rbedyinë', rla'onë' nisa rero laohuë' ni'a Jesús. Ude na' rzi'në' guitza' guichonë' resebidyinë' ni'a Jesús, raonë' situ ni'a Jesús, uzi'në' aceite rla' žixi žeo, bla'onë'n ni'a Jesús. ³⁹ Biži ben' naca partido fariseo, ben' bë' ta udao Jesús, cati blë'ënë' cabë' bë nigula, na' guquë' pensari unë': “Chi tali ben' niga naquë' ben' use'ela' Diuzi, huacabë'në' ca naca nigula rqui' lënë', dan' naquë' nigula mala.” ⁴⁰ Na'ra una Jesús rëbinë' Simón:

—Simón, re'enda' inia' luë' tu di'idza'.

Na'ra una Simón rëbinë' Jesús:

—Una në'ëdi', maestro.

⁴¹ Na'ra una Jesús rëbinë' lëbë':

—Uzu chopa be'mbyu reya'ala'yaquë' dumi quie ben' rue presta dumi. Tunë' reya'alë' ga'yo' gayuhua dumi plata. Na' itunë' reya'alë' gatzo gayuhua. ⁴² Na' como lao rupayaquë' biužaque'yaquë' yeyu'eyaquë' ben' unabayaquë' presta dumi, quie lao rupateyaquë' bezi'ze ben' unabayaquë'

presta dumi. Na'ra rnaba' luè' tu di'idza': Lao rupayaquè', ¿ca nulayaquè' lao rupayaquè' reya'ala' gacayaquè' agradecer mazara quie ben' na'?

⁴³ Na'ra una Simón rëbinè' Jesús:

—Raqueda' ben' reya'ala' yalao quie ben' bē presta dumi.

Na'ra una Jesús rëbinè' lëbè':

—Napo' rson cabè' unao'.

⁴⁴ Biži beyëcho Jesús rna'nè' gan' zē nigula, unè' rëbinè' Simón:

—¿Rlè'ëlo' nigula niga? Nè'èdi' baoyu'a lu'u yu'u quio', na' bibenlo' nisa tzèri ni'a. Na' nigula niga baodibinè' ni'a con nisa uredyinè' besebidyinè'n con guitza' guichonè'. ⁴⁵ Baoyu'a lu'u yu'u quio', na' biudaolo' situ xaga' ca naca costumbre de quiero. Pero desde uyu'a lu'u yu'u quio', birsan nigula ni raonè' situ ni'a. ⁴⁶ Bibla'olo' aceite guichoga' ca naca costumbre de quiero, na' nigula niga babla'onè'n ni'a aceite rla' žixi zeo. ⁴⁷ Quie lena' rnìa' luè', ca tu ta nedyè'è nigula niga nè'èdi', lena' rulu'en nezinè' de yela' huenitilao quienè' ca nacala tamala babènè'. Pero nu ben' bē lè'èti'zi tamala, lèzi lè'èti'zi nedyè'ènè' ben' bezi'ze quienè'.

⁴⁸ Na'ra una Jesús rëbinè' nigula:

—Abezi'zia' ca naca dula' xquia babao'.

⁴⁹ Na' biži yaca ben' dyiarè lao mesa, yaca ben' bdyinrè udaorè, unayaquè' laguedyiaquè':

—¿Nuži naca ben' niga yezi'ženè' quie dula' xquia quie benè'?

⁵⁰ Na'ra una Jesús rëbinè' nigula:

—Dan' rzudyi'ilëlo' nè'èdi', babeyëri'lo' lao Diuzi. Beyo, bira idëbilo' quie dula' xquia quio'.

8

Gucalë yaca nigula Jesús

¹ Ude beyudyi uzu Jesús lidyi Simón, na' uza'lënè' lao chipchopa ben' quienè'. Zioyaquè' yedyi tu yedyi rguixogue'nè' yaca benè' cabè' naca yela' rnabè' quie Diuzi. ² Lèzi ziorè yaca nigula len Jesús. Lëyaca nigula beyue Jesús yela' hue' yu'uyaquè', bebionè' bichi be xi'ibi' yu'uyaquè'. Ladoyaquè' na' ziorè ben' lao María Magdalena. Lëlëbè' bebio Jesús gadyi bichi be xi'ibi' uyu'unè'. ³ Lèzi ziorè tu nigula lao Juana, žgula ben' lao Chuza, ben' naca gobierno quie rey Herodes. Lèzi ziorè itu nigula lao Susana, len yaca nigula bërè ta de quieyaquè' ta gucalëyaquè' Jesús.

Ga una Jesús tu di'idza' quie ben' raza bini trigo

(Mt. 13.1-9; Mr. 4.1-9)

⁴ Biži ca zioyaquè' yedyi tu yedyi bdyin yaca ben' zē ga zē Jesús. Caora babdupa ben' zē gan' zënè', na'ra unè' tu di'idza' ta nacan irupa iyunala rëbinè' leyaquè' canì:

⁵ —Zio tu ben' gaza bini trigo. Caora rzalanè' bini trigo ca costumbre quieyaquè', bala bini yaque'n tu neza, na' ude ja benè' bliojë'n, lëscan' aodaorè yaca bguini len. ⁶ Ibala bini trigo yaque'n lao yo ga žuba tzaye'zi yu. Bè' ulèn ubidyin, dan' binacan tubelaozi yu. ⁷ Ibala bini trigo yaque'n ga rlè guixi' yëchi'. Biži guixi' yëchi' gu'unin, na' bdyiaqui'n bini trigo. ⁸ Ibala bini trigo yaque'n ga naca tubelaozi yu. Gu'unin huen bē'n usecho dya'a. Udyian tu gayuhua bini trigo quie lao tu ni'an.

Beyudyi unè Jesús di'idza' unè' zidzo unè':

—Le'e babe, ulezè nagale can' rnìa'.

Una Jesús ga huen dyin di'idza' rusëdinë' benë'

(Mt. 13.10-17; Mr. 4.10-12)

⁹ Na'ra unaba yaca ben' quie Jesús ga huen dyin di'idza' unë'. ¹⁰ Na'ra unë' rëbinë' yaca ben' quie'.

—Uzioñe'ecazi Diuzi le'e ca naca quie yela' rnabë' quienë'. Na' yaca ben' tula, rëba' leyaquë' conlë di'idza' ta nacan irupa iyunala como dan' ba'ala'cazi rlë'ëyaquë', rueyaquë' ca ben' birilë'ë, ba'ala'cazi reyaquë', rueyaquë' ca ben' birionë'e.

Ga bexi'idzë' Jesús quie di'idza' unë'

(Mt. 13.18-23; Mr. 4.13-20)

Na' una Jesús:

¹¹ Cani naca quie di'idza' ta nacan irupa iyunala: Bini trigo ruen ca quie xti'idza' Diuzi. ¹² Na' bini yaque' tu neza, ruen ca quie benë' babzënaga xti'idza' Diuzi, pero biži za' xan'taxi'ibi' reguban ca naca di'idza' babeyaquë' ta bira hue quieyaquë'n, biyeyëriyaquë' lao Diuzi. ¹³ Na' bini yaque' lao yo ga žuba tzaye'zi yu, ruen ca quie ben' babzënaga xti'idza' Diuzi, na' uyezila'adyi'yaquë'n bë quieyaquë'n tu chi'. Pero dan' nacayaquë' ca quie lue bini biuyu'un zitu' yu, quie lena' tu chi'zi bë quieyaquë'n. Catì guta' žëdi quieyaquë', na' psanyaquë', bira bë quieyaquë'n. ¹⁴ Na' bini yaque' ga rlë guixi' yëchi', ruen ca quie ben' bzënaga xti'idza' Diuzi, pero bibë quieyaquë'n. Naoziyaquë' neza quieyaquë', rdëbiyaquë' quie dza rdayaquë' lao yedyi' layu, rza'la'adyi'yaquë' ta de lao dyilayu. Lëlëyaquë' naca quieyaquë' ca quie bini bibë' usecho. ¹⁵ Na' bini yaque' lao tubelaozi yu, ruen ca quie ben' bzënaga xti'idza' Diuzi, na' bëyaquë' quieyaquë'n. Du guicho du la'adyi'yaquë' naoyaquë'n. Lëlëyaquë' naca quieyaquë' ca quie bini bë' usecho dya'a.

Unë Jesús tu di'idza' quie tu lámpara

(Mr. 4.21-25)

Na' una Jesús:

¹⁶ —Nunu uga'ala' lámpara ta utacoron caja, ni ta ucachi'ron zan belaga. Ruen zi uzuro lámpara sibi ta useni'n ta ilë'ë ben' za' tzu'u lu'u yu'u. ¹⁷ Cabë' naca quie lámpara, cana' nacarën quie yaca benë'. Yugulu ta pcachi' yaca benë', huadyin dza yebio Diuzi ta pcachi'yaquë', cuionë'n zaca'lao ta ilë'ë ja benë' len. Lëscan' yugulu di'idza' negachi' rnë yaca benë', huadyin dza quixogue' Diuzi ca di'idza' negachi' unayaquë'.

¹⁸ Ulezë nagale dyë'ëdi. Nu ben' rue quie ta tzioñe'enë' bi na xti'idza' Diuzi, uzioñe'era Diuzi lëbë' mazara, pero nu ben' bihue quie ta tzioñe'enë' xti'idza' Diuzi, hueguba Diuzi hasta tadao' baoyoñe'enë'.

Unë Jesús quie znë'ë len bi' bichinë'

(Mt. 12.46-50; Mr. 3.31-35)

¹⁹ Biži bdyin žna' Jesús len yaca bi' bichinë' gan' zënë', pero biužaquë' tzu'uyaquë' lu'u yu'u dan' nita' yaca ben' zë gula gan' zënë'. ²⁰ Na'ra tu ben' zë gan' zënë' unë' rëbinë' lëbë'.

—Lali'a babbdyin žnao' len yaca bi' bicho'. Re'enyayuë' hue'lëyaquë' luë' di'idza'.

²¹ Biži una Jesús rëbinë' yaca ben' nita' rzënaga:

—Con nu ben' rzënaga rue quienë' xti'idza' Diuzi, lëleyaquë' naquë' ca quie žna'a, ca quie bi' bicha'.

Udila Jesús be bedun'

(Mt. 8.23-27; Mr. 4.35-41)

²² Bizi dza tula uyu'u Jesús lënë' yaca ben' quië' lu'u barco, na' unë' rëbinë' leyaquë':

—Tzioro tzala'la lagun.

²³ Na'ra uza'yaquë' zioyaquë' tzala'la lagun. Na' tu zaidyinrayaquë' guta' Jesús gusinë'. Cana' uzulao rda tu be bedun' huala gula lao nisa, baredza' nisa lu'u barco bare'ennan yeton. ²⁴ Na'ra psebë yaca ben' quienë' lëbë', unayaquë' rëbiyaquë' lëbë':

—¡Maestro! ¡Maestro! ¡Bareto barco lu'u nisa!

Cana' uyasa Jesús udilanë' be bedun' ta rda lao nisa. Lëcana' lapsanten laore'ten chizi. ²⁵ Na'ra unë' rëbinë' yaca ben' quienë':

—¿Bixquien' biuzudyi'lële Diuzi ta ute uselanë' ra'o?

Biži leyaquë' du rdzebiyaquë', unayaquë' rëbiyaquë' laguediyiyaquë':

—¿Nuži ben' niga rnabë'në' be bedun' len nisa ralen quienë'?

Beyue Jesús tu ben' yedyi Gadara, ben' yu'u bichi be mala

(Mt. 8.28-34; Mr. 5.1-20)

²⁶ Bizi bdyinyaquë' yu nebaba Gadara ta re'n tzala' lagun gan' nebaba estado Galilea. ²⁷ Biži bë' bero Jesús lu'u barco, caora na' ubiga' tu ben' yedyi na'. Baoca zi dza yu'unë' bichi be xi'ibi'. Rdanë' du guidinë', biraconë' žabanë'. Nica zuzë' žan yu'u, den' zunë' ga rcachi'yaquë' ben' huati. ²⁸ Cati blë'ënë' Jesús, na' uditzu žibinë' ure'në' lao Jesús urediyi'ya'në' rëbinë' Jesús:

—¿Bixquien' zao' niga huelo' në'ëdi' žëdi? Nubë'da' luë' Jesús, ži'i Diuzi zu guiba'. Rnabayëcha' laolo' ta biutzagalaolo' në'ëdi'.

²⁹ Cana' una ben' na' dan' bë Jesús mandato ta yero bichi be xi'ibi' yu'unë', dan' rnabë'cazin yu'un lëbë'. Biži baoca zë lasa rquioyaquë' lëbë' na'anë' len ni'anë', pero ružužu ruquinonë'n, ržunonë' rquië'n lëbë' lao lato ga bidyia yu'u. ³⁰ Na'ra unaba Jesús len:

—¿Bi laolo'?

Na' bequëbin rëbin lëbë':

—Xopa mla laohua'.

Cana' unan dan' neyë yaca taxi'ibi' uyu'u ben' na'. ³¹ Na'ra una yaca bichi be xi'ibi' unabayëchi'yacan ta biuse'ela' Jesús leyacan lu'u yero zitu' gula ga yedzagalaoyacan.

³² Lëgan' na' nita' cuchi zë lao ya'a yu'uyacaba' hua. Na' unabayëchi'yacan Jesús ta tztetzu'uyacan yaca cuchi. Na'ra bë'në' lato leyacan tztetzu'uyacan cuchi. ³³ Cana' guca bero yaca bichi be xi'ibi' ben' na', zioyacan yetzu'uyacan cuchi. Biži ca uyu'uyacan cuchi, uxitiyacaba' lu'u barranca bguinuyacaba' lu'u nisa ga gutiyacaba'.

³⁴ Biži caora blë'ë yaca ben' rapa cuchi cabë' guca quieyacaba', na' bdzebiyaquë' uza'yaquë' zioyaquë' tztetxogue'yaquë' yaca ben' lao yedyi len yaca ben' zio layela cabë' guca. ³⁵ Cana' zio yaca benë' tzena'yaquë' cabë' guca. Cati bdyinyaquë' gan' zë Jesús, blë'ëyaquë' ben' uyu'u bichi be xi'ibi'. Blë'ëyaquë' are'në' chizi xni'a Jesús, anaconë' žabanë', abeyu'unë' pensari. Caora na', tu bega'nziyaquë' bdzebiyaquë'. ³⁶ Ca naca yaca ben' blë'ë, udixogue'yaquë' cabë' guca quie ben' uyu'u bichi be xi'ibi' beroyacan gan' uyu'uyacan. ³⁷ Nun quie can' guca, gudyi yaca ben' yedyi Gadara ta yeza' Jesús yeyoguë' ga tula, dan' rdzebiyaquë' can' guca. Na' beza' Jesús beyu'unë' lu'u barco zeyoguë'. ³⁸ Pero tu bineza' Jesús, unabayëchi' ben' uyu'u bichi be xi'ibi' chi bisaque' tziolënë' lëbë' con ga zioguë'. Biži una Jesús gudyinë' lëbë':

39 —Bigaca sao!. Beyo žan yu'u quio', yetixogue' yaca ben' nita' žan yu'u quio' con cabë' bë Diuzi quio' beyaco'.

Na'ra beza'në' zeyogué' udixogue'në' yaca benë' lao yedyi con cabë' bë Jesús beyuenë' lëbë'.

Ni ru'en di'idza' quie nigula bda' zbe zaba Jesús len quie ži'i Jairo, bi' guti (Mt. 9.18-26; Mr. 5.21-43)

40 Biži cati bdyin Jesús tatula ga uzë'ë itzala' lagun, biži yaca benë' bezi'yaquë' lëbë' dyë'ëdi dan' nita'yaquë' rbezayaquë' lëbë'. 41 Lëscan' bdyin tu ben' lao Jairo, naquë' ben' napa dyin lu'u idao' sinagoga. Lëlëbë' bdyinnë' uditzu žibinë' žni'a Jesús. Na' unabë' cule lao Jesús ta tzio Jesús žan yu'u quienë'. 42 Unë' cana' dan' zu tuzi ži'inë' nigula. Lëži'inë' nigula na' chipchopa iza zubi', na' debi' raca žhue'bi' bagatibi'. Ca naca zio Jesús lënë' leyaquë' lado yaca benë', lega rquidi' yaca benë' lëbë' gan' zionë' yu'unë' neza.

43 Lëladoyaquë' na' zio tu nigula zu uba'a aoca lao chipchopa iza. Aoy-onë' lao médico zë, bënë' gasto dumi quie'. Ni tu médico biužaquë'yaquë' yeyueyaquë' lëbë'. 44 Lëlëbë' yasë' bago xcu'udzu Jesús bda'në' žbenë' žaba Jesús. Ca bda'në' žbenë' žaba Jesús, laolezate quie uba'a quienë'.

45 Biži una Jesús rëbinë' leyaquë':

—ŽNuži bda' žbe žaba'?

Na'ra una yugo yaca benë' zë na' rëbiyaquë' Jesús:

—Nunu bda' žbe žabo'.

Lëscan' una Pedro len yaca ben' laguedyinë', rëbiyaquë' lëbë':

—Maestro, rquidi' yaca benë' luë' de lao rupala'ate, na' como rnao': “ŽNuži bda' žbe žaba'?”

46 Na'ra una Jesús:

—Žu tu ben' bda' žbe žaba', dan' gucabë'da' bro yela' huaca quia' beyaca ben' bda' žbe žaba'.

47 Biži cati blë'ë nigula gucabë' Jesús can' bë nigula, du rdzebinë' bdyinnë' uditzu žibinë' žni'a Jesús. Na' unë' udixogue'në' zaquë'lao lao yaca benë', dan' bda'në' žbenë' žaba Jesús. Lëži udixogue'rënë' beyacanë' caora bda'në'n. 48 Biži una Jesús rëbinë' nigula:

—Žana', dan' zudyi'ilëlo' në'ëdi', babeyaco'. Beyo, cue' chizi lu'u guicho laxta'olo'.

49 Caora zë Jesús nernënë', cati bdyin tu ben' uza' žan yu'u quie Jairo, ben' napa dyin lu'u idao' sinagoga. Na' unë' rëbinë' Jairo:

—Baguti ži'ilo'. Bira cule huelo' Maestro zëdi.

50 Biži cati be Jesús ca unë', na' unë' rëbinë' Jairo:

—Biidzebo'. Sudyi'ilëlo' në'ëdi' con lëzin hueyaca ži'ilo'.

51 Cati bdyinyaquë' žan yu'u quie Jairo, bibë'në' lato nurla tzu'ulënë' lu'u yu'u. Na' uyu'ulënë' Pedro, len Jacobo, len Juan, len xuzi žna' xcuidi'. 52 Biži rbedyi lao yuguluyaquë' raca beyëchi' quieyaquë' quie bi' huati. Na' una Jesús rëbinë' leyaquë':

—Bicuedyile. Le'e nale bagutibi', pero në'ëdi' nia' rasizibi'.

53 Biži yaca benë' bzidyyaquë' quienë', dan' unë' can', dan' baneziyaquë' banati xcuidi'. 54 Na'ra bëxo Jesús na'a xcuidi' huati, na' unë' zidzo unë':

—Xcuidi', uyasa.

55 Ca unë' cana', babeban xcuidi' labeyasatebi'. Na' bë Jesús mandado ta hue'yaquë' ta gao xcuidi'. 56 Biži xuzi žna' xcuidi' huati, tu bega'nziyaquë' bebanyaquë' can' guca. Na' gudyi Jesús leyaquë':

—Ni tu nunu yëbile cabë' bia' quie bi' huati.

9

Use'ela' Jesús lao chipchopa ben' quienë'

(Mt. 10.5-15; Mr. 6.7-13)

¹ Na'ra betupa Jesús lao chipchopa ben' quienë' bè'në' yela' huaca quienë' ta yebioyaquë' bichi be xi'ibi' yu'u yaca benë', lëscan' ta yeyueyaquë' nacala yela' hue' yu'u yaca benë'. ² Use'ela'në' leyaquë' tzetixogue'yaquë' yaca benë' de que baza' dza inabë' Diuzi lao yaca ben' nita' lao yedyi layu, lêzi ta yeyueyaquë' ben' raca zhue'. ³ Na'ra una Jesús rëbinë' leyaquë':

—Bë' baziole yu'ule neza, ni tu bibi hua'ale, ni tu yaga, ni tu yëxo, ni ta gaole, ni dumi. Nica hua'ale chopa cue' zäbale, tu cue'zin hua'ale. ⁴ Ga idyinle zan yu'u quie benë' ga gasile, biutza'le. Tuzi ga gasile hasta que idyin dza yeza'le. ⁵ Chi ga bire'enyauquë' yezi'yaquë' le'e, uleza' lao yedyi, gusile bëxte yu dyia ni'ale ta gacan tu seña de que bibë quieyaquë' xti'idza' Diuzi.

⁶ Na' beza'yaquë' zioyaquë' lao dužete yedyi ta quixogue'yaquë' ca hue Diuzi ta gata' yela' neban quiejë' tuzioli, lêzi ta yeyueyaquë' yaca ben' raca zhue' lao duže gan' rdayaquë'.

Cabë' bë Herodes bënë' mandado bëtiyaquë' Juan

(Mt. 14.1-12; Mr. 6.14-29)

⁷ Caora na' Herodes, ben' naca gobernador, unezinë' lao dužete cabë' rue Jesús. Na' rdëbinë' raquë' pensari, dan' rna yaca benë' rnayaquë' quie Jesús naquë' Juan bautista babebannë' tatula. ⁸ Na' balayaquë' rnayaquë' quie Jesús naquë' profeta Elías abela'në' tatula. Na' ibalayaquë' rnayaquë' quie Jesús naquë' ben' udixogue' xti'idza' Diuzi tiempote, ben' beban tatula. ⁹ Biži una Herodes rëbinë' laguëdyinë':

—Në'ëdi' bia' mandado ichuguyaquë' luba' Juan agutinë'. ¿Na' nuži ben' rda ruenë' cabë' ca di'idza' ru'e yaca benë'?

Na'ra Herodes gu'unnë' ilë'ënë' Jesús.

Bgao Jesús lao ga'yo' mila be'mbyu

(Mt. 14.13-21; Mr. 6.30-44; Jn. 6.1-14)

¹⁰ Biži bë' bedyin yaca ben' quienë' gan' zu Jesús, caora na' gudiyiaquë' lëbë' con can' bëyaquë' gan' uyoyaquë'. Na'ra uquë' Jesús leyaquë' ziolënë' leyaquë' tu lao lato ga rega'nnan ga'ala' yedyi Betsaida. ¹¹ Bë' unezi yaca benë' azioguë' ru'a yedyila, na' zioyaquë' gan' zënë'. Na' bezi'në' leyaquë' udixogue'në' leyaquë' quie yela' rnabë' quie Diuzi. Lêzi beyuerënë' yaca ben' raca zhue'.

¹² Biži bardze' bara' dza, ubiga' yaca ben' quië' gan' zënë' rëbiyaquë' lëbë':

—Gudyi yaca benë' yeyoyaquë' con ga re' yedyi ga'ala' ta tzetiloyaquë' ta gaoyaquë' ta yezila'adyi'yaquë', porque gan' zëro niga, bide ta gaoyaquë'.

¹³ Na'ra una Jesús rëbinë' yaca ben' quienë':

—Ulehue' yaca benë' ni ta gaoyaquë'.

Na'ra unayaquë' rëbiyaquë' Jesús:

—Binu'ando' tazë. Ga'yo'zi yëta xtila len ichopa bela ta nu'ando'. Lëzin de chi bitziondo' tzegue'ndo' mazara ta gao yaca ben' niga. —Cana' unayaquë' rëbiyaquë' Jesús.

¹⁴ Na' biži nita' ca du ga'yo' mila be'mbyu gan' zë Jesús. Na'ra una Jesús rëbinë' yaca ben' quienë':

—Uleyëbiyaquë' cue'yaquë' lao gatzo gayuhua huioyaquë'.

¹⁵ Cana' ure'yaquë' lao gatzo gayuhua huioyaquë' lao yuguluyaquë'.

¹⁶ Na'ra uži' Jesús lao ga'yo' yëta xtila len lao chopa bela bazënë'n. Na' unë'ë ladza unë' rëbinë' Diuzi "Diuxcalelo." Ude na', bë'në'n yaca ben' quienë' ta

quisiyaquë'n hue'yaquë' ta gao yaca ben' re'. ¹⁷ Biži udao yuguluteyaquë' beloyaquë'. Ude na' besedza'yaquë' chipchopa ga' naga yaca ta yožo began'.

Una Pedro naca Jesús ben' Cristo, ben' use'ela' Diuzi

(Mt. 16.13-19; Mr. 8.27-29)

¹⁸ Biži bdyin tu dza zulë Jesús yaca ben' quienë' tu cuinziyaquë' cati bë'lë Jesús Diuzi di'idza'. Na' unë' rëbinë' yaca ben' quienë':

—¿Nuži na yaca benë' naca' në'ëdi'?

¹⁹ Na'ra una yaca ben' quienë' rëbiyaquë' lëbë':

—Balayaquë' nayaquë' luë' naco' Juan bautista, na' ibalayaquë' nayaquë' naco' Elías. Pero ibalayaquë' nayaquë' naco' ben' udirxoguerë xti'idza' Diuzi tiempote, ben' beban.

²⁰ Caora na' unë' rëbinë' yaca ben' quienë':

—¿Na'a le'e, nuži nale naca' në'ëdi'?

Na' unë Pedro:

—Luë' naco' ben' Cristo, ben' use'ela' Diuzi.

Una Jesús ca gaca quienë' cati gatinë'

(Mt. 16.20-28; Mr. 8.30-9.1)

²¹ Biži Jesús unë' gudyinë' leyaquë' dyë'ëdi ta biyëbiyaquë' benë' naquë' ben' Cristo, ben' use'ela' Diuzi. ²² Na' unë' rëbinë' leyaquë':

—Në'ëdi', bichi yugulu benë', lega yedzagalaohua'. Yaca ben' rnabë', len yaca xan' pxuzi, len yaca ben' rsëdi ley quie Moisés, huaru'unla'adyi'yaquë' në'ëdi', gutiyaquë' në'ëdi'. Pero te gaca lao tzona dza, huebana'.

²³ Lëzi unarë' rëbinë' leyaquë':

—Chi nu yaca ben' re'en inao në'ëdi', ruen zi bira inaoyaquë' ca rna pensari quieyaquë'. Ruen zi biidzebiyaquë' naoyaquë' në'ëdi' yugu dza, ba'ala'cazi ruen žudyi guti ja benë' leyaquë'. ²⁴ Chi nu yaca ben' rdzebi inaoyaquë' në'ëdi', dan' rdzebiyaquë' gatiyaquë' tanun quia', bigata' yela' neban quiejë' tuzioli. Pero nu yaca ben' bibdzebi inaoyaquë' në'ëdi', bibdzebiyaquë' gatiyaquë' tanun quia', lëlëyaquë' huata'cazi yela' neban quieyaquë' tuzioli. ²⁵ ¿Biži gan de quie nu benë' anaca quie' lao yugulate ta de lao yedyi layu, chi bigata' yela' neban quie' tuzioli? ²⁶ Chi nu ben' chu'unla'adyi' në'ëdi' yedue'yaquë' hue quieyaquë' can' baonia', lëzi në'ëdi', bichi yugulu benë', huaru'unla'adya' leyaquë' cati yeguida' inabi'a lao yedyi layu ca rey. Zeyu'a yela' huaca quie Xuza' Diuzi len yaca ángel naca la'iya quienë'. ²⁷ Tali ca rnia' le'e, binegati bala le'e nita' niga len në'ëdi' tu binelë'ële ca naca yela' huaca quie Diuzi.

Ca guca bë' betza' cuin Jesús zaca'lao lao yaca ben' quienë'

(Mt. 17.1-8; Mr. 9.2-8)

²⁸ Biži bë' guca lao xuna dza una Jesús cana', urënë' tu lao ya'a ta hue'lënë' Diuzi di'idza'. Na' uquië'në' Pedro, len Santiago, len Juan. ²⁹ Biži ca uzulaonë' ru'elënë' Diuzi di'idza', cana' betza' laohuë' len žabanë' gucan bezëri di. ³⁰ Caora na' labdyinte Moisés len Elías ga zë Jesús, ru'elëyaquë' lëbë' di'idza'. ³¹ Na' tu xni' ze ure' gan' zëyaquë' tu ru'elëyaquë' lëbë' di'idza' unayaquë' ca gaca quienë' gatinë' ciudad Jerusalén. ³² Ba'ala'cazi Pedro len ben' laguedyinë' barnatzeguen gasiyaquë', bega'nyaquë' rna'yaquë' ca naca yela' huaca quie Jesús blu'en ga zënë' len chopa ben' ru'elënë' di'idza'. ³³ Biži bë' beza' yaca ben' bë'lë Jesús di'idza', na' una Pedro rëbinë' Jesús:

—Maestro, tahlen na' zundo' lëndo' luë' niga. Ben lato huendo' tzona yu'u dao' de guizi. Huendo' tun quio', itun quie Moisés, itun quie Elías. —Cana' una Pedro den' binezinë' bi në'.

³⁴ Biži ca naca ru'e Pedro di'idza', bdyin tu beo bdubin leyaquë' gan' nita'yaquë'. ³⁵ Biži lado beo na' beyaquë' rchi' Diuzi unë' rëbinë' leyaquë'.

—Lëzi'ina' niga, ben' nedyë'ëda'. Ulezënaga quië' cabë' në' na'.

³⁶ Ude beyaquë' rchi' Diuzi, blë'ëyaquë' ituzi Jesús zënë' na'. Ganura nita' len lëbë'. Na' bega'nyaquë' bira unëyaquë'. Lëzi bibi gudyya'yaquë' yaca benë' ca guca quieyaquë' ca blë'ëyaquë'.

Beyue Jesús tu bi' yu'u bichi be xi'ibi'

(Mt. 17.14-21; Mr. 9.14-29)

³⁷ Biži bezu dza tula, beyëziyaquë' ga zu ya'a. Caora na' uyo ben' zë gula yetilalaoyaquë' Jesús. ³⁸ Na'ra unë tu ben' zë ladoyaquë' unëguë' zidzo:

—Maestro, bë tu cule, ina'lo' zi'ina' niga. Zelao tuzi lëbi' naca zi'ina'.

³⁹ Yu'ubi' tu bichi be mala ruxun lëbi' rbedyiya'bi'. Rde na' reru'unnan lëbi' layu, raca bdyin' ru'abi'. Lega rulëtzaguen lëbi', bire'ennan usannan lëbi'. ⁴⁰ Bagudya' yaca ben' quio' ta yebioyaquë' bichi be mala yu'ubi', pero biuzaque'yaquë'.

⁴¹ Na'ra una Jesús rëbinë' yaca benë':

—¡Le'e, ben' zidi yaladyi', biralele! ¿Ca balala dza re'ennan sëlía' le'e sueda' can' ruele? Yaxi' zi'ilo' dehua'abi' niga.

⁴² Biži cati bdyin bi' yu'u taxi'ibi' bago gan' zë Jesús, udi taxi'ibi' lëbi' layu, pxizeran lëbi'. Na'ra udila Jesús bichi be xi'ibi' yu'ubi' beron zeyon beyacabi'. Ude na' beyu'enë'bi' xuzibi'. ⁴³ Biži bega'n yugulu ben' nita' na' bebanyaquë' ca naca yela' huaca quie Diuzi bë Jesús.

Udixogue' Jesús tatula ca gaca bë' gatinë'

(Mt. 17.22-23; Mr. 9.30-32)

Tu reban yaca benë', na' una Jesús rëbinë' yaca ben' quienë':

⁴⁴ —Ulezënaga dyë'ëdi con can' nia'. Në'ëdi', bichi yugulu benë', usedyin yaca benë' në'ëdi' lao na'a ben' rudie në'ëdi'.

⁴⁵ Biži yaca ben' quienë' biuyoñe'eyaquë' ca unë'. Binedyin hora ta tzioñe'eyaquë' can' unë'. Lëzi bireyažoyaquë' inabayaquë' yexi'idzë' leyaquë' cabiži unë'.

Una Jesús ca nurla ben' quienë' nacara belao

(Mt. 18.1-5; Mr. 9.33-37)

⁴⁶ Biži yaca ben' quie Jesús rtzaloyaquë' unayaquë':

—¿Nurla ra'o gacararo belao cati idyinfo ga zu Diuzi?

⁴⁷ Pero nezi Jesús ca naca pensari racayaquë'. Lëcana' uži'në' tu xcuidi' bzënë'bi' cuëta lë'në'. ⁴⁸ Na'ra unë' rëbinë' yaca ben' quienë':

—Chi nu yaca ben' rezi' xcuidi' niga tanun quia', lëscan' rezi'rëyaquë' në'ëdi'. Chi nu yaca ben' rezi' në'ëdi', lëscan' rezi'rëyaquë' ben' use'ela' në'ëdi'. Quie lena', nu le'e racalë laguedyi, biruele belao cuinle, lëben' na' nacarë' ben' belao entre le'e lao yugulule.

Nu ben' birue condre ra'o, nacacazi quieyaquë' ca quie ben' rnëcule ra'o

(Mr. 9.38-40)

⁴⁹ Na'ra una Juan rëbinë' Jesús:

—Maestro, bablë'ëndo' rda tu ben' rzëtoguë' laolo' rebioquë' bichi be xi'ibi' yu'u benë'. Begadyindo'në' udilalëndo'në', dan' ruenë' cana' birdalënë' ra'o.

⁵⁰ Na'ra una Jesús rëbinë' Juan:

—Bihuegadyile ben' rue can', dan' nu ben' birue condre ra'o, nacacazi quieyaquë' ca quie ben' rnëculë ra'o.

Jesús udilë' Santiago len Juan

⁵¹ Bizi baruen bago idyin dza yeyo Jesús guibá, na' uzè'è du la'adyi'nè' bdze'nè' neza zionè' ciudad Jerusalén. ⁵² Na' aose'elè' ben' quienè' udyialaoyaquè' zioyaquè' tu yedyi quie estado Samaria ta quiloyaquè' lato ga idyinyaquè'. ⁵³ Bizi yaca ben' Samaritano, bigu'unyaquè' hueyaquè' lato ta yega'nyaquè' gan', dan' neziyaquè' bazioyaquè' ciudad Jerusalén. ⁵⁴ Bizi cati be yaca ben' quie Jesús cabè' bè yaca ben' Samaritano, na'ra una Santiago len Juan rèbiyaquè' Jesús:

—Señor, ¿re'enlo' guèžiro gui' za' guibá ta uzeina utachin leyaquè' cabè' bè profeta Elías dza na'la?

⁵⁵ Na'ra una' Jesús leyaquè' udilanè' leyaquè' unè' rèbinè' leyaquè':

—Le'e binezile ca pensari calèla yu'ule, dan' unale cana'. ⁵⁶ Nè'èdi', bichi yugulu benè', cala bida' ta aodyiaya' yaca benè', bida' ta ute usela' leyaquè'. Na' uži'yaquè' zioyaquè' yedyi tula.

Ni rnan quie ja ben' nao Jesús
(Mt. 8.19-22)

⁵⁷ Bizi azioyaquè' yu'uyaquè' neza cati bdyin tu ben' unè' rèbinè' Jesús:

—¿Señor, huaza'lia' luè' con gatezi tzio'?

⁵⁸ Na'ra una Jesús rèbinè' lèbè':

—Zu belò ga rasi yaca be'eza'. Lèzi dyiarè lidyì bguini ga rasiyacaba'. Pero nè'èdi', bichi yugulu benè', bizu lidyà' ga idyina' sua'.

⁵⁹ Na'ra una Jesús rèbinè' ben' itu:

—Uda, unao nè'èdi'.

Na' bequèbinè' rèbinè' Jesús:

—Señor, ben nè'èdi' lato tzetapa' xuxa', dan' bagatinè'.

⁶⁰ Na'ra una Jesús rèbinè' lèbè':

—Bè lato ucachi' yaca ben' birue quie xti'idza' Diuzi xuzo'. Pero na' luè', uda ta quixogue'lo' benè' xti'idza' Diuzi ca naca yela' r nabè' quienè'.

⁶¹ Na'ra una itu ben' rèbinè' Jesús:

—Señor, re'enda' inaohua' luè', pero ben lato tzeguedya' yaca ben' zu žan yu'u, chi usanyaquè' nè'èdi' ta inaohua' luè'.

⁶² Na'ra una Jesús rèbinè' lèbè':

—Nu ben' birna' tuzi xneza' inaonè' nè'èdi', chi reyèchonè' rna'nè' xcu'udzule, lena' rulu'en rnan quienè' inaonè' neza tula. Na' binaca quienè' ga zu Diuzi r nabè'nè'.

10

Use'ela' Jesús tzona galo chi ben' quienè'

¹ Bè' ude unè' Jesús di'idza', na' ulioguè' itzona galo chi benè' ta use'ela'nè' chopà huioyaquè' zioyaquè' yedyi tu yedyi ta udyialaonezayaquè' con gan' tzio Jesús. ² Na'ra unè' rèbinè' leyaquè':

—Tali rnìa' le'e, nita' ben' zè, ben' rbeza uzènaga xti'idza' Diuzi, naca quieyaquè' ca quie usecho. Pero tu chopaziyaquè' naca ben' rezi' usecho quie Diuzi, ben' rguixogue' xti'idzè'. Tana' lena', ruguìn inabale Diuzi ise'elè' mazara ben' yezi' usecho, ben' quixogue' xti'idzè'. ³ Na' uletzio le'e. Yeza'la'adyi'le rse'ela' le'e naca quiele ca quie beco' ži'ila' tziòle lado yaca ben' naca ca lobo. ⁴ Bihua'ale dumi, bihua'ale yèxo, bihua'ale ni itu cue' guidi uliole. Lèzi bitzèle hue'lèle yaca benè' zè di'idza' tu neza gan' ziole. ⁵ Catì bayu'ule lu'u yu'u quie benè', reya'ala' inale yèbile xan' yu'u: “Huabèchi Diuzi chizi lu'u guicho laxta'ole gan' zule niga.” ⁶ Chi rezi'yaquè' le'e dyè'èdi, cana' huabe' chizi lu'u guicho laxta'oyaquè'. Pero chí birezi'yaquè' le'e

dyë'edi, bicue' chizi lu'u guicho laxta'oyaquë'. ⁷ Cati idyinle yu'u gan' idyinle, na'azi sule, na'azi gaole yo'ole con ta runyaquë'. Nu ben' rue dyin, napë' derecho quizu xa'nnë' lëbë'. Tuzi yu'u gan' idyinle na' yega'nle. ⁸ Cati idyinle tu yedyi ga rezi'yaquë' le'e, ulegao ta udyiayaquë' laole gaole. ⁹ Lêzi yeyuele ben' raca zhue' yedyi gan' idyinle yëbileyaquë': "Babdyin dza hue quiele xti'idza' Diuzi." ¹⁰ Chi yedyi gan' bdyinle bigu'unyaquë' yezi'yaquë' le'e, uleta lao neza quieyaquë' inale cani: ¹¹ "Bëxte yu quie yedyi ni uda'n lu'u huaracho quiendo', usisindo'n yedyibin ta nacan tu seña bibë quiele xti'idza' Diuzi. Ruen zi inezile babdyin dza hue quiele xti'idza' Diuzi." ¹² Rnia' le'e, dza gaca juicio, huata'ra castigo huala quie ben' yedyi bibezi' le'e. Huacaran mazara cabë' bë Diuzi quie yaca ben' ciudad Sodoma dza na'la.

Ni rnën quie yaca yedyi bibë quie xti'idza' Diuzi
(Mt. 11.20-24)

Na' una Jesús:

¹³ —¡Bayëchi' gula gaca quie le'e, ben' yedyi Corazín! ¡Lëzi bayëchi' gula gaca quie le'e, ben' yedyi Betsaida! Chi blë'ë ben' yedyi Tiro len ben' yedyi Sidón ca yela' huaca bë Diuzi lao le'e, biunaoyaquë' huerayaquë' tamala quieyaquë' dza na'la. Chi blë'ëyaquë', abetza'yaquë' pensari quieyaquë', gucoyaquë' la'ari' gaso, bdyiayaquë' de guichoyaquë' ta ulu'en baneziyaquë' ca tamala bëyaquë'. ¹⁴ Quie lena', cati bdyin dza hue Diuzi juicio, huata'ra castigo huala gula quiele, cala ca castigo gaca quie ben' yedyi Tiro len ben' yedyi Sidón. ¹⁵ Na'ra le'e, ben' yedyi Capernaum, biinale rlë'ë Diuzi le'e ben' huen yeyole guibá, dechan' le'e yeyole lao gui' gabila.

Na' una Jesús rëbinë' yaca ben' quië':

¹⁶ —Nu yaca ben' ruzënaga quiele, cana' ruzënarëyaquë' quia'. Nu yaca ben' rusebi' le'e, cana' rusebi'rëyaquë' në'ëdi'. Chi nu ben' rusebi' në'ëdi', cana' rusebi'rëyaquë' ben' use'ela' në'ëdi'.

Cabë' guca cati bedyin tzona galo chi ben' quie Jesús

¹⁷ Na'ra cati bedyin tzona galo chi yaca ben' use'ela' Jesús, redaohueyaquë' unayaquë' rëbiyaquë' lëbë':

—Señor, lente yaca bichi be xi'ibi' guleyacan quiendo' cati bzëtondo' laolo'.

¹⁸ Na'ra una Jesús rëbinë' leyaquë':

—Blë'ëda' bguino xan' taxi'ibi' Satanás zan guibá, uyëzin ca rëzi bdyito hueziu'. ¹⁹ Na'ra guna' le'e yela' huaca quia' ta nuliole yaca bëla, na' nuliole yaca xuni', bibi hueyacaba' quiele. Lëscan' guna' le'e yela'huaca quia' ta huele gan xan' taxi'ibi' bihuelënan le'e. ²⁰ Tahuen na' rale yaca taxi'ibi' quiele. Pero lena' binacaten ta yedaohuele. Nacaran ta yedaohuele dan' bazu laole lë'ë guichi quie Diuzi de guibá.

Bedaohue Jesús unë'në'
(Mt. 11.25-27; 13.16-17)

²¹ Lëhora na', du yu'u Jesús Bichi Be quie Diuzi, lega redaohuenë' unë':

—Xuza' Diuzi, naco' ben' ze, naco' ben' r nabë' guibá len lao yedyi layu. Luë' pcacho' yela' huaca quio' quie yaca ben' na rioñe'e. Na' blu'elo' yela' huaca quio' yaca ben' rale quio' ca rue xcuidi' ralebi' quie xuzibi'. Cana' bao' xuza', dan' cana' re'enlo' gaca.

²² 'Lao na'a babën xuza' yugulute. Nunu nuebë' në'ëdi' ca nuebë' xuza' në'ëdi'. Lëscan' nunu nuebë' xuza' ca nuebi'a xuza'. Yaca ben' baolioga', lëleyaquë' nuebë'yaquë' xuza'.

²³ Bizi una' Jesús yaca ben' quienë', unë' rëbinë' lëziyaquë':

—Tahuen gula naca quie le'e, dan' rlë'ële cabë' rua'. ²⁴ Rnia' le'e can', dan' yaca ben' zë, ben' udixogue' xti'idza' Diuzi dza na', len yaca ben' naca rey, gu'unyaquë' ilë'ëyaquë' ca naca ta rlë'ële, pero biblë'ëyaquë'. Gu'unyaquë' yeyaquë' ca naca ta rele, pero bibeyaquë'.

Ga unë Jesús quie ben' Samaria

²⁵ Bizi tu dza tula, uyo tu ben' rusëdi ley quie Moisés gan' zë Jesús ta huenë' Jesús prueba ca bi di'idza' yequëbinë'. Na' unë' rëbinë' Jesús:

—Maestro, ¿ca bi reya'ala' hua' ta gata' yela' neban quia' tuzioli?

²⁶ Na'ra una Jesús rëbinë' lëbë':

—¿Bizi rna lë'ë guichi ley quie Moisés? ¿Ca bi ca inao' rnën?

²⁷ Na'ra bequëbi ben' rusëdi ley quie Moisés unë' rëbinë' Jesús:

—“Reya'ala' idyë'ëro Diuzi quiero du guicho du la'adyi'ro. Lëzi reya'ala' idyë'ëro laguedyiro cabë' nedyë'ëro cuinro.”

²⁸ Bizi una Jesús rëbinë' lëbë':

—Lagazi unao'. Chi hue quio' ca unao', huata' yela' neban quio' tuzioli.

²⁹ Pero ben' rusëdi ley quie Moisés, gu'unnë' gacalënë' cuinnë' cabë' di'idza' gudyinë' Jesús. Cana' unë' rëbinë' Jesús:

—¿Nuži ben' naca laguedya'?

³⁰ Na'ra una Jesús rëbinë' lëbë':

—Uza' tu ben' ciudad Jerusalén zionë' yedyi Jericó. Bizi tu neza gan' zionë', na' bro yaca ben' uban ulanyaquë' ta nu'ë. Bë'yaquë' lëbë' zi', pca'nyaquë' lëbë' du guidinë'. Bega'nnë' tu neza, ilë'ëti'zi bigutinë'. ³¹ Bizi na' zio tu pxuzi tu neza gan' de ben' na'. Bizi bë' blë'ënë' ben' de tu neza, na' udenë' tzala'la zioquë' yu'unë' neza. ³² Lëscan' uderë tu ben' naca zi'i suba Levi gan' de ben' naca zi'. Lëzi cati blë'ënë' ben' na', tu udezinë' zionë' yu'unë' neza. ³³ Lëzi zio tu ben' uza' tu yedyi quie estado Samaria tu neza gan' de ben' naca zi'. Bizi ca blë'ënë' lëbë' gan' denë', na' beyëchi'la'adyi'në' lëbë'. ³⁴ Na'ra ubiga'në' gan' de ben' naca zi', bla'onë' aceite len vino gan' naca hue'. Ude na' ptubinë' la'ari' lao hue'. Na' pcuënë' lëbë' xcu'udzu bia quienë' uquië'në' lëbë' con gan' idyinyaquë' yega'nyaquë'. Lëgan' na' unë'ë lëbë'. ³⁵ Bizi bezu dza tula, tu binesë'ë, ulio ben' Samaria chopa dumi plata bë'në'n ben' naca xan' yu'u gan' bdyinyaquë'. Na' unë' rëbinë' lëbë': “Gapo' na' hue'lo' ta gao ben' niga. Chi biguque dumi niga, na' aozala'ora' quizuga' bë' yedia' tatula.”

³⁶ Na' una Jesús rëbinë' ben' rusëdi ley quie Moisés:

—Pues rnaba' luë', lao yuna yaca ben' ude na', ¿ca nurlayaquë' naca ben' laguedyi ben' guca zi'?

³⁷ Na'ra una ben' rsëdi ley quie Moisés rëbinë' Jesús:

—Ben' beyëchi'la'adyi' ben' guca zi'.

Na'ra una Jesús rëbinë' lëbë':

—Beyo, bërë con cabë' bë ben' na', ben' beyëchi'la'adyi' ben' guca zi'.

Ga bdyin Jesús lidyí Marta len María

³⁸ Na' uza' Jesús uyu'unë' neza zionë' bdyinnë' ga de tu yedyi. Lëgan' na' zu tu nigula laonë' Marta. Lëlëbë' bezi'në' Jesús zan yu'u quienë'. ³⁹ Na' zu tu zila Marta laonë' María. Ure'në' xni'a Jesús ta uzënanagë' cabë' rna Jesús.

⁴⁰ Pero lega rdyine Marta quie dyin quienë' rusiña'në' ta gaoyaquë'. Na'ra ubiga'në' ga re' Jesús unë' rëbinë' lëbë':

—Señor, ¿bixquien' birdëbilo' quia' në'ëdi'? Apcan' zila' María në'ëdi'. Tuza' rua' dyin niga. Gudyi zila' tu di'idza' yeguidabi' gacalëbi' në'ëdi'.

⁴¹ Na'ra una Jesús rëbinë' lëbë':

—Marta, Marta, lega rdyinelol' rdëbilo' quie dyin quio!'. ⁴² Pero ta uzënegaro xti'idza' Diuzi nacaran belao. Cabë' rue Maria, re'bi' ruzënegabi' can' nia', lena' nacaran huen. Bisaque' yëpa'bi': "Beyo, bicue'lo' rzënego' can' rnia'."

11

Ga psëdi Jesús yaca ben' quienë' ta hue'lëyaquë' Diuzi di'idza'

(Mt. 6.9-15; 7.7-11)

¹ Biži bdyin tu dza uzu Jesús tu lao lato ga bë'lënë' Diuzi di'idza'. Bë' beyudyi bë'lënë' Diuzi di'idza', na' unë tu ben' quienë' rëbinë' lëbë':

—Señor, psëdi nëtö' cabë' huendo' ta hue'lëndö' Diuzi di'idza' cabë' bë Juan psëdinë' yaca ben' quienë'.

² Na'ra una Jesús rëbinë' yaca ben' quienë':

—Cati hue'lële Diuzi di'idza', inale cani:

Xuzindo' Diuzi zulo' guibá, naca la'iya laolo'.

Rbezando' guida dza inabë'lo' lao yedyi layu cabë' rnabë'lo' guibá ga zulo'.

³ Guno' ta gaondo' quie na'adza cabë' ta rdzioguendo'.

⁴ Bezi'ze quiendo' tamala bëndö' cabë' rezi'zendo' tamala bë yaca benë' len nëtö'.

Gacalao' nëtö' ta biiguinondo' lao tamala, ucuasa ucu'olo'tamala za' gaca quiendo'. Amén.

⁵ Lëzi unarë Jesús rëbinë' leyaquë':

—Ugunro lao tu le'e tziöle gatzo yela lidyí tu amigo quiele yëbilenë': "Amigo, ben në'ëdi' tzona yëta xtila ⁶ como dan' babla' tu bi' amigo quia' zan yu'u. Na' bibi de ta hua'abi' gaobi'." ⁷ Lëzi ugunro bequëbi ben' zu lu'u yu'u unë': "Bihuelo' në'ëdi' zëdi, dan' baneyeyo yu'u quia'. Lëzi arasi yaca xcuidi' quia' rzubayacabi' lao cama len në'ëdi'. Bisaque' chasa' guna' luë' dan' rnabo'." ⁸ Pues rnia' le'e, chi lëbë' biuyasë' hue'në' ta rnaba ben' na', ba'ala'cazi naquë' bi' amigo quienë', re'en ca re'ennan chasë' hue'në' yugulu ta rdziogue amigo quienë' tacuenda bira bizëdi huenë' lëbë'. ⁹ Cani rnia' le'e: Ulenaba Diuzi ta rdzioguele, na' gunnë'n. Ulequilo tali quie Diuzi, na' huadzëlan. Ulelidza Diuzi gan' zunë', na' huenë' quiele. ¹⁰ Ruen zi huele cana', porque nu ben' rnaba Diuzi ta rdzioguenë', na' hue'në'n. Lëscan' nu ben' rguilo tali quie Diuzi, na' huadzëlenë'n. Lëscan' nu ben' rulidza Diuzi gan' zunë', na' huenë' quienë'.

¹¹ ¿Bi ca nale le'e xuzi xcuidi'? ¿Hue'le zi'ile yola lao laza inababi' yëta xtila? Lëzi, ¿hue'le zi'ile bëlala lao laza inababi' bela? ¹² Lëzi, ¿hue'le zi'ile xuni'la lao laza inababi' chita? ¹³ Chi le'e, ben' rda lao yedyi layu niga, chi nezile hue'le zi'ile tu tadya'a, na' biži Xuzile Diuzi zu guibá, neziranë' ca le'e hue'në' benë' tu tadya'a, hasta udze'në' Bichi Be quienë' lu'u guicho laxta'o yaca ben' unaba len.

Ga una benë' bebio Jesús bichi be xi'ibi' conlë yela' huaca quie xan' taxi'ibi'

(Mt. 12.22-30; Mr. 3.19-27)

¹⁴ Biži bdyin tu dza bebio Jesús tu bichi be xi'ibi' yu'u tu ben' bero. Caora bero bichi be xi'ibi' gan yu'un, labeyacate ben' na', benë'në'. Na'ra bega'n yaca benë' bebanyaquë' cabë' guca quienë'. ¹⁵ Cana' una bala benë' rëbiyaquë' laguediyaquë':

—Conlë yela' huaca quie Beelzebú, ben' naca xan' taxi'ibi', rebio ben' niga bichi be xi'ibi' yu'u yaca benë'.

¹⁶ Biži ibalayaquë' unabayaquë' hue Jesús tu yela' huaca quie Diuzi zan guibá chi tali naquë' ben' use'ela' Diuzi. ¹⁷ Pero banezi Jesús cabë' pensari raca yaca benë'. Na' unë' rëbinë' leyaquë':

—Chi tu cue' gobierno gaca zē cue' partido, chi tilalēyaquē' laguediyaquē' ben' naca partido, bisue gobierno inabē'yaquē' zidza. Lēzi chi gata' dila quie yaca ben' žan yu'u, huaroyaquē' huadzatzayaquē', bira saque' suyaquē' tuzi.

¹⁸ Lēzi cana' nacarē quie Satanás. Chi rbio Satanás laguedyi bichi be xi'ibi'n yu'u benē', bira saque' inabē'n'an zidza. Nia' le'e cana', como dan' nale conlē yela' huaca quie Beelzebú rebioga' bichi be xi'ibi' yu'u yaca benē'. ¹⁹ Pero chi nacan talí ca nale, ¿bizi nale quie yaca ben' naca le'e tuže, yaca ben' rebio bichi be xi'ibi' yu'urē yaca benē'? Lena' huanayaquē' le'e bisaque' taxi'ibi' yebion laguedyi xi'ibi'n. ²⁰ Pero conlē yela' huaca quie Diuzi rebioga' bichi be xi'ibi' yu'u yaca benē'. Lena' ulu'en azēcazi ladolē yela' huaca quie Diuzi.

²¹ 'Baruen quie Satanás ca quie tu ben' huala, ben' nuxu espada quie, ben' rapa lao yugulute ta de quie. Bisaque' tzu'u ben' tula si' ta de quienē'. ²² Na'ra chi guida tu ben' hualara ca lēbē', ben' dera yela' huaca quie, huenē' gan ucaxonē' lēbē'. Cana' cubanē' espada quienē' ta rzugadyilenē'. Cana' si'nē' lao yugulute ta de quienē'.

²³ 'Nu ben' birnēcule nē'ēdi', condre nē'ēdi' zēnē'. Lēzi nu ben' biracalē nē'ēdi', condre nē'ēdi' ruenē'.

Ni rnan quie tu bichi be xi'ibi' beron beyu'un
(Mt. 12.43-45)

Na' una Jesús:

²⁴ —Bizi cati bero tu bichi be xi'ibi' ga yu'un benē', na' rdan tu lao lato bidyi rguilon ga tzu'unan yezila'adyi'n. Bizi cati birdzela ga tzu'un, na' racan pensari: “Hueya'a tatula gan' broga' ta yeyu'a tatula.” ²⁵ Biži bē' yedyinnan gan' brona be'mbyu, anaca quienē' ca quie tu žan yu'u neluba dya'a, bega'nnan dya'a gula. ²⁶ Na'ra tzion tzaxi'n igadyi bichi be xi'ibi' nacara mala ca len. Na'ra tzu'u yuguluyacan be'mbyu. Biži ben' na' huacara mala quienē' cabē' naca quienē' tanēro.

Ni rnēn quie ben' naca huen quie

²⁷ Tu rnē Jesús rēbinē' benē', na' unē tu nigula zidzo rēbinē' Jesús:

—Naca huen quie nigula bi'a bga'adyi' luē'.

²⁸ Na'ra una Jesús rēbinē' lēbē':

—Nacara huen quie ben' re rzēnaga ca rna Diuzi, na' rue quieyaquē'n.

Unaba ben' mala ulu'e Jesús tu yela' huaca za' guibá
(Mt. 12.38-42; Mr. 8.12)

²⁹ Biži bdyinra yaca ben' zē gan' zē Jesús, na' uzulaonē' unē' rēbinē' leyaquē':

—Ben' mala naca ben' nita' na'a. Rnabarēyaquē' hua' yela' huaca ta za' guibá ilē'ēyaquē'. Pero bihua' yela' huaca ta za' guibá ca re'enyayquē'. Ca yela' huaca bē Diuzi lēnē' profeta Jonás, cana' huerēnē' lēnē' nē'ēdi'.

³⁰ Cabē' guca quie Jonás, bē Diuzi yela' huaca len lēbē' ta blu'enē' yaca ben' nita' yedyi Nínive ga use'ela' Diuzi lēbē', lēzi cana' gacarē quia' nē'ēdi', bichi yugulu benē'. Hue Diuzi len nē'ēdi' tu yela' huaca ta ulu'enē' yaca ben' nita' na'a de que use'ela'nē' nē'ēdi'. ³¹ Dza gaca juicio cati ichuguli Diuzi quie yaca ben' nita' na'a, lēcana' guida nigula r nabē' lao yedyi nebaba Arabia ta ichugubē'nē' quiele. Cana' huenē' como dan' lēbē' uzē'ē yedyi re' zitu' zioquē' yezēnaguē' ca ta rionē'e Salomón dza na'la. Pero ladole zua' nē'ēdi', ben' r nabē'ra ca Salomón, na' le'e biruzēnagale quia'. ³² Lēzi dza gaca juicio cati ichuguli Diuzi quie yaca ben' nita' na'a, lēcana' guida yaca ben' unita' yedyi Nínive dza na'la ta ichugubē'yaquē' quiele. Cana' hueyaquē' como dan' leyaquē' betza'yaquē' pensari quieyaquē' caora cati bdyin Jonás

udixogue'në' leyaquë' xti'idza' Diuzi. Pero ladole zua' në'ëdi', ben' rnabë'ra ca Jonás, na' le'e biruzë'nagale quia'.

Una Jesús quie ben' yu'u pensari quie Diuzi
(Mt. 5.15; 6.22-23)

Na' una Jesús:

³³ —Ni tule biuga'ala'le lámpara ucui'olen ga negachi', nica quixolen zan caja. Ruen zi ixubalen sibi ta useni'n ta ilë'ë yaca ben' za' tzu'u yu'u. ³⁴ Naca laole ca quie tu lámpara rseni'n lu'u guicho laxta'ole. Chi ina'le dyë'ëdi hue quiele xti'idza' Diuzi, lena' rulu'en quiele yu'u pensari quie Diuzi lu'u guicho laxta'ole. Pero chi biina'le dyë'ëdi, chi bihue quiele xti'idza' Diuzi, lena' rulu'en quiele rdale lao lato lao chula. ³⁵ Gapale cuidado hue quiele xti'idza' Diuzi ta bitale lao lato lao chula. ³⁶ Chi rue quiele du guicho du la'adyi'le xti'idza' Diuzi, cana' tzioñe'le ca naca tali quie Diuzi, cana' gaca quiele ca quie ben' zë lámpara ta useni'n ilë'ënë' ga zionë'.

Ga rao Jesús xquia yaca ben' partido fariseo, len yaca ben' rusëdi ley quie Moisés

(Mt. 23.1-36; Mr. 12.38-40; Lc. 20.45-47)

³⁷ Biži babeyudyi unë Jesús cana', na'ra gudyi tu ben' partido fariseo Jesús ta tzionë' zan yu'u quienë' ta gaonë'. Na' zio Jesús uyu'unë' lu'u yu'u quienë' yaque'në' ru'a mesa. ³⁸ Na'ra tu bebanzi ben' partido fariseo rnë'ë ta biudibi na'a Jesús tu zagaonë'. Biunao Jesús ca naca costumbre unaoyaquë' rnayaquë' dan' rguibi na'ayaquë', cana' neyëriyaquë' lao Diuzi. ³⁹ Na'ra una Jesús rëbinë' lëbë':

—Le'e ben' partido fariseo, rguibile xcu'udzu plato taza quiele, pero le'e yu'u pensari mala lu'u guicho laxta'ole, rbanle ruele tamedian quie laguedyile. ⁴⁰ ¡Le'e ben' zidi! ¿Binezile re'en Diuzi huerële yëri lu'u guicho laxta'ole? ⁴¹ Pero chi re'enle huele yëri lu'u guicho laxta'ole, ulehue' ta de quiele yaca ben' yëchi'. Na'tera gacale yëri duzele.

⁴² ¡Bayëchi' gula naca quie le'e, ben' partido fariseo! Biži lente guixi' cuan ru'ele Diuzi tu cue'n quie lao chi cue'na. Pero biruele bala ta yu'u ni'a xnezi quie Diuzi, nica nedyë'ële Diuzi. Lena' zaca'ra huele, cala ca ta ru'ele Diuzi tu cue'n quie lao chi cue'na, pero rupaten reya'ala' huele.

⁴³ ¡Bayëchi' gula naca quie le'e, ben' partido fariseo! Lega raxele cue'le silla ga rbe' yaca ben' bala'ana lu'u idao' sinagoga. Na' lëzi lega raxele gapala'n benë' le'e ga ziole yu'u neza.

⁴⁴ ¡Bayëchi' gula naca quie le'e, ben' rusëdi ley quie Moisés, len le'e, ben' partido fariseo! Le'e biruele tuzi ca nale. Naca quiele ca quie yerobá nadocon bëbi. Na' biži yaca benë' rdeyaquë' laonan bineziyaquë' chi yerobá na'.

⁴⁵ Na'ra una tu ben' rusëdi ley quie Moisés rëbinë' Jesús:

—Maestro, ca di'idza' unëlo', lëzi rnërao' condre nëto'.

⁴⁶ Na'ra una Jesús rëbinë' leyaquë':

—¡Bayëchi' gula naca quie le'e, ben' rusëdi ley quie Moisés! Ruele cabë' rue ben' rucua' yua' zi'i gula lao laguedyin tu ta bisueyaquë'. Re'enle inao yaca benë' le'e, hue quieyaquë' ca inale, na' inale cana' re'en Diuzi hueyaquë', ba'ala'cazi zëdi gula nacan ta hue quieyaquë' len. Na'ra le'e ni lë'ëti' biyeyëchi'la'adyi'le yaca benë' gacalële leyaquë' ta hue quieyaquë' len.

⁴⁷ ¡Bayëchi' gula naca quie le'e, ben' rusëdi ley quie Moisés! Como dan' cabë' bë xuzixta'ole dza na'la bëtiyaquë' nu ben' uda udixogue' xti'idza' Diuzi, cana' re'enle huerële. ⁴⁸ Nacale de acuerdo con can' bë xuzixta'ole. Chi le'e

uzurële dza uzu xuzixta'ole, lêzi bêtile yaca ben' uda udixogue' xti'idza' Diuzi. Gucalêle lëbizi xuzixta'ole.

⁴⁹ 'Yela' rioñe'e quie Diuzi unë' cani: "Huase'ela' yaca ben' quixogue' di'idza' quia' laoyaquë'. Na'ra gutiyaquë' balayaquë', na' hualaoyaquë' ibalayaquë'." ⁵⁰ Pero le'e, ben' nita' na'a, huazi' Diuzi cuenda quiele quie yela' guti quie yugulu yaca ben' udixogue' xti'idza' Diuzi, desde dza ure' lao yedyi layu. ⁵¹ Pues desde dza ulato ren quie Abel hasta dza bëtiaquë' Zacarías lu'u idao' xcu'udzu becugo, lëlena' huazi' Diuzi cuenda quiele.

⁵² 'jBayëchi' gula naca quie le'e, ben' rusëdi ley quie Moisés! Le'e ruza'agale tzioñe'e yaca benë' xti'idza' Diuzi. Le'e birioñe'ele xti'idza' Diuzi, nica ru'le lato tzioñe'e yaca ben' re'en tzioñe'e len. —Cana' una Jesús gudyinë' leyaquë'.

⁵³ Bë' una Jesús can' gudyinë' leyaquë', na'ra bdza'tzeguera yaca ben' rusëdi ley quie Moisés, len yaca ben' partido fariseo. Caora na' uzu-laoyaquë' rueyaquë' lëbë' zëdi unabayaquë' lëbë' mazara di'idza'. ⁵⁴ Lega rbe'naoyaquë' lëbë' re'enaquë' hueyaquë' trampa quie Jesús ca di'idza' yequëbinë' tacuenda ga gaoyaquë' lëbë' xquia.

12

Ga unë Jesús quie ben' rlidza Diuzi de di'idza' ladzazi

¹ Bizi banita' ben' zë gula ga zë Jesús. Tantozi babdupa ben' zë, barquidi'yaquë' laguedyiaquë'. Na'ra una Jesús rëbinë' yaca ben' quienë':

—Gapale cuidado bihuele ca rue yaca ben' naca partido fariseo, dan' nacayaquë' ben' rlidza Diuzi de di'idza' ladzazi. ² Yugulu ta bë yaca benë' negachi'zi, decazide yezacalaon quieyaquë' lao Diuzi cabë' bëyaquë'. Ni tu ta bë yaca benë' raqueyaquë' chi nunu blë'ë, decazide yezacalaon quieyaquë' lao Diuzi cabë' bëyaquë'. ³ Yugulu ca naca di'idza' negachi' rna yaca benë', huadyin dza yezacalaon quieyaquë' lao Diuzi cabë' di'idza' unayaquë'. Lëzi yugulu di'idza' raque yaca benë' di'idza' negü'io, huadyin dza inezi yugulu benë' cabë' di'idza' unayaquë'.

Ni ru'en di'idza' quie nu ben' reya'ala' idzebiro (Mt. 10.26-31)

Na' una Jesús:

⁴ —Le'e amigo quia', rnial' le'e: Biidzebile nu ben' re'en guti le'e, como dan' bë' bagutiyaquë' le'e, bira bide bihueyaquë' quiele. ⁵ Ta rnial' le'e nu ben' reya'ala' idzebile. Reya'ala' idzebile Diuzi como dan' de yela' rnabë' quienë' yezi'në' yela' neban quie yaca benë', na' udze'në' leyaquë' lu'u gui' gabila.

⁶ 'Lëscan' rnial' le'e: ¿Cala ruti'yaca benë' ga'yo' bguini dao' lao chopadumi dao' lasi? Na' bizi la'acazi nacaba' bguini dao' bižu, birala'adyi' Diuzi quieyacaba'. ⁷ Ta rnial' le'e, hasta guitza' guichole nulaba Diuzi lao yuguluten. Biidzebile, zaca'rale lao Diuzi mazara ca yaca bguini dao'.

Ni ru'en di'idza' quie yaca ben' birnë cule Jesucristo (Mt. 10.32-33; 12.32; 10.19-20)

Na' una Jesús:

⁸ —Ta rnial' le'e, nu ben' rnë cule në'ëdi' lao yaca ben' nita' lao yedyi layu, lêzi në'ëdi', bichi yugulu benë', huania' cule leyaquë' lao yaca ángel quie Diuzi. ⁹ Pero nu yaca ben' bichezila'adyi' në'ëdi' lao yaca ben' nita' lao yedyi layu, lêzi në'ëdi' bichezila'adya' leyaquë' lao yaca ángel quie Diuzi.

¹⁰ 'Nu ben' rnëxi'ibi' condre në'ëdi', bichi yugulu benë', ru'en lato yezi'ze Diuzi quieyaquë'. Pero nu ben' rnëxi'ibi' condre Bichi Be quie Diuzi, biyezi'ze Diuzi quieyaquë'.

¹¹ 'Cati usedyinyaquë' le'e lao na'a ben' napa dyin lu'u idao' sinagoga, o chi lao na'a yaca juez, o chi lao na'a yaca ben' rnabë', bidëbile bi di'idza' inale yequëbile yëbileyaquë'. ¹² Cati idyin hora inale yequëbile yëbileyaquë', caora na' huacalë Bichi Be quie Diuzi le'e bi inale yequëbile yëbileyaquë'.

Ga rue zudyi quie ben' uña'a

¹³ Biži lado yaca ben' na', uzë tu benë' unë' rëbinë' Jesús:

—Maestro, aguti xuza'. Gudyi ben' bicha' gunnë' ta de quie xuza' ca tu ta redu'uleda' si'a.

¹⁴ Na'ra una Jesús rëbinë' lëbë':

—Rnia' luë', binacan dyin quia' para hua'a laze quiele quie ta de quie xuzile.

¹⁵ Lëscan' unë' rëbinë' leyaquë':

—Gapale cuidado ta bisa'la'adyi'le ta de lao yedyi layu, como dan' nacaran belao quiele gata' yela' neban quiele tuzioli, cala ca ta sa'la'adyi'le ta de lao yedyi layu.

¹⁶ Na'ra una Jesús tu ejemplo cani:

—Uzu tu ben' uña'a. Guzanë' lao yu quienë'. Lega guca usecho quienë'.

¹⁷ Biži ben' uña'a guquë' pensari unë': "¿Ca biži hua'/? Bide ga udzi'a usecho quia', dan' lega gucana." ¹⁸ Lena' guquë' pensari unë': "Banezda' ca ta hua'. Uquinuga' yu'u ga udzi'a usecho, bigaquen. Lena' huera' tažera tacienda gagen ga udzi'a usecho quia' len yugulu ta de quia'." ¹⁹ Lëscan' guquë' pensari unë' cuinzinë': "Lega guca usecho quia'. Huaquen lao zë iza. Quie lena' abdyin hora yezila'adya', zua' contento, yo'oga', gaohua'." ²⁰ Pero na' una Diuzi rëbinë' ben' uña'a: "Ben' tondo luë', na'ayela gatio'. Na' yugulu ta de quio', ¿nuži gaca quie len'?" ²¹ Cana' nacan quie ben' uña'a chi rcuezanë' quie' cuinzinë' dza rdanë' lao yedyi layu. Na' biži Diuzi rlë'ënë' lëbë' ben' yëchi' gula.

Rna'cazi Diuzi ben' nao xnezë' (Mt. 6.25-34)

²² Beyudyi una Jesús cana', unë' rëbinë' yaca ben' quienë':

—Con ca rnia' le'e, bidëbile ga za' ta gaole. Bidëbile ga za' ta gacole.

²³ Nacaran belao hue quiele xti'idza' Diuzi dza rdale lao yedyi layu, cala ca ta idëbile ga za' ta gaole, ta gacole. ²⁴ Ulena'cara ca raca quie yaca bguini. Birazara'nyacaba', biruerëyacaba' ga udze'yacaba' ta gaoba', den' rgaocazi Diuzi leyacaba'. Na' biži le'e, jzaca'rale ca yaca bguini! ²⁵ Nitu nitule, ba'ala'cazi rdëbitzeguele, bisaque' uda'rale ni itu hora ta yezurale lao yedyi layu bë' beya dza quiele. ²⁶ Na' chi ni ilë'ëti' bisaque' uda'rale yezurale lao yedyi layu bë' beya dza quiele, ¿bixquien' rdëbile ga za' ta gaole, ga za' ta gacole?

²⁷ 'Ulena'cara ca re'eni yaca yo. Birueyacan dyin, bira'aban yëla. Na' biži rnia' le'e, ni rey Salomón, ba'ala'cazi guconë' la'ari' tzaol, la'ari' baquitu, bibetilan lëbizi yela' baquitu quie yo. ²⁸ Cabë' rue Diuzi rapë' yo ta de lao layëla, ba'ala'cazi gaca tu chopa dza huabidyin tzu'un lagui' tzeina, cana' huaparë Diuzi le'e, pero mazara le'e, ben' rdëbi ga za' ta gaole, ga za' ta gacole. ²⁹ Quie lena', bitale idëbile quilole ga za' ta gaole, ga za' ta yo'ole. ³⁰ Bihuele cana', dan' cana' rue yaca ben' rda lao yedyi layu, rdëbiyaquë' bi ta gata' quieyaquë'. Pero zucazi Xuziro Diuzi, rnë'ë le'e, banezinë' bi ta

rdzioguele. ³¹ Ta nacaran belao hue quiele inaole xneza Diuzi, lëcana' gunnë' lao yugulute ta rdzioguele.

Una Jesús ga reya'ala' gata'yela' uña'a quiero
(Mt. 6.19-21)

Na' una Jesús:

³² —Bidzebile, nacale ca quie beco' zi'ila' quia', bia napa'. Ba'ala'cazi naca tu chopale, lega redaohue Xuziro Diuzi gunnë' lato yedyinle ga zunë' rnabë'në'. ³³ Uleguti' ta de quiele. Dumi dan' guti'le ta de quiele, na' ulehue'n ben'bide quie. Cana' huacara tadya'a quiele guibá, gun Diuzi quiele ta de guibá. Na' ta gata' quiele guibá, bisaque' cuan benë' len, nica nu tzu'u udyiagui' len. ³⁴ Con ga re'enle gata' yela' uña'a quiele, chi lao yedyi layu, chi guibá, lena' ulu'en ca bi pensari racale, chi quie cuinzile, chi quie Diuzi.

Reya'ala' suro puesto cuezaro yeguida Cristo

Na' una Jesús:

³⁵ —Ulesu listo, ulehue ca rue ben' ruga'ala' lámpara quie, barbezë' chi ben' idyin zan yu'u. ³⁶ Reya'ala' huele ca rue ben' zu rapa zan yu'u quie xa'ne, ben' rbeza bë' yedyin xa'nnë' gan' tzioguë' ga raca huetzagana'. Rbezë' ulidza xa'nnë' lëbë' ru'a yu'u ta isaloguë' ta yeyu'u xa'nnë'. ³⁷ Tahuen gula naca quie ben' rapa yu'u bë' yedyin xa'nnë', ilë'ënë' zuë', rnë'ë birasinë'. Lëlena' nacan tali rnia' le'e, cuin xa'nnë' huabëchinë' lëbë' lao mesa, hue'në' laze ta gao ben' rapa yu'u. ³⁸ Lëzi tahuen gula naca quie ben' rapa yu'u chi zuë' rnë'ë birasinë' bë' yedyin xa'nnë', ba'ala'cazi du gatzo yela, ba'ala'cazi du bala. ³⁹ Uzënagale ca rnia' le'e ni. Chi tu ben' xan' yu'u ineziguë' bi hora idyin ben' uban, na'ra sunë' inë'ë bigasinë', bihuë'në' lato ta tzu'u ben' uban lu'u yu'u ta cuannë' ta de quienë'. ⁴⁰ Na' bi'zi le'e, ulesu listo cuezale yeguida', como dan' caora bibi pensari racale yeguida', lao durpendizi yeguida' lao yedyi layu në'ëdi', bichi yugulu benë'.

Ni rnën quie ben' bzu di'idza' len ben' bibzu di'idza'
(Mt. 24.45-51)

⁴¹ Na'ra una Pedro rëbinë' Jesús:

—¿Señor, unëlo' di'idza' ta nacan irupa iyunala para nëto'zi o chi unëlo'n lao duzetela?

⁴² Na'ra una Jesús rëbinë' lëbë':

—Rnia' di'idza' ta nacan irupa iyunala para nutezi ben' rioñe'e, para nutezi ben' ruzu di'idza' ca rna xa'nnë'. Lëben' na' hue xa'nnë' ladyina'anë' ta inë'ë ben' nita' zan yu'u quienë' ta hue'në' ta gaoyaquë' caora idyin hora gaoyaquë'. ⁴³ Tahuen gula gaca quie ben' zu rapa yu'u quie xa'nnë', chi bë' yedyin xa'nnë' ilë'ënë' rzuguë' di'idza' con can' gudyinë' xa'nnë' lëbë'. ⁴⁴ Tali ca rnia', ben' na'ca xan' yu'u, hue'në' ladyina'a yugulu ta de quienë' lao na'a ben' udapa yu'u quie'. ⁴⁵ Bi'zi chan' ben' zu rapa zan yu'u quie xa'nnë', chi racanë' pensari huadzë xa'nnë' biyedyinnezë', chi sulaonë' tilalënë' inë'ënë' yaca ben' rue dyin zan yu'u quie xa'nnë', chi sulaocalanë' gaonë' yo'onë' xudyinë', ⁴⁶ na'ra bë' yedyin xa'nnë' dza birbezë' yedyin xa'nnë', hualë'ënë' can' ruenë', huenë' lëbë' tu castigo huala gula, ise'elë' lëbë'ta tzionë' lado yaca los demás ben' bibzu di'idza' quie'.

⁴⁷ Nu ben' zu lao xa'nnë' nezinë' ca ta re'en xa'nnë' huenë', den' bibzunë' di'idza' huenë' ca gu'un xa'nnë', huata' castigo huala gula quienë'. ⁴⁸ Pero nu ben' zu lao xa'nnë', pero binezinë' ca ta re'en xa'nnë' huenë', pues ba'ala'cazi reya'ala' gata' castigo quienë' cabë' bënë', pero dan' biunezinë' can' bënë', yubë'ëzi castigo gata' quienë'. Nu ben' bë' Diuzi ta'ze, lë'ëbë' yenaba Diuzi

yeyu'enë' tazëra. Lëscan' nu ben' pca'n Diuzi tazë lao në'ë, lëlëbë' yenaba Diuzi usedyinnë' tazëra lao në'ë.

Una Jesús huario yaca benë' chopa cue'
(Mt. 10.34-36)

Na' una Jesús:

⁴⁹—Në'ëdi' bida' ta cuëcha' ca quie gui' lao yedyi layu. Lena' re'entzegueda' ga'ala'n na'a. ⁵⁰Baza' dza gatia' lë'ë yaga cruzo. Lega rutëbin në'ëdi' rbeza' bë' yeyudyi gatia'. ⁵¹Na' rnìa' le'e, ¿raquele bida' lao yedyi layu ta bira gata' zëdi huedila quiele? Rnìa' le'e, cala lena' bida', dechan' bida' ta iro chopa cue' yaca ben' nita' lao yedyi layu. ⁵²Ga sulaon na'a, ga sulaon quie dza zaza'ra. Huaca quie lao ga'yo' ben' nita' zan yu'u, huaroyaquë' chopa cue'. Tzonayaquë' huaca condre quie chopayaquë'. Na' ichopayaquë' huaca condre quie tzonayaquë'. ⁵³Huaca xuzi zna' xcuidi' condre quie ži'iyaquë'. Na' huaca ži'iyaquë' condre quie xuzi zna'yacabi'. Huaca zna' be'mbyu condre quie žualidyinë'. Na' huaca žualidyinë' condre quie ben' gula quiebi'.

Reya'ala' huero pensari cabë' raca quiero
(Mt. 16.1-4; Mr. 8.11-13)

⁵⁴Na'ra una Jesús rëbinë' yaca ben' nita' na':

—Cati rlë'ële rasa beo ga reguin obidza, lena' inale huen nisayo, na'ra huen cabë' nale. ⁵⁵Lëzi cati rlë'ële baza' be tzala' ga reguin obidza, lena' inale huen žla, na'ra huen cabë' nale. ⁵⁶Le'e ben' rlidza Diuzi de di'idza' ladzazi, banežile huele pensari can' hue beo len can' hue be, ¿na' bixquien' binežile huele pensari can' raca quiele dza rdale lao yedyi layu?

Reya'ala' yega'ntza'olëro ben' reya'ala'ro quie
(Mt. 5.25-26)

Na' una Jesús:

⁵⁷—¿Bixquien' biracale pensari ca naca tali ca reya'ala' huele? ⁵⁸Chi zu tu ben' reya'ala'le quie, na' re'ennë' quizole quienë' uquië'në' le'e lao ben' napa dyin, ruen ži yega'ntza'ole laonë' tu neza tu binedyinke lao ben' napa dyin. Chi baziolëlenë' lao juež, hue juež mandado udze' policia' le'e lu'u dyiguiba. ⁵⁹Na' rnìa' le'e, gabi yerole hasta que quizole yugulute ca ta reya'ala'le.

13

Nacan belao yetza'ro pensari quiero

¹Lëhora na' bdyin yaca benë' rëbiyaquë' Jesús can' bë Pilato bëtinë' chopa tzona ben' estado Galilea. Pquixinë' ren quieyaquë' len ren quie bia guixi' ta bdyiayaquë' lao becugo quie idao' rnabë'ra zu ciudad Jerusalén. ²Na' una Jesús rëbinë' leyaquë':

—¿Ca biži pensari racale cabë' guca quie yaca ben' Galilea? ¿Raquele nacarayaquë' ben' bëra tamala quie, cala ca yaca ben' lao yedyi quiele? ³Na'ra rnìa' le'e, binacan can'. Na' le'e, chi biyetza'le pensari quiele inaole xneza Diuzi, biyeži' Diuzi le'e. ⁴¿Ca biži pensari racale cabë' guca quie yaca chi'inu'betzona yaca ben' guti bdaco' torre Siloé leyaquë'? ¿Raquele nacarayaquë' ben' de dula' xquia quie, cala ca yaca los demás ben' nita' lao ciudad Jerusalén? ⁵Lena' rnìa' le'e, binacan can'. Na' le'e chi biyetza'le pensari quiele inaole xneza Diuzi, biyeži' Diuzi le'e.

Unë Jesús tu di'idza' quie tu yaga higo bidyian tazixi

⁶Na'ra una Jesús tu ejemplo ni:

—Uzu tu be'mbyu zu tu yaga higo quienè' lao layela quienè'. Na'ra uzè'è zioguè' tzena'nè'n chi badyian higo, na' blè'ènè' nì tu higo bidyia lao yaga. ⁷ Na'ra una ben' zu tu yaga higo quie, rèbinè' ben' rapa layela quiè': "Una'cara, azio tzona iza rida' dena'a yaga higo nì chi dyian tazixi, pero nì tu higo binelè'èda' cuialaonan. Mejorla ichugulo'n, ¿bixiquien' ru'eron lato zun layu niga, chi birbian higo?" ⁸ Na'ra una ben' rapa layela rèbinè' xa'nnè': "Señor, psan quien, biichuguron zazugaran itu iza na'a. Ta hua' cuècha' tu pozo zannan tacuenda udyia'n bena. ⁹ Con ca hua' quien, a ver chi bicuian tazixi. Pero chi bicuian tazixi, na'tera ichuguron."

Beyue Jesús tu nigula xcu'udzu bego dza huezila'adyi'

¹⁰ Uzu tu dza saodo, dza huezila'adyi' quieyaquè', uyu'u Jesús lu'u idao' sinagoga ga rsèdinè' yaca benè'. ¹¹ Lègan' na' zè tu nigula raca zhue'nè'. Azio chi'inu'betzona iza uyu'unè' tu bichi be xi'ibi', na' beca'nnan lèbè' bego, bira guca yelinè'. ¹² Bi'zi cati blè'è Jesús lèbè', na' guzinè' lèbè' unè' rèbinè' lèbè':

—Nigula, hueyua' luè' ca naca yela' hue' yu'ulo'.

¹³ Na'ra bda' na'anè' xcu'udzu nigula. Caora bda'nè' nè'è nigula, la-belitenè'. Na' uzulaonè' ruenè' Diuzi ben' ze. ¹⁴ Pero lega bdza' ben' napa dyin lu'u idao' sinagoga, dan' beyue Jesús ben' xcu'udzu bego dza huezila'adyi'. Na'ra unè ben' napa dyin lu'u idao' sinagoga rèbinè' yaca benè':

—Xopa dza nacan ta huero dyin. Lèdza na' reya'ala' guida ben' raca zhue' ta iyacayaquè', cala na'adza huezila'adyi'.

¹⁵ Na'ra una Jesús rèbinè' lèbè':

—Luè' ben' rlidza Diuzi de di'idza' ladzazi, ¿cala rxèdyo' huaga quio' o burro quio' ta tzhuea'alo'ba' yo'oba' nisa dza huezila'adyi'? ¹⁶ Na' nigula niga naquè' zi'i suba Abraham. Na' bi'zi xan' taxi'ibi' Satanás nuquion lèbè' nuen bego xcu'udzunè' azio chi'inu'betzona iza. Na' bi'zi luè', ¿bixiquien' nao' bireya'ala' yexèdya' tanuquio xan' taxi'ibi' nigula nì dza huezila'adyi'?

¹⁷ Bi'zi caora una Jesús can', bedue'tzegue yaca ben' rue condre lèbè'. Pero yaca los demás benè', lega redaohueyaquè' blè'èyaquè' ca yela' huaca babè Jesús.

Unè Jesús tu di'idza' quie bini mostaza

(Mt. 13.31-32; Mr. 4.30-32)

¹⁸ Na'ra una Jesús rèbinè' yaca benè':

—¿Ca bi'zi hua' ta yexi'idza' le'e ca naca ga rnabè' Diuzi? ¿Ca bi di'idza' re'ennan inia' le'e ta inezile dyè'èdi? ¹⁹ Nacan ca quie tu bini mostaza ta guza tu benè' lao layu quiè'. Na' bi'zi bini mostaza, la'acazi tu bini dao' bicu', pero gu'unin gucan tu yaga ze gula. Na' bdyin yaca bia xila bëyacaba' lidyiba' lao taca'n.

Unè Jesús tu di'idza' quie levadura

(Mt. 13.33)

²⁰ Lèscan' una Jesús rèbinè' leyaquè':

—¿Ca bi di'idza' re'ennan inia' le'e ta inezile dyè'èdi ca naca ga rnabè' Diuzi? ²¹ Nacan ca quie tu levadura ta rzi' nigula rla'adyi'nè'n con tzona medida yezo. Conlè lena' rèzin duze cuba racan ta'ze.

Ga unè Jesús quie ru'a yu'u naca gui

(Mt. 7.13-14, 21-23)

²² Na'ra uza' Jesús uyu'unè' neza tatula zionè' ciudad Jerusalén. Na' ga rdyinnè' tu tu yedyi neza ciudad Jerusalén uzulaonè' rguixogue'nè' xti'idza' Diuzi. ²³ Na'ra unaba tu benè' lèbè' rèbinè' lèbè':

—Señor, ¿huezil' Diuzi ben' zë yeyoyaquë' guibá o chi tu chopaziyaquë'?

²⁴ Na'ra una Jesús rëbinë' lëbë':

—Naca gui ru'a yu'u guibá. Dula'adyi'le ulehue quiele tacuenda saque' tzu'ule lëru'a yu'u naca gui. Rnia' le'e, ben' zë gula inita' gue'enyayquë' tzu'uyaquë', pero bisaque'. ²⁵ Caora bapsio ben' xan' yu'u na', biži le'e inita'le lali'a, na' ibiga'le ru'a yu'u, uxidyile ru'a yu'u, na' inale: “Señor, isalolo' ru'a yu'u niga.” Na' biži ben' xan' yu'u inënë' lu'u yu'ute yëbinë' le'e: “Binubë'da' nu le'e.” ²⁶ Na'ra le'e inale yëbile ben' xan' yu'u: “Aodaolëndo' luë', bahue'elëndo' luë' tuzi. Lëzi psëdio' yaca benë' yedyi quiendo' xti'idza' Diuzi.” ²⁷ Na'ra inë ben' xan' yu'u yëbinë' le'e: “Baonia' le'e, binubë'da' le'e. Uleyo bira huele në'ëdi' zëdi, le'e ben' mala.” ²⁸ Quie lena' cuedyile zi'laza gula gao leile caora ilë'ële Abraham, len Isaac, len Jacob, len yaca los demás ben' udixogue' xti'idza' Diuzi dza na'la anita'yaquë' guibá, na' biži le'e, naca bayëchi' quiele inita'le lali'a. ²⁹ Rnia' le'e, huida yaca ben' uza' lao duže yedyi layu yegu'udi'yaquë' guibá ta cue'yaquë' lao mesa quie Diuzi ta gaoyaquë'. ³⁰ Bala ben' nita' lao yedyi layu niga, binacajë' ben' ze, pero huacajë' ben' ze dza yedyinjë' ga zu Diuzi. Lëscan' bala ben' naca ben' ze lao yedyi layu niga, bira nacajë' ben' ze dza yedyinjë' ga zu Diuzi.

Uredyi Jesús cabë' bë yaca ben' nita' ciudad Jerusalén (Mt. 23.37-39)

³¹ Lëdza na' bdyin yaca ben' partido fariseo gudyiyaquë' Jesús:

—Uza' uyo ga tula, dan' re'en rey Herodes gutinë' luë'.

³² Na' una Jesús rëbinë' leyaquë':

—Uleyo uletzeguëdyi lëben' mañoso ca rnia' le'e, nia': “Itu chopa tzona dza sua' yebioga' bichi be xi'ibi' yu'u yaca benë', yeyueria' yaca ben' raca žhue'. Na' baruen bago dza iyudyi hua' dyin quia'.” ³³ Pero decazide hua' dyin cabë' dyin nagan Diuzi hua'. Nerdziogue itu chopa tzona dza ga idyintia' ciudad Jerusalén como dan' lëciudad na' nacan ciudad ga rutiyaquë' ben' rguixogue' xti'idza' Diuzi.

³⁴ Le'e ben' ciudad Jerusalén, rutile yaca ben' za' rguixogue' xti'idza' Diuzi. Lëzi le'e ben' ciudad Jerusalén, rguile yo yaca ben' use'ela' Diuzi laole. Zë lasa gu'unda' gapa' le'e cabë' rue nu biu bena', rapaba' ži'iba', rguëdyiba' ži'iba' žan xilaba'. Pero na' le'e, bigu'unle. ³⁵ Lena' apsanla'adyi' Diuzi le'e. Na'ra rnia' le'e, ibaba dza bira ilë'ële në'ëdi'. Hasta quie idyin dza yëbile në'ëdi': “Ben' naca la'iya luë', ben' use'ela' Diuzi, na'tera ilë'ële në'ëdi' tatula.”

14

Beyue Jesús tu ben' yu'u gui

¹ Biži bezu dza tula, dza huezila'adyi'. Caora na' zio Jesús ta gaohuë' žan yu'u quie ben' napa dyin, ben' naca partido fariseo. Na'ra rbë'náo yaca ben' laguedyinë' chi bi hue Jesús dza huezila'adyi'. ² Na' lëgan' na' zë tu ben' yu'u yela' hui' gui. ³ Na'ra una Jesús rëbinë' yaca ben' rusëdi ley quie Moisés, len yaca ben' naca partido fariseo:

—¿Biži na lao ley? ¿Ru'en lato yeyua' ben' raca žhue' dza huezila'adyi'?

⁴ Caora na' bega'nyaquë' chizi, bira unëyaquë'. Na'ra bëxunë' na'a ben' yu'u gui, beyuenë' lëbë'. Ude na' una Jesús gudyinë' ben' beyuenë': “Aoca, beyo.”

⁵ Na' una Jesús gudyinë' ben' partido fariseo:

—Chi nu le'e rguino burro o huaga quiele lu'u barranca, ba'ala'cazi nacan dza huezila'adyi', ¿quele huayole tzaliöleba'?

⁶ Na'ra bira ubinyaquë' bi yëbiyaquë' lëbë'.

Ga unë Jesús quie ben' rue lani

⁷ Bë' blë'ë Jesús ca rue yaca ben' bdyin ga zë'ë, blë'ënë' rsereyaquë' ga cue'yaquë' re'enyacuë' cue'yaquë' ga cue' ben' bala'anara. ⁸ Na' unë' rëbinë' leyaquë' tu di'idza':

—Cati ziole ga raca huetzagana', bicue'le ga rbe' ben' bala'anara. Biži chan' zaza'ra ben' nacara belao cue'në' gan' re'lo' na'. ⁹ Biži bare'lo' ga rbe' ben' bala'anara, na' inë ben' rue lani yëbinë' luë': "Uzuli, bë' lato cue' ben' niga gan' bare'lo'." Cati inanë' luë' cana', cana' yedue'lo' yeyolo' tzare'lo' xcu'udzula. ¹⁰ Na' ca ta reya'ala' huele cati tzirole lani, cue'le xcu'udzutela. Na'ra cati ilë'ë ben' rue lani re'lo' xcu'udzutela, na'ra inë' luë': "Amigo, ude nila cue'lo' ga rbe' ben' bala'anara." Cana' gaca bala'ana quiele len yaca ben' bare' lao mesa. ¹¹ Na' rnia' le'e, nu ben' rue že cuine, huadyin dza hue Diuzi lëbë' ben' yube'ezi. Na' biži nu ben' rue yube'ezi cuine, huadyin dza hue Diuzi lëbë' ben' že. —Cana' una Jesús rëbinë' leyaquë'.

¹² Lëzi unë'ë Jesús rëbinë' ben' rue lani:

—Cati huelo' lani biguëzo' ben' naca amigo quio', ni bi' bicho', ni xuzi znao', nica ben' uña'a, como dan' huadyin dza yeyueyaquë' laohue quio', gunrëyaquë' ta gaolo'. Conlë lëzin yeyuen laohue quio'. ¹³ Na' ca ta reya'ala' huelo' cati huelo' lani, reya'ala' guëzo' yaca ben' yëchi', len yaca ben' ca guicho ca lao, len yaca ben' zi, len yaca ben' laochula. ¹⁴ Chi huelo' cana', cana' gata' tahuen gulara quio' yedaohuelo' bë' idyin dza useban Diuzi ben' bë' quie xti'idza'në'. Huata' tadya'a quio' lao Diuzi dan' bë'lo' ta udao yaca ben' raca bayëchi' quie, ba'ala'cazi bide dumi ta quizoyaquë'n ni ta yeyueyaquë' laohue quio'.

Ga unë Jesús tu di'idza' quie ben' rëzi ben' gao yaca

¹⁵ Biži bë' be tu ben' re' lao mesa cabë' una Jesús, na'ra unë':

—Lega gaca huen quie ben' gao yela' huao ga zu Diuzi rnabë'në'.

¹⁶ Na'ra una Jesús rëbinë' lëbë':

—Uzu tu be'mbyu dza na', bë'në' laze ta gao yaca ben' zë, ben' guëzinë'.

¹⁷ Bë' beyudyi bapcuezë' ta gao yaca benë' guëzinë', na' use'ela'në' criado quienë' unë' rëbinë' lëbë': "Uyo, yexi' yaca ben' guida gao yaca. Banaca laze ta gaoyaquë'." ¹⁸ Biži yaca ben' rëzinë' ta gao, unabayaquë' ta yezi'zenë' quieyaquë'. Na'ra ben' nëro unë' gudyinë' criado quie ben' na': "Zabeyudyi hua'a tū layu. Len re'enda' tzena'a. Ta nacan' nia' luë' yëbo'në' yezi'zenë' quia'." ¹⁹ Na' unë' ben' urupe rëbinë' ben' zio tzexi' lëbë': "Baozia' ga'yo' pare bëdyihuaga. Lëba' tza'lia' hua'ba' prueba. Lena' nia' bisaque' sa'a, yezi'zenë' quia'." ²⁰ Na' una ben' uyune rëbinë' ben' zio tzexi' lëbë': "Zabeyudyi ptzagana'a. Yela' na' bisaque' sa'a." ²¹ Biži bë' bdyin criado, na' udixogue'në' xa'nnë' cabë' gudyi yaca benë' lëbë'. Na'ra bdza'tzegue xa'nnë' unë' rëbinë' criado quie: "Uyo yena' la'o yedyi, yexi' yaca ben' yëchi', len yaca ben' ca guicho ca lao, len yaca ben' zi, len yaca ben' laochula." ²² Na'ra bdyin criado quie ben' na' unë' rëbinë' lëbë': "Señor, babia' ca mandado bao'. Pero nerunnan lato guidara benë'." ²³ Na'ra una xa'nnë' tatula rëbinë' lëbë': "Uyo yena' la'o yedyi du tu neza. Bë bala iquie'lo'yaquë' cuenda yedza' yaca benë' lu'u yu'u quia'." ²⁴ Yela' na' rnia', ni tu yaca ben' baguza' tanëro, ben' bibida gao quia', bira de lato gaoyaquë' ta pcueza'."

Ruen zi inaoro xneza Cristo

²⁵ Ben' zë gula zenaoyaquë' Jesús. Na'ra unë' rëbinë' leyaquë':

²⁶ —Chi nu ben' re'en inao në'ëdi', ruen zi idyë'ëranë' në'ëdi' cala ca xuzë', ca znë'ë, ca zgulanë', ca zi'inë', ca bi' bichinë', ca bi' zannë', cala ca yela'

neban quienè'. Chi binedyè'èranè' nè'èdi' cala ca familia quienè', ca yela' neban quienè', bisaque' gacanè' ben' quia'. ²⁷ Nu ben' rdzebi inao xneza' nun quie ruen žudyi guti benè' lèbè', bisaque' gacanè' ben' quia'. ²⁸ Chi le'e re'enle huele tu yu'u ¿cala reya'ala' huele pensari usaque'le chi huaque dumi quiele ta useyudyile yu'u? ²⁹ Chi tu ben' uzulaohue rcua'nè' lu'u yu barbèchinè' xni'a besu, na' biži chi biguque dumi quienè' ta useyudyinè' yu'u, na' yaca ben' ilè'è, utituyaquè' užidyiaquè' lèbè'. ³⁰ Na' inayaquè' quienè': "Ben' niga aozulaonè' ruenè' yu'u quienè', na' biguque dumi quienè' ta useyudyinè'n." ³¹ Chi zu tu rey, na' zu itu rey re'ennè' tilalènè' lèbè'. Na' napè' chi mila soldado. Na' biži itu rey napè' galo mila soldado quienè'. Caora cati baza' tilarèyaquè', ¿cala reya'ala' huenè' pensari chi huaque chi mila soldado quienè' ta tilalènè' ben' napa galo mila soldado? ³² Chi bapsaquenè' bisuenè' tilalènè' itu rey, na'ra tu nezu itu rey zitu', reya'ala' ise'ela'nè' tu ben' tzio lao lazè' ta tzeguedyinè' itu rey ta yega'ntza'oyaquè' bitilayaquè'. ³³ Lena' unia' le'e ta inezile nuti'tezile re'enle inaole nè'èdi', chi bisule puesto ta usanle yugulu ta de quiele inaole nè'èdi', bisaque' gacale ben' quia'.

Ga ru'en di'idza' quie zedi' bira nacan sna'a
(Mt. 5.13; Mr. 9.50)

Na' una Jesús:

³⁴—De ga hue zedi'dyin chi nacan sna'a. Pero chi bira nacan sna'a, ¿ca biži huero ta iyacan sna'a? ³⁵ Bibi dyin huena, ni para quie layu, ni para bena. Nacan ta chu'unro. Nule babe, ulezènaga cabè'baonia'.

15

Unè Jesús tu ejemplo quie tu beco' ži'ila' bia uniti
(Mt. 18.10-14)

¹ Biži yaca ben' zè, ben' huequižu len yaca ben' nao neza mala, begu'udi'yaquè' zè lasa gan' zè Jesús ta uzènagayaquè' cabè' unè'. ² Na' biži yaca ben' partido fariseo, len yaca ben' rusèdi ley quie Moisés, rtzaloyaquè' can' rue Jesús, unayaquè' rèbiyaquè' laguedyiaquè':

—Ben' niga rezi'nè' yaca ben' nao neza mala, raolènè' leyaquè' tzaže.

³ Na' tu di'idza' ni una Jesús rèbinè' leyaquè':

⁴—Chi zu tu gayuhua beco' ži'ila' quiele, na' aoniti tuba', ¿cala uca'nle yaca bia biuniti ga nita'yacaba' dya'a? ¿Cala huayole tzedilole itu bia neniti hasta que yedzeleleba'? ⁵ Bè' yedzeleleba' ¿cala lega yedaohuele huezi'leba' yequiè'leba' žan yu'u? ⁶ Na' bè' bedyinle žan yu'u quiele ¿cala guèžile yaca ben' naca amigo quiele? ¿Cala yèbileyauquè': "Huero lani, dan' babedzeleda' beco' ži'ila' quia', bia uniti"? ⁷ Lena' rnìa' le'e, cabè' guca quie xan' beco' ži'ila', cana' nacarè quie Diuzi. Yedaohueranè' quie tu ben' betza' pensari quie, ben' unao neza mala, na' inaonè' xneza Diuzi, cala ca yaca ben' zè, yaca ben' ziocazi nao xnezè'.

Unè Jesús tu di'idza' quie tu dumi ta uniti

Na' itu di'idza' ni una Jesús rèbinè' leyaquè':

⁸—Lèzi rnìa' le'e, chi zu tu nigula de chi dumi plata quiè', na' bèxo tun, ¿cala uga'ala'nè' lámpara quiè', ulubanè' lu'u yu'u quienè' dyè'èdi, yeguilonè'n hasta que yedzelenè'n? ⁹ Na' biži bè' bedzelenè'n, lega bedaohuenè'. Na' guèžinè'yaca amiga quienè' inè' yèbinè' leyaquè': "Huero tu lani, dan' babedzeleda' dumi quia' ta uniti." ¹⁰ Lèzi rnìa' le'e, can' guca bedaohue nigula, cana' yedaohuerè yaca ángel quie Diuzi cati yetza' pensari quie tu ben' unao neza mala, na' inaonè' xneza Diuzi.

Unë Jesús tu di'idza' quie tu ben' uzu chopa zi'inë' byu

¹¹ Lëscan' una Jesús rëbinë' leyaquë':

—Uzu tu be'mbyu uzu chopa zi'inë' byu. ¹² Na' bi'zi zi'inë' byu, bi' nëchi'la, unab'i rëbibi' xuzibi': "Xuza', žbigunlo' në'ëdi' ta redu'uleda' si'a? Na'ra xuzibi' bënë' laze, bënë'bi' ta redu'ulebi' si'bi'. ¹³ Bi'zi guca tu chopa tzona dza, ptupa zi'inë' nëchi' ta de quiebi' bi'abi' yuguluten. Na' uza'bi' ziobi' yedyi re' zitu' ga beditobi' dumi quiebi' uyu'ubi' pensari mala ca bëbi'. ¹⁴ Pero bë' beditobi' yugulu ta de quiebi', na' bdyin dza guca tu ubin huala gula yedyi na'. Bira guta' ta gaobi', na' lega uduebi'. ¹⁵ Na'ra uza'bi' ziobi' tzetilobi' bi dyin huebi' lao tu ben' zu lao yedyi gan' bdyimbi'. Na' bi'zi ben' na' use'ela'në'bi' ga de layu quienë' ta gapabi' cuchi quienë'. ¹⁶ Tanto uduebi' gu'umbi' gaobi' ca ta bë'yaquë' yaca cuchi ta gaoba'. Pero na' lëbi' nunu bë' ta gaobi'. ¹⁷ Na'ra gucabi' pensari: "iNacala ben' zë rueyaquë' dyin zan yu'u quie xuza', birdziogueyaquë' ta gaoyaquë'! iNa' niga në'ëdi' ruda'a huatia' yela' rdue quia'! ¹⁸ Yeza'cala' yeya'a zan yu'u quie xuza' ta yëpa'në': Xuza', uzi'ze quia'. Baoquixa' lao Diuzi. Baoquixa' laolo'. ¹⁹ Bira bizaca' inao' në'ëdi' naca' zi'ilo'. Bë në'ëdi' cuenda ca nu ben' rue dyin quio'." ²⁰ Na'ra beza'bi' beyu'ubi' neza zeyobi' zan yu'u quie xuzibi'.

'Nezeza'bi' tu neza zitu' caora blë'ë xuzibi' bazeza'bi'. Na' beyëchi'la'adyi'në' lëbi' zionë' udëdyinë'bi' udaonë'bi' situ xagabi'. ²¹ Na' bi'zi una bi'byu na' rëbibi' xuzibi': "Xuza', uzi'ze quia'. Baoquixa' lao Diuzi. Baoquixa' laolo'." ²² Na' bi'zi una xuzibi' rëbinë' yaca bi' criado quië': "Uletzio cuiole tu cue' la'ari' dya'ara ta ugacolebi'. Lëzi uletzexi' tu anillo ta udze'le zhebi' len itu cue' guidi ta udze'le ni'abi'. ²³ Lëzi uletzio tzexi'le tu bëdyihuaga, bia nacara nu'unu, bia gutiro gaoro ta huero lani. ²⁴ Cana' huero como dan' zi'ina' niga anaca quiebi' ca quie tu ben' baguti beban. Aonitibi', pero na' babelabi' bazulëbi' ra'o niga." Na' uzulaoyaquë' rueyaquë' lani.

²⁵ Na' bi'zi zi'inë' bi' huaca, nega'mbi' layela. Bë' beza'bi' layela bedyimbi' bago gan' zu yu'u, bebi' rgüedyi raca hueya'a. ²⁶ Na'ra guzibi' tu criado quie xuzibi' unababi' lëbi' bi guca zan yu'u. ²⁷ Na' una bi' criado rëbibi' lëbi': "Babela' bi' bicho'. Na' bë xuzo' mandado babëtiyaquë' tu bëdyihuaga nu'unu, dan'abela' bi' bicho' dya'a, bibi guca quiebi'. ²⁸ Na' bi'zi bi' bichibi' huaca, lega rdza'bi' bire'embi' yeyu'ubi' lu'u yu'u. Lena' bro xuzibi' unabanë' cule laobi' ta yeyu'ubi' lu'u yu'u. ²⁹ Na'ra una bi' bichibi' huaca rëbibi' xuzibi': "Luë' nezo' dyë'ëdi' gula azio zë iza zua' rua' dyin quio'. Bireguitzoga' di'idza' quio'. Ni tu lasa bibenlo' në'ëdi' ni tu chivo ta gutia' hua' lani gaolia' yaca bi' amigo quia'. ³⁰ Na' zi'ilo' niga,abela'bi' tatula. Baoyobi' beditobi' dumi babë'lo'bi' conlë yaca nigula mala. Na' luë' babetio' bëdyihuaga nu'unu ta gaole huele lani." ³¹ Na'ra una xuzibi' rëbinë'bi': "Zi'ina', zucazo' ni len në'ëdi' yugu dza. Tana' lena' yugulu ta de quia' nacacazin quio'. ³² Pero nacacazin huen huero lani yedaohuero, dan'abela' bi' bicho'. Naca quiebi' ca quie ben' baguti beban. Aonitibi' bela'bi' bazulëbi' ra'o tatula." —Cana' una Jesús gudyinë' leyaquë'.

16

Unë Jesús tu di'idza' quie tu ben' guca ladyinë'ë quie xa'ne, bëguë' tamala

¹ Lëzi cani una Jesús rëbinë' yaca ben' quienë':

—Uzu tu ben' uña'a zu tu ben' nu'enë' ladyina'anë' ta de quienë'. Na' bi'zi una yaca benë' unayaquë' rëbiyaquë' lëbë': "Ben' nu'elo' ladyinë'ë ta de quio', lega rueditoguë' ta de quio'." ² Na'ra ben' naca xa'nnë' guzinë' lëbë' yëbinë' lëbë': "žBi'zi bëlo' conlë ta de quia' de que na yaca benë' rueditolo' ta de

quia'?' Besio cuenda quie dyin babao', dan' bira re'enda' gaca ladyinao' ta de quia'." ³ Na' biži ben' naca ladyinē'ē ta de quie xa'ne, na' guquē' pensari: "¿Ca biži hua' chi yeguba xa'na' xchina'?' Biraca' hua' dyin guixi'. Lēzi reduē'da' ta'a tu tu yu'u inaba' ta gaohua'. ⁴ Na'a banezda' ca hua' cuenda inita' ben' gacalē nē'ēdi' cati babeguba xa'na' xchina'." ⁵ Na'ra gužinē' tu huio yaca ben' reya'ala' quie xa'nnē'. Na'ra unabē' ben' nēro rēbinē' lēbē': "¿Gaca tu reya'alo' quie ben' xa'na'?" ⁶ Na'ra bequēbinē' unē': "Reya'ala' tu gayuhua frasco aceite." Na' una ben' naca ladyinē'ē rēbinē' lēbē': "Ni zia' guichi nexubo' lao xa'na'. Caga na'a ure' bē itu guichi de gatzo gayuhuaži." ⁷ Biži na' unē' rēbinē' ben' urupe: "Na' luē', ¿gacaži reya'alo' quie xa'na'?" Na'ra una ben' na': "Reya'ala' tu gayuhua bolsa bini trigo." Na'ra unē' rēbinē' lēbē': "Ni zia' guichi nexubo' lao xa'na'. Caga na'a bē itu guichi de tapa galozi." ⁸ Na' biži xan' ben' na', bezaquenē' ca bē ben' bē'nē' ladyinē'ē, naquē' listo ta si'nē' benē' yē'.

Na' una Jesús rēbinē' yaca ben' quienē':

—Lēcana' nacan quie yaca ben' rda birnao xneza Diuzi, lega rze-bila'adyi'yaquē' nacayaquē' listo ta si'yaquē' benē' yē', cala ca yaca ben' rda rnao xneza Diuzi.

⁹ ¿Cabizi re'enle inia' le'e quie ben' guca ladyinē'ē? ¿Re'enle inia' le'e huele ca lēbē' si'le ben' yē' cuenda gata' dumi quiele hue'len yaca ben' re'enle gaca amigo quiele? ¿Re'enle inia' le'e cana' huele tacuenda gacalē amigo quiele le'e ta yezi' Diuzi le'e sulēlenē' tuzioli?

¹⁰ 'Bigaca inia' le'e can', como dan' chi nu ben' rapa dyē'ēdi tadao' lē'ēti' nu'e xa'nnē' lēbē', lena' ulu'ena quienē' gaparē' dyē'ēdi tazēra hue' xa'nnē' lēbē'. ¹¹ Lēzi chi le'e ziole rueditole con ganzi ta de quiele lao yedyi layu niga, ¿cómo na'a gue'enrēle gun Diuzi le'e ta de quienē' guibá?

¹² Chi le'e biziole gapale dyē'ēdi ta de quie ben' tula, ¿bixquien' raquele gun Diuzi ta gata' quiecazile? ¹³ Nu ben' rue dyin lao xa'ne, bisaque' uzunē' chopa xa'nnē'. Huata' zēdi quiē' quie lao rupa yaca ben' xa'nnē'. Tuē' huatzaxenē', na' ituē' bitzaxenē'. Tuē' biuzunē' di'idza' quiē', na' ituē' uzunē' di'idza' quiē'. Chi rza'la'adyi'le dumi, bisaque' huele dyin quie Diuzi. —Cana' una Jesús gudyinē' leyaquē'.

¹⁴ Biži yaca ben' naca partido fariseo, unita'yaquē' rzēnagayaquē' can' una Jesús quie dumi. Dan' lega rexeyaquē' gata' dumi quieyaquē', tana' lena' uzulaoyaquē' rtituyaquē' lēbē'. ¹⁵ Na'ra una Jesús rēbinē' leyaquē':

—Le'e, lega re'enle ilē'ē yaca benē' le'e ben' huen. Pero nezi Diuzi ca naca pensari mala yu'u lu'u guicho laxta'ole. Rapa yaca benē' le'e bala'ana, pero Diuzi ratzanē' ca ruele.

Ga rnēn quie ley len quie yela' rnabē' quie Diuzi

Na' una Jesús:

¹⁶ —Hasta dza uzu Juan lao yedyi layu unabē' ley quie Moisés len di'idza' ca una yaca ben' profeta. Desde lēdza na' rguixogue' yaca benē' de que baza' dza inabē' Diuzi lao yedyi layu. Lēcana' baregu'udi' yaca ben' zē, yaca ben' re'en hue bala inabē' Diuzi leyaquē'.

¹⁷ 'Pero ca naca quie lao ley, nacaran yalo yeyudyi yedu quie guibá len yedyi layu, cala ca biuzun di'idza' ca rnan lē'ē guichi ga yu'u ley quie Diuzi.

Unē Jesús quie ben' rsan laguedyi
(Mt. 19.1-12; Mr. 10.1-12)

Na' una Jesús:

18 —Chi tu be'mbyu bapsannè' nigula zulènè', na' bezi'nè' nigula tula, aoquixinè' nacan xquia quienè' lao Diuzi. Na' lèzi, chi tu be'mbyu bezi'nè' nigula psan xquiuhue, aoquixinè' nacan xquia quienè' lao Diuzi.

Ga una Jesús quie tu ben' uña'a len tu ben' yèchi' lao Lázaro

Na' una Jesús:

19 —Lëscan' inia' le'e, uzu tu ben' uña'a guconè' la'ari' dya'a, la'ari' baquitu. Na' biži ruenè' lani yugu dza, udaonè' tadya'a gula. 20 Lëscan' uzu tu ben' yèchi' gula laonè' Lázaro. Lega dyianè' yedzo' zidzo. Na' rbe'nè' layu ru'a yu'u quie ben' uña'a yugu dza. 21 Biži ben' yèchi' rbezè' rnè'è chi hue' ben' uña'a lè'èti' ta began' udaohuè'. Na' yaca beco' ubiga'yacaba' rlè'èyacaba' yedzo' dyianè'. 22 Biži bdyin dza guti Lázaro. Na'ra bequie' yaca ángel lèbè' ta sunè' guibá gan' zu Abraham. Na' lèzi ben' uña'a gutinè' pcachi'yaquè' lèbè' lu'u yu. 23 Na'ra uyu'unè' lu'u gui' gabila ga redzagalaohuè'. Catì bechisa laonè' rnè'è zitu' ga zu Abraham len Lázaro. 24 Na'ra uredyiya'nè' zidzo unè': "Xuza' Abraham, beyèchi'la'adyi' nè'èdi', use'ela' Lázaro ula'onè' zbenè' nisa ta guidè' dedze'nè'n lu'u ru'a yeya'ala' lè'èti' gan' yu'a niga, porque lega tahuala redzagalaohua' gan' yu'a laguì' niga." 25 Na'ra una Abraham gudyinè' lèbè': "Zi'ina', beza'la'adyi' guca dya'a gula quio' dza uzulo' lao yedyi layu. Na' biži Lázaro niga, biguca dya'a quienè'. Lena' rezila'adyi'nè' zunè' niga len nè'èdi'. Na' luè' redzagalaolo' gan' yu'ulo'. 26 Lèzi zu tu barranca ga nita'ndo' niga. Na' bisaque' guidando' ga zulo'. Lèzi luè' bisaque' guido' niga." 27 Na'ra unè' ben' uña'a rëbinè' Abraham: "Rnabayècha' laolo', xuza' Abraham, ta ise'elo' Lázaro žan yu'u quie xuza' 28 gan' nita' ga'yo' bi' bicha' ta yëbinè' leyacabi' can' raca quia' niga tacuenda biguidayacabi' gan' yu'a niga redzagalohua'." 29 Na'ra una Abraham rëbinè' lèbè': "Decazi guichi ga yu'u xti'idza' Diuzi ta pca'nnè' lao na'a Moisés len yaca los demás ben' uidxogue' xti'idzè'. Lena' reya'ala' hueyaquè' bala ulabayaquè'n." 30 Na'ra unè' ben' na' rëbinè' Abraham: "Nacan tali ca nao', xuza' Abraham, pero chi tzio tu ben' baguti beban tzetixogue'nè' leyacabi', cana' yetza'yacabi' pensari quieyacabi'." 31 Na'ra una Abraham rëbinè' lèbè': "Chi bihueyacabi' bala cabè' di'idza' yu'u lè'è guichi la'iya quie Diuzi ta pca'nnè' lao na'a Moisés, len yaca los demás ben' uidxogue' xti'idzè', nica yetza'yacabi' pensari quieyacabi' ba'ala'cazi tzio tu ben' baguti beban tzetixogue'nè' leyacabi'."

17

Ruen zudyi gula quie ben' udze'yela laguedyi

(Mt. 18:6-7, 21-22; Mr. 9:42)

1 Na' una Jesús rëbinè' yaca ben' quie':

—Birdziogue nu ben' udze'yela laguedyi ta inën leyaquè' hueyaquè' tamala. Però hue Diuzi tu castigo huala gula quie ben' udze'yela laguedyi. 2 Quie nu ben' rudze'yela xcuidi', huacaran huen quienè' chi uquiyoaquè' tu yo ze luba'nè', na' uzalayaquè' lèbè' lu'u yao ze gatinè' lu'u nisa, cala ca castigo hue Diuzi lèbè'. 3 Ulegapa cuidado cabè' ruele.

Uletila bi' bichile chan' uquixibi' bëbi' condre le'e. Na' chi betza'bi' pensari quiebi', ulezi'ze quiebi'.

4 'Ba'ala'cazi baoquixibi' babëbi' condre le'e gadyi lasa lao tu dza, ba'ala'cazi gadyi lasa bidabi' unabì' le'e: "Uzi'ze quia', bira hua' cana'", ulezi'ze quiebi'.

Ruen yaca ben' quie Jesús zi sudyi'ilëyaquè' Diuzi dyè'èdi

⁵ Na' una yaca ben' quie Jesús rëbiyaquë' lëbë':

—Gacalao' nêto' ta sudyi'ilëndo' Diuzi dyë'ëdi.

⁶ Na' una Jesús rëbinë' leyaquë':

—Chi tali sudyi'ilële Diuzi, la'acazi lë'ëti'zi, huazaque' yëbile tu yaga: “Uza', uyo yetzu'u lu'u yao ze”, na' yaga hualen quiele cabë' yëbilen.

Ga ru'en di'idza' ca reya'ala' hue ben' nao xneza Diuzi

Na' una Jesús:

⁷ —Chi zu tu ben' rue dyin zan yu'u quiele ¿cala tanëro reya'ala' usiña'në' ta gaole, te na' huazaque' gaorënë', ba'ala'cazi babënë' dyin bedu dza?

⁸ ¿Cala tali na' yëbileyaquë': “Psiña' ta gaohua', te aodaohua' bahu'a, natera huazaque' gaolo' yo'olo'”? ⁹ ¿Cala tali na' biyëbile ben' rue dyin zan yu'u quiele: “Diuxcalele babële ca ta re'enda' huele”, como dan' ca ta reya'ala' huecaziyaquë' bëyaquë'? ¹⁰ Lëscan' cana' nacarën quie le'e. Caora babeyudyi babële yugulu ca una Diuzi le'e, na'tera reya'ala' yëbile Diuzi: “Nacando' ben' bibi zaca'te inao' nêto' diuxcalele, como dan' ca ta reya'ala'cazi huendo' bëndo'.” —Cana' una Jesús gudyinë' leyaquë'.

¹¹ Na' uza' Jesús uyu'unë' neza ta zionë' ciudad Jerusalén udenë' lao beza' estado Galilea ga sulao estado Samaria. ¹² Bë' bdyinnë' gan' de tu yedyi, lëgan' na' bro chi ben' yu'u yela' hue' ca mal de pindo. Bega'nyaquë' zitu' con gan' zë Jesús. ¹³ Na' urediya'yaquë' zidzo rëbiyaquë' lëbë':

—Jesús, Maestro, yeyëchi'la'adyo' nêto' ca nacando'!

¹⁴ Cati blë'ë Jesús leyaquë' cabë' nacayaquë', unë' rëbinë' leyaquë':

—Uletzio uletzelu'e cunle lao pxuzi.

Caora na' uza'yaquë' zioyaquë'. Biži tu neza gan' zioyaquë' beži yela' hue' yu'uyaquë'. ¹⁵ Na'ra bë' blë'ë tunë' babežinë' ca naca yela' hue' yu'unë', na' bebi'në' zeyonë' gan' zë Jesús unënë' zidzo ruenë' Diuzi ben' ze. ¹⁶ Na' ure'në' uditzu žibinë' lao Jesús, bda'te laohue layu ta rëbinë' Jesús: “Diuxcalelo'.” Lëben' na' naquë' ben' estado Samaria. ¹⁷ Na'ra una Jesús rëbinë' lëbë':

—¿Cala chi le'e beyaca? ¿Ganaži iga yaca ben' beyacarë? ¹⁸ Lëben' niga, ben' binaca ben' Israel, žtuzi lëbë' bebi'në' zeza'në' niga ta ruenë' Diuzi ben' ze?

¹⁹ Na'ra una Jesús rëbinë' lëbë':

—Bezuli, beyo. Dan' rzudyi'ilëlo' Diuzi, lena' babeži yela' hue' yu'ulo'.

Udixogue' Jesús ca gaca bë' yeguidë' tatula lao yedyi layu

(Mt. 24.23-28, 36-41)

²⁰ Na' bdyin tu dza una yaca ben' partido fariseo rëbiyaquë' Jesús:

—¿Bata sulao inabë' Diuzi lao yedyi layu?

Na' una Jesús rëbinë' leyaquë':

—Bide bi ilë'ële cati sulao inabë' Diuzi lao yedyi layu. ²¹ Bisaque' yëbile benë': “Barnabë' Diuzi yedyi ni' o “Barnabë' Diuzi yedyi na'” como dan' pensari yu'u lu'u guicho laxta'ole, lena' inabë' Diuzi.

²² Na' bezu dza tula una Jesús rëbinë' yaca ben' quienë':

—Huadyin dza cati gue'enle sulia' le'e siquiera itu dzazi, pero bisaque'.

²³ Lëdza na' ina yaca benë' le'e: “Bazunë' ni'” o “Bazunë' na'” na' bigalele quieyaquë'. Bitziole inaole leyaquë' ga zioyaquë'. ²⁴ Cabë' rlë'ële quie bdyito hueziu' ratzo rtinan zan guibá, cana' ilë'ële në'ëdi', bichi yugulu benë', cati idyin dza yeguida' lao yedyi layu. ²⁵ Pero ca naca na'a, ruen zi yedzagalaotzaguia' usebi' yaca ben' nita' na'a në'ëdi'. ²⁶ Cabë' bë yaca ben' unita' lao yedyi layu tiempote caora uzu Noé, cana' huerë yaca ben' inita' lao yedyi layu caora yeguida' tatula në'ëdi', bichi yugulu benë'. ²⁷ Ri'o

raoyaquë', rtzagana'yaquë', rtzagana'rë ži'iaquë' hasta bdyin dza uyu'u Noé len familia quienë' lu'u barco quienë'. Lëcana' ben yusiu' huala gula, guca juicio quie nisa, guti lao yuguluteyaquë'. ²⁸ Lëzi cana' bèrë yaca ben' unita' lao yedyi layu tiempote caora uzu Lot. Ri'o raoyaquë', ra'o rutiyaquë', razara'nyaquë' rueyaquë' yu'u quieyaquë'. ²⁹ Pero cati bro Lot ciudad Sodoma, lëcana' bžexo Diuzi juicio gu'i, uyëzin žan guibá, bëtín yuguluteyaquë'. ³⁰ Lëzi cana' gacarë quie yaca benë' inita' dza bè' yeguida' lao yedyi layu në'ëdi', bichi yugulu benë'.

³¹ 'Lëdza bè' yeguida' tatula, chi inita' yaca benë' lali'a, bireya'ala' yeyu'uyaquë' lu'u yu'u quieyaquë' ta cuioyaquë' ta de quieyaquë' nun quie dan' ruen baguinzi ižunoyaquë'. Lëscan' chi ziorëyaquë' layela, bireya'ala' yeyoyaquë' žan yu'u quieyaquë' nun quie dan' ruen baguinzi ižunoyaquë'. ³² Bigalala'adyi'le cabë' guca quie žgula Lot. ³³ Nu ben' rdzebi gati, yela' na' binaoyaquë' në'ëdi', bigata'yela' neban quieyaquë' tuzioli. Pero nu yaca ben' birdzebi gati, yaca ben' nao në'ëdi', huata'yela' neban quieyaquë' tuzioli.

³⁴ 'Cani rnìa' le'e, lëyela cati yeguida' tatula, useria' yaca ben' nao në'ëdi', na' iquie' yaca ángel leyaquë'. Por ejemplo, chi rasi chopa benë' tzaže lao belaga, iquie' yaca ángel tunë', na' yega'n itunë'. ³⁵ Chi zu chopa nigula rutuyaquë' tzaže lao guichi, iquie' yaca ángel tunë', na' yega'n itunë'. ³⁶ Chi zu chopa be'mbyu rueyaquë' dyin tzaže layela, iquie' yaca ángel tunë', na' yega'n itunë'.

³⁷ Bë' beyaquë' can' unë', na'ra unayaquë' rëbiyaquë' lëbë':

—¿Gaži gaca can' baonao', Señor?

Na'ra bequëbinë' rëbinë' leyaquë':

—Caora rlë'ële rëcho yaca bëchi ladza, cana' inezile de ta zigo raoyacaba'. Lëcana' gaca inezile gan' gaca can' baonia'.

18

Una Jesús tu di'idza' quie tu nigula bagui xquiuhue len tu juez mala

¹ Una Jesús tu di'idza' ni psëdinë' yaca ben' quienë' ca ta reya'ala' hue'lëyaquë' Diuzi di'idza' yugu dza. Bireya'ala' yeyatiyaquë', bireya'ala' usanla'adyi'yaquë' ulidzayaquë' Diuzi. ² Na'ra unë' rëbinë' leyaquë':

—Bizi de tu yedyi ga uzu tu juez birapala'nnë' Diuzi, nica rapala'nnë' benë'. ³ Lëlao yedyi na', lëzi uzurë tu nigula, ben' baguti xquiuhue. Riotezi rionë' lao juez ta rnabë' huenë' justicia quie' len quie ben' raca dilalënë'.

⁴ Baguca zë lasa bigu'un juez huenë' justicia quie nigula. Bizi na'ra guca juez pensari unë': "Ba'ala'cazi nunu rdzeba', nica Diuzi, nica yaca benë', ⁵ por nun quie dan' nigula niga rdazi rdë' ruenë' në'ëdi' zëdi, tana' lena' huacalia'në' hua' justicia quie' cuenda bira guidë' hueranë' në'ëdi' zëdi. Bardanë'ëda' rdazi rdanë' ruenë' në'ëdi' zëdi."

⁶ Na' una Jesús rëbinë' leyaquë':

—Cana'la bë juez mala pensari ca unë'. ⁷ Na' nia' le'e, ¿bizi raquele ca hue Diuzi? ¿Raquele bigacalë Diuzi yaca ben' quienë', ben' rulidza lëbë' yugu dza yugu yela? ¿Raquele huadzë Diuzi bigacalënë' yaca ben' quienë'? ⁸ Rnìa' le'e, bitzë Diuzi. Labezi gacalënë' yaca ben' quie'. Pero cati yeguida' në'ëdi', bichi yugulu benë', žhuadzëleda' ben' rzudyi'ilë Diuzi, lao yedyi layu?

Una Jesús tu di'idza' quie tu ben' partido fariseo len tu ben' huequizu

⁹ Lëzi itu di'idza' ni una Jesús quie yaca ben' rlë'ë cuine ben' dya'a, na' rlë'ëyaquë' laguediyayaquë' ben' mala. Na' una Jesús:

10 —Uyo chopá benë' lu'u idao' rnabë'ra ta ulidzayaquë' Diuzi. Tunë' naquë' ben' partido fariseo. Na' itunë' naquë' ben' huequižu pquizunë' benë' mazara ca ta redu'ulanë' si'në'. 11 Biži zutezi ben' partido fariseo rulidzanë' Diuzi unë' cani: “Xuza' Diuzi, nia' diuxcalelo' como dan' binaca' ca ben' uban, binaca' ca ben' mala, binaca' ca ben' rutilë' nigula quie ben' tula. Binaca' ca ben' huequižu niga. 12 Në'ëdi' rua' ubasi chopá lasa lao tu xman. Na' runa' tu cue' lao chi cue' ca tu ta rua' gan.” Cana' unë' gudyinë' Diuzi. 13 Na' biži ben' huequižu, bega'nnë' zë' zitu'la gan' zë' ben' fariseo. Nica reyažonë' yechisa laonë' ladza. Na' uzulaonë' rcudyinë' ru'achu'unne' unë' rëbinë' Diuzi: “Xuza' Diuzi, beyëchi'la'adyi' në'ëdi' como dan' de dula' xquia quia.” 14 Na'ra inia' le'e, beži'ze Diuzi dula' xquia de quie ben' huequižu, zeyoguë' žan yu'u quienë'. Biži quie ben' partido fariseo nenaocazi dula' xquia quie' lëbë'. Rnia' le'e, nu ben' rue že cuine, huadyin dza hue Diuzi lëbë' ben' yube'ëzi. Na' biži nu ben' rue yube'ëzi cuine, huadyin dza hue Diuzi lëbë' ben' že.

Bëla'iya Jesús yaca xcuidi'
(Mt. 19.13-15; Mr. 10.13-16)

15 Na' guca dza bdyin yaca benë' gan' zë Jesús, nequië'yaquë' xcuidi' quieyaquë' ta uquichinë' na'anë' ta huela'iyane' leycabi'. Na' biži cati blë'ë yaca ben' quie Jesús nequië'yaquë' xcuidi' quieyaquë', na' udilayaquë' leyaquë'. 16 Na'ra guzi Jesús yaca ben' quienë' rëbinë' leyaquë':

—Biudzunle yaca xcuidi'. Guidagarayacabi' ni como dan' ca naca quieyacabi', rue quieyacabi' quie xuziyacabi', lëcana' nacaren quie ben' zio rue quie xti'idza' Diuzi. 17 Tali ca rnia' le'e, chi nu yaca ben' birue quieyaquë' xti'idza' Diuzi ca rue xcuidi' quie xuzibi', bisaque' yeyoyaquë' guibá gan' zu Diuzi.

Tu ben' uña'a bë'lënë' Jesús di'idza'
(Mt. 19.16-30; Mr. 10.17-31)

18 Biži bdyin tu ben' rnabë' gan' zë Jesús, na' unë' rëbinë' lëbë':
—Maestro, ben' huen naco'. Nainao', žca biži reya'ala' hua' ta gata' yela' neban quia' tuzioli?

19 Na' una Jesús rëbinë' lëbë':

—žBixquien' nao' naca' ben' huen? Tahuencazi nao' cana', como tuzi Diuzi naquë' ben' huen. 20 Luë' banežilo' ca rna lë'ë guichi la'iya quie Diuzi: “Biutilo' nigula quie ben' tula. Bigutio' benë'. Bicuanlo' quie benë'. Bisiu' benë' yë'. Lëzi udapala'n xuzo' len žnao'.” 21 Na'ra unë' ben' na' rëbinë' Jesús: —Yugulu ca rnao', ruequiecaza' len za'caza' naohua'n desde nacatia' xcuidi'.

22 Bë' be Jesús can' unë', na'ra unë' rëbinë' lëbë':

—De tu ta nerdzioguelo' huelo'. Bëti' yugulu ta de quio', na' bë'n yaca ben' yëchi'. Cana' gunra Diuzi taže quio' bë' yedyinlo' gan' zunë' guibá. Na' uda unao në'ëdi' gaco' ben' quia'.

23 Na' biži bë' be ben' na' ca una Jesús, na' bega'nnë' guquenë' beyëchi' gula, como dan' naquë' ben' uña'a huala gula. 24 Caora blë'ë Jesús guqueyëchi'në', na'ra unë' rëbinë' yaca benë':

—Žëdi gula nacan quie yaca ben' uña'a ta yeyoyaquë' guibá gan' zu Diuzi.

25 Nacaran yalo te tu camello naga yëchi', cala ca ta yeyu'u ben' uña'a guibá gan' zu Diuzi.

26 Na' yaca ben' be can' unë', unayaquë' rëbiyaquë' lëbë':

—Chi nacan žëdi gula yeyu'u yaca ben' uña'a guibá gan' zu Diuzi, žca nuži saque' yeyu'u?

27 Na'ra una Jesús rëbinë' leyaquë':

—Tu ta bisaque' hue yaca benë', Diuzi sí, huazaque'në' huenë'n.

²⁸ Na' biži unë Pedro rëbinë' Jesús:

—Señor, nëto' bapca'nndo' yugulu ta de quiendo' cuenda za'ndo' inaondo' luë'.

²⁹ Na'ra una Jesús rëbinë' lëbë':

—Nacan tali can' rnia' le'e. Con nuti'tezi ben' pca'n nu yu'u, nu xuzi, nu znë'ë, nu bichi, nu žgule, nu ži'ine tanun quie dan' bazionë' naonë' xneza Diuzi, ³⁰ hueyu'era Diuzi tazera quienë' dza rdanë' lao yedyi layu cala ca tu ta pca'nne'. Na' bë' yedyinnë' guibá gan' zu Diuzi, hue'në' lëbë' yela' neban tuzioli.

Una Jesús tatula cabë' gaca quië' gatinë'

(Mt. 20.17-19; Mr. 10.32-34)

³¹ Na' guži Jesús lao chipchopa ben' quienë' ubiga'yaquë' tzala'la unë' rëbinë' leyaquë':

—Uletza' tziro ciudad Jerusalén ga uzu di'idza' ca di'idza' bzu yaca ben' quie Diuzi lë'ë guichi dza na'te. Lë'ë lëguichi na' rguixogüe'n cabë' usaca' yaca benë' në'ëdi', bichi yugulu benë'. ³² Na' yaca ben' yedyi quia' usedyinyaquë' në'ëdi' lao na'a ben' tula ta utituyaquë' utasi unioyaquë' në'ëdi', uda'yaquë' žen' laohua'. ³³ Lëzi huaguiyaquë' gutiyaquë' në'ëdi'. Biži bë' gaca lao tzona dza, huebana' yeroga' gan' ucachi'yaquë' në'ëdi'. ³⁴ Pero yaca ben' quie Jesús biuyoñe'yaquë' cabë' gudiy Jesús leyaquë'. Binacan quieyaquë' ta tziõe'yaquë' can' unë'.

Beyue Jesús tu ben' laochula, ben' yedyi Jericó

(Mt. 20.29-34; Mr. 10.46-52)

³⁵ Bagazi idyinyaquë' yedyi Jericó, na' re' tu ben' laochula tu neza gan' zioyaquë' r nabë' caridad. ³⁶ Biži bë' be ben' laochula rde yaca ben' zë gula, caora na' unabane' yaca ben' bin' guca dan' rdezi rdeyaquë'. ³⁷ Na'ra unayaquë' rëbiyaquë' lëbë':

—Huade Jesús, ben' yedyi Nazaret, gan' re'lo' niga.

³⁸ Quie lena' unë' zidzo:

—Jesús, ži'i suba rey David, beyëchi'la'adyi' në'ëdi'!

³⁹ Biži yaca ben' dyialao laohuë', rdilayaquë' lëbë' ta bira inënë', pero unë're' zidzora unë':

—Ži'i suba rey David, beyëchi'la'adyi' në'ëdi'.

⁴⁰ Biži uleza Jesús, bënë' mandado yexi'yaquë' ben' laochula. Caora bdyinnë' ga'ala' gan' zë Jesús, na'ra unaba Jesús lëbë':

⁴¹ —¿Ca biži re'enlo' hua' quio'?

Na' bequëbi ben' laochula në':

—Señor, re'enda' yelë'ëda'.

⁴² Na'ra una Jesús rëbinë' lëbë':

—Babeyaco', barelë'ëlo' na'a nun quie rzudyi'ilëlo' Diuzi.

⁴³ Ca tu beyudyizi unë' cana', labelë'ëte ben' laochula, uži'në' zionë' naonë' Jesús ruenë' Diuzi ben' ze. Lëzi yaca ben' blë'ë can' bënë' quie ben' laochula, bëyaquë' Diuzi ben' ze.

19

Uyo Jesús lidyí Zaqueo

¹ Na'ra bë' bdyin Jesús yedyi Jericó udenë' lao yedyi na'. ² Lëlao yedyi na' uzu tu ben' uña'a laonë' Zaqueo. Nacanë' xan' ben' huequižu. ³ LëZaqueo re'ennë' ilë'ënë' Jesús cuenda huebë'në' lëbë'. Pero birzaque'në' ilë'ënë' lëbë',

dan' lega bgu'udi' yaca ben' zē gula. Na' lēbē' naquē' ben' chaco, binaquē' ben' huego'. ⁴ Na'ra zionē' taria udyialaonē' bdyinnē' gan' zu tu yaga laona sicómoro cuēta neza gan' zio Jesús. Biži na' urēnē' lao yaga ta ilē'ēnē' Jesús dyē'ēdi. ⁵ Biži cati bdyin Jesús gan', bechisa laonē' rna'nē' lao yaga gan' dyia Zaqueo. Na' unē' rēbinē' lēbē':

—Zaqueo, labe beyēzi gan' dyialo' como dan' žan yu'u quio' idyina' na'.

⁶ Biži Zaqueo labezi beyēzinē' gan' dyianē' lao yaga. Bedaohuenē' bequē'nē' Jesús žan yu'u quienē'. ⁷ Bē' blē'ē yaca benē' bazio Jesús žan yu'u quie Zaqueo, na'ra uzulaoyaquē' rtzaloayaquē' rēbiyaquē' laguedyiaquē' unayaquē' bazio Jesús yedyinnē' žan yu'u quie tu ben' huezī' yē', ben' mala gula. ⁸ Na'ra bare'yaquē' lu'u lidyī Zaqueo, uzulinē' unē' rēbinē' Jesús:

—Señor, hua' yaca ben' yēchi' gatzo ta de quia'. Chi baožia' benē' yē' ulana' quieyaquē', na' yeyu'ayaquē' lao tapa cue' ta aožia' quieyaquē'.

⁹ Na'ra una Jesús rēbinē' Zaqueo:

—Lena' rulu'en tali abetza'lo' pensari quio', na' barue quio' xti'idza' Diuzi. Banaco' dugalo zi'i suba Abraham. ¹⁰ Nē'ēdi', bichi yugulu benē', bida' lao yedyi layu ta ute usela' ben' ruen žudyi quie yeyoyaquē' lao gui' gabila.

Una Jesús tu di'idza' quie ben' bē' ben' gaca ladyinē'ē dumi

¹¹ Tu neržēnaga yaca benē' ca rna Jesús, unē' itu di'idza' dan' barega'n ga'ala' ga re' ciudad Jerusalén, lēscan' dan' guqueyaquē' ilē'ēti'zi rdziogue ta idyin dza inabē' Diuzi lao yedyi layu. ¹² Na'ra unē' rēbinē' leyaquē':

—Uzu tu ben' bala'ana. Na' uzē'ē zionē' yedyi re' žitu' ta cuioyaquē' lēbē' gaquē' rey yedyinnē' tatula ta inabē'nē' lao yedyi quienē'. ¹³ Pero tu zaironē' sa'nē', na' gužinē' lao chi yaca ben' hue'nē' ladyinē'ē. Na' bē'nē' quie quieyaquē' tu dumi že. Tana' unē' gudyinē' leyaquē': "Ulehue negocio conlē dumi babēna' le'e. Na' bē' yeguida' huero cuenda." ¹⁴ Na' biži yaca ben' lao yedyi quienē', lega rudieyaquē' lēbē'. Caora na' use'ela'yaquē' yaca benē' zio zenaoyaquē' lēbē' ta yēbiyaquē' ben' re' yedyi gan' zioyaquē': "Birexendo' ben' ni ta gaquē' rey quiendo'." ¹⁵ Pero gucacazinē' rey quieyaquē'. Ude na' bedyinnē' lao yedyi quienē'. Cati bedyinnē', na' gužinē' yaca ben' nu'enē' ladyinē'ē dumi quienē' ta inezinē' gaca tu ta bēlēyaquē' gan' dumi quienē'.

¹⁶ Na'ra unē' ben' nēro rēbinē' lēbē': "Señor, dumi benlo' nē'ēdi', babēlia'n gan' ichi cue' mazara ca tu ta benlo' nē'ēdi'." ¹⁷ Na'ra una rey na' rēbinē' lēbē': "Tahuen gula babao'. Na' nun quie bzulo' di'idza' bao' huen conlē lē'ēti'zi pca'na' lao na'alo', na'ra gaco' ben' rna'bē' quie lao chi yedyi." ¹⁸ Lēzi bdyin ben' urupe unē' rēbinē' rey na': "Señor, dumi quio' benlo' nē'ēdi', babēlia'n gan' iga'yo cue' mazara ca tu ta benlo' nē'ēdi'." ¹⁹ Na'ra una rey na' rēbinē' lēbē': "Gaco' ben' rna'bē' lao ga'yo yedyi." ²⁰ Biži bdyin ben' uyune unē' rēbinē' rey na': "Señor, ni zeyu'a dumi benlo' nē'ēdi'. Putba'n la'ari' bdze'tza'ohua'n. ²¹ Bibēlia' dumi quio' negocio, dan' rdzeba' chan' initin idza'lo' nē'ēdi', dan' nezda' naco' ben' reguē'ē bire'enlo' initi ta de quio'. Nezda' ruelao' dumi quio' negocio ga gacan seguro hue guichon." ²² Na'ra una rey na' rēbinē' ben' na': "Ben' mala gula naco'. Con can' rnao' rulu'en quio' aoquixo' bibē' huelo' ca re'enda'. Chi nezo' naca' ben' reguē'ē, ben' rue negocio ga gacan seguro hue guichon, ²³ ¿bixquien' biyelēcho' dumi quia' lao banco tacienda hue guichon yezi'a dumi quia' len guichon bē' yela' žan yu'u?" ²⁴ Na'ra una rey na' gudyinē' yaca ben' nita' na': "Ulesi' dumi bi'a ben' na' na' ulehue na ben' bi'a chi dumi." ²⁵ Na' unayaquē' rēbiyaquē' rey na': "Pero Señor, badecazi chi dumi quienē'." ²⁶ Na' una rey na' rēbinē' leyaquē': "Nu ben' rue quie ca ta pca'n xa'nnē' ladyinē'ē, lēlēbē' hue'ra xa'nnē' lēbē' mazara. Pero nu ben' birue quie ca ta pca'n xa'nnē' ladyinē'ē, hueguba

xa'nnè' ca ta bè'nè' lèbè'. ²⁷ Pero ca naca yaca ben' rudie nè'èdi', yaca ben' birexe gaca' rey quieyaquè', uletzexi'yaquè' gutileyaquè' zaquè' laohua' ni."

Bdyin Jesús ciudad Jerusalén

(Mt. 21.1-11; Mr. 11.1-11; Jn. 12.12-19)

²⁸ Bè' beyudyi una Jesús cana', beyu'uyaquè' neza tatula uza'yaquè' zioyaquè' ciudad Jerusalén. ²⁹ Cati baruen bago idyinyaquè' yedyi Betfagé len yedyi Betania, ga nacan ga'ala' gan' zu tu ya'a Olivos, lègan' na' use'ela'nè' chopa ben' quienè'. ³⁰ Na' unè' gudyinè' leyaquè':

—Uletzio yedyi re' ni' ga'ala'. Bè' idyinle gan', huatzaxacale tu burra nerioha', bia nitu nunu necuia. Uxèdyileba' nadahua'aleba' niga. ³¹ Chi ilè'è yaca benè' le'e inayaquè' le'e bixquien' rxèdyileba', na' reya'ala' yèbileyaquè' re'en Señor lèba' ta cuianè'ba'.

³² Na'ra uza' yaca ben' quie Jesús zioyaquè' gan' use'ela'nè' leyaquè'. Na' laga guca quieyaquè' cabè' gudyi Jesús leyaquè' yexacayaquè' lègan' nerio burra. ³³ Na' caora barxèdyiyaquè' burra, cana' bdyincazi xan' burra, na' unè' rëbinè' leyaquè':

—¿Bixquien' rxèdyile burra quia'?

³⁴ Na'ra unayaquè' rëbiyaquè' lèbè':

—Re'en Señor lèba' ta cuianè'ba'. Bè' idyinnè' gan' ziondo', nadesanndo'ba'.

³⁵ Na' bequiè'yaquè'ba' gan' zè Jesús, uxubayaquè' žabayaquè' xcu'udzu burra ta udyianè' lèba'. ³⁶ Tu neyu'u Jesús neza zionè' ciudad Jerusalén, ulèchoyaquè' žabayaquè' udixuyaquè'n tu neza gan' tenè'. ³⁷ Caora bdyinyaquè' gan' zu leto quie ya'a Olivos, cana' uzulao yaca ben' zio nao Jesús unèyaquè' zidzo. Lega redaohueyaquè' bëyaquè' Diuzi ben' že ca naca yela' huaca bènè' blè'èyaquè'. ³⁸ Lena' unayaquè' zidzo:

—Ben' naca la'iya ben' niga. Naquè' rey quiero. Diuzi use'ela'nè' lèbè'. Redaohue yaca ben' nita' guibá ca ruenè'. Naca Diuzi ben' že gula. —Cana' unayaquè'.

³⁹ Na' biži nita' bala yaca ben' partido fariseo lado yaca ben' zio nao Jesús. Na' unayaquè' rëbiyaquè' lèbè':

—Maestro, reya'ala' tilo' yaca ben' za' nao luè' niga ta bira inayaquè' can' nayaquè'.

⁴⁰ Na' bequèbi Jesús rëbinè' leyaquè':

—Rnia' le'e, chi yega'n yaca ben' niga chizi, huanè yaca yo ni zidzo lao lazayaquè'.

⁴¹ Cati bdyinyaquè' ga'ala' ga re' ciudad Jerusalén, na' blè'ènè' ciudad na', na' uredyinè'. ⁴² Quie lao ciudad na' unè' cani:

—Bida' ta ucuasa ucu'oga' le'e cue' chizi laxta'ole tuzioli, pero bire'enle birezaquale nè'èdi'. Quie lena' baode quiele na'a. ⁴³ Baza' dza gaca bayèchi' gula quiele. Huala' yaca ben' zè, yaca ben' rudie le'e. Huayèchoyaquè' lao ciudad quiele uza'agayaquè' le'e. ⁴⁴ Gutiyaquè' le'e len žgulale len ži'ile. Yela'te uquinuyaquè' yu'u quiele. Cana' gaca quiele como dan' bibè quiele nè'èdi' dza bida' gu'unda' sulia' le'e tuže.

Blaos Jesús yaca ben' yu'u huèti' lu'u idao' rnabè'ra

(Mt. 21.12-17; Mr. 11.15-19; Jn. 2.13-22)

⁴⁵ Na'ra uyu'u Jesús lu'u idao' rnabè'ra blaonè' yaca ben' yu'u ra'o ruti'.

⁴⁶ Na' unè' rëbinè' leyaquè':

—Lè'è guichi gan' yu'u di'idza' la'iya quie Diuzi nan cani: “Lu'u idao' r nabè'ra ni nacan ga r lidza yaca benè' Diuzi.” Pero le'e abetza'len ruelen ca quie beló ga yu'u ben' uban. —Cana' una Jesús gudyinè' leyaquè'.

⁴⁷ Pero yugu dza rio Jesús lu'u idao' r nabè'ra ruxi'idze'nè' yaca benè'. Pero yaca xan' pxuzi, len yaca ben' rusèdi ley quie Moisés, len yaca ben' napa dyin quie lao yedyi, reguilola'adyi'yaquè' r na'yaquè' ca hueyaquè' ta gutiyaquè' lèbè'. ⁴⁸ Pero biubinyaquè' bi hueyaquè' ta gutiyaquè' lèbè', como dan' nita' yaca ben' zè gula rexeayaquè' uzè nagayaquè' can' rnè'.

20

Bè'yaquè' di'idza' quie yela' r nabè' quie Jesús

(Mt. 21.23-27; Mr. 11.27-33)

¹ Bizi bdyin tu dza zè Jesús lu'u idao' r nabè'ra ruxi'idzè' yaca benè' ca re'en Diuzi hueyaquè' ta yeyèri laxta'oyaquè' laohuè'. Na' bdyin yaca xan' pxuzi, len yaca ben' rusèdi ley quie Moisés, len yaca ben' napa dyin quie yulao'.

² Na'ra unayaquè' rèbiyaquè' lèbè':

—Una nètò' ¿nu ben yela' r nabè' quio', dan' bablaolo' yaca ben' yu'u huèti' lu'u idao' r nabè'ra?

³ Na' una Jesús rèbinè' leyaquè':

—Lèscan' re'enda' inaba' le'e tu di'idza'. Na' yequèbile quia': ⁴ ¿Nuži use'ela' Juan bautista? ¿Use'ela' Diuzi lèbè' o ta racazi la'adyi'nè' bidè'?

⁵ Na'ra uzulaoyaquè' rtzaloayaquè' ru'elèyaquè' laguedyiaquè' di'idza' unayaquè':

—¿Cabizi yèbironè'? Chan' yèbironè': “Diuzi use'elè' lèbè'”, na' huanè' ra'o: “¿Bixquien' bigulele quienè'?” ⁶ Na' chi yèbironè': “Ta racazi la'adyi'nè' bidè'”, na' huadza' yaca benè' ra'o, ruen žudyi huaguiaquè' ra'o yo, gutiyaquè' ra'o como dan' rnyaquè' use'ela' Diuzi Juan rguixoguenè' xti'idzè'.

⁷ Na'ra unayaquè' rèbiyaquè' Jesús:

—Binezindo' nu ben' use'ela' Juan bautista.

⁸ Lèzi unarè Jesús rèbinè' leyaquè':

—Lèscan' nèt'èdi', biinia' le'e nu ben yela' r nabè' quia' bablaohua' yaca ben' yu'u huèti' lu'u idao' r nabè'ra.

Una Jesús tu di'idza' quie ben' mala, ben' guca ladyinè'è quie xa'ne

(Mt. 21.33-44; Mr. 12.1-11)

⁹ Na'ra una Jesús itu di'idza' ni rèbinè' yaca benè':

—Uzu tu ben' guzanè' bedzuli' lao layu quienè'. Ude na' pca'nnè'n lao na'a yaca ben' gaca ladyinè'è layela quienè'. Na' uzè'è zioquè' yedyi re' zitu'. ¹⁰ Bizi cati bdyin biu' quie usecho quie bedzuli', na' bese'ela' xan' layela tu ben' zu laohuè' ta tzenabanè' tu ta redu'ulanè' si'nè' quie bedzuli' quienè'. Pero bela'cala bè'yaquè' zi' ben' use'ela' xa'nyaquè'. Na' beza'nè' gabi zeyu'anè', bedyinè' lao xa'nnè'. ¹¹ Na'ra bese'ela' ben' xan' layela ben' tula zioquè'. Pero lèzi utasi unioyaquè' lèbè', bè'yaquè' lèbè' zi', gabi bè'yaquè' lèbè'. Na' zeyoguè' bedyinè' lao xa'nnè', gabi zeyu'anè'. ¹² Bizi ben' xan' layela, tatula bese'ela'nè' ben' tula, ben' uyune. Lèzi bèrèyaquè' lèbè' hue', blaoyaquè' lèbè', gabi zeyu'anè'.

¹³ 'Pues guca ben' xan' layela pensari unè': “¿Ca bižira hua'? Na' ise'ela' zi'ina' bi' nedyè'èda'. Catì ilè'èyaquè' lèbi', chica huapala'nyaquè' lèbi'.” ¹⁴ Pero bè' blè'è yaca ben' naca ladyinè'è layela babdyin zi' i xa'nyaquè', na'ra unayaquè' rèbiyaquè' laguedyiaquè': “Bi' niga gaca quiebi' layu niga cati bagati xuzibi'. Uletza' gutirobi' cuenda si'ro layu niga gacan quiero.” ¹⁵ Na'ra bèxoyaquè'bi', ulioyaquè'bi' gan' de layela, bètiyaquè' lèbi'.

Na'ra unaba Jesús yaca ben' nita' na' tu di'idza' unë':

—¿Cabiži hue xan' layela len leyaquë'? ¹⁶ Pues huedyinnë' gan' de layela quienë' ta gutinë' yaca ben' nu'enë' ladyinë'ë, hue'në' yaca ben' tula gaca ladyina'ayaquë' layela quienë'.

Na'ra caora be yaca benë' cabë' una Jesús, na' unayaquë' rëbiyaquë' lëbë':

—Birda chi tamala ca tamala bë yaca ben' guca ladyinë'ë layela.

¹⁷ Na'ra una' Jesús leyaquë' unë' rëbinë' leyaquë':

—Chi nacan can' rnale, ¿ga huen dyin di'idza' yu'u lë'ë guichi la'iya quie Diuzi rnën caniga?:

Yo laga' ta baoru'un ben' hue huecua', lëyo na' bezi' Diuzi bzunë'n ga naca belao, ga rzulao besu.

¹⁸ Na' rnial' le'e, nu yaca ben' iguino lëlao yo na', huayožo iguinoyaquë'. Lëscan' chi iguino yo idacon leyaquë', huatzutzon leyaquë'.

Unabayaquë' Jesús ca naca quie impuesto

(Mt. 21.45-46; 22.15-22; Mr. 12.13-17)

¹⁹ Na'ra yaca xan' pxuzi, len yaca ben' rusëdi ley quie Moisés, gu'unayaquë' guxuyaquë' Jesús luegozi, dan' bezaqueyaquë' quieyaquë' unë' Jesús di'idza' quie yaca ben' guca ladyinë'ë layela. Pero bibeyažoyaquë' bi hueyaquë' quienë', dan' rdzebiyaquë' bi hue yaca benë' quieyaquë'. ²⁰ Bizi cabë' beguilola'adyi'yaquë' bëyaquë', use'ela'yaquë' ben' ruezzi cuine ca ben' bala'ana ta tzenabayaquë' Jesús di'idza' naci iquixinë' inë' calëla tacuenda ga saque' gaoyaquë' lëbë' xquia lao ben' naca gobierno. ²¹ Quie lena' bdyinyaquë' gan' zë Jesús unayaquë' rëbiyaquë' Jesús:

—Maestro, banezindo' luë' rxi'idze'lo' yaca benë' di'idza' naca li. Na' biru' cuenda bi naque yaca benë', sino rxi'idze'lo' benë' tali ca naca xneza Diuzi.

²² Unacara nëto': ¿Ru'en lato quizoro quie impuesto quie ben' naca gobierno romano? ¿Huaguižoron o biquižoron?

²³ Pero banezi Jesús ca naca pensari mala yu'uyaquë' reguilola'adyi'yaquë' bi hueyaquë' quienë'. Na' unë' rëbinë' leyaquë':

—¿Bixquien' re'enle cuëchile trampa quia'? ²⁴ Uleulu'ecara në'ëdi' tu dumi. ¿Nu guicho, nu laohue da' lë'ën?

Na'ra unayaquë' rëbiyaquë' lëbë':

—Da' lë'ë dumi nu guicho, nu lao ben' naca gobierno.

²⁵ Na' una Jesús rëbinë' leyaquë':

—Ulehue' ben' naca gobierno ta redu'ulanë' si'në'. Lëscan' ulehue' Diuzi ta redu'ulanë' si'në'.

²⁶ Na' gabi užaque'yaquë' ga iquixi Jesús ca di'idza' rnë' lao benë'. Bela'cala tu bebanziyaquë' can' unë'. Babira biubinyaquë' bi yëbiyaquë' lëbë'.

Unabayaquë' Jesús quie ben' baguti beban

(Mt. 22.23-33; Mr. 12.18-27)

²⁷ Ude na' uyorë yaca ben' partido saduceo gan' zë Jesús. Na'ra rna yaca ben' partido saduceo biyeban yaca ben' baguti. Quie lena' unayaquë' rëbiyaquë' Jesús:

²⁸ —Maestro, ca naca di'idza' bzu Moisés lë'ë guichi, rnën chi baguti tu be'mbyu, na' bega'n žgulanë' tu cuinzë', nunu ži'iyacuë' uzu, ruen zi yezi' bi' bichinë' nigula quie ben' baguti tacuenda yezu xcuidi' yezi' lao ben' baguti.

²⁹ Na' ugunro guca gadyi bichiyaquë'. Na' ben' nëro uzi'në' nigula quienë'. Pero ni tu ži'iyacuë' biuzu gutinë'. ³⁰ Na' biži ben' urupe bezi'në' nigula quie ben' bichinë', ben' baguti. Lëzi gutirënë', nunu ži'iyacuë' uzurë. ³¹ Na' biži ben' uyune bezi'rënë' nigula quie ben' bichinë', ben' baguti. Lëzirë gutirënë' nunu ži'iyacuë' uzurë. Cana' guca quie lao gadyiteyaquë', yaca ben' uzulë

nigula. ³² Ga beyudyicala quie nigula, gutirënë'. ³³ Na'ra chi tali na' yeban yaca ben' huati, ¿ca nurlayaquë' naca žgulyaquë' nigula na', como dan' lao gadyi bichiyaquë' uzulëyaquë' lëbë'?

³⁴ Na' bequëbi Jesús rëbinë' leyaquë':

—Lao yedyi layu niga rzulë be'mbyu nigula, lëscan' rzulë nigula be'mbyu. ³⁵ Pero yaca ben' yeban yeyo guibá ga zu Diuzi, bira sulëyaquë' laguediyaquë' ca nu žgulyaquë', ca nu xquiuyaquë'. ³⁶ Lëscan' bira gatiyaquë'. Cabë' bigati yaca ángel, cana' bigatirëyaquë'. Tali nacayaquë' ži'i Diuzi, dan' babebanyaquë' huatzezulëyaquë' Diuzi tuzioli. ³⁷ Na' rguixogue' yaca di'idza' bzu Moisés lë'ë guichi de que yeban yaca ben' baguti. Caora zë Moisés gan' re' yaga ra'ala' gui' bireina, lëgan' na' una Diuzi gudyinë' Moisés: “Naca' Diuzi quie xuzixta'olo' Abraham, len quie xuzixta'olo' Isaac, len quie xuzixta'olo' Jacob.” ³⁸ Cana' una Diuzi quieyaquë', ba'ala'cazi bagutiyaquë' azio zë iza caora. Lena' rulu'en rlë'ë Diuzi leyaquë' ca ben' neneban, cala ca ben' baguti. Pues rlë'ë Diuzi yugulu benë' ca yaca ben' neban. Birlë'ënë' leyaquë' ca ben' baguti.

³⁹ Biži bala yaca ben' rusëdi ley quie Moisés, ben' nita' na', ruzënegayaquë' bi na Jesús, unayaquë' rëbiyaquë' Jesús:

—Tahuencazi cabë' baonao', Maestro.

⁴⁰ Na' biži bira biubinyaquë' bi di'idza' inabayaquë' lëbë'.

Naca ben' Cristo Señor quie rey David

(Mt. 22.41-46; Mr. 12.35-37)

⁴¹ Na'ra una Jesús rëbinë' leyaquë':

—Nacan tali ca nale, nale naca ben' Cristo ži'i rey David. ⁴² Pero cuin rey David, caora bzunë' di'idza' lë'ë guichi Salmos, unë' cani:

Una Diuzi rëbinë' ben' naca Señor quia': “Ure' cuëta' zaquë' yebë niga,

⁴³ hasta idyin dza cuëcha' xni'alo' yaca ben' rudie luë'.”

⁴⁴ Quie lena' rnaba' le'e: ¿Cómo naca ben' Cristo ži'i rey David, chi cuin rey David unë' naca ben' Cristo Señor quienë'?

Udao Jesús xquia yaca ben' rusëdi ley quie Moisés

(Mt. 23.1-36; Mr. 12.38-40; Lc. 11.37-54)

⁴⁵ Na' ben' zë nita' bzënegayaquë' ca una Jesús caora unë' rëbinë' yaca ben' quienë':

⁴⁶ —Gapale cuidado bihuele ca rue yaca ben' rusëdi ley quie Moisés. Lega rexeyaquë' gacoyaquë' la'ari' naca tona. Lega rexeyaquë' gapala'n yaca benë' leyaquë' ga rdayaquë' tu neza. Lega rexeyaquë' cue'yaquë' ga rbe' ben' bala'ana, chi lu'u idao' sinagoga, chi ga raca lani. ⁴⁷ Zidza rulidzayaquë' Diuzi cuenda ilë'ë yaca benë' leyaquë' ben' quie Diuzi, pero bë' rueziaquë' regulolola'adyi'yaquë' bi hueyaquë' ta cubayaquë' ta de quie yaca nigula baguti xquiuhue. Quie lena' huera Diuzi leyaquë' tu castigo huala gula.

21

Una Jesús quie tu nigula guti xquiuhue bdze'në' gun quie idao'

(Mr. 12.41-44)

¹ Na' guca tu dza zë Jesús lu'u idao' rnabë'ra blë'ënë' rudze' yaca ben' uña'a dumi quieyaquë' lu'u caja ga yu'un gun quie idao' rnabë'ra. ² Lëzi blë'ënë' bdze' tu nigula guti xquiuhue chopá dumi dao' lasi de cobre lu'u caja na'.

³ Na' una Jesús rëbinë' yaca ben' quienë':

—Tali rnia' le'e, nigula na' naquë' ben' yëchi', aguti xquiuhuë', pero ca naca dumi bdze'në' lu'u caja, nacaran dumi že cala ca ta bdze' yaca ben' uña'a.

⁴ Ta bega'nnan sobre quieyaquë' bdze'yaquë' lu'u caja na', pero lë'nigula ben' yëchi', bdze'në' ca tu dumi dao' dezi quienë' ta ra'onë' ta raonë'.

Una Jesús huabiagui' idao' rnabë'ra
(Mt. 24.1-2; Mr. 13.1-2)

⁵ Na'ra yaca ben' quie Jesús, bë'lëyaquë' laguedyiaquë' di'idza' unayaquë' quie idao' rnabë'ra de que nacan badan gula, len yo necua' besu, len tu ta psala'adyi' yaca benë' bë'yaquë' quie idao'. ⁶ Na'ra una Jesús rëbinë' leyaquë': —Huadyin dza iguino duže ca ta rna'le niga. Ni tu yo bira yega'nnan xcu'udzu laguedyin.

Ga ru'en di'idza' cabë' gaca baruen bago dza iyudyi dyilayu
(Mt. 24.3-28; Mr. 13.3-23)

⁷ Na'ra yaca ben' quie Jesús unabayaquë' Jesús rëbiyaquë' lëbë': —Maestro, ¿bata gaca can' rnao'? ¿Ca biži gaca ta ulu'en nëto' cati baruen bago dza gaca can' rnao'?

⁸ Na' una Jesús rëbinë' leyaquë': —Gapale cuidado ta bisi' yaca benë' le'e yë'. Porque huida ben' zë inayaquë': “Në'ëdi' naca' Cristo.” Lëscan' inayaquë': “Abdyin hora yeyudyi yedu quie dyila yu.” Pero bigalele quieyaquë'. ⁹ Lëzi cati babele baozulao huedila, rdilalë nación conlë itu nación, lëscan' rdilalë benë' conlë gobierno quieyaquë', bidzebile. Huata'cazi huedila quie lao yedyi layu, pero nerdziogue idyin dza yeyudyi yedu quie lao yedyi layu.

¹⁰ Lëscan' una Jesús rëbinë' leyaquë':

—Huaca dilalë tu nación itu nación. Huaca dilalë tu yedyi itu yedyi.

¹¹ Lëscan' ni'nizi quie lao yedyi layu huaca uzu' huala, huata' ubin, huata' yela' hue'. Lëscan' hualë'ë yaca benë' ta utzebin leyaquë' za'n guibá huazën ladza.

¹² Pero tu zagaca can', guxu yaca benë' le'e hueyaquë' le'e bizinaquezi. Iquië'yaquë' le'e lu'u yaca idao' sinagoga ta gaoyaquë' le'e xquia. Lëscan' udze'yaquë' le'e lu'u dyiguiba, usedyinyaquë' le'e lao na'a ben' naca go-bierno dan' baralele baza'le naole në'ëdi'. ¹³ Cana' gaca quiele tacuenda inële cule në'ëdi' laoyaquë'. ¹⁴ Bidëbile ca bi yëbilyaquë' cuenda gacalële cuinle laoyaquë'. ¹⁵ Bidëbile como dan' gacalia' le'e bi di'idza' yeqüëbile yeyëbilyaquë' cuenda inita' yaca ben' rudie le'e chizi, bira ibinyaquë' bi inayaquë' le'e. ¹⁶ Hasta ben' naca familia quiele, len ben' naca amigo quiele, huazi'yaquë' le'e yë'. Usedyin nu xuzile, nu bichile, nu diadza quiele, nu amigo quiele le'e lao na'a ben' rnabë'. Gutiaquë' bala le'e. ¹⁷ Huadi yaca ben' nita' lao yedyi layu le'e dan' naole xneza'. ¹⁸ Pero bibi gaca quiele, ni tu guitza' guichole bicuiagui'n. ¹⁹ Chi hue quiele biusanla'adyi'le naole xneza', huata' yela' neban quiele tuzioli.

²⁰ Cati ilë'ële baneyëchote yaca soldado ciudad Jerusalén, huanezile baruen bago dza udyiagui'yaquë' lao ciudad na'. ²¹ Na'ra yaca ben' nita' estado Judea, ruguinte izunoyaquë' tzioyaquë' ga zu ya'a. Lëscan' yaca ben' nita' ciudad Jerusalén, ruguinte eroyaquë' tzioyaquë' huažuno. Lëscan' yaca ben' nita' lao layela, bireya'ala' yeyoyaquë' ciudad Jerusalén. ²² Lëdza gaca can' nacan dza hue Diuzi castigo. Nacan dza uzucazi yugulu di'idza' ca di'idza' yu'u lë'ë guichi la'iya quie Diuzi. ²³ Huaca bayëchi' gula quie yaca nigula nu'a bdao', len yaca nigula ruga'adyi bdao' dza gaca can'. Lega yedzagalao yaca ben' Israel, hue Diuzi leyaquë' tu castigo huala gula. ²⁴ Na' guti yaca soldado balayaquë'. Na' ibalayaquë' uquioyaquë' hueyaquë' leyaquë' preso iquië'yaquë' leyaquë' yaca yedyi zë, yedyi tula. Tana' lena'

inabè' yaca ben' za' yedyi tula lao ciudad Jerusalén hasta idyin dza bira hue Diuzi lato inabè'yaquè' lao ciudad na'.

Ca guca bè' yeguida ben' naca bichi yugulu benè' lao yedyi layu tatula (Mt. 24.29-35, 42-44; Mr. 13.24-37)

Na' una Jesús:

²⁵ —Ude na' huata' ta naca seña ladza. Huechula obidza, bira gata' xni' biu', huaguino yaca bélo. Huaca tondo yaca ben' nita' lao yedyi layu. Huadzebiyaquè' yeyaquè' xchi' nisadao' ruen ru'be huala gula ga rbiga' rdan ru'a yu bidyi. ²⁶ Huayun'yaquè' tanto idzebiyaquè' ca gaca quieyaquè' lao yedyi layu. Huazisi huaguino yaca bélo dyian guibá. ²⁷ Lēcana' hualè'è yaca ben' nita' lao yedyi layu nē'ēdi', bichi yugulu benè'. Hualè'ēyaquè' yeguida' lao beo zē ladza. Hualè'ēyaquè' nē'ēdi' de yela' huaca quia'. ²⁸ Cati baraca can' rnía', na'ra bidzebile, reya'ala' yechisa guichole ina'le ladza como dan' ilè'ēti'zi rzioogue ute usela' le'e ca ta raca quiele.

²⁹ Lēzirē unē Jesús itu di'idza' ni, unē' rēbinè' leyaquè':

—Ulena'cara ca raca quie yaga higo o bitezi yaga tula. ³⁰ Cati ilè'ēle bagusin la'aga' gula, barebian la'aga' re'ene quien, banezile baza' biu' oba. ³¹ Lēzirē cati ilè'ēle baraca cabè' rnía' le'e, reya'ala' inezile baza' dza inabè' Diuzi lao yedyi layu.

³² 'Tali rnía' le'e, tu bineya zi'isuba ben' nita' na'a, bè' gaca cabè' rnía' le'e.

³³ Huade quie ta dyia guibá len lao yedyi layu cana'zi, pero ca naca di'idza' rnía' le'e, biten cana'zi. Decazide huazun di'idza' cabè' rnía' le'e.

³⁴ Ulegapa cuidado, bihue'le lato gacale zidi tzu'u pensari mala lu'u guicho laxta'ole. Bihuele tabayatza, bihuele hue'e, bidēbile quie ta gaole, bidēbile quie ta gacole, yela' na' biyebanle dza yeguida'. ³⁵ Porque cabè' rdzebi bia guixi' bè' rdacoba' lu'u trampa, cana' yedzebi yaca ben' nita' lao duze yedyi layu dza yeguida'. ³⁶ Lena' nia' le'e, ulesu listo. Ulehue'lē Diuzi di'idza' yugu dza, yugu yela, cuenda ucuasa ucu'ionè' le'e ca tamala za' gaca lao yedyi layu. Ulehue quiele cuenda yetilalaole nē'ēdi', bichi yugulu benè'. —Cana' una Jesús rēbinè' leyaquè'.

³⁷ Ruxi'idze' Jesús yaca benè' lu'u idao' rnabè'ra te dza. Na' biži quie sadze' rionè' ga zu ya'a lao Olivos ga reguesinè'. ³⁸ Biži yaca ben' zē rdyinyaquè' yugu zila lu'u idao' rnabè'ra ta rzēnagayaquè' ca di'idza' ruxi'idzē' leyaquè'.

22

Beguilola'adyi'yaquè' bi hueyaquè' ta gutiyaquè' Jesús (Mt. 26.1-5, 14-16; Mr. 14.1-2, 10-11; Jn. 11.45-53)

¹ Na' baruen bago ta hue yaca ben' Israel lani pascua ta gaoyaquè' yēta xtila binequixi levadura. ² Biži yaca xan' pxuzi len yaca ben' rusēdi ley quie Moisés, lega regulola'adyi'yaquè' bi hueyaquè' ta gutiyaquè' Jesús. Pero bireyazoyaquè', dan' rdzebiyaquè' idza' yaca benè' leyaquè'.

³ Na' biži tu ben' naca ben' quie Jesús lado ichiptu yaca ben' quie Jesús bè'nè' lato uyu'u xan' taxi'ibi' Satanás lu'u laxta'onè'. Lēben' na' laonè' Judas Iscariote. ⁴ Na' uyo Judas tzeguelēnè' di'idza' yaca xan' pxuzi, len yaca ben' napa dyin quie idao' rnabè'ra ta yeguilola'adyi'yaquè' bi hueyaquè' ta usedyinnè' Jesús lao na'ayaquè'. ⁵ Leyaquè' lega bedao-hueyaquè' bega'nlēyaquè' lēbè' di'idza' ta hue'yaquè' lēbè' dumi. ⁶ Na' uzulaonè' beguilola'adyi'nè' bi huenè' ta usedyinnè' Jesús lao na'ayaquè' cati nunu ben' nita'.

Ga ru'en di'idza' ca gaoyaquë' quie lani pascua
(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Bdyincazi dza bëyaquë' lani pascua cati gaoyaquë' yëta xtila ta binequixi levadura, lëscan' gutirëyaquë' beco' zi'ila' quie lani pascua. ⁸ Lena' una Jesús rëbinë' chopa ben' quienë', Pedro len Juan:

—Uletzio ta ucuezale ta gaoro rtze' quie lani pascua.

⁹ Na'ra unabayaquë' rëbiyaquë' lëbë':

—¿Gaži re'enlo' tziondo' ta tzacuezando' ta gaoro?

¹⁰ Biži na' una Jesús rëbinë' leyaquë':

—Uletzio ciudad Jerusalén. Caora babdyinle ru'a ciudad, lëgan' na' yedilale tu be'mbyu zeyu'a tu re' yudzo nisa. Lëben' na' inaole gan' zeyonë' yedyinnë' zan yu'u. ¹¹ Na' tzu'ule yëbile ben' naca xan' yu'u: “Cani na Maestro: ¿Gaži zu lu'u yu'u ga gaolëndo'në' rtze' quie lani pascua?” ¹² Na'ra ulu'enë' le'e tu lu'u yu'u že de chopa xcuia ga baneluban banacan dya'a. Lëgan' na' ucuezale ta gaoro.

¹³ Na' uza'yaquë' zioyaquë' gucan laga con can' gudyi Jesús leyaquë'. Lëgan'na' pcuezayaquë' ta gaoyaquë' rtze' quie lani pascua.

¹⁴ Cati bdyin hora gaoyaquë' quie rtze', na' uza' Jesús ziolënë' yaca ben' quienë' uyu'uyaquë' lu'u yu'u ure'yaquë' lao mesa. ¹⁵ Na'ra una Jesús rëbinë' leyaquë':

—Lega bare'enda' gaolia' le'e rtze' quie lani pascua tu zagatia'. ¹⁶ Rnia' le'e, bira gaolia' le'e rtze' quie lani pascua. Caora babzu di'idza' ca una Diuzi arnabë'në' lao yedyi layu, cana'tera gaolia' le'e rtze' quie lani pascua tatula.

¹⁷ Na'ra uzi'në' tu copa, bazënë'n lao në'ë, unë' rëbinë' Diuzi:

—Diuxcalelo'.

Ude na' unë' rëbinë' leyaquë':

—Uleguxun tu tule, uleyo'on. ¹⁸ Rnia' le'e, bira yo'oga' nisa quie bedzuli'. Caora babdyin dza arnabë' Diuzi lao yedyi layu, cana'tera yo'oga' nisa bedzuli' tatula.

¹⁹ Na' uzi'në' tu yëta xtila bazënë'n lao në'ë unë' rëbinë' Diuzi:

—Diuxcalelo'.

Ude na' unë' rëbinë' leyaquë':

—Lëyëta xtila ni nacan ca quie cuerpo quia'. Huatia' cuenda gata' yela' huezi'že quiele lao Diuzi. Cabë' aodaoro rtze' niga, cana' huerële ta yezala'adyi'le në'ëdi' cabë' bia' quiele.

²⁰ Lëzirë, ude beyudyi udaoyaquë', bezi'në' itu copa unë' rëbinë' leyaquë':

—Naca nisa bedzuli' yudzu copa ni ca quie ren quia'. Lena' ilatoga' gatia' cuenda yega'ntza'olë Diuzi le'e tacubila. Lena' ilatoga' cuenda gata' yela' huezi'že quiele lao Diuzi.

²¹ Pero tu ben' re' len në'ëdi' lao mesa ni, lëben' na' usedyinnë' në'ëdi' lao na'a ben' rudie në'ëdi'. ²² Në'ëdi', bichi yugulu benë', banugunnan gatia'. Pero bayëchi' gula gaca quie ben' usedyin në'ëdi' lao na'a ben' rudie në'ëdi'.

²³ Na'ra unayaquë' rëbiyaquë' laguedyiaquë':

—¿Nuži ra'o usedyinronë' lao na'a ben' rudie lëbë'?

Ga bëyaquë' tu huenë quie nulayaquë' gacara belao

²⁴ Na'ra yaca ben' quie Jesús uyu'uyaquë' huenë len laguedyiaquë' ca nulayaquë' gacara ben' belao entre leyaquë'. ²⁵ Pero na' una Jesús rëbinë' leyaquë':

—Yaca ben' naca gobierno lao yedyi layu niga, lega dyiabë'yaquë' hue yaca benë' ca ta re'enyacuë'. Na' nayaquë' nacayaquë' ben' belao. ²⁶ Pero na' le'e bireya'ala' huele ca rueyaquë'. Bireya'ala' hue cuinle ben' belao. Reya'ala'

gacalële laguedyile. Reya'ala' ilë'ële cuinle ca ben' criado. Chi huele cana', tali na' nacale ben' belao ca re'en Diuzi. ²⁷ Quie lao ben' nita' lao yedyi layu niga, rbe'cazi xa'nyaquë' lao mesa ta gaoyaquë' ta rudyia criado quieyaquë'. Pero në'ëdi', la'acazi naca' xa'nle, zua' ladole rua' ca quie criado quiele.

²⁸ Na' como dan' bipsanla'adyi'le në'ëdi' dza cati guca zëdi gula quia', ²⁹⁻³⁰ quie lena', guna' le'e lato cue'le gaole yo'ole len në'ëdi' lao mesa quia' ga yedyina' inabi'a. Lëscan' guna' le'e lato cue'le ga gaca xlatole ichugolle quie lao chipchopa cue' ben' Israel. Cabë' bë Xuza', pca'nnë' yela' rnabë' quienë' ta inabi'a, cana' hueria' quiele, uca'na' yela' rnabë' quia' ta inabë'le.

Ga una Jesús quie Pedro huananë' binubë'në' lëbë'

(Mt. 26.31-35; Mr. 14.27-31; Jn. 13.36-38)

³¹ Lëzi unë'rë Jesús:

—Simón, Simón, re'en xan' taxi'ibi' Satanás huelën le'e prueba, chi usanla'adyi'le në'ëdi', chi biusanla'adyi'le në'ëdi'. Re'ennan usisin le'e ca rsisi benë' bini trigo. ³² Pero bablidza' Diuzi ta gacalënë' luë' ta biusanla'adyo' në'ëdi'. Na'ra cati barenaolo' xneza' tatula, na' utipalo' yaca ben' bicho', ben' nao xneza', ta inaorayaquë' mazara xneza'.

³³ Na'ra una Simón rëbinë' Jesús:

—Zucaza' dispuesto tzalia' luë', ba'ala'cazi udze'yaquë' ra'o lu'u dyiguiba, o chi gutiyaquë' ra'o.

³⁴ Na' una Jesús rëbinë' lëbë':

—Pedro, rnia' luë', bala tu binecuedyi biu, huanao' tzona lasa binubë'lo' në'ëdi'.

Baidyin hora yedzagalao Jesús

³⁵ Na'ra una Jesús rëbinë' leyaquë':

—Cati use'ela' le'e ga uyole dza na', bibi'ale yëxo, bibi'ale dumi, bibi'ale itu cue' guidi ta uliole, ÷bdzioguele bi ta bdzioguele?

Na' unayaquë' rëbiyaquë' Jesús:

—Bibi bdzioguendo'.

³⁶ Bi'zi una Jesús rëbinë' leyaquë':

—Babetza' ca nia' huele. Chi de yëxo quiele, reya'ala' hua'alén, lëzi hua'arële dumi. Chi bide macheta quiele, guti'le gabán quiele ta ga'ole macheta quiele hua'alén. ³⁷ Lena' rnia' le'e, decazide uzun di'idza' gan' rnën quia' lë'ë guichi la'iya quie Diuzi cani: “Hualë'ëyaquë' në'ëdi' ben' mala.” Pues uzucazi yugulu di'idza' gan' rnën quia' lë'ë guichi la'iya.

³⁸ Na'ra unayaquë' rëbiyaquë' lëbë':

—Señor, decazi chopa macheta quiendo'.

Na' bequëbi Jesús unë':

—Conlë lëcazin hue'ennan.

Bë'lë Jesús Diuzi di'idza' ga laona Getsemaní

(Mt. 26.36-46; Mr. 14.32-42)

³⁹ Na'ra ca rue Jesús yugu rdze', uza'në' zionë' gan' zu ya'a lao Olivos. Lëscan' uza'rë yaca ben' quienë' ziolëyaquë' lëbë'. ⁴⁰ Bë' bdyinyaquë' gan', na'ra unë' rëbinë' leyaquë':

—Ulidzale Diuzi cuenda yezi'le fuerza ta bihue xan' taxi'ibi' le'e gan bihuele xquia ca tazëdi baza' gaca quiele.

⁴¹ Lëgan' na' bega'n yaca ben' quienë' udyialao Jesús ilë'ëti' ca tu ga rdyin yo cati reru'unron. Na' ure'në' uditzu žibinë' layu blidzë' Diuzi. ⁴² Na' unë' rëbinë' Diuzi:

—Xuza' Diuzi, inaba' laolo' ucuasa ucu'olo' nē'ēdi' ca tazēdi gula baza' gaca quia'. Nacan ca quie tu ta naca sla' ruen zi yo'oga'n. Pero zua' dispuesto gaca quia' cabē' re'enlo' luē', cala ca re'enda' nē'ēdi'. ⁴³ Biži na' bdyinte tu ángel za' guibá gan' zēnē', gualēnē' lēbē' bezi'nē' fuerza. ⁴⁴ Na' tanto bedzagalaonē' guquenē' bayēchi' gula, gucanē' nisa yesa blaton layu nacan ca ren quienē' tu rliđzē' Diuzi du guicho du la'adyi'nē'.

⁴⁵ Biži bē' beyudyi blidzē' Diuzi, na' bezulinē' zeyoguē' gan' nita' yaca ben' quienē', blē'ēnē' barasiyaquē', dan' banexaqueyaquē' tanto rdēbiyaquē' racayēchi'yaquē'. ⁴⁶ Lena' una Jesús rēbinē' leyaquē':

—¿Bixquien' rasizile? Ulechasa ulelidza Diuzi cuenda yezi'le fuerza ta bihue xan' taxi'ibi' le'e gan bihuele xquia ca tazēdi gula baza' gaca quiele.

Guxuyaquē' Jesús

(Mt. 26.47-56; Mr. 14.43-50; Jn. 18.2-11)

⁴⁷ Nerna Jesús ru'elēnē' yaca ben' quiē' di'idza' cati bdyin Judas gan' zēnē' dyialaotenē' lao yaca ben' ziolēnē' lēbē' tuže. Lēcana' ubiga'nē' gan' zē Jesús udaonē' situ xaganē'. Naca Judas tuže len ichiptu yaca ben' quie Jesús.

⁴⁸ Na'ra una Jesús rēbinē' lēbē':

—Judas, con tu situ baodaolo' xaga', ¿lena' babao' entregar nē'ēdi', bichi yugulu benē'?

⁴⁹ Na' biži cati blē'ē yaca ben' quie Jesús bi raca quienē', na'ra unayaquē' rēbiyaquē' lēbē':

—Señor, ¿re'enlo' cuiondo' macheta quiendo' tilalēndo' leyaquē'?

⁵⁰ Biži na' ulio tu ben' quie Jesús macheta quienē', udinē' ben' criado quie xan' pxuzi, uchugunē' naguē' yebē. ⁵¹ Pero na' una Jesús rēbinē' lēbē':

—Psan quieyaquē', cana'zi.

Ude na' bda' Jesús nē'ē naga ben' na', labeyacaten. ⁵² Na'ra una Jesús gudyinē' yaca xan' pxuzi, len yaca ben' napa dyin quie idao' rñabē'ra, len yaca los demás ben' rñabē', ben' ziorē guxu lēbē':

—¿Cala ben' uban raquele naca' dan' nu'ale macheta, nu'ale yaga za'le guxule nē'ēdi'? ⁵³ Cati uzulia' le'e lu'u idao' rñabē'ra yugu dza, nica beyazole guxule nē'ēdi'. Pero na'ra abdyin hora quiele cati huelēle nē'ēdi' ca ta rnan quiele le'e, ben' rda lao lato laochula.

Una Pedro binubē'nē' Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Na' bēxuyaquē' lēbē' uquiē'yaquē' lēbē' zan yu'u quie xan' pxuzi. Na' ziorē Pedro zitu'la zenaonē' leyaquē'. ⁵⁵ Cati bdyinyaquē' na', ulēchiyaquē' gui' lali'a gan' rbe'yaquē' neyēchayaquē' ru'a gui' ta yedze'eyaquē'. Na' ure'rē Pedro ladoyaquē'. ⁵⁶ Biži tu nigula, bi' naca criada, bē' blē'ēbi' Pedro re'nē' ru'a gui', na' bega'mbi' rna'bi' lao Pedro. Beyudyi una'bi' lēbē' dyē'ēdi, na' unēbi' rēbibi' lēbē':

—Lēzi ben' re' niga, naquē' ben' quie ben' na'.

⁵⁷ Na' una Pedro rēbinē' lēbi':

—Nigula, binubē'da' ben' nao' can'.

⁵⁸ Bē' guca itu chí', blē'ē ben' tula Pedro gan' re'nē'. Na' una ben' na' rēbinē' lēbē':

—Lēzi luē' nacarao' ben' quieyaquē'.

Pero na' una Pedro rēbinē' lēbē':

—Binaca' ben' quieyaquē'. Binubē'da' ben' na'.

⁵⁹ Biži bē' guca ca itu hora, na' unē itu ben' nita' na' rēbinē' Pedro:

—Tali naca ben' ni ben' quie ben' na', como dan' nacarë' ben' estado Galilea.

⁶⁰ Na'ra una Pedro rëbinë' ben' una cana':

—Binezda' quie ben' rnao', binubë'da' ben' na'.

Lëcana', caora nernë Pedro cana', na' uredyi biu. ⁶¹ Na' beyëcho Jesús una'në' lao Pedro. Caora na' beza'la'adyi' Pedro con ca una Jesús gudyinë' lëbë': "Bala tu binecuedyi biu, huanao' tzona lasa binubë'lo' në'ëdi'." ⁶² Na'ra ubiga' Pedro tzala'la zionë' ga uredyinë' zi'laza gula.

Ga ru'en di'idza' cabë' bëyaquë' ptituyaquë' Jesús

(Mt. 26.67-68; Mr. 14.65)

⁶³ Na' yaca ben' napa Jesús, ptituyaquë' lëbë', udyibiyaquë' lëbë' begorro.

⁶⁴ Lëscan' pquiyaquë' la'ari' laohuë', udyibiyaquë' laohuë', unayaquë' rëbiyaquë' lëbë':

—Unacara nu udyibi luë'.

⁶⁵ Lëscan' lega di'idza' zi' unëyaquë' gudyiyaquë' lëbë'.

Psedyinyaquë' Jesús lao na'a yaca ben' rnabë'

(Mt. 26.59-66; Mr. 14.55-64; Jn. 18.19-24)

⁶⁶ Bizi bë' uyani' dza tula, bedupa yaca ben' napa dyin, len yaca xan' pxuzi, len yaca ben' rusëdi ley quie Moisés, uquië'yaquë' Jesús ziolëyaquë' lëbë' gan' re' yaca ben' napa dyin. Na' unabayaquë' rëbiyaquë' lëbë':

⁶⁷ —Unacara nëto' ¿naco' ben' na Diuzi ise'elë'?

Na'ra bequëbi Jesús rëbinë' leyaquë':

—Chan' inia' le'e naca' ben' na Diuzi ise'elë', nica galele quia'. ⁶⁸ Lëzi chi inaba' le'e tu di'idza', nica yequëbile quia', nica usanle në'ëdi'. ⁶⁹ Pero baza' dza huatzeri'a në'ëdi', bichí yugulu benë', zaquë' yebë cuëta Diuzi, ben' dera yela' rnabë' quie.

⁷⁰ Bizi lao yuguluteyaquë' unayaquë' rëbiyaquë' lëbë':

—¿Naco' zi'i Diuzi?

Na' bequëbi Jesús rëbinë' leyaquë':

—Sí, naca' zi'i Diuzi con can' nale.

⁷¹ Na'ra unayaquë' rëbiyaquë' laguediyiaquë':

—¿Ca nura testigo re'ennan guida? Cuincaziro babero cabë' baona ben' niga.

23

Psedyinyaquë' Jesús lao Pilato

(Mt. 27.1-2, 11-14; Mr. 15.1-5; Jn. 18.28-38)

¹ Na'ra yugulu yaca ben' re' gan', uzuliyaquë' uquië'yaquë' Jesús tza-hua'ayaquë' lëbë' lao Pilato, ben' naca gobernador. ² Lëgan' na' udaoyaquë' lëbë' xquia, unayaquë' rëbiyaquë' Pilato:

—Ben' niga rudze'yelanë' yaca ben' yedyi quiendo' rëbinë' leyaquë' bireya'ala' quízero impuesto quie gobierno romano. Lëzi nanë' naquë' ben' use'ela' Diuzi, na' nanë' naquë' rey quiendo'.

³ Na'ra unabá Pilato Jesús rëbinë' lëbë':

—¿Tabala naco' rey quie ben' Israel?

Na' bequëbi Jesús rëbinë' Pilato:

—Naca' cabë' unao'.

⁴ Na'ra una Pilato rëbinë' yaca xan' pxuzi, len yaca los demás ben' nita' na':

—Gabi dula' de quie ben' niga.

⁵ Na' bizi leyaquë' unërayaquë' zidzo gula rëbiyaquë' Pilato:

—Con ga baodenë' rudze'yelanë' yaca benë'. Pues barudze'yelanë' yaca ben' quie yaca yedyi quie estado Judea len yaca ben' quie yaca yedyi quie estado Galilea. Na' babla'në' niga ta udze'yelanë' yaca ben' lao ciudad niga.

Psedyinyaquë' Jesús lao Herodes

⁶ Bë' be Pilato can' unayaquë' quie Jesús, na' unabanë' leyaquë' chi tali naca Jesús ben' quie estado Galilea. ⁷ Na' caora bequëbiyaquë' tali naquë' ben' quie estado Galilea, na' use'ela'në' Jesús lao Herodes, dan' naca Herodes gobernador quie estado Galilea, lëscan' dan' bazurë Herodes ciudad Jerusalén. ⁸ Bizi bë' blë'ë Herodes bdyin Jesús gan' zunë', lega redaohuenë' como dan' azio zë dza re'ennë' ilë'ënë' lëbë'. Babenë' can' na yaca benë' can' ruenë'. Lena' re'ennë' ilë'ënë' lëbë' chi bihuenë' tu milagro. ⁹ Na' uzulaonë' rnabanë' Jesús zë pregunta, pero bibequëbi Jesús quienë'. ¹⁰ Lëgan' na' bdyinrë yaca xan' pxuzi, len yaca ben' rusëdi ley quie Moisés, udaoyaquë' lëbë' xquia. Di'idza' zëra bëyaquë' condre Jesús. ¹¹ Bizi Herodes len yaca soldado quienë' uzulaoyaquë' rueyaquë' lëbë' bizinaquezi. Bgacoyaquë' lëbë' tu la'ari' tzaot ca quie la'ari' raco rey ta utituyaquë' lëbë'. Ude na' bese'ela'yaquë' lëbë' tatula lao Pilato. ¹² Du dza na'la, Herodes len Pilato, biyu'uyaquë' dya'a bigucayaquë' amigo, pero caora na' beyacayaquë' amigo.

Ga uchugubë'yaquë' gati Jesús

(Mt. 27.15-26; Mr. 15.6-15; Jn. 18.39-19.16)

¹³ Na' bë Pilato mandado bedupa yaca xan' pxuzi, len yaca ben' napa dyin, len yaca ben' lao yedyi. ¹⁴ Na'ra una Pilato rëbinë' leyaquë':

—Le'e badehua'ale ben' niga ni, nale rudze'yelanë' yaca benë', pero bapquëpa' lëbë' zaquë' lao le'e, na' le'e bablë'ële bibi dula' de quienë' con ca inale raole lëbë' xquia. ¹⁵ Lëscan' Herodes pquëpinë' lëbë' bibi falta de quienë' bese'ela'në' lëbë' niga. Bablë'ële bibi dula' de quienë' cuenda hua' mandado guti yaca soldado lëbë'. ¹⁶ Quie lena' hua' mandado qui yaca soldado lëbë' guidi, na'tera usana'në'. —Cana' una Pilato rëbinë' leyaquë'.

¹⁷ Na' bizi bë' ga'ala' lani, de yebio Pilato tu ben' naca preso lu'u dyiguiba con ca gue'en yaca benë'. Cana' naca costumbre quieyaquë' yebioyaquë' tu ben' naca preso dza lani pascua. Bizi Pilato gu'unnë' usannë' Jesús. ¹⁸ Pero yaca ben' nita' na' uzulaoyaquë' urediya'yaquë' unëyaquë' zidzo:

—¡Biusanlo' ben' na'! ¡Yebiolo' Barrabás!

¹⁹ Bizi ben' lao Barrabás yu'unë' lu'u dyiguiba, dan' udilalënë' yaca ben' rnabë' quie lao yedyi, lëzi bëtinë' benë'. ²⁰ Na' como gu'un Pilato usannë' Jesús, bë'lënë' yaca ben' nita' na' mazara di'idza'. ²¹ Pero urediya'yaquë' zidzo unayaquë':

—¡Uda'lo'në' lë'ë yaga cruzo! ¡Uda'lo'në' lë'ë yaga cruzo!

²² Na'ra tabeyuna lasa una Pilato rëbinë' leyaquë':

—¿Bizi tamala babënë'? Bibi dula' de quienë' cuenda hua' mandado guti yaca soldado lëbë'. Quie lena' hua' mandado qui yaca soldado lëbë' guidi, na'tera usana'në'.

²³ Pero na' unëra yaca benë' zidzora urediya'yaquë' rëbiyaquë' Pilato ta huenë' mandado uda'yaquë' Jesús lë'ë yaga cruzo. Tanto urediya' yaca ben' nita' na' len yaca xan' pxuzi, bëyaquë' gan gucan cabë' gu'unyaquë'.

²⁴ Cana' guca bë Pilato mandado cabë' unabayaquë' huenë'. ²⁵ Cana' guca ulio Pilato con ben' gu'unyaquë' yero lu'u dyiguiba, ben' guca dilalë ben' napa dyin, ben' bëti benë'. Cana' guca psedyin Pilato Jesús lao na'a yaca ben' hue bizinaquezi conlë lëbë'.

*Bda'yaquë' Jesús lë'ë yaga cruzo**(Mt. 27.32-44; Mr. 15.21-32; Jn. 19.17-27)*

²⁶ Caora bë' nequië'yaquë' Jesús ta uda'yaquë' lëbë' lë'ë yaga cruzo, na' bëxoyaquë' tu ben' lao Simón, ben' yedyi Cirene, ben' zeza' layela. Na' bëyaquë' mandado bi'anë' yaga cruzo zionë' nu'anë'n zioquë' zenaohuë' Jesús.

²⁷ Na' yaga ben' zë gula zioyaquë' zenaoyaquë' leyaquë'. Lëscan' zenao nigula zë zioyaquë' rbediya'yaquë' raqueyaquë' beyëchi', dan' rusacayaquë' Jesús bizinaquezi. ²⁸ Na' bizi Jesús beyëchi'në' unë' rëbinë' leyaquë':

—Le'e nigula ciudad Jerusalén, bicuedyile por në'ëdi'. Yela'cala cuedyile por le'e len zi'ile. ²⁹ Porque baza' dza gaca bayëchi' gula quiele. Na' tanto gaca bayëchi' quiele, bisule gusto chi zu zi'ile, bisule gusto chi nu'ale bdao', bisule gusto chi ruga'adyile xcuidi'. ³⁰ Lëdza na' tanto idzebile bi gaca quiele, hueguilole ga ucachi'laole ga naca lë'ë ya'a. ³¹ Nia' le'e chi ruelëyaquë' yaga ya'a bizinaquezi, ¿bizira huelëyaquë' yaga bidyi?

³² Lëzi nequië'rëyaquë' chopa yaca ben' bë tamala ta gutiyaquë' leyaquë' tzaže len Jesús. ³³ Na' cati bdyinyaquë' ga laona chita guicho ben' huati, lëgan' na' bda'yaquë' lëbë' lë'ë yaga cruzo. Lëzirë bda'rëyaquë' chopa yaca ben' bë tamala. Tunë' bda'yaquë' zaquë' yebë, na' itunë' bda'yaquë' zaquë' yega'.

³⁴ Cati baruda'yaquë' Jesús lë'ë yaga cruzo unë' rëbinë' Diuzi:

—Xuza' Diuzi, bezi'ze quieyaquë', dan' bineziyaquë' bi rueyaquë'.

Ude beyudyi na', bë yaca soldado tu sorteo entre leyaquë' ca nulayaquë' gaca quie zaba Jesús. ³⁵ Bizi yaca ben' nita' na', bega'nyaquë' rna'yaquë' lëbë'. Na' lente yaca ben' napa dyin rutituyaquë' lëbë' unayaquë' rëbiyaquë' laguediyaquë':

—Gucalënë' ben' tula, gacalëgaranë' cuinnë' chi tali naquë' ben' Cristo, ben' use'ela' Diuzi.

³⁶ Lëscan' ptiturë yaca soldado lëbë'. Bebiga'yaquë' gan' dë'ë, rzi'yaquë' vino naca sla' ruyo'oyaquë' lëbë'. ³⁷ Unayaquë' rëbiyaquë' lëbë':

—Chi tali naco' rey quie ben' Israel, pte psela cuinlo'.

³⁸ Lë'ë yaga cruzo zaquë' ga zu guichoguë', bda'yaquë' tu yaga ta'a dyian letra griego, len letra latín, len letra hebreo. Lë'ë yaga ta'a rnan cani: “Ben' ni naquë' rey quie yaca ben' Israel.”

³⁹ Bizi tu ben' bë tamala, ben' da'rë cuëta lë'ënë' lë'ë yaga cruzo, ptiturënë' Jesús rëbinë' lëbë':

—Chi tali naco' ben' Cristo, pte psela cuinlo' len nëto'.

⁴⁰ Pero ben' itu laguedyinë' udilanë' lëbë' unë' rëbinë' lëbë':

—¿Nica rdzebo' Diuzi hora cati gatio'? ⁴¹ Ca naca ra'o de dula' xquia quiero, na'a redzagalaoro barguizoro ca naca tamala bëro. Ta reya'ala'cazi gata' castigo quiero, pero ben' niga redzagalaonë', den' bibi tamala de bënë'.

⁴² Na'ra unë' gudyinë' Jesús:

—Jesús, cati bazulo' gan' inabë'lo', yeza'la'adyo' quia' në'ëdi'.

⁴³ Na' una Jesús rëbinë' lëbë':

—Tali rnia' luë', na'a dza bazulo' len në'ëdi' guibá gan' zu Diuzi.

*Ca guca guti Jesús**(Mt. 27.45-56; Mr. 15.33-41; Jn. 19.28-30)*

⁴⁴ Bizi cati baruen cadu gatzo dza, bechula lao duže ciudad na' hasta reda tzona quie sadze'. ⁴⁵ Bechula lao ubidza. Caora na' bre'eza la'ari' zë gatzo lao' idao' rna'bë'ra gucan chopa la'a. ⁴⁶ Na'ra urediya' Jesús unë' rëbinë' Diuzi:

—Xuza' Diuzi, ruca'na' bichi be quia' lao na'alo'.

Ude beyudyi unë' cana', gutinë'.

⁴⁷ Bizi ben' naca capitán quie yaca soldado romano, cati bablë'ënë' can' guca quie Jesús, bënë' Diuzi ben' ze unë':

—Tali ben' niga naquë' ben' huen, bibi tamala bënë'.

⁴⁸ Na' bizi yaca ben' bida blë'ë yaca can' guca quie Jesús, zeyoyaquë' zan yu'u rribiyaquë' ru'achu'uyaquë', dan' raqueyaquë' beyëchi' cabë' bëyaquë' quie Jesús. ⁴⁹ Pero yaca ben' unao Jesús, lenrë yaca nigula unao lëbë' desde dza uza'në' estado Galilea, bega'nyaquë' nita'yaquë' zitu'la rna'yaquë' can' guca quienë'.

Pcachi'yaquë' Jesús

(Mt. 27.57-61; Mr. 15.42-47; Jn. 19.38-42)

⁵⁰ Lëgan' na' uzurë tu ben' dya'a, ben' rue quie xti'idza' Diuzi laonë' José. Naquë' ben' yedyi lao Arimatea quie estado Judea. Napë' dyin, naquë' ben' rna'bë' quie yaca ben' Israel. ⁵¹ Lëben' lao José rbezë' dza guida ben' ise'ela' Diuzi ta inabë'në' lao yedyi layu. Bibënë' tuzi cabë' bë yaca los demás ben' naparë dyin. ⁵² Na'ra uyönë' yenabanë' lao Pilato chi bihue'në' lato ta yechisanë' cuerpo quie Jesús. ⁵³ Na' ude bechisanë' cuerpo quie Jesús lë'ë yaga cruzo, betubinë' lëbë' la'ari', bdze'në' lëbë' tu lu'u yero beló yo ta zapqui'inyaquë', nitu nunu nedze'yaquë' gan'. ⁵⁴ Lëdza na' nacan dza vierna cati rucuezayaquë' ta gaoyaquë' quie dza huezila'adyi'. Baodze' bagazi sulao dza huezila'adyi'.

⁵⁵ Na' yaca nigula unao Jesús desde dza uza'në' estado Galilea, uyoyaquë' yena'yaquë' gan' bdze'yaquë' cuerpo quienë'. ⁵⁶ Ude beyudyi na', beza'yaquë' zeyoyaquë' zan yu'u quieyaquë' bapcuezayaquë' aceite rla' zixi zeo len güento ta ilëpiyaquë' cuerpo quie Jesús. Ude beyudyi bëyaquë' can', bezila'adyi'yaquë' según ca rnan lë'ë guichi la'ia quie Diuzi.

24

Ga ru'en di'idza' cabë' guca cati beban Jesús

(Mt. 28.1-10; Mr. 16.1-8; Jn. 20.1-10)

¹ Na' bala baza' reni' dza domingo, zio yaca nigula gan' de yero beló yo gan' pcachi'yaquë' Jesús. Nu'ayaquë' aceite rla' zixi zeo ta pcuezayaquë'.

² Bizi bë' bdyinyaquë' gan', rna'yaquë' baneyalo ru'a yero beló yo. Bira da' yo laga' ru'a yero gan' bda'yaquë'n. ³ Na'ra uyu'uyaquë' yero beló yo rna'yaquë' bira de cuerpo quie Señor Jesús gan'. ⁴ Lega bega'nyaquë' bdzebiyaquë'. Bira biubinyaquë' bi hueyaquë'. Caora na' blë'ëyaquë' bazë chopa be'mbyu zaquë' laoyaquë' nacoyaquë' la'ari' bezëri di ta raca titi'. ⁵ Na' bizi bezëta' laoyaquë' layu, lega bdzebiyaquë'. Na' una yaca be'mbyu rëbiyaquë' leyaquë':

—¿Bixquien' rdale reguilole tu ben' naban gan' rucachi'yaquë' ben' huati?

⁶ Bira denë' niga. Babebannë' zunë' tatula. Uleza'la'adyi' can' unë' le'e cati nezulënë' le'e estado Galilea. ⁷ Lëdza na' unë' gudyinë' le'e decazide usedyin yaca benë' lëbë' lao na'a yaca ben' rna'bë', na' uda'yaquë' lëbë' lë'ë yaga cruzo, pero bë' gaca lao tzona dza, huebannë' tatula lëbë', ben' bichi yugulu benë'.

⁸ Lëcana' beza'la'adyi'yaquë' ca una Jesús gudyinë' leyaquë'. ⁹ Ude beyudyi na', beroyaquë' lu'u yero beló yo beza'yaquë' zioyaquë' udixogue'yaquë' lao chiptu yaca ben' quie Jesús, len yaca los demás ben' nao xneza Jesús can' guca quieyaquë'. ¹⁰ Na' lëyaca nigula, ben' uyo yetixogue' yaca ben' quie

Jesús, tuè' laohuè' María Magdalena, ituè' laohuè' Juana, ituè' laohuè' María, naquè' zna' Santiago. Lëscan' uyorè yaca nigula naca laguedyiaquè'. ¹¹ Na' biži yaca ben' quie Jesús guqueyaquè' calëla can' gudyi yaca nigula leyaquè'. Biguleyaquè' quieyaquè'.

¹² Den' uyocazi Pedro uyu'unè' be zionè' taria gan' de yero beló yo. Na' bē' una'nē' lu'u yero beló yo, blē'ēnē' la'ari' ta ptubiyaquè' cuerpo quie Jesús, bega'nnan re'nan cuinzin. Na'ra tu bebanzinè' can' blē'ēnē' beza'nē' zeyoguè' žan yu'u quienē'.

*Neza zio Emaús ptilalao Jesús chopa ben' unao lēbē'
(Mr. 16.12-13)*

¹³ Lēdza na'ateži, beza' chopa yaca ben' unao xneza Jesús ciudad Jerusalén, zeyoyaquè' yedyi quieyaquè' laona Emaús. Na' ciudad Jerusalén para yedyi quieyaquè' nacan tzona legua. ¹⁴ Zioyaquè' ru'eyaquè' di'idza' ca bē yaca ben' ciudad Jerusalén psacayaquè' Jesús. ¹⁵ Biži tu rza'yaquè' zioyaquè' ru'eyaquè' di'idza', cati ubiga' cuin Jesús cuēta leyaquè' baziolēnē' leyaquè' tzaže. ¹⁶ Pero ba'ala'cazi blē'ēyaquè' lēbē', bibezaqueyaquè' chi lēbē'. ¹⁷ Na'ra una Jesús rēbinē' leyaquè':

—¿Biži guca rnēle yu'ule neza? ¿Bixquien' raqueyēchi'le?

¹⁸ Na' tu ben' ziolē laguedyi laonē' Cleofas unēnē' rēbinē' Jesús:

—Banezi yugulu benē' can' guca ciudad Jerusalén nionasigazi. ¿Cala zurao' luē' ciudad Jerusalén, na' biunezo' bin' guca?

¹⁹ Na'ra unaba Jesús leyaquè':

—¿Cabiži guca gan'?

Na' unayaquè' rēbiyaquè' lēbē':

—Guca tu tamala gula quie tu ben' lao Jesús, ben' yedyi Nazaret. Guquè' ben' udixogue' xti'idza' Diuzi. Bēnē' yela' huaca, psēdinē' yaca benē' di'idza' dya'a. Yaxe Diuzi len yaca benē' can' bēnē'. ²⁰ Pero yaca xan' pxuzi, len yaca los demás ben' napa dyin quiero, psedyinyaquè' lēbē' lao na'a ben' bda' lēbē' lē'ē yaga cruzo bētiyaquè' lēbē'. ²¹ Pero nēto' guquendo' naquè' ben' use'ela' Diuzi ta ute uselanē' ra'o ben' Israel cuenda bira inabē' yaca ben' naca gobierno romano ra'o. Na' biži azio lao tzona dza bētiyaquè' lēbē'. ²² Pero na'a zila, bala yaca nigula nacalēndo' tuzi unaondo' lēbē', uyoyaquè' lu'u beló yo gan' pcachi'yaquè' lēbē'. Na' bega'nndo' rebanendo' ca gudyiyaquè' nēto' blē'ēyaquè' gan'. ²³ Bela'yaquè' udixogue'yaquè' nēto' bide cuerpo quienē' lu'u yero beló yo gan' pcachi'yaquè' lēbē'. Unayaquè' blē'ēyaquè' chopa ben' naca ángel, ben' una babeban Jesús zunē' tatula. ²⁴ Lēzirē ibala be'mbyu laguedyindo', ben' unao lēbē', uyoyaquè' uyu'uyaquè' lu'u yero beló yo, na' blē'ēyaquè' nacan tali can' una yaca nigula, pero na' biblē'ēyaquè' Jesús.

²⁵ Na'ra una Jesús rēbinē' leyaquè':

—Taze nerdzioguele tziōnē'ele cabē' na xti'idza' Diuzi. Lega ruen zēdi quiele galele yugulu cabē' una yaca ben' udixogue' xti'idza' Diuzi dza na'la. ²⁶ ¿Biži binezile rnan lē'ē guichi la'iya quie Diuzi yedzagalao ben' ise'ela' Diuzi gatinē', te na' yebannē' tatula hue Diuzi lēbē' ben' žera? —Cana' una Jesús rēbinē' leyaquè'.

²⁷ Na'ra uzulaonē' ruxi'idze'nē' leyaquè' ca na di'idza' la'iya quie Diuzi gan' rguixogue'n quie ben' ise'ela' Diuzi. Conlē di'idza' bzu Moisés lē'ē guichi uzulaonē' ruxi'idze'nē' leyaquè', bzalaorē' unarē' mazara hasta gan' bzu yaca profeta di'idza' lē'ē guichi.

²⁸ Bè' bdyinyaquè' yedyi gan' zioyaquè', labètenè' badyinzi ta sè'è tzu'unè' neza tatula. ²⁹ Pero leyaquè' bdyiabè'yaquè' quienè' ta yega'nnè' len leyaquè'. Lena' unayaquè' rèbiyaquè' lèbè':

—Bega'n'lè nètò' niga. Baza' rchula bahuen rtze'.

Na'ra bega'nnè' len leyaquè' gan'. ³⁰ Caora baore'lènè' leyaquè' lao mesa ta gaoyaquè' rtze', na' uzi'nè' tu yèta xtila unè' rèbinè' Diuzi diuxcalelo'. Beyudyi na', bzožoguè'n bè'nè'n leyaquè'. ³¹ Lècana' beyeni' laoyaquè' bezaqueyaquè' lèbè'. Na' bizi lèbè' tu beyulazinè', bira blè'èyaquè' lèbè'.

³² Na'ra unayaquè' bè'yaquè' di'idza' lao rupayaquè' unèyaquè':

—¿Cala tali na' bedaohue guicho laxta'oro caora za'lènè' ra'o tu neza ruxi'idze'nè' ra'o quie di'idza' tu lè'è guichi la'ia quie Diuzi?

³³ Na'ra labeyu'uteyaquè' neza tatula, zioyaquè' ciudad Jerusalén gan' yetilayaquè' nita' yaca chiptu ben' quie Jesús, len yaca los demás ben' unao lèbè'. ³⁴ Na' una yaca ben' bgu'udi' gan', rèbiyaquè' ben' zabdyin:

—Nacan tali babeban Señor quiero. Bablè'è Simón lèbè'.

³⁵ Na' unayaquè' rèbiyaquè' leyaquè' can' guca quieyaquè' tu neza bè'lèyaquè' Jesús di'idza', pero bibezaqueyaquè' chi lèbè' hasta bzožonè' yèta xtila bè'nè'n leyaquè'.

Pltilao Jesús yaca ben' quienè'

(Mt. 28.16-20; Mr. 16.14-18; Jn. 20.19-23)

³⁶ Bizi nenita'teyaquè' neru'eyaquè' di'idza' cati bdyin Jesús yèsazi bazènè' ladoyaquè' blidzanè' leyaquè'unè':

—Cue' chizi laxta'ole.

³⁷ Pero lega bdzebiyaquè' guqueyaquè' blè'èyaquè' ludza' ben' huati.

³⁸ Lena' una Jesús rèbinè' leyaquè':

—¿Bixquien' rdzebile? ¿Bixquien' raquele cala nè'èdi'? ³⁹ Ulena'cara na'a len ni'a, nè'èdi'cazi. Ney'a nè'èdi' naca' benè', binaca' ludza' ben' huati. Tu ludza' ben' huati binacan bè'èla', biyu'un chita can' rlè'èle naca'.

⁴⁰ Tu ru'elènè' leyaquè' di'idza', blu'enè' leyaquè' nè'è len ni'anè'. ⁴¹ Pero como dan' binegaleyauquè' chi lèbè', bega'nyaquè' rebaneyaquè' redao-hueyaquè', unè' rèbinè' leyaquè':

—¿Bide lè'èti' quiele gunle lè'èti' gaohua'?

⁴² Na'ra bè'yaquè' lèbè' tu naga bela banegüechi len tu yèta quie bezo yudzu bdyin'dao'. ⁴³ Na'ra uzi'nè'n udaonè'n zaquè'lao leyaquè'. ⁴⁴ Na' unè' rèbinè' leyaquè':

—Bagua quia' cabè' can' baonia' le'e gaca quia' dza na'la, dza cati nezulia' le'e. Agudya' le'e decazide uzun yugulu di'idza' can' rnan quia' nè'èdi' lè'è guichi bè Moisés, len guichi bè yaca profeta, len guichi Salmos.

⁴⁵ Na'ra pxi'idze'nè' leyaquè' can' na lè'è guichi la'ia quie Diuzi. ⁴⁶ Lena' unè' rèbinè' leyaquè':

—Canì rnèn lè'è guichi la'ia quie Diuzi. Rnan decazide gati ben' ise'ela' Diuzi lao yedyi layu. Te beyudyi na', yebannè' tatula gaca lao tzona dza. ⁴⁷ Lèscan' rnan lè'è guichi la'ia quie Diuzi ruen dyiabè' tzio yaca ben' quienè' tzetixogue'yaquè' yaca ben' nita' lao duze yedyi layu de que reya'ala' yetza'yaquè' pensari quieyaquè' inaoyaquè' nè'èdi' cuenda yezi'ze Diuzi dula' xquia quieyaquè'. Ciudad Jerusalén reya'ala' sulaoyaquè' quioxogue'yaquè', na'tera tzioyaquè' yedyi tula. ⁴⁸ Le'e nacale testigo quia' blè'èle baguca quia' can' rnan lè'è guichi la'ia quie Diuzi. ⁴⁹ Na' ise'ela' Bichi Be quie Diuzi ta tzu'unè' lu'u guicho laxta'ole can' una Xuza' huenè' quiele. Quie lena' cuezale niga ciudad Jerusalén hasta que chezi Bichi Be quie Diuzi

tzu'unë' lu'u guicho laxta'ole cuenda gata' yela' huaca quiele. —Cana' una Jesús gudyinë' leyaquë'.

Beyëpi Jesús zeyonë' guibá

(Mr. 16.19-20)

⁵⁰ Biži na' uquië' Jesús leyaquë' broyaquë' lao ciudad Jerusalén uza'yaquë' bdyinyaquë' yedyi Betania. Ude beyudyi na', uchisanë' në'ë bëla'ïyanë' leyaquë'. ⁵¹ Bë' beyudyi bëla'ïyanë' leyaquë', na' beyëpinë' ladza yeyonë' guibá. ⁵² Na' uyonla'adyi'yaquë' lëbë' gan'. Ude beyudyi na', beza'yaquë' zey-oyaquë' ciudad Jerusalén tatula. Na' lega redaohueyaquë', ⁵³ riocaziyaquë' yugu dza lu'u idao' r nabë'ra rulidzayaquë' rueyaquë' Diuzi ben' ze. Amén.

DI'IDZA' LA'TYA BZU SAN JUAN LÈ'È GUICHI

Ben' naca xti'idza' Diuzi guquë' be'mbyu

¹ Caora binecue' lao yedyi layu, bazucazi tu ben' naca xti'idza' Diuzi. Lëben' na' zulënë' Diuzi tuže, lëscan' naquë' Diuzi. ² Desde aodixu Diuzi yedyi layu, bazulanë' nacalënë' Diuzi tzaže. ³ Conlë lëbë' bë Diuzi yugulu ta de lao yedyi layu. Ni tu ta bë Diuzi bibënnë'n sin lëbë'. ⁴ Por lëbë' de yela' neban quiero. Naquë' ca quie tu gui' ta useni'n ulu'en xnezaro ga rdaro. ⁵ Lëgui' na' rseni'n quie yaca ben' rda lao lato lao chula. Nitu nitu nunu saque' usula len.

⁶ Uzu tu ben' lao Juan, ben' use'ela' Diuzi. ⁷ Bidë' udixogue'në' benë' unë' huida tu ben' naca ca quie gui' rseni'n ga naca chula. Lëcana' guca Juan testigo de que huida ben' naca ca quie gui' rseni'n ga naca chula. ⁸ Juan binaquë' ben' zaza', ben' naca ca gui' rseni'n ga naca chula. Nacazë' tu testigo ta use'ela' Diuzi ta quixogue'në' quie ben' zaza', ben' naca ca quie gui' rseni'n ga naca chula. ⁹ Na'ra babidacazi ben' naca ca quie gui' rseni'n ga naca chula, ben' ru'e di'idza' li, ben' ruzioñe'e yaca ben' nita' lao yedyi layu.

¹⁰ Bidanë' lao yedyi layu. Udixogue'në' benë' di'idza' la'tya quie Diuzi. Ba'ala'cazi conlë lëbë' bë Diuzi yugulu ta de lao yedyi layu, bibezaque yaca benë' chi lëbë'. ¹¹ Lëbë' uzunë' lao yedyi quienë', na' biži yaca ben' lao yedyi quienë', biuyezila'adyi'yaquë' lëbë'. ¹² Pero con bala ben' uyezila'adyi' lëbë', lëben' na' bë'në' derecho gacayaquë' ži'i Diuzi. ¹³ Pero netza' quie yaca ben' gaca ži'i Diuzi, porque cala mandado quie benë' gacajë' ži'i Diuzi, cala dan' golojë' nita'jë' lao yedyi layu gacajë' ži'i Diuzi, dechan' Diuzicazi bë cana' gacajë' ži'i Diuzi.

¹⁴ Ben' naca xti'idza' Diuzi guquë' tu be'mbyu. Uzunë' lado ra'o tu chi'. Blë'endo' yela' huaca quienë', blë'endo' tuzi lëbë' naquë' ži'i Diuzi, ben' nedyë'ë ra'o, ben' ru'e di'idza' li. ¹⁵ Unë Juan udixogue'në' quie ben' na' unë': —Quie ben' na' unia' caora nia' ben' zaza'ra zenao në'ëdi', nacarë' ben' že ca në'ëdi' como bazulanë' caora uzua' në'ëdi'. —Cana' una Juan.

¹⁶ Yela' ben' huen quienë' taže na' bënë' quiero bëla'iyane' ra'o yuguluro. ¹⁷ Lao na'a Moisés pca'n Diuzi ley quienë'. Pero lao na'a Cristo neziro nedyë'ë Diuzi ra'o, neziro ca naca tabala quie Diuzi. ¹⁸ Nitu nitu nunu nuebë' Diuzi. Tuzi ži'inë', ben' dugalo nacalë Diuzi tuže, lënë' ruzioñe'enë' ra'o ta huebë'ro Diuzi.

Užë Juan cule quie Jesucristo

(Mt. 3.11-12; Mr. 1.7-8; Lc. 3.15-17)

¹⁹ Yaca ben' Israel, yaca ben' nita' ciudad Jerusalén, use'ela'yaquë' yaca pxuzi len yaca ben' naca familia quie Leví ta yenabayaquë' Juan chi naquë' ben' Cristo.

²⁰ Biži dyë'ëdi unë':

—Cala në'ëdi' ben' Cristo.

²¹ Na'ra tatula unayaquë' rëbiyaquë' lëbë':

—¿Nuzi naco' luë' chi'? ¿Naco' ben' profeta, o chi naco' ben' lao Elías?

Na' biži una Juan rëbinë' leyaquë':

—Cala Elías në'ëdi'.

Pero tatula unayaquë' rëbiyaquë' Juan:

—¿Naco' ben' profeta, ben' zaza'ra?

Na'ra bequëbinë' unanë':

—Cala në'ëdi'.

²² Biži tatula rëbiyaquë' lëbë':

—¿Nuži naco' luë' chi'? Deyeyu'ando' tu di'idza' quio' ta inezi yaca ben' use'ela' nêto'. ¿Cabiži inao'? ¿Nuži naco' luë'?

²³ Na'ra una Juan rëbinë' leyaquë':

—Naca' tu ben' rnë zidzo lao lato ga bidyia yu'u. Nia' can' con ca baona profeta Isaías, ben' uzu dza na'te, nia': "Usalole tu neza li, dan' baza' xa'nro, ben' use'ela' Diuzi."

²⁴ Na' biži yaca ben' uyo yegue'lë Juan di'idza', nacayaquë' ben' use'ela' yaca ben' partido fariseo. ²⁵ Na'ra unayaquë' rëbiyaquë' lëbë':

—Chi binaco' ben' Cristo, ni Elías, ni ben' profeta, ¿na'a bixquien' ru'elo' lao yaca benë'?

²⁶ Na'ra una Juan rëbinë' leyaquë':

—Tali ru'a lao yaca benë' con nisa, pero entre ladole huida tu ben' binubë'le. ²⁷ Zaza'rë' zenaohuë' në'ëdi'. Tanto naquë' ben' zera ca në'ëdi', ni lë'ëti' bibi zaca' ni siquiera biyeyazoga' cuioga' guidi yu'u ni'anë'. —Cana' una Juan.

²⁸ Lëcana' uzacayaquë' lao lato laona Betábara, ga rega'nnan ga'ala' ga de yao Jordán, con gan' bë' Juan lao yaca benë'.

Jesucristo, ben' naca ca beco' zi'ila', bia naca gun quie Diuzi

²⁹ Biži beteyu blë'ë Juan baza' Jesús ga'ala'. Na' unë' rëbinë' yaca ben' nita' na':

—Ulena', lëben' ni naquë' ca beco' zi'ila', bia naca gun quie Diuzi. Lëlëbë' cubë' dula' xquia quie yaca benë' nita' lao yedyi layu. ³⁰ Quie ben' niga unia' caora nia': "Ben' zaza'ra zenao në'ëdi', nacaré' ben' ze ca në'ëdi', como dan' bazulanë' caora uzua' në'ëdi'." ³¹ Biži në'ëdi' biunezda' nu naquë', pero za' ru'a lao yaca ben' Israel con nisa tacuenda ineziyaquë' nu naquë'.

³² Lëzi unarë Juan:

—Blë'ëda' uyezi Bichi Be quie Diuzi, za'në' guibá ca uyezi biu, yasënë' ga zë Jesús. ³³ Biži në'ëdi' biunezda' nu naquë'. Pero ben' use'ela' në'ëdi' ta za' ru'a lao yaca benë' unë' rëbinë' në'ëdi': "Cati ilë'ëlo' Bichi Be quia' chezinë' tzasënë' ga zë tu be'mbyu, lëben' na' udze'në' Bichi Be quie Diuzi lu'u laxta'o yaca benë'." ³⁴ Blë'ëda' guca quie ben' ni con ca una Diuzi. Quie lena' naca' testigo lëlëbë' naquë' zi'i Diuzi.

Udilo Jesús yaca ben' inao lëbë'

³⁵ Biži beteyu tula, zë Juan len chopa yaca ben' nao lëbë'. ³⁶ Cati blë'ënë' ude Jesús gan' zënë' unë':

—Ulena', lëben' ni naquë' ca beco' zi'ila', bia naca gun quie Diuzi.

³⁷ Lao rupate yaca ben' zio nao Juan, beyaquë' ca una Juan. Na'ra zioyaquë' unaoyaquë' Jesús. ³⁸ Na'ra beyëcho Jesús una'në' xcu'udzunë' blë'ënë' zio yaca benë' zenao lëbë'. Na' unë' rëbinë' leyaquë':

—¿Cabiži rguilole?

Na'ra unëyaquë' rëbiyaquë' lëbë':

—Maestro, ¿gaži idyinfo'?

³⁹ Na'ra una Jesús:

—Uleda, hualë'ële gan' idyina'. Na'ra uži'yaquë' ziolëyaquë' lëbë' blë'ëyaquë' gan' bdyinnë'. Lëgan' na' bega'nlyaquë' lëbë' dan' uyë'ënë' dza, baruen cadu reda tapa quie zadze'.

⁴⁰ Biži lado chopa ben' be ca una Juan unaoyaquë' Jesús, zu tunë' laohuë' Andrés, bi' bichi Simón Pedro. ⁴¹ Cana' laoyote Andrés yedilonë' ga zu bichinë' Simón, na' gudyinë' lëñë':

—Abedilando' ben' use'ela' Diuzi, ben' naca Cristo.

⁴² Na'ra uquië' Andrés bi' bichinë' Simón gan' zë Jesús. Biži caora blë'ë Jesús Andrés len Simón, unë' rëbinë' Simón:

—Luë' Simón, ži'i Jonás, ixuba' laolo' Cefas, ta inaro: Pedro.

Ulio Jesús Felipe len Natanael, gucajë' ben' nao lëbë'

⁴³ Lëzirë beteyu tula, Jesús uži'në' zionë' Galilea. Lëgan' na' bedilanë' Felipe, na' gudyinë' lëbë':

—Unao në'ëdi' gaco' ben' quia' —unë' rëbinë' lëbë'.

⁴⁴ Na'ra ben' yedyi Betsaida naca Felipe. Lëlao yedyi na' zurë Andrés len Pedro. ⁴⁵ Biži Felipe bedilanë' Natanael në' rëbinë' lëbë':

—Bedilando' tu ben' rnën quie lë'ë guichi bë Moisés, len yaca guichi bë yaca ben' profeta. Lëben' na' laohuë' Jesús, ži'i José, ben' yedyi Nazaret.

⁴⁶ Na'ra una Natanael rëbinë' Felipe:

—¿Cabizi tu tahuen ero lao yedyi Nazaret?

Na'ra bequëbi Felipe:

—Uda, ilë'ëlo'.

⁴⁷ Caora blë'ë Jesús baza' Natanael, na'ra unë Jesús cani:

—Baza' tu ben' naca dugalo ben' Israel, ben' birzi' yë'.

⁴⁸ Biži Natanael unë' rëbinë' Jesús:

—¿Cómo nubë'lo' në'ëdi'?

Na'ra una Jesús rëbinë' lëbë':

—Bala blë'ëda' luë' ga re'lo' žan yaga higo tu binequixogue' Felipe luë'.

⁴⁹ Na'ra una Natanael rëbinë' Jesús:

—Maestro, luë' naco' ži'i Diuzi, ben' za' inabë' yaca ben' Israel.

⁵⁰ Biži una Jesús rëbinë' Natanael:

—¿Bagulelo' dan' nia' blë'ëda' luë' ga re'lo'?

⁵¹ Lëzi unarë Jesús rëbinë' leyaquë':

—Tali rnia' le'e, naca' bichi yugulu benë', na' hualë'ële tzalo guibá chezi yeyëpi yaca ángel idyinjë' gan zua' lao yedyi layu.

2

Yedyi Caná ga nebaba Galilea bëyaquë' huetzagana'

¹ Guca lao tzona dza, na' guca huetzagana' yedyi Caná quie estado Galilea. Biži yedyi na' zurë žna' Jesús, blë'ënë' caora na'. ² Biži gan' guca huetzagana', bërëjë' Jesús invitar len yaca ben' quienë'. ³ Biži na' guca bebidyi vino nisa bedzuli' ta ri'oyaquë'. Na'ra una žna' Jesús rëbinë' lëbë':

—Babebidyí vino, gabira yudzon.

⁴ Na'ra una Jesús rëbinë' žnë'ë:

—Žna'a, ¿bixquien' nao' në'ëdi' cana'? Binedyin hora ulu'ena' benë' yela' huaca quia'.

⁵ Na' biži unë' žnë'ë rëbinë' yaca ben' ru'e laze:

—Ulehue yugulu con ta ruebi' le'e mandado huele —në' rëbinë'yaquë'.

⁶ Biži gan' nita'yaquë' na', nita'rë xopa yeso' yela de yo. Ca biu' benëbi quie yaca ben' Israel, lëyeso' na' nacan ta yudzon nisa ta rguibiyaquë' cuinyaquë' lente ta de quieyaquë'. Lao tu huiona yudzon cadu gatzo gayuhua litro o cadu tzona galo chí litro nisa. ⁷ Na'ra una Jesús rëbinë' yaca ben' ru'e laze:

—Usedza'le yeso' na' nisa.

⁸ Caora bedza' lao xopa yeso', na' una Jesús rëbinë' yaca ben' ru'e laze:

—Ulecuion, ulehue' ben' naca xan' lani.

Biži laoda'teyaquë'n yehua'ayaquë'n bë'yaquë'n ben' xan' lani. ⁹ Biži ben' naca xan' lani, byubinë' nisa babeyacan vinola, pero binezinë' ga za'n. Tuzi yaca ben' ru'e laze baneziyaquë' ga za'n. Cana' guca guži ben' naca xan' lani bi' utzagana' ¹⁰ unë' rëbinë' bi':

—Yaca benë' rue nu lani ru'ecaziyaquë' tanëro vino naca dya'a. Caora ri'o yaca ben' rida lani ta zila, na' ru'eyaquë' vino sisa. Na' biži luë', pca'nlo' vino dya'a hasta na'tera baoliolo'n barequisio'n —në' rëbinë' bi'byu.

¹¹ Cana' naca milagro nëro bë Jesús yedyi Caná quie estado Galilea, ga uzulaonë' blu'enë' yela' huaca quienë'. Dan' bënë' cana', lëcana' gule yaca ben' zio nao lëbë'.

¹² Ude beyudyi na', uzë'ë ziolënë' žnë'ë, len bichinë', len yaca ben' quienë' yedyi lao Capernaum. Lëgan' na' bega'nyaquë' baba dza.

Blao Jesús yaca ben' yu'u huëti' lu'u idao' rnaë'ra

(Mt. 21.12-13; Mr. 11.15-18; Lc. 19.45-46)

¹³ Dan' bazu bago ga'ala' lani pascua ta reza'la'adyi'yaquë' ca guca bro xuzixta'oyaquë' nación Egipto, lëcana' uza' Jesús bdyinnë' ciudad Jerusalén.

¹⁴ Ca bdyinnë' lali'a quie idao' rnaë'ra ciudad Jerusalén, na' blë'ënë' nita' yaca ben' ruti' huaga, len ben' ruti' beco' ži'ila', len ben' ruti' biu. Lëscan' blë'ënë' yaca ben' rutza' dumi. ¹⁵ Biži cati blë'ë Jesús ca rue yaca ben' yu'u huëti' lali'a idao' rnaë'ra, na' uži'guë' tu guidi udinë' blaonë' yaca ben' yu'u ruti' lente huaga lente beco' ži'ila' quieyaquë'. Na' quie ben' retza' dumi, uru'unnë' mesa quieyaquë' layu, gusi dumi layu. ¹⁶ Na'ra gudyinë' yaca ben' ruti' biu rëbinë' leyaquë':

—¡Ulecuba yugulu ta de niga! ¡Bihuele yu'u quie ye'eya yu'u quie Xuza'!

¹⁷ Cana' beza'la'adyi' yaca ben' quië' can' rnën lë'ë guichi la'iya quie Diuzi cani: “Tanto rdëbida' quie yu'u quio', raqueda' bayëchi' ca tamala rue yaca benë' quien.”

¹⁸ Na'ra una yaca ben' Israel rëbiyaquë' Jesús:

—Blu'e nëto' tu seña ta inezindo' de yela' rnaë' quio' dan' blaolo' yaca ben' yu'u huëti' lali'a idao'.

¹⁹ Na'ra una Jesús rëbinë' leyaquë':

—Chi le'e udyiagui'le idao' rnaë'ra niga, në'ëdi' yechiza' tu tacubi gaca lao tzona dza.

²⁰ Biži una yaca ben' Israel rëbiyaquë' lëbë':

—Yaca ben' bë idao' rnaë'ra niga, bëyaquë'n lao chopa galo xopa iza, žna' como luë' nao' gaca lao tzona dza yechizalo' tu tacubi? —Cana' unayaquë' rëbiyaquë' Jesús.

²¹ Pero caora unë Jesús cana', cala quie idao' na' unënë', quie cuinzinë' unënë'. ²² Biži caora guti Jesús bebannë' tatula, caora na' lëlena' beza'la'adyi' yaca ben' unao lëbë' con ca unë'. Lëlena' guleyaquë' ca rnën lë'ë guichi la'iya quie Diuzi lente ca una Jesús gudyinë' leyaquë'.

Nezi Jesús bi pensari yu'u lu'u guicho laxta'o benë'

²³ Caora uzu Jesús ciudad Jerusalén, caora na' guca lani pascua. Lëcana' yaca ben' zë guleyaquë' quienë' dan' blë'ëyaquë' yela' huaca quienë'. ²⁴ Biži Jesús gucabë'në' biguleyaquë' dula'adyi'yaquë', dan' nezinë' bi pensari yu'u lu'u guicho laxta'o yaca benë'. ²⁵ Lëlena' birnaban nu yëbi Jesús bi pensari yu'u lu'u guicho laxta'o yaca benë'.

3

Nicodemo ru'elēnē' Jesús di'idza'

¹ Uzu tu ben' partido fariseo laonē' Nicodemo. Naquē' ben' rnabē' quie yaca ben' Israel. ² Biži Nicodemo uyonē' rdze' ga zu Jesús rēbinē' lēbē':

—Maestro, banezindo' luē' naco' ben' use'ela' Diuzi ta uzioñe'elo' nēto', dan' nitu nitu nunu nehue yela' huaca ca ruelo' luē' chi Diuzi bizulēnē' luē' tzaže.

³ Na'ra una Jesús rēbinē' lēbē':

—Tali ca rnīa' luē', chi nu ben' bigalo taorupe, bisaque' yedyinnē' guibá ga rnabē' Diuzi.

⁴ Biži Nicodemo unē' rēbinē' Jesús:

—¿Biži hue tu ben' gula galonē' taorupe? ¿Huazaque' yeyu'unē' lu'u lē'ē znē'ē ta galonē' taorupe?

⁵ Na'ra una Jesús rēbinē' lēbē':

—Chi nu ben' biralo conlē nisa, na'tera lēscan' conlē Bichi Be quie Diuzi, bisaque' yedyinnē' guibá ga rnabē' Diuzi. ⁶ Nu ben' rzu de zi'i be'mbyu, nacacazē' be'mbyu. Pero nu ben' rzu de Bichi Be quie Diuzi, nacacazē' ben' yu'u Bichi Be quie Diuzi lu'u laxta'ohue. ⁷ Biyebanelo' con can' rnīa' luē': “Rnaban galo benē' taorupe.” ⁸ Cabē' quie be, rdanan ni, rdanan na', rero xchi'nān, pero na' bineziro gala' za'n, gala' zion. Lēcana' nacarē quie yaca ben' ralo lao na'a Bichi Be quie Diuzi.

⁹ Na'ra na Nicodemo rēbinē' Jesús:

—¿Cabīži gaca ca unao'?

¹⁰ Biži Jesús nē' rēbinē' lēbē':

—Naco' tu maestro quie ben' Israel, ¿cómo binezo' con ca baonia' luē'?

¹¹ Tali ca rnīa' luē', ca ta nezindo' baonando' nacando' testigo ca ta blē'ēndo', pero na' le'e biralele cabē' baonando'. ¹² Chi binezile ca naca baonia' le'e bi raca lao yedyi layu, ¿cabīži huele para inezile ta inīa' le'e bi raca guibá?

¹³ Nitu nunu uyo guibá yedyin quixogue' benē' bi raca guibá. Tuza' nē'ēdi', bichi yugulu benē', idetixogue'na' benē' bi raca guibá. ¹⁴ Cabē' bē Moisés bēguē' tu bēla de bronce, bda'guē'ba' lē'ē yaga sibi, lēcana' gacarē quia' nē'ēdi', bichi yugulu benē', uda'rē benē' nē'ēdi' lē'ē yaga cruzo. ¹⁵ Cana' gaca quia' tacuenda gata' yela' neban tuzioli quie nu ben' gale quia'.

Ni nan ca nedyē'ē Diuzi ra'o

¹⁶ Biži tanto nedyē'ē Diuzi yaca benē' nita' lao yedyi layu, use'elē' tu litza' zi'inē' tacuenda nutezi ben' nao xnezē', bicuiaguī'yaquē', den' gata' yela' neban quiejē' tuzioli. ¹⁷ Cala use'ela' Diuzi zi'inē' lao yedyi layu ta huenē' castigo quie yaca benē', den' use'ela' Diuzi lēbē' ta ute uselanē' leyaquē' hue'nē' yela' neban quiejē' tuzioli.

¹⁸ Nu yaca ben' nao xneza zi'i Diuzi, bihue Diuzi castigo quieyaquē'. Pero nu yaca ben' binao xneza zi'inē', huata'cazi castigo quieyaquē', dan' biunaoyaquē' xneza ben' naca tu litza' zi'inē'. ¹⁹ Nu yaca ben' biunao xneza zi'inē', baochuguli Diuzi quieyaquē' huata' castigo quiejē', porque cati bdyin zi'inē' lao yedyi layu bzioñe'enē' quie Diuzi, caora na' yaxerayaquē' tayaquē' lao lato lao chula, biguleyaquē' quienē'. ²⁰ Yugulute yaca ben' rue tamedian rudieyaquē' ben' ruzioñe' quie Diuzi. Bire'enyaquē' naoyaquē' xnezē', porque dan' rdzebiyaquē' su be ca tamedian rueyaquē'. ²¹ Pero yaca ben' nao tali, raxeyaquē' naoyaquē' xneza ben' ruzioñe' quie Diuzi, porque dan' cana' su be de que rueyaquē' tadya'a cabē' re'en Diuzi hueyaquē'.

Barenē Juan quie Jesús tatula

²² Bē' beyudyi na', uza' Jesús ziolēnē' yaca ben' quienē' estado Judea. Lēgan' na' bega'nyaquē' tu chī' ga bē'yaquē' lao yaca benē'. ²³ Lēzirē zu Juan ru'enē' lao yaca benē' gan' lao Enón, gan' de nisa zila. Nacan ga'ala' para yedyi Salim. Lēgan' na' bedupa yaca benē', na' bē' Juan laoyaquē'. ²⁴ Cana' guca caora bindeze'yaquē' Juan lu'u dyiguiba.

²⁵ Biži bala yaca ben' quie Juan uyu'ulēyaquē' tu ben' Israel huenē' ru'eyaquē' di'idza' ca costumbre naoyaquē' quie idao' ta gacan yēri lao Diuzi.

²⁶ Na'ra uyoyaquē' rēbiyaquē' Juan:

—Maestro, ben' uzulē luē' itzala' yao Jordán, lēben' unao' nēto' dza na', ben' zē baru'enē' laohue, bazioyaquē' lēnē'.

²⁷ Biži una Juan rēbinē' leyaquē':

—Ni tu nunu de yela' rnabē' quie, chi cala Diuzi bē'nē'n lao nē'ē. ²⁸ Le'e banezile dyē'ēdi ca unia'. Binaca' ben' Cristo. Naca' ben' rguixogue' benē' de que huida ben' Cristo. ²⁹ Cristo naquē' ca quie ben' utzagana'. Lēzirē yaca ben' nao xnezē', naca quieyaquē' ca quie nigula utzagana'. Nē'ēdi' naca' ca quie amigo quie ben' utzagana'. Biži ben' naca amigo quie ben' utzagana', redaohuenē' uzēnaguē' yenē' bi na ben' utzagana'. Quie lena' redaohueda' rzēnaga' yeda' bi na ben' Cristo. ³⁰ Lēbē' ziorē' raquē' ben' zera ca nē'ēdi', reya'ala' ta' puro žanle.

Ni rnēn quie ben' za' guibá

³¹ Ben' za' guibá, rnabē'nē' lao yugulute benē'. Ben' ralo lao yedyi layu, nacacazē' ben' dugalo de lao yedyi layu. Raquē' pensari quie ta raca lao yedyi layu. ³² Pero ben' za' guibá, ru'enē' di'idza' ca ta blē'ēnē' len ca ta benē'. Biži na' yaca benē' biraleyaquē' quienē' cabē' nanē' na'. ³³ Chi nu ben' ralenē' ca di'idza' na ben' za' guibá, lena' ulu'en ralenē' bi na Diuzi. ³⁴ Ben' use'ela' Diuzi, rnēguē' di'idza' quie Diuzi. Dula'adyi'cazi yu'unē' Bichi Be quie Diuzi lu'u guicho laxta'onē'. ³⁵ Xuziro Diuzi nedyē'ēcazinē' ži'inē'. Nu'eguē' yugulute ta de lao na'a ži'inē'. ³⁶ Nu yaca ben' nao xneza ben' Cristo ži'i Diuzi, baguta' yela' neban quieyaquē' tuzioli. Pero quie nu yaca benē' binao xneza ži'i Diuzi, bibi yela' neban tuzioli gata' quieyaquē', yela'cala hue Diuzi lēyaquē' tu castigo huala gula.

4

Jesús ru'elēnē' tu nigula ben' Samaria di'idza'

¹ Biži bdyin dza blē'ē yaca ben' fariseo de que unao ben' zēra Jesús ca ben' unao Juan. Lēzi bē' Jesús lao ben' zēra ca Juan. ² Pero cala Jesús bē'nē' lao benē', dechan' yaca ben' quienē', lēlēyaquē' bē'yaquē' lao yaca benē'. ³ Caora gucabē' Jesús ca rna yaca ben' fariseo, na' uzē'ē estado Judea žiogué' bdyinnē' estado Galilea.

⁴ Con gan' zionē' re'ennan tenē' estado Samaria. ⁵ Cana' bdyinnē' yedyi Sicar quie estado Samaria. Nacan ga'ala' gan' de layu bē' Jacob ži'inē' José cana'te gula. ⁶ Biži bdyinnē' gan' re' pozo nisa ta ulēchi xuzixta'onē' Jacob. Na' como dan' banexaquenē' yu'unē' neza, caora na' ure'nē' ru'a pozo aruen cadu gatzo dza. ⁷⁻⁸ Biži yaca ben' quienē' zioyaquē' la'o yedyi ta ga'oyaquē' ta gaoyaquē'. Cana' guca bdyin tu nigula ben' Samaria ta cuioquē' nisa gan' re' pozo. Na'ra una Jesús rēbinē' nigula:

—Ben nisa yo'oga'.

⁹ Na'ra una nigula na' rēbinē' Jesús:

—¿Cómo luē', ben' Israel, rnabo' nē'ēdi', ben' Samaritana, nisa yo'olo'?

(Cana' una nigula gudyinē' Jesús dan' biyu'ulē ben' Samaria tuzi len ben' Israel.) ¹⁰ Biži una Jesús rēbinē' nigula:

—Chan' inezilo' ca rue run Diuzi, lēzi chan' nubē'rao' nu ben' rnaba luē' nisa ta yo'oguē', na' huanabacazo' nē'ēdi' nisa yo'olo', guncaza' nisa neban.

¹¹ Na'ra una nigula rēbinē' Jesús:

—Señor, bibi nu'acazo' ta cuiolo' nisa. Lēzi dan' re'n zitu', tana' lena' rnia' luē' ¿gaži tzexiu' nisa nao' nisa neban na'? ¹² Ulēchi xuzixta'oro Jacob pozo niga ga hue'enē' cuinnē' len zi'inē' len yaca bia guixi' adapē'. Nia' luē', ¿biži rnabē'ro' luē' ca lēbē'?

¹³ Na' biži Jesús nē' rēbinē' nigula:

—Lao yugulute yaca ben' yo'o nisa niga, bicuezan ta rbiliyaquē'n, hui'oyaquē'n tatula. ¹⁴ Pero nu yaca ben' yo'o nisa hua' nē'ēdi', bira ibiliyaquē'. Huaca quieyaquē' ca quie tu ga ralo nisa lu'u laxta'oyaquē' tacuenda gata' yela' neban quiejē' tuzioli.

¹⁵ Na'ra una nigula rēbinē' Jesús:

—Señor, ben nisa nao' guno' yo'oga', yela' na' bira guida' ru'a pozo ni idelioga' nisa.

¹⁶ Biži unē' Jesús rēbinē' nigula:

—Beyo yexi' xquiulo' guidalao'nē' gan' niga.

¹⁷ Na'ra una nigula rēbinē' lēbē':

—Nunu xquiuhua' zu.

Na' biži una Jesús rēbinē' lēbē':

—Tali ca unao' nao' ganu xquiulo' zu. ¹⁸ Na' biži nē' nia', baozulao' lao ga'yo' be'mbyu. Na' ben' zulao' na'a, cala xquiulo'. Lēlēna' nacacazin tali ca unao'.

¹⁹ Bē' be nigula ca una Jesús, unē' rēbinē' lēbē':

—Señor, rlē'ēda' luē' naco' tu ben' quie Diuzi. ²⁰ Nē'ēdi' nia' de que uyonla'adyi' yaca ben' xuzixta'ondo' Diuzi gan' zu ya'a niga. Na' biži lē'e, ben' Israel, nale ciudad Jerusalén, lēgana' reya'ala' tzionla'adyi' yaca benē' Diuzi.

²¹ Biži una Jesús rēbinē' nigula:

—Nigula, gule can' nia' na', huadyin dza tzionla'adyi'le Diuzi, pero cala niga gan' zu ya'a guidale, lēscan' cala ciudad Jerusalén tzirole. ²² Le'e ben' Samaritano, binezile nu tzionla'adyi'le, pero nēto' banezcazindo' nu tzionla'adyi'ndo'. Conlē yaca ben' Israel pca'n Diuzi di'idza' quienē' tacuenda inezi yaca benē' bi re'en Diuzi huejē' ta yeyēri laxta'ojē' laohuē'. ²³ Baruen bago idyin hora cati yaca ben' rionla'adyi' Diuzi tzionla'adyi'yaquē' lēbē' conlē Bichi Be quienē', lēscan' conlē di'idza' li cabē' re'en Diuzi. Lēyaca ben' rue cana', raxe Diuzi tzionla'adyi'yaquē' lēbē'.

²⁴ Naca Diuzi ben' bichi be. Lēlēna' yaca ben' rionla'adyi' lēbē', reya'ala' tzionla'adyi'yaquē' lēbē' conlē bichi be quieyaquē', lēscan' conlē di'idza' li cabē' re'en Diuzi.

²⁵ Na'ra una nigula rēbinē' lēbē':

—Pues nē'ēdi' banezda' de que huida ben' naca Cristo. Lēscan' cati guidē', uzioñe'enē' ra'o lao yugulute.

²⁶ Na'ra una Jesús rēbinē' lēbē':

—Nē'ēdi' naca' ben' Cristo, ben' ru'elē luē' di'idza'.

²⁷ Na'ra cati bedyin yaca ben' quienē' gan' zēnē', tu bebanziyaquē' ru'elē Jesús di'idza' nigula Samaritana. Pero bibeyažocaziyaquē' bi yēbiyaquē' lēbē' bi di'idza' ru'elēnē' nigula. ²⁸ Cana' guca pca'n nigula re'e quienē', bezē'ē zioquē' la'o yedyi quienē' yetixogue'nē' yaca ben' yedyi na' unē' rēbinē' leyaquē':

29 —Ya' tziro ilè'ëro tu be'mbyu laga unè' nē'ēdi' ca naca ta babia'. ¿Cala lēbē' naquē' ben' Cristo?

30 Na'ra uza' yaca ben' lao yedyi yená'yaquē' gan' zē Jesús. 31 Tu zadyinra ben' lao yedyi, caora na' una yaca ben' quie Jesús rēbiyaquē' lēbē':

—Maestro, ¿biraolo' lē'ēti'?

32 Na'ra unè' rēbinē' leyaquē':

—Le'e binezile decazi ta gaohua'.

33 Na'ra uzulao yaca ben' quienē' rēbiyaquē' laguedyiaquē':

—¿Cala biblè'ëro babida yaca ben' bedehua'a ta udaohuē'?

34 Bizi una Jesús rēbinē' yaca ben' quiē':

—Ruzua' di'idza' quie ben' use'ela' nē'ēdi'. Lēlena' gaca quia' ca quie ben' baodao.

35 Na' le'e nale: “Neru'en lato itapa biu' ta yezi'ro usecho.” Na' bizi nē'ēdi' nia': “Ulena'cara ca naca quie layela como dan' bade yeza bidyi baguca yezi'ron.” 36 Ca naca quie ben' bezi' usecho, cana' huazi'guē' xlažoguē'. Huazulēcazinē' Diuzi tuzioli. Tana' lena' redaohue lao rupateyaquē', ca ben' raza, ca ben' yezi' usecho. 37 Nacan tali ca na benē': “Tuē' raza, na' ituē' yezi'nē' usecho.” 38 Bizi nē'ēdi' ise'ela' le'e ta yezi'le usecho quie Diuzi ga biguzale. Nacan ta guza ben' tula, ben' ruerē dyin quie Diuzi. Na' bizi le'e redaohuele yezi'le usecho quie Diuzi. Re'en Diuzi inao yaca benē' xnezē'. —Cana' una Jesús rēbinē' leyaquē'.

39 Na' bizi yaca ben' zē, ben' Samaria, ben' nita' yedyi Sicar, guleyaquē' quie Jesús dan' una nigula: “Unanē' nē'ēdi' yugulu ca ta babia'.” 40 Bizi cati bdyin yaca ben' Samaria gan' zē Jesús, caora na' unēyēchi'yaquē' para yega'nlē Jesús leyaquē'. Na'ra bega'n Jesús uzulēnē' leyaquē' lao chopa dza. 41 Lēcana' guca gulera yaca ben' zē quie Jesús beyaquē' ca unanē'. 42 Na'ra unayaquē' rēbiyaquē' nigula:

—Na'ra bagulendo' quienē'. Cala rquincara luē' inao' nēto' bidē'. Banezindo' ca naca di'idza' ru'enē'. Banezindo' talicazi lēbē' naquē' ben' Cristo, ben' ute usela yaca ben' nita' lao yedyi layu. —Cana' nayaquē' rēbiyaquē' nigula.

Jesús beyuenē' zi'i ben' naca empleado quie gobierno

43 Ude lao chopa dza uzulēnē' leyaquē' estado Samaria, na' uzē'ë zionē' estado Galilea. 44 Cana' guca uza'nē' bdyinnē' estado Galilea. Na'ra cuinnē' unē' cabē' raza quie yaca ben' rguixogue' di'idza' la'iya quie Diuzi. Bira-pala'n ben' lao yedyi quienē' lēbē'. 45 Pues cati bdyinnē' estado Galilea, na' yaca ben' nita' gan' bdyinnē', bezi'yaquē' lēbē' dyē'ēdi como dan' baoyoy-aquē' ciudad Jerusalén dza na' cati raza laní quie pascua, blē'ēyaquē' cabē' bēnē' cati uyoguē' ciudad Jerusalén.

46 Bizi na' bdyinnē' ciudad Caná quie estado Galilea. Lēgana' bexinoguē' nisa beyuenē'n vino. Na'ra ciudad Capernaum zu tu ben' r nabē' naquē' empleado quie gobierno rey. Na' zu tu zi'inē' raza žhue'bi'. 47 Caora unezi ben' empleado uza' Jesús estado Judea bdyinnē' estado Galilea, na' uzē'ë zioquē' tzeguedyiné' Jesús ta tziōnē' žan yu'u quienē' ta yeyuenē' zi'i ben' na', porque debi' raza žhue'bi' bagatibi'.

48 Na'ra una Jesús rēbinē' ben' na':

—Le'e bigalele chi biillē'ële tu seña quie yela' huaca hua'.

49 Bizi una ben' naca empleado:

—Señor, chi huu' cule, latziotero antes na'a binegati zi'ina'.

50 Bizi Jesús unē' rēbinē' lēbē':

—Beyo žan yu'u quio'. Bigati ži'ilo'.

Bizi ben' empleado gulenë' ca gudyi Jesús lëbë'. Na' bezë'ë zeyoguë' žan yu'u quië'. ⁵¹ Cati zeyoguë' gatzo neza, binedyinnë' žan yu'u quienë', caora na' bedzaganë' yaca ben' zulaohuë'. Na' bizi unayaquë' rëbiyaquë' ben' xa'nyaquë'.

—Hueyaca ži'ilo', bigatibi'.

⁵² Bizi ben' empleado unabë' yaca ben' zulaohuë' unë':

—¿Ca bizi hora berobi' tala?

Na'ra una yaca ben' zulaonë' rëbiyaquë' lëbë':

—Niogue ca reda tu quie zadzë', cana' bezubi' dya'a berobi' tala.

⁵³ Bizi ben' empleado xuzi xcuidi' raca žhue', bezaquenë' caora gudyi Jesús lëbë': "Hueyaca ži'ilo' bigatibi'", lëhora na' labeyacatebi'. Cana' guca gulenë' quie Jesús. Lëscan' gule yugulute yaca ben' nita' žan yu'u quienë'.

⁵⁴ Lëcana' guca laorupe lasa blu'eguë' seña quie yela' huaca quienë' caora cati uzë'ë estado Judea bdyinnë' estado Galilea.

5

Beyue Jesús tu ben' ži, ben' ciudad Betesda

¹ Ude beyudyi beyue Jesús yaca ben' raca žhue', na'tera guca dza raca lani quie ben' Israel. Tana' uza' Jesús zionë' ciudad Jerusalén. ² Ga bdyinnë' ciudad Jerusalén, na' re' na' tu pozo nisa. Na' di'idza' hebreo lao pozo nisa na' pozo nisa Betesda. Nu'an ga'yo' ru'a yu'u ga ru'u benë'. Rega'nnan ga'ala' ga zu tu ru'a yu'u belao. Lëru'a yu'u na' nezi'laona ru'a yu'u quie beco' ži'ila'.

³ Lëlugar na' nita' yaca ben' zë, ben' raca žhue', len ben' laochula, len ben' ži, len ben' neseco biraca sa'. Rbezayaquë' bë' chechu ta nisa. ⁴ Rbezayaquë' gan' dan' bayu'u rdyin ángel ga re' pozo nisa ta utanë'n. Bizi ben' yubi tzu'u tanëro lu'u nisa caora sulao chechu tanan, lëben' na' laiyacate con biti'tezi yela' hue' racanë'. ⁵ Lëgan' na' de tu ben' raca žhue' azio lao galobechi xuna iza raca žhue'në'. ⁶ Bizi Jesús bdyinnë' blë'ënë' de ben' na' raca žhue'në', gucabë'në' azio zë iza raca žhue'në'. Na'ra una Jesús rëbinë' ben' raca žhue':

—¿Re'enlo' yero yela' hue' yu'ulo' ta yeyaco'?

⁷ Na'ra una ben' raca žhue' rëbinë' Jesús:

—Señor, nunu dyila' udze' në'ëdi' lu'u pozo nisa cati sulao tanan. Bizi në'ëdi', cati re'enda' tzu'a tanëro, laru'ute ben' tula. —në' rëbinë' Jesús.

⁸ Bizi una Jesús rëbinë' lëbë':

—Uyasa, uži' da'a quio', beda.

⁹ Bizi ca una Jesús cana', labeyasate ben' raca žhue', bezi'guë' da'a quië' nu'anë'n rdalënë'n. Pero dza rezila'adyi' bë Jesús cana'. ¹⁰ Lena' una yaca ben' Israel rëbiyaquë' ben' beyaca:

—Na'adza nacan dza huezila'adyi'. Biru'en lato talo' hua'alo' da'a quio'.

¹¹ Na'ra bequëbi ben' beyaca unë' rëbinë' leyaquë':

—Ben' beyue në'ëdi' unë': "Uyasa, uži' da'a quio' beda."

¹² Na'ra unayaquë' rëbiyaquë' lëbë':

—¿Nuži ben' una luë' cana'?

¹³ Bizi ben' beyaca biunezinë' bi lao ben' beyue lëbë', dan' labeza'te Jesús udenë' zionë' lado ben' zë. ¹⁴ Bizi zio Jesús lu'u idao' rnabë'ra. Lëgana' bedilänë' ben' beyuenë', na' unë' rëbinë' lëbë':

—Canaca na'a babeyaco', bira huelo' bizinaquezi ta bira gaca quio' ta hualara can' baguca quio'.

¹⁵ Cana' guca uyo ben' beyaca yeguëdyinè' yaca ben' Israel, unè' rëbinè' leyaquë':

—Jesús na', lëbë' beyuenè' nê'ëdi'.

¹⁶ Bë' unezi yaca ben' Israel cabè' una ben' beyaca, caora na' rnaojë' Jesús re' enyaquë' gutijë' lëbë', dan' beyuenè' ben' zi dza huezila'adyi'. ¹⁷ Na' biži Jesús unè' rëbinè' leyaquë':

—Dan' rue Xuza' Diuzi dyin yugu dza, lëlena' hueria' dyin yugu dza.

¹⁸ Ca be yaca ben' Israel ca una Jesús can', mazara bdza'yaquë' gu'unyaquë' gutiyaquë' lëbë', dan' bibënè' casa quie ley quie dza huezila'adyi'. Lëscan' bënë' cuinnè' ca Diuzi caora unè' quie Diuzi naca Diuzi Xuzinè'.

Udixogüe' Jesús quie yela' rnabë' quienè', unè' naquë' zi'i Diuzi

¹⁹ Na'ra una Jesús rëbinè' leyaquë':

—Tali ca rnia' le'e, nê'ëdi' zi'i Diuzi, bibi de hua' chan' bizu Diuzi conlë nê'ëdi'. Ca ta blë'ëda' rue Xuza', lëlena' rueria' nê'ëdi'. Can' rue Xuza', cana' rueria' nê'ëdi' zi'inè'. ²⁰ Pues Diuzi nedyë'ënè' nê'ëdi' zi'inè', rlu'enè' nê'ëdi' rua' yugulu ta ruenè'. Zaza'ra ulu'enè' nê'ëdi' zi'inè' tu ta nacara ze, tu ta binelë'ële huebanle cati ilë'ëlen. ²¹ Cabè' rue Xuza', resebannè' ben' baguti, lëscana' nê'ëdi' zi'inè', hua'a benè' yela' neban tuzioli, ben' re'enda' gata' yela' neban quie. ²² Cala Xuza' ichugobè'nè' quie yaca benè'. Lao na'a nê'ëdi' zi'inè' napca'nnè' yela' rnabë' quienè' ta ichugobi'a quie yaca benè'. ²³ Bë Xuza' cana' tacuenda lao yugulute yaca benè' gapala'nyaquë' nê'ëdi' zi'i Diuzi cabè' rapala'nyaquë' Xuza'. Chi nu yaca benè' birapala'nyaquë' nê'ëdi' zi'i Diuzi, lëlena' rulu'en birapala'nyaquë' Xuza', ben' use'ela' nê'ëdi'.

²⁴ 'Tali ca rnia', con nu ben' rzënaga can' baonia', lena' rulu'en raleyaquë' quie ben' use'ela' nê'ëdi', na' de yela' neban quië' tuzioli, bigata' castigo quienè'. Naca quienè' ca quie ben' baguti beban tatula, bira gatinè'. ²⁵ Tali ca rnia', abdyin dza uzënaga yaca ben' birale quia' cabè' di'idza' rnia' nê'ëdi' zi'i Diuzi. Naca quieyaquë' ca quie ben' nati, dan' biraleyaquë' quia' cabè' di'idza' rnia'. Nu yaca ben' uzënaga di'idza' gale quia' cabè' rnia', hue' Diuzi leyaquë' yela' neban tuzioli. ²⁶ Napa Xuza' yela' rnabë' ta hue'nè' lëjë' yela' neban tuzioli. Lëzi baben Xuza' Diuzi nê'ëdi' zi'inè' yela' rnabë' ta hua'a yaca benè' yela' neban tuzioli. ²⁷ Lëzi benrë Xuza' Diuzi nê'ëdi' yela' rnabë' ta ichugobi'a quie yaca benè' dan' naca' bichi yugulu benè'. ²⁸ Biyeabanle can' baonia', huadyin dza ye yugulute yaca ben' huati rchi'a cati inia'. ²⁹ Lëhora na' yero yaca ben' huati lu'u yëroba. Na' biži yaca ben' bë dya'a hueyata' yela' neban quieyaquë' para tuzioli. Pero na' biži yaca ben' bë dula' xquia, useban Diuzi leyaquë' ta huenè' leyaquë' castigo.

Ni rnan ga za' yela' rnabë' quie Jesús

³⁰ 'Bibi de hua' cuinza'. Rchugobi'a quie yaca benè' ca ta una Diuzi nê'ëdi' hua'. Tana' rchugobi'a hua' tu ta yu'u ni'a xnezi. Cala ta racazi la'adya' hua' den' hua' ca re'en Xuza', ben' use'ela' nê'ëdi'. ³¹ Chi rnia' cule quia' cuinza', lena' bibi sirve ta ulu'en nu naca'. ³² Pero zu itu ben' rnë cule nê'ëdi' naquë' testigo quia'. Na' ca ta rnënè' cule quia' nê'ëdi', lena' ulu'en nu naca'. ³³ Biži le'e use'ela'le yaca ben' uyo yenaba Juan. Na' ca ta bequëbi Juan nacan tali. ³⁴ Biruguinte inè tu benè' cule nê'ëdi'. Ca di'idza' rnia' le'e, nacan ta galele quia' gata' yela' neban quiele tuzioli. ³⁵ Ca di'idza' una Juan nacan ca quie yëri ra'alara' rseni'n. Biži le'e, yedaohuele bzënegale ca di'idza' unè' tu chi'zi. ³⁶ Decazira cule quia' nê'ëdi' ta nacaràn belao ca di'idza' una Juan ta ulu'en nu naca'. Bia' yela' huaca quia' tuz ca una Xuza' nê'ëdi' hua'. Lëlena' ulu'en le'e tali use'ela' Xuza' nê'ëdi'. ³⁷ Lëzi Xuza', ben' use'ela' nê'ëdi', zënë'

cule conlë nê'ëdi' ta ulu'en le'e nu naca' la'acazi nitu lasa bibe le xchi'nê', biblê'ë lao cuinle lënê'. ³⁸ Cabê' le'e binetzu'u di'idza' quie Diuzi lu'u guicho laxta'ole. Biralele quia' nê'ëdi' naca' ben' use'ela' Diuzi. ³⁹ Le'e rusêdile dyê'ëdi' ca rna lê'ë guichi la'iya quie Diuzi como dan' raquele chi rusêdilen dyê'ëdi, cana' gata' yela' neban quiele tuzioli. Na' bizi lê'ë guichi na' rnêcazin quia' nê'ëdi'. ⁴⁰ Pero le'e, bire'enle guidale naole nê'ëdi' ta gata' yela' neban quiele tuzioli.

⁴¹ 'Tuzi nacalia' Diuzi la'acazi gapale nê'ëdi' bala'ana, la'acazi bigapale nê'ëdi' bala'ana. ⁴² Lëscan'ra nubê'da' le'e. Nezda' binedyê'ële Diuzi. ⁴³ Tanun quie Xuza' bida' lao yedyi layu, pero na' le'e biuyezila'adyi'le nê'ëdi'. Bizi chan' za' ben' tula ta racazi la'adyi'nê' ben' na'la gue'enle. ⁴⁴ Cabizi huele inaole xneza Diuzi, chi lao laza huele ta gue'en tuzi Diuzi le'e, na' ruele ta gue'en yaca benê' le'e. ⁴⁵ Biinale chi nê'ëdi' huaohua' le'e xquia lao Diuzi. Cuin Moisés, ben' nale sulêle dya'a lao Diuzi, lëbê' gaonê' le'e xquia lao Diuzi. ⁴⁶ Bizi chan' ralele quie Moisés cabê' unê', lëscana' reya'ala' galerêle quia', como dan' bzu Moisés di'idza' lê'ë guichi ta rguixogue'n quie nê'ëdi'. ⁴⁷ Bizi chan' le'e biralele cabê' di'idza' bzu Moisés lê'ë guichi, çcabizi huele galele cabê' di'idza' rnia' le'e?

6

Bgao Jesús lao ga'yo' mila benê'

(Mt. 14.13-21; Mr. 6.30-44; Lc. 9.10-17)

¹ Te beyudyi una Jesús cana', uzê'ë zioquê' itzala' lagun Galilea. Lëlagun na' nezi'laona lagun Tiberias. ² Bizi yaca ben' zê gula zioyaquê' naoyaquê' lëbê', dan' blê'ëyaquê' ca naca yela' huaca quienê' reyuenê' yaca ben' raca zhue'. ³ Cana' guca urê Jesús zionê' ga zu tu ya'a. Lao ya'a na' ure'nê' lënê' yaca ben' quienê'. ⁴ Baruen bago quie lani pascua quie yaca ben' Israel. ⁵ Cati una Jesús ca yaca ben' zê nao lëbê', na'ra unê' rëbinê' Felipe:

—¿Ca gaži tzexi'ro ta gao yaca ben' zê gula niga?

⁶ Jesús bënë' pruebazi Felipe a ver bi ca inanê', dan' dyê'ëdi banezinê' cuinnê' ca huenê'. ⁷ Na'ra unê' Felipe rëbinê' Jesús:

—Nica gaguezi lao chopa gayuhua dumi denarios ta ga'oro yêta xtila ta gao yaca ben' niga. Ni tu bicho huion bigaquen gaoyaquê'.

⁸ Na'ra una Andrés, bi' bichi Simón Pedro, ben' nao Jesús, unê' rëbinê' lëbê':

⁹ —Ni zu tu xcuidi' nu'abi' ga'yo' yêta xtila len chopa bela, pero nia' ¿ca bizi huero gaquen gao lao yugulute ben' nita' niga?

¹⁰ Na'ra una Jesús rëbinê' leyaquê':

—Uleyëbi lao yuguluteyaquê' cue'yaquê'.

Bizi gan' ure'yaquê', na' de guiži ya'a. Na' ure' yaca lao ga'yo' mila be'mbyu. ¹¹ Ude na' uzi' Jesús yêta xtila na', bazënë'n bê'lënê' Diuzi di'idza' unê': "Diuxcalelo", na' bënë'n yaca ben' quienê'. Na' bizi yaca ben' quienê', udisiyaquê'n bê'yaquê'n ca tu yaca ben' re' gan' nita'yaquê'. Lëzi cana' bërê' quie bela, udaoyaquê' ca tu rnan quieyaquê'. ¹² Bê' beyudyi udaoyaquê' beloyaquê', na' una Jesús rëbinê' yaca ben' quienê':

—Uletupa, ulezi' ca tu ta bega'n ta bigaca ditoguen.

¹³ Cana' guca yezi'yaquê' tayožo gucan lao chipchopa ga' naga ca tu ta bega'n udaoyaquê' quie lao ga'yo' yêta xtila. ¹⁴ Na' bizi yaca benê' blê'ëyaquê' ca naca yela' huaca bê Jesús, unayaquê' rëbiyaquê' laguedyiaquê':

—Tali ben' ni naquê' ben' use'ela' Diuzi lao yedyi layu ta quixogue'nê' ra'o xti'idza' Diuzi.

¹⁵ Na' como gucabë' Jesús bare'enyacuë' iqui'yaquë' lëbë' tzione' rey quieyaquë' a la fuerza, cana' uza' Jesús lënë' yaca ben' quie' zione' urënë' tu ya'a.

Ni nan cabë' bë Jesús uza'në' lao nisa

(Mt. 14.22-27; Mr. 6.45-52)

¹⁶ Caora aodze' bare'en ixin, uza'yaquë' zioyaquë' ru'a nisa lagun. ¹⁷ Biži yaca ben' quie Jesús, uyu'yaquë' lu'u barco azioyaquë' lao nisa ta idyinyaquë' ciudad Capernaum. Na' baruen chula, nunu Jesús bdyin gan'. ¹⁸ Biži lu'u nisa gan' zioyaquë' na', uzulao raca tu be bedun' huala gula, bi'a be nisa rxitin ladza. ¹⁹ Caora aruen ga'yo' xopa kilómetro aoza'lëyaquë' barco, blë'ëyaquë' rza' Jesús lao nisa, azioquë' bago gan' re'yaquë' lu'u barco. Biži cana' guca bdzebitzegueyaquë'. ²⁰ Na'ra una Jesús rëbinë' leyaquë': —Në'ëdi' za' niga, bidzebile. ²¹ Biži redaohueyaquë' ta tzu'u Jesús lu'u barco gan' yu'yaquë'. Ca uyu'u Jesús lu'u barco itu chi'zi bdyinyaquë' ru'a nisa gan' tzioyaquë'.

Ca bë yaca benë' beguiloyaquë' Jesús

²² Beteyu tula, biži bega'n yaca benë' ru'a nisa lagun gan' uza' yaca ben' quie Jesús. Na' biži beza'la'adyi'yaquë' uyu'u yaca ben' quie Jesús tuzi barco de ru'a nisa. Lëzirë beza'la'adyi'rëyaquë' bizio Jesús lënë' yaca ben' quienë' lu'u barco. ²³ Na' bdyin yaca barco tula gan', barco ta uza' ciudad Tiberias. Rega'nnan ga'ala' gan' udaoyaquë' yëta xtila len bela, gan' bëlë Jesús Diuzi di'idza' gudyinë' lëbë': "Xcalelo'". ²⁴ Biži caora blë'ëyaquë' nunu Jesús lënë' yaca ben' quienë' zu gan', na' uyu'yaquë' yaca barco de gan' zioyaquë' ciudad Capernaum ta yeguiloyaquë' Jesús.

Naca Jesús ca quie yëta xtila nu'an yela' neban tuzioli

²⁵ Cati bdyinyaquë' itzala' lagun, bedilayaquë' Jesús unayaquë' rëbiyaquë' lëbë':

—Maestro, ¿ca bata blao' niga?

²⁶ Na'ra una Jesús rëbinë' leyaquë':

—Tali ca rnia' le'e, le'e rdale reguilole në'ëdi' dan' aodaole abelole. Cala reguilole në'ëdi' dan' agulele quie yela' huaca bia' blë'ële. ²⁷ Biquilole tuzi yela' huao yedu yebidyi. pero ulequilorë yela' huao biyedu yebidyi, yela' huao nu'an yela' neban tuzioli. Lëyela' huao na' guna' le'e. Në'ëdi', bichi yugulu benë', bablu'e Xuza' Diuzi le'e cabë' ruzua' di'idza' quie'. —Cana' guca una Jesús rëbinë' leyaquë'.

²⁸ Biži rnabayaquë' lëbë' rnayaquë':

—¿Ca biži reya'ala' huendo' ta huendo' ca re'en Diuzi?

²⁹ Na'ra una Jesús rëbinë' leyaquë':

—Ca ta re'en Diuzi huele, re'ennë' galele quia' në'ëdi', ben' use'elë'.

³⁰ Biži unayaquë' rëbiyaquë' lëbë':

—¿Cabiži yela' huaca huelo' ta ulu'elo' ilë'ëndo' galendo' quio'? ³¹ Lena' rnando' dan' yaca ben' xuzixta'oro udaoyaquë' yëta xtila lao maná lao lato ga bidyia yu'u con cabë' ca rnan lë'ë guichi la'iya quie Diuzi: "Diuzi bë'në' ta udaoyaquë' yëta xtila za' guibá." —Cana' gudyiyaquë' Jesús.

³² Na'ra una Jesús rëbinë' leyaquë':

—Tali ca rnia' le'e. Cala Moisés bë'në' yëta xtila za' guibá, dechan' Xuza' Diuzi bë'në'n ta udaoyaquë'. Lëzi Xuza' Diuzi gunnë' le'e yëta xtila ta za' guibá. ³³ Lëyëta xtila gun Diuzi za'ten de guibá nu'an yela' neban tuzioli para yaca ben' nita' lao yedyi layu.

³⁴ Na'ra unayaquë' rëbiyaquë' lëbë':

—Señor, guncazo' yëta xtila nao guno'.

³⁵ Biži una Jesús rëbinë' leyaquë':

—Në'ëdi' naca' lëyëta xtila nu'an yela' neban tuzioli. Con nu yaca ben' guida nao në'ëdi', biyeyudyi yedu yela' neban quieyaquë'. Huaca quieyaquë' ca quie ben' bitue, ben' birbili. ³⁶ Con can' baonëcaza' le'e, ba'ala'cazi bablë'ële në'ëdi', biralele quia'. ³⁷ Nu yaca ben' gun Xuza' Diuzi guida nao në'ëdi', biyesebi'ayaquë'. ³⁸ Në'ëdi' za' guibá ta uzua' di'idza' quie Xuza', ben' use'ela' në'ëdi'. Hua' cabë' unanë', bihua' ta racazi la'adya'. Hua' cabë' mandado bë Xuza'. ³⁹ Ca re'en Xuza' Diuzi, ben' use'ela' në'ëdi', re'ennë' ni tu yaca benë' guida nao në'ëdi' bicuiagu'yaquë'. Re'ennë' usebancaza' leyaquë' dza gaca juicio. ⁴⁰ Ca re'en Xuza' Diuzi, ben' use'ela' në'ëdi', re'ennë' gata'cazi yela' neban tuzioli quie yaca ben' gale quia' në'ëdi' zi'inë'. Huasebana'yaquë' dza gaca juicio. —Cana' una Jesús rëbinë' leyaquë'.

⁴¹ Con ca be yaca ben' Israel una Jesús unë' naquë' ca quie yëta xtila za' guibá, lena' udyiala'adyi'yaquë' Jesús. ⁴² Na' nayaquë':

—¿Cala ben' niga Jesús, ži'i José? ¿Cómo në' naquë' ben' za' guibá, dechan' nubë'ro xuzinë' len zna'në'?

⁴³ Na'ra una Jesús rëbinë' leyaquë':

—Ulesan, biinële con ganzi quia'. ⁴⁴ Nunu guida nao në'ëdi', chi biben Xuza', ben' use'ela' në'ëdi', leyaquë'. Na' lënë'ëdi' usebancaza' leyaquë' dza gaca juicio. ⁴⁵ Lu'u libro ga yu'u di'idza' bzu yaca ben' uidxogue' xti'idza' Diuzi rnan cani: “Diuzi ružio'ëne' lao yugulu yaca benë'.” Tana' rnia', con nu yaca ben' rženaga ca na di'idza' quie Xuza', uzio'ne'e Xuza' leyaquë'. Lëyaca ben' na' guidayaquë' inaoyaquë' në'ëdi'.

⁴⁶ 'Nitu nitu yaca benë' binelë'ëyaquë' Xuza'. Tuza' në'ëdi', ben' uza' ga zunë', bablë'ëda'në'. ⁴⁷ Tali ca rnia' le'e, nu yaca ben' gale quia', badecazi yela' neban quieyaquë' tuzioli. ⁴⁸ Naca' ca quie yëta xtila nu'an yela' neban tuzioli. ⁴⁹ Yaca ben' xuzixta'oro udaoyaquë' yëta xtila lao maná lao lato ga bidyia yu'u, pero bë' bdyin dza gatiyaquë' gutiyaquë'. ⁵⁰ Pero në'ëdi' rnia' quie yëta xtila uza' guibá, con nu yaca ben' gao len, bigaticaziyaquë'. ⁵¹ Në'ëdi' naca' ca quie yëta xtila uza' guibá nu'an yela' neban tuzioli. Con nu yaca ben' gao lëyëta xtila nebancaziyaquë' tuzioli. Cuina' gatia' tacuenda gata' yela' neban quie yaca benë'. Quie lena' bë'ëla' quia' nacan ca yëta xtila nu'an yela' neban tuzioli. —Cana' una Jesús rëbinë' leyaquë'.

⁵² Biži yaca ben' Israel bë'lëyaquë' laguedyiaquë' di'idza' unayaquë':

—¿Cómo na ben' niga gunnë' bë'ëla' quienë' gaoro?

⁵³ Na'ra una Jesús rëbinë' leyaquë':

—Tali ca rnia' le'e, në'ëdi' bichi yugulu benë', chi le'e bigaole bë'ëla' quia', chi le'e biyo'orële ren quia', bigata' yela' neban quiele. ⁵⁴ Nu yaca ben' gao bë'ëla' quia' yo'o ren quia', de yela' neban quieyaquë' tuzioli. Në'ëdi' huesebana'yaquë' dza gaca juicio. ⁵⁵ Bë'ëla' quia' nacan dugalo yela' huao gaole. Lëzirë ren quia' nacarën dugalo ta yo'ole. ⁵⁶ Nu yaca ben' gao bë'ëla' quia', yo'o ren quia', zulëcaziyaquë' në'ëdi' tzaže, lëzi në'ëdi' zulia'yaquë' tzaže. ⁵⁷ Xuza', ben' use'ela' në'ëdi', nebancazinë'. Na' biži në'ëdi', nebana' por nun quienë'. Lëzi cana' gacarë quie ben' gao bë'ëla' quia', nebanyaquë' por nun quia' në'ëdi'. ⁵⁸ Në'ëdi' rnia' quie yëta xtila za' guibá. Con nu yaca ben' gao lëyëta xtila na', badecazi yela' neban quieyaquë' tuzioli. Pero quie yëta xtila lao maná ta udao yaca ben' xuzixta'oro, ba'ala'cazi udaoyaquë'n, cati bdyin dza gatiyaquë' gutiyaquë'.

⁵⁹ Cana' una Jesús rëbinë' leyaquë', lu'u idao' sinagoga ciudad Capernaum.

Ga ru'en di'idza' quie yela' neban tuzioli

⁶⁰ Ca be yaca ben' can' unao Jesús, na' unayaquë' rëbiyaquë' laguediyiquë':

—Zëdi gula naca ca di'idza' unë' ra'o. ¿Nuži nezi bidan' unënë'?

⁶¹ Biži Jesús gucabë'në' ca pensari racayaquë' ru'eyaquë' di'idza' de que tziøjë' contra lëbë'. Na'ra unë' rëbinë' leyaquë':

—¿Quele resebi'le can' baonia'? ⁶² ¿Cabiži huele chi ilë'ële në'ëdi', bichi yugulu benë', yeyëpa' yeya'a guibá ga zua' dza na'? ⁶³ Bichi Be quie Diuzi, lëbë' runnë' yela' neban quiele. Bibi de hue bë'ëla' zuba' quiele lao Diuzi. Ca di'idza' baonia' le'e, lëdi'idza' na' nacan tali, rnën quie Bichi Be quie Diuzi, ben' run yela' neban. ⁶⁴ Pero nenita' bala le'e biralele quia'.

Cana' una Jesús rëbinë' leyaquë', dan' nezinë' desde caora na'te nu ben' gale quienë', nu ben' bigale quienë'. Lëzi nezinë' nu ben' usedyin lëbë' lao na'a yaca ben' guti lëbë'. ⁶⁵ Biži una Jesús rëbinë' leyaquë':

—Lena' unia' le'e can', ni tu yaca benë' bisaque' guidayaquë' naoyaquë' në'ëdi', chi Xuza' bibënnë' yaca ben' sa'lë në'ëdi'. —Cana' una Jesús rëbinë' leyaquë'.

⁶⁶ Cana' guca apsanla'adyi' yaca ben' zë Jesús, yaca ben' unao lënë'. Bira uyoyaquë' inaoyaquë' lëbë' con ga zioquë'. ⁶⁷ Cana' guca una Jesús rëbinë' lao chipchopa ben' quienë', ben' bega'n:

—Lëzi le'e, ¿re'enlë ibiga'le tzala'la, bira inaole në'ëdi'?

⁶⁸ Na'ra una Simón Pedro rëbinë' lëbë':

—Señor, ¿ca nuzila ben' tziolëndo', como tuzo' luë' rnao' di'idza' rguixogue'n quie yela' neban tuzioli? ⁶⁹ Ca naca nëto', bagulendo' quio'. Nezindo' luë' naco' ben' Cristo ži'i Diuzi, ben' neban tuzioli.

⁷⁰ Na'ra una Jesús rëbinë' leyaquë':

—Banebioga' lao chipchopa le'e gacale ben' quia', pero biži ladole ni, zu tule nuelë tuže len bichi be xi'ibi'.

⁷¹ Ca una Jesús cana', unë' quie Judas Iscariote, ži'i ben' lao Simón. LëJudas na' naquë' tuže len ichtipu yaca ben' quie Jesús. Lëbë' usedyinnë' Jesús lao na'a yaca ben' guti lëbë'.

7

Yaca bi' bichi Jesús biguleyaquë' quienë'

¹ Beyudyi guca can', uza' Jesús zioquë' estado Galilea. Bire'ennë' sunë' estado Judea, dan' lëgan' na' rda yaca ben' Israel re'enyacuë' gutiyaquë' lëbë'.

² Dan' baruen bago quie lani quie yu'u guizi, ³ na'ra una yaca bi' bichi Jesús rëbinë' lëbë':

—Biyega'nlo' niga, beyo estado Judea tacuenda yedilo' yaca ben' rnao luë' ta inezirëyaquë' cabë' ruelo'. ⁴ Chi re'enlo' inezi yaca benë' cabë' ruelo', bihuelo' negachi'zi. Na' como baruelo' tu ta binelë'ë yaca benë', bza'lao bënan zaca'laa ta ilë'ë yaca benë'. —Cana' unayaquë' rëbiyaquë' lëbë'.

⁵ Nica yaca bi' bichi Jesús biguleyaquë' quienë'. ⁶ Biži una Jesús rëbinë' leyaquë':

—Binëdyin hora ulu'ena' yaca benë' ca ta hua' ilë'ëyaquë'. Pero ca naca le'e, huazaque' tzirole lani bitezi hora. ⁷ Yaca ben' nita' lao yedyi layu biudze'la'adyi'yaquë' le'e. Pero ca naca në'ëdi', sí, udze'la'adyi'yaquë' në'ëdi', dan' rguixogui'a ca naca tamedian rueyaquë'. ⁸ Uletzio le'e lani. Bisa' në'ëdi' na'a, dan' binëdyin hora sa'a.

⁹ Ude beyudyi una Jesús cana', bega'ncazinë' estado Galilea.

Uyo Jesús lani quie yu'u guizi

¹⁰ Ude uza' yaca bi' bichi Jesús zioyaquë' lani, na'tera uza'rënë' zionë' lani, pero biuyoguë' zaquë'lao, uyoguë' negachi'zi. ¹¹ Bi'zi yaca ben' Israel reguiyoaqué' lëbë' ga raca lani unayaquë' rëbiyaquë' laguedyiaquë':

—¿Ga'zi zio Jesús?

¹² Bi'zi yaca ben' zë unëyaquë' quie Jesús. Balayaquë' unayaquë' naquë' ben' huen. Na' ibalayaquë' unayaquë' binaquë' ben' huen, unayaquë' rdanë' rzi'në' yë' yaca benë'.

¹³ Bi'zi yaca benë' rnëyaquë' negachi'zi quie Jesús, dan' rdzebiyaquë' ye yaca ben' rnabë' quieyaquë'.

¹⁴ Araca gatzo lani cati uyu'u Jesús lu'u idao' rnabë'ra zu na', na' uzu-laohuë' rusëdiguë' yaca benë'. ¹⁵ Na' du rebanyaquë' unayaquë' rëbiyaquë' laguedyiaquë':

—¿Cómo ben' niga rueguë' zi rioñe'e? ¿Ga'zi uyonë' huesëdi?

¹⁶ Na'ra una Jesús rëbinë' leyaquë':

—Ca di'idza' rusëdia' le'e niga, binacan di'idza' quia' cuinza', nacan di'idza' quia' len ben' use'ela' në'ëdi'. ¹⁷ Chi nu yaca ben' re'en hue ca re'en Diuzi, lena' huaneziyaquë' cabë' naca di'idza' rnäa', chi tuze rnëlia' Diuzi, o chi rnäa' ta racazi la'adya'. ¹⁸ Nu ben' rnë ta racazi la'adyi'në' re'ennë' para gue'en ja benë' lëbë'. Pero nu ben' rnëli Diuzi tuze, ru'enë' di'idza' li, birzi'në' yë'.

¹⁹ ¿Quele Moisés bënë' le'e ley quie Diuzi? Na' bi'zi le'e birue quiele cabë' na ley na'. ¿Ca bixquien' re'enle gütle në'ëdi'?

²⁰ Na' bi'zi una yaca benë' rëbiyaquë' lëbë':

—Yu'ulo' bichi be quie taxi'ibi'. ¿Ca nu'zi re'en guti luë' dan' nao' can'?

²¹ Na' una Jesús rëbinë' leyaquë':

—Le'e rebanele cabë' bia' yela' milagro quia' tu dza huezila'adyi'. ²² Bi'zi Moisés bënë' mandado bzu xuzixta'oro tu xëdyidao' cuin xcuidi'dao' byu. Pero tanëro xuzixta'otelaro bë' can', cala Moisés. Lëscan' le'e ruzule tu xëdyidao' xcuidi'dao' byu quiele, ba'ala'cazi dza huezila'adyi'. ²³ Le'e naole ruele ca una Moisés, ruzule tu xëdyidao' xcuidi'dao' byu quiele ba'ala'cazi dza huezila'adyi' tacuenda uzucazile di'idza' ca unë'. Na' bi'zi në'ëdi', dan' beyua' tu ben' zi dza huezila'adyi', lena' rdza'tzeguele në'ëdi'. ²⁴ Biichugulile con ganzi. Cati ichugulile, ulechuguli tu ta yu'u ni'a xnezi quie. —Cana' una Jesús rëbinë' leyaquë'.

Unë Jesús quie ga zë'e

²⁵ Bi'zi bala yaca ben' nita' ciudad Jerusalén unayaquë' rëbiyaquë' laguedyiaquë':

—¿Cala ben' niga reguilo yaca ben' rnabë' ta gutiyaquë' lëbë'? ²⁶ Zaca'lao za' ja ben' zë na' zënë' rnënë'. Bibi reyažo yaca ben' rnabë' bihueyaquë' quienë'. ¿Cala baneziyaquë' tali naquë' Cristo? ²⁷ Ra'o baneziro dyë'ëdi' ga yedyi golonë'. Pero cati guida ben' Cristo, nica neziro ga yedyi galoguë'. —Cana' unayaquë' rëbiyaquë' laguedyiaquë'.

²⁸ Cana' guca zë Jesús lu'u idao' rnabë'ra quie yaca ben' Israel rusëdinë' leyaquë', na' benë' ca rna yaca benë'. Na'ra unënë' zidzo rëbinë' leyaquë':

—Cabë' le'e banubë'le në'ëdi', banezile ga gologa'. Pero cala bida' ta racazi la'adya'. Bida' tanun quie ben' zu tuzioli, ben' binubë'le. ²⁹ Pero në'ëdi', nubë'da'në'. Uza' ga zunë'. Lëlëbë' use'ela'në' në'ëdi'. —Cana' una Jesús rëbinë' leyaquë'.

³⁰ Cana' guca gu'unyaquë' guxuyaquë' hueyaquë' lëbë' preso, pero bibeyažoayaquë' guxuyaquë' lëbë', dan' binedyin dza idyinnë' lao na'ayaquë'.

³¹ Pero yaca ben' zë, guleyaquë' quienë'. Na'ra unayaquë':

—Talicazi ben' ni naquë' ben' Cristo. Por nun quie yela' huaca quienë' bënë', lena' aoneziro naquë' ben' Cristo. ¿Ca nuzira guida huera yela' huaca ca lëbë'?

Yaca ben' partido fariseo, ben' rnabë' yaca, use'ela'yaquë' policía ta tzequëxoyaquë' Jesús

³² Caora be yaca ben' partido fariseo ca di'idza' ru'e yaca benë', na' leyaquë' len xan' pxuzi, use'ela'yaquë' yaca policía lu'u idao' rnabë'ra ta tzequëxoyaquë' Jesús. ³³ Na'ra una Jesús rëbinë' yaca benë':

—Dza nababa dzazi zulua' le'e niga, te na' yeya'a gan' zu ben' use'ela' në'ëdi'. ³⁴ Le'e huadale yeguile në'ëdi', pero biyedzelele në'ëdi', dan' bisaque' guidale gan' yeya'a.

³⁵ Na' bizi yaca ben' Israel rnabayaquë' rëbiyaquë' laguediyaquë':

—¿Ca gaži yeyo ben' niga, na' ra'o biyedzelerero gan' yeyoguë'? ¿Huayoguë' gan' nita' yaca ben' quiero, ben' uza' yaca zio yaca yedyi griego? ¿Cala huayonë' usëdinë' yaca ben' griego? ³⁶ ¿Ca bizi re'en ina di'idza' unë' ra'o: "Le'e huadale yeguile në'ëdi', pero biyedzelele në'ëdi', dan' bisaque' guidale gan' yeya'a."?

Rnë Jesús quie yao nu'an yela' neban

³⁷ Mero dza yeyudyi lani nacan dza belao. Lëdza na' uzuli Jesús unë' zidzo rëbinë' yaca benë':

—Con nu yaca ben' rbili, ruen zi inaoyaquë' në'ëdi' tacuenda gata' ta yo'oyaquë'. ³⁸ Con nu ben' rale quia', gaca quienë' con ca rnë' lë'ë guichi la'iya quie Diuzi: "Huaca laxta'oyaquë' ca quie ga de yao nu'an yela' neban."

³⁹ Caora cati una Jesús cana', quie Bichi Be quie Diuzi unë'. Na' huadyin dza huayu'u Bichi Be quie Diuzi lu'u guicho laxta'o yaca ben' rue quie quie xti'idza' Jesús, pero binedyin dza gaca can' dan' bineyo Jesús guibá ta tzeque'në' cuëta lë'ë Diuzi.

Ga rbio yaca benë' zë cue' laguediyaquë'

⁴⁰ Entre bala yaca benë' be ca una Jesús, na' bizi unayaquë' rëbiyaquë' laguediyaquë':

—Tali ben' niga naquë' ben' rguixogue' xti'idza' Diuzi, ben' una Diuzi ise'ela'në'.

⁴¹ Balayaquë' unayaquë':

—Lë'lëbë' naquë' ben' Cristo, ben' use'ela' Diuzi.

Na' ibalayaquë' unayaquë':

—¿Quele, cala estado Galilea za' ben' Cristo? ⁴² Lë'ë guichi la'iya quie Diuzi rnën quie ben' Cristo naquë' ben' zi'isuba rey David, ben' galo yedyi Belén, mero yedyi ga uzu rey David. —Cana' unayaquë' rëbiyaquë' laguediyaquë'.

⁴³ Cana' guca, dan' brojë' zë cue' unayaquë' di'idza' udeudela quie Jesús.

⁴⁴ Lena' balayaquë' gu'unyaquë' guxuyaquë' Jesús ta udze'yaquë' lëbë' lu'u dyiguiba, pero bibeyažoayaquë'.

Yaca ben' rnabë' biguleyaquë' quie Jesús

⁴⁵ Yaca ben' naca policía, ben' napa dyin quie idao' uyoyaquë' regunni'ajë' Jesús bedyinyaquë' ga nita' yaca ben' partido fariseo len yaca xan' pxuzi. Bizi na' una yaca ben' partido fariseo len yaca xan' pxuzi rëbiyaquë' policía:

—¿Bixquien' bibequie' le lëbë'?

⁴⁶ Na'ra bequëbi yaca policia rëbiyaquë' leyaquë':

—Nitu nitu nunu rnë ca lëbë'.

⁴⁷ Na'ra una yaca ben' partido fariseo rëbiyaquë' leyaquë':

—¿Lente le'e babë'le lato uzi'në' le'e yë'? ⁴⁸ ¿Biži binezile nitu yaca ben' rnabë', lëzi nitu ben' partido fariseo, biguleyaquë' quienë'? ⁴⁹ Biži yaca ben' yedyi bineziyaquë' ca na lë'ë guichi la'iya quie Diuzi. Lëlena' dan' nacayaquë' ben' yu'u de'. —Cana' una yaca ben' rnabë' rëbiyaquë' yaca policia.

⁵⁰ Biži Nicodemo naquerë' ben' partido fariseo, ben' uyo yeguelë di'idza' Jesús rtze', unë' rëbinë' yaca ben' laguedyinë':

⁵¹ —Según ca naca ley quiero, biru'en lato ichugobë'ro quie yaca benë' chi bineyero bi rueyaquë'.

⁵² Biži unayaquë' rëbiyaquë' Nicodemo:

—¿Lëzi luë', za'rao' estado Galilea? Psëdin una' lë'ë guichi la'iya quie Diuzi, hualë'ëlo' biuza' ben' ise'ela' Diuzi estado Galilea.

⁵³ Na'ra beza'yaquë' zeyoyaquë' žan yu'u quie quieyaquë'.

8

Ni nan quie nigula zu xquihue, rtile' ben' tula

¹ Biži Jesús uzi'në' zioquë' ga zu ya'a laona ya'a Olivos. ² Cati uyani' dza tula, zeyo Jesús lu'u idao' rnabë'ra. Na' begu'udi' yaca benë' gan' zënë'. Biži na' ure'në' rusëdinë' leyaquë'. ³ Na'ra yaca ben' rusëdi ley quie Moisés len yaca ben' partido fariseo, uquië'yaquë' tu nigula, ben' rdalë be'mbyu binaca xquihue. Bablë'ë benë' bin' bë nigula na' len be'mbyu. Cana' guca dan' bëxoyaquë' nigula na' lado ben' zë gan' nita'yaquë'. ⁴ Na'ra unayaquë' rëbiyaquë' Jesús:

—Maestro, bablë'ë yaca benë' bin' bë nigula ni, aptilë' be'mbyu binaca xquihue'. ⁵ Rnën lë'ë guichi ley quie Moisés de quie reya'ala' gutiro con yo ben' rue cabë' bë nigula niga. ¿Cabizi nao' luë'? —una yaca ben' na' gudyijë' Jesús.

⁶ Unayaquë' can' ta yeyaquë' cabizi yequëbi Jesús. Reguilola'adyi'yaquë' ta gaoyaquë' lëbë' xquia. Na' biži Jesús byëchonë' layula uzulaonë' bënë' letra layu conlë žbenë'. ⁷ Como dan' rnabazi rnabayaquë' lëbë', cana' guca bezulinë' unë' rëbinë' leyaquë':

—Nutezi le'e bibi xquia nehua', tanëro le'e ulequi nigula ni yo.

⁸ Na' biži beyëchonë' tatula layu. Bënë' letra tatula layu conlë žbenë'. ⁹ Biži yaca ben' nita' ga zë Jesús, bë' beyaquë' bi una Jesús, gucabë'yaquë' pensari quieyaquë' raon leyaquë' xquia. Cana' guca beza' tu huió tu huioyaquë'. Tanëro beza' yaca ben' gula, cana' guca beza' lao yuguluteyaquë'. Bega'n nigula ituzinë' gan' zë Jesús. ¹⁰ Caora bezuli Jesús, blë'ënë' nuranu yaca benë' dyila'. Biži ituzi nigula bega'n gan' zë Jesús. Na'ra una Jesús rëbinë' nigula:

—Nigula, ¿ganaži yaca ben' rao luë' xquia? ¿Quele nitu nitu nunu ichugobë' quio'?

¹¹ Biži una nigula na' rëbinë' lëbë':

—Nunu ichugobë' quia', Señor.

Na'ra una Jesús rëbinë' lëbë':

—Nica në'ëdi' biichugobi'a quio'. Pues na' beyo, bira huu' bizinaquezi.

Jesús naquë' ca quie tu gui' ta useni'n quie yugulu ben' rda lao lato lao chula

¹² Unë Jesús tatula rëbinë' yaca benë':

—Naca' ca quie tu gui' ta useni'n quie yugulu ben' rda lao lato lao chula. Chi nu yaca benë' nao në'ëdi', bitayaquë' lao lato lao chula. Huadayaquë' ga rseni' xni' gui', ga idzeleyaquë' yela' neban tuzioli.

¹³ Na'ra una yaca ben' partido fariseo rëbiyaquë' Jesús:

—Luë' rnëlo' cule quio' cuinzo'. Ca di'idza' rnëlo' na' bibizaca'n.

¹⁴ Bizi una Jesús rëbinë' leyaquë':

—Ba'ala'cazi rnia' cule quia', pero zaca' di'idza' rnia', dan' banezda' gan' za'a, banezda' gan' yeya'a. Pero ca naca le'e, nica nezizile gan' za'a, nica nezizile gan' yeya'a. ¹⁵ Le'e rchugobë'le cabë' raca lao yedyi layu. Pero ca naca në'ëdi', nitu nitu nunu rchugobi'a quie. ¹⁶ Pero chi ichugobi'a quie benë', hua' tu ta yu'u ni'a xnezi dan' cala cuinza' ichugobi'a, ichugobë'lëcaza' Xuza', ben' use'ela' në'ëdi'. ¹⁷ Lu'u libro ga yu'u ley quiele, rnën quie chopa ben' naca testigo. Chi tuzi ca rnayaquë', lena' nacan tali cabë' rnëyaquë'. ¹⁸ Bizi nia' le'e, në'ëdi' rnia' cule quia', lëzi rnërë Xuza', ben' use'ela' në'ëdi', cule quia'.

¹⁹ Na'ra unayaquë' rëbiyaquë' lëbë':

—¿Gazi nao' zu xuzo'?

Bizi una Jesús rëbinë' leyaquë':

—Cabë' le'e, binubë'le në'ëdi'. Lëzi cana' binubë'le Xuza'. Chi le'e nubë'le në'ëdi', lëzi cana' huebë'rële Xuza', ben' use'ela' në'ëdi'. —Cana' una Jesús rëbinë' leyaquë'.

²⁰ Una Jesús cana' tu nersëdinë' yaca benë' lu'u idao' rnabë'ra ga žuba tu caja ga rudze'yaquë' gun. Pero nituyaquë' bibeyažoyaquë' guxoyaquë' lëbë', dan' binedyin hora idyinnë' lao na'a yaca ben' rnabë'.

Na Jesús: “Nitule bisaque' yeza'le gan' yeya'a”

²¹ Una Jesús tatula rëbinë' leyaquë':

—Në'ëdi' hueya'a guibá ga uza'a. Le'e hueguilole në'ëdi', pero huatile du nao dula' xquia quiele le'e. Nitule bisaque' yeza'le gan' yeya'a.

²² Na'ra una yaca ben' Israel rëbiyaquë' laguediyaquë':

—¿Cala gutinë' cuinnë'? ¿Cala lena' dan' unanë': “Bisaque' yeza'le gan' yeya'a”?

²³ Na'ra una Jesús rëbinë' leyaquë':

—Le'e za'le lao yedyi layu niga, pero në'ëdi' naca' ben' za' guibá. Le'e nacale quie ben' lao yedyi layu niga, pero në'ëdi' binaca' quie ben' lao yedyi layu niga. ²⁴ Tana' lena' rnia' le'e, huatile du nao dula' xquia quiele le'e. Huatile conlë dula' xquia quiele chi biralele ca nia' nu naca'.

²⁵ Na'ra unayaquë' rëbiyaquë' Jesús:

—¿Nuži naco' luë'?

Na' una Jesús:

—Desde dza na'te, baonia' le'e nu naca'. ²⁶ Tazë de ta inia' le'e, lëzi tazë de ta ichugulia' quiele le'e. Xuza', ben' use'ela' në'ëdi', rnëguë' puro di'idza' naca li. Ca di'idza' baonia' le'e, lëdi'idza' na' beda' una Xuza' në'ëdi'. —Cana' una Jesús rëbinë' leyaquë'.

²⁷ Pero na' yaca ben' biuyoñe'eyaquë' cati unë Jesús quie Xuzinë'. ²⁸ Tana' lena' unë rëbinë' leyaquë':

—Cati baolisale në'ëdi' sibi, në'ëdi' bichi yugulu benë', lëcana' inezile nuži naca'. Lëzi inezirële cala ta racazi la'adya' rua', den' rnëcaza' ca ta bzioñe'e Xuza' në'ëdi'. ²⁹ Xuza', ben' use'ela' në'ëdi', zulëcazë' në'ëdi' tuže. Birsannë' në'ëdi' zua' tuza', dan' ruzucaza' di'idza' cabë' rnanë'. —Cana' una Jesús rëbinë' leyaquë'.

³⁰ Ca be yaca benë' ca una Jesús, caora na' gule yaca ben' zë quienë'.

Ni rnën quie yaca ben' rale len yaca ben' birale

³¹ Biži una Jesús rëbinë' yaca ben' Israel con bala yaca ben' rale quienë':

—Chi le'e naole hue quiele can' rnïa' le'e, nacacazile ben' quia'. ³² Lena' huanezcazile nacan tali ta una Diuzi. Lena' dan' gacale libre. —Cana' una Jesús rëbinë' leyaquë'.

³³ Na'ra unayaquë' rëbiyaquë' lëbë':

—Nëto' nacando' zi'isuba Abraham. Desde dza na'te banacando' libre. ¿Cómo luë' nao' gacando' libre?

³⁴ Na'ra una Jesús rëbinë' leyaquë':

—Tali ca rnïa', nu ben' rue xquia, naca quieyaquë' ca quie ben' nada'o. Naca xquia quieyaquë' ca quie xa'nyaquë'. ³⁵ Nu ben' nada'o, binaquë' familia quie xa'nnë'. Pero nu zi'i xa'nnë', nacacazibi' familia quie xa'ne.

³⁶ Chi yeži zi'i Diuzi xquia quiele, talicazi nacale libre. ³⁷ Banezda' le'e nacale ben' zi'isuba Abraham, pero re'enle gutile në'ëdi', dan' rsebi'le di'idza' rnïa' le'e. ³⁸ Në'ëdi' rnïa' cabë' una Xuza' në'ëdi'. Pero na' le'e ruzule di'idza' cabë' mandado rue ben' naca xuzile le'e. —Cana' una Jesús rëbinë' leyaquë'.

³⁹ Na'ra unayaquë' rëbiyaquë' Jesús:

—Abraham naquë' xuzindo'.

Biži una Jesús rëbinë' leyaquë':

—Chi nacale dugalo zi'i Abraham, huerële can' bënë'. ⁴⁰ Ba'ala'cazi aonia' le'e di'idza' li ca ta una Diuzi në'ëdi', na' le'e re'enle gutile në'ëdi'. Bibë Abraham cana'. ⁴¹ Le'e ruele laga ca rue ben' naca xuzile.

Na'ra unayaquë' rëbiyaquë' Jesús:

—Binacando' zi'i ben' tula. Tuzi Diuzi naquë' xuzindo'.

⁴² Biži una Jesús rëbinë' leyaquë':

—Chi tali naca Diuzi xuzile, huadyë'ële në'ëdi' dan' uza' ga zu Diuzi. Cala bida' ta racazi la'adya', den' bida' tanun quie Diuzi. ⁴³ ¿Bixquien' bire'enle ye le con ca rnïa'? Pues nia' le'e, birele dan' bire'enle hue quiele con ca rnïa'. ⁴⁴ Xan' taxi'ibi' naca xuzile. Lena' dan' re'enle huerële cabë' ruenan. Desde cana'te rutinan benë', biruenan tali. Ca pensari yu'u laxta'onan, cana' rzi'nän yë'. Nacanan ben' huizi' yë'. Nacarënan xuzi yugulu ben' huizi' yë'.

⁴⁵ Dan' rnïa' le'e ta naca tali, ta yu'u ni'a xnezi, quie lena' bire'enle galele quia'. ⁴⁶ ¿Nuži le'e ulenacara chi në'ëdi' de dula' quia'? Chi rnïa' ta naca tali, ¿bixquien' biralele quia'? ⁴⁷ Nu ben' naca quie Diuzi, uzë'nagayaquë' xti'idza' Diuzi. Pero le'e, dan' binacale ben' quie Diuzi, lena' bire'enle uzë'nagale hue quiele xti'idza' Diuzi. —Cana' una Jesús rëbinë' leyaquë'.

Tu binegalo Abraham bazucazi Cristo

⁴⁸ Na'ra una yaca ben' Israel rëbiyaquë' Jesús:

—¿Cala tali rnando' naco' ben' samaritano bayu'ulo' bichi be xi'ibi'?

⁴⁹ Biži una Jesús rëbinë' leyaquë':

—Biyu'a bichi be xi'ibi'. Ca ta rua', rua' Xuza' ben' ze. Na' biži le'e, rutasi runiole në'ëdi'. ⁵⁰ Në'ëdi' bihua' cuina' ben' ze, pero zucazi ben' rue në'ëdi' ben' ze. Lëbë' ichugobë'në' quiele. ⁵¹ Tali ca rnïa' le'e, chi nu yaca ben' hue quie di'idza' rnïa', bigaticazinë'.

⁵² Na'ra una yaca ben' Israel rëbiyaquë' lëbë':

—Baguquelindo' yu'ucazo' bichi be xi'ibi'. Pues Abraham len yaca ben' udxogue' xti'idza' Diuzi, gutiyaquë'. Na' biži luë' nao': "Chi nu yaca benë' hue quie di'idza' rnïa', bigaticazinë'." ⁵³ ¿Nacaro' luë' ben' ze ca xuzixta'ondo' Abraham? Lëbë' gutinë', lëzirë gutirë yaca los demás ben' udxogue' xti'idza' Diuzi, na'a ¿ca nuži nao' naco' luë'?

⁵⁴ Na'ra una Jesús rëbinë' leyaquë':

—Chi rua' cuina' ben' ze, bibi zaca'n ca nia'. Pero Xuza', ben' nale naca Diuzi quiele, lënë' ruenë' në'ëdi' ben' ze. ⁵⁵ Në'ëdi' nia' le'e binubë'le lëbë', pero në'ëdi' sí, nubë'da' lëbë'. Chi inaro de que nia' binubë'da' lëbë', lena' nacaria' ben' huizi' yë' ca le'e. Pero biinia' can', como dan' nacan tali nubë'da' lëbë', ruzua' di'idza' quienë'. ⁵⁶ Bedaohue xuzixta'ole Abraham dza blë'ënë' bdyina' yedyi layu.

⁵⁷ Na'ra una yaca ben' Israel rëbiyaquë' Jesús:

—Binedyinfo' gatzo gayuhua iza, ¿cómo luë' nao' blë'ëlo' xuzixta'ondo' Abraham?

⁵⁸ Na'ra una Jesús rëbinë' leyaquë':

—Tali ca rniä' le'e, tu binegalo xuzixta'ole Abraham, bazucaza' në'ëdi'. —Cana' una Jesús rëbinë' leyaquë'.

⁵⁹ Bizi na' uzi'yaquë' yo gu'unyaquë' quiyaquë'n Jesús. Na' ubiguë' tzala'la lu'u idao' rnabë'ra beroguë' bedenë' zioguë' ladoyaquë'.

9

Beyue Jesús tu ben' laochula

¹ Gan' uzi' Jesús zionë' blë'ënë' tu ben' laochulacazi nacatë' gologuë' naquë' xcuidi'. ² Na'ra una yaca ben' quie Jesús rëbiyaquë' lëbë':

—Maestro, ¿bixquien' golo ben' niga nechula laohuë'? ¿Nu quie dula' xquia guca laohuë' can'? ¿Idula' xquia quie xuzë', o chi dula' xquia quie cuinzë'?

³ Na'ra una Jesús rëbinë' yaca ben' quië':

—Cala gucan quie dula' xquia quie cuinzë', ni quele dula' xquia quie xuzinë'. Gucan can' tacuenda inezi yaca benë' cabë' hue Diuzi yela' huaca quienë' gacalënë' lëbë'. ⁴ Na' nia' le'e na'a te dza naca baguin racaten dyabë' hua' dyin quie Xuza', ben' use'ela' në'ëdi'. Cati baodze', nuranu saque' hue dyin. ⁵ Tu raca zua' lao yedyi layu, naca' ca quie gui' rsenin' ga naca chula ta ilë'ë yaca benë'.

⁶ Ude beyudyi una Jesús cana', uru'unë' zen' layu, bënë' ledao' gun' conlë zen' quienë'. Ude na' uzi'në'n blëpinë'n lao ben' laochula. ⁷ Na'ra una Jesús rëbinë' ben' laochula:

—Uyo yetibi laolo' lu'u pozo nisa lao Siloé, ta inaro xti'idza'ro: Pozo nisa quie ben' uyo lao laza ben' tula.

Bizi uyo ben' laochula yetibinë' laohuë', na' bizi bedyinnë' zan yu'u quienë' baoyalo laohuë' barlë'ënë'. ⁸ Na'ra yaca ben' nita' ga'ala' ga zu ben' abeyalo laohue, len yacara los demás ben' tula, ben' bezaque chi lënë' reque'në' rnabë' gun, caora na' unayaquë' rëbiyaquë' laguediyiaquë':

—¿Cala ben' niga reque' rnaba gun yugu dza?

⁹ Bala yaca benë' unayaquë':

—Lë'lëbë'.

Ibalayaquë' unayaquë':

—Lëbë' raquero.

Pero bizi cuincazi ben' beyalo laohue unë':

—Lënë'ëdi'.

¹⁰ Na'ra unabayaquë' lëbë':

—¿Bizi bao' ta belë'ëlo'?

¹¹ Na'ra bequëbinë' rëbinë' leyaquë':

—Lëben' lao Jesús bënë' gun' blëpinë'n laohua'. Bë' beyudyi blëpinë' gun' laohua', na'ra unë' në'ëdi': “Uyo yetibi laolo' lu'u pozo nisa lao Siloé.” Bizi na' uya'a yetiba' laohua', cana' guca' barlë'ëda'.

12 Na'ra unabayaquë' lënë':

—¿Ganaži ben' nao' cana'?

Na'ra unë':

—Binezda' gala zionë'.

Yaca ben' partido fariseo, pquëpiyaquë' ben' beyalo laohue bi guca quienë'

13 Na'ra uquië'yaquë' ben' beyalo laohue psedyinyaquë' lëbë' gan' nita' yaca ben' partido fariseo. 14 Cana' bëyaquë', dan' beyue Jesús laohue ben' na' dza saodo, dza huezila'adyi'. 15 Na'ra pquëpiyaquë' ben' beyalo laohue ca guca dan' belë'ënë'. Cani unë' rëbinë' leyaquë':

—Blëpiguë' gun' laohua'. Ude na' uya'a yetiba'n. Cana' guca belë'ëda'.

16 Na'ra una bala yaca ben' partido fariseo:

—Ben' nao' bë can', binaquë' ben' quie Diuzi, dan' bibënë' bala dza huezila'adyi' quiero.

Na' biži ibalayaquë' unayaquë':

—Chi naquë' ben' napa dula' xquia, ¿cabiži guca bënë' yela' huaca ta belë'ë ben' niga?

Cana' guca unëyaquë' di'idza' udeudela. 17 Na'ra unayaquë' rëbiyaquë' ben' beyalo laohue:

—¿Cabiži nao' luë' quie ben' nao' beyue laolo'?

Na'ra unë' rëbinë' leyaquë':

—Në'ëdi' rnía' naquë' ben' use'ela' Diuzi. —Cana' unë' rëbinë' yaca ben' partido fariseo.

18 Pero bigulecaziyaquë' chi tali guquë' ben' laochula. Na' tacuenda yezacalao bi guca quienë', guziyaquë' xuzi zna' ben' beyalo laohue. 19 Na'ra unabayaquë' xuzi zna' ben' na' rëbiyaquë' leyaquë':

—¿Ži'ile ni unale nechula laonë' cati uzutenë'? Chi nale nechula laonë', ¿cómo barlë'ënë' na'a?

20 Na' biži unayaquë' rëbiyaquë' leyaquë':

—Nando' ži'indo'. Nezindo' desde bdao'tenë' nechula laonë'.

21 Binezcazindo' bi guca dan' barlë'ënë'. Nica nezizindo' nu ben' bë ta belë'ënë'. Banacanë' ben' huaca. Ulenabacaranë' lënë'. Huananë' cuinnë' bi guca quienë' dan' barelë'ënë'.

22 Cana' una xuzi zna' ben' beyalo laohue, dan' rdzebiyaquë' bi hue yaca ben' rnabë', como dan' banuži'a yaca ben' rnabë' bihue'yaquë' lato tzu'u ben' lu'u idao' sinagoga, ben' rale quie Jesús naquë' ben' Cristo. 23 Tana' lena' unayaquë' rëbiyaquë' yaca ben' rnabë': “Banaquë' ben' huaca. Ulenabacaranë' lënë'.”

24 Biži yaca ben' rnabë' guziyaquë' tatula ben' beyalo laohue, unayaquë' rëbiyaquë' lëbë':

—Tali una nëto', dan' huecazi Diuzi ca inao'. Biži nëto' banezindo' ben' na' naquë' ben' de dula' xquia quie.

25 Na'ra una ben' beyalo laohue rëbinë' leyaquë':

—Binezicazida' chi naquë' ben' de dula' xquia quie, o chi bede dula' xquia quienë'. Zelao na' ta nezda', guca ben' laochula, biži na'a barelë'ëda'.

26 Lena' unabayaquë' lëbë' tatula:

—¿Biži bënë' quio' dan' nao' beyuenë' luë'?

27 Na'ra unë' rëbinë' leyaquë':

—Baonia' le'e can' bënë', pero bibi bala ruele quia'. ¿Bixquien' rnabale në'ëdi' tatula? ¿Cala re'enle inaorële lëbë', gacale ben' quienë'?

28 Biži mazara bdza' yaca ben' rnabë' lëbë' rëbiyaquë' lëbë':

—Luë' naolo' ben' na'. Bizi nêto' naondo' rzundo' di'idza' ca una Moisés.
²⁹ Nêto' banezindo' dyë'ëdi ca bē Diuzi bē'lēnē' Moisés di'idza'. Pero quie ben' na', nica nezindo' ga za'nē'.

³⁰ Na'ra unē ben' beyalo laohue rēbinē' leyaquē':

—Nacan ta yebanero ca nale, nale binezile ga za'nē'. ¿Cómo binezile ga za' tu ben' guca beyuenē' nē'ëdi' barlē'ëda' na'a? ³¹ Dyë'ëdi neziro bire Diuzi yaca ben' napa dula' xquia. Con tuzi yaca ben' rionla'adyi' lēbē', yaca ben' rue quie xti'idzē', lējē' re Diuzi quiejē'. ³² Desde ure'te lao yedyi layu, nunu nehue cabē' bē ben' niga, bēnē' ta yelē'ë tu ben' laochulacazi nacatē' gologuē'. ³³ Chi ben' na' biuza'nē' tzionē' lao Diuzi, bibi de huenē' cuinzinē'.

³⁴ Na'ra una yaca ben' partido fariseo rēbiyaquē' lēbē':

—Yela' ben' mala quio' naco' can' gololo'. ¿Na' como luē' re'enlo' yexi'idze'lo' nêto' uzioñe'elo' nêto'?

Can' guca ulioyaquē' lēbē' lu'u idao' sinagoga.

Ben' birale quie Jesús naca quieyaquē' ca quie ben' laochula

³⁵ Bizi Jesús unezinē' ulio yaca ben' partido fariseo ben' baoyalo laohue lu'u idao' sinagoga. Na' bedila Jesús lēbē' unē rēbinē' lēbē':

—¿Ralelo' quie ben' naca zi'i Diuzi?

³⁶ Na'ra una ben' baoyalo laohue rēbinē' Jesús:

—Señor, una nu ben' na' tacuenda galeda' quienē'.

³⁷ Na'ra una Jesús rēbinē' lēbē':

—Nē'ëdi', ben' ru'elē luē' di'idza', naca' ben' na'.

³⁸ Caora na' uditzo žibinē' lao Jesús rēbinē' lēbē':

—Baraleda' quio', Señor.

³⁹ Na' bizi una Jesús rēbinē' lēbē':

—Nē'ëdi' bida' lao yedyi layu ta hua' juicio. Lēzirē bida' tacuenda yelē'ë yaca ben' birlē'ë. Pero quie yaca ben' bire'en gale quia', bida' ta yechula laohueyaquē'.

⁴⁰ Bizi bala yaca ben' partido fariseo nita'yaquē' ga'ala' ga zē Jesús, bē' beyaquē' can' unanē', na'tera unayaquē' rēbiyaquē' lēbē':

—¿Bizi ca nao'? ¿Nacarēndo' ben' laochula?

⁴¹ Na'ra una Jesús rēbinē' leyaquē':

—Chi tali binezile bi ruele, bide dula' xquia quiele. Pero como dyë'ëdi banezile bi ruele, lena' decazi dula' xquia quiele.

10

Una Jesús tu di'idza' quie beco' zi'ila' len quie ben' rapa lēba', ben' naca xa'mba'

¹ Tali ca rnia' le'e, nu ben' bitzu'u ru'a corrale ga yu'u beco' zi'ila', den' negachi' ru'unē' xcu'udzule, lēben' na' naquē' ben' uban, ben' re'en cuan beco' zi'ila'. ² Ben' ru'u ru'a corrale, ga yu'u beco' zi'ila', lēben' na' naquē' dugalo ben' rapa beco' zi'ila', ben' naca xa'mba'. ³ Ben' rapa ru'a corrale, rsaloguē' ru'a corrale ta tzu'u ben' rapa beco' zi'ila', ben' naca xa'mba'. Bizi rezaque yaca beco' zi'ila' xchi' ben' rapa lēba', ben' naca xa'mba'. Rēziguē' tu tuba' según cabē' laoba' quie quiejaba' ta cuioguē'ba' lu'u corrale. ⁴ Rde reyudyi rbioguē' lao yuguluteba', na' rebialao ben' rapa lēba' laoyacaba'. Bizi leyacaba' yenaoyacaba' ben' rapa lēba', ben' naca xa'mba' dan' rezaqueyacaba' xchi'nē'. ⁵ Pero binaoyacaba' ben' binubē'yacaba'. Huažunoyacaba' lēbē', dan' binubē'yacaba' xchi'nē'. Rezaqueyacaba' cala ben' rapa lēba', ben' naca xa'mba'. —Cana' una Jesús rēbinē' yaca benē'.

⁶ Lëtu di'idza' ni gudyi Jesús yaca benë', pero bizi biuyoñe'ejë' bi na di'idza' una Jesús quie xa'n beco' zi'ila'.

Jesús naquë' dugalo ben' rapa beco' zi'ila', ben' naca xa'mba'

⁷ Na'ra una Jesús tatula rëbinë' leyaquë':

—Tali ca rnïa' le'e, në'ëdi' naca' ca quie ru'a corrale ga ru'u yaca beco' zi'ila'. ⁸ Yaca ben' babida caora bineguida', gu'unyaquë' cuanyaquë' yaca beco' zi'ila'. Pero bizi yaca beco' zi'ila' bibëyacaba' bala inaoyacaba' leyaquë'. ⁹ Dan' naca' ca quie ru'a corrale, lena' con nu yaca ben' tzu'u ru'a corrale gan' zua', lëlëyaca ben' na' gata' yela' neban quiejë' tuzioli. Huaca quieyaquë' ca quie yaca beco' zi'ila' ru'u rero lu'u corrale ga de guiži ya'a ta gaoyacaba'.

¹⁰ 'Rida yaca ben' uban ta cuanyaquë' gutiyaquë' udyiagu'yaquë' yaca benë'. Pero bida' në'ëdi' ta gata'cazi yela' neban quieyaquë' tuzioli. ¹¹ Në'ëdi' naca' dugalo ben' rapa beco' zi'ila', ben' naca xa'mba'. Zua' puesto gatiä' tacuenda bicuiagui'yacaba'. ¹² Pero nu ben' rue dyin de lažo, cati ilë'ënë' za' lobo, caora na' izunoguë' uca'nnë' yaca beco' zi'ila', dan' binaquë' dugalo ben' rapa beco' zi'ila', ben' naca xa'mba'. Binacayacaba' bia quienë'. Cana' gaca guida lobo guxuba' utzatzaba' yaca beco' zi'ila'. ¹³ Pero ben' binaca xa'mba' rueguë' dyin de lažo, lena' użunoguë' bibi cuenda huenë' quie yaca beco' zi'ila'.

¹⁴⁻¹⁵ 'Në'ëdi' naca' dugalo ben' rapa beco' zi'ila', ben' naca xa'mba'. Cabë' Xuza' nubë'në' në'ëdi', cana' nubë'da' Xuza'. Lëzirë cabë' nubë'da' yaca ben' naca ca quie beco' zi'ila' quia', cana' nubë'yaquë' në'ëdi'. Zua' puesto gatiä' tacuenda bicuiagui'yaquë'. ¹⁶ Lëzirë nita' yaca ben' tula nacarëyaquë' ca quie beco' zi'ila' quia'. Bizuyaquë' ni len në'ëdi'. Lena' huatzazi'ayaquë' guidayaquë' ta sulëyaquë' në'ëdi', dan' baraleyaquë' quia'. Nacarëyaquë' tuzi len yaca los demás ben' barale quia'. Cana' iyacayaquë' tu žezi, na' tuza' në'ëdi' gaca' xa'nyaquë'.

¹⁷ 'Xuza' nedyë'ënë' në'ëdi' dan' zua' puesto gatiä', te na' yezi'a yela' neban quia' tatula.

¹⁸ 'Nunu rzaque' guti në'ëdi' chi bihua'yaquë' lato. Gusto quia' zua' puesto gatiä', te na' yezi'a yela' neban quia' tatula. Cana' mandado bë Xuza' në'ëdi'.

¹⁹ Ude beyudyi be yaca ben' Israel ca una Jesús, na'tera unëyaquë' udeudela. ²⁰ Yaca ben' zë unëyaquë' quienë' rëbiyaquë' laguedyiyaquë':

—¿Bixquien' ruele bala rzënegale quienë'? Yu'u bichi be xi'ibi' lu'u laxta'onë', naquë' ben' loco.

²¹ Bizi ibalayaquë' unayaquë':

—Nu ben' yu'u bichi be xi'ibi', birnënë' ca rnë ben' ni. ¿Quele, chi ben' yu'u bichi be xi'ibi', bisaque'në' yeyuenë' ben' laochula ta yelë'ënë'?

Yaca ben' Israel besebi'yaquë' Jesús

²² Bizi bdyin dza hue yaca ben' Israel lani ta yeza'la'adyi'yaquë' dza guca la'iya idao' rnabë'ra quieyaquë'. Biu' bëyaquë' lani, nacan biu' zaga. ²³ Uyu'u Jesús lu'u idao' rnabë'ra rdanë' bago ru'a idao' nezi'laonan ru'a idao' Salomón. ²⁴ Bizi yaca ben' rnabë' quie ben' Israel uyëchoyaquë' Jesús rnayaquë' rëbiyaquë' lëbë':

—¿Bataži iyudyi rutëbilo' nëto' ca di'idza' inao' nëto'? Chi luë' naco' ben' Cristo, una nëto' tu lasagazi.

²⁵ Na'ra una Jesús rëbinë' leyaquë':

—Baonia' le'e, pero biralele. Ca naca yela' huaca babia' conlë Xuza', lena' rulu'enan le'e nu naca'. ²⁶ Pero le'e biralele quia', dan' binacale ben' naca beco' zi'ila' quia' ca ta baonëcaza' le'e. ²⁷ Bizi yaca ben' naca beco'

zi'ila' quia', rzēnagayaquē' di'idza' rnia'. Nē'ēdi' nubē'da' leyaquē', cana'ra guidayaquē' inaoyaquē' nē'ēdi'. ²⁸ Nē'ēdi' hua'yaquē' yela' neban tuzioli ta bicuiaguī'caziyaquē'. Nitu nitu nunu saque' cuba leyaquē' lao na'a como dan' ²⁹ Xuza' bēnnē' leyaquē' nē'ēdi'. Nacara Xuza' ben' žera ca yaca benē'. Nitu nitu nunu saque' cuba leyaquē' lao na'a Xuza'. ³⁰ Xuza' len nē'ēdi' nacando' tuže. —Cana' una Jesús rēbinē' leyaquē'.

³¹ Bizi yaca ben' r nabē' quie ben' Israel, tatula uzi'yaquē' yo, gu'unyaquē' quiyaquē' Jesús. ³² Pero una Jesús rēbinē' leyaquē':

—Žē'lasa bia' tadya'a delante lao le'e conlē yela' huaca quie Xuza'. Chi bia' tadya'a, žbixquien' re'enle quile nē'ēdi' yo?

³³ Na'ra unayaquē' rēbiyaquē' Jesús:

—Cala re'enndo' quindo' luē' yo dan' babao' tadya'a, pero dan' rnaya'lo' Diuzi ca rnao'. Benē'cazi naco', na' ruelo' cuinlo' ca Diuzi.

³⁴ Na'ra una Jesús rēbinē' yaca ben' r nabē':

—Lē'ē guichi ga bzu Moisés di'idza' la'iya quie Diuzi, rguixogue'n ca una Diuzi rēbinē' yaca benē' cani: “Le'e nacale ca yaca diuzi.” ³⁵ Cana' una Diuzi quie yaca ben' uzēnaga quienē' unē' rēbinē' leyaquē': “Le'e nacale ca yaca diuzi.” Na' bizi banezira di'idza' licazi zun lē'ē guichi la'iya quie Diuzi. ³⁶ Chi Diuzi ulioguē' nē'ēdi' use'ela'nē' nē'ēdi' lao yedyi layu niga, žbixquien' le'e nale rnaya' Diuzi dan' nia' naca' ži'i Diuzi? ³⁷ Chi birzua' di'idza' cabē' rna Xuza' nē'ēdi', bigalecazile quia'. ³⁸ Pero chi rzua' di'idza' cabē' rna Xuza' nē'ēdi', ruen ži galele quia' por nun quie len tacuenda inezile tu lasagazi nacalia' Xuza' tuže, lēscan' nacalē Xuza' nē'ēdi' tuže. —Cana' una Jesús rēbinē' leyaquē'.

³⁹ Bizi yaca ben' r nabē', tatula gu'unyaquē' guxuyaquē' Jesús ta hueyaquē' lēbē' preso, pero aode ulanē' lao na'a yaca ben' na'.

⁴⁰ Bizi beyo Jesús tatula itzala' yao Jordán. Na' bega'nnē' gan' bē' Juan lao yaca benē' dza na'te. ⁴¹ Yaca ben' žē uyoyaquē' yena'yaquē' Jesús. Na'ra unayaquē' rēbiyaquē' laguedyiaquē':

—Ba'ala'cazi bibē Juan yela' milagro, pero yugulu ca ta unē' quie ben' niga nacan tali.

⁴² Na'ra yaca ben' žē uyo gan' zēnē', guleyaquē' quienē'.

11

Ni rnēn cabē' guca cati guti Lázaro

¹ Na' uzu tu ben' guca žhue', ben' lao Lázaro. Naquē' ben' yedyi Betania lēnē' chopa zannē', María len Marta. ² LēMaría na' uyonē' dza na'te yelatonē' aceite rla' žixi žeo ni'a Jesús. Ude na' besebidyinē'n conlē guitza' guichonē'. ³ Cana' guca use'ela' rupa zan Lázaro tu ben' uyo gan' zu Jesús unē' rēbinē' lēbē':

—Señor, raca žhue' Lázaro, ben' naca amigo quio'.

⁴ Bē' be Jesús ca una ben' na', na' unē' rēbinē' lēbē':

—Ca naca yela' hue' racanē', bisuen gutin lēbē'. Raca žhue'nē' tacuenda ulu'en ca naca yela' huaca quie Diuzi, lente yela' huaca quia' nē'ēdi' ži'i Diuzi. —Cana' una Jesús rēbinē' lēbē'.

⁵ Ba'ala'cazi nedyē'ētzegue Jesús Lázaro len Marta len žilanē' María, ⁶ bilaoyotenē' caora benē' raca žhue' Lázaro. Bega'nnē' uzurē' ichopa dza gan' zuē'. ⁷ Guca lao chopa dza unē' rēbinē' yaca ben' quienē':

—Uletza' tzioro tatula estado Judea.

⁸ Na'ra una yaca ben' quie Jesús rēbiyaquē' lēbē':

—Maestro, ta zaracagazi gu'un yaca ben' quiyaquë' luë' yo gan' nao' tzioro. Na' biži luë', ¿re'enlo' tzioro tatula?

⁹ Biži una Jesús rëbinë' leyaquë':

—Nu'acazi chipchopa hora lao tu dza. Chi ra'o rdaro te dza, bicha'oro dan' rseni' xni' obidza. ¹⁰ Pero chi ra'o rdaro lao chula, decazide huacha'oro, dan' birseni' xni' obidza ilë'ëro.

¹¹ Te beyudyi una Jesús cana', na'ra unë' rëbinë' yaca ben' quie':

—Ben' amigo quiero Lázaro, barasinë', pero huaya'a usebia'në'.

¹² Na'ra una yaca ben' quienë' rëbiyaquë' lëbë':

—Señor, chi lëbë' rasizinë', hueyacanë'.

¹³ Pero unë' Jesús can' dan' baguti Lázaro, cala rasizinë'. Biži raque yaca ben' quienë' de que rasizi Lázaro. ¹⁴ Na'ra una Jesús dyë'ëdi rëbinë' leyaquë':

—Baguticazi Lázaro. ¹⁵ Redaohueda' dan' biuzua' na' ta ilë'ëda' cati guti Lázaro. Redaohueda' dan' cabë' guca quienë' nacan ta gacalën le'e ta galera le quia' në'ëdi'. Pues na' uletza' tzioro gan' denë'.

¹⁶ Biži Tomás, ben' uxubayaquë' laohue ben' guidi', unë' gudyinë' laguedy-inë', ben' quie' jesus:

—Uletza' tziolëronë' ta gatilëronë' tzaže.

Naca Jesús ben' useban yaca ben' huati

¹⁷ Caora bdyin Jesús gan', bazio lao tapa dza babgachi'la Lázaro lu'u beló yo. ¹⁸ Yedyi Betania rega'n ga'ala' ga re' ciudad Jerusalén. Nacan chopa legua yugatzo. ¹⁹ Zë yaca ben' Israel uyoyaquë' gan' nita' Marta len María, reyuezyayaquë' leyaquë' dan' guti zanyaquë'. ²⁰ Bë' be Marta baza' Jesús, na' uyoguë' yelezanë' lëbë'. Pero María bega'nnë' zan yu'u quienë'. ²¹ Na'ra una Marta rëbinë' Jesús:

—Señor, chan' zucalo' lao' nëto' niga, beyaca Lázaro zanndo', bigutinë'.

²² Nezda' yugulu ta inabo' Diuzi, guncazinë'n luë'.

²³ Na'ra una Jesús rëbinë' lëbë':

—Bi' zanle huebannë' tatula.

²⁴ Na' bequëbi Marta rëbinë' Jesús:

—Banezda' hueban bi' zana' dza iyudyi lao yedyi layu, dza yeban yugulu yaca ben' baguti.

²⁵ Biži una Jesús rëbinë' lëbë':

—Në'ëdi' naca' ben' useban yaca ben' huati, yeyu'ayaquë' yela' neban tatula. Con nu benë' gale quia', ba'ala'cazi gatiyaquë', huebanyaquë' tatula.

²⁶ Nia' luë' yaca ben' neban, yaca ben' rale quia', tuzioli bitziojë' lao gui' gabila. ¿Bagulelo' can' baonia'?

²⁷ Na'ra una Marta rëbinë' Jesús:

—Señor, raleda' quio' luë' naco' ben' Cristo, zi'i Diuzi. Luë' naco' ben' una Diuzi ise'ela'në' lao yedyi layu. —Cana' unë' rëbinë' Jesús.

Uredy Jesús gan' pcachi'yaquë' Lázaro

²⁸ Ude beyudyi una Marta can', uzë'ë yeguëdyinë' ben' zilanë' María. Unë' di'idza' balanzi rëbinë' lëbë':

—Baza' Maestro, guëžinë' luë'.

²⁹ Ca be María ca una Marta, laozatënë' zionë' gan' zë Jesús. ³⁰ Binetzu'u Jesús la'o yedyi. Tu neza nenita'lënë' yaca ben' quie' ga bedilanë' Marta.

³¹ Yaca ben' bdyin zan yu'u, caora blë'ëyaquë' uzuli María uza'në' zionë' taria, lëscan' uži'rëyaquë' xnezayaquë' zioyaquë' naoyaquë' lëbë'. Guqueyaquë' chi zionë' cuëdyinë' gan' pcachi'yaquë' Lázaro.

³² Bizi cati bdyin María gan' zë Jesús, uditzu žibinë' lao Jesús, unë' rëbinë' lëbë':

—Señor, chan' zucalo' lao' nëto' niga, beyaca Lázaro zanndo', bigutinë'.

³³ Bizi cati blë'ë Jesús rbedyi María len yaca ben' zio nao lëbë', rdëbinë' guca beyëchi' lu'u laxta'onë'. ³⁴ Na'ra una Jesús rëbinë' leyaquë':

—¿Ga mero pcachi'lenë'?

Na' biži unayaquë':

—Señor, ya' ilë'ëlo'.

³⁵ Biži na' uredyi Jesús. ³⁶ Na'ra una yaca ben' ziorë nao:

—Ulena', lega nedye'ënë' lëbë'.

³⁷ Biži bala yaca ben' ziolë leyaquë' unayaquë':

—Ben' niga bënë' ta belë'ë ben' birlë'ë, ¿cómo na' bibi bënë' ta iyaca Lázaro ta bigatinë'?

Ni rnën cabë' bë Jesús psebannë' Lázaro

³⁸ Bizi Jesús racatzeguenë' beyëchi' tatula. Na' ubiga'në' bago ru'a beló yo gan' pcachi'yaquë' Lázaro. Na' da' tu yo ze ru'a beló. ³⁹ Lena' una Jesús rëbinë' leyaquë':

—Ulecuba yo da' ru'a beló.

Biži Marta, zan ben' huati, unë' rëbinë' Jesús:

—Señor, bazio lao tapa dza gutinë', barla'në' zigo.

⁴⁰ Na'ra una Jesús rëbinë' lëbë':

—¿Cala baonia' luë', chi ralelo' can' baonia', hualë'ëlo' hue Diuzi yela' huaca quienë'?

⁴¹ Caora na' udubayaquë' yo da' ru'a beló. Biži na' una' Jesús sibi ladza, blidzanë' Diuzi:

—Xuza', diuxcalelo' dan' relo' cati nia' luë'. ⁴² Nezcazida' relo' cati rnia' luë'. Pero por nun quie yaca ben' nita' niga, lena' bë'lia' luë' di'idza' zaquë'lao laoyaquë' tacuendá uzénagayaquë' ineziyaquë' luë' use'elo' në'ëdi'.

⁴³ Ude beyudyi unë Jesús can', na' unë' zidzo unë':

—Lázaro, bero gan' delo' na'.

⁴⁴ Caora na' bero Lázaro gan' denë'. Nedubi la'ari' na'anë' len ni'anë'. Lëzi bdaco la'ari' laohuë'. Na'ra una Jesús rëbinë' leyaquë':

—Ulexëdyi la'ari' dubi na'anë' len ni'anë'. Ulesannë' yeyoguë'.

Bapsaqueyaquë' ca hueyaquë' guxuyaquë' Jesús

(Mt. 26.1-5; Mr. 14.1-2; Lc. 22.1-2)

⁴⁵ Yaca ben' ziolë María gan', blë'ëyaquë' cabë' bë Jesús besebannë' Lázaro. Lëcana' yaca ben' zë guleyaquë' quienë'. ⁴⁶ Biži balayaquë' uyoyaquë' yetixogue'yaquë' yaca ben' partido fariseo cabë' bë Jesús. ⁴⁷ Na'ra yaca ben' partido fariseo len yaca xan' pxuzi bedupayaquë' bëyaquë' junta len yaca los demás ben' rnabë'. Na'ra unayaquë' rëbiyaquë' laguediyaquë':

—¿Ca biži huero quie ben' na'? Lega ruenë' yela' huaca ta binelë'ëro.

⁴⁸ Chi hue'roguë' lato tanë' huenë' can', na' huanao yaca ben' zë lënë'. Biži huadza' yaca ben' rnabë' quie ben' romano, huase'ela'yaquë' soldado udyi-agui'yaquë' idao' rnabë'ra quiero lente ciudad quiero. —Cana' unayaquë' rëbiyaquë' laguediyaquë'.

⁴⁹ Biži ben' naca xan' pxuzi lëiza na', ben' lao Caifás, unë' gudyinë' leyaquë':

—Le'e netondole ca di'idza' rnale. ⁵⁰ Nica nenezile nacaran dya'a quiero gati tuzi benë' lao laza yaca ben' yedyi, cala ca ta gati yuguluro. —Cana' una Caifás.

⁵¹ Dan' lèiza na' nacanë' xan' pxuzi unë' can'. Pero cala cuenta quienë' unë' can'. Biunezinë' unë' cuenta quie Diuzi cati unë' gati Jesús lao laza yaca ben' Israel. ⁵² Pero cala tuzi lao laza ben' Israel gati Jesús, lëscan' gati Jesús lao laza yugulu yaca ben' gale quienë', yaca ben' nedzatza nita' yaca yedyi tula. ⁵³ Lëdza na' psaque yaca ben' rnabë' quie ben' Israel ca hueyaquë' gutiyaquë' Jesús.

⁵⁴ Cana' guca bira uda Jesús zaquë'lao len yaca ben' Israel. Tana' uzë'ë estado Judea zioquë' yedyi lao Efraín ga nacan ga'ala' lao lato ga bidyia yu'u. Lëgan' na' bega'nlënë' yaca ben' quie'.

⁵⁵ Baruen bago ta hueyaquë' lani ta reza'la'adyi'yaquë' quie xuz-ixta'oyaquë' caora broyaquë' nación Egipto. Tana' lena' yaca ben' zë, yaca ben' yedyi, uza'yaquë' zioyaquë' ciudad Jerusalén ta yeyëriyaquë' cuinyaquë' lao Diuzi según costumbre quieyaquë'. ⁵⁶ Na'ra yaca ben' na' rdayaquë' reguiloyaquë' Jesús. Caora rioyaquë' lu'u idao' rnabë'ra, na' unayaquë' rëbiyaquë' laguedyiaquë':

—¿Bizi raquële? ¿Huida Jesús lani, o chi biguidanë'?

⁵⁷ Cana' guca bë yaca ben' partido fariseo len yaca xan' pxuzi mandado gudyiaquë' benë' con nu yaca ben' ilë'ë Jesús laquixogue'teyaquë' leyaquë' tacuenda guxuyaquë' lëbë' hueyaquë' lëbë' preso.

12

Tu nigula blëpinë' aceite rla' zixi zeo ni'a Jesús

(Mt. 26.6-13; Mr. 14.3-9)

¹ Zaidylna lao xopa dza ga'ala' lani cati reza'la'adyi'yaquë' quie xuz-ixta'oyaquë'. Caora na' uza' Jesús uyoguë' yedyi Betania gan' zu Lázaro, ben' baguti, pero beseban Jesús lëbë'. ² Lëgan' na' psiña'ayaquë' yela' huao ta gapayaquë' Jesús bala'ana. Caora na' bë Marta laze ta udaoyaquë', na' udaorë Lázaro tuze len leyaquë'. ³ Na'ra uzi' María gatzó litro aceite rla' zixi zeo ta rbioyaquë' yo lao nardo. Lëaceite na' bibi nequixin, zaca'n za'ala' gula. Bizi na' blëpinë'n ni'a Jesús, na' uzi'në' guitza' guichonë' bla'onë'n aceite la'o ni'a Jesús. Cana' bedu lu'u yu'u ure' be zeo gula. ⁴ Na'ra una tu ben' quie Jesús laonë' Judas Iscariote. Lëbë' naquë' zi'i tu ben' lao Simón. Na' ba'ala'cazi naquë' ben' quie Jesús, lëlëbë' usedyinnë' Jesús lao na'a yaca ben' guti lëbë'. Na' una Judas rëbinë' leyaquë':

⁵ —¿Bixquien' bibët'guë' aceite rla' zixi zeo, dan' zaca'n tzona gayuhua dumi denario tacuenda si'në' dumi quien hue'në'n yaca ben' yëchi'?

⁶ Cana' una Judas, pero bireyëchi'la'adyi'në' quie yaca ben' yëchi'. Rdëbinë' quie dumi, dan' naquë' ben' uban. Rapanë' bolsa yu'u dumi tacuenda saque' cuannë' dumi yu'u lu'u bolsa na'. ⁷ Na'ra una Jesús rëbinë' Judas:

—Psan quienë'. Pues baodyialaonë' bënë' quie dza gatia' igacha'.

⁸ Nita'cazi ben' yëchi' lao yedyi layu yugu dza, pero në'ëdi', itu chopá dzazi zulia' le'e.

Ga rsaqueyaquë' ta gutirëyaquë' Lázaro

⁹ Yaca ben' zë, yaca ben' Israel, caora uneziyaquë' bazu Jesús yedyi Betania, uza'yaquë' uyoyaquë' gan' zunë'. Uyoyaquë' yena'yaquë' lëbë' len Lázaro, ben' baguti, pero beseban Jesús lëbë'. ¹⁰ Na'ra yaca ben' xan' pxuzi bapsaqueyaquë' bi hueyaquë' ta gutirëyaquë' Lázaro. ¹¹ Cana' psaqueyaquë', dan' barale zë yaca ben' Israel quie Jesús por nun quie dan' psebannë' Lázaro. Cana' bira bë yaca ben' yedyi na' tzaže len yaca ben' rnabë' quieyaquë', pero guleyaquë' quie Jesús.

Beyo Jesús tatula la'o ciudad Jerusalén

(Mt. 21.1-11; Mr. 11.1-11; Lc. 19.28-40)

¹² Yaca ben' zē gula uyoyaquē' ciudad Jerusalén ga raca lani ta reza'la'adyi'yaquē' quie xuzixta'oyaquē'. Biži bezu dza tula uneziyaquē' huadyin Jesús lani ciudad Jerusalén. ¹³ Caora na' uchugoyaquē' la'aga' palma ta bi'ayaquē' yelezayaquē' Jesús tu neza. Caora bedilayaquē' lēbē' unēyaquē' zidzo:

—Ben' ze gula naca Diuzi. Naca la'ia ben' uza' lao xa'nro Diuzi. Naca la'ia rey quiero, ben' Israel.

¹⁴ Na'ra zē tu burra gan' zioquē'. Na' udyia Jesús lēba' con ca rguixogue'n lē'ē guichi la'ia quie Diuzi cani:

¹⁵ Le'e ben' yedyi Sión, biidzebile.

Ulena' baza' Rey quiele, bdyianē' tu burro.

¹⁶ Dza na'la biuyoñe'e yaca ben' quie Jesús con ca rnēn lē'ē guichi la'ia quie Diuzi. Pero ude beyudyi gutinē' bebannē' zeyonē' guibá, cana'ra beza'la'adyi'yaquē' con ca rna lē'ē guichi. Bezaqueyaquē' guca quie Jesús tali con ca rnēn lē'ē guichi na'.

¹⁷ Yaca benē' nita' gan' zē Jesús caora gužinē' Lázaro yeronē' lu'u beló yo besebannē' lēbē', lēyaca ben' na', udixogue'yaquē' ca naca blē'ēyaquē' bi bē Jesús. ¹⁸ Tana' lena' uza' yaca benē' yedzagayaquē' Jesús tu neza, dan' babeyaquē' ca naca quie yela' huaca babēnē'. ¹⁹ Biži yaca ben' partido fariseo unayaquē' rēbiyaquē' laguedyiaquē':

—Bablē'ēro bira bide huero. Ulena'cara lao yugulute benē' zioyaquē' banaoyaquē' lēbē'.

Bala ben' griego beguiloayaquē' Jesús

²⁰ Lado yaca ben' nita' lao lani ciudad Jerusalén, nita'rē bala ben' griego.

²¹ Lēyaquē' ubiga'yaquē' bago ga zē Felipe, ben' yedyi Betsaida quie estado Galilea, na' unayaquē' rēbiyaquē' lēbē':

—Señor, re'enndo' tzeyubindo' Jesús.

²² Na'ra uyo Felipe gan' zē Andrés gudyinē' lēbē' cabē' una yaca ben' griego. Biži na' zio rupayaquē' yetixogue'yaquē' Jesús. ²³ Na'ra una Jesús rēbinē' lēyaquē':

—Bagazi idyin hora quia' nē'ēdi', bichi yugulu benē', huatia' yebana', yeya'a guibá tatula ga uza'a. ²⁴ Tali ca rnia' le'e na'a quie bini trigo. Nacacazi tuzin chi bitzu'un lu'u yu gu'udzon. Pero chi bini razaro yeyu'udzon lu'u yu, hualē laxta'ona ta yeyunan bini zē gula. ²⁵ Cana' nacarē quie yaca benē'. Chi nu ben' bire'en inao nē'ēdi' dan' ruen zudyi initi yela' neban quienē', bibi yela' neban gata' quienē' tuzioli. Pero chi nu ben' inao nē'ēdi' ba'ala'cazi ruen zudyi initi yela' neban quienē', lēben' na' decazi yela' neban quienē' tuzioli. ²⁶ Chi nu ben' re'en guida gaca ben' quia', reya'ala' guidayaquē' inaoyaquē' nē'ēdi'. Con gatezi tzezua', lēzi gan' na' huazurēlēyaquē' nē'ēdi'. Nu yaca ben' gaca ben' quia', huapala'n Xuza' lēyaquē'.

Rna Jesús baruen bago gatinē'

²⁷ 'Baraca yēchi' lu'u laxta'ohua'. ¿Cabizi inia' yēpa' Xuza'? ¿Inia' yēpa'nē': "Ute uselao' nē'ēdi' can' gaca quia' gatia'"? Bigacacazi yēpa' Xuza' can', porque nun quie lena' use'ela'nē' nē'ēdi' lao yedyi layu. ²⁸ Xuza', ulu'elo' yaca benē' ca naca yela' huaca quio'. —Cana' una Jesús rēbinē' Xuzinē'.

Biži beyaquē' de guibáte za' xchi' Diuzi unē':

—Bablu'ecaza' yaca benē' yela' huaca quia'. Tatula hua' yela' huaca quia' ta ilē'ēyaquē'.

²⁹ Bizi yaca ben' rženaga nita'yaquë' gan' zë Jesús, caora beyaquë' xchi' Diuzi unayaquë':

—Unë tu huiziu'.

Ibalayaquë' unayaquë':

—Tu ángel bë'lënë lëbë' di'idza'.

³⁰ Na'ra una Jesús rëbinë' leyaquë':

—Tahuen na' bë Diuzi quiele unë' bele xchi'në'. ³¹ Babbdyincazi hora na'a ulu'e Diuzi ca tamala rue yaca benë'. Bizi lëcana' udyiagui' Diuzi dyin quie xan' taxi'ibi'. Lëlëna r nabë'na yaca benë' nita' lao yedyi layu niga. ³² Te yeyudyi uda' yaca benë' në'ëdi' lë'ë yaga cruzo gatia', caora na' hueyëza' lao yugulte yaca benë' ta gacayaquë' ben' yenaon në'ëdi'.

³³ Una Jesús can' tacuenda inezi yaca benë' cabë' gaca gatinë'. ³⁴ Na' bizi una yaca benë' rëbinë' lëbë':

—Babendo' ca rna yaca ben' rulaba guichi yu'u ley de que ben' Cristo nebankazinë' tuzioli. Na'ra ¿cómo luë' rnao' ben' naca bichi yugulu benë' gatinë' lë'ë yaga cruzo? ¿Ca nužila ben' naca bichi yugulu benë'?

³⁵ Na'ra una Jesús rëbinë' leyaquë':

—Në'ëdi' naca' ca quie tu gui' rseni'n ga naca chula. Nezulia' le'e itu chopa dzazi. Reya'ala' huele bala ca rnia' le'e na'a nezua' ni len le'e cuenda biquixile. Nu ben' rda lao lato lao chula, binezinë' ga tzioguë' huaquixinë' xnezë'. ³⁶ Reya'ala' galele quia' naca' ca quie tu gui' rseni'n ga naca chula na'a nezua' ni len le'e tacuenda gacale ben' quia', ben' rda lao lato lao xni'.

Ude beyudyi una Jesús can', zioquë' pcachi'laonë', bira blë'ëjë' gala zionë'.

Bigule yaca ben' Israel quie Jesús

³⁷ Ba'ala'cazi bë Jesús zë yela' huaca zaquë'lao yaca benë' Israel, bigule-caziyaquë' quienë'. ³⁸ Guca can' dan' decazide uzun di'idza' ca bzu Isaías lë'ë guichi dza na'la. Lë'ë guichi na' rnën cani:

Señor, ¿nuži gale ca naca di'idza' la'iya quio' rguixogui'a benë'.

¿Nuži blu'elo' ca naca yela' huaca quio'?

Cana' una Isaías dza na'.

³⁹ Cana' bigu'unayaquë' galeyaquë' quie Jesús. Lëscan' bzu Isaías di'idza' lë'ë guichi rnën cani:

⁴⁰ Yela' yeladyi' quieyaquë' bë Diuzi leyaquë' ca quie ben' laochula, bënë' zidi lu'u laxta'oyaquë',

cuenda ba'ala'cazi rlë'ëyaquë', gaca quieyaquë' ca ben' birlë'ë, lëscan' cuenda ba'ala'cazi tzu'u di'idza' lu'u guichoyaquë', gaca quieyaquë' ca ben' birioñe'e.

Cana' biinaoyaquë' xneza Diuzi ta yeyëri laxta'oyaquë'.

⁴¹ Cana' una Isaías dza na' dan' unezinë' naca Jesús ben' rue yela' huaca quie Diuzi. Quie lena' unënë' quienë'.

⁴² Pero gulecazi zë yaca ben' Israel, lente yaca ben' r nabë' quiejë' gu-leyaquë' quie Jesús. Pero biblu'eyaquë'n zaquë'lao chi raleyaquë', dan' rdzebiyaquë' yaca ben' partido fariseo chi yebioyaquë' leyaquë' lu'u yaca idao' sinagoga. ⁴³ Lena' rlu'en raxerayaquë' ca bala'ana hue yaca benë' len leyaquë', quiele ca bala'ana hue Diuzi len leyaquë'.

Una Jesús cabë' gaca quie yaca benë' dza gaca juicio

⁴⁴ Bizi unë Jesús zidzo rëbinë' leyaquë':

—Con nu yaca ben' rue quie di'idza' quia', lëscan' ruerë quieyaquë' di'idza' quie Xuza', ben' use'ela' në'ëdi'. ⁴⁵ Con nu yaca ben' nuebë' në'ëdi', lëscan' nuebë'rëyaquë' ben' use'ela' në'ëdi'. ⁴⁶ Në'ëdi' naca' ca quie tu gui' rseni'n ga

naca chula. Nu yaca ben' gale quia', bitayaquë' lao lato lao chula. Tana' lena' bida' lao yedyi layu. ⁴⁷ Pero chi nu yaca benë' babe di'idza' can' baonia', na' birue quieyaquen, cala në'ëdi' ichugobi'a quieyaquë'. Bida' lao yedyi layu ta ute usela' yaca benë', cala ta ichugobi'a quieyaquë'. ⁴⁸ Nu ben' yesebi' në'ëdi', ben' birue quie ca naca di'idza' baonia', decazide zu ben' ichugobë' gaca juicio quieyaquë'. Ta bibëyaquë' bala ca naca di'idza' baonia', lëlena' ichugobë'n quieyaquë' dza yeyudyi lao yedyi layu. ⁴⁹ Cabë' në'ëdi', quele ta racazi la'adya' rnia'. Rnia' ca una Xuza', ben' use'ela' në'ëdi'. Lëlebë' unanë' në'ëdi' ca bi di'idza' inia' usëdia' yaca benë'. ⁵⁰ Banezda' bë Xuza' mandado ta gata' yela' neban tuzioli quie yaca ben' gale quia'. Pues con can' rnia', rnia' ca una Xuza' në'ëdi'.

13

Udibi Jesús ni'a yaca ben' quienë'

¹ Raca falta dza ga'ala' lani pascua ta reza'la'adyi'yaquë' ca guca quie xuzixta'oyaquë'. Caora na' gucabë' Jesús abdyin hora gatinë' yeyoguë' guibá ga zu Xuzë'. Pues nedyë'ëcazi Jesús yaca ben' rale quienë', ben' nita' lao yedyi layu. Biyeyudyi yedu nedyë'ënë' leyaquë'.

²⁻⁴ Bizi Judas Iscariote, zi'i Simón, uyu'unë' pensari quie xan' taxi'ibi' ta regulola'adyi'në' ca huenë' usedyinnë' Jesús lao na'a yaca ben' guti lëbë'. Bizi Jesús dyë'ëdi' nezinë' uza'në' guibá ga zu Diuzi hueyoguë' ga zu Xuzinë' tatula. Nezirënë' pca'n Xuzinë' duze yela' rnabë' quienë' lao na'anë'.

Na' bizi caora uyu'uyaquë' huao rtze', uzulinë' ru'a mesa ga re'në', udubë' zabë' de laohue, uzi'në' tu toalla pquionë'n lë'e si'në'. ⁵ Na'ra uzi'në' tu palangan udza'në'n nisa. Na' uzulaonë' rguibinë' ni'a yaca ben' quienë', bebesidyinë'n conlë toalla pquionë' lë'e si'në'.

⁶ Cati zionë' quibinë' ni'a Simón Pedro, na' una Pedro rëbinë' Jesús:

—Señor, ¿huaguibo' ni'a?

⁷ Bizi una Jesús rëbinë' lëbë':

—Cabë' na'a binetzioñe'elo' cabë' hua' quio', pero terala, huayoñe'elo'.

⁸ Na'ra una Pedro rëbinë' lëbë':

—Bigacacazi quibo' ni'a në'ëdi'.

Bizi Jesús unë' rëbinë' lëbë':

—Chi bigaca quiba' ni'alo', bira naco' tuze len në'ëdi'.

⁹ Bizi Simón Pedro unë' rëbinë' Jesús:

—Señor, cala tuzi ni'a quibo', lëscan' quibo' na'a lente guichoga'.

¹⁰ Na'ra una Jesús rëbinë' Pedro:

—Nu ben' zagozo yao, birnaban tzequëzunë' yao luegozi. Ni'azinë' rquin tzerina, dan' banaquë' ben' yëri. Le'e banacale ben' yëri pero cala lao yugulule.

¹¹ Na' una Jesús: “Cala lao yugulule”, dan' nezinë' nu ben' usedyin lëbë' lao na'a yaca ben' guti lëbë'.

¹² Ude beyudyi udibinë' ni'a yaca ben' quienë', beyaconë' zabë' de laohue, bebe'në' tatula ru'a mesa unë' rëbinë' leyaquë':

—¿Banezile cabë' babia' quiele? ¹³ Le'e nale në'ëdi': “Maestro”, lëscan' nale në'ëdi': “Señor.” Nacan tali quiele ca nale në'ëdi', dan' tali naca' maestro, nacatia' Señor quiele. ¹⁴ Como në'ëdi', ben' naca maestro, ben' naca Señor quiele, baodiba' ni'ale le'e, na'ra le'e, reya'ala' quibirële ni'a tu itu lagedyile. ¹⁵ Bablu'ena' le'e cabë' reya'ala' huele quie lagedyile con can' babia' quiele.

¹⁶ Tali rnia' le'e, ni tu ben' naca mozo birnabë'në' como ca xa'nnë'. Lëzi ni tu ben' rio mandado quie ben' tula, birnabë'në' como ca ben' use'ela' lëbë'.

¹⁷ Chi baoyoñe'ele cabë' baonia' le'e, chi hue quielen, yedaohuele, na' sule gusto.

¹⁸ 'Cala rnia' quie lao yugulutele. Nè'edi' anezda' nu le'e aolioga' nacale ben' quia'. Pero decazide uzun di'idza' ca rnan lè'ë guichi la'iya quie Diuzi: "Con tu ben' gaolè nè'edi', lèben' na' huenè' conde nè'edi'." ¹⁹ Desde na'a rnia' le'e ca ta za' gaca quia' cuenda galele quia' nia' le'e nu naca' cati idyin dza gaca quia' can' baonia' le'e. ²⁰ Tali rnia' le'e, con nu yaca ben' chezila'adyi' quie ben' ise'ela', lèscan' rezila'adyi'rëyaquë' nè'edi'. Na' con nu yaca ben' chezila'adyi' nè'edi', rezila'adyi'rëyaquë' ben' use'ela' nè'edi'.

Udixogue' Jesús usedyin Judas lèbë' lao na'a yaca ben' guti lèbë'

(Mt. 26.20-25; Mr. 14.17-21; Lc. 22.21-23)

²¹ Ude beyudyi una Jesús can', guca yèchi'nè', lega ptëbin lu'u laxta'onè'. Na' claro gula unè' rëbinè' yaca ben' quienè':

—Tali rnia' le'e, zu tu ben' zu ladole ni, ben' usedyin nè'edi' lao na'a yaca ben' guti nè'edi'.

²² Na'ra uzulaoyaquë' rna'yaquë' lao laguedyiaquë'. Bineziaquë' nula'yaquë' rnè Jesús quie can'. ²³ Uzu tu ben' quienè' ure'nè' cuëta lè'ë Jesús ga udaoyaquë' rtze'. Lega nedyë'ë Jesús lèbë'. ²⁴ Bizi Simón Pedro bënë' seña lao ben' ure' cuëta lè'ë Jesús ta inabë' nuzila quieyaquë' rnè Jesús. ²⁵ Cana' una ben' ure' cuëta lè'ë Jesús rëbinè' lèbë':

—¿Señor, nuzila nêto' rnao' can'?

²⁶ Na'ra una Jesús rëbinè' leyaquë':

—Con nu ben' hua'a yëta xtila bdyia' lu'u plato niga, lèlëben' na' usedyinnè' nè'edi' lao na'a yaca ben' guti nè'edi'.

Caora na' uzi'nè' tu bicho yëta xtila ta bdyianè' lu'u plato bënë'n Judas Iscariote, zi'i Simón. ²⁷ Ca uzi' Judas yëta xtila, cana' layu'ute bichi be quie xan' taxi'ibi' lu'u laxta'onè'. Caora na' una Jesús rëbinè' Judas:

—Ca ta raco' pensari huelo', bëtegan.

²⁸ Pero nitu yaca ben' raolënë' lao mesa biuyoñe'eyaquë' bixquien' gudyinè' Judas can'. ²⁹ Como Judas naca ladyina'anè' bolsa ga yu'u dumi, quie lena' guqueyaquë' re'len Jesús tzio Judas ta ga'onè' ta gaoyaquë' quie lani o chi ta ga'onè' ta hue'nè' yaca ben' yèchi'. ³⁰ Ca beyudyi udao Judas yëta xtila ta bënë' Jesús lënë', caora na' beza'nè' baruen lao rtze'.

Ga rguixogue'n quie mandamiento cubi

³¹ Ude uza' Judas zioquë', na' una Jesús rëbinè' yaca ben' quienè':

—Abdyin hora ulu'ena' le'e yela' huaca quia', nè'edi' bichi yugulu benè'. Lèzi ulu'ena' le'e yela' huaca quie Xuza'. ³² Cabë' nè'edi' bichi yugulu benè', ulu'ena' le'e yela' huaca quie Xuza', lèscan' ulu'erë Xuza' le'e yela' huaca quia' nè'edi' zi'inè'. Baruen baba dzazi gaca cana'. ³³ Bicha', calara zidza zulua' le'e niga. Le'e huadale yeguilole nè'edi'. Na'ra inia' le'e con can' bagudya' yaca los demás ben' Israel dza na': Con gan' yeya'a, bisaque' yeza'rële len nè'edi'. ³⁴ Rnia' le'e tu mandamiento cubi: Idyë'ële tu itu laguedyile. Na'ra cabë' rua' nè'edi', nedyë'ëda' le'e, lècana' huerële, idyë'ële tu itu laguedyile. ³⁵ Chi idyë'ële tu itu laguedyile, lècana' huanezi yugulu benè' nacale ben' quia'.

Ga rguixogue' Jesús cabë' hue Pedro si'nè' yë'

(Mt. 26.31-35; Mr. 14.27-31; Lc. 22.31-34)

³⁶ Bizi Simón Pedro unanè' rëbinè' Jesús:

—Señor, ¿ga'zi yeyolo'?

Na'ra una Jesús rëbinè' lèbë':

—Gan' yeya'a bisaque' yeza'lo' na'a. Pero terala yeguidale gan' yeya'a.

³⁷ Na'ra una Pedro rëbinë' lëbë':

—Señor, ¿bixquien' bisaque' yeza'lia' luë' na'a? Zua' puesto gatia' lao lazo'.

³⁸ Biži Jesús unë' rëbinë' lëbë':

—¿Nacan tali zulo' puesto nao' gatio' lao laza'? Tali ca rnía' luë', zahuen bala binecuedyi biu, huanao' tzona lasa binubë'lo' në'ëdi'.

14

Una Jesús quie neza ta yeyoro guibá

¹ Nernë Jesús rëbinë' leyaquë':

—Bigapale cuidado. Rzudyi'ilële Diuzi, lëzirë reya'ala' sudyi'ilële në'ëdi'.

² Lu'u guibá ga zu Xuza', detzegue lato ga tzezule. Chi bide lato, inía' le'e bide lato. Lena' yeya'a guibá tzeguia' dya'a ga tzezule. ³ Ude yeyudyi yeya'a guibá tzeguia' dya'a ga tzezule, caora na' yeguida' tatula dežia' le'e cuenda sulële në'ëdi' lu'u guibá tuže. ⁴ Le'e banezile ga zio neza gan' yedyina'.

⁵ Na'ra una Tomás rëbinë' Jesús:

—Señor, binezindo' gan' yedyinlo', ¿cómo luë' nao' banezindo' gan' zio neza?

⁶ Na'ra una Jesús rëbinë' lëbë':

—Në'ëdi' naca' neza guibá, ben' rnë tali, ben' run yela' neban tuzioli. Tuzu' në'ëdi' naca' ben' ulu'e yaca benë' yedyinyaquë' ga zu Diuzi. ⁷ Chi tali banubë'le në'ëdi', lëzi nubë'rële Xuza'. Desde na'a banubë'le Xuza', barlë'ëlenë'.

⁸ Na'ra una Felipe rëbinë' Jesús:

—Señor, ben lato ilë'ëndo' Xuzi Diuzi. Tana'zi inabando' luë'.

⁹ Quie lena' una Jesús rëbinë' lëbë':

—Felipe, zidza baoca zulía' le'e, ¿quele binubë'lo' në'ëdi'? Nu ben' bablë'ë në'ëdi', lëben' na' bablë'erënë' Xuza'. ¿Na' bixquien' nao' në'ëdi': "Ben lato ilë'ëndo' Xuzi Diuzi"? ¹⁰ ¿Binezile në'ëdi' zulëcaza' Xuza', lëzi zulëcazinë' në'ëdi'? Ca naca di'idza' baonia' le'e nacan di'idza' ta una Xuza' në'ëdi', cala di'idza' quia' cuinza'. Cala ta racazi la'adya' unia'. Naca Xuza' ben' zulëcazi në'ëdi' tzaže. Ruecazinë' ca re'ennë' gaca. ¹¹ Galele zulëcaza' Xuza', lëzi Xuza' zulëcazinë' në'ëdi'. Chi biralele con can' baonia' le'e, galele quia' por nun quie ta bia' blë'ële. ¹² Tali ca rnía' le'e, con nu ben' rale quia', huerëyaquë' ca ta babia'. Lëzi huerayaquë' mazara ca ta babia', dan' yedyina' gan' zu Xuza'. ¹³ Yugulu ta inabale lao Xuza', uzëtole laohua' inabalen, na' në'ëdi' ži'inë', guna'n tachuenda ulu'ena' yela' huaca quie Xuza'. ¹⁴ Con bitezi inabale uzëtole laohua', naguna'n.

Una Jesús ise'ela'në' Bichi Be quie Diuzi

¹⁵ 'Chi le'e nedyë'ële në'ëdi', ulehue quiele ca naca mandamiento baonia' le'e. ¹⁶ Në'ëdi' yëpa' Xuza' ta ise'ela'në' itu ben' gacalë le'e. Lëbë' yeyuežela'adyi'në' le'e, huazulëcazinë' le'e tuzioli. Naquë' Bichi Be quie Diuzi, ben' uzioñe' le'e ta naca tali. ¹⁷ Pero nu yaca ben' nita' lao yedyi layu, bichežila'adyi'yaquë' lëbë', nica nelë'ëyaquë' lëbë', nica huebë'yaquë' lëbë'. Pero le'e nubë'le lëbë', dan' zulëcazinë' le'e yu'unë' lu'u laxta'ole tuzioli. ¹⁸ Biuca'na' le'e cuinzile. Hueguidacaza' tatula sulía' le'e. ¹⁹ Ibaba dza ilë'ë yaca benë' nita' lao yedyi layu në'ëdi'. Pero le'e, hualë'ëcazile në'ëdi'. Huata' yela' neban quiele tuzioli, dan' nacale ben' quia' në'ëdi', ben' neban tuzioli. ²⁰ Dza gaca can' hualë'ële zulëcaza' Xuza' tuže, lëscan' le'e lëlënë'ëdi', lëscan' në'ëdi' len le'e. ²¹ Nu ben' hue quie ca naca mandamiento baonia' le'e, lena' rlu'en quienë' tali nedyë'ëne' në'ëdi'. Na'ra idyë'erë Xuza' nu ben' nedyë'ë

nè'èdi'. Lèzi nè'èdi' nedyè'èda' con nu ben' nedyè'è nè'èdi', ulu'ena'yaquè' yela' huaca quia'.

²² Na'ra unè Judas, pero Judas tula, cala Judas Iscariote, rëbinè' Jesús:

—Señor, ¿bixquien' ulu'elo' nêto' yela' huaca quio', na' biulu'elo'n yaca ben' nita' lao yedyi layu?

²³ Bizi una Jesús rëbinè' lëbè':

—Nu yaca ben' nedyè'è nè'èdi', rue quieyaquè' xti'idza', nadyè'è Xuza' leyaquè'. Nè'èdilia' Xuza' huazulëcazindo' leyaquè' tuže. ²⁴ Pero nu yaca ben' binedyè'è nè'èdi', birue quieyaquè' xti'idza'. 'Ca naca di'idza' baonia' le'e, cala ta racazi la'adya' unia' le'e, di'idza' quia' nacan di'idza' una Xuza', ben' use'ela' nè'èdi'.

²⁵ 'Tu neraca nezulia' le'e itu chi', rguixogue'na' le'e ca di'idza' baonia'.

²⁶ Cati bira zua' ni len le'e, huase'ela' Xuza' Bichi Be quienè' lao laza' ta gacalënë' le'e huažela'adyi'nè' le'e. Lèzi uzioñe'enè' le'e usa'la'adyi'nè' le'e yugulute ca ta baonia' le'e.

²⁷ 'Baruen bago dza yeya'a pero huabëcha' chizi lu'u laxta'ole con ca re' chizi lu'u laxta'ohua'. Cana' dugalo cue'n chizi lu'u laxta'ole, quele ca rue yaca ben' nita' lao yedyi layu, quele dugalo cuëchijè' chizi lu'u laxta'ole. Lëlena' bidëbile, bidzebile. ²⁸ Babelè unia' le'e de que hueya'a guibá hueguida' tatula sulia' le'e. Chi tali nedyè'è nè'èdi', huëdaohuele yele di'idza' yedyina' ga zu Xuza'. Nacara Xuza' ben' ze ca nè'èdi'. ²⁹ Desde na'a rnìa' le'e ta za' gaca quia' cuenda yeza'la'adyi'le cabè' unia' le'e galele quia' cati idyìn dza gaca quia' can' baonia'.

³⁰ 'Birabi zè di'idza' hue'lia' le'e, dan' baza' xan' taxi'ibi'. Lëna rna'bè'na yaca benè' nita' lao yedyi layu. Pero birna'bè'na nè'èdi'. ³¹ Ruzucaza' di'idza' ca ta una Xuza' nè'èdi' tacuenda inezi yaca benè' nita' lao yedyi layu de que nedyè'èda' Xuza'. Ulechasa gan' ni. Uletza' ga tula.

15

Una Jesús tu di'idza' quie luba bedzuli'

¹ Bizi neru'elè Jesús leyaquè' di'idza' unè':

—Nè'èdi' naca' ca quie luba bedzuli'. Naca Xuza' ca quie ben' rapa luba bedzuli'. ² Huachuguè' yaca taca' luba ta bidyia tazixi tzechu'unnè'n. Na' luba dyia bedzuli', uluba ucha'anè'n tacuenda cuiaran tazixi. ³ Le'e nacale ben' yèri lao Diuzi dan' rue quiele ca ta bapsèdia' le'e. ⁴ Ta reya'ala' huele biusanle nè'èdi' nacalëcazile nè'èdi' tuže cabè' nacalëcaza' le'e tuže. Tu taca' luba bedzuli' bizun lè'è luba quien, bisaque' cuian tazixi. Lèzi le'e, chi binacalëcazile nè'èdi' tuže, naca quiele ca quie luba bidyia tazixi.

⁵ 'Nè'èdi' naca' ca quie luba. Na' bizi le'e nacale ca quie taca' luba. Chi nacalëcazile nè'èdi' tuže cabè' nacalëcaza' le'e tuže, naca quiele ca quie luba bedzuli' dyia tazixi. Chi binacalëcazile nè'èdi' tuže, bibi de huele. ⁶ Nu yaca ben' binacalë nè'èdi' tuže, gaca quienè' ca quie taca' luba bidyia tazixi. Nacan ta chu'un yaca benè' tzala'la ta utupayaquè'n ibidyin uzeiyaquè'n.

⁷ 'Chi nacalëcazile nè'èdi' tzaže, chi bigala'adyi'le ca ta bapsèdia' le'e, na' con bitezi inabale nè'èdi', guncaza'n le'e. ⁸ Cati rue quiele di'idza' quie Xuza', cana' bala'ana nacale ca quie luba bedzuli' dyian tazixi. Lëcana' ulu'en talicazi nacale ben' quia'. ⁹ Nè'èdi' nedyè'èda' le'e ca nedyè'è Xuza' nè'èdi'. Ulenao nè'èdi' con can' nedyè'èda' le'e. ¹⁰ Chi hue quiele cabè' baonia' le'e, cana' idyè'èda' le'e cabè' nedyè'è Xuza' nè'èdi', rua' cabè' unanè' nè'èdi'.

¹¹ 'Cabè' di'idza' baonia' le'e, nacan ta yedaohuele lële nè'èdi' su gusto lu'u laxta'ole. ¹² Ni rnìa' le'e tu di'idza' belao: Re'enda' idyè'èle tu itu laguedyile

con can' rua' nedyë'da' le'e. ¹³ Chi baguti tu benë' lao laza amigo quienë' ta uselanë' lëbë', lëlena' ulu'en lega nedyë' ben' na' amigo quienë'. Ganura zu nedyë'ëra ben' amigo quienë' ca ben' na', ben' guti. ¹⁴ Le'e nacacazile amigo quia' chi hue quiele di'idza' con can' baonia' le'e. ¹⁵ Bira inia' le'e nacale ca quie mozo quia', porque binezi yaca mozo bi rue xa'nyaquë'. Inia' le'e nacale amigo quia', porque aonia' le'e ca ta una Xuza' në'di', banezcazole bi ruenë'. ¹⁶ Cala le'e uliole në'di', den' në'di' ulioga' le'e ta tzirole huele dyin quie Diuzi si'le usecho ta de tuzioli. Cana', guncazi Xuza' yugulu ta inabale uzëtole laohua'. ¹⁷ Na'ra tatula inia' le'e: Re'enda' idyë'le tu itu laguedyile.

Yaca ben' nita' lao yedyi layu rudieyaquë' Jesús len yaca ben' quienë'

¹⁸ 'Chi rudie yaca ben' nita' lao yedyi layu le'e, bigala'adyi'le tanëro bdieyaquë' në'di'. ¹⁹ Chi le'e nacale tuzi len ben' nita' lao yedyi layu, gue'enyaquë' le'e con ca gue'enyaquë' yaca ben' quieyaquë'. Pero në'di' ulioga' le'e ladoyaquë', quie lena' rudieyaquë' le'e, dan' bira nacale tuzi len leyaquë'. ²⁰ Bigala'adyi'le con can' baonia' le'e: Ben' rue dyin lao xa'ne, binaquë' ben' ze ca xa'nnë'. Chi rudie yaca benë' në'di', lëzi udieyaquë' le'e. Chi bë quieyaquë' con can' baonia' bagudya'yaquë', lëzirë hue quieyaquë' con can' inale yëbilyaquë'. ²¹ Na' usacayaquë' le'e bizinaquezi, porque dan' nacale ben' quia', binubë'yaquë' ben' use'ela' në'di'.

²² 'Bibi dula' napayaquë' chi në'di' bibida' bibë'lia'yaquë' di'idza'. Pero dan' bida', bë'lia'yaquë' di'idza', lëlena' birson gata' quieyaquë', naocazi dula' xquia quieyaquë' leyaquë'. ²³ Nu yaca ben' rudie në'di', lëscan' rudierëyaquë' Xuza'. ²⁴ Bibi dula' napayaquë' chi në'di' bibia' yela' huaca quia' ladoyaquë'. Pero bablë'ëcaziyaquë' ca ta bia'. Na' biži ba'ala'cazi bablë'ëyaquë' can' babia', rudiecaziyaquë' në'di', lëscan' rudierëyaquë' Xuza'. ²⁵ Pero racan can' ta uzun di'idza' con can' zu lë'ë guichi ley ga rnën: "Rudiecaziyaquë' në'di', ba'ala'cazi bibi dula' quia' de."

²⁶ 'Caora guida ben' ise'ela' tanun quie Xuza', na' lëben' na' gacalënë' le'e huezela'adyi'në' le'e. Naca lëben' na' Bichi Be quie Xuza', ben' rnë puro di'idza' li. Huanënë' cule quia' në'di'. ²⁷ Lëzi le'e huanërële cule në'di' dan' zulële në'di' tzaže desde dza uzulaoro rdaro tuzi.

16

¹ 'Cabë' di'idza' rnia' le'e, biyeyatile dan' lëdi'idza' na' gacalën le'e ta inaole në'di'. Yaca benë' rudie në'di' ² huebioyaquë' le'e lu'u yaca idao' sinagoga. Huadyin dza gaquëyaquë' chi mandado quie Diuzi gutiyaquë' le'e. ³ Cana' hueyaquë' como dan' binubë'yaquë' Xuza', lëzi binubë'yaquë' në'di'. ⁴ Ca di'idza' ni rnia' le'e, nacan ta yeza'la'adyi'le con can' baonia' le'e caora baza' gaca quiele can' baonia'.

Ni rguixogüe'n quie Bichi Be quie Diuzi

'Biunia' le'e dza' na' ca ta rnia' le'e na'a, como dan' nezulia' le'e dza na'. ⁵ Pero baidyin hora yeya'a tzezulia' ben' use'ela' në'di'. Na' ni tule biunabale në'di' gan' yeya'a. ⁶ Pero dan' rnia' le'e ni, lena' baraqueyëchi' lu'u laxta'ole. ⁷ Pero rnia' le'e ta naca tali. Huaca huen quiele chi yeya'a, porque chi biyeya'a, biguida Bichi Be quie Diuzi ta sulënë' le'e gacalënë' le'e huezela'adyi'në' le'e. Chi yeya'a ga zu Xuza', huase'ela' Bichi Be quienë' ga zule. ⁸ Catì guida lëbë' uzioñe'enë' yaca benë' nita' lao yedyi layu ta ineziyaquë' decazi dula' xquia quieyaquë', lëzi ta ineziyaquë' re'en Diuzi tzëri laxta'oyaquë', lëzirë ta ineziyaquë' huachugobë' Diuzi quieyaquë' con can' bëyaquë'. ⁹ Dan' biraleyaquë' quia', lena' decazi dula' xquia quieyaquë'.

¹⁰ Nun quie dan' yeya'a ga zu Xuza', lena' huanezi yaca ben' nita' lao yedyi layu re'en Diuzi tzëri laxta'oyaquë'. Na' bizi le'e, itu chi'zi zulia' le'e. ¹¹ Na'ra huanezi yaca benë' nita' lao yedyi layu hue Diuzi juicio quieyaquë' con cabë' baochugobë' Diuzi quie xan' taxi'ibi', ben' rnabë' lao ben' nita' lao yedyi layu.

¹² Tazë nede ta inia' le'e, pero le'e bitzioñe'elen na'a. ¹³ Cati guida Bichi Be quie Diuzi, ben' rnë tali, lëbë' uzioñe'enë' le'e ta naca tabala quie Diuzi. Quele huananë' ta racazi la'adyi'në', den' tanun quie Diuzi inanë. Uzioñe'enë' le'e ca ta za' gaca dza zaza'ra. ¹⁴ Huenë' në'ëdi' ben' zë'. Nezinë' cabë' di'idza' rnia', uzioñe'enë' le'e cabë' nacan. ¹⁵ Yugute ca rna Xuza' nacan ta inëria' le'e. Lena' rnia' nezi Bichi Be quie Diuzi cabë' di'idza' rnia', uzioñe'enë' le'e cabë' nacan.

Ni rnën ca gaqueyëchi' yaca ben' quie Jesús tu chi'zi, te na' huedaohueyaquë'

¹⁶ Bizi gaca tu chi'zi birlë'ële në'ëdi', te na' itu chi'zi yelë'ële në'ëdi' tatula.

¹⁷ Na'ra unë yaca ben' quie Jesús rëbiyaquë' laguedyiaquë':

—¿Ca bizi naca di'idza' unë' ra'o? Unë' gaca tu chi'zi birlë'ëroguë', te na' në' itu chi'zi hualë'ëroguë' tatula. Lëzi narë' gaca quienë' cana' dan' yeyonë' gan' zu Xuzinë'. ¹⁸ ¿Ca bizi naca di'idza' unë' caora unë': "Gaca tu chi'zi"? Birioñe'ero cabë' di'idza' unë' ra'o.

¹⁹ Bizi gucabë' Jesús biuyoñe'eyaquë' ca di'idza' gudyinë' leyaquë'. Tana' unë' rëbinë' leyaquë':

—Baonëcaza' le'e gaca tu chi'zi birlë'ële në'ëdi', te na' itu chi'zi yelë'ële në'ëdi' tatula. ¿Lëdi'idza' na' biuyoñe'ele rnabale laguedyile? ²⁰ Tali ca rnia' le'e, huaqueyëchi'le huabedyile baidyin hora guti yaca benë' në'ëdi'. Na' bizi yaca benë' nita' lao yedyi layu, huedaohueyaquë' dan' gatia'. Pero ba'ala'cazi huaqueyëchi'le tu chi'zi, te na' huedaohuele bë' yelë'ële në'ëdi' tatula. ²¹ Tu nigula nu'a zi'ine, bë' idyin hora su bdao' quienë', redzagalaonë' ta su bdao' quienë'. Bizi caora baozu bdao' quienë', huala'adyi'në' ca ta babedzagalaonë', dan' lega redaohuetzeguenë' baozu zi'inë' byu. ²² Lëscana' nacarë quie le'e. Redzagalaole na'a, pero cati yeguida' dena'a le'e, lëcana' lega yedaohuele. Nitu nitu nunura uzu le'e bayëchi' tatula.

²³ Lëdza na' birabi inabale në'ëdi'. Tali ca rnia' le'e, guncazi Xuza' yugulu ca ta inabale lëñë' uzëtole laohua'. ²⁴ Desde dza na' binuzëtole laohua' bi ta rnabale Xuza'. Ulenaba con can' baonia' le'e. Cana' guncazi Xuza' le'e ca ta inabalenë' tacuenda gaca huen quiele sule dya'a.

Cristo, babënë' gan lao xan' taxi'ibi', ben' rnabë'na lao yedyi layu

²⁵ 'Di'idza' baonia' le'e nacan di'idza' canezi tzioñe'elen. Pero huadyin dza bira inia' le'e di'idza' canezi tzioñe'elen, huania' le'e di'idza' ta tzioñe'ele labezi inezile quie Xuza'. ²⁶⁻²⁷ Lëdza na' uzëtole laohua' inabale Xuza' bi ta re'enle inabalenë'. Caora na' bira inaban inaba' Xuza' gunnë' bi ta re'enle. Nedyë'ëcazi Xuza' le'e. Nedyë'ënë' le'e porque dan' nedyë'ële në'ëdi', ralele dan' nia' uza' ga zu Xuza'. ²⁸ Tali na' uza' ga zu Xuza' bida' lao yedyi layu. Pero na' abdyin hora huez'a lao yedyi layu, yeya'a ga zu Xuza' tatula.

²⁹ Caora na' una yaca ben' quienë' rëbiyaquë' lëbë':

—Na'ra rnëlo' di'idza' ta tzioñe'endo' labezi, quele di'idza' canezi tzioñe'endo'. ³⁰ Na'ra banezindo' luë' nezo' quie lao yugulute. Nica inabando' luë' banezo' bi ta inabando' luë'. Quie lena' banezindo' de que luë' naco' ben' uza' ga zu Diuzi.

³¹ Bizi una Jesús rëbinë' leyaquë':

—¿Na'ra banezile? ³² Bagazi idyin hora yedzatzale tziole quie quiele uca'nle në'ëdi' tuza'. Pero bizucaza' tuza' dan' zucazi Xuza' len në'ëdi'. ³³ Ca di'idza' baonia' le'e nacan ta cuëchin chizi lu'u guicho laxta'ole, lëscan' ta

sudyi'ilëcazile në'ëdi'. Yedzagalaole lao yedyi layu niga, pero bidzebile como dan' babia' gan lao xan' taxi'ibi', ben' rnabë'na lao yedyi layu.

17

Jesús bë'lënë' Xuzinë' di'idza' por yaca ben' quienë'

¹ Ude beyudyi una Jesús cana', pchisa laohuë' una'në' zan guibá unë':

—Xuza', abdyin hora quia'. Huelo' në'ëdi' zi'ilo' ben' ze con ca rua' luë' ben' ze. ² Në'ëdi', zi'ilo', bapca'nlo' lao na'a yela' rnabë' quio' ta inabi'a lao yugulu benë'. Cana' hua'a yaca ben' pca'nlo' lao na'a yela' neban tuzioli. ³ Decazi yela' neban quieyaquë' tuzioli tanun quie dan' nubë'yaquë' luë' tuzo' naco' Diuzi. Lëzirë nubë'rëyaquë' në'ëdi', Jesucristo, ben' use'elo'.

⁴ 'Babia' luë' ben' ze lao yedyi layu niga. Babzua' di'idza' quio', babia' ca ta use'elo' në'ëdi' hua'. ⁵ Xuza', huelo' në'ëdi' ben' ze caora yeguida' tatula gan' zulo' cabë' bao' dza na', bao' në'ëdi' ben' ze tu binecue' yedyi layu.

⁶ 'Ca yaca ben' uliolo' lado yaca ben' nita' lao yedyi layu, babzioñe'ena'yaquë' ca naco'. Nacayaquë' ben' quio'. Lëleyaquë' pca'nlo' lao na'a, baraleyaquë' di'idza' quio'. ⁷ Baneziyaquë' lao na'alo' za' yugulute ta pca'nlo' lao na'a. ⁸ Ca naca di'idza' pca'nlo' lao na'a, barue quieyaquë'n. Baneziyaquë' tali uza' ga zulo', baraleyaquë' de que luë' use'elo' në'ëdi'.

⁹ 'Rnaba' cule laolo' por yaca ben' pca'nlo' lao na'a, dan' nacayaquë' ben' quio'. Cala rnaba' por yaca ben' nita' lao yedyi layu. ¹⁰ Yugulu yaca ben' quia', nacarëyaquë' ben' quio'. Lëzirë yugulu yaca ben' quio', nacarëyaquë' ben' quia'. Lëleyaquë' rueyaquë' në'ëdi' ben' ze.

¹¹ 'Ca naca në'ëdi', bira sua' lao yedyi layu niga. Pero leyaquë' nezuyaquë' lao yedyi layu ni. Biži në'ëdi' hueguida' gan' zulo'. Xuza', ben' la'ia naco', conlë yela' huaca quio' gacalao' yaca ben' pca'nlo' lao na'a tacuenda gacayaquë' tuzi pensari cabë' nacalia' luë' tuzi pensari. ¹² Udapacha'a yaca ben' pca'nlo' lao na'a dza uzulia' leyaquë' lao yedyi layu niga. Conlë yela' huaca quio' pcuasa pcui'oga'yaquë', nituyaquë' biuniti. Tuzi ben' uniti unitinë' tacuenda uzun di'idza' ca rnan lë'ë guichi la'ia quio'.

¹³ 'Na'ra hueguida' gan' zulo'. Pero tu raca nezua' lao yedyi layu niga, rnia' luë' di'idza' tacuenda yedaohueyaquë' ca redaohueda'. ¹⁴ Bapca'na' di'idza' quio' lao na'ayaquë'. Rudie yaca ben' nita' lao yedyi layu leyaquë', dan' bizulëyaquë' leyaquë' tuzi. Nacayaquë' ca në'ëdi', bizulia' yaca ben' nita' lao yedyi layu tuzi. ¹⁵ Cala rnaba' ta cuiolo'yaquë' lao yedyi layu, rnaba' ta ucuasa ucu'i'olo'yaquë' ca ta re'en xan' taxi'ibi' huenan quieyaquë'.

¹⁶ Ca naca në'ëdi', bizulia' yaca ben' nita' lao yedyi layu tuzi, lëzi cana' nacarë quieyaquë', bizulëryaquë' yaca ben' nita' lao yedyi layu tuzi.

¹⁷ Udze'lo'yaquë' lao na'alo'. Uzioñe'elo'yaquë' ca naca tabala quio'. Naca di'idza' quio' di'idza' li. ¹⁸ Como luë' baose'elo' në'ëdi' bida' lado yaca ben' nita' lao yedyi layu, lëzirë cana' në'ëdi' ise'ela'yaquë' lado yaca ben' nita' lao yedyi layu. ¹⁹ Por nun quieyaquë' babdyia' cuina' lao na'alo' cuenda udze'lo'yaquë' lao na'alo' ineziyaquë' ca naca tabala quio'.

²⁰ 'Cala por tuzi leyaquë' rnaba' cule, lëscan' rnaba' cule por yaca ben' zagalera quia' ga tzioyaquë' tzetixogue'yaquë' di'idza' quio'. ²¹ Rnaba' cule laolo' gacalao'yaquë' ta inita'yaquë' tuzi tzu'ulëyaquë' ra'o tzaže ca nacalao' në'ëdi', ca nacalia' luë'. Cana' re'enda' Xuza', re'enda' inita'yaquë' tuzi tacuenda inezi yaca ben' nita' lao yedyi layu de que luë' use'elo' në'ëdi'. ²² Baoyu'ulia' leyaquë' tuzi ca naca luë' zulao' në'ëdi' tuzi tacuenda tzu'uyaquë' tuzi pensari cabë' rue ra'o, yu'uro tuzi pensari. ²³ Tuzi nacalia' leyaquë', lëscan' tuzi naco' len në'ëdi'. Lëcana' gacarëyaquë' tuzi, inezi yaca

ben' nita' lao yedyi layu de que luë' use'elo' në'ëdi', nedyë'ëlo'yaquë' cabë' nedyë'ëlo' në'ëdi'.

²⁴ Xuza', ca yaca ben' pca'nlo' lao na'a, re'enda' sulëyaquë' në'ëdi' gan' tze-sua' tacuenda ilë'ëyaquë' yela' huaca quia' benlo' në'ëdi' nun quie nedyë'ëlo' në'ëdi' desde binecuet' lao yedyi layu. ²⁵ Xuza', ben' la'iya naco'. Ca naca yaca ben' nita' lao yedyi layu, binubë'yaquë' luë', pero në'ëdi' sí, nubë'da' luë'. Ca naca yaca ben' quia', ben' nita'lë' në'ëdi' niga, baneziyaquë' luë' use'elo' në'ëdi'. ²⁶ Babzioñe'ena' leyaquë' ca naco'. Neruzioñe'era'yaquë' mazara ca naco' tacuenda idyë'ëyaquë' tu ituyaquë' ca nedyë'ëlo' në'ëdi', gacalëyaquë' në'ëdi' tuze.

18

Bdyin yaca benë' ta guxuyaquë' Jesús

(Mt. 26.47-56; Mr. 14.43-50; Lc. 22.47-53)

¹ Ude beyudyi unë Jesús cana', uza'në' ziolënë' yaca ben' quienë' tzala' yao Cedrón. Lëgan' na' dyiatzegue yaga gan' bega'nlnë' yaca ben' quienë'. ² Lëzi Judas, ben' usedyin lëbë' lao na'a yaca ben' guti lëbë', nubë'rënë' gan', dan' riozi rio Jesús lënë' yaca ben' quienë' gan'. ³ Cana' guca uyo Judas yexi'në' yaca soldado len yaca ben' naca xaga idao', yaca ben' use'ela' yaca xan' pxuzi, len yaca ben' partido fariseo. Nu'ayaquë' espada, nu'ayaquë' lámpara, nu'ayaquë' yëri yaga, bdyinyaquë' gan' zë Jesús. ⁴ Como Jesús nezinë' bin' gaca quienë', na'ra bronë' gan' nita'lënë' yaca ben' quienë', unë' rëbinë' yaca ben' bdyin guxu lëbë':

—¿Nuži ben' reguilole?

⁵ Na'ra unayaquë' rëbiyaquë' lëbë':

—Reguilondo' Jesús, ben' yedyi Nazaret.

Biži Jesús unë' rëbinë' leyaquë':

—Në'ëdi' ben' reguilole.

Lëzi zërë Judas lënë' yaca ben' bdyin guxu Jesús. ⁶ Na' una Jesús rëbinë' leyaquë': “Në'ëdi' ben' reguilole”, na'tera guca bebiga'yaquë' guzu xcu'udzula, bgu'unyaquë' layu. ⁷ Biži unë Jesús tatula rëbinë' leyaquë':

—¿Nuži ben' reguilole?

Na'ra unayaquë' rëbiyaquë' lëbë':

—Reguilondo' Jesús, ben' yedyi Nazaret.

⁸ Biži una Jesús rëbinë' leyaquë':

—Baonëcaza' le'e në'ëdi' ben' reguilole. Chi reguilole tuza' në'ëdi', ulesan yaca ben' niga yeyoyaquë'.

⁹ Una Jesús can' ta uzun di'idza' ca unë' rëbinë' Xuzinë' dza na': “Yaca ben' pca'nlo' lao na'a, nituyaquë' biuniti.” ¹⁰ Cana' guca ulio Simón Pedro espada nu'anë' udinë'n uchuguë' naga yebë ben' lao Malco, ben' zulao xan' pxuzi.

¹¹ Biži una Jesús rëbinë' Pedro:

—Bedze' espada quio' lu'u lidyin. ¿Cala binenezo' decazide yedzagalaohua' ca ta banugun Xuza' quia'?

Besedyinyaquë' Jesús lao pxuzi rnabë'ra

(Mt. 26.57-58; Mr. 14.53-54; Lc. 22.54)

¹² Na' biži yaca soldado, len comandante quieyaquë', len yaca xaga idao', bëxuyaquë' Jesús pquioyaquë' lëbë' bëyaquë' lëbë' preso. ¹³ Na'ra uquie'yaquë' lëbë' žan yu'u quie Anás, ben' naca ben' gula quie Caifás. Lëiza na' naca Caifás pxuzi rnabë'ra. ¹⁴ LëCaifás naquë' ben' una dza na'la: “Nacalan huenla gati

tuzi benë' lao laza yaca ben' yedyi, cala ca ta gati yuguluro." Cana' unë' dza na'la.

Una Pedro binaquë' ben' quie Jesús
(Mt. 26.69-70; Mr. 14.66-68; Lc. 22.55-57)

¹⁵ Na' Simón Pedro len itu ben' quie Jesús, unaoyaquë' yaca ben' nequië' Jesús. Bizi lëben' quie Jesús nubë'në' ben' naca xan' pxuzi r nabë'ra, lena' uyu'ulënë' Jesús lali'a quie yu'u quie xan' pxuzi. ¹⁶ Bizi Pedro bega'nnë' ru'a yu'u quie lali'a. Na'ra lëben' quie Jesús, ben' nubë' pxuzi r nabë'ra, broguë' ru'a yu'u, bë'lënë' nigula di'idza', nigula rapa ru'a yu'u, ta bdze'në' Pedro lu'u lali'a. ¹⁷ Na'ra una nigula na' rëbinë' Pedro:

—¿Cala nacarao' ben' quienë'?

Na'ra una Pedro rëbinë' nigula:

—Binaca' ben' quienë'.

¹⁸ Bizi yaca ben' zulao xan' pxuzi len yaca xaga idao', ulëchiyaquë' gui' lali'a como dan' ruen zaga. Unita'yaquë' ru'a gui' ta yedze'eyaquë'. Lëzirë Pedro uzërënë' len leyaquë' tzaže ru'a gui'.

Ben' naca pxuzi r nabë'ra pquëpinë' Jesús
(Mt. 26.59-66; Mr. 14.55-64; Lc. 22.66-71)

¹⁹ Bizi ben' naca pxuzi r nabë'ra, unabë' Jesús nu ben' naca yaca ben' quienë', lëzi unabë' bidan' rsëdinë' yaca benë'. ²⁰ Na'ra una Jesús rëbinë' lëbë': —Bizi në'ëdi' zaquë'lao yaca benë' unia' rusëdia'yaquë'. Lu'u idao' sinagoga, lëzi lu'u idao' r nabë'ra gan' regu'udi' yugulu ben' Israel, lëgan' na' rsëdia'yaquë'. Bipsëdia'yaquë' balarazi. ²¹ ¿Bixquien' rnabo' në'ëdi' bidan' rsëdia'? Unabacara yaca ben' babe cabë' baonia'. Leyaquë' huanayaquë' ca di'idza' unia'. Baneziyaquë' ca di'idza' gudya'yaquë'.

²² Ude beyudyi una Jesús can', bizi udapa tu ben' xaga idao' ru'a Jesús, unë' rëbinë' lëbë':

—¿Bixquien' rëbo' pxuzi r nabë'ra cana'?

²³ Bizi una Jesús rëbinë' lëbë':

—Chi birnia' di'idza' li, unacara bi di'idza' binacan di'idza' li. Pero chi rnia' di'idza' li, ¿bixquien' udapo' ru'a?

²⁴ Na'ra bë Anás mandado uquië'yaquë' Jesús anerioguë' lao Caifás, ben' nacarë pxuzi r nabë'ra.

Tatula una Pedro binaquë' ben' quie Jesús
(Mt. 26.71-75; Mr. 14.66-72; Lc. 22.58-62)

²⁵ Tu neraca quie Jesús can', bizi Pedro nezënë' ru'a gui' ta yedze'enë'. Na'ra unaba yaca ben' nita' gan' zënë':

—¿Cala nacarao' luë' ben' quie Jesús?

Na' bizi Pedro unë' rëbinë' leyaquë':

—Binaca' ben' quienë'.

²⁶ Na'ra unë' tu ben' zulao xan' pxuzi, ben' naca familia quie ben' uchugu Pedro nague, rëbinë' Pedro:

—¿Cala blë'ëda' luë' zëla' Jesús gan' dyia yaga?

²⁷ Na'ra una Pedro rëbinë' leyaquë':

—Cala në'ëdi'.

Ca beyudyi unë' cana', laoredyite biu tu.

Psedyinyaquë' Jesús lao na'a Pilato
(Mt. 27.1-2, 11-14; Mr. 15.1-5; Lc. 23.1-5)

²⁸ Na'ra uquië'yaquë' Jesús lidyí Caifás zioyaquë' ga zu palacio ga re' gobierno quieyaquë', na' baza' reni'. Bizi yaca ben' Israel, biuyu'uyaquë'

lu'u palacio, dan' binaca ben' naca gobernador ben' Israel. Según naca costumbre quieyaquë', raqueyaquë' bineyëriyaquë' lao Diuzi chi tzu'uyaquë' lu'u lidyí ben' binaca ben' Israel. Nica gacazi gaoyaquë' quie lani pascua len ben' binaca ben' Israel. ²⁹ Tana' lena' bro Pilato lu'u palacio, zionë' ga nita' yaca benë', unë' rëbinë' leyaquë':

—¿Cabizi bë ben' niga, na' raolenë' xquia?

³⁰ Na'ra unayaquë' rëbiyaquë' lëbë':

—Chan' binaquë' ben' rue xquia, bidehua'ando'në' niga.

³¹ Na'ra una Pilato rëbinë' leyaquë':

—Ulequië' ben' niga, ichugobë'le ca rna ley quiele le'e.

Na' biži una yaca ben' Israel rëbiyaquë' Pilato:

—Binapando' derecho gutindo' yaca benë'.

³² Cana' bzun di'idza' ca unë Jesús gaca quienë' gatinë'. ³³ Na'ra Pilato beyu'unë' lu'u palacio gužinë' Jesús unë' rëbinë' lëbë':

—¿Naco' rey quie ben' Israel?

³⁴ Biži una Jesús rëbinë' lëbë':

—¿Ta racazi quio' rnabo' në'ëdi', o chi ta relo' ca rna yaca benë'?

³⁵ Na'ra una Pilato rëbinë' lëbë':

—¿Bixquien' raquelo' nacaria' ben' Israel? Yaca ben' yedyi quio', len yaca xan' pxuzi, leyaquë' psedyinyaquë' luë' gan' ni. ¿Cabizi bao'?

³⁶ Biži una Jesús rëbinë' lëbë':

—Naca' ben' rnabë', pero cala quie lao yedyi layu niga. Chan' naca' ben' rnabë' quie lao yedyi layu niga, huadila yaca ben' nao në'ëdi' len yaca ben' rudie në'ëdi' ta biusedyinyaquë' në'ëdi' lao na'a yaca ben' re'en guti në'ëdi'. Quie lena' rnia' binaca' ben' rnabë' quie lao yedyi layu niga.

³⁷ Na'ra una Pilato rëbinë' Jesús:

—¿Bi ca nao'? ¿Nacacazo' rey?

Biži Jesús unë' rëbinë' lëbë':

—Nacacaza' rey con can' baonao'. Para lena' bida' gologa' lao yedyi layu ta quixogui'a yaca benë' ta naca tabala. Nu yaca ben' nao tabala rzënegacaziyaquë' ca rnia'.

³⁸ Na'ra una Pilato rëbinë' lëbë':

—¿Ca bidan' naca tabala?

Apsaqueyaquë' ca gutiyaquë' Jesús

(Mt. 27.15-31; Mr. 15.6-20; Lc. 23.13-25)

Ude beyudyi pqüepi Pilato Jesús, bero Pilato tatula lu'u palacio zionë' ga nita' yaca ben' Israel unë' rëbinë' leyaquë':

—Në'ëdi' rnia' le'e, nitu xquia binehue ben' niga. ³⁹ Cabë' le'e, de tu costumbre quiele yebioga' tu ben' de lu'u dyiguiba ca ra'ala' lani pascua. ¿Biži ca nale? ¿Re'enle yebioga' ben' naca rey quiele?

⁴⁰ Na'ra urediyi'yaquë' unëyaquë' zidzo rëbiyaquë' Pilato:

—Biyebiolo' ben' na'. Bebio Barrabás.

Cana' unayaquë' rëbiyaquë' Pilato.

Na' biži Barrabás naquë' tu ben' uban.

19

¹ Caora na' bë Pilato mandado udi yaca soldado Jesús guidi. ² Lëscan' bzu yaca soldado tu coron dyia yëchi' guicho Jesús, bgacoyaquë' lëbë' tu la'ari' zna chula, ³ uzëyaquë' zaquë'lao Jesús unayaquë' rëbiyaquë' lëbë':

—¡Viva rey quie yaca ben' Israel!

Caora na' udiyaquë' begoro xtalaonë'.

⁴ Na'ra bro Pilato tatula lu'u palacio unë' rëbinë' yaca ben' Israel:

—Ulena'cara, bequi'a ben' ni sënë' laole ta inezile bibi nitu xquia bine-huenë'.

⁵ Bizi ulioyaquë' Jesús lu'u palacio, nezu coron yëchi' guichonë', nena-corënë' la'ari' zna chula. Na'ra una Pilato rëbinë' leyaquë':

—Ulena'cara bazë ben' ni.

⁶ Ca blë'ë yaca xan' pxuzi len yaca ben' xaga idao' Jesús, na'tera ure-diya'yaquë' unëyaquë' zidzo:

—¡Uleda' ben' na' lë'ë yaga cruzo! ¡Uleda' ben' na' lë'ë yaga cruzo!

Bizi unë Pilato rëbinë' leyaquë':

—Ulequië'në' le'e, uleda'në' le'e lë'ë yaga cruzo. Në'ëdi' nia' nitu xquia bibi nhenüë'.

⁷ Na'ra una yaca ben' Israel rëbiyaquë' Pilato:

—Nëto' de tu ley quiendo'. Según ca rna ley quiendo', reya'ala' gati ben' niga, dan' në' naquë' zi'i Diuzi.

⁸ Ca be Pilato can' unayaquë', caora na' bdzebinë' mazara. ⁹ Beyu'u Pilato lu'u palacio tatula pqüëpinë' Jesús:

—¿Gaži zao' luë'?

Pero Jesús uzënë' chizi, bibequëbinë'.

¹⁰ Na'ra una Pilato rëbinë' lëbë':

—¿Bixquien' birudyi'ilo' di'idza'? ¿Binezo' në'ëdi' de yela' rna'bë' quia' hua' mandado uda'yaquë' luë' lë'ë yaga cruzo, o chi usana' luë', hua' luë' libre?

¹¹ Bizi una Jesús rëbinë' lëbë':

—Bibi yela' rna'bë' quio' luë' de ta ichugubao' quia' chan' Diuzi chi bibënnë'n luë'. Tana' lena' nacara xquia quie ben' psedyin në'ëdi' laolo', cala ca luë'.

¹² Lëhora na' beguilola'adyi' Pilato ta usannë' Jesús, huenë' lëbë' libre. Pero bizi yaca ben' Israel urediya'yaquë' unayaquë' zidzo:

—Chi usanlo'në' huu'në' libre, binaco' amigo quie rey César, ben' rna'bë'ra ra'o. Nu ben' ina naquë' rey, lëben' na' naquë' enemigo quie rey César.

¹³ Bizi cati be Pilato bi una yaca benë', na' bënë' mandado bro Jesús lu'u palacio. Ude na' bebe' Pilato xlatonë' ga rchugobë'në' quie yaca benë'. Lëlugar na' nezi'laona di'idza' hebreo Gabata, ta inaro xti'idza'ro: Layu ga yu'u yo laga'. ¹⁴ Mero la'odza, dza iteyu ga'ala' lani pascua, una Pilato rëbinë' yaca ben' Israel:

—¡Ni bazë rey quiele!

¹⁵ Bizi na' urediya'yaquë' unëyaquë' zidzo:

—¡Gatigaranë', gatigaranë'! ¡Uleda' ben' na' lë'ë yaga cruzo!

Na'ra una Pilato rëbinë' leyaquë':

—¿Bixquien' re'enle uda'ndo' rey quiele lë'ë yaga cruzo?

Pero bizi yaca xan' pxuzi, unayaquë' rëbiyaquë' Pilato:

—Tuzi César naquë' rey quiero. Nunura ben' tula zu naca rey quiero.

¹⁶ Ude na' psedyin Pilato Jesús lao na'ayaquë' ta uda'yaquë' lëbë' lë'ë yaga cruzo, na' uquië'yaquë' lëbë'.

Ni ru'en di'idza' ca guca bda'yaquë' Jesús lë'ë yaga cruzo

(Mt. 27.32-44; Mr. 15.21-32; Lc. 23.26-43)

¹⁷ Lëcana' guca ziolëyaquë' Jesús banu'anë' tuzë' yaga cruzo, bdyinyaquë' gan' nezi'laona di'idza' hebreo Gólgota, ta inaro xti'idza'ro: Chita guicho ben' huati. ¹⁸ Lëgan' na' bda'yaquë' Jesús lë'ë yaga cruzo. Bda'yaquë' ichopa benë' tzala' huio cuëta lë'ë Jesús. ¹⁹ Bë Pilato mandado bdyiayaquë' letra guicho cruzo rnën cani: "Jesús, ben' yedyi Nazaret, ben' naca rey quie yaca ben' Israel." ²⁰ Na'ra yaca ben' zë, yaca ben' Israel blabayaquë' letra, dan' nacan

ga'ala' ga re' ciudad Jerusalén. Lao tzona cue' di'idza' bdyiayaquë' letra. Bdyiayaquë' letra hebreo, len letra griego, len letra latín. ²¹ Tana' lena' una yaca ben' xan' pxuzi rèbiyaquë' Pilato:

—Biudyiale letra rnën “Ben' naca rey quie yaca ben' Israel.” Mejorla udyiale letra inën “Ben' una naca' rey quie yaca ben' Israel.”

²² Na'ra una Pilato rëbinë' leyaquë':

—Ca letra babdyia', yega'nnan cana'.

²³ Ude beyudyi uda' yaca soldado Jesús lë'ë yaga cruzo, uzi'yaquë' zabanë' bë'yaquë' laze lao tapayaquë'. Uzi'rëyaquë' capa quienë'. Nacan de tu dibazi, binacan de chopa yo'o. ²⁴ Dan' nacan de tu dibazi, lena' una yaca soldado:

—Bichezaron. Mejorla huero tu suerte ta ineziro nularo gaca quie len.

Cana' guca bzun di'idza' ca rnën lë'ë guichi quie Diuzi ga rnan: “Bë'yaquë' laze žaba', uzi'yaquë'n. Bëyaquë' suerte quien.” Cana' bë yaca soldado.

²⁵ Bago ga zu cruzo ga da' Jesús, lëgan' na' zë žnë'ë, len žila žnë'ë, len María žgula Cleofas, lërë María Magdalena. ²⁶ Na'ra blë'ë Jesús zë žnë'ë bago len tu ben' quienë', ben' nedyë'ënë'. Na' nacan' unë' rëbinë' žnë'ë:

—Žna'a, na' zë ži'ilo'.

²⁷ Lëzirë unërënë' ben' quienë':

—Na' zë žna'lo'.

Cana' guca bequië' ben' quienë' žnë'ë žan yu'u quië'.

Ca guca cati guti Jesús

(Mt. 27.45-56; Mr. 15.33-41; Lc. 23.44-49)

²⁸ Biži banezi Jesús babzunë' yugulute di'idza' ca gu'un Xuzinë' Diuzi. Na'ra tacuenda zuran di'idza' ca rnën lë'ë guichi quie Diuzi, lena' unë':

—Barbilida'.

²⁹ Lëgan' na' zu tu yeso' yudzo vino banacan zi. Uzi'yaquë' tu ta naca yun' rzupi' vino, bzuyaquë'n lao yaga, bla'oyaquë'n vino banacan zi. Ude na' bzuyaquë'n ru'a Jesús. ³⁰ Biži caora bzuyaquë'n ru'a Jesús uzupinë'n, caora na' unë':

—Babeyudyite bzun di'idza'.

Ca beyudyi unë' cana', bzëta' guichonë' gutinë'.

Tu soldado udyibë' lanza ru'achu'u Jesús

³¹ Biži dza na' nacan dza iteyu ga'ala' lani pascua. Lena' bigu'un yaca ben' Israel yega'n benë' lë'ë yaga cruzo, dan' dza iteyu ga'ala' lani, nacan dza že quie lani. Tana' lena' unabayaquë' tu cule lao Pilato chi bihuenë' mandado ta quitzu yaca soldado chita ni'a yaca ben' da' lë'ë yaga cruzo, na' yegubayaquë' leyaquë' gan' da'yaquë'. ³² Cana' uyo yaca soldado uditzuyaquë' chita ni'a yaca ben' uda' lë'ë yaga cruzo cuëta lë'ë Jesús. ³³ Ca bdyinyaquë' cuëta lë'ë Jesús, blë'ëyaquë' bagutinë'. Tana' lena' bira uditzuyaquë' chita ni'anë'.

³⁴ Pero tu soldado udyibinë' lanza ru'achu'u Jesús. Caora na' blato ren len nisa gan' udyibi soldado lanza. ³⁵ Në'tëdi', Juan, blë'ëda' can' bëyaquë' quienë'. Naca' testigo cabë' blë'ëda'. Nacan tabala cabë' rnia' quienë' tacuenda galele quienë' inaole xnezë'. ³⁶ Tana' lena' guca quienë' ta bzun di'idza' con ca rnan lë'ë guichi quie Diuzi gan' rnan: “Biquitzuyaquë' ni tu chita quienë'.” ³⁷ Lëzi žurë itu di'idza' lë'ë guichi la'iya quie Diuzi ga rnan: “Hualë'ë yaca ben' bdyibi lanza ru'achu'uhue lëbë'.”

Ca guca cati pcachi'yaquë' Jesús

(Mt. 27.57-61; Mr. 15.42-47; Lc. 23.50-56)

³⁸ Ude beyudyi guca can', unaba tu ben' lao José, ben' yedyi Arimatea, chi bihue' Pilato lato ta yeyu'anë' cuerpo quie Jesús. Naca José ben' unao

Jesús, pero negachi'zi, dan' rdzebinè' quie yaca ben' r nabè'. Na' bizi Pilato bè'nè' lato uyo José ta beyu'anè' cuerpo quie Jesús. ³⁹ Lëzirè bdyin Nicodemo, ben' uyo rtze' yegue'lè Jesús di'idza' dza na'la. Bdyinnè' nu'è galobechi kilo aceite mirra nequixin itu ta lao áloes ta rla'n zixi zeo. ⁴⁰ Caora na' bezi'yaquè' cuerpo quie Jesús, ptubiyaquè' lèbè' la'ari' ta la'o aceite rla' zixi zeo, según ca naca costumbre quie yaca ben' Israel rcachi'yaquè' ben' huati. ⁴¹ Bizi ga'ala' gan' bda'yaquè' Jesús lè'è yaga cruzo, lègan' na' de tu lao lato ga dyia yaca yaga. Bizi lao lato na', zu tu yo beló cubi ga nitu yaca ben' huati binecachi'yaquè' gan'. ⁴² Bizi lu'u beló cubi na', pcachi'yaquè' Jesús dan' zun ga'ala' baruen bago dza huezila'adyi'.

20

Ca guca cati beban Jesús

(Mt. 28.1-10; Mr. 16.1-8; Lc. 24.1-12)

¹ Bizi bala dza domingo nerna' chula, uzi' María Magdalena zionè' gan' zu beló yo gan' pcachi'yaquè' Jesús. Na'ra blè'è'nè' bira da' yo laga'ta bda'yaquè' ru'a beló yo gan' pcachi'yaquè' Jesús. ² Caora na' taria za' María ga zua' nè'èdi', ben' Jesús nedyè'è, zèlia' Simón Pedro, ta unè' nètò unè':

—Babi'ayaquè' cuerpo quie Señor quiero. Bineziro ga yehua'ayaquè' lèbè'.

³ Na'ra uza'lia' Pedro ziondo' yena'ndo' gan' pcachi'yaquè' lèbè'. ⁴ Brondo' rupando' ziondo' tzaže. Bizi nè'èdi' udyialaora' bdyinneza' gan' ca Pedro.

⁵ Bizi byèchoga' blè'èda' gan' re' la'ari' ptubiyaquè' lèbè', pero biuyu'a lu'u beló. ⁶ Bizi ca bla' Simón Pedro, uyu'unè' lu'u beló yo, blè'èrènè' re' la'ari' ptubiyaquè' lèbè' gan'. ⁷ Lëzirè blè'èrènè' re' squiela la'ari' bdze'yaquè' guichonè'. Blè'è'nè' nedubin, bire'n tuzi len la'ari' ptubiyaquè' lèbè'. ⁸ Na'ra uyu'uria' nè'èdi' lu'u beló, blè'èda' can' naca re' yaca la'ari', guleda' tabala beban Jesús. ⁹ Bizi binegalendo' ca rnan lè'è guichi la'ia quie Diuzi gan' rnan de que ba'ala'cazi gati Jesús, huebancazinè'. ¹⁰ Na'ra bezi'ndo' zeyondo' zan yu'u quiendo'.

Ca guca ptilalao Jesús María Magdalena

(Mr. 16.9-11)

¹¹ Bizi bega'n María rbedyinè' zènè' ru'a beló yo. Du rbedyinè' bzèta' guichonè' rnè'è lu'u beló. ¹² Na'ra blè'è'nè' chopa ángel nacoyaquè' la'ari' bezèri. Re'yaquè' gan' uduxuyaquè' cuerpo quie Jesús, tunè' zaquè' xquichonè', ituè' zaquè' znì'anè'. ¹³ Na'ra una yaca ángel rèbiyaquè' María:

—Nígula, ¿bixquien' rbedyo'?

Na'ra bequëbinè' rëbinè' leyaquè':

—Dan' babi'ayaquè' Señor quiendo' gan' yehua'ayaquè' lèbè'.

¹⁴ Tu beyudyizi unè' can', cati beyèchoguè' rnè'è Jesús na' zè gan'. Pero bibezaquenè' chi Jesús na'. ¹⁵ Caora na' una Jesús rëbinè' lèbè':

—Nígula, ¿bixquien' rbedyo'? ¿Nuži reguilolo'?

Bizi María raquenè' chi ben' rapa gan' dyia yaca yaga. Na'ra unè' rëbinè' lèbè':

—Señor, chi luè' bi'alo' cuerpo, una nè'èdi' gan' yehua'alo'nè' ta cuenda tza'tzezi'anè' yeyu'anè'.

¹⁶ Na'ra una Jesús rëbinè' lèbè':

—¡María!

Na' bizi lèbè', beyalè' unè' rëbinè' Jesús di'idza' hebreo:

—¡Raboni! —ta inaro xti'idza'ro: Maestro.

¹⁷ Na' una Jesús rëbinè' lèbè':

—Biuda'lo' nao' në'èdi', dan' bineya'a guibá gan' zu Xuza'. Ta re'enda' inia' luè', beyo gan' nita' yaca ben' bicha', ben' rnao në'èdi', yèbo'yaquè' në'èdi' hueya'a guibá ga zu Xuziro, ben' naca Diuzi quiero.

¹⁸ Bizi María Magdalena uyonè' yetixogue'nè' yaca ben' quie Jesús de que bablè'èné' Señor quiero. Unè' udixogue'nè' leyaquè' ca di'idza' gudiy Jesús lèbè'.

Ca guca cati ptilalao Jesús yaca ben' quienè'

(Mt. 28.16-20; Mr. 16.14-18; Lc. 24.36-49)

¹⁹ Lédza na', dza domingo rtze', begu'udi' yaca ben' quie Jesús tu lu'u yu'u neyeyo, dan' rdzebiyaquè' quie yaca ben' rnabè'. Bizi uyu'u Jesús yatilalaohuè' leyaquè' unè' rëbinè' leyaquè':

—Cue' chizi lu'u laxta'ole.

²⁰ Ude beyudiyi unè' can', blu'enè' yaca ben' na' na'anè' len ru'achu'unnè'. Lega redaohueyaquè' blè'èyaquè' lèbè'. ²¹ Na'ra una Jesús tatula rëbinè' leyaquè':

—Cue' chizi lu'u laxta'ole. Cabè' baose'ela' Xuza' në'èdi' babzua' di'idza' quienè', lècana' në'èdi' ise'ela' le'e ta uzule di'idza' quia'.

²² Na'ra blubè' laoyaquè', unè' rëbinè' leyaquè':

—Tzu'u lu'u laxta'ole Bichi Be quie Diuzi. ²³ Nu yaca ben' bè xquia yezi'zele quie, bira nao xquia quieyaquè' leyaquè' babežinan. Lèzirè nu yaca ben' biyezi'zele quie, naocazi xquia quieyaquè' leyaquè' bibežinan.

Ca guca cati blè'è Tomás beban Jesús

²⁴ Na' Tomás, nacarènè' ben' quie Jesús lao chipchopayaquè', naquè' ben' uxubayaquè' laohue ben' guidi', na' biuzunè' caora uyo Jesús tanèro yena'nè' yaca ben' quienè'. ²⁵ Lèlena' yaca ben' laguediyinè', yaca ben' quie Jesús, unayaquè' rëbiyaquè' lèbè':

—Bablè'èndo' Señor quiero.

Na'ra una Tomás rëbinè' leyaquè':

—Bigaleda' babebannè' chi biilè'èda' na'anè' gan' guca hue', na' uquia' zbia' gan' udiyaquè' bdido, lèscan' uquia' taca' ru'achu'unnè' gan' udy-ibiyaquè' lanza.

²⁶ Guca lao xuna dza, cati begu'udi' yaca ben' quie Jesús tu lu'u yu'u tatula. Na' zurè Tomás len leyaquè'. Ba'ala'cazi neyeyo ru'a yu'u, uyu'u Jesús lu'u yu'u yasènè' gatzo la'o gan' nita'yaquè'. Unè' rëbinè' leyaquè' tatula:

—Cue' chizi lu'u laxta'ole.

²⁷ Na'ra unè' rëbinè' Tomás:

—Una' lu'u taca', na' pqui zbelo' ni. Lèscan' bli na'alo', pqui taco' lu'u ru'achu'a. Bira gaco' ben' birale, pero gule babebana'.

²⁸ Na'ra una Tomás rëbinè' lèbè':

—Naco' Señor quia', naco' Diuzi quia'.

²⁹ Bizi una Jesús rëbinè' lèbè':

—Tomás, dan' bablè'èlo' në'èdi', quie lena' bagulelo'. Yedaohuecazi yaca ben' rale quia', ba'ala'cazi binelè'èyaquè' në'èdi'.

Unè Juan bixquien' bzunè' di'idza' ni lè'è guichi

³⁰ Bèra Jesús yela' huaca tula lao yaca ben' quienè', pero birguixogue'n lè'è guichi ni yugulu yela' huaca bènè'. ³¹ Babzua' di'idza' ni lè'è guichi ta rguixogue'n ca bè Jesús tacuenda galele quienè' naquè' Cristo, ži'i Diuzi, na' gata' yela' neban tuzioli quiele.

21

Ca guca cati ptilalao Jesús lao gadyi yaca ben' quienë' tatula

¹ Ude beyudyi bē Jesús can', ptilalao huë' tatula yaca ben' quienë' ru'a lagun Tiberias. Ni ru'en di'idza' ca bē Jesús ptilalaonë' yaca ben' quienë'. ² Lēdza na' uzē Simón Pedro tzaže len Tomás, ben' nexubayaquë' laohue ben' guidi', len Natanael, ben' yedyi Caná quie estado Galilea, len yaca ži'i Zebedeo, len ichopa yaca ben' quie Jesús. ³ Biži una Simón Pedro rëbinë' leyaquë':

—Huaya'a tzezia' bela.

Biži unayaquë' rëbiyaquë' lëbë':

—Lëzi nëto' huaza'rëndo' len luë'.

Na'ra uyu'uyaquë' lu'u barco zioyaquë' lao nisa. Bedu yela rdayaquë' lao nisa, pero nitu bela nunu užeyaquë'. ⁴ Baza' tzeni' bdyin Jesús zënë' ru'a lagun. Pero biži yaca ben' quienë', re'yaquë' lu'u barco, bibezaqueyaquë' chi lëbë'. ⁵ Na'ra una Jesús rëbinë' leyaquë':

—Bicha', ¿babële gan bela gaoro?

Biži unayaquë' rëbiyaquë' lëbë':

—Ni tuba' binehuendo' gan.

⁶ Na'ra una Jesús rëbinë' leyaquë':

—Uledze' du yëxo quiele zaquë' yebë gan' nita'le lu'u barco ta tzu'u bela.

Na'ra bëyaquë' cabë' una Jesús bdze'yaquë' du yëxo lu'u nisa. Caora na' bedza'ten uyu'un bela zë gula, bira uzueyaquë' yebioyaquë' du yëxo. ⁷ Biži una tu ben' quie Jesús, ben' Jesús nedyë'ë, rëbinë' Pedro:

—Señor quiero ben' na'.

Na'ra como dan' nelëcho žaba Pedro re'në' lu'u barco, ca benë' ca unia', labeyacatenë' žabë' laohue, uda'në' lu'u nisa ta yedyinnë' gan' zë Jesús. ⁸ Na'ra yaca los demás ben' bega'n lu'u barco, psa'yaquë' barco ta yedyinyaquë' layu bidyi. Tzegubayaquë' du yëxo nedza'ten bela como dan' nerdziogue itu gayuhua metrozi ta yedyinyaquë' layu bidyi. ⁹ Caora bedyinyaquë' layu bidyi, broyaquë' barco blë'ëyaquë' re' bao' gui' žuban tu bela. Lëzi derë yëta xtila gan'. ¹⁰ Na'ra una Jesús rëbinë' leyaquë':

—Uletzexi' tu chopa bela baožele bachi.

¹¹ Biži beyu'u Simón Pedro lu'u barco, tzegubanë' du yëxo gan' yu'u yaca bela. Nedza'ten tu gayuhua yugatzto tzona bela yela. Ba'ala'cazi bedza'ten bela, biurugon. ¹² Biži una Jesús rëbinë' leyaquë':

—Uleda gaole rzila.

Na'ra leyaquë' nituyaquë' bibeyažoyaquë' inabayaquë' nu naquë' dan' babezaqueyaquë' lëbë' naquë' Señor quiero. ¹³ Na'ra ubiga' Jesús gan' nita'yaquë', uži'në' yëta xtila len bela bë'në'n leyaquë'.

¹⁴ Cana' guca lao tzona lasa ptilalao Jesús yaca ben' quienë' ude beyudyi gutinë' bebannë'.

Jesús bë'lënë' Simón Pedro di'idza'

¹⁵ Ude beyudyi udaoyaquë' rzila, una Jesús rëbinë' Simón Pedro:

—Simón, ži'i Jonás, ¿nedyë'ëro' në'ëdi' ca nedyë'ëlo' nutezi ben' tula?

Na'ra una Pedro rëbinë' lëbë':

—Señor, luë' nezo' nedyë'ëda' luë'.

Biži una Jesús rëbinë' Pedro:

—Re'enda' uzioñë'elo' yaca ben' barale quia'. Nacayaquë' ca quie beco' ži'lla' quia'.

¹⁶ Na' taorupe una Jesús rëbinë' Pedro:

—Simón, ži'i Jonás, ¿nedyë'ëlo' në'ëdi'?

Na'ra una Pedro rëbinë' lëbë':

—Señor, luë' nezo' nedyë'ëcaza' luë'.

Bizi una Jesús tatula rëbinë' Pedro:

—Re'enda' uzioñe'elo' yaca ben' barale quia'. Nacayaquë' ca quie beco' zi'ila' quia'.

¹⁷ Na' taoyune unaba Jesús Pedro rëbinë' lëbë':

—Simón, zi'i Jonás, ¿nedyë'ëcazo' në'ëdi'?

Bizi Pedro bega'nnë' gucayëchi'në', dan' unaba Jesús lëbë' lao yuna lasa chi nedyë'ënë' lëbë'. Na'ra unë' rëbinë' Jesús:

—Señor, luë' banezo' yugulute, banezo' nedyë'ëcazida' luë'.

Na'ra una Jesús tatula rëbinë' Pedro:

—Re'enda' uzioñe'elo' yaca ben' barale quia'. Nacayaquë' ca quie beco' zi'ila' quia'. ¹⁸ Tali ca rnía' luë', cati guco' bi' ru'abe, cuinzo' gucolo' zabo' uyolo' con ga re'enlo', pero cati gaco' ben' gula, hualio' na'alo' tacuenda ugaco ben' tula luë' zabo' ta tzehua'ayaquë' luë' con ga bire'enlo' tziolo'.

¹⁹ Una Jesús can' tacuenda ineziro ca hue Pedro huenë' Diuzi ben' ze hora gatinë'. Ude beyudyi unë' Jesús can', na' unë' rëbinë' Pedro:

—Unao në'ëdi'.

Ni rnan quie Juan, nedyë'ëtzeque Jesús lëbë'

²⁰ Ca beyëcho Pedro, blë'ënë' në'ëdi' za' naohua' leyaquë'. Nedyë'ëtzeque Jesús në'ëdi'. Na' uri'a cuëta lë'ë Jesús caora udaondo' rtze' dza na'. Caora na' unaba' rëpa'në': “Señor, ¿ca nuzi usedyin luë' lao yaca ben' re'en guti luë'?”

²¹ Caora blë'ë Pedro në'ëdi', unë' rëbinë' Jesús:

—Señor, ¿cabizi gaca quie ben' niga?

²² Na'ra una Jesús rëbinë' Pedro:

—Chi re'enda' sura ben' niga zidza hasta que bë' yeguida' tatula, ¿bizcuenda quio' luë' rnabo' në'ëdi'? Pero luë', unao në'ëdi'.

²³ Cana' guca bro di'idza' lado yaca ben' barale quie Jesús cabë' gaca quia' bigatia'. Pero cala cana' una Jesús, sino que unë': “Chi re'enda' sura ben' niga zidza, hasta que bë' yeguida' tatula, ¿bizcuenda quio' luë' rnabo' në'ëdi'?” Cana' una Jesús rëbinë' Pedro.

²⁴ Në'ëdi', ben' quie Jesús, bzua' di'idza' ni lë'ë guichi. Blë'ëda' naca' testigo cabë' guca quie Jesús. Banezile nacan tali can' baonia'.

²⁵ Lëzi dera ta bë Jesús. Chan' uzuro lë'ë guichi yugulute ta bë Jesús, bigaque lao yedyi layu gata' libro ga ru'en di'idza' ta bë Jesús. Amén.

CA YELA' HUACA BĔ YACA APÓSTOL

Una Jesús huayu'u Bichi Be quie Diuzi lu'u laxta'o ja apóstol quiené'

¹ Estimado Teófilo, lè'è guichi bia' tanëro, rguixogue'n quie Jesús yugulu cabè' bënë' len yugulu cabè' psëdinè' yaca benè' desde dza uzulaonè' rusëdinè' benè' ² hasta dza beyëpinè' ladza. Pero zayeyëpinè' ladza, ulionè' lao chipchopa ben' quiené'. Caora na' lao na'a Bichi Be quie Diuzi unè' gudyinè' leyaquè' bi hueyaquè'. ³ Ude beyudyi agutinè' bebannè', caora na' zionè' ptilè' ja ben' quienè', uzulènè' leyaquè' lao chopa galo dza ta ineziyaquè' tabala bebannè'. Lëscan' unè' rëbinè' leyaquè' ca rna Diuzi rna bënë'nè'.

⁴ Tu bineza'nè' guibá unè' gudyinè' leyaquè' ta biyeza'yaquè' ciudad Jerusalén. Na'ra unè' rëbinè' leyaquè':

—Nizi cuezale gaca quiele ca una Xuza' huenè' quiele ⁵ según cabè' agudya' le'e. Na' tali na' bē' Juan laole conlè nisa, pero netza'la ca hue Diuzi quiele, ise'elè' Bichi Be quienè' ta tzu'unè' laxta'ole ichopa tzona dza.

Cabè' guca beyëpi Jesús ladza zeyonè' guibá

⁶ Na'ra cati bdyin dza, bedupa ben' quie Jesús tatula bē'lëjè' lëbè' di'idza':

—¿Señor, rnaband' luè' chi babdyin hora huu' mandado yenabè'ro lao yedyi quiero tatula como unabè' xuxixta'oro dza na'te?

⁷ Na'ra bequèbi Jesús nè' rëbinè' leyaquè':

—Binacan quiele inezile bi hora, bi tiempo, hue Xuziro Diuzi bi re'ennè' huenè', porque tuzi Diuzi de yela' rna bënë' quienè' bi re'ennè' huenè'. ⁸ Pero le'e, caora baoyu'u Bichi Be quie Diuzi lu'u guicho laxta'ole, cana' gata' quiele yela' huaca quie Diuzi. Te na' tzirole tzetixogue'le yaca benè' len cabè' bia' cabè' unia'. Tanëro tzirole ciudad Jerusalén. Na' tziorèle estado Judea len estado Samaria. Na'tera hasta duze yedyi layu tzirole.

⁹ Ude beyudyi unè' cana', tu nerna'yaquè' lëbè', beyëpi Jesús ladza, bdubi beo lëbè', bira blè'ëyaquè' lëbè'. ¹⁰ Nerna'yaquè' ladza ga zio Jesús, caora labdyinte chopa ángel nacoyaquè' la'ari' bezëri. ¹¹ Na'ra unayaquè' rëbiyaquè' ben' quie Jesús:

—¡Ben' Galilea! ¿Bixquien' rebanle rna'le ladza gan' zeyo Jesús guibá? Rnando' le'e cabè' blè'ële beyëpinè' ladza zeyonè' guibá, cana' yeguidanè' lao yedyi layu tatula.

Uliojè' Matías bënë' apóstol lao laza Judas

¹² Na'ra uza'yaquè' ya'a Olivos bdyinyaquè' ciudad Jerusalén. Bi zi ya'a ga uza'yaquè' nacan ga'ala' para idyinjè' ciudad Jerusalén. Bigucan gatzo legua.

¹³ Na' cati bdyinyaquè' ciudad Jerusalén, bdyinyaquè' ga re' tu yu'u chopa xcuia, urèyaquè' ga nacan lao chopa xcuia na'. Entre leyaquè' laojè' Pedro, len Juan, len Santiago, len Andrés, len Felipe, len Tomás, len Bartolomé, len Mateo, len Santiago Zi'i Alfeo, len Simón ben' partido cananista, len Judas Zi'i Santiago. ¹⁴ Yugu dza bedupalëjè' María, zna' Jesús, len yaca ben' bichi Jesús, len yaca itu chopa nígula tacuenda hue'lëjè' Diuzi di'idza'.

¹⁵ Bi zi bdyin dza begu'udi' du tu gayuhua galo ben' rale quie Jesús. Na' gatzo lao' re' Pedro uzulinè' rëbinè' leyaquè':

¹⁶ —Bicha', zana', bisaque' te cana'zi di'idza' quie Diuzi. Re'en ca re'ena gaca quie Judas laga con ca una rey David lao na'a Bichi Be quie Diuzi,

porque bē Judas tuže len yaca ben' bēxo Jesús, ben' bē lēbē' preso. ¹⁷ Lēscan' bē Judas ra'o tuže udixogue'lēronē' yaca benē' xti'idza' Diuzi. ¹⁸ Beya'onē' tu cue' layu conlē dumi ta udižuyaquē' lēbē' quie tamala bēnē'. Pero bdyin dza bgudyinē' yu utin guidi lē'ēnē', na' brote xlonē' yaque'n layula. ¹⁹ Por lena' uxuba ben' Jerusalén lao layu quienē' Acéldama, ta inaro xti'idza'ro: Layu ga ulato ren. ²⁰ Porque rnēn lu'u libro Salmos cani: Huadachi yu'u quienē', yega'nnan cana'zi. Ganura dyila' su lu'u lidyinē'. Lēzi cani rnēn: Huazi' ben' tula dyin quienē'.

²¹ Na'ra nerna Pedro rēbinē' leyaquē':

—Ladoro niga zu yaca ben' uza'lē ra'o tuže caora uzulaoro udalēro Jesús ²² desde cati bē' Juan lao benē' hasta dza beyēpi Jesús ladza. Re'ennan cuioro ben' tula tacuenda gacarēnē' testigo conlē ra'o de que nacan tabala babeban Jesús.

²³ Na'ra ulioyaquē' chopa be'mbyu. Tunē' laonē' Matías, itunē' laonē' José, ben' laorē Barsabás, lēscan' laorēnē' Justo. ²⁴ Na' biži bē'lē yaca apóstol Diuzi di'idza' rēbiyaquē' lēbē':

—Xuzindo' Diuzi, luē' nezo' cabē' naca pensari quie quiendo'. Una nēto' nu ben' re'enlo' cuiondo' lao rupa yaca ben' nita'ja ni ²⁵ tacuenda sa'lēnē' nēto' yega'nnē' lao laza Judas. Cabē' bē Judas, gucanē' ben' mala, zeyonē' ga reya'ala' zagacanē' castigo.

²⁶ Na'ra bēyaquē' sorteo lao rupayaquē'. Na' biži Matías bēnē' gan sorteo bēnē' tuže lao ichiptu ja apóstol.

2

Cabē' bē Bichi Be quie Diuzi uyu'unē' lu'u laxta'o yaca ben' quie Jesús

¹ Na'ra guca dza lani quie usecho quie trigo laona lani quie pentecostés. Por lani na', bdupa yaca ben' quie Jesús tu lu'u yu'u. ² Biži desde guibá ga zu Diuzi za' chi' ca tu be bedun' fuerte. Cati bdyinnan, uyu'un lu'u yu'u gan re'yaquē'. ³ Lēzi, tu ta ra'ala' ca gui' ptilalaonan leyaquē'. Nacan forma ca ludyi benē'. Na'ra bdyinnan bdzatzana ziona tu huiōyaquē' ga re'yaquē'. ⁴ Caora na' uyu'u Bichi Be quie Diuzi lu'u laxta'oyaquē' yugulujē'. Lena' uzulaoyaquē' rnēyaquē' di'idza' quie ben' tula. Yela' huaca quie Bichi Be quie Diuzi lagucateyaquē' di'idza' quie ben' yedyi tula.

⁵ Na'ra ciudad Jerusalén unita' zē ben' Israel, ben' reza'la'adyi' Diuzi. Zē yedyi bdzatzajē' bdyinyaquē' ciudad Jerusalén. ⁶ Biži caora beyaquē' rnē ben' quie Jesús xti'idza' tu tujē', bega'nyaquē' rebanyaquē'. ⁷ Biži yela' uban guca quieyaquē' unayaquē':

—Ben' rnē di'idza' niga, ¿quele ben' estado Galilea? ¿Cómo arnēyaquē' di'idza' quie tu turo? ⁸ ¿Cómo rero xti'idza'ro ga goloro? ⁹ Niga nita' ben' Partia, len ben' Media, len ben' Elam, len ben' Mesopotamia, len ben' Judea, len ben' Capadocia, len ben' Ponto, len ben' Asia, ¹⁰ len ben' Frigia, len ben' Panfilia, len ben' Egipto, len ben' Africa ga nebaba yedyi Cirene, ¹¹ len ben' Creta len ben' Arabia. Ben' Israel nacayaquē'. Uza'yaquē' yedyi quiejē' bdyinyaquē' ciudad Jerusalén. Lēzi niga rda yaca ben' Roma, ben' bida tu hueltazi. Balayaquē' nacayaquē' ben' Israel, ibalayaquē' ba'ala'cazi binacayaquē' ben' Israel, rnaoyaquē' costumbre quie ja ben' Israel. ¿Cómo, pues, rnē ben' estado Galilea di'idza' quie tu turo, rguixogue'yaquē' ra'o cabē' naca yela' huaca quie Diuzi?

¹² Bizi lega reban ja ben' za'ja yedyi tula, porque binezijë' bi raca quiejë'. Lena' nayaquë' rëbijë' laguedyiaquë':

—¿Bizi raca niga?

¹³ Na'ra ibalayaquë' ptitojë' yaca ben' quie Jesús rëbiyaquë' laguedyijë':

—Ažudyiaquë'.

Con cabë' una Pedro gudyinë' ja ben' nita'ja na'

¹⁴ Na'ra uzuli Pedro len ichiptu ja apóstol. Uzulaonë' rnë' zidzo rëbinë' yaca benë' nita' na':

—Užëcara nagale, le'e ben' estado Judea len le'e ben' ciudad Jerusalén. Re'enda' inia' le'e tu chopa di'idza' nacan belao yele. ¹⁵ Bigacale pensari aožudyindo', porque nenacara baguin. ¹⁶ Cala aožudyindo', dechan' ruen quiendo' ca una profeta Joel dza na'te cati unë':

¹⁷ Dza baruen bago yedu yedyi layu, udze' Diuzi Bichi Be quienë' lu'u laxta'o benë'.

Por lena' quixogue' zi'iro cabë' naca di'idza' la'iya quie Diuzi.

Por lena' ulu'e Diuzi bi' ru'abe quiero tu ta binelu'enë' ra'o.

Por lena' hue Diuzi mandado ixusa ben' gula quiero, pero tu ta binexusayaquë'.

¹⁸ Lëzi zaidyinra dza, udze' Diuzi Bichi Be quienë' lu'u laxta'o nu ben' naca ben' quienë', chi be'mbyu, chi nigula.

Por lena' quixogue'jë' benë' xti'idza'në'.

¹⁹ Lëzi žan guibá ulu'e Diuzi tu ta yebanro ilë'ëron.

Pues huenë' seña quienë' lao yedyi layu como hualato ren, huayala gui' duže, huabe' džen ca beola.

²⁰ Lëzi huechula obidza, ina' biu' žnazi como ca ren.

Cana' gaca tu dza antes zaidyin dza hue Diuzi juicio.

Naca lëdza na' dza belao, gaca tu ta binelë'ëro.

²¹ Bizi yugulu ben' ulidza Diuzi, ben' rzëto laohuë', ute usela Diuzi leyaquë'.

²² Na'ra nernë Pedro rëbinë' leyaquë':

—Užëcara nagale cabë' inia' le'e ben' Israel. Jesús, ben' yedyi Nazaret, bablu'e Diuzi lao le'e lega yaxenë' ca bënë' como dan' lao na'anë' bë Diuzi yela' huaca quienë' zaca'lao le'e. Dyë'ëdi nezile cabë' guca quie Jesús. ²³ Pues según ca pensari bë Diuzi huenë' dza na'te, napsedyinnë' Jesús lao na'ale. Na'ra le'e bële lëbë' preso, bda'lenë' lë'ë yaga cruzo bëtilenë', bële tuže conlë yaca ben' mala. ²⁴ Pero pseban Diuzi lëbë'. Tuzioli bira gatinë', porque bira saque' yela' guti huenan gan Jesús.

²⁵ Na'ra nernë Pedro rëbinë' leyaquë' con cabë' una rey David quie Jesús dza na'la:

Bablë'ëda' zu Diuzi rna' ruhuanë' në'ëdi' yugu dza.

Zuë' cuëta' zaquë' yebë rapanë' në'ëdi'.

Quie lena' birdzeba' bi tamala gaca quia'.

²⁶ Quie lena' zu gusto lu'u guichi laxta'ohua', redaohueda' ru'elia' Diuzi di'idza'.

²⁷ Quie lena' birdzeba' rbeza' dza useban Diuzi cuerpo quia', porque biusan Diuzi alma quia' yeyon gabila ga de yaca ben' huati.

Lëscan' bihue'në' lato itabo cuerpo quia' në'ëdi', ben' la'iya quienë'.

²⁸ Abzioñe' Diuzi në'ëdi' cabë' naca xnezë'.

Nu ben' inao xnezë', huata' yela' neban quieyaquë' tuzioli.

Legazi redaohueda' dan' zulia' Diuzi tuže.

Na'ra nernë Pedro rëbinë' leyaquë':

²⁹ —Bicha', nacan tali aguti xuxixta'oro rey David dza na'la. Pues apcachi'yaquë' lëbë', nerezala'adyi'ro ga de ba quienë'. ³⁰ Na'ra como guca rey David ben' profeta, ben' rguixogue' di'idza' quie Diuzi, quie lena' unezinë' bega'nle Diuzi lëbë' di'idza' de que gaca tu zi'i subanë' ben' naca Cristo, huatzeque'në' xlatonë' inabë'në'. Babgunte Diuzi cuinnë' gacan ca unë' gacan. ³¹ Lëscan' ca ben' bablë'ë una rey David useban Diuzi Cristo. Quie Cristo unë' caora unë' biusan Diuzi yeyo alma quienë' gui' gabila ga de ben' huati. Bihue'në' lato itabo cuerpo quienë'. ³² Nëtö' yugulundo' nacando' testigo pseban Diuzi Jesús. ³³ Cana' ure'në' zaquë' yebë cuëta Diuzi ga naca xlatö ben' bala'ana. Lëscan' use'ela' Diuzi Bichi Be quienë' según di'idza' bega'nle Diuzi Jesús dza na'. Por lëbë' bablë'ële babele yela' huaca quie Diuzi. ³⁴ Na'ra quele rey David beyëpinë' ladza, sino que lëbë' unë' quie Jesús cati unë' cani:

Una Diuzi rëbinë' ben' naca Señor quia': "Ure' cuëta' zaquë' yebë niga,

³⁵ hasta idyin dza cuëcha' xni'alo' ja ben' rudie luë'."

Na'ra nernë Pedro rëbinë' leyaquë':

³⁶ —Reya'ala' inezi yugulu ben' Israel du la'adyi'yaquë' de que lëben' bda'yaquë' lë'ë yaga cruzo naquë' ben' bë Diuzi nombrar Señor quiero lëscan' Cristo quiero.

³⁷ Ude beyudyi bzënegayaquë' ca una Pedro, caora na' ben bayëchi' pensari quiejë' unabayaquë' rëbiyaquë' Pedro len los demás apóstoles:

—Bicha', ¿bizi ca huendo'?

³⁸ Na'ra una Pedro rëbinë' leyaquë':

—Uletza' pensari quiele, ulehue lato hue'ndo' laole quie quiele rzëtöndo' lao Jesucristo tacienda yezi'ze Diuzi dula' xquia quiele. Cana' udze'në' Bichi Be quienë' lu'u guicho laxta'ole con cabë' una Diuzi huenë' quiele dza na'te.

³⁹ Pero quele para le'ezi una Diuzi cana' dza na'te, lëscan' quie ja zi'ile zaza', lëscan' quie ja ben' binaca ben' Israel, para nutezi ben' cuio Diuzi gaca ben' gale quienë'.

⁴⁰ Cana' una Pedro bë'në' leyaquë' consejo rëbinë' leyaquë':

—Ulebiga' tzala'la bihuele tuze yaca ben' birzënaga quie Diuzi, ben' nebi-agui'.

⁴¹ Pues na'ra zëyaquë' uyezila'adyi'jë' gulejë' ca una Pedro. Dza na', tu dzazi, gule ja tzona mila benë', bëjë' tuze len yaca apóstol. Na'ra bë' ja apóstol laoyaquë'. ⁴² Bipsanjë' inaojë' ca gudyi yaca apóstol leyaquë'. Bega'nleayaquë' laguedyiaquë' tuzi, bë'lëyaquë' Diuzi di'idza', bedupajë' bzüzuyaquë' yëta xtila.

Cabë' bë yaca ben' unao xneza Jesús taprimero

⁴³ Na'ra tu rebanzi ben' birale cabë' bë ja apóstol yela' milagro quie Diuzi.

⁴⁴ Bizi bega'n ben' quie Jesús de acuerdo entre leyaquë', bë'yaquë' laze entre lëjë' yugulu ta de quieyaquë'. Lëzi chi nita' ben' bide dumi quie,

⁴⁵ na'ra bëti'yaquë' ta de quieyaquë' bë'yaquë' ben' bide dumi quie. ⁴⁶ Tu dza, tu dza, begu'udi'yaquë' lu'u idao' rnabë'ra, lëscan' lu'u yu'u quie tu tuyaquë' uyoyaquë' yetaoyaquë'. Legazi redaohueyaquë' udaoyaquë' tuze, bzüzuyaquë' yëta xtila beza'la'adyi'jë' Jesús, ⁴⁷ udapala'nyaquë' Diuzi. Blë'ë yaca ben' yedyi quieyaquë' leyaquë' ben huen. Na'ra tu dza, tu dza, psere Diuzi nura ben' gale quie', gaquë' tuze len yaca los demás ben' barue quie Diuzi.

3

Beyue Pedro tu ben' zi

¹ Na'ra bdyin dza zio Pedro len Juan lu'u idao' r nabè'ra tacuenda hue'lëyaquë' Diuzi di'idza'. Según ca costumbre quie ja ben' Israel na', rioyaquë' zadzë' du reda tzona. Bizi na' ru'a idao' na' re' tu ben' zi, pero cati golotë' nažinë'. ² Yugu dza ralëchiyaquë' lëbë' ru'a idao' r nabè'ra laonan ru'a badan tacuenda inabë' caridad con nu ben' zioja lu'u idao' r nabè'ra na'. Unabayëchi'në' ben' bede zio lu'u idao' r nabè'ra tu caridad. ³ Caora blë'ë ben' zi Pedro len Juan, unëyëchi'në' hue'yaquë' tu caridad quienë'. ⁴ Na'ra blidzayaquë' lëbë' rëbijë' lëbë':

—¡Una'cara nëto'!

⁵ Bizi una' ben' zi leyaquë' guquë' pensari hue'yaquë' tu caridad quienë'.

⁶ Pero na'ra una Pedro rëbinë' ben' zi:

—Bibi oro, bibi plata, zia' guna' luë', pero tu ta nezda' gacalia' luë', rnia': ¡Uzuli! ¡Uza'! porque yela' huaca quie Jesús, ben' yedyi Nazaret, hueyuenë' luë'.

⁷⁻⁸ Na'ra bëxu Pedro në'ë yebë. Caora cati uchisanë' në'ë, labezute ni'anë' yu, laoxititenë' uzulaonë' rza'në'. Na'ra ziolë ben' zi leyaquë' lu'u idao' r nabè'ra, zionë' rxitinë' ruenë' Diuzi ben' ze. ⁹ Caora blë'ë ja benë' ca rue ben' zi, barza'në' ruenë' Diuzi ben' ze, ¹⁰ bizi tu bega'nziyaquë' rebanyaquë' ca guca quienë'. Bezaqueyaquë' lëbë' ure'në' yugu dza ru'a idao' r nabè'ra unabayëchi'në' benë' tu caridad quienë'.

Pedro bdze'në' di'idza' ga zu tu lachila laonan lachila quie Salomón

¹¹ Na'ra bdyin Pedro, len Juan, len ben' beyuejë' ga zu tu lachila quie idao' laona lachila quie Salomón. Bizi bire'en ben' beyuejë' usannë' leyaquë'. Pues ben' zë beguitejë' gan zë Pedro len Juan, tu bebanzijë' cabë' guca quie ben' beyuejë'. ¹² Caora blë'ë Pedro banita' ja ben' zë, na'ra unë' rëbinë' lejë':

—Bicha', nacale ben' Israel ca në'ëdi'. Biyebanle ina'le nëto' como si fuera yela' huaca quiendo' beyuendo' ben' ni. Bigacale pensari yela' rionla'adyi' quiendo' bareza' ben' zi. ¹³ Cala lena' beyacanë', dechan' yela' huaca quie Diuzi quie xuzixta'oro Abraham, len Isaac, len Jacob bezi' ni'anë' fuerza. Pues tuzi Diuzi na' pca'nnë' lao na'a ži'inë' Jesús naquë' ben' r nabë' lao yugulute. Pero le'e bële yela' mala quiele psedyinle Jesús lao na'a ja ben' r nabë'. Caora cati gu'unle Pilato yebionë' Jesús dyiguiba, le'e bigu'unle.

¹⁴ Calëla unabale gu'unle yebio Pilato tu ben' ruti benë'. Bigu'unle yebio Pilato tu ben' naca la'iya, ben' dya'a. ¹⁵ Le'e gu'unle gati ben' run yela' neban quiero, pero Diuzi psebannë' lëbë'. Nacando' testigo pseban Diuzi lëbë'. ¹⁶ Re'enda' inia' le'e de que cuin Jesús beyuenë' ben' zi, ben' beyaca bezaquele. Beyue Jesús lëbë' caora bzëtondo' laonë' ralendo' quienë'. Cana' labeyacatë' zë' laole rlë'ëtenë'.

¹⁷ Na'ra nernë Pedro rëbinë' leyaquë':

—Bicha', banezda' de que caora bëtile Jesús, binezile bi bële, lëzi ben' r nabë' quiele, binezirëjë' bi bëjë'. ¹⁸ Pero guca quie Jesús de acuerdo con ca una Diuzi dza na'te caora bzu ben' profeta xti'idza' Diuzi lë'ë guichi. Na'ra rnën de que huadyin dza yedzagalao ben' naca Cristo. ¹⁹ Por lena' reya'ala' utza'le pensari quiele, inaole xneza Diuzi tacuenda yezi'ženë' dula' xquia quiele, na' cuëchinë' chizi lu'u guicho laxta'ole, ²⁰ huenë' mandado yeguida Jesús tatula como naca Jesús ben' ulio Diuzi desde cana'te ta gacalënë' le'e. ²¹ Pero huadzënë' guibá hasta que idyin dza hue Diuzi mandado uzunë'

xti'idza'nè' con cabè' rnèn lè'è guichi la'iya bè ben' profeta, ben' unita' dza na'la, ben' naca la'iya quienè'. ²² Quie lena' una Moisés dza na'te gudyinè' xuzixta'oro cani: “De entre laguedyizi'ro ise'ela' Diuzi itu ben' quixogue' xti'idzè' laga con ca use'ela'nè' nè'èdi'. Re'ennan huele bala yugulu con ca inè' le'e. ²³ Porque nu ben' bihue bala con ca inè', udyiagui' Diuzi lè'èjè'. Bihue' Diuzi lato inita'lè'èjè' yaca ben' quienè'.” Cana' una Moisés.

²⁴ 'Lëscan' yugulu yaca los demás ben' udixogue' xti'idza' Diuzi dza na', desde Samuel lente yaca ben' zeza'ra, unè'jè' quie dza rda Jesús lao yedyi layu. ²⁵ Ca di'idza' bega'nlè Diuzi leyaquè', lëscan' nega'nnan para le'e caora una Diuzi rëbinè' xuzixta'oro Abraham cani: “Por tu ži'isubo' huaca huen gula quie yugulu ben' nita' lao yedyi layu.” ²⁶ Na'ra quie lena' ulio Diuzi ži'inè' Jesús, use'ela'nè' lèbè' laole tanëro tacuenda gaca tahuen gula quiele, usanle bira huele tamala.

4

Psedyinyaquè' Pedro len Juan lao na'a ben' rna'bè'

¹ Na'ra neru'elè Pedro lènè' Juan yaca benè' di'idza' caora bdyin yaca pxuzi, len yaca xan' policia quie idao' rna'bè'ra, len tu cue' ben' Israel nacajè' quie partido saduceo. ² Rdza'yaquè' Pedro len Juan porque rdayaquè' ru'elëyaquè' yaca benè' di'idza' rna'yaquè' de que cabè' guca quie Jesús bebannè' nacan prueba huadyin dza yebanrè yaca ben' huati. ³ Na'ra bëyaquè' leyaquè' preso, bdze'yaquè' leyaquè' lu'u dyiguiba ga bega'nyaquè' tu yela porque aodze'. Lena' bibè'nan lato tzesëyaquè' lao ben' rna'bè'. ⁴ Na'ra ben' zè, ben' bzënaga quiejè', guleyaquè' di'idza' quie Diuzi, ptza'yaquè' pensari quieyaquè'. Por lena' uye ben' barale quie Jesús cadu ga'yo' mila be'mbyu, apartela nigula.

⁵ Na' biži beteyu dza tula, bedupa ben' rna'bè' quie ciudad Jerusalén tacuenda hueyaquè' junta. Bdyinrè yaca ben' gula, len ben' rna'bè' quie idao' rna'bè'ra, len ben' escribas, ben' rusèdi di'idza' bzu Moisés lè'è guichi. ⁶ Bdyinrè xan' pxuzi laonè' Anás, len Caifás, len Juan, len Alejandro, lente yugulu diadza quie xan' pxuzi. ⁷ Na'ra bëyaquè' mandado tzexi'jè' Pedro len Juan ta tzesëjè' laojè'. Caora bazëyaquè' na', na'ra una ben' rna'bè' rëbinè' leyaquè':

—¿Bi yela' rna'bè' de quiele rdale niga ruele cabè' re'enle? ¿Nuži use'ela' le'e?

⁸ Na'ra du yu'u Pedro Bichi Be quie Diuzi, unè' rëbinè' leyaquè':

⁹ —Le'e ben' rna'bè' quie ciudad Jerusalén, len le'e ben' gula, chi re'enle inezile bi yela' rna'bè' de quiendo' bëndo' tu huen beyuendo' ben' neseco ni'e, ¹⁰ chi re'enle inando' le'e len lo demás ben' Israel, nainando' de que por yela' huaca quie Jesucristo, ben' yedyi Nazaret, babeyaca ben' niga. Lëcazi ben' bda'le lè'è yaga cruzo, ben' pseban Diuzi, lèbè' beyunenè' ben' niga. ¹¹ Le'e bële ca ben' rue huecua', ben' uru'un tzala'la yo laga'. Na' Jesús naquè' ca quie yo laga' uru'unle tzala'la, pero uži' Diuzi yo laga' uru'unle, bzunè'n ga rzulao besu. ¹² Pues ni tu ben' tula biuse'ela' Diuzi ta ute uselanè' ra'o. Tuzi Jesús na' use'ela' Diuzi lao yedyi layu ta ute uselanè' ra'o yeyoro guibá. —Cana' una Pedro, rëbinè' ben' rna'bè'.

¹³ Na'ra caora be yaca ben' rna'bè' ca una Pedro len Juan, blë'ëyaquè' birdzebijè', na'ra tu rebanzijè' porque unezijè' naca Pedro len Juan ben' birlë'ética guichi. Pero bezaquejè' naca Pedro len Juan ben' quie Jesús. ¹⁴ Pero como na' zëlëjè' ben' beyueyaquè', bira ubin ben' rna'bè' bi inayaquè'

contra leyaquë'. ¹⁵ Na'ra bebiojë' Pedro len Juan lu'u yu'u gan nitajë' tacuenda hue'yaquë' di'idza' entre lëzijë' bi hueyaquë' quieyaquë'. ¹⁶ Na'ra ru'eyaquë' di'idza' rëbiyaquë' laguedyiaquë':

—¿Bi huero? Nacan tali bëyaquë' tu yela' milagro. Nun quie banezi yugulu ben' yedyi cabë' bëyaquë', bisaque' yëbiro ben' yedyi bibi yela' milagro nehueyaquë'. ¹⁷ Na'ra ta iyudyi quie asunto ta bira huen zëdi lao ben' yedyi, mejorla uzëgadyiro quiejë' de que bireya'ala' inëyaquë' quie Jesús.

¹⁸ Na'ra beyëzi yaca ben' rnabë' Pedro len Juan tatula, bzëgadyiaquë' quiejë' de que bireya'ala' inëyaquë' quie Jesús. ¹⁹ Caora na' una Pedro len Juan, rëbiyaquë' leyaquë':

—Reya'ala' huele pensari chi nacaran huen huendo' cabë' re'enle, na' bihuendo' cabë' re'en Diuzi. ²⁰ Nëto' bisaque' usanndo' yëbindo' benë' ca ta blë'ëndo' ca ta bendo'.

²¹ Na' bzëgadyi yaca ben' rnabë' quieyaquë' tatula. Pero psanyaquë' leyaquë' cana'zi, beroyaquë' zeyoyaquë'. Biubinjë' bi huejë' quiejë', porque dan' yugu ben' yedyi rueyaquë' Diuzi ben' ze, dan' blë'ëyaquë' beyaca ben' zi. ²² Lëben' na', ben' beyaca ni'e por yela' milagro quie Diuzi, mazla chopa galo iza napanë'.

Yaca ben' quie Jesús blidzajë' Diuzi unabajë' hue'në' leyaquë' fuerza valor

²³ Na'ra psan yaca ben' rnabë' lejë', uzi'yaquë' zioyaquë' bdyinyaquë' ga nita' los demazara ben' quie Jesús, bë'leyaquë' leyaquë' di'idza' bicara dan' gudiyi yaca xan' pxuzi len yaca ben' gula. ²⁴ Ude beyudyi beyaquë' ca una Pedro len Juan, caora na' yuguluyaquë' blidzayaquë' Diuzi rëbiyaquë' lëbë':

—Xuzindo' Diuzi, luë' bëlo' guibá, bao' dyila yu, bao' nisadao' lente yugulu ta de lu'una. ²⁵ Luë' conlë Bichi Be quio', bao' mandado bzu rey David di'idza' quio' lë'ë guichi la'ya ga rnën caniga:

¿Bixquien' raca dila lao yedyi layu?

¿Bixquien' racajë' pensari bizinaquezi?

²⁶ Abedupa ja ben' rnabë' quieyaquë' tacuenda huejë' contra Diuzi len zi'inë', ben' naca Cristo.

²⁷ Cana' una rey David dza na':

—Na'ra bablë'ëndo' nacan tabala yedyi ni bë rey Herodes, len Poncio Pilato, len ben' Israel, len ben' yedyi tula tuže contra zi'ilo' Jesús, ben' la'ya quio'. ²⁸ Pero bëyaquë' cabë' mandado bao' dza na'te gaca quieyaquë'. ²⁹ Na'ra, Xuzindo' Diuzi, una' como re'enyaquë' utzebiyaquë' nëto'. Gucalë nëto' como nacando' ben' quio' cuenda bidzebindo' yeyondo' tzetixogue'ndo' benë' di'idza' quio'. ³⁰ Uquicho' na'alo' yeyuelo' yaca ben' raca Zhue'. Uquicho' na'alo' ta gaca yela' huaca quio' lao na'a zi'ilo' Jesús, ben' la'ya quio'. —Cana' unayaquë' rëbiyaquë' Diuzi.

³¹ Caora beyudyi bë'lëyaquë' Diuzi di'idza', na'ra bzisin gan' begu'udi'yaquë'. Du yu'uyaquë' Bichi Be quie Diuzi, birdzebijë' quixogue'jë' benë' xti'idza' Diuzi.

Con bitezi ta de quie ben' quie Jesús, guquen quie entre yugujë'

³² Na'ra yaca ben' zë, ben' nao xneza Jesús, guca pensari quiejë' yugutejë' tuzi. Entre leyaquë', yugulu ta de quieyaquë', gucan para quie yugutejë'.

³³ Na'ra yaca apóstol bipsanyaquë' quixogue'yaquë' benë' cabë' guca quie xa'nro Jesús caora gutinë' bebannë'. Pero xti'idza'jë' bi'an fuerza valor, porque Diuzi gucalënë' leyaquë'. ³⁴ Lëscan' entre leyaquë', ni tu gabi bdziogueyaquë', como dan' yugo ben' de quie, chi yu'u, chi layu, bëti'yaquë'n la hora rdzioguejë' dumi, ³⁵ na' uzi'jë'n bë'jë'n apóstol. Na'ra bë apóstol

mandado ta udisiyaquë' dumi quie tu tuyaquë' con nu ben' bide quie. ³⁶ Na' ladoyaquë' uzu tu ben' naca familia quie xuzixta'oro Leví laonë' José. Lao isla Chipre gologuë'. Uxuba ja apóstol laonë' Bernabé, ta inaro xti'idza'ro: Ben' huen, ben' zela'adyi'. ³⁷ Lëben' na' bëti'në' layu quienë' bë'në' apóstol dumi quien.

5

Cabë' guca bë Ananías len Safira xquia quiejë'

¹ Pero uzu tu ben' laonë' Ananías lënë' žgulanë' Safira. Pues na' bëti'yaquë' tu layu quieyaquë'. ² Pero binahue dumi quien bë'në' apóstol, nechan' baoži'në' lë'ëti' quienë' tu partenë' bë'në'n apóstol como si fuera nahue dumi quien.

—Pues dyë'ëdi banezi žgulë' cabë' bënë'.

³ Na'ra una Pedro rëbinë' Ananías:

—Ananías, žbiquien' uyu'ulo' pensari xi'ibi', užio' Bichi Be quie Diuzi yë', binao' uži'lo' lë'ëti' dumi tu parte quio'? ⁴ Nunu bë mandado guti'o'n, cuinzo' bëti'o'n. Nunu una luë' yeyunlo' dumi quien, cuinzo' beyunlo'n. žBiquien' uyu'ulo' pensari median, bao' cana'? Diuzi uži'lo' yë', quele benë'.

⁵ Na'ra ude beyudyi be Ananías xti'idza' Pedro, tu bgu'unzë' layu gutinë'.

⁶ Caora na' bdyin chopa tzona bi'byu ptubiyacabi' lëbë' con la'ari' laozi'tejabi' lëbë' nu'ajabi' yecachi'yacabi' lëbë'. Por lena' yugo ja benë' unezi cabë' užaca Ananías, legazi bdzebijë' can' guca.

⁷ Na'ra aodela cadu tzona hora, caora bdyin žgula Ananías ga zë Pedro. Pero binenezinë' bi baguca quie xquiuhuë'. ⁸ Caora na' unaba Pedro rëbinë' lëbë':

—iUna chi nahue dumi ca tu ta bëti'le layu quiele!

Pues bequëbi nigula rëbinë' Pedro:

—Aja', nahuena.

⁹ Na'ra una Pedro rëbinë' nigula:

—žBixquien' bega'nlëlo' xquiulo' de acuerdo bële prueba Bichi Be quie Diuzi? Na' baza' ja ben' yecachi' xquiulo', lëzi huetzecachi'rëjabi' luë'.

¹⁰ Caora na' tu bgu'unzë' lao Pedro gutinë'. Cati uyu'u ja bi'byu ga denë', blë'ëyacabi' bagutirënë'. Lëzi uliojabi' lëbë' uži'yacabi' yecachi'yacabi' lëbë' cuëta lë'ë ga pcachi'yacabi' xquiunë'. ¹¹ Quie lena' ptzebitzegue ben' quie Jesús len los demás ben' unezi cabë' guca quieyaquë'.

Lega bë ja apóstol yela' huaca quie Diuzi

¹² Na'ra zë lasa bë yaca apóstol yela' milagro lao ben' yedyi. Caora na' bedupa yaca ben' quie Jesús ga laonan Lachila quie Salomón. ¹³ Blë'ë ja ben' yedyi leyaquë' ben' huen, pero bdzebiyaquë' yedupalëyaquë' leyaquë'.

¹⁴ Pero unaocazi ben' zë xneza Jesús, be'mbyu len ja nigula. ¹⁵ Hasta que ulioyaquë' ben' raza žhue' udixojë' leyaquë' du tu neza lao belaga o chi lao da'a. Rbezayaquë' te pxin quie Pedro ga deyaquë' ta yeyacayaquë'. ¹⁶ Lëzi bdyin zë benë' quie yedyi re' ga'ala', nu'arëyaquë' ben' raza žhue' len ben' yu'u taxi'ibi'. Na' yugulutejë' beyacayaquë'.

Bdze'yaquë' Pedro len Juan lu'u dyiguiba

¹⁷ Na'ra yela' zë' quie xan' pxuzi len ben' partido saduceo, ¹⁸ bëxoyaquë' apóstol bdze'yaquë' leyaquë' lu'u dyiguiba. ¹⁹ Pero ca du bala bdyin tu ángel quie Diuzi ga de ja apóstol lu'u dyiguiba, psalonë' ru'a yu'u dyiguiba, ulionë' yaca apóstol unë' rëbinë' leyaquë':

20 —Tziole lu'u idao' r nabè'ra quixogue'le benè' xti'idza' Diuzi yèbilejè' quie yela' neban tuzioli ru'e Diuzi ben' nao xnezè'.

21 Ude beyudyi beyaquè' ca una ángel, caora uyenì' na', uza'yaquè' zioy-aquè' lu'u idao' r nabè'ra bezulaoyaquè' rguixogue'yaquè' benè' xti'idza' Diuzi.

Hora na' balara uyasa xan' pxuzi lènè' yaca ben' quiè', uza'yaquè' zioy-aquè' ga hueyaquè' junta bènè' mandado guida yugulu ben' r nabè' quie ben' Israel. Caora abgu'udi'yaquè' yuguluyaquè', hora na' bè xan' pxuzi mandado tzio policía tzexi'jè' apóstol lu'u yu'u dyiguiba. 22 Na'ra uyo policía tzexi'yaquè' apóstol, pero ganu ja apóstol bedzeleyaquè' lu'u dyiguiba. Por lena' beza'yaquè' zeyoyaquè' gan' rueyaquè' junta, 23 unayaquè' rèbiyaquè' yaca ben' r nabè':

—Bè' bdyindo' neyeyo dyiguiba con candado, blèt'èndo' zu policía rapajè' ru'a dyiguiba. Pero caora usalondo' ru'a yu'u dyiguiba, nunu dyila' lu'u dyiguiba.

24 Na'ra yaca xan' pxuzi len xan' policía quie idao', caora beyaquè' ca una policía, rdzebitzegueyaquè' ga yeyudyi yedu asunto na'. 25 Bizi cati bla' tu ben' bla', udixogue'nè' leyaquè' unè':

—Lu'u idao' r nabè'ra bazè ja ben' bdze'le lu'u dyiguiba, baru'elèyaquè' yaca ben' yedyi di'idza' tatula.

26 Na'ra laziote xan' policía len ben' quiè' yexi'yaquè' leyaquè'. Pero bibè'yaquè' quieyaquè', porque rdzebiyaquè' uda' yaca ben' yedyi leyaquè' yo. 27 Na'ra zeqùè'yaquè' apóstol ga rueyaquè' junta yesanyaquè' leyaquè' lao ben' r nabè' tatula. Na'ra una xan' pxuzi rèbinè' leyaquè':

28 —Barzègadyindo' quiele bira inale quie Jesús. ¿Na' bizi bèle? Ner-guixogue'le yugulu ben' ciudad Jerusalén rèbileyaquè' ca naca pensari quiele, re'enle gale ben' yedyi de que dula' quiendo' guti Jesús.

29 Na'ra una Pedro lènè' yaca los demás apóstol:

—Decazide huendo' cabè' re'en Diuzi, bihuendo' cabè' re'enle le'e. 30 Le'e bètle Jesús bda'le lèbè' lè'è yaga cruzo, pero Diuzi na' psebannè' lèbè'. 31 Bè Diuzi nombrar lèbè' gaquè' ben' re' zaquè' yebè cuètanè' ga naca xlato ben' bala'ana. Ulionè' lèbè' gaquè' xa'nro, ben' ute usela ra'o tacuenda utza'ro pensari median quiero yezi'ze Diuzi dula' xquia quiero. 32 Nacando' testigo tali na'. Lèscan' Bichi Be quie Diuzi, ben' yu'u guicho laxta'o ben' nao xneza Diuzi, naquè' testigo tali na'.

33 Caora beyudyi beyaquè' di'idza' una Pedro, na'ra lega bdza'tzegue ben' r nabè', gu'unyaquè' gutiyaquè' leyaquè'. 34 Pero entre leyaquè' uzu tu ben' quie partido fariseo laonè' Gamaliel. Naquè' ben' huen, ben' psèdi ley quie Moisés. Na'ra bènè' mandado yero ja apóstol lao junta ga re' ben' r nabè' cuesayaquè' tu chi'. 35 Caora bero yaca apóstol, na'ra una Gamaliel rèbinè' laguedyinè':

—Ben' Israel, gapale cuidado bi re'enle huele quieyaquè'. 36 Bigala'adyi'le cabè' guca quie tu ben' lao Teudas. Azio iza uzunè' unè' naquè' ben' belao. Unao ca du tapa gayuhua benè' lèbè'. Pero bdyin dza bèti soldado lèbè', bdzatza bežuno yaca ben' unao lèbè'. 37 Beyudyi bedu quie Teudas, uzu itu ben' Galilea lao Judas dza bè gobierno censo blabanè' benè'. Gu'unrènè' tilalènè' soldado quie gobierno. Unao è ja ben' zè lèbè', pero bètirè soldado lèbè'. Lèzi bdzatzarè bžunorè ben' unao lèbè'. 38 Lena' rnìa' le'e, mejorla usanro quieyaquè', bira huerojè' zèdi. Porque chi ta racazi la'adyi'jè' ruejè', huabezan. 39 Pero chi tu ta rueyaquè' nacan quie Diuzi, ba'ala'cazi re'enle

cuezan, bicuezan. Na'ra gapale cuidado ta bihuele contra Diuzi. —Cana' una Gamaliel gudyinē' leyaquē'.

⁴⁰ Pues na'ra aozi'yaquē' xti'idza' Gamaliel. Caora na' beyēziyaquē' apóstol tatula. Caora bazēyaquē' na', bē ben' rnabē' mandado udi policía leyaquē' con guidi. Lēscan' bzēgadyiyaquē' quiejē' tatula ta bira inēyaquē' quie Jesús. Ude beyudyi na', bē ben' rnabē' permiso yero ja apóstol na'. ⁴¹ Caora na' beroyaquē' ga re' ben' rnabē' lao junta zeyoyaquē' redaohueyaquē' dan' bedzagalaoyaquē' por nun quie Jesús. Yugu dza uza'yaquē' ziojē' lu'u idao' rnabē'ra o chi lu'u yu'u quie tu tu benē'. ⁴² Bipsanyaquē' inēyaquē' quie Jesucristo.

6

Ulioyaquē' gadyi yaca ben' quisi yela' huao quiejē'

¹ Na'ra dza na'te, tu dza huio, uyera mazera ben' quie Jesús. Pero bala ben' quie Jesús, ben' rnē di'idza' griego, uyu'uyaquē' huenē conlē ben' quie Jesús, ben' rnēja di'idza' hebreo. Na'ra una ben' rnē di'idza' griego rēbiyaquē' yaca apóstol:

—Ben' rnē di'idza' hebreo, biru'eyaquē' laze parejo. Caora udisiyaquē' ta gao nigula bizu xquiuhue, ledao'zi ru'eyaquē' nigula bizu xquiuhue quiendo'.

² Na'ra bedupa lao chipchopa apóstol len yaca los demás ben' quie Jesús, unayaquē' rēbiyaquē' leyaquē':

—Bireya'ala' usanndo' rguixogue'ndo' benē' xti'idza' Diuzi ta hue'ndo' laze yela' huao na'. ³ Mejorla cuiole gadyi ben' huen, ben' de pensari, ben' rale quie Bichi Be quie Diuzi du guicho du la'adyi'yaquē', na' huele mandado quisiyaquē' yela' huao parejo. ⁴ Na'ra nēto', biusanndo' rulidzando' Diuzi rguixogue'ndo' benē' xti'idzé'.

⁵ Na'ra yaxe yugulu ben' quie Jesús cabē' una yaca apóstol. Caora na' ulioyaquē' Esteban, ben' rale quie Bichi Be quie Diuzi du guicho du la'adyi'nē'. Lēzi ulioyaquē' Felipe, len Prócoro, len Nicanor, len Timón, len Parmenas, len Nicolás ben' yedyi tula. Naca Nicolás ben' yedyi Antioquía, ben' unao religión quie ben' Israel dza na'. ⁶ Na'ra bzuyaquē' leyaquē' lao yaca apóstol, pquichi yaca apóstol na'ayaquē' guichojē', bē'lēyaquē' Diuzi di'idza' por leyaquē'.

⁷ Na'ra yugu dza udxogué' ja apóstol mazera benē' xti'idza' Diuzi. Por lena' taže uye ben' rnao xneza Jesús ciudad Jerusalén. Lente zē yaca pxuzi, unaorēyaquē' xneza Jesús.

Cabē' guca bēyaquē' Esteban preso

⁸ Na'ra taže gualē Diuzi Esteban bēnē' yela' huaca quie Diuzi lao ja ben' yedyi nita' na'. ⁹ Pero bala ja ben' uza' yedyi Cirene, len ben' uza' yedyi Alejandria, len ben' uza' yedyi Cilicia, len ben' uza' yaca yedyi nebaba Asia, len ben' rio lu'u idao' sinagoga quie ben' bira naca ben' nada'o, uyu'uyaquē' huenē conlē Esteban. ¹⁰ Pero biubinyaquē' bi nayaquē' porque gualē Bichi Be quie Diuzi lēbē' bdze'nē' lu'u guichonē' bi di'idza' unēlēnē' leyaquē'. ¹¹ Quie lena' udizoyaquē' benē' ta inayaquē' di'idza' contra Esteban. Cani' unā ben' uzi' dumi rēbiyaquē' laguediyaquē':

—Nēto' bendo' unē Esteban di'idza' xi'ibi' contra Moisés len Diuzi.

¹² Cana' bējē' gan bdza' ja ben' yedyi, len ja ben' gula, len ja ben' rusēdi ley quie Moisés lēbē'. Na'ra uquiē'yaquē' lēbē', psedyinyaquē' lēbē' ga re' ben' rnabē' lao junta. ¹³ Udiloyaquē' ben' unē di'idza' falso contra lēbē'. Na' lēyaca ben' na', unayaquē' rēbiyaquē' ben' rnabē':

—Birsan ben' niga rnë' di'idza' contra idao' rnabë'ra quiero. Lëzi ruenë' contra ley pca'n xuzixta'oro Moisés. ¹⁴ Nëto' bendo' unë' udyiagui' Jesús idao' rnabë'ra quiero. Lëscan' unë' utza' Jesús costumbre quiero ta pca'n xuzixta'oro Moisés.

¹⁵ Ude beyudyi unajë' cana', na'ra una' ben' rue junta lao Esteban, pero blë'ëyaquë' beyaca laonë' ca quie lao ángel.

7

Cabë' unë' Esteban gualënë' cuinnë' lao ben' rnabë'

¹ Na'ra unabaxan' pxuzi rëbinë' Esteban:

—¿Nacan tali cabë' unayaquë'?

² Na'ra bequëbi Esteban rëbinë' leyaquë':

—Bicha', xuxa', ulezëcara nagale cabë' inia' le'e. Azio zë iza, blu'e Diuzi xuzixta'oro Abraham yela' huaca quienë' caora cati binetzesu Abraham yedyi Harán, nezunë' yu nebaba Mesopotamia. ³ Lëdza na' una Diuzi rëbinë' Abraham: "Psan diadza quio', psan yedyi quio', beyo yedyi tula ga ulu'ena' luë'." Cana' una Diuzi gudyinë' Abraham. ⁴ Por lena' uza' Abraham yu nebaba ben' Caldea, zionë' yesunë' yedyi Harán. Bi'zi cati aguti xuzi Abraham, bë Diuzi mandado beza' Abraham yedyi Harán, belanë' yedyi niga ga nita'ro na'a. ⁵ Pero bibë' Diuzi lëbë' ga gague quienë' sunë', ni siquiera tu pedazozi. Pero bega'nle Diuzi lëbë' di'idza' de que idyin dza gague quienë' ga sunë', na' bë' bagutinë' gague quie zi'inë'. Na'ra la'acazi ga nu zi'inë' nenita' caora, bega'nle Diuzi lëbë' di'idza' cana'. ⁶ Lëzi una Diuzi de que inita' zi'isuba Abraham yedyi quie ben' tula ga hueyaquë' dyin sin lazu, na' hue yaca benë' zi' quieyaquë' lao tapa gayuhua iza. ⁷ Lëscan' una Diuzi rëbinë' Abraham dza na': "Huachugobi'a quie ben' bë' zi' quieyaquë'. Te iyudyi na' yeza' zi'isuba' yedyi na' yela'jë' niga ga tzionla'adyi'yaquë' në'ëdi'." Cana' una Diuzi.

Na'ra nernë Esteban rëbinë' yaca ben' rnabë':

⁸ —Lëzi bë Diuzi mandado uzu Abraham tu xëdyidao' zi'inë' byu ta gaca seña ulu'en ca di'idza' bega'nle Diuzi lëbë'. Por lena', caora aoca tu xun' golo zi'inë' Isaac, na'ra bzunë' tu xëdyidao' lëbi'. Con ca bë Abraham lënë' zi'inë' Isaac, cana' bërë Isaac lënë' zi'inë' Jacob. Lëzi con ca bë Isaac lënë' zi'inë' Jacob, cana' bërë Jacob lënë' chipchopa zi'inë' byu. ⁹ Yela' zë' quie yaca zi'i Jacob, bëti'yaquë' tu bichiyaquë' laonë' José, uzi' ben' zio Egipto lëbë'. ¹⁰ Pero gualë Diuzi lëbë' pcuasa pcui'onë' tamala za' gaca quienë'. Cana' guca José ben' yu'u pensari, yexe rey Faraón lëbë'. Tantozi yexe Faraón José, ulionë' lëbë' ta tzionë' gague' xan' ben' rnabë' lao nación Egipto. Lëscan' ulionë' lëbë' gague' xan' ben' rue dyin lu'u lidyinë'.

¹¹ Na'ra dza na'te guca tu obin huala gula nación Egipto len nación Canaán. Fuerte bedzagalao xuzixta'oro, bibdzeleyaquë' bi gaoyaquë'. ¹² Caora unezi Jacob de que rdzela trigo nación Egipto, na'ra use'ela'në' zi'inë' gan', pero bibezaqueyaquë' chi bi' bichiyaquë' José. ¹³ Na'ra taorupe zioyaquë' bdyinyaquë' nación Egipto, caora na' una José rëbinë' leyaquë': "Në'ëdi' naca' bichile, José." Cana'ra bezaqueyaquë' lëbë'. Cana' bdyin hora unezi rey Faraón de que naca José ren quie ben' Israel. ¹⁴ Na'ra guzi José xuzinë' Jacob lente yugulu familia quienë', uza'yaquë' zioyaquë' bdyinyaquë' nación Egipto. Na'ra entre yaca ben' bdyin nacajë' tzona galo chi'inu'. ¹⁵ Cana' guca unita' Jacob nación Egipto. Na'ra caora bdyin dza quienë', gutinë'. Lëzi caora bdyinrë dza quie zi'inë', gutirëyaquë'. ¹⁶ Caora azio iza, bebio zi'i subayaquë'

chita quieyaquë' yecachi'yaquë'n yedyi Siquem. Na' bdze'yaquë' chita quieyaquë' lu'u beló ta hue' Abraham desde cana'te. Con dumi plata quienë' hue'në'n lao ja zi'i Hamor, ben' yedyi Siquem.

¹⁷ Caora cati ilë'ëti'zi idyin hora uzu Diuzi di'idza' cabë' di'idza' bega'n'lënë' Abraham dza na'te, caora na' baoye ben' Israel gucajë' ben' zë. ¹⁸ Pero uzulao rna'bë' tu rey cubi quie ben' Egipto. ¹⁹ Pues rey na', binubë'në' José. Udi-lalënë' xuzixta'oro, bënë' leyaquë' zi', uzi'në' leyaquë' yë', bënë' mandado uca'n xuzixta'oro bdao' zagolo quieyaquë' lu'u guixi' ta gatiyacabi'. ²⁰ Na'ra bdyin hora golo Moisés, pero badanla zubi'. Pero como rna'bë' rey gati bdao' quie ja ben' Israel, quie lena' pcachi' zna'bi' lëbi' lu'u yu'u. Pero cati aode tzona biu', bira uzaque'në' ucachi'në'bi' lu'u yu'u. ²¹ Quie lena' psanyaquë' lëbi' lu'u guixi', pero bezi' zi'i rey nigula lëbi', uzi'në'bi' psegulanë'bi' ca quie xcuidi' quienë'. ²² Cana' guca psëdi Moisés yugulu ta nezi ben' nación Egipto. Guquë' ben' yu'u pensari, udapala'n benë' lëbë', porque dyin dya'a bënë', di'idza' li unënë'.

²³ Chopa galo iza zunë' caora cati gu'unnë' gacalënë' laguedyinë' ben' Israel. ²⁴ Cana' zionë' yeyubinë' leyaquë' ga rueyaquë' dyin. Pero blë'ënë' tu ben' Egipto rdilalënë' tu ben' Israel. Bi'zi na' gualë Moisés laguedyinë', bëtinë' ben' Egipto. ²⁵ Pero guque Moisés de que nezi ben' Israel re'en Diuzi gacalë Moisés leyaquë' yeza'yaquë' nación Egipto. Pero biuneziyaquë' cana'. ²⁶ Bi'zi bete yu na', zezio Moisés tatula ga zu laguedyinë' bedilanë' chopa ben' Israel rdilayaquë'. Na'ra como re'en Moisés bitilayaquë', unë' rëbinë' leyaquë': "¡Bicha! ¿Bixquien' re'enle hue'le laguedyile zi'?" ²⁷ Pero bi'zi ben' rdilayaca bdyiganë' Moisés tzala'la, unë' rëbinë' lëbë': "¿Nu ulio luë' rna'bë'lo' nêto' ca juez quiendo?" ²⁸ ¿Quele re'enlo' gutio' nê'ëdi' ca bëtio' ben' Egipto niogue?" ²⁹ Cati be Moisés ca unë', na'ra zeyonë' hue'uno yesunë' yu nebaba Madián. Cana' uzunë' yedyi tula, yedyi binacan quienë', ptzagana'në' uzu chopa zi'inë' byu.

³⁰ Caora baguca ichopa galo iza tu lu'u guixi', na' zu tu lato dachi ruen ga'ala' ga zu tu ya'a laona Sinaí ga bdyin tu ángel ptilalaonë' Moisés. Na' uzë ángel na' lu'u tu yaga yëchi' ra'ala'n yu'un gui'. ³¹ Caora blë'ë Moisés ángel na', tu bega'nzinë' rebannë'. Cati ubiga'në' ga'ala' tacuenda ilë'ënë' dyë'ëdi, caora na' una Diuzi rëbinë' lëbë': ³² "Nê'ëdi' naca' Diuzi quie xuzixta'olo' Abraham, len xuzixta'olo' Isaac, len xuzixta'olo' Jacob." Caora be Moisés ca una Diuzi, rzizinë' rdzebinë' ina'në' mazera. ³³ Na'ra unëra Diuzi rëbinë' Moisés: "Ulëcho huarache quio' porque naca la'ya ga zëlo'. ³⁴ Pues abeda' rulidza ja ben' quia' nita' Egipto nê'ëdi'. Ablë'ëda' ca redzagalaojë'. Baoyëza' ta ute usela' leyaquë'. Udacara, ise'ela' luë' nación Egipto." Cana' una Diuzi rëbinë' Moisés.

³⁵ Na'ra nernë Esteban rëbinë' leyaquë':

—Ba'ala'cazi biueyëzila'adyi' yaca ben' Israel Moisés, ba'ala'cazi unayaquë' rëbiyaquë' Moisés: "¿Nu ulio luë' ta inabë'lo' nêto' ca juez quiendo?", na' use'ela' Diuzi Moisés ta inabë'në' ute uselanë' leyaquë'. Conlë ángel, ben' ptilalao lëbë' lu'u yaga yëchi', use'ela' Diuzi Moisés. ³⁶ Na'ra lëMoisés ulionë' xuzixta'oro hora beza'yaquë' beroyaquë' nación Egipto, bënë' yela' huaca quie Diuzi ga re' tu nisadao' laona Nisadao' Zna. Lëscan' bënë' yela' huaca quie Diuzi hora uda yaca ben' Israel gabi yu'u dyia chopa galo iza. ³⁷ Lëzi lëMoisés unë' rëbinë' ben' Israel: "De entre le'e huabio Diuzi itu ben' ina le'e xti'idza' Diuzi laga con ca ulionë' nê'ëdi'. Ulehue bala ca inë' le'e." ³⁸ Lëscan' lëMoisés na' ziolënë' ben' Israel cati uza'yaquë' udayaquë' tu paraje gabi yu'u

dyia lao chopa galo iza. Conlë Moisés na' bè'lë ángel di'idza' lë'yë ya'a Sinaí. Lëbë' uidxogue'në' xuzixta'oro di'idza' bè'lë ángel lëbë'. Lëdi'idza' na', di'idza' neban, pca'n Moisés para ra'o.

³⁹ 'Pero bigule xuzixta'oro di'idza' pca'n Moisés. Gu'unyaquë' uza'la'adyi'jën ya'za'jën yeyoyaquë' nación Egipto tatula. ⁴⁰ Cati nezio Moisés lë'yë ya'a, caora na' unayaquë' rëbiyaquë' Aarón, ben' xan' pxuzi: "Re'ennodo' huelo' chopa tzona diuzi ta hua'aro tu neza ta ucuasa ucu'ón ra'o bi tamala za' gaca quiero, porque binezindo' bi guca quie Moisés, ben' ulio ra'o nación Egipto." ⁴¹ Na'ra bzaloyaquë' tu bëdyihuaga dao' de oro. Bëtirëyaquë' tu beco' zi'ila' bdyiayaquë'ba' lao bëdyihuaga de oro ca gun quieba'. Lega yexeyaquë' diuzi bëyaquë' na'aziyaquë'. ⁴² Cana' psanla'adyi' Diuzi leyaquë' ta tzionla'adyi'yaquë' yaca tadyia guibá. Quie lena' guca quieyaquë' con ca rna lë'yë guichi bë yaca profeta ga rguixogue'n ca una Diuzi: Le'e ben' Israel, ¿para në'ëdi' bëtile bia bdyialeba' ru'aba dza rdale lao lato dachi chopa galo iza?

⁴³ Quele para në'ëdi', pero bële con na'azile diuzi uyonla'adyi'le.

Nu'ale tu rumita dao' de la'ari' quie Moloc.

Nu'arële tu ta naca forma quie bëlo, laona Renfán.

Lena' unale naca Diuzi quiele.

Quie lena' hua' castigo quiele, huabioga' hualao'hua' le'e yedyi quiele tzirole zitu', tzesule yedyi quie ben' tula yedyi laona Babilonia.

Cana' una Diuzi gudyinë' xuzixta'oro dza na'te.

⁴⁴ Na'ra nernë Esteban rëbinë' leyaquë':

—Dza rda xuzixta'oro lao lato gabi yu'u dyia, nu'ayaquë' tu yu'u de la'ari', lena' gucan idao' quieyaquë'. Lu'en na' bzuyaquë' yaca yo ta'a ga bzu Diuzi ley quienë'. Lëyu'u de la'ari' na', bëyaquë'n con ca una Diuzi hueyaquë'n, porque Diuzi blu'enë' Moisés ca re'ennë' hue ben' Israel yu'u de la'ari'. ⁴⁵ Na'ra bdyin dza aguti Moisés. Caora na' ulio Diuzi tu ben' lao Josué gaquë' ben' rnabë' quie xuzixta'oro lao laza Moisés. Bi'zi lao na'a Josué bdyin xuzixta'oro layu ga bega'n'lë Diuzi leyaquë' di'idza' gaca layu quieyaquë'. Caora na' gualë Diuzi leyaquë' blaonë' ben' nita' layu na' zioyaquë' hue'zuno. Lao na'a Diuzi bëyaquë' gan, bzuyaquë' yu'u de la'ari' layu quieyaquë' bë' bdyinjë' na'. Cana'zi bega'n'nan hasta bdyin dza rda rey David. ⁴⁶ Pero rey David, lega nedyë'ë Diuzi lëbë'. Caora na' gu'un rey David huenë' tu idao' zegula ga inita' Diuzi. ⁴⁷ Pero quele rey David bënë'n nechan' zi'inë' Salomónla bënë'n. ⁴⁸ Pero sibila zu Diuzi, binita'në' lu'u idao' ta bë benë'zi. Lena' nacan de acuerdo con ca una Diuzi caora unë':

⁴⁹ Naca ladza ca quie xlatoga' ga ri'a.

Naca yedyi layu ca quie lato ga rezila'adyi' ni'a.

¿Ca bi cue' yu'u huele para në'ëdi'?

¿Ga'zi naca lato ga yezila'adya'?

⁵⁰ ¿Bi'zi binezile conlë na'a bia' yugulu ta de?

Cana' una Diuzi gudyinë' xuzixta'oro dza na'te.

⁵¹ Na'ra nernë Esteban rëbinë' leyaquë':

—Yela' zidi quiele birioñe'ele ruele ca ben' binubë' Diuzi. Siempre biralele quie Bichi Be quienë'. Ruele tamala laga con ca bë xuzixta'oro. ⁵² ¿Nu ben' profeta biudilalë xuzixta'oro? Leyaquë' bëtiyaquë' ben' uidxogue' de que guida Cristo. Bi'zi cati bidë' detë'ë lao yedyi layu, le'e udaole lëbë' xquia, unële di'idza' contra lëbë', bëtilenë'. ⁵³ Pca'n Diuzi ley quienë' lao na'a Moisés para le'e, pero le'e, biralele quien.

Cabë' guca bëtiyaquë' Esteban

⁵⁴ Na'ra ude beyudyi be yaca ben' r nabë' ca una Esteban, mazera bdza'tzegueyaquë' lëbë'. ⁵⁵ Pero Esteban, du yu'unë' Bichi Be quie Diuzi, una'në' guibá blë'ënë' xni' gui' ga zu Diuzi. Blë'erënenë' zë Jesús zaquë' yebë quie Diuzi. ⁵⁶ Na'ra una Esteban rëbinë' yaca ben' r nabë':

—¡Ulena'cara! Rlë'ëda' uyaló guibá ga zu Diuzi. Rlë'ëda' ben' naca bichi yugulo benë'. Zënë' zaquë' yebë quie Diuzi.

⁵⁷ Pero lapsiote yaca ben' r nabë' nagayaquë', urediya'yaquë' zidzo, ⁵⁸ labëxoteyaquë' uquië'yaquë' lëbë' ru'a yedyila. Caora na' ulëchayaquë' gaban quieyaquë' pca'nyaquë'n lao na'a tu ben' cuidi' laonë' Saulo. Na'ra uzulaoyaquë' rguiaquë' lëbë' yo ta gatië'. ⁵⁹ Pero du rguiaquë' Esteban yo, blidzë' Jesús rëbinë' lëbë':

—Señor Jesús, bezi' në'ëdi' yeguida' ga zulo'.

⁶⁰ Na'ra uditzu Esteban zibinë', unë' zidzo rëbinë' Jesús:

—Señor, uzi'ze quieyaquë' rueyaquë' xquia rutiyaquë' në'ëdi'.

Ude beyudyi unë' cana', gutinë'.

8

Saulo bënë' contra ben' quie Jesús

¹ Na'ra redaohue Saulo dan' bëtiyaquë' Esteban. ² Bizi caora bagutinë', uyo chopá tzona ben' rue quie xti'idza' Diuzi bi'ayaquë' cuerpo quienë' ta yecachi'yaquë'. Legazi rbediyaquë' raqueyaquë' bayëchi'. Caora na' uzulao yaca benë' usacayaquë' bizinaquezi ben' quie Jesús, ben' nita' ciudad Jerusalén. ³ Cana' guca zëdi quie ben' quie Jesús, porque bipsan Saulo bënë' contra leyaquë'. Uyu'unë' lu'u yu'u quie quieyaquë', ulionë' leyaquë' lu'u yu'u quiejë' udze'në' leyaquë' lu'u dyiguiba, la'achi nigula, la'achi be'mbyu.

Caora yetixogue' ja ben' quie Jesús xti'idza' Diuzi estado Samaria

⁴ Quie lena' bdzatza yaca ben' quie Jesús zioyaquë' yedyi tula, zioyaquë' yedyi re' estado Judea len yedyi re' estado Samaria. Pero biuza' yaca apóstol, bega'nyaquë' ciudad Jerusalén. Na' yaca ben' bedzatzaja uza' ciudad Jerusalén, zioyaquë' rguixogue'yaquë' benë' xti'idza' Diuzi tu tu yedyi ga bdyinyaquë'. ⁵ Uza'rë tu ben' quie Jesús laonë' Felipe. Uzë'ë zionë' tu yedyi quie estado Samaria. Caora bdyinnë' gudyinë' yaca ben' yedyi na' de que naca Jesús ben' Cristo, ben' use'ela' Diuzi. ⁶ Na'ra labedupate ben' yedyi na', labzënegateyaquë' xti'idza' Felipe, porque blë'ëyaquë' ruenë' yela' huaca quie Diuzi. ⁷ Caora na' beyue Felipe yaca ben' yu'u taxi'ibi'. Bero yaca taxi'ibi' ga yu'uyacan urediya'yacan. Lëscan' beyuenë' ben' zi, beyacayaquë'. ⁸ Quie lena' lega bedaohue yaca ben' yedyi na'.

⁹ Pero yedyi na' ga uyo Felipe, uzu tu ben' rue brujo laonë' Simón. Yela' brujo quienë', uzi'në' ben' quie Samaria yë' unë' naquë' ben' belao, ben' bala'ana. ¹⁰ Por lena' bzënegayaquë' ca gudyinë' leyaquë' la'achi xcuidi', la'achi ben' huaca. Yugulujë' bëyaquë' lëbë' caso, unayaquë' rëbiyaquë' laguediyaquë':

—Ben' ni ruenë' yela' huaca quie Diuzi.

¹¹ Na'ra azio zë iza uzi'në' leyaquë' yë'. ¹² Pero caora bdyin Felipe, gudyinë' leyaquë' quie yela' r nabë' quie Diuzi, gudyirënë' leyaquë' con cabë' una Jesús, caora na' guleyaquë' quienë'. Por lena' bë' Felipe laoyaquë', tanto nigula como ca be'mbyu. ¹³ Hasta cuin Simón gulerënë' di'idza' quie Jesús, bë'rë Felipe laonë'. Caora na' udalënë' Felipe tuze, pero tu bebanzinë' ca yela' huaca quie Diuzi bë Felipe.

¹⁴ Caora unezi ja apóstol nita' ciudad Jerusalén de que uyezila'adyi' ben' Samaria xti'idza' Diuzi, na'ra use'ela'yaquë' Pedro len Juan zioyaquë' na'.
¹⁵ Caora bdyinyaquë' na', blidzayaquë' Diuzi unabayaquë' Diuzi uchizë' Bichi Be quienë' tzu'unë' lu'u guicho laxta'o ben' Samaria barale quie Jesús,
¹⁶ porque binetzu'u Bichi Be quie Diuzi lu'u guicho laxta'oyaquë'. Caora cati bë' Felipe laoyaquë' dza na'te, tu bzëtozinë' lao Jesús, quele uyu'uyaquë' Bichi Be quie Diuzi. ¹⁷ Quie lena' bda' Pedro len Juan na'ayaquë' guichoyaquë', laoyu'uteyaquë' Bichi Be quie Diuzi.

¹⁸ Caora blë'ë Simón cabë' bëyaquë' uyu'u Bichi Be quie Diuzi lu'u guicho laxta'o benë' cati bda'yaquë' na'ayaquë' guicho benë', ¹⁹ na' unë' rëbinë' ben' apóstol:

—Gacatezi dumi inabo' naguna'n, chi ulu'ele nët'ëdi' bi hua' tacuenda tzu'u Bichi Be quie Diuzi lu'u guicho laxta'o benë' cati uda'a na'a guichoyaquë'.

²⁰ Na'ra bequëbi Pedro rëbinë' Simón:

—Udyiagui' Diuzi luë' lente dumi plata quio', porque raco' pensari huazi' Diuzi dumi plata tacuenda uchizané' Bichi Be quienë' tzu'unë' lu'u guicho laxta'o benë'. ²¹ Bide lato ni derecho quio' huelao' nët'o' tuze, porque bineyëri laxta'olo' lao Diuzi, ²² psan tamala quio'. Unaba lao Diuzi chi yezi'zenë' pensari median quio'. ²³ Ca quie nisa sla' ratza ja benë' naco'. Yela' mala quio' naco' ca quie ben' de lu'u dyiguiba.

²⁴ Na'ra una Simón rëbinë' apóstol:

—Huele cule inabale lao Diuzi yezi'zenë' quia', bigaca quia' con ca baonale nët'ëdi'.

²⁵ Caora ude beyudyi udixogue' apóstol yaca ben' nita' na' xti'idza' Diuzi, na'ra beza'yaquë' zeyoyaquë' ciudad Jerusalén, rguixogue'rëyaquë' ben' Samaria nita' tu tu yedyi ga bedeyaquë' xti'idza' Diuzi.

Bedila Felipe tu ben' Etiopía tu neza ga zionë'

²⁶ Ude beyudyi na', bdyin tu ángel quie Diuzi ga zë Felipe rëbinë' lëbë':

—Uzi', uyo tu lao lato ga bidyia yu'u, ga rde neza za' ciudad Jerusalén para yedyi Gaza.

²⁷ Na'ra uzi'në' zionë'. Du tu neza na', zeza' ben' bedilanë', ben' nación Etiopía. Ben' na' naquë' eunuco, ben' rapa dumi quie tu nigula lao Candace. Naca Candace reina quie nación Etiopía. Pues ben' na' uyonë' ciudad Jerusalén ga uyonla'adyi'ne' Diuzi. ²⁸ Caora na' re'në' lu'u tu carro dao' ra'ala' chopa bia zeyonë' yedyinnë' yedyi quienë'. Na'ra du re'në' lu'u carro dao', rna'në' guichi quie ben' profeta Isaías. ²⁹ Caora na' una Bichi Be quie Diuzi rëbinë' Felipe:

—Uyo tzenao' ben' re' lu'u carro dao'.

³⁰ Cana' zio Felipe ga re'në', pero benë' rnënë' di'idza' quie ben' profeta Isaías. Caora na' una Felipe rëbinë' lëbë':

—¿Rioñe'elo' bi na di'idza' rnëlo'?

³¹ Na'ra unë' rëbinë' Felipe:

—¿Biži hua' tzioñe'eda' con ca rna lë'ë guichi, chi ganu dyla' uzioñe'e nët'ëdi'?

Ude beyudyi unë' cana', gudyinë' Felipe cuënë' lu'u carro ta cue'në' cuëtë'.

³² Na'ra parte gan blabanë' xti'idza' Diuzi rnën cani:

Naca quienë' ca quie beco' ži'ila' guti benë'.

Lëzi naca quienë' ca quie tu beco' ži'ila' rchugu benë' guitza' quieba', pero bibi unë'.

³³ Ptitoyaquë' lëbë'.

Bibëyaquë' justicia quienë'.

¿Biži huero inaro quie ben' yedyi quienē?

Porque mero leyaquē' bētiyaquē' lēbē'.

³⁴ Ude beyudyi unē' lē'ē guichi, na'ra unē' gudyinē' Felipe:

—Una nē'ēdi' chi una ben' profeta quiē' cuinnē' o chi unē' quie ben' tula.

³⁵ Caora na' uzulao Felipe rzioñē'enē' lēbē' con ca rna lē'ē guichi gudyinē' lēbē' con ca guca quie Jesús. ³⁶ Biži cati bdyinyaquē' ga zu nisa, una ben' Etiópía rēbinē' Felipe:

—Abdyinro ga zu nisa. ¿A ver bi ca nao' luē', chi bisaque' hue'lo' laohua' nē'ēdi' niga?

³⁷ Na'ra una Felipe rēbinē' lēbē':

—Chi ralelo' quie Jesús du guicho du la'adyo', huazaque' hua' laolo' luē' niga.

Na'ra bequēbi ben' na' unē':

—Du guicho du la'adya' raleda' naca Jesucristo ži'i Diuzi.

³⁸ Cana' bē ben' na' mandado cueza carro dao' quienē' ziolēnē' Felipe ru'a nisate, uyu'uyaquē' lu'u nisa bē' Felipe laonē' lēbē'. ³⁹ Catí beroyaquē' lu'u nisa, laoquiē'te Bichi Be quie Diuzi Felipe. Bira blē'ē ben' na' lēbē'. Pero ben' na', lega redaohuenē' beza'nē' zeyonē' xquiedyiné'. ⁴⁰ Na'ra labedyinte Felipe tu yedyi laona Azoto. Hora na' bedenē' yedyi tu yedyi rēbinē' benē' xti'idza' Jesús con ca guca quienē' hasta bdyinnē' ciudad Cesarea.

9

Cabē' uzaca Saulo tu neza Damasco

(Hch. 22.6-16; 26.12-18)

¹ Na'ra bipsancazi Saulo yela' rdza' quienē' re'ennē' gutinē' ben' quie Jesús.

² Por lena' uyonē' yanabē' guichi lao xan' pxuzi tacuenda tzionē' tzedilanē' huenē' preso nu ben' rnao xneza Jesús ciudad Damasco. Gu'unnē' tzu'unē' idao' sinagoga quieyaquē' guxonē' ise'ela'nē' leyaquē' ciudad Jerusalén, chi be'mbyu, chi nigula. ³ Pero ilē'ēti'zi binedyinnē' yedyi, cati uyēzi tu xni' guí' za'n sibi guibá yatilan lēbē' ga zionē'. ⁴ Caora na' bđinē' yu, benē' unē' Jesús rēbinē' lēbē':

—Saulo, ¿bixquien' ru' contra nē'ēdi'?

⁵ Na'ra unaba Saulo:

—¿Nuži luē', Señor?

Hora na' unē' Jesús tatula, rēbinē' lēbē':

—Nē'ēdi' laohua' Jesús. Naca' ben' ruelo' contra. Pero cala nē'ēdi' ru' contra, nechan' contra cuinzo' ruelo' ca quie tu bēdyi huaga rulibiba' nu lē'ē yaga duchi' nu'a xa'mba' ta rulaohuē'ba'.

⁶ Pero du rdzebi, du rzizi Saulo, unē' rēbinē' Jesús:

—¿Biži ca re'enlo' hua', Señor?

Na'ra una Jesús, rēbinē' lēbē':

—Beyasa, uyo ciudad Damasco. Bē' bazulo' ciudad na', naise'ela' ben' ina luē' bi huelo'.

⁷ Na'ra uyasa Saulo gan denē' layu. Caora bexa' laonē', biblē'ēnē'. Pero yaca ben' ziolēnē', lega bdzebiyaquē', porque biblē'ēyaquē' nu ben' blidza Saulo. ⁸ Caora na' bēxoyaquē' nē'ē uquiē'yaquē' lēbē' ciudad Damasco, ⁹ pero lao tzona dza bibi blē'ēnē', bibi udaonē', bibi hue'enē'.

¹⁰ La ciudad Damasco zu tu ben' quie Jesús laonē' Ananías. Caora na' ptilalao Jesús lēbē' ga zē' rulidzē' lēbē':

—Ananías.

Pero ca quie ben' uxusa guca quienē' benē' unē' Jesús. Na'ra una Ananías:

—Ni zua', Señor.

¹¹ Na'ra una Jesús rëbinë' lëbë':

—Uzi', uyo ga rde tu lecan laona lecan li. Tziolo' lidy Judas, na' yedzelelo' tu ben' yedy Tarso laonë' Saulo. Huelao'në' di'idza', porque rulidzanë' në'ëdi'. ¹² Gaca quië' ca tu ben' rxusazi ilë'ënë' luë'. Na' uda'lo' nao' guichonë' tacuenda yelë'ënë'.

¹³ Caora be Ananías ca una Jesús, na'ra unë' rëbinë' lëbë':

—Señor, zë lasa babeda' cabë' rue Saulo. Legazi bënë' median contra yaca ben' quio' nita' ciudad Jerusalén. ¹⁴ Na' baza'në' ni, nu'anë' guichi quie yaca xan' pxuzi. Conlë guichi na' de yela' rnabë' quië' ta guxonë' huenë' preso nu ben' rulidza luë'.

¹⁵ Pero una Jesús, rëbinë' lëbë':

—Uzi', uyo ga bdyinnë', porque ulioga' lëbë' tzeguedyinnë' ben' quie nación tula, len yaca rey quieyaquë', len ben' Israel di'idza' la'iya quia'. ¹⁶ Na' hue'lia'në' di'idza' cabë' yedzagalaonë' yëbinë' benë' di'idza' la'iya quia'.

—Cana' una Jesús gudyinë' Ananías.

¹⁷ Na'ra uza' Ananías zionë' bdyinnë' yu'u ga bdyin Saulo, bda'në' në'ë guicho Saulo, unë' rëbinë' lëbë':

—Bicha' Saulo, Señor Jesús, ben' ptilalao luë' tu neza ga za'lo', lëbë' use'ela'në' në'ëdi' baza' niga tacuenda yelë'ëlo' tzu'ulo' Bichi Be quie Diuzi.

—Cana' una Ananías gudyinë' Saulo.

¹⁸ Hora na' bro tu ta naca ca žeza' bela lu'u lao Saulo belë'ënë' tatula. Na'ra uyasë' bë' Ananías lëbë' laohuë'. ¹⁹ Ude beyudyi na' beyaonë' bezi'në' fuerza, bega'nnë' ciudad Damasco chopa tzona dza yeyubinë' ben' quie Jesús zuyaca na'.

Saulo na' udixogue'në' benë' xti'idza' Diuzi ciudad Damasco

²⁰ Na'ra uzulao Saulo rguixogue'në' ben' Israel, ben' nita' Damasco de que naca Jesús zi'i Diuzi. Rionë' lu'u sinagoga quieyaquë' rëbinë' leyaquë' xti'idza' Diuzi. ²¹ Cana' tu rebanzi yaca ben' be ca una Saulo, unayaquë' rëbiyaquë' laguedyijë':

—¿Cala lëbë' bënë' contra ben' quie Jesús, ben' nita' ciudad Jerusalén? ¿Cala lëbë' bla'në' ni ta huenë' ben' quie Jesús preso, usedyinnë' leyaquë' lao na'a yaca xan' pxuzi? —Cana' unayaquë' quie Saulo.

²² Pero birdzebi Saulo rguixogue'në' leyaquë' de que naca Jesús ben' use'ela' Diuzi. Blu'enë' leyaquë' lë'ë guichi la'iya quie Diuzi ga rnën naca Jesús ben' Cristo. Bënë' gan biubin yaca ben' Israel, ben' nita' ciudad Damasco, bi inayaquë' quienë'.

Ula Saulo bibëti yaca ben' Israel lëbë'

²³ Pero bazio zë dza zunë' na', na'ra guca yaca ben' Israel de acuerdo ta gutiyaquë' Saulo. ²⁴ Lena' yugu dza, yugu yela, ure'yaquë' neza ru'a yedyi tacuenda guxoyaquë' gutiyaquë' lëbë'. Pero unezi Saulo cabë' gu'unyaquë' hueyaquë' quienë'. ²⁵ Hora na' du rtze', uquië' ben' quie Jesús lëbë', urëyaquë' ga zu tu ventan ze lë'ë besu zio ru'a yedyi, uyu'unë' lu'u tu chicuiti ze ta uchizayaquë' lëbë' layu tacuenda ulanë' zionë' ciudad Jerusalén.

Ca guca quie Saulo bedyinnë' ciudad Jerusalén

²⁶ Caora bedyinnë' ciudad Jerusalén gu'unne' huelënë' ben' quie Jesús tuze. Pero rdzebiyaquë' lëbë', porque bineneziaquë' chi tali banaquë' ben' quie Jesús. ²⁷ Por lena' uquië' Bernabé lëbë' ga nita' ja apóstol yaguëdyinë' leyaquë' cabë' guca quie Saulo blë'ënë' Jesús tu neza Damasco, bëlë' Jesús lëbë' di'idza', birdzebinë' udixogue'në' ben' Damasco xti'idza' Diuzi. ²⁸ Hora

na' uyezila'adyi'yaquë' lëbë' bega'nlënë' leyaquë' ciudad Jerusalén. ²⁹ Na'ra birdzebinë' uzulaonë' rguixogue'në' benë' xti'idza' Diuzi. Uyu'unë' huenë lënë' tu cue' ben' Israel, ben' raca di'idza' griego, pero ure' unaoyaquë' bi hueyaquë' ta gutiyaquë' Saulo. ³⁰ Caora unezi los demás ben' quie Jesús de que re'enyauquë' gutiyaquë' lëbë', uquië'yaquë' lëbë' ciudad Cesarea, na'tera use'ela'yaquë' lëbë' yedyi Tarso.

³¹ Na'ra ja ben' quie Jesús nita' yedyi quie estado Judea, len ben' nita' estado Galilea, len ben' nita' estado Samaria, uzujë' contento. Du guicho du la'adyi'jë' unaojë' xneza Jesús. Yugu dza rapala'nyaquë' Diuzi gualë Bichi Be quie Diuzi leyaquë'. Cana' mazera uye ben' blë' leyaquë' tuže.

Beyaca tu ben' zi, ben' lao Eneas

³² Caora na' rio Pedro rayubinë' ben' quie Jesús con bi yedyi nita'yaquë'. Cana' uyonë' yeyubinë' yaca ben' quie Jesús, ben' nita' yedyi Lida. ³³ Lëyedyi na' yatilanë' tu ben' zi laonë' Eneas. Azio xuna iza denë' lao belaga nažinë'.

³⁴ Na' una Pedro rëbinë' lëbë':

—¡Eneas, hueyue Jesucristo luë'! ¡Uyasa, beyue laze belaga quio'!

Na'ra caora uyasë', labeyacatenë'. ³⁵ Bizi na' caora blë'ë yugo ben' yedyi Lida len yugo ben' yedyi Sarón cabë' guca quienë' beyacanë', cana'ra psanyaquë' costumbre gula quieyaquë' unaoyaquë' xneza Jesús.

Cabë' guca beban tu nigula baguti lao Dorcas

³⁶ Na'ra dza na'te uzu tu nigula yedyi Jope laonë' Tabita. Na' di'idza' griego laorënë' Dorcas. Naquë' ben' nao xneza Jesús. Yugu dza gualënë' ben' yëchi', bënë' leyaquë' ta de quienë'. ³⁷ Biži na' bdyin dza guca žhue'në' gutinë'. Caora na' bgazujë' lëbë' yao uxubayaquë' lëbë' sibi tu lu'u cuarto chopa xcuia.

³⁸ Na'ra como uneziyaquë' yedyi Lida zu Pedro, lëscan' como re'n ga'ala'zi, use'ela'jë' chopa be'mbyu tzenabayaquë' Pedro, chi bisaque' së'ë luegozi.

³⁹ Na'ra uza' Pedro ziolënë' leyaquë'. Caora bedyinyaquë' uquië'yaquë' lëbë' lu'u cuarto chopa xcuia ga de nigula. Lu'u cuarto na' nita' ja nigula guti xquiuhue rbedyiaquë', blu'eyaquë' Pedro vestido quieyaquë' ta bë Dorcas cati nezunë'. ⁴⁰ Na'ra bë Pedro mandado yero ja nigula lu'u cuarto. Caora beroyaquë', uditzu žibinë' blidzë' Diuzi. Ude beyudyi na', byëchunë' una'në' ben' huati, unë' rëbinë' lënë':

—Tabita, uyas.

Cati una Pedro cana', labeža'te lao nigula, una'në' Pedro uyananë'. ⁴¹ Bëxu Pedro na'anë' gualënë' lëbë' uzulinë'. Na'ra beyëži Pedro yaca nigula guti xquiuhue lente los demás ben' quie Jesús. Blu'enë' leyaquë' de que neban Dorcas. ⁴² Na'ra yugulo ben' yedyi Jope uneziyaquë' cabë' guca quie nigula na'. Caora na' uzulao zëyaquë' naoyaquë' xneza Jesús. ⁴³ Na'ra zë dza bega'n Pedro yedyi Jope. Uzunë' lidyi tu ben' lao Simón, ben' ruti' zaba bëdyihuaga.

10

Pedro na' ptilanë' tu ben' lao Cornelio

¹ Na'ra ciudad Cesarea uzu tu ben' laonë' Cornelio. Naquë' xan' tu gayuhua soldado. Na' naca soldado quienë' tu cue' ben' italiano. ² Lëbë' lente yugulu familia quienë' udapala'nyaquë' Diuzi. Gualënë' ben' Israel, bënë' caridad quiejë', rulidzë' Diuzi yugu dza. ³ Biži bdyin dza blë'ë Cornelio tu ángel quie Diuzi. Uzë ángel na' bdyinnë' ga zë Cornelio. Zadze' cadu las tres guca quienë' cana'. Pero ca quie ben' uxusa guca quië' blë'ënë' lëbë'. Na'ra una ángel na' rëbinë' lëbë':

—Cornelio.

⁴ Du rdzebi Cornelio una'në' ángel rëbinë' lëbë':

—¿Bi nao', Señor?

Na'ra una ángel rëbinë' Cornelio:

—Raxe Diuzi ca di'idza' ru'elo'në', lëscan' raxenë' ca ruelo' ru'elo' ben' yëchi' caridad. ⁵ Hora na' ise'elo' chopa tzona ben' tzio yedyi Jope tzexi'yaquë' tu ben' lao Simón Pedro. ⁶ Zunë' zan yu'u quie tu ben' laorë Simón, ben' ruti' guidi. Zu yu'u quienë' ga'ala' ru'a nisadao'.

⁷ Ude beyudyi una ángel cana', zeyonë'. Caora na' beyëzi Cornelio chopa bi' criado quienë' len tu soldado quienë', ben' rapala'n Diuzi, ben' de confianza, ⁸ gudyinë' leyaquë' con cabë' guca quienë', na' use'ela'në' leyaquë' yedyi Jope.

⁹ Na' beteyu, tu nezioyaquë' tu neza ga'ala' ga zu yedyi Jope, caora na' cadu la'odza urë Pedro lun yu'u, como naca lun yu'u quiejë' ba'a. Na'ra zënë' guicho yu'u na' uzulaonë' ru'elënë' Diuzi di'idza'. ¹⁰ Hora na' rduenë' unabë' hue ben' ga zunë' ta gaonë'. Pero tu neru'eyaquë' laze ta gaonë', cati guca quienë' ca quie ben' rxusa. ¹¹ Caora na' blë'ënë' uyalo guibá, uyëzi tu ta naca ca quie tu la'ari' yua' nerio idapa isquinan. ¹² Laona na' dyila' zë cue' bia guixi', bia dyia tapa ni'e, len zë cue' bëla len bguini. ¹³ Caora na' be Pedro una tu ben' rëbinë' lëbë':

—Pedro, uyasa. Bëtiba', udaoba'.

¹⁴ Na'ra una Pedro:

—Bigaohua'ba', Señor, porque ni tu lasa binegaohua' tu ta biru'en lato gaohua'.

¹⁵ Na' be Pedro una ben' na' tatula rëbinë' lëbë':

—Tu ta aona Diuzi gaolo', binao' biru'en lato gaolo'n.

¹⁶ Beyunate lasa guca quie Pedro cana', na'ra beyëpi la'ari' yua' zeyon guibá tatula. ¹⁷ Neraque Pedro bi re'en inë di'idza' unë ben' na' cati bdyin ben' use'ela' Cornelio ru'a yu'u. Rdayaquë' reguiloyaquë' lidyí Simón. ¹⁸ Caora na' bdyinyaquë' unayaquë' zidzo chi zu Simón, ben' laorë Pedro, zan yu'u. ¹⁹ Neraca Pedro pensari cabë' naca ta blë'ënë', caora cati unë Bichi Be quie Diuzi rëbinë' lëbë':

—Abdyin tzona ben' reguilo luë'. ²⁰ Beyëzi, beyolëyaquë'. Bidëbo' bibi gaca quio', porque në'ëdi' bia' mandado dexi'yaquë' luë'.

²¹ Na'ra beyëzi Pedro yetilanë' leyaquë' unë' rëbinë' leyaquë':

—Në'ëdi' reguilole. ¿Nuži use'ela' le'e za'le niga?

²² Na'ra unayaquë' rëbiyaquë' Pedro:

—Nëto' za'ndo' mandado quie capitán Cornelio. Naca Cornelio tu ben' bala'ana, ben' rionla'adyi' Diuzi. Rapala'n yugulu ben' Israel lëbë'. Na'ra bla'ndo' ni, porque niogue bdyin tu ángel quie Diuzi lidyí Cornelio gudyinë' lëbë' ta guidando' dexi'ndo' luë' tacuenda uzënaga Cornelio bi di'idza' yëbo'në'.

²³ Na'ra uzi' Pedro leyaquë' lu'u yu'u bega'nyaquë' tu yela. Caora cati beteyu, uyasayaquë' ziolë Pedro leyaquë'. Lëzi uquië'rë Pedro chopa tzona ben' nao xneza Jesús, ben' nita' yedyi Jope.

²⁴ Na'ra cadu zila dza urupe bedyinyaquë' ru'a ciudad Cesarea. Caora na' guži Cornelio diadza quie' len nu amigo zudyi'ilënë' tacuenda cuesayaquë' idyín Pedro. ²⁵ Cati bdyin Pedro ru'a yu'u, hora na' zio Cornelio yetilë' lëbë', uditzu žibinë' lao Pedro, uyonla'adyi'në' lëbë'. ²⁶ Pero belisa Pedro lëbë' unë':

—Uzuli, lëzi benë'zi ca luë' naca'.

²⁷ Du ru'eyaquë' di'idza', uyu'uyaquë' lu'u yu'u quie Cornelio, bl'ë Pedro babedupa ben' zë lu'u lidyinë'. ²⁸ Na'ra una Pedro rëbinë' leyaquë':

—Dyë'ëdi banezile con ca naca costumbre quiendo' ben' Israel. Nacan zudyi huelëndo' ben' binaca ben' Israel tuze. Ni siquiera ta tzu'undo' lu'u yu'u quieyaquë' biru'en lato. Pero na'a sí, abzioñe' Diuzi n'ë'ëdi' de que bireya'ala' inia' biru'en lato huelia' ben' binaca ben' Israel tuze. ²⁹ Por lena' bibi zëdi bia' za'lia' yaca ben' use'elo' dexti' n'ë'ëdi'. Na' biži, ¿ca re'enlo' hua'?

³⁰ Na'ra una Cornelio rëbinë' Pedro:

—Azio tapa dza na', cadu hora na'a, zua' žan yu'u niga rua' ubasi rulidza' Diuzi. Caora na' detilalao tu ben' naco la'ari' bezëri di n'ë'ëdi'. ³¹ Na' una ben' na' rëbinë' n'ë'ëdi': "Cornelio, re Diuzi hora rulidzo' lëbë'. Lëzi rlë'ënë' hora ru'elo' ben' yëchi' caridad. ³² Na' pse'ela' ben' quio' yedyi Jope tzexi'yaquë' tu ben' lao Simón Pedro. Zuë' žan lidyi itu ben' lao Simón, ben' huëti' guidi. Huedzelejë' lidyinë' zunë' ga'ala' ru'a nisadao'. Caora babla'në' quio' na', hue'lënë' luë' di'idza'." ³³ Pues beyudyi unë' cana', laose'ela'tia' mozo quia' dexi'yaquë' luë'. Babao' tu huen blao' niga. Hora na' rlë'ë Diuzi nita'ro niga tacuenda uzënağando' di'idza' re'en Diuzi inao' nëto'.

Caora bdze' Pedro di'idza' lidyi Cornelio

³⁴⁻³⁵ Na'ra una Pedro rëbinë' leyaquë':

—Hora sí, aoyoñe'eda' de que tuzi ca rue Diuzi yeyëchi'la'adyi'në' nu ben' huen, ben' rapala'n lëbë', chi ben' Israel, chi ben' quie nación tula. ³⁶ Una Diuzi dza na' gudyinë' nëto' ben' Israel de que lao na'a Jesucristo, ben' naca Señor quie yugulu benë', huata' tadya'a yega'nnan huen quie yaca benë' lao Diuzi. ³⁷ Dyë'ëdi nezile cabë' guca lao yaca yedyi quie ben' Israel. Uzulao Jesús udixogue'në' xti'idza' Diuzi estado Galilea dza na' cati beyudyi udixogue' Juan bautista xti'idza' Diuzi bë' lao yaca benë'. ³⁸ Lëzi dyë'ëdi nezile use'ela' Diuzi Bichi Be quienë' bëlënë' Jesús yela' huaca quienë', udanë' bënë' puro tadya'a, beyuenë' yaca ben' yu'u taxi'ibi' nun quie nuelë Diuzi lëbë' tuze. ³⁹ Nëto' blë'ëndo' yugulu ta bë Jesús caora zuë' udë' estado Judea len ciudad Jerusalén. Ude beyudyi na' bda'yaquë' lëbë' lë'ë yaga cruzo bëtiyaquë' lëbë'. ⁴⁰ Pero bë' baode tzona dza pseban Diuzi lëbë' bidë' detilalaonë' nëto'. ⁴¹ Pero nëto'zi ptilalaonë', quele yugulu benë'. Ulio Diuzi nëto' dza na'te ta gacando' testigo cabë' guca quienë' gutinë' bebannë'. Nëto' udaondo' hue'endo' len lëbë' cati bebannë'. ⁴² Na'ra use'ela' Diuzi nëto' tzetixogue'ndo' benë' di'idza' quienë' rëbindo'yaquë' de que ulio Diuzi Jesús ben' hue juicio quie yugulu benë', la'achi ben' nëban, la'achi ben' baguti. ⁴³ Lëscan' desde dza na'te una yaca ben' udixogue' xti'idza' Diuzi rëbiyaquë' quie Jesús, unayaquë' gata' yela' huezi'ze quie yugulu ben' nao xnezë'.

Caora uyu'u Bichi Be quie Diuzi lu'u guicho laxta'o ben' binacaja ben' Israel

⁴⁴ Bineyudyi hue'lë Pedro lejë' di'idza' caora uyu'u Bichi Be quie Diuzi lu'u guicho laxta'o ben' bzënaga di'idza' quië'. ⁴⁵⁻⁴⁶ Na'ra uzulaoyaquë' rnëyaquë' di'idza' tula, di'idza' binaca quieyaquë', rulidzayaquë' Diuzi. Na'ra yaca ben' Israel, ben' uza'lë Pedro, tu bega'nzižë' rebanziyaquë' porque hasta ben' tulala, ben' binaca ben' Israel, uyu'urëyaquë' Bichi Be quie Diuzi.

⁴⁷ Na'ra una Pedro rëbinë' laguedyinë':

—¿Quele baoyu'uyaquë' Bichi Be quie Diuzi laga ca uyu'unë' ra'o? Quie lena' nunu udzon hue'ro laoyaquë'.

⁴⁸ Caora na' bë Pedro mandado hue'yaquë' laoyaquë' uzëtöyaquë' lao Jesucristo. Ude beyudyi na' unabayaquë' yega'nle Pedro leyaquë' chopa tzona dza.

11

Bedyin Pedro ciudad Jerusalén udixogue'ně' cabě' guca quieně'

¹ Na'ra unezi yaca apóstol len los demás ben' quie Jesús nita' estado Judea de que banaorě ben' tulala, ben' binaca ben' Israel, xti'idza' Diuzi. ² Cati bedyin Pedro ciudad Jerusalén, na'ra yaca ben' Israel, ben' nao xneza Jesús, udilayaquě' Pedro unayaquě' ³ rěbiyaquě' lěbě':

—¿Biquien' uyu'ulo' lu'u yu'u quie ben' tulala, yaca ben' binaca ben' Israel, udaolao' tuže len leyaquě'?

⁴ Na'ra una Pedro rěbině' leyaquě' yugulu con cabě' guca quieně' uně':

⁵ —Uya'a yedyi Jope. Na' caora blidza' Diuzi, guca quia' ca quie tu ben' rxusa, blě'ěda' uyězi tu ta naca ca quie tu la'ari' yua' nerio idapa isquinan guibá. ⁶ Caora una' dyě'ědi, blě'ěda' dyila' zě cue' bia guixi', bia dyia tapa ni'e, len zě cue' bēla, len bguini. ⁷ Hora na' beda' uně tu ben' una ně'ědi': "Pedro, uyasa. Bětiba', udaoba'." ⁸ Pero agudya' ben' na': "Bigaohua'ba', Señor, porque ni tu lasa binegaohua' tu biru'en lato gaohua'." ⁹ Na'ra una ben' na' rěbině' ně'ědi' tatula: "Tu ta aona Diuzi gaolo', binao' biru'en lato gaolo'n." ¹⁰ Beyunate lasa uně' ně'ědi' cana', na'ra beyēpin zeyonan ladza. ¹¹ Caora na' bdyin tzona yaca ben' reguilo ně'ědi', ben' uza'yaca yedyi Cesarea dexi'yaquě' ně'ědi'. ¹² Hora na' una Bichi Be quie Diuzi rěbině' ně'ědi': "Uzi', uyolěyaquě'. Bibi cuidado gapo'." Por lena' uza'a uquiě'a xopa ben' nao xneza Jesús ziondo' ga zu ben' use'ela' yaca ben' dexi' ně'ědi'. ¹³ Caora bdyindo' lidyi ben' na', udixogue'ně' nēto' con cabě' blě'ěnē' nē' bdyin tu ángel lidyině' rěbině' lěbě': "Use'ela' ben' quio' tzioyaquě' yedyi Jope tzexi'yaquě' tu ben' lao Simón Pedro. ¹⁴ Lěbě' ině' luě' cabě' huelo' ta ute usela Diuzi luě' lente yugo diadza quio'." Cana' una ángel rěbině' lěbě'. ¹⁵ Na'ra uzulaohua' ru'elia'yaquě' di'idza', caora na' uyu'u Bichi Be quie Diuzi lu'u guicho laxta'oyaquě' laga ca uyu'uně' lu'u guicho laxta'oro dza na'te. ¹⁶ Hora na' beza'la'adya' di'idza' una Jesús caora uně': "Tali bē' Juan laole conlě nisa, pero netza'la ca hue Diuzi quiele, ise'elě' Bichi Be quieně' ta tzu'uně' lu'u laxta'ole." ¹⁷ Pues como bē' Diuzi lato tzu'u Bichi Be quieně' lu'u laxta'oyaquě' laga con cabě' bēnē' quiero, ben' nao xneza Señor quiero Jesucristo, žnuži naca ně'ědi' bihua' ca rē'en Diuzi hua'?

¹⁸ Na'ra yaca ben' quie Jesús, ben' nita' ciudad Jerusalén, caora beyaquě' cabě' di'idza' ru'e Pedro, bira pquěpiyaquě' lěbě', unayaquě' rěbiyaquě' laguedyiaquě':

—Diuzi naquě' ben' ze. Como hasta ben' tulala, ben' binaca ben' Israel, re'en Diuzi utza'yaquě' pensari quieyaquě' tacuenda gata' yela' neban quieyaquě' tuzioli.

Cabě' guca unita'ja ben' nao xneza Jesús ciudad Antioquía

¹⁹ Na'ra cati bētiyaquě' Esteban dza na'te, lěscan' uzulaoyaquě' rueyaquě' contra yaca los demás ben' nao xneza Jesús, ben' nita'ja na'. Por lena' bdzatzažě' uza'yaquě' ziojě' yedyi tula. Ziojě' ciudad Antioquía, ziojě' yedyi nebaba Fenicia, ziojě' yedyi nebaba Chipre. Na'ra yaca ben' uza'ja ciudad Jerusalén, biudixogue'yaquě' yugulu beně' xti'idza' Diuzi, dechan' entre yaca ben' Israelzi udixogue'jě' xti'idza' Diuzi. ²⁰ Pero ibala ben' nao xneza Jesús, ben' uza'ja yedyi nebaba Chipre, len ben' uza'ja yedyi nebaba Cirene, zioyaquě' bdyinyaquě' ciudad Antioquía uzulaoyaquě' rguixogue'yaquě' ben' tulala, ben' binacaja ben' Israel, xti'idza' Jesús. ²¹ Na'ra bē' Diuzi yela'

huaca quiè' lao na'ayaquè'. Por lena' zèyaquè' psanyaquè' costumbre gula quieyaquè', unaoyaquè' xneza Jesús.

²² Na'ra ben' nao xneza Jesús, ben' nita' ciudad Jerusalén, caora un-eziyaquè' cabè' guca ciudad Antioquía, use'ela'yaquè' Bernabé ciudad na'.

²³ Caora bdyinnè' na', blè'ènè' bè Diuzi yela' huaca quienè', bèla'ianè' leyaquè'. Na'ra redaohuetzegue Bernabé unèyuenè' leyaquè' ta ino-
rayaquè' xneza Jesús du guicho du la'adyi'yaquè'. ²⁴ Cana' bè Bernabé como dan' naquè' ben' dya'a, ben' yu'u Bichi Be quie Diuzi, ben' nao xneza Jesús du guicho du la'adyi'. Cana' bènè' gan gule ben' zè, ben' nao xneza Jesús.

²⁵ Ude beyudyi na', uza' Bernabé zionè' yedyi Tarso tzedilanè' Saulo. Caora bedzelenè' lèbè', uquiè'nè' lèbè' ciudad Antioquía. ²⁶ Na'ra lao tu iza naya' bega'nyaquè' len ben' nao xneza Jesús psèdiyaquè' ben' zè xti'idza' Diuzi. Na' yaca ben' nita' ciudad Antioquía, leyaquè' uxubayaquè' tanèro lao ben' nao xneza Jesús ben' cristiano.

²⁷ Caora na' ciudad Antioquía bdyin chopa tzona ben' rguixogue' xti'idza' Diuzi, ben' uza'yaca ciudad Jerusalén. ²⁸ Na'ra uzuli tu ben' za' leyaquè' laonè' Agabo ga bedupa yaca ben' nao xneza Jesús. Du yu'unè' Bichi Be quie Diuzi, unè' rëbinè' leyaquè':

—Una Diuzi nè'èdi' gaca tu obin huala duze yedyi layu. —Cana' unè' gudyinè' leyaquè'.

²⁹ Pues gucan con ca unè'. Guca tu obin huala tiempo uzu tu ben' lao Claudio, ben' naca rey quie ben' romano. Na'ra yaca ben' nao xneza Jesús nita' ciudad Antioquía, udilojè' modo gacalèyaquè' laguedyiaquè' ben' nao xneza Jesús, ben' nita' estado Judea. ³⁰ Cana' ptupayaquè' lè'èti' huio dumi ise'ela'yaquè'n lao na'a Bernabé len Saulo ta tzehua'ayaquè'n tzesanyaquè'n lao na'a yaca ben' nao xneza Jesús, ben' nita' ciudad Jerusalén.

12

Cabè' guca bëtijè' Santiago bdze'yaquè' Pedro lu'u dyiguiba

¹ Na'ra dza na' uzulao rey Herodes ruenè' contra yaca ben' quie Jesús. ² Bènè' mandado guti soldado quienè' Santiago, ben' bichi Juan. Bètiyaquè' lèbè' conlè espada quieyaquè'. ³ Caora blè'è rey Herodes de que raxe ben' Israel ruenè' contra ben' quie Jesús, na'ra bëxorènè' Pedro bènè' lèbè' preso. Bdze'nè' lèbè' lu'u dyiguiba dza rueyaquè' lani cati reza'la'adyi' ben' Israel dza beza' yaca xuzixta'oyaquè' nación Egipto. ⁴ Na'ra ude beyudyi bdze'nè' lèbè' lu'u dyiguiba, bè rey Herodes mandado zio chi'inu'betu soldado ta gapayaquè' lèbè'. Tapazi soldado udapayaquè' lèbè' tu chi' huio. Na'ra psaque' rey Herodes cuionè' Pedro lu'u dyiguiba cati ude dza lani tacuenda guti ja soldado lèbè' zaquè'lao lao ben' yedyi. ⁵ Tu nede Pedro lu'u dyiguiba, caora na' rulidza yaca ben' quie Jesús Diuzi du guicho du la'adyi'yaquè' por nun quie Pedro.

Bebio Diuzi Pedro lu'u dyiguiba

⁶ Pues binedyin hora tzeni' ta cuio rey Herodes Pedro lu'u dyiguiba. Nede Pedro narionè' chopa caden rasinè' entre chopa soldado. Lèzi zè ja mazera soldado rapayaquè' ru'a yu'u dyiguiba. ⁷ Caora na' ure' xni' gui' lu'u dyiguiba labdyinte tu àngel quie Diuzi. Na'ra ptanè' Pedro ta psebènè' lèbè' rëbinè' lèbè':

—Labe uyasa.

Bè' uyasa Pedro, cuinzi cadena bguinojan dan' narionè'. ⁸ Na 'una ángel tatula rëbinè' lëbè':

—Pquio cincho quio' bde huarache quio'.

Ude beyudyi bē Pedro con ca una ángel gudyinè' lëbè', na'ra una ángel rëbinè' lëbè' tatula:

—Bdubi gabán quio' unao nē'èdi'.

⁹ Caora na' zio Pedro zenaonè' ángel, pero biraquenè' chi tali cabè' raza quienè' len ángel, dechan' raquenè' rxusanè'. ¹⁰ Na'ra chopa cue' udeyaquè' ga zē soldado rapa dyiguiba, bdyinyaquè' ga zu puerta de guíba ga beyudyite yeroyaquè' la'o yedyi. Na' tu cuinzina uyalo puerta na' bedeyaquè' beroyaquè' lu'u dyiguiba. Ledao'tzi beza'yaquè' na' lazeyote ángel, bega'n Pedro tuzinè'. ¹¹ Cana'ra gucabè' Pedro nacan li cabè' guca quienè', unè':

—Pues nacan li de que use'ela' Diuzi tu ángel quienè' ta pselanè' nē'èdi' con ca re'en rey Herodes len ja ben' Israel huejè' quia'.

¹² Na'ra zionè' racanè' pensari cabè' guca quienè' bdyinnè' lidyi María, zna' Juan, ben' laorè Marcos. Pero lu'u yu'u na' babedupa ben' zē, ben' nao xneza Jesús, rulidzayaquè' Diuzi por nun quie Pedro. ¹³ Na'ra bdyinnè' lali'a zènè' ru'a yu'u ruxidyiguè' lè'è puerta. Caora na' zio tu nigula dao' laobi' Rode tzena'bi' nu ruxidyi puerta, ¹⁴ caora na' bezaquebi' chi' Pedro, pero biusalobi' puerta nun quie redaohuebi' bebi'bi' zeyobi' lu'u yu'u gan nita' ja ben' rulidza Diuzi yeguèdyibi' leyaquè' babdyin Pedro zènè' ru'a yu'u.

¹⁵ Na'ra una ja ben' nita' lu'u yu'u rëbiyaquè' lëbi':

—¿Que raza tondulo?

Pero lëbi' nabi' talicazi bdyin Pedro ru'a puerta. Na'ra unayaquè' rëbiyaquè' lëbi':

—Cala lëbè', dechan' ángel quienè'.

¹⁶ Pero zēcazi Pedro ruxidyiguè' lè'è puerta. Na' cati usaloyaquè' puerta blè'ëyaquè' lëbè', lega bdzebiyaquè'. ¹⁷ Na'ra bënè' seña conlè nē'è ta yega'nyaquè' chizi. Caora na' gudyinè' leyaquè' cabè' guca ulio Diuzi lëbè' lu'u dyiguiba. Quie lena' unè' rëbinè' leyaquè':

—Uletzeguèdyi Santiago lente yaca los demás bichiro cabè' ta užaca' beroga' lu'u dyiguiba.

Ude beyudyi na', uži'nè' zeyoguè' ga tula.

¹⁸ Biži cati uyenina' ziladao', legazi uyu'u soldado ru'be, porque bineziyaquè' bi guca quie Pedro. ¹⁹ Cana' bē rey Herodes mandado tzio soldado tula tzediloyaquè' Pedro, pero ganu Pedro bedzeleyaquè'. Hora na' beyēzinè' pquëpinè' ja soldado rapa dyiguiba, pero biubinyaquè' bi inayaquè'. Na'ra bē rey Herodes mandado gati yaca soldado. Ude beyudyi na', uža'nè' estado Judea zionè' yesunè' ciudad Cesarea.

Cabè' guca guti rey Herodes

²⁰ Na'ra puro yedyi ga r nabè' rey Herodes na' ra'o yaca ben' yedyi Tiro len ben' yedyi Sidón ta raoyaquè'. Pero rey Herodes na' rdza'nè' leyaquè'. Quie lena' gucayaquè' de acuerdo ta tzena'yaquè' lëbè' ta hue'lëyaquè' lëbè' di'idza'. Por lena' yeyubiyaquè' tu ben' lao Blasto, ben' naca empleado quie rey Herodes, cuenda na' chi huenè' tu cule hue'lënè' rey Herodes di'idza' ta yega'ntza'olè rey Herodes leyaquè'. ²¹ Cati bdyin dza ru'elè rey Herodes leyaquè' di'idza', guconè' žabanè' ta racocazi rey, yeque'nè' xlatonè' ga rbezè' benè', uzulaonè' ru'elënè' yaca benè' di'idza'. ²² Na'ra yaca ben' bzënaga quienè', unëyaquè' zidzo nayaquè':

—¡Quele benè' rnè, nechan' tu diuzi rnè!

²³ Bineyudyi di'idza' caora labdyinte tu ángel quie Diuzi bënë' ta gaca žhue' rey Herodes, porque bigudyinē' yaca ben' bzēnaga quienē' de que bireya'ala' tzionla'adyi'jē' lēbē', tuzi Diuzi reya'ala' tzionla'adyi'jē'. Na'ra udao bēla dao' bižu yu'u lu'u lē'ēnē' lēbē' gutinē'.

²⁴ Tu dza, tu dza, ziorarē xti'idza' Diuzi cabē' uidxogue'jē' duže yedyi re' na'.

²⁵ Na'ra Bernabé len Saulo, caora beyudyi dyin quieyaquē', beza'yaquē' ciudad Jerusalén zeyoyaquē' ciudad Antioquía uquiē'yaquē' Juan, ben' laorē Marcos.

13

Bernabé len Saulo uzulaojē' rdajē' rguixogue'jē' benē' xti'idza' Diuzi tu tu yedyi

¹ Na'ra entre ja ben' nao xneza Jesús nita' ciudad Antioquía, uzu yaca ben' psēdi uidxogue' xti'idza' Diuzi. Uzu tu ben' lao Simón Gaso. Lēscan' uzurē tu ben' yedyi Cirene laonē' Lucio. Lēscan' uzurē itunē' laonē' Manaén, ben' abgualē Herodes. Naca Herodes gobernador quie estado Galilea. Lēzi ciudad Antioquía nita'lē Saulo len Bernabé len los demáasyaquē'. ² Biži cati guca tu dza rionla'adyi'yaquē' Diuzi rueyaquē' ubasi, hora na' unē Bichi Be quie Diuzi gudyinē' lejē'.

—Uleuda' Bernabé len Saulo ta tzioyaquē' hueyaquē' ca tu dyin re'enda' hueyaquē'.

³ Quie lena' bipsanjē' bēyaquē' ubasi. Caora na' du rulidzayaquē' Diuzi, na' bda'yaquē' na'ajē' guicho Bernabé len Saulo unabayaquē' gacalē Diuzi leyaquē'.

Yaca apóstol na' uidxogue'jē' benē' xti'idza' Diuzi isla Chipre

⁴ Na'ra use'ela' Bichi Be quie Diuzi leyaquē' uza'yaquē' zioyaquē' ciudad Seleucia. Caora na' udejē' yedyi na' uyu'yaquē' lu'u barco ta idyinyaquē' isla Chipre. Naquiē'jē' Juan Marcos ta gacalēnē' leyaquē'. ⁵ Na'ra cati bdyinyaquē' yedyi Salamina. Caora na' rioyaquē' lu'u sinagoga quie ja ben' nacaja ben' Israel, uzulaoyaquē' rguixogue'jē' leyaquē' xti'idza' Diuzi. ⁶ Pues udayaquē' dužete isla Chipre bdyinyaquē' yedyi Pafos. Na' yatilayaquē' tu ben' Israel laonē' Bargesús. Naquē' ben' brujo, nanē' rnē' puro xti'idza' Diuzi, dechan' ben' huezi' yē'. ⁷ Pues ben' brujo na' zuē' lao ben' naca gobernador laonē' Sergio Paulo. Pues gobernador na' naquē' ben' de pensari. Bēnē' mandado tzexi'yaquē' Bernabé len Saulo, porque re'ennē' yenē' con cabē' naca xti'idza' Diuzi. ⁸ Pero ben' brujo na' laorēnē' Elimas, bēnē' contra Bernabé len Saulo. Bigu'unne' gale gobernador xti'idza' Diuzi. ⁹ Na'ra Saulo na' laorēnē' Pablo, du yu'unē' Bichi Be quie Diuzi, una'nē' ben' brujo dyē'ēdi, unē' gudyinē' lēbē'.

¹⁰ —Ben' huezi' yē', ben' mala naco'. Naco' ži'i taxi'ibi'. Puro tamedian rguilolo' ruelo'. ¿Bixquien' birsanlo' rziu' benē' yē' bire'enlo' galeyaquē' xti'idza' Diuzi? ¹¹ Pues na'ra abdyin hora hue Diuzi luē' castigo. Gaco' ben' laochula. Žēdza ni siquiera xni' obidza bira ilē'ēlo'.

Caora na' laochulate lao ben' brujo, bira blē'ēnē'. Na' unabayēchi'nē' gudyinē' nu ben' bēxo nē'ē, ben' bequiē' lēbē'. ¹² Caora blē'ē gobernador cabē' guca quie ben' brujo, na'ra gulēnē' xti'idza' Diuzi. Tu bega'nzinē' bebanzinē' con cabē' naca yela' huaca quie xti'idza' Señor quiero Jesucristo.

Bdyin Pablo len Bernabé ciudad Antioquía ga nebaba Pisidia

¹³ Na'ra Pablo lënë' yaca ben' za'lënë', uza'yaquë' yedyi Pafos con lu'u barco zioyaquë' bdyinyaquë' yedyi Perge ga nebaba Panfilia. Pero Juan Marcos na' psanla'adyi'në' leyaquë' beza'në' na', bedyinnë' ciudad Jerusalén. ¹⁴ Caora na' udeyaquë' yedyi Perge bdyinyaquë' ciudad Antioquia ga nebaba Pisidia. Caora guca dza huezila'adyi', uza'yaquë' zioyaquë' lu'u sinagoga ure'yaquë'. ¹⁵ Ude beyudyi unë yaca ben' re' na' di'idza' bzu Moisés len yaca los demás ben' profeta lë'ë guichi, na'ra use'ela' yaca xan' sinagoga tu ben' unë gudyinë' leyaquë':

—Bicha', chi re'enle yëbile ja benë' bi di'idza', huazaque' yëbilejë'n na'a.

¹⁶ Pues na'ra uzuli Pablo ga re'në', bënë' seña conlë na'anë' tacuenda na' inita'lë' chizi uzëmagayaquë' quienë'. Na'ra unë' rëbinë' leyaquë':

—Ulezëcara nagale le'e ben' Israel len yugulu le'e ben' rionla'adyi'rë Diuzi.

¹⁷ Psere Diuzi xuzixta'oro bënë' uyeyaquë' gucayaquë' ben' zë dza nenita'jë' yu binaca quieyaquë', yu nebaba nación Egipto. Conlë yela' huaca quienë' gualënë' xuzixta'oro beza'yaquë' na'. ¹⁸ Pero con paciencia uzi'ze Diuzi quieyaquë' dza udayaquë' chopa galo iza tu paraje ga bidyia yu'u. ¹⁹ Caora na' bdyiagui' Diuzi gadyi yedyi ta nebaba Canaán, bënë' xuzixta'oro layu quie ben' na' gucan quieyaquë'. ²⁰ Na'ra cadu tapa gayuhua iza yu gatzo ulio Diuzi yaca ben' gaca juez quieyaquë' ta inabë'në' leyaquë'. Cana'zi bega'nnan hasta dza rda tu ben' profeta laonë' Samuel. ²¹ Hora na' unaba xuzixta'oro usere Diuzi tu rey, ben' inabë' leyaquë'. Na'ra ulio Diuzi tu ben' laonë' Saúl, zi'i Cis. Naquë' diadza quie xuzixta'oro Benjamín, ben' unita' dza na'te. Na'ra guquë' rey quieyaquë' cadu chopa galo iza. ²² Pero uderala cati bezi' Diuzi yela' rna'bë' quie Saúl, bënë' mandado gaca David rey quieyaquë' lao laza Saúl. Na'ra quie rey David unë Diuzi caora unë' rëbinë' xuzixta'oro: “Na'a sí, baolioga' David zi'i Isaí ta gaquë' rey quiele, porque rexeda'në' ruenë' du guicho du la'adyi'në' con ta re'enda' huenë'.”

²³ Na'ra nernë Pablo rëbinë' leyaquë':

—Según ca compromiso bë Diuzi dza na'te, ulionë' de entre yaca zi'isuba rey David nu ben' ute usela ra'o yeyoro ga zu Diuzi. Naca Jesús lëben' ulionë' ta ute uselanë' ra'o. ²⁴ Pues tu zaquixogüë' Jesús xti'idza' Diuzi, udixogüë' Juan bautista ra'o de que yuguluro reya'ala' utza'ro pensari quiero cuenda hue' Juan laoro. ²⁵ Na'ra cati baruen bago dza gati Juan unë': “Raquële naca' Cristo, pero binaca' Cristo. Zaza'rala ben' naca Cristo. Tantozi nacaré' ben' belao ca në'ëdi', ni lë'ëti' bibizaca' ni siquiera biyeyazoga' cuioga' guidi yu'u ni'anë'.”

²⁶ Na'ra nernë Pablo rëbinë' lejë':

—Le'e ben' zi'isuba xuzixta'ohua' Abraham, len le'e ben' tula, ben' rionla'adyi'rë Diuzi, nacan para le'e di'idza' rnia' niga. Rguixogüë'n quie ben' ute usela ra'o yeyoro ga zu Diuzi. ²⁷ Pues ja ben' nita' ciudad Jerusalén lente ben' rna'bë' quieyaquë', binezijë' chi zi'i Diuzi naca Jesús. Lëzi raquëyaquë' rionë'eyaquë' bi re'en ina di'idza' bzu ben' profeta lë'ë guichi caora cati rula-bajë' lu'u sinagoga dza sábado. Pero birionë'eyaquë'n, dechan' bëyaquë' yela' mala con ca una ben' profeta hueyaquë' udaoyaquë' Jesús xquia gu'unyaquë' gutiyaquë' lëbë'. ²⁸ Bizi biubinyaquë' bi hueyaquë' ta guti ben' rna'bë' Jesús, porque bibi dula' xquia de quienë'. Cana' gu'unjë' guti Pilato Jesús ta gatinë' ca quie ben' de dula' xquia quie. ²⁹ Na'ra caora baguca quie Jesús con ca rna lë'ë guichi la'ya quie Diuzi ca gaca quie Jesús, bechizayaquë' lëbë' ga gutië' lë'ë yaga cruzo yecachi'yaquë' lëbë'. ³⁰ Pero pseban Diuzi lëbë' zionë' ptilë' con yaca ben' quienë', ben' uza'lë lëbë' estado Galilea bdyinyaquë' ciudad

Jerusalén. ³¹ Pues zidza uzulënë' yaca ben' quië' na'. Leyaquë' rguixogue'jè' benë' con ca guca quie Jesús.

³² 'Lëzi nêto' zêndo' niga rguixogue'ndo' le'e xti'idza' Diuzi, rguixogue'ndo' le'e de que según compromiso bêlê Diuzi xuzixta'oro dza na'te, bzuë' di'idza' quië' caora cati psebannë' Jesús. ³³ Lëzi para ra'o pseban Diuzi lëbë', como nacaro zi'isuba leyaquë'. Pseban Diuzi lëbë' con cabë' rguixogue'n lë'ë guichi salmo chopa cabë' rnën caniga: "Luë' naco' zi'ina'. Abdyin dza ulu'ena' yaca ben' nita' lao yedyi layu zi'ina' luë'." ³⁴ Lëzi una Diuzi dza na'te de que usebannë' Jesús tacuenda yebannë' tuzioli bira gaticazinë'. Quie lena' unë' caora nê': "Huecaza' huen quiele según ca compromiso bêlia' xuzixta'ole rey David." ³⁵ Lëzi rnën lë'ë guichi tula cabë' hue Diuzi quie zi'inë'. Lena' rnën cani: "Bihue'nê' lato itabo cuiagui' cuerpo quie zi'inë', ben' naca la'iya quienë'."

³⁶ Na'ra nernë Pablo rëbinë' leyaquë':

—Pues xuzixta'oro rey David, bënë' cumplir con ca gudyi Diuzi lëbë' dza nezunë' yedyi layu. Pero bdyin dza quienë' gutinë' yecachi'yaquë' lëbë' ga racachi'yaquë' xuzixta'oro. Na'ra utabo cuerpo quienë', ³⁷ pero biutabo cuerpo quie Jesús, porque pseban Diuzi lëbë'. ³⁸ Bicha', reya'ala' inezile de que lao na'a Jesús yezi'ze Diuzi dula' xquia quiele. ³⁹ Lëscan' lao na'a Jesús hualë'ë Diuzi yugu ben' nao xneza Jesús ben' laxta'o yëri. Pero quie ley pca'n Diuzi lao na'a Moisés, bide fuerza valor quie ley na' ta ilë'ë Diuzi ben' nao ley na' ben' laxta'o yëri. ⁴⁰ Pues quie lena' gapale cuidado ta bigaca quiele con ca bzu ja ben' profeta lë'ë guichi cati una Diuzi cani:

⁴¹ Hua' tu yela' milagro quia' dza rdale yedyi layu, pero yela' yaladyi' quiele, bigalele quie yela' milagro quia' hua'.

Ba'ala'cazi nu ben' yexi'idze'në' le'e, bigalecazile.

Tu yebanzile ilë'ële con ca hua' entre le'e, pero como dan' biralele, lena' udyiagui'a le'e.

Cana' una Pablo uidxogue'në' leyaquë' con cabë' una Diuzi dza na'.

⁴² Na'ra cati bero Pablo len yaca laguedyinë' lu'u sinagoga, ben' zë, ben' bzënaga quië', unabajë' lëbë' chi biyeguidë' ixun' ta yexi'idze'në' leyaquë' mazera. ⁴³ Na'ra bedzatzayaquë' lu'u sinagoga, pero zë ben' Israel len ben' tula, ben' naotzegue religiön quie ben' Israel, unaoyaquë' ziolëyaquë' Pablo len Bernabé tu neza. Caora na' bë' Pablo len Bernabé leyaquë' consejo gudyiyaquë' leyaquë' biyuhuëdiyaquë' inaoyaquë' xneza Diuzi nun quie ulio Diuzi nedyë'ë Diuzi leyaquë'.

⁴⁴ Na'ra beya' xun' bedupa casi yugu ben' yedyi lu'u sinagoga ta uzëmagayaquë' con cabë' rna xti'idza' Diuzi. ⁴⁵ Na'ra cati blë'ë yaca los demás ben' Israel cabë' abedupa ben' zë uzëmagayaquë' ca una Pablo, caora na' gucažë'yaquë' uzulaoyaquë' rnëläyaquë' Pablo hasta ptasi bnioyaquë' lëbë'. ⁴⁶ Pues hora na' bibdzebi Pablo len Bernabé unayaquë' rëbiyaquë' leyaquë' cani:

—Pues tanëro reya'ala' za'ndo' quixogue'ndo' le'e xti'idza' Diuzi porque nacale ben' Israel. Pero na' le'e bire'enle uzëmagale. Bire'enle guñ Diuzi le'e yela' neban tuzioli. Quie lena' yeza'ndo' niga tzetixogue'ndo' yaca ben' binaca ben' Israel con cabë' rna xti'idza' Diuzi. ⁴⁷ Porque cana' use'ela' Diuzi nêto' unë' gudyinë' cani:

Bzua' le'e ca quie tu gui' ze tacuenda ilë'ë yaca ben' tula, ben' binaca ben' Israel.

Ise'ela' le'e ta tzetixogue'le xti'idza' yaca ben' nita' yedyi zitu' gula.

⁴⁸ Na'ra bē' be yaca ben' binaca ben' Israel ca unē Pablo, legazi redao-hueyaquē' nayaquē' naca dya'a xti'idza' Diuzi. Pues gule yaca ben' ulio Diuzi, yaca ben' re'en Diuzi gata' yela' neban quie tuzioli. ⁴⁹ Na'ra bipsan ben' quie Jesús quixogue'yaquē' ben' nita' yugulu yedyi re' na' xti'idza' Diuzi. ⁵⁰ Pero bala ben' Israel bē'lēyaquē' ben' belao quie yedyi, lente bala nigula bala'ana di'idza'. Unabayaquē' chi bigacalēyaquē' leyaquē' ta yebioyaquē' Pablo len Bernabé ciudad na'. ⁵¹ Caora na' pchibi Pablo len Bernabé yu bēxte dyia huarache quieyaquē', porque según costumbre quieyaquē', lena' nacan seña de que psaca ben' ciudad na' leyaquē' bizinaquezi. Caora na' beza'jē' ziojē' ciudad Iconio. ⁵² Pero con ca tu yaca ben' bagule xti'idza' Jesús, uyu'uyaquē' Bichi Be quie Diuzi redaohuetzegueyaquē'.

14

Pablo len Bernabé bdyinyaquē' ciudad Iconio

¹ Na'ra bē' bdyin Pablo len Bernabé ciudad Iconio, zioyaquē' uyu'uyaquē' lu'u sinagoga quie ben' Israel. Na' bē'lēyaquē' ben' bedupa lu'u sinagoga na' di'idza'. Caora na' ben' zē guleyaquē' ca gudyi Pablo len Bernabé leyaquē', tanto ben' Israel como ca ben' binaca ben' Israel. ² Pero yaca ben' Israel, ben' birale cabē' di'idza' ru'e Pablo len Bernabé, unēyaquē' contra leyaquē'. Na'ra ja ben' binaca ben' Israel, guleyaquē' ca di'idza' unē ben' Israel contra lejē', blē'ēyaquē' ben' mala ben' nao xneza Jesús. ³ Quie lena' bega'n Pablo len Bernabé zidza na'. Birdzebijē' udixogue'yaquē' con cabē' rna xti'idza' Jesús. Pues bē' Diuzi leyaquē' lato hueyaquē' yela' milagro quienē' tacuenda inezi yaca ben' yedyi na' de que huacalē Diuzi nutezi ben' gale xti'idzē'. ⁴ Quie lena' guca yaca ben' ciudad Iconio chopa cue'. Tu cue'yaquē' bē'lēyaquē' ben' Israel, ben' binao xneza Jesús tuže. Pero itu cue'jē' bda'yaquē' yaca apóstol. ⁵ Quie lena' guca yaca ben' binao xneza Jesús de acuerdo len ben' rna'bē' quieyaquē' ta hueyaquē' leyaquē' bizinaquezi quieyaquē' leyaquē' yo. ⁶ Biži caora unezi Pablo len Bernabé ca re'enyauē' hueyaquē' quieyaquē', uza'yaquē' zioyaquē' yu nebaba Licaonia, udeyaquē' ciudad Listra len ciudad Derbe, uderēyaquē' yaca ciudad tula, ciudad re' ga'ala'. ⁷ Con ga udeyaquē', udixogue'jē' benē' con cabē' rna xti'idza' Diuzi.

Ciudad Listra udijē' Pablo yo

⁸ Na'ra ciudad Listra uzu tu be'mbyu, ben' biraca sa'. Ni tu lasagazi binesa'nē'. Puro re'tezinē' como nažinē' desde cati galotenē'. ⁹ Na'ra re'nē' rženaguē' con cabē' di'idza' ru'e Pablo. Na'ra una' Pablo lēbē' dyē'ēdi, gacabē'nē' rzudyi'lē ben' ži Diuzi rbezē' yeyue Diuzi lēbē'. ¹⁰ Na'ra unē Pablo zidzo gudyyinē' lēbē':

—Užuli, bezu ni'alo' derecho.

Caora na' uxitinē' labezutenē' ni'anē' yu, laozulaotenē' rza'nē'. ¹¹ Biži cati blē'ē ja benē' cabē' bē Pablo quie ben' ži, unēyaquē' zidzo rēbiyaquē' laguedyiaquē':

—¡Baoyēzi chopa diuzi quiero! ¡Nacajē' forma quie benē' detilalaoyaquē' ra'o niga!

¹² Na' unēyaquē' xti'idza'yaquē', di'idza' quie ben' Licaonia. Unayaquē' naca Bernabé tu diuzi laonē' Júpiter. Lēzi unayaquē' naca Pablo itu diuzi laonē' Mercurio. Na'ra unayaquē' naca Pablo diuzi Mercurio, porque nayaquē' naca Mercurio ben' ru'etzegue di'idza' cabē' ru'e Pablo. ¹³ Na'ra ru'a ciudad na' zu tu idao' quie diuzi Júpiter. Pues na' bro tu pxuzi quie idao' na', bdyinnē' ga zē Pablo len Bernabé. Naquienē' bēdyihuaga, bia nuetza'onē'

con yo. Na'ra pxuzi lënë' yaca ben' nita' na', re'enyaquë' tzionla'adyi'yaquë' Pablo len Bernabé nayaquë' yaca diuzi leyaquë'. Re'enyaquë' gutiyaquë' bëdyihuaga ca quie gun quieyaquë'. ¹⁴ Na'ra cati gucabë' Pablo len Bernabé cabë' re'enyaquë' huejë', caora na' uzulaoyaquë' rchezayaquë' žabayaquë', yu'uayaquë' lado yaca benë' na' unëyaquë' zidzo rëbiyaquë' leyaquë':

¹⁵ —¡Benë'! ¿Bixquien' ruele tamedian quiele ruele cana'? Lëzi benë'zi ca le'e nacarëndo' za'ndo' quixogue'ndo' le'e ta usanle ta bibi sirve ri-onla'adyi'le benë'. Reya'ala' tzionla'adyi'le tuzi Diuzi zu guibá, Diuzi neban tuzioli. Como lëbë' bënë' guibá, lëbë' bzaloguë' dyila yu, lëbë' uduxuguë' nisadao'. Hasta con lao yugulute bënë'. ¹⁶ Na'ra dza na'te ba'ala'cazi bë yaca ben' binaca ben' Israel ta rnazin quieyaquë', bibë Diuzi castigo quieyaquë'. ¹⁷ Birsannë' rulu'enë' yela' huaca quienë'. Rulu'enë' ben' huen naquë' dan' tadya'a babënnë' quiero. Por lëbë' ruen nisayo, rero usecho dya'a, runnë' yugulu ta raoro yugu dza tzu'uro gusto lao yedyi layu.

¹⁸ Pero ba'ala'cazi una Pablo len Bernabé cana', canezi bëyaquë' gan bibëti yaca ben' yedyi bëdyihuaga ca quie gun quiejë' ta tzionla'adyi'jë' leyaquë'.

¹⁹ Na'ra cati bdyin yaca ben' Israel, ben' uza'ja ciudad Antioquia len ben' uza'rëja ciudad Iconio, bë'lëyaquë' ben' ciudad di'idza' ta huejë' contra Pablo len Bernabé. Quie lena' uzulao ja ben' ciudad na' rguijë' Pablo yo ta gutiyaquë' lëbë'. Caora guqueyaquë' baguti Pablo, hora na' udubayaquë' lëbë' yatixojë' ru'a ciudadtela. ²⁰ Na'ra bedupa yaca ben' quie Jesús nayëchoyaquë' gan' de Pablo. Caora na' beyasa Pablo zeyonë' lao ciudad tatula. Pues beteyu dza tula, uza'lë Pablo Bernabé zioyaquë' ciudad Derbe.

²¹ Na'ra uduxogue'rëjë' ben' ciudad Derbe con cabë' rna xti'idza' Diuzi. Na' bëyaquë' gan gule ben' zë, gucayaquë' ben' nao xneza Jesús. Ude beyudyi na', bedeyaquë' ciudad Listra, bedeyaquë' ciudad Iconio, bedeyaquë' ciudad Antioquia. ²² Na'ra ja ciudad ga bedeyaquë', bë'yaquë' di'idza' žela'adyi' yaca ben' nao xneza Jesús, unëyueyaquë' leyaquë' con cabë' reya'ala' hueyaquë' inaoyaquë' du guicho du la'adyi'jë' xneza Jesús. Lëzi unayaquë' rëbiyaquë' leyaquë':

—Huetzague benë' bizinaquezi quiele, porque cana' ruejë' quie nu ben' nao xneza Diuzi.

²³ Lëzi ulioyaquë' ben' napa dyin, ben' racalë ben' nao xneza Jesús quie quie ciudad ga nita' ben' nao xneza Jesús. Pues beyudyi na', bëyaquë' ubasi bë'lëyaquë' Diuzi di'idza' blidzayaquë' lëbë' chi biucuasa ucui'onë' bi tamala gaca quie ben' ulioyaquë' como dan' barue quieyaquë' xti'idza'në'.

Bedyin Pablo len Bernabé ciudad Antioquia ga nebaba Siria tatula

²⁴ Ude beyudyi na', uza'yaquë' zioyaquë' udeyaquë' yu nebaba Pisidia, na' bdyinyaquë' yu nebaba Panfilia. ²⁵ Lëzi udejë' ciudad Perge ga uduxogue'rëjë' ben' ciudad na' con cabë' rna xti'idza' Diuzi. Beyudyi na' uza'yaquë' zioyaquë' ciudad Atalia. ²⁶ Na'ra ciudad na' beza'yaquë' con lu'u barco zeza'yaquë' bedyinyaquë' ciudad Antioquia tatula ga nita' yaca ben' nao xneza Jesús, ben' use'ela' leyaquë' yetixogue'yaquë' benë' xti'idza' Diuzi. Lëyaca ben' na' bë'lëyaquë' Diuzi di'idza' por nun quieyaquë' dza zioyaquë' na'. Na' beyudyi tu ca dyin quie Diuzi bëyaquë'.

²⁷ Na'ra caora bedyinyaquë', bdupa yaca ben' nao xneza Jesús nita' ciudad Antioquia. Uzulao Pablo ru'enë' di'idza' con cabë' gualë Diuzi leyaquë'. Lëzi gudyinë' leyaquë' con cabë' ulio Diuzi ben' binaca ben' Israel rnaorëyaquë' xneza Jesús. ²⁸ Na'ra Pablo len Bernabé bega'nyaquë' zidza ciudad na' len yaca los demás ben' nao xneza Jesús.

15

Caora bedupa ja ben' quie Jesús bëjë' junta ciudad Jerusalén

¹ Pero tiempo na' bdyin chopa tizona ben' ciudad Antioquía, ben' uza'ja estado Judea. Na'ra unayaquë' rëbiyaquë' ben' nao xneza Jesús:

—Yugu ben' binaca ben' Israel, ben' banao xneza Jesús, naban hueyaquë' lato su tu xëdyidao' cuinyaquë' cabë' rna lë'ë guichi ley pca'n Moisés dza na'te. Porque chi binaoyaquë' con cabë' rna lë'ë guichi ley na', biyezi' Diuzi leyaquë' yeyoyaquë' guibá dza gatiyaquë'. —Cana' unayaquë' gudyijë' lejë'.

² Quie lena' legazi uyu'u Pablo len Bernabé huenë len leyaquë'. Pues como bibega'një' de acuerdo, na'ra entre yaca ben' nao xneza Jesús nita' na', bëyaquë' nombrar Pablo len Bernabé len ichopa tizona ben' tzio ciudad Jerusalén tacuenda hue'jë' di'idza' conlë ja apóstol len yaca ben' belao quie yaca ben' nao xneza Jesús nita' na'.

³ Na'ra yaca ben' nao xneza Jesús nita' ciudad Antioquía use'ela'yaquë' lejë' uza'yaquë' udeyaquë' ja ciudad nebaba Fenicia len ja ciudad nebaba Samaria. Na'ra tu tu ciudad ga udeyaquë' udixogue'yaquë' leyaquë' cabë' rue yaca ben' binaca ben' Israel barsanla'adyi'yaquë' costumbre quie xuzixta'oyaquë', barnaoyaquë' xneza Jesús. Na'ra quie lena', legazi redaohue yaca ben' nao xneza Jesús nita' ja ciudad ga udeyaquë'.

⁴ Caora bedyinyaquë' ciudad Jerusalén, pues yaca apóstol, len yaca los demás ben' nao xneza Jesús, len yaca ben' napa dyin quieyaquë', bgapajë' leyaquë' diuzi. Na'ra bdze' Pablo len Bernabé di'idza' yugulu con cabë' bë Diuzi gualënë' leyaquë' ga udixogue'jë' ben' con cabë' rna xti'idzë'. ⁵ Pero na' uzuli bala ben' nao xneza Jesús, ben' nacaré quie partido fariseo. Na'ra nu ben' naca partido fariseo, legazi rnaoyaquë' guichi ley pca'n Diuzi lao na'a Moisés. Quie lena' unayaquë' rëbiyaquë' yaca los demás ben' nao xneza Jesús cani:

—Yugu ben' binaca ben' Israel, yaca ben' nao xneza Jesús, reya'ala' uzu tu xëdyidao' cuinyaquë'. Lëzi reya'ala' huero mandado huejë' cumplir con ca rna lë'ë guichi ley pca'n Diuzi lao na'a Moisés.

⁶ Na'ra bedupa yaca apóstol len yaca ben' napa dyin quie ben' nao xneza Jesús tacuenda hueyaquë' pensari con cabë' una yaca ben' na'. ⁷ Caora na' legazi uyu'uyaquë' huenë. Cati beyudyi na', na'ra uzuli Pedro rëbinë' leyaquë':

—Bicha', dyë'ëdi nezile de que dza na'te ulio Diuzi në'ëdi' de entre ra'o ta quixogui'a ben' binaca ben' Israel xti'idza' Diuzi, porque lëscan' re'en Diuzi inaoyaquë' xnezë'. ⁸ Nezi Diuzi bitezi pensari raca yugo benë'. Quie lena' bzioñe'enë' leyaquë' de que zuë' dispuesto yezi'në' leyaquë'. Na' bizi ba'ala'cazi binacajë' ben' Israel, bdze'në' Bichi Be quienë' lu'u guicho laxta'oyaquë' laga ca bdze'në' Bichi Be quienë' lu'u guicho laxta'oro. ⁹ Como tuzi rue Diuzi len leyaquë' len ra'o, aodibi Diuzi laxta'oyaquë' nun quie barue quieyaquë' xti'idzë'. ¹⁰ Na'a ¿bixquien' racale pensari binezi Diuzi bi bënë'? Pues ni ra'o ni xuzixta'oro bibëro gan inaoro duze guichi ley pca'n Diuzi lao na'a Moisés. Na'ra ¿bixquien', pues, re'enle inao yaca ben' binaca ben' Israel ley quiero? Lena' nacan ca quie chi ugua'aroyaquë' yua' zi'i, tu ta bisuejë' hua'ayaquë'. ¹¹ Bizi dyë'ëdi neziro de que laga cabë' ute usela Señor Jesús quiero por yela' ben' huen quienë', lëscan' ute usela Jesús yaca ben' binaca ben' Israel, yaca ben' rue quie xti'idzë'. —Cana' una Pedro gudyinë' leyaquë'.

¹² Na'ra uzulao Bernabé len Pablo ru'eyaqué' di'idza' con cabé' gualé Diuzi leyaqué' bëyaqué' nu yela' milagro lao ben' binacaja ben' Israel. Quie lena' unita' yaca ben' na' chizi yugutejé' rzénagayaqué' con cabé' una Bernabé len Pablo. ¹³ Pues beyudyi bë'yaqué' di'idza' na', na'ra una Santiago rëbiné' leyaqué':

—Bicha', uzëcara nagale quia'. Pues agudyi ¹⁴ Simón Pedro ra'o de que babdyin hora cuio Diuzi entre ja ben' binaca ben' Israel nu ben' re'en gaca ben' quiené' galeyaqué' xti'idzè'. ¹⁵ Lena' nacan de acuerdo con cabé' una ja ben' gula, ben' udixogue' xti'idza' Diuzi dza na'. Lena' rnën lë'ë guichi quie Diuzi cani:

¹⁶ Cabé' rue yaca bené', reyueyaqué' recubiyaqué' yedyi quieyaqué', cana' hueria' conlë yaca ben' Israel.

Huadyin dza gacalia' yaca ben' Israel ta yenaoyaqué' xneza' tatula cabé' unao xuzixta'oyaqué' xneza' dza uda rey David lao yedyi layu.

¹⁷ Cana' hua' tacuenda inaorë yaca los demás ben' binaca ben' Israel xneza', lente yugu ben' naca ben' la'iya quia', ben' rzëto laohua'.

¹⁸ Cana' una Diuzi bzioñe'ené' ra'o.

Desde dza na'te unë' udixogue'në' xti'idzè'.

¹⁹ Na'ra nernë Santiago rëbiné' leyaqué':

—Quie lena' nia' bireya'ala' huero zëdi ben' binacaja ben' Israel, ben' psanja pensari gula quiejé' barnaojé' xneza Diuzi. ²⁰ Tuzi ca reya'ala' huero ise'ela'ro tu guichi ta quixogue'royaqué' bireya'ala' gaoyaqué' bë'ëla' bdyia bené' lao ru'aba ta bë'yaqué' ídolo quieyaqué'. Lëzi bireya'ala' gaoyaqué' bë'ëla' quie nu bia bibro ren hora gutiba'. Lëscan', con nutezi bia guixi', bireya'ala' gaoyaqué' ren quieba'. Lëzi bireya'ala' gatalëyaqué' nigula binaca zgulayaqué'. ²¹ Cana' re'ennan hueja ben' binacaja ben' Israel, ben' barnaoja xneza Diuzi tacuenda biudze'la'adyi' ja ben' Israel, porque desde tiempote uzucazi ja ben' nao ley pca'ey Moisés. Quie quie yedyi quiero nita' yaca ben' Israel rulabajé' guichi ley na' lu'u sinagoga yugu dza saodo. —Cana' una Jacobo gudyinë' leyaqué'.

²² Na'ra ja apóstol, len yaca ben' napa dyin quie ben' nao xneza Jesús, len los demásyaqué', psaque'yaqué' cabé' huejé' ta cuioyaqué' entre leyaqué' ben' tziolë Pablo len Bernabé ciudad Antioquía. Quie lena' ulioyaqué' tu ben' lao Judas Barsabás, len itunë' laonë' Silas. Nacayaqué' ben' bala'ana entre ja ben' nao xneza Jesús. ²³ Na'ra lëscan' bëyaqué' tu guichi ta nu'ayaqué'. Lë'ë guichi na' rnën cani:

“Nëto', yaca apóstol len yaca los demás ben' napa dyin entre yaca ben' nao xneza Jesús, rgapando' diuzi le'e como ben' bichindo', ben' barnao xneza Jesús. Baose'ela'ndo' guichi ni lao le'e ben' binaca ben' Israel, ben' nita' ciudad Antioquía, len le'e ben' nita' yedyi nebaba Siria, len le'e ben' nita' yedyi nebaba Cilicia. ²⁴ Banezindo' babida chopa tzona ben' uza' yedyi ni badeyubiyaqué' le'e ta hue'lëyaqué' le'e di'idza', pero ca bëyaqué' pquixiyaqué' pensari quiele bëyaqué' le'e zëdi. Pero cala nëto' use'ela'ndo'yaqué', dechan' ta racazi la'adyi'jé' bëjé' cana'. ²⁵ Quie lena' gucando' de acuerdo, uliondo' de entre nëto' chopa ben' guidalë bichiro Pablo len bichiro Bernabé ideyubiyaqué' le'e inayaqué' le'e ca naca pensari quiendo'. ²⁶ Naca Pablo len Bernabé ben' uyocazi ja ciudad tula tanun quie Señor quiero Jesucristo ja ruenan zudyi guti ja bené' lejé'. ²⁷ Lëscana' use'ela'ndo' Judas len Silas ta uxi'idze'yaqué' le'e yugulu cabé' naca pensari quiendo' niga. ²⁸ Na'ra según pensari quie Bichi Be quie Diuzi len pensari quiendo', nacan huen bihuendo' mandado inaole duze ley quie Moisés. Ca

rnando' le'e niga, cana'zi nacan zi quiele huele. ²⁹ Pues bireya'ala' gaole bē'ēla' bdyia benē' ru'aba ta bē'yaquē' ídolo quieyaquē'. Lēzi bigaole bē'ēla' quie nu bia bibro ren hora gutiba'. Lēscan' con nutezi bia guixi', bireya'ala' gaole ren quieba'. Lēzi bireya'ala' gatalēle nigula binaca žgulale. Chi hue quiele uzule di'idza' ca nando' le'e niga, cana' huele ta yu'u ni'a xnezi. Na' yugu dza rulidzando' Diuzi gacalēnē' le'e." Cana' unēn lē'ē guichi na' ta use'ela'yaquē'.

³⁰ Pues cana' guca uza'yaquē' zioyaquē' ciudad Antioquía ptpayaquē' yaca ben' nao xneza Jesús, bē'yaquē' leyaquē' guichi nu'ayaquē'. ³¹ Na'ra cati bablabayaquē' guichi na', legazi bedaohueyaquē' con cabē' di'idza' žela'adyi' rnēn lē'ē guichi na'. ³² Na'ra como Judas len Silas nacarēyaquē' ben' rguixogue' xti'idza' Diuzi, hora na' bē'lēyaquē' leyaquē' di'idza' žela'adyi' mazera. Na'ra nun quie di'idza' unayaquē' gucalēyaquē' leyaquē' ta ino-
rayaquē' dula'adyi'jē' xneza Jesús. ³³ Biži na' caora baguca zidza zuyaquē' ciudad na', bē yaca ben' quie Jesús tu despedida ta yeza'yaquē' yedyinyaquē' ciudad ga nita' ja ben' use'ela' leyaquē'.

³⁴ Pero Silas psaque'nē' yega'nnē' ciudad Antioquía. ³⁵ Lēzi bega'nrē Pablo len Bernabé ciudad na'. Na'ra leyaquē' len yaca los demás ben' quie Jesús, uidxogue'yaquē' benē' con cabē' rna xti'idza' Diuzi.

Bezulao Pablo ta chopa rdanē' rguixogue'nē' benē' con cabē' rna xti'idza' Diuzi

³⁶ Pues caora baode tu tiempo, una Pablo rēbinē' Bernabé:

—Ya' tziro tatula tzeyubiro ja bichiro nita' yugu ciudad con ga udero uidxogue'ro yaca benē' con cabē' rna xti'idza' Diuzi dza na'. Tziro tzena'ro bi' raca quiejē'.

³⁷ Pues na'ra gu'un Bernabé iquie'yaquē' Juan Marcos, ³⁸ pero Pablo na' bigu'unnē', porque dan' psanla'adyi' Juan leyaquē' dza uyoyaquē' yaca yedyi' nebaba Panfilia. Biuyolēnē' leyaquē' ta tzetixogue'yaquē' benē' con cabē' rna xti'idza' Diuzi. ³⁹ Tantozi uyu'uyaquē' huenē na', uza'yaquē' quie quieyaquē'. Na'ra uquie' Bernabé Marcos uza'yaquē' zioyaquē' isla Chipre. ⁴⁰ Pero Pablo, por tu partela, ulionē' Silas ben' tziolē lēbē'. Na'ra bē' beyudyi' blidza ben' nao xneza Jesús Diuzi ta gacalēnē' Pablo len Silas con ga tzioyaquē', ⁴¹ caora na' uza'yaquē' zioyaquē' yedyi' ga nebaba Siria len yedyi' ga nebaba Cilicia. Con ga udeyaquē' mazera bē'yaquē' ben' nao xneza Jesús di'idza' žela'adyi'.

16

Uquie' Pablo len Silas Timoteo

¹ Na'ra bedyin Pablo len Silas ga re' ciudad Derbe len ciudad Listra. Na' yexacayaquē' tu ben' lao Timoteo naquē' ben' quie Jesús. Naca žna'nē' ben' Israel, lēzi nacarēnē' ben' nao xneza Jesús. Naca xuzinē' ben' griego. ² Rna ja ben' nao xneza Jesús nita' ciudad Listra, len ben' nao xneza Jesús nita' ciudad Iconio, de que naca Timoteo ben' dya'a gula. ³ Caora na' gu'un Pablo uquie'nē' Timoteo, pero como nita' zē ben' Israel gan' tzioyaquē', lēscan' como nezi yaca ben' Israel binaca xuzi Timoteo ben' Israel, quie lena' bzu Pablo tu xēdyidao' Timoteo tacuenda biudze'la'adyi' ja ben' Israel nita' ja ciudad ga tzioyaquē'. ⁴ Na'ra uza'yaquē' zioyaquē'. Pero tu tu ciudad ga udeyaquē' uidxogue'yaquē' ben' nao xneza Jesús nita'ja na' con cabē' una yaca apóstol len ben' napa dyin caora bējē' junta ciudad Jerusalén. Lēscan' gudyijē' lejē' ta uzujē' di'idza' ca di'idza' una yaca ben' bē' junta. ⁵ Pues cana'

guca quie ben' quie Jesús nita' ga udejé', užela'adyi'yaquë' naoyaquë' xneza Jesús du guicho du la'adyi'jé'. Quie lena' uyera mazera ben' nao xneza Jesús tu dza tu dza.

Cabë' guca uxusa Pablo blë'ënë' tu be'mbyu, ben' uza' yaca ciudad nebaba Macedonia

⁶ Pues como bibë' Bichi Be quie Diuzi lato quixogue'yaquë' ben' nita' yaca ciudad nebaba Asia con cabë' rna xti'idza' Diuzi, uza'yaquë' udeyaquë' yaca ciudad nebaba Frigia len yaca ciudad nebaba Galacia ⁷ hasta bdyinyaquë' ga beyudyi yu nebaba Misia. Hora na' gu'unyaquë' tziorayaquë' mazera ta idyinyaquë' yaca ciudad nebaba Bitinia, pero lêzi bibë' Bichi Be quie Diuzi lato. ⁸ Quie lena' beza'yaquë' bedeyaquë' yu nebaba Misia bedyinyaquë' ciudad Troas. ⁹ Caora na' ca du rêla, uxusa Pablo blë'ënë' tu ben' Macedonia zënë' rnabayëchi'në' rêbinë' lëbë': "Naguido' Macedonia ga zundo' tacuenda gacalao' nêto'." ¹⁰ Hora na' ude beyudyi blë'ë Pablo con cabë' uxusanë', na'ra labëtëyaquë' puesto quieyaquë' ta tzioyaquë' Macedonia. Lêzi nê'ëdi', Lucas, uyalia' leyaquë'. Naca' ben' bzu di'idza' lë'ë guichi ni. Na'ra con cabë' uxusa Pablo, lena' unezindo' de que re'en Diuzi tziondo' tzetixogue'ndo' ben' Macedonia con cabë' rna xti'idzé'.

Pablo len Silas bdyinyaquë' ciudad Filipos

¹¹ Na'ra uza'ndo' ciudad Troas con lu'u barco ziondo' tu li ta idyinndo' isla Samotracia. Caora beteyu dza tula bdyinndo' ciudad Neápolis. ¹² Na'ra uza'ndo' ziondo' ciudad Filipos. Pues ciudad Filipos nacan yedyi belaora quie ja ciudad nebaba Macedonia. Pues nita' casi puro ben' romano ciudad na'. Na'ra bega'nndo' na' chopa tzona dza. ¹³ Bizi guca tu dza saodo na' uza'ndo' ziondo' tu ru'a yao že de ru'a yedyi na'. Lëlugar na' nacan ga rio ja ben' Israel ru'elëyaquë' Diuzi di'idza'. Na'ra ure'ndo' na' uzulaondo' rguixogue'ndo' con cabë' rna xti'idza' Diuzi lao ja nigula bdupayaca na'. ¹⁴ Na'ra entre ja nigula na' ure' tunë' laonë' Lidia. Naquë' ben' ciudad Tiatira. Naquë' ben' ruti' la'ari' tza'o, la'ari' culuri morado. Lêzi naquë' ben' rionla'adyi' Diuzi. Na'ra bdze' Diuzi lëbë' pensari ta hue quienë' con cabë' rna di'idza' ru'e Pablo rêbinë' leyaquë'. Cana' uzulaonë' inaonë' xneza Jesús. ¹⁵ Caora na' bë'yaquë' laonë' lente yaca familia quienë'. Pues beyudyi na', unë' nêto' du la'adyi'në':

—Chi psaque'le de que tali banaca' ben' rnao xneza Jesús, guidale sule zan yu'u quia' chopa tzona dza.

Na'ra cana' guca quiendo', bega'nndo' lidyinë'.

¹⁶ Pues bdyin hora tatula ziondo' ga naca lugar ruendo' orar. Pero du tu neza yetilando' tu niguladao' yu'ubi' taxi'ibi'. Na'ra conlë taxi'ibi' ruebi' divinar. Lêzi nacabi' bi' nada'o, bi' rue dyin sin lažu. Pues como ruebi' divinar quie benë', legazi ruebi' gan dumi že para quie ja xa'mbi'. ¹⁷ Na'ra uzulao nigula naobi' nêto' ga ziondo' rnëbi' zidzo rêbibi' ben' nita' ciudad na': —Yaca ben' ni rueyaquë' mandado quie tuzi Diuzi zu sibi. Rguixogue'yaquë' benë' con cabë' rna xti'idza' Diuzi ta hue quieyaquë'n ta yeyoyaquë' guibá dza gatiyaquë'.

¹⁸ Na'ra cana' guca bazio zëdza nao niguladao' nêto' ga riondo' hasta que bdyin dza bdza' Pablo lëbi'. Caora na' beyëchonë' unë' rêbinë' taxi'ibi' yu'ubi': —Rzëtoga' lao Jesucristo, yerolo' gan' yu'ulo'.

Pues caora na'tezi laberote taxi'ibi' yu'u niguladao' na'.

¹⁹ Pero cati blë'ë yaca xan' nigula de que bira saque' hueyaquë' gan dumi por lëbi', caora na' bëxoyaquë' Pablo len Silas, uquië'yaquë' lejé' yulao' ga

re' yaca ben' rñabè'. ²⁰ Na'ra psedyinyaquè' lejè' lao yaca juez unayaquè' rèbiyaquè' ja juez:

—Yaca ben' ni nacayaquè' ben' Israel. Rdayaquè' rguiloyaquè' huedila lao yedyi quiero niga. ²¹ Re' enyaquè' si'ro inaoro cabè' naca pensari quiejè', pero biru'en lato inaoro xneza quieyaquè', porque dan' nacaro ben' romano.

²² Na'ra yaca ben' yedyi na', bdza'tzegueyaquè' Pablo len Silas. Hora na' bè ja juez mandado ilècho policía zabajè' tacuenda quiaquè' lejè' con bara.

²³ Beyudyi uditzagueyaquè' lejè' con bara, bdze'yaquè' lejè' lu'u dyiguiba, gudyiyaquè' ben' rapa dyiguiba ta gapè' lejè' dyè'èdi. ²⁴ Quie lena' uquiè' ben' rapa dyiguiba lejè' guichote ga beyudyite dyiguiba, bdze'nè' ni'ajè' lu'u yèro dyia chopa yaga ta'a ta resiofejè' con candado.

²⁵ Na' cadu gatzo yèla re' Pablo len Silas rueyaquè' orar rulayaquè' alabanza quie Diuzi, pero yaca los demás preso deyaquè' rzènegayaquè' cabè' rula Pablo len Silas. ²⁶ Pues caora na' tu sasazi, ben tu užu' huala gula bzisin dyiguiba. Dyin quie užu' na', uyalo yugu puerta quie dyiguiba. Lèzi yugu caden na' nario ja preso beyedyijan bguinojan layu. ²⁷ Cati udèlebè ben' rapa dyiguiba, blè'èné' nayalo ja puerta quie dyiguiba. Caora na' ulèchonè' espada quienè' ta yeyutinè' cuinnè', porque guquenè' baola yaca preso de ja na'.

²⁸ Hora na' unè Pablo zidzo gudyinè' lèbè':

—Bibi tamala huelo' quio', porque nicazi nita'ndo' yugundo'.

²⁹ Na'ra unaba ben' rapa dyiguiba gui' zionè' tariara uyu'unè' lu'u dyiguiba. Tantozi rdzebinè' zionè' uditzu žibinè' laojè', ³⁰ ulionè' Pablo len Silas ga dejè' unè' rèbinè' lejè':

—Señores, žibiž ca reya'ala' hua' ta yeyèri laxta'ohua' lao Diuzi?

³¹ Na'ra bequèbijè' rèbijè' lèbè':

—Reya'ala' hue quio' xti'idza' Señor Jesús. Cana' yeyèri laxta'olo' lao Diuzi, cana' yeyèri laxta'o familia quio' lao Diuzi.

³² Pues udixogueljè' lèbè' lente yugu yaca familia quienè' nita'ja na' con cabè' rna xti'idza' Señor Jesús. ³³ Lèzi yèla na'tezi hora na', udibi ben' rapa dyiguiba ga naca Pablo len Silas hue'. Na'ra bè'yaquè' lao ben' rapa dyiguiba lente yugo familia quienè'. ³⁴ Beyudyi na' uquiè'nè' Pablo len Silas lidyinè' ga bgaonè' leyaquè'. Hora na' lèbè' lente yugo familia quienè', legazi redaohueyaquè', porque dan' barnaojè' xneza Diuzi.

³⁵ Pero caora uyenì' zila na', use'ela' yaca juez policía gan zè ben' rapa dyiguiba gudyiyaquè' lèbè' ta yebionè' Pablo len Silas lu'u dyiguiba. ³⁶ Caora na' unè ben' rapa dyiguiba rèbinè' Pablo:

—Abla' di'idza' quie ja juez na' re' enyaquè' yebioga' le'e. Pues na' yerole dyè'èdi, yeyole huen.

³⁷ Pero una Pablo gudyinè' lejè':

—Nèto' banacando' cuenda quie ciudad Roma. Según ley quie ben' romano, biru'en lato quiaquè' nèto' udze'yaquè' nèto' dyiguiba sin nica negacazi justicia quiendo'. ¿Cómo pues bare' enyaquè' yebiayaquè' nèto' nagachi'zi? ¡Pues bisaque' usacayaquè' nèto' cana'! Ni cuezando' hasta que guidayaquè' cuinyaquè' yebiayaquè' nèto'.

³⁸ Na'ra hora na' uyo ja policía yeguèdyiyaquè' yaca juez con ca una Pablo. Pues cati unezi yaca juez de que naca Pablo len Silas cuenda quie ciudad Roma, lena' legazi bdzebigaziyaquè'. ³⁹ Caora na' uyo yaca juez gan' de Pablo len Silas yeguèdyijè' lejè' ta yezi'ze Pablo len Silas quieyaquè'. Cana' guca bebioyaquè' lejè' lu'u dyiguiba. Na' unabayèchi'jè' lejè' ta yeza'jè' yerojè' ciudad na'. ⁴⁰ Pues bè' beroyaquè' dyiguiba na', zioyaquè' yeyubiyaquè' Lidia, ben' ruti' la'ari'. Lèscan' yeyubiyaquè' yaca los demás ben' quie

Jesús nita' na'. Ude beyudyi bē'yaquē' lejē' di'idza' žela'adyi', beza'yaquē' zioyaquē' ciudad tula.

17

Guca tu zēdi gula conlē Pablo len Silas ciudad Tesalónica

¹ Pues udeyaquē' ciudad Anfípolis len ciudad Apolonia labdyintejē' ciudad Tesalónica ga zu tu idao' sinagoga quie ja ben' Israel. ² Na'ra con ca naca costumbre quie Pablo, rionē' lu'u sinagoga. Pues lao tzona xman, tu dza huio tu xman dza saodo na', bē'lēnē' ben' rioja lu'u sinagoga na' di'idza' con cabē' rna xti'idza' Diuzi bzu ja ben' unita' dza na' lē'ē guichi. ³ Pxi'idze'nē' leyaquē' de que con cabē' rna lē'ē guichi guti yaca benē' ben' use'ela' Diuzi, pero useban Diuzi lēbē'. Quie lena' unē' rēbinē' lejē' cani:

—Naca Jesús ben' use'ela' Diuzi. Quie lēbē' rguixogui'a le'e. —Cana' una Pablo gudyinē' lejē'.

⁴ Na'ra uzulao inao bala yaca ben' Israel xneza Jesús. Hora na' gucajē' tuže len Pablo len Silas. Lēzi zē yaca ben' griego, ben' rionla'adyi' yaca diuzi, unaorēyaquē' xneza Jesús. Lēzi unaorē ja zē nigula bala'ana quie yedyi na'.

⁵ Pero bala ja ben' Israel, ben' biunao xneza Jesús, gucažē'ēyaquē' como dan' bagule ben' zē ca una Pablo. Caora na' ptupajē' bala ben' rdazija du tu neza, yaca ben' malaja, gudyiyaquē' leyaquē' ta inēyaquē' di'idza' contra Pablo len Silas tacuenda na' idza' yaca ben' yedyi leyaquē'. Hora na' de por mala yetzu'uyaquē' lu'u yu'u quie tu ben' lao Jasón como rdayaquē' reguiloyaquē' Pablo len Silas ta yequiē'yaquē' lejē' ga bedupa ja ben' yedyi. ⁶ Pero como bibedzeleyaquē' lejē' žan yu'u na', uquiē'yaquē' Jasón udubayaquē' lēbē' layu lente itu chopa ben' quie Jesús. Hora na' zioyaquē' ga re' ben' rnabē' quiejē' unayaquē' zidzo rēbiyaquē' leyaquē':

—Ben' ni laonē' Jasón. Bē'nē' lato bdyin ben' rue zēdi duže yedyi layu žan yu'u quienē'. ⁷ Rueyaquē' contra ley quie rey César, porque nayaquē' quele César naquē' rey, nechan' tu ben' lao Jesús na' naca rey.

⁸ Na'ra bē' be ja ben' rnabē' len yaca los demás ben' yedyi ca una yaca ben' na', legazi bdza'yaquē'. ⁹ Pero bebiocaziyaquē' Jasón de fianza lente ben' compañero quienē'.

Bžēnaga yaca ben' ciudad Berea di'idza' una Pablo len Silas

¹⁰ Quie lena' ja ben' quie Jesús nita' na' luegozi use'ela'yaquē' Pablo len Silas du rēla ciudad tula, ciudad laona Berea. Catī bdyinyaquē' ciudad na', rioyaquē' lu'u idao' sinagoga quie ja ben' Israel. ¹¹ Pero yaca ben' nita' na', nacarajē' ben' huen, quele ca yaca ben' nita' ciudad Tesalónica, porque dan' yexetzegueyaquē' bžēnagayaquē' di'idza' ru'e Pablo. Pues tu dza, tu dza, reguiloyaquē' rna'yaquē' lē'ē guichi la'ya quie Diuzi chi ru'e Pablo di'idza' li con cabē' rnēn lē'ē guichi na'. ¹² Na'ra zēyaquē' uzulaoyaquē' inaoyaquē' xneza Jesús. Lēzi unaorē zē ja ben' griego, tanto yaca nigula bala'ana lente yaca be'mbyu, xneza Jesús. ¹³ Pero yaca ben' Israel nita' ciudad Tesalónica, caora uneziyaquē' arda Pablo ciudad Berea rguixogue'nē' yaca benē' con cabē' rna xti'idza' Diuzi, caora na' uza'yaquē' zioyaquē' ciudad Berea unēyaquē' di'idza' contra Pablo len Silas tacuenda idza' ben' ciudad Berea lejē'. ¹⁴ Quie lena' ja ben' nao xneza Jesús nita' ciudad Berea, luegozi laose'ela'teyaquē' Pablo ga uzulao ru'a nisadao'. Pero bega'n Silas len Timoteo ciudad Berea. ¹⁵ Na'ra yaca ben' ziolē Pablo, uquiē'yaquē' lēbē' hasta ciudad Atenas. Caora na' beza'yaquē' zeyoyaquē' ciudad Berea. Lēscan'

caora na' bese'ela' Pablo di'idza' lao Silas lenè' Timoteo ta idežeyaquè' lèbè' luegozi.

Cabè' guca bdze' Pablo di'idza' lao ben' ciudad Atenas

¹⁶ Tu nerbeza Pablo idyin Silas len Timoteo ciudad Atenas na', cati blè'ènè' de ídolo zè gula quie ja ben' ciudad na'. Nun quie blè'ènè' napayaquè' ídolo zègula, cana' lena' guqueyèchi' Pablo. ¹⁷ Quie lena' rionè' lu'u sinagoga ru'elènè' yaca ben' Israel di'idza' len yaca los demás ben' rionla'adyi' Diuzi. Lèzi rdarènè' lao ye'eya yugo dza ru'elènè' di'idza' con nu ben' redilanè' na'. ¹⁸ Na'ra bdyin dza bedila Pablo yaca ben' rusèdi di'idza' quie tu ben' lao Epicuro, len yaca ben' rusèdi di'idza' quie itu ben' lao Zenón. Caora na' uzu-laoayaquè' ru'elèyaquè' lèbè' di'idza'. Unayaquè' rèbiyaquè' laguedyiaquè':

—¿A ver bizi ca ina ben' huezi' yè' niga?

Pero na' ibalayaquè' unayaquè':

—Raqueda' naquè' ben' rda rguixogue' di'idza' quie yaca diuzi tula.

Cana' unayaquè' como dan' rda Pablo rguixogue'nè' yaca benè' con cabè' guca quie Jesús bebanner'. ¹⁹ Caora na' uquiè'yaquè' lèbè' tu paraje laona Areópago ga redupayaquè' según costumbre quiejè' ru'eyaquè' laguedyijè' consejo. Na'ra unayaquè' rèbiyaquè' lèbè':

—Re'enndo' inezindo' con cabè' rnao', ²⁰ porque bineyendo' cabè' naca pensari quio'. Re'enndo' uxi'idze'lo' nètò'.

²¹ Cana' nayaquè' como dan' lega rexeyaquè' yeyaquè' tu ta bineyeyaquè'. Casi yugu dza puro re'yaquè' ru'eyaquè' di'idza' tacuenda idzeleyaquè' nu pensari natza'la, pensari cubitecala. Cana' bè ja ben' Atenas len ja ben' uza' yedyi tula nita' na'.

²² Na'ra uzuli Pablo gatzo la'o gan re'jè' paraje quiejè' laona Areópago unè' rëbinè' leyaquè':

—Benè' quie ciudad Atenas, rlè'èda' rionla'adyi'le diuzi zè gula. ²³ Cati uya'a yena'a ga rionla'adyi'le diuzi quiele, blè'èda' tu ru'aba lè'èna na' dyia letra rnan cani: “Ru'aba quie diuzi nítu nunu nubè'.” Cana' rnèn. Pues como baonale binubè'le Diuzi, quie lena' re'enda' inia' le'e quie tuzi Diuzi zu guibá.

²⁴ 'Pues lèbè' bzalonè' yedyi layu len yugulu ta de laona. Naquè' xan' lao yugulute, chi lu'u guibá, chi lao yedyi layu. Pero bizunè' lu'u idao' ta bè ja benè'. ²⁵ Bibi rdziogue Diuzi bi cosa. Pues lao na'anè' za' yela' neban quiero, za' be rzi'ro, za' yugulu ta de quiero.

²⁶ 'De tuzi be'mbyu bè Diuzi beya cue' benèchi' ta inita'yaquè' duze yedyi layu. Lèzi udixunè' bi tiempo reya'ala' zuyaquè' lao yedyi layu, udixurènè' lato quieyaquè' ga reya'ala' nita'yaquè'. ²⁷ Bènè' cana' tacuenda huero pensari inaoro xnezè', porque binacan zèdi yedzeleroro xnezè' chi re'enro inaoron. ²⁸ Pues rnaban yele ca una tu ben' laguedyile, ben' uzu dza na'te, ben' rsèdi guichi. Pues lèbè' unè' cani: “Lao na'a Diuzi nebanro, rdaro, rzi'ro be.” Lèzi una itu ben' laguedyile rëbinè' le'e cani: “Nacaro familia quie Diuzi, porque lèbè' runnè' yela' neban quiero.”

²⁹ Neru'e Pablo di'idza' rëbinè' leyaquè':

—Chi nezile Diuzi runnè' yela' neban quiero, bireya'ala' gacale pensari de que naca Diuzi ca quie tu imagen de oro o de plata, o de yo. De pensarizi quie yaca benè' rueyaquè' imagen quieyaquè'. ³⁰ Ba'ala'cazi bè ja ben' unita' dza na'te contra Diuzi, bibènè' castigo quieyaquè', porque biuneziyaquè' bi bèyaquè'. Pero hora na' re'en Diuzi utza' yugo ben' nita' duze yedyi layu pensari quieyaquè' inaoyaquè' xnezè'. ³¹ Cana' re'en Diuzi porque tali na' idyin dza cati huenè' juicio duze yedyi layu. Por lena' bè Diuzi nombrar Jesús gaquè' ben' hue juicio ta yu'u ni'a xnezi. Pseban Diuzi Jesús ta inezi

yugu ja benë' naca Jesús ben' hue juicio lao yugulute ben' nita' lao yedyi layu. —Cana' una Pablo gudyinë' lejë'.

³² Na'ra cati be yaca ben' nita' na' ca una Pablo unë' pseban Diuzi Jesús, caora na' balayaquë' ptitojë' lëbë'. Pero ibalayaquë' unayaquë' rëbiyaquë' lëbë':

—Tu dza zeza'ra uzë'nagando' quio' mazera cabë' rnao'.

³³ Caora na' bero Pablo beza'në' ga re'yaquë', ³⁴ pero bala yaca benë' na' guleyaquë' con cabë' di'idza' unë' Pablo. Entre leyaquë' zu tu ben' lao Dionisio, naquë' juez conlë yaca los demás ben' re' lu'u Areópago. Lëzi gulerë tu nigula laonë' Dámaris lente ibala ja ben' tula.

18

Cabë' guca quie Pablo dza udanë' ciudad Corinto

¹ Ude beyudyi na', beza' Pablo ciudad Atenas zionë' ciudad Corinto.

² Lëciudad na' yatilanë' tu ben' Israel. Ben' na' laonë' Aquilo, naquë' ben' uza' yu nebaba Ponto. Na' ciudad Roma zu tu ben' lao Claudio, naquë' rey quie ben' romano. Na' bënë' mandado yeza' yugu ja ben' Israel ciudad Roma. Quie lena' beza' Aquilo lenë' žgulë' Priscila ciudad na', bedyinyaquë' ciudad Corintola. ³ Cana' uyo Pablo yeyubinë' leyaquë' como lëzi ca dyin na' rue Aquilo lenë' žgulë', cana' ruerë Pablo. Pues bega'nënë' leyaquë' bëlënë' leyaquë' dyin tuže reguibiyaquë' la'ari' reo ta hueyaquë' nu yu'u de la'ari' ta ta'ona. ⁴ Na'ra yugo dza saodo rio Pablo lu'u sinagoga quie ja ben' Israel udixogue'në' leyaquë' len ben' binaca ben' Israel con cabë' rna xti'idza' Diuzi, porque gu'unnë' inaojë' xneza Diuzi.

⁵ Caora na' uza' Silas len Timoteo yu nebaba Macedonia bdyinyaquë' ciudad Corinto ga rguixogue' Pablo ja ben' Israel con cabë' rna xti'idza' Diuzi du guicho du la'adyi'në' rëbinë' leyaquë' naca Jesús ben' use'ela' Diuzi.

⁶ Pero yaca ben' Israel, uzulaoyaquë' rnëyaquë' di'idza' contra Pablo ptasi bnioyaquë' lëbë'. Quie lena' psisi Pablo gabán quienë' tacuenda yedyibi bëxte dyian. Cana' bënë', porque según ca naca costumbre quieyaquë', lena' nacan seña bibë yaca ben' yedyi na' cuenda ca di'idza' bëlënë' leyaquë'. Quie lena' unë' rëbinë' lejë':

—Cuzinile napale dula' xquia quiele. Bibi dula' quia' nacan chi hue Diuzi castigo quiele, porque udixogui'a le'e con cabë' rna xti'idza' Diuzi, pero le'e bigulele quia'. Na'ra usanla'adya' le'e tza' tzetixogui'a yaca ben' binaca ben' Israel con cabë' rna xti'idza' Diuzi. —Cana' una Pablo gudyinë' lejë'.

⁷ Caora na' beronë' lu'u sinagoga na', zionë' lidyí tu ben' lao Ticio Justo. Naca Ticio Justo ben' rionla'adyi' Diuzi, zuë' cuëta sinagoga. ⁸ Pero na'ra uzulao tu ben' lao Crispo, ben' xan' sinagoga na', inaoñë' xneza Jesús lente familia quienë'. Lëscan' zë yaca ben' ciudad Corinto, uzulaoyaquë' inaoyaquë' xneza Jesús. Caora na' bë' Pablo laoyaquë' yuguluyaquë'. ⁹ Na'ra guca tu yëla uxusa Pablo benë' unë' Jesús gudyinë' lëbë':

—Bigapo' cuidado. Biusano' rguixogue'lo' yaca benë' con cabë' rna xti'idza' Diuzi. Bicie'lo' chizi. ¹⁰ Como në'ëdi' rapa' luë', ni tu nunu saque huelë luë' chan' bi tamala re'nyaquë' hueyaquë' quio', porque yedyi niga nita' zë yaca ben' inao xneza'. —Cana' uxusa Pablo benë' una Jesús gudyinë' lëbë'.

¹¹ Cana' guca bega'n Pablo ciudad Corinto tu iza yu gatzo na' psëdinë' yaca ben' ciudad na' con cabë' rna xti'idza' Diuzi.

¹² Na'ra tiempo na' uzu tu ben' lao Galión. Naquë' gobernador quie yu nebaba Acaya. Pues yaca ben' Israel ptupayaquë' laguedyijë' bëyaquë'

contra Pablo uquië'yaquë' lëbë' ga re' gobernador, ¹³ unayaquë' rëbiyaquë' gobernador na':

—Ben' ni rdanë' rusëdinë' benë' netza'la ca reya'ala' tzionla'adyi'yaquë' Diuzi. Ca rusëdinë' benë' binacan tuzi con cabë' rna ley quiero.

¹⁴ Caora na' binesulao Pablo inënë' caora unë Galión rëbinë' yaca ben' Israel:

—Chi naquë' ben' de dula' xquia huala quie, o chi bënë' tu tamala gula, pues bibi zëdi de hua' reglo quiele. ¹⁵ Pero como racale huedila quie di'idza', quie lao benë', quie lao ley quiele, pues ulehue reglo de entre le'ezi, porque bire'enda' gaca' juez quie ley quiele.

¹⁶ Caora na' bebionë' leyaquë' gan' re'në' na'. ¹⁷ Na'ra bëxoyaquë' tu ben' lao Sóstenes, porque naquë' xan' sinagoga na', bë'yaquë' lëbë' zi' lao ga re' gobernador na'. Pero gobernador na', gabi cuenda bënë' dan' bë'yaquë' cana'.

Bedyin Pablo ciudad Antioquía tatula

¹⁸ Pero Pablo na' bega'nnë' na' zë dza. Uderala bë'në' tu despedida yaca ben' quie Jesús nita' ciudad Corinto, beza'në' zeyonë' uquië'në' Aquilo len Priscila bdyinyaquë' Cencrea na' ga pchibi Pablo guichonë' garë'te ta gaca seña de que abzunë' di'idza' ca bega'nlënë' Diuzi dza na'te. Caora na' uyu'ulënë' Aquilo len Priscila lu'u barco zioyaquë' tu ciudad nebaba Siria laona Efeso. ¹⁹ Cati bdyinyaquë' ciudad na', psan Pablo leyaquë' na' uyonë' lu'u sinagoga ga bë'llenë' yaca ben' Israel di'idza', yaca ben' bedupa na'. ²⁰ Caora na' unabayaquë' yega'n Pablo len leyaquë' zidza, pero bigu'unnë' yega'nnë' na'. ²¹ Cana' bë'në' leyaquë' tu despedida ta yeza'në', na' unë gudyinë' leyaquë':

—Reya'ala' tza'a ciudad Jerusalén, porque baza' tu lani. Pero chi Diuzi gunnë' lato decazide huida' ideyuba' le'e. —Cana' una Pablo caora beza'në'.

Na' uyu'u Pablo lu'u barco beza'në' ciudad Efeso zionë' ciudad Cesarea. ²² Tu bedezinë' ciudad Cesarea uyonë' ciudad Jerusalén yeyubinë' yaca ben' nao xneza Jesús nita' na' yegapanë' lejë' diuzi. Caora na' beza'në' zeyonë' ciudad Antioquía. ²³ Pues na' uzunë' chopa tzona dza. Ude na', uza'në' udanë' tu tu yedyi nebaba Galacia len tu tu yedyi nebaba Frigia, bë'në' di'idza' zela'adyi' yaca ben' nao xneza Jesús nita' tu tu yedyi con ga udenë'.

Bdyin Apolos ciudad Efeso udixogue'në' benë' con cabë' rna xti'idza' Diuzi

²⁴ Na'ra tiempo na' uzu tu ben' Israel, ben' lao Apolos. Naquë' ben' ciudad Alejandría. Na' bdyinnë' ciudad Efeso rguixogue'në' benë' con cabë' rna xti'idza' Diuzi, porque dyë'ëdi' nezinë' cabë' rnën' lë'e guichi la'iya quie Diuzi. ²⁵ Lëzi nezinë' xneza Jesús. Dyë'ëdi gula udixogue'në' psëdinë' benë' ca naca quie Jesús, ba'ala'cazi tuzi ca bë' Juan lao benë' nubë'në' psëdinë' benë'. ²⁶ Na'ra birdzebinë' rguixogue'në' con cabë' rna xti'idza' Diuzi lu'u sinagoga na' zu yedyi na'. Pero cati be Aquilo len Priscila di'idza' ru'enë', caora na' uquië'yaquë' lëbë' lidyiyaquë' ga pxidze'yaquë' lëbë' mazera bala ta binenezinë' quie xneza Diuzi. ²⁷ Caora cati bdyin dza gu'u'n Apolos tzionë' yu nebaba Acaya, gualë yaca ben' nao xneza Jesús lëbë', bë'yaquë' lëbë' tu guichi ta hua'në' lao yaca ben' nao xneza Jesús nita' yedyi nebaba Acaya tacuenda na' yezi'yaquë' lëbë' dyë'ëdi zan yu'u quieyaquë'. Cana' uza'në' zionë' bdyinnë' ja yedyi nebaba Acaya. Dyë'ëdi gula gualënë' ja ben' nita' na', ben' nao xneza Jesús, porque bë' Diuzi tu tahuen quiejë' bdze'në' leyaquë' pensari inaojë' xnezë'. ²⁸ Pues lao catu yaca ben' nita' na' bdze'në' di'idza' claro gula de que uquixi ja ben' Israel bire'enjë' inaojë' xneza Jesús. Tantozi udixogue'në' leyaquë' dyë'ëdi gula con cabë' rna xti'idza' Diuzi,

biubinyaquë' bi nayaquë' ta yequëbiyaquë' inayaquë' lëbë'. Con cabë' rnën lë'ë guichi la'ia quie Diuzi, pxi'idze'në' leyaquë' de que naca Jesús ben' ute usela yaca ben' Israel.

19

Con cabë' bë Pablo cati udanë' ciudad Efeso

¹ Na'ra tu nerda Apolos ciudad Corinto zio Pablo tu bedezinë' ga nacan puro ya'a bdyinnë' ciudad Efeso. Lëciudad na' yatilanë' chopa tzona ben' nao xneza Juan bautista. Pero bineneziaquë' chi zu Bichi Be quie Diuzi. ² Quie lena' una Pablo rëbinë' leyaquë':

—¿Uyu'ule Bichi Be quie Diuzi caora ptza'le pensari quiele uzulaole rnaole xneza Diuzi?

Pues na' bequëbiyaquë' nayaquë':

—Ni siquiera binezindo' chi zu Bichi Be quie Diuzi.

³ Na' unaba Pablo leyaquë' tatula:

—¿Nuži bë' laole dza na', chi'?

Na' bequëbiyaquë' rëbijë' lëbë':

—Bë' Juan bautista laondo' con cabë' unanë' nëto'.

⁴ Na'ra una Pablo rëbinë' leyaquë':

—Bë' Juan bautista lao nu ben' ptza' pensari quie, ben' re'en inao xneza Diuzi. Pero lëzi gudyinë' yaca ben' bë'në' laohue de que reya'ala' inaojë' neza quie tu ben' zaza'ra, tu ben' lao Jesús. —Cana' una Pablo gudyinë' lejë'.

⁵ Pues cati beyaquë' cabë' di'idza' ru'e Pablo, na' bë' Pablo laoyaquë' bzëtonë' lao Señor quiero Jesús. ⁶ Biži cati pquichi Pablo na'anë' guichoyaquë', caora na' uyu'u Bichi Be quie Diuzi leyaquë'. Quie lena' uzulaoyaquë' ru'eyaquë' di'idza' quie ben' tula, bë'yaquë' di'idza' binaca di'idza' quieyaquë', unayaquë' con cabë' pensari bdze' Diuzi lu'u guicho laxta'oyaquë'. ⁷ Pues ca tu yaca ben' bë' Pablo laohue, naca chipchopayaquë'.

⁸ Na'ra lao tzona biu' uzu Pablo ciudad na' rionë' lu'u sinagoga quie ja ben' na'. Birdzebinë' rudze'në' di'idza' laoyaquë' gudyinë' leyaquë' reya'ala' inaoyaquë' xneza Diuzi. ⁹ Pero bala ben' zu na' gucajë' yaladyi'. Bigu'unjë' galejë' con cabë' rna xti'idza' Diuzi, dechan' uzulaoyaquë' rnëyaquë' di'idza' contra xneza Jesús lao yaca ben' ciudad na'. Quie lena' psanla'adyi' Pablo leyaquë' ga nita'jë' na'. Uquië'në' yaca ben' nao xneza Jesús zioyaquë' ga zu tu yu'u escuela quie tu ben' lao Tiranno. Pues yugu dza bë'lënë' benë' di'idza' lu'u yu'u escuela na'. ¹⁰ Cana' guca bega'n Pablo yedyi na' psëdinë' leyaquë' lao chopa iza cuenda na' be yaca ben' nita' ja ciudad nebaba Asia xti'idza' Señor quiero, chi ben' Israel, chi ben' tula. ¹¹ Na'ra gualcë' Diuzi Pablo, bënë' yela' milagro quienë' ¹² hasta que yehua'a benë' nu bayo o chi nu žaba Pablo ga de ben' raca žhue'. Pues con lëzin beyacajë', bero ja taxi'ibi' yu'uyaquë'.

¹³ Na'ra guca dza na' rda chopa tzona yaca ben' Israel tu tu yedyi, ben' rebio yaca taxi'ibi' yu'u yaca benë'. Pues gu'unyaquë' hueyaquë' uzëtoyaquë' lao Señor quiero Jesús ta yero taxi'ibi' yu'u ja benë'. Quie lena' unayaquë' rëbiyaquë' taxi'ibi' yu'u yaca ben' na':

—Ržëtondo' lao Jesús, ben' rguixogue' Pablo di'idza' quie, ta yerolo' gan' yu'ulo'.

¹⁴ Cana' bë yaca lao gadyi ži'i tu ben' lao Esceva. Naca Esceva ben' Israel. Lëscan' naquë' xan' pxuzi. ¹⁵ Caora cati gudyiyaquë' taxi'ibi' cana', bequëbi taxi'ibi' na' gudyin leyaquë':

—Nubë'caza' Jesús, lëzi nubë'caza' Pablo, pero le'e, ¿nuži nacale? —Cana' una taxi'ibi' gudyin leyaquë'.

¹⁶ Na'ra ben' yu'u taxi'ibi' na', labëxotenë' leyaquë' bë'në' quieyaquë'. Tan-tozi bë'në' leyaquë' zi', bezunoyaquë' du ga'ala' guidiyaquë'. Du nacayaquë' hue' bedyinjë' žan yu'ute quieyaquë' zi'. ¹⁷ Na' cati be yaca ben' nita' ciudad Efeso cabë' guca quie ži'i Esceva, legazi bdzebiyaquë'. Cana' gucayaquë' pensari naca Señor quiero Jesús ben' že, ben' de yela' huaca quie.

¹⁸ Lëzi žë yaca ben' nao xneza Jesús na', bicala ta median babëyaquë' dza na'la, uxubalëpiyaquë'. ¹⁹ Cana' bërë žë yaca ben' nao rusëdi yela' brujo. Nu'ayaquë' libro yela' ben' brujo quieyaquë' bzeiyaquë'n lao yaca ben' yedyi nita' na'. Pues bira unaojë' quie yela' brujo quiejë'. Caora cati bebiojë' cuenda ca tu zaca' ja libro na', zaca'n cadu gatzo gayuhua mila dumi plata. ²⁰ Cana' guca bžera ben' nao xneza Jesús. Du guicho du la'adyi'yaquë' unaoyaquë' xnezë'.

²¹ Pues bë' beyudyi guca cana', na'ra psaque' Pablo tzionë' tzeyubinë' yaca ben' quie Jesús nita' ja ciudad nebaba Macedonia len ja ben' nao xneza Jesús nita' ciudad nebaba Acaya. Lëzi gu'unnë' tziorënë' ciudad Jerusalén. Na' unë' gudyinë' lejë'.

—Huayoro ciudad Jerusalén, te na' tziorëro ciudad Roma. ²² Caora na' use'ela' Pablo chopa ben' racalë lëbë', use'elë' Timoteo len itu ben' lao Erasto. Bënë' mandado tzioyaquë' yu nebaba Macedonia. Pero Pablo na' bega'nnë' ichopa tzona dza yu nebaba Asia na'.

Cabë' guca, guca žëdi quie ben' quie Jesús, ben' nita' ciudad Efeso

²³ Na'ra tiempo na' uzulao ja ben' ciudad Efeso rueyaquë' contra ben' nao xneza Jesús. ²⁴ Pues dyin quie tu ben' lao Demetrio uzulaojë' ruejë' contra lejë'. Nacan negocio quie Demetrio ruenë' idao' bižu quie diuži quieyaquë' lao Diana. De puro plata ruzaloyaquë'n ta ta'onan. Quie lena' dumi žë ruenë' gan lente ja ben' ruelë lëbë' negocio na'. ²⁵ Caora na' bedupalënë' yaca ben' ruelënë' negocio, unë' rëbinë' leyaquë'.

—Señores, dyë'ëdi nezile con ca dyin na' naoro dan' ruero gan dumi žë quiero. ²⁶ Lëzi dyë'ëdi nezile con cabë' rue ben' lao Pablo. Pues rdanë' në' de que yaca diuži rue ja benë', binacayaquë' diuži. Pues como rdanë' rëbinë' ja benë' cana', abënë' gan apsan ben' žë costumbre quiero, barnaoyaquë' con cabë' rna Pablo. Na' cala tuzi ciudad quiero rdanë' ruenë' cana', lëscan' casi duže yedyi nebaba Asia rdanë'. ²⁷ Quie lena' žudyi gula nacan huabiagui' negocio quiero. Lëscan' nacarën žudyi idyin dza bira gapala'n benë' idao' quie Diana quiero, bira tzionla'adyi'yaquë' lëbë'. Bireya'ala' usantro gacan cana', porque duže yedyi nebaba Asia lente yaca los demás yedyi layu rionla'adyi'yaquë' Diana quiero.

²⁸ Na'ra bë' beyudyi beyaquë' con cabë' una Demetrio, legazi bdza'yaquë'. Hora na' unëyaquë' židzo unayaquë'.

—¡Viva Diana. Naquë' diuži quie ra'o ben' Efeso!

²⁹ Pues dan' gucan cana', legazi uyu'u yaca ben' yedyi ru'be. Caora na' bëxoyaquë' chopa ben' uza' yu nebaba Macedonia, yaca ben' dzaga Pablo, tu ben' lao Gayo, len itu ben' lao Aristarco. Pues udubajë' leyaquë' layu psedyinjë' leyaquë' ga rdupa ben' yedyi na' ta rueyaquë' junta. ³⁰ Na'ra gu'un Pablo tzionë' ga babedupa ja ben' yedyi ta hue'lënë' leyaquë' di'idza', pero bipsan yaca ben' nao xneza Jesús lëbë' tzionë' na'. ³¹ Lëzi bala yaca ben' rna bë' quie yu nebaba Asia, nacayaquë' amigo quienë', unëyueyaquë' lëbë' de que bireya'ala' tzu'unë' ga babedupa yaca ben' yedyi. ³² Pues entre yaca ben' nita' na', balajë' unëyaquë' židzo di'idza' udeudela. Ibalajë' unëjë' natza'la, porque yaca benë' na' legazi uyu'ujë' ru'be, nica bineziyaquë' bixquien' dan' bedupajë' na'. ³³ Caora na' balayaquë' entre yaca benë' nita'

na' pxi'idze'yaquë' tu ben' lao Alejandro bixquien' bdza' ja ben' ciudad Efeso. Na' gudyiyaquë' lëbë' de que tal como bdza' ben' ciudad Efeso conlë ben' nao xneza Jesús, lëscan' bdza'rëyaquë' conlë ben' Israel nita' ciudad Efeso. Quie lena' bdyiga yaca ben' Israel Alejandro tacuenda zënë' zaquë'lao lao yaca ben' bedupa na' tacuenda huenë' cule huenë' defender ben' Israel. Na'ra bë Alejandro seña con na'anë' tacuenda inita'yaquë' chizi yeyaquë' di'idza' re'ennë' inë'. ³⁴ Pero cati gucabë'yaquë' nacarë Alejandro ben' Israel, hora na' cadu lao chopa hora unëyaquë' zidzo unayaquë':

—¡Viva Diana! ¡Naquë' diuzi quie ra'o, ben' Efeso!

³⁵ Na'ra ben' naca secretario quie ciudad na', caora bënë' gan ulezarë yaca ben' nita' na', hora na' unë' rëbinë' leyaquë':

—Benë' ciudad Efeso, rnia' le'e de que yugu ben' nita' ja yedyi layu, dyë'ëdi neziyaquë' de que ra'o, ben' ciudad Efeso, nacan quiero ta gaparo idao' quie diuzi Diana len imagen quienë' ta bguino guibá dza na'te. ³⁶ Na'ra como nitu, nitu, nunu inë' binacan cana', pues ulehue pensari dyë'ëdi cabë' re'enle huele. Mejorla bira huele zëdi. ³⁷ Pues yaca ben' dehua'ale niga, cala unalyaquë' quie idao' quiero, cala unayaquë' di'idza' xi'ibi' contra diuzi quiero. ³⁸ Na'ra chi Demetrio lënë' nu ben' ruelënë' dyin, chi de nu causa quieyaquë' contra nutezi benë', reya'ala' tzioyaquë' ga re' ja ben' rnabë' tacuenda gaonë' leyaquë' xquia lao juez. Pues lao ben' rnabë' reya'ala' gaoro benë' xquia, quele niga. ³⁹ Pues chi re'en Demetrio gaonë' leyaquë' xquia niga ga reduparo, reya'ala' cuezë' hasta idyin dza gaca junta con cabë' rna ley quiero. ⁴⁰ Pues rue zudyi gao ben' quie gobierno ra'o xquia con cabë' guca na'adza. Rue zudyi inayaquë' re'enro tilalëro gobiernó. Pues, chan' inaba ben' quie gobierno le'e bixquien' bedupale bële zëdi na'adza, ¿bizi yëbilyaquë'?

⁴¹ Pues cana' una ben' secretario gudyinë' ben' Efeso. Na'ra ude beyudyi na', bënë' mandado bedzatzayaquë' yeyoyaquë' zan yu'u quie quieyaquë'.

20

Cabë' guca caora uza' Pablo zionë' yaca ciudad nebaba Macedonia len yaca ciudad nebaba Grecia

¹ Na'ra bë' beyudyi tazëdi guca quiejë' na', beyëzi Pablo yaca ben' nao xneza Jesús tacuenda inëyuenë' leyaquë'. Ude beyudyi na', udëdyinë' leyaquë' bë'në' tu despedida. Hora na' uza'në' zionë' yaca ciudad ga nebaba Macedonia. ² Pues uyonë' yeyubinë' yaca ben' nao xneza Jesús, ben' nita' ja ciudad na', bë'në' leyaquë' di'idza' zela'adyi' ta inaoyaquë' mazera xneza Jesús. Beyudyi na' beza'në' zioquë' bedyinnë' yaca ciudad ga nebaba Grecia. ³ Na' ga bega'nnë' tzona biu'. Gu'unnë' tzu'unë' lu'u barco ta tzionë' yaca yedyi nebaba Siria, pero como nezinë' bare'en yaca ben' Israel gutiyaquë' lëbë', bebi'zinë' zeyoguë' bedenë' yaca yedyi ga nebaba Macedonia tatula. ⁴ Uquie'në' tu ben' lao Sópater, ben' ciudad Berea, len Aristarco, len Segundo, ben' ciudad Tesalónica, len Gayo, ben' ciudad Derbe, len Timoteo, len chopa ben' nebaba Asia, tunë' laonë' Tíquico, itunë' laonë' Trófimo. ⁵ Na'ra yaca ben' na', caora bedyinyaquë' ciudad Filipos, tu bedeziyaquë' udyialaoyaquë' zioyaquë' ciudad Troas. Na' ulezayaquë' tu raca bdyin Pablo, porque ciudad Filipos bega'nnë' bedilanë' në'ëdi', Lucas, ben' bdyia di'idza' lë'e guichi ni. ⁶ Cana' bega'nnë' ciudad Filipos hasta dza ude lani cati reza'la'adyi' ben' Israel cabë' guca desde cana'te beza' yaca xuzixta'ojë' nación Egipto. Ude beyudyi na', uza'ndo' con lu'u barco ziondo' ciudad Troas. Pues lao ga'yo'

dza bdyinndo' ciudad Troas na', bedilando' yaca ben' udyialao nêto'. Na' bega'nndo' cadu gadyi dza.

Cabê' guca yeyubi Pablo yaca ben' nao xneza Jesús, ben' nita' ciudad Troas

⁷ Caora na' dza domingo na', bedupalêndo' yaca los demás ben' nao xneza Jesús tacuenda užuzundo' yêta xtila gaondo'n yeza'la'adyi'ndo' Jesús. Lêzi uzulao Pablo na' rusêdinê' nêto' mazera, pero como hueza'nê' yeteyu na', hasta bdyin gatzo yêla ru'elêzinê' nêto' di'idza'. ⁸ Caora na' nita'ndo' tu lu'u cuarto de tzona xcuiâ ga ra'ala' zê yêri yaga. ⁹ Lêscan' na' re' tu bi'byu, bi' ru'abe laobi' Eutico. Re'bi' tu ru'a bentan zu ga nita'ndo' na'. Na'ra como Pablo na' neru'enê' di'idza' mazera, na' unan gasi bi' ru'abe na'. Pues du rasibi', cati bguinobi' ru'a bentan lao tzona xcuiâ ga re'bi' na'te. Caora na' bechisayaquê'bi', pero natibi'. ¹⁰ Quie lena' uyêzi Pablo zionê' ga udixojê'bi' na' byêchonê' udêdyinê'bi' unê' gudyinê' yaca ben' nao xneza Jesús nita'ja na': —Bidzebile, nenebambi'.

¹¹ Caora na', bebê Pablo tatula lu'u cuarto de tzona xcuiâ. Lêgan' na' udaondo' yugutendo' tuze, bzuundo' yêta xtila beza'la'adyi'ndo' Jesús, bê'zi Pablo di'idza' tatula hasta que uyenî' na'. Ude beyudyinê' beza'nê' zeyonê'. ¹² Pero yaca ben' nita' na', blê'ëyaquê' nabamcazi bi' bguino na' bequiê'yaquê'. Quie lena' yugutejê' legazi redaohueyaquê' cabê' guca na'.

Ca guca uza' Pablo len compañero quienê' ciudad Troas bdyinyaquê' ciudad Mileto

¹³ Na'ra nêto' udyialaondo' uyondo' con lu'u barco ta idyinndo' ciudad Asón ta cuezando' guida Pablo, porque gu'unnê' tzionê' puro tu neza. Bigu'unnê' tzionê' lu'u barco. Quie lena' bega'n'lêndo' lêbê' di'idza' yedilando' lêbê' ciudad Asón. ¹⁴ Bi'zi na' caora bedilando' Pablo ciudad na', uyu'ulêndo' Pablo lu'u barco uyondo' yugulundo' ciudad Mitilene. ¹⁵ Na'ra tu bedezindo' ciudad na', beteyu tula, udendo' yu nebaba Quío. Na' beteyu tatula, bdyinndo' ga nacan ga'ala' para tu ciudad laona Samos. Na'ra como biuzaque' idyinndo' mero ciudad Samos, bega'nndo' tu yêla ciudad Trogilio. Na' beteyu tatula, bdyinndo' ciudad Mileto. ¹⁶ Biuyondo' ciudad Efeso, porque bigu'un Pablo sunê' zidza yu nebaba Asia. Pero chi saque'nê', re'ennê' yedyinbachinê' ciudad Jerusalén tacuenda sunê' na' cati idyin dza ga'ala' lani quie usecho quie trigo laonan lani Pentecostés.

Ca di'idza' bdze' Pablo gudyinê' yaca ben' napa dyin, yaca ben' nao xneza Jesús nita' ciudad Efeso

¹⁷ Na'ra cati bdyinndo' ciudad Mileto, gu'zi Pablo yaca ben' napa dyin, yaca ben' nao xneza Jesús nita' ciudad Efeso. ¹⁸ Caora banita'jê' lao Pablo na' unê' rêbinê' leyaquê' cani:

—Dyê'êdi nezile con cabê' bia' laole desde primero cati bdyina' yaca ciudad nebaba Asia. ¹⁹ Pues con catu dza uzulia' le'e, bia' dyin quie Diuzi. Guca' gaxo conlê le'e hasta uredya' bedzagalaohua' nun quie dan' gu'un ja ben' Israel gutiyaquê' nê'êdi'. ²⁰ Udixogui'a le'e yugute ta huen huen quiele. Uya' lu'u yu'u quie quiele apsêdia' le'e con cabê' rna xti'idza' Jesús. ²¹ Udixogui'a ben' Israel len ben' binaca ben' Israel de que reya'ala' hue quiejê' xti'idza' Diuzi, reya'ala' inaojê' xneza Jesús, ben' naca Señor quiero. ²² Na'ra abdyin hora yeya'a ciudad Jerusalén. Ni siquiera nezda' chan' bi tamala gaca quia' ga tza'a. Pero mandado quie Bichi Be quie Diuzi uzua' di'idza' tza'a. ²³ Nacan seguro udze' benê' nê'êdi' dyiguiba. Nacan seguro yedzagalaohua', porque cana' baona Bichi Be quie Diuzi nê'êdi' tu tu yedyi

ga rda'a. ²⁴ Pero birdëbida' bi gaca quia'. Zua' dispuesto gatia'. Decazide re'enda' useyudya' con gusto ca comisión pca'n Señor quiero lao na'a ta quixogu'a benë' con cabë' rna xti'idza' Diuzi ta ineziyaquë' nedyë'ë Diuzi leyaquë'.

²⁵ 'Nezda' dyë'ëdi nitu, nitule, bira yedilale në'ëdi'. ²⁶ Udixogui'a le'e con cabë' rna xti'idza' Diuzi. Quie lena' re'enda' inia' le'e de que cala dula' quia' chan' bihue quiele xti'idza' Diuzi, ²⁷ porque udixogue'caza' le'e duzete con cabë' rna xti'idza' Diuzi, nitu di'idza' bipcacha' ca tu ta rnën lë'ë guichi la'ia quienë'. ²⁸ Gapale cuidado ta inaole dyë'ëdi xneza Jesús. Rapale yaca los demás ben' nao xneza Jesús, porque ulio Bichi Be quie Diuzi le'e ta gapaleyaquë' ca rapa xan' beco' zi'ila' yaca beco' zi'ila' quienë', como por leyaquë' aguti Jesús lë'ë yaga cruzo. ²⁹ Dyë'ëdi banezda' de que caora azeya'a, huída yaca ben' hue ca rue lobo, utzatzayaquë' hueyaquë' zëdi yaca ben' nao xneza Jesús. ³⁰ Lëscan' rnia' le'e de que entre le'ezi huario ben' huazi' ben' nao xneza Jesús yë' tacuenda inaojë' neza tula. ³¹ Gapale cuidado. Bigala'adyi'le como lao tzona iza bipsanla'adya' le'e unëyuecaza' le'e du dza, du yëla, hasta uredya' por le'e.

³² 'Hora na', bicha', rnia' le'e huele cuenda quie Diuzi, lëscan' hue quiele xti'idza'në', porque nedyë'ë Diuzi le'e. Napa xti'idza' Diuzi poder ta gacalën le'e inaorale xnezë'. Lëscan' napan poder ta gacalën le'e gata' quiele yugulu ta re'en Diuzi gunnë' le'e, len yugulu los demás ben' naca ben' la'ia quienë'.

³³ Na'ra biunaba' gunle ni žabale, ni dumi. ³⁴ Dyë'ëdi nezile bia' dyin ta gata' dumi hua' gasto quia' lente gasto quie yaca ben' dzaga në'ëdi'. ³⁵ Bia' cana' ta gaca tu ejempló cabë' reya'ala' huele dyin tacuenda gacalële ben' bibi de quie. Bigala'adyi'le ca una Señor quiero caora unë': "Nacara dya'a quiero gacalëro benë', quiele ca ta si'ro quie benë'."

³⁶ Pues ude beyudyi una Pablo cana', uditzonë' žibinë' bë'lënë' Diuzi di'idza' conlë yaca ben' napa dyin, yaca ben' nao xneza Jesús nita' ciudad Efeso. ³⁷ Caora na' urediyaquë' udedyiyaquë' Pablo udaoyaquë' xaguë' situ.

³⁸ Legazi raqueyaquë' bayëchi', dan' gudyinë' lejë': "Nitu, nitule, bira yedilale në'ëdi'." Na'ra uyolëyaquë' Pablo yesanjë' lëbë' hasta ga iyu'unë' lu'u barcote.

21

Ca guca zio Pablo ciudad Jerusalén

¹ Na'ra bë'ndo' ja ben' nao xneza Jesús, ben' nita' ciudad Efeso, tu despedida. Ude beyudyi na', ziondo' tu lu'u barco bdyinndo' ciudad Cos. Caora beteyuna', uza'ndo' bdyinndo' ciudad Rodas. Tu bedezindo' ciudad Rodas, bdyinndo' ciudad Pátara. ² Na' ciudad Pátara bedilando' tu barco ta zio yu nebaba Fenicia. Caora na' uyu'undo' barco na' ziondo'. ³ Neziondo' lu'u barco cati blë'ëndo' isla Chipre re'n zaquë' yega', pero tu bedezindo' isla Chipre bdyinndo' yu nebaba Siria. Pero como barco na' nu'an yua' ta uca'nnan ciudad Tiro, berondo' lu'u barco na'. ⁴ Caora na' uyondo' yena'ndo' yaca ben' nao xneza Jesús, yaca ben' nita' ciudad na'. Biži bega'ndo' len leyaquë' lao gadyi dza. Na' unayaquë' gudyiyaquë' Pablo de que bireya'ala' tzione' ciudad Jerusalén como baona Bichi Be quie Diuzi leyaquë' bi gaca quie Pablo dza zaza'ra. ⁵ Na'ra baoca gadyi dza zundo' na', beza'ndo', pero yugu ben' nao xneza Jesús, ben' nita' na', len yaca žgulayaquë', len yaca xcuidi' quiejë', za'lëyaquë' nëto' hasta ru'a yedyite. Caora na' lao yožo ru'a nisadao' na', uditzondo' žibindo' blidzando' Diuzi. ⁶ Na'ra bë'ndo' lejë' tu despedida udedyindo' leyaquë'. Na' beza'ndo' uyu'undo' lu'u barco tatula. Caora na' bedzatzajë' zeyojë' žan yu'u quie quiejë'.

⁷ Pero nêto' uza'ndo' ciudad Tiro ziondo' bdyinndo' ciudad Tolemaida ga berondo' lu'u barco. Pues ciudad Tolemaida na' bgapando' diuzi yaca bichiro ben' nao xneza Jesús, ben' nita' na'. Na' bega'nlêndo' lejê' tu yêla. ⁸ Na'ra beteyu na', uza'lêndo' Pablo ni'ando' len yaca los demás ben' dzaga nêto' bdyinndo' ciudad Cesarea. Caora na' uyondo' zan yu'u quie tu ben' lao Felipe. Naquê' ben' rio yedyi tula ratixogue'nê' benê' con cabê' rna xti'idza' Diuzi. Lêzi naquê' ben' ru'e laze ta gao ja nigula bizu xquiuhue de entre ja ben' nao xneza Jesús. Entre ja ben' ru'e laze naca gadyijê'. Na' bega'nlêndo' lèbê'. ⁹ Pues lidyí Felipe na' nita'rê tapa zi'inê' nigula, puro bi' ru'abe yaca. Lêzi rguixogue'rêjabi' benê' di'idza' con ca rna Diuzi. Ruejabi' cabê' bê ja ben' profeta, ben' ulio Diuzi unita' tiempote. ¹⁰ Na'ra aoca chopá tzona dza zundo' yedyi na', cati bla' tu ben' profeta laonê' Agabo. Uza'nê' estado Judea ¹¹ bla'nê' deyubinê' nêto'. Hora na' uzi'nê' cincho quie Pablo pquionê'n cunnê' unê' rêbinê' nêto':

—Yaca ben' Israel, ben' nita' ciudad Jerusalén, uquiojê' xan' cincho ni cabê' pquioga' cuina', usedyinyaquê' lèbê' lao na'a ja ben' romano. Cana' baona Bichi Be quie Diuzi nê'êdi'.

¹² Caora bendo' di'idza' una Agabo, caora na' nêto' len yaca los demás ben' nao xneza Jesús, ben' nita' ciudad Cesarea na', unêyêchi'ndo' rêbindo' Pablo: —Mejorla bira tzio' ciudad Jerusalén.

¹³ Pero bequêbi Pablo rêbinê' nêto':

—Bicuedyile uzuyêchi'le nê'êdi'. Zucaza' dispuesto bitezi ta gaca quia' ciudad Jerusalén por nun quie Señor Jesús, chi uquiojê' nê'êdi', chi gutiyaquê' nê'êdi'.

¹⁴ Pues como bibêndo' gan udzundo'nê', quie lena' gudyindo'nê':

—Gaca quio' ca re'en Diuzi.

¹⁵ Beyudyi bêndo' puesto quiendo', ziondo' ciudad Jerusalén. ¹⁶ Lêzi za'lê bala ben' nao xneza Jesús, ben' nita' ciudad Cesarea, nêto'. Na'ra ciudad Jerusalén bdyinndo' lidyí tu ben' lao Mnasón, ben' uza' Isla Chipre. Bazio zê iza naquê' ben' nao xneza Jesús.

Cabê' guca uyo Pablo yeyubinê' Santiago

¹⁷ Na'ra yaca bichiro, ben' nao xneza Jesús, ben' nita' ciudad Jerusalén na', bê' bdyinndo' na', dyê'êdi gula bgapayaquê' nêto' diuzi. ¹⁸ Caora beteyu na' dza tula, uyolêndo' Pablo yeyubindo' tu ben' lao Santiago zu na'. Lêzi na' beduparê yaca ben' napa dyin quie ja ben' nao xneza Jesús, ben' nita' ciudad Jerusalén. ¹⁹ Caora na' bgapa Pablo leyaquê' diuzi bê'lênê' leyaquê' di'idza' rêbinê' lejê' yugu con cabê' bê Diuzi gualênê' lèbê' udixogue'nê' ben' binaca ben' Israel con cabê' rna xti'idza' Diuzi. ²⁰ Bizi cati beyaquê' di'idza' na' cabê' una Pablo, bêjê' Diuzi ben' ze. Beyudyi na', unayaquê' rêbiyaquê' Pablo:

—Bicha', tahuen gula babêlo'. Banezo' de que entre yaca ben' Israel nita'cazi zê mila yaca ben' barnao xneza Jesús, pero re'entzegueyaquê' inao yugulu benê' ca rna lao ley pca'n Diuzi lao na'a Moisés dza na'te.

²¹ Baneziyaquê' de que luê' rsêdio' yaca ben' Israel nita' yedyi quie ben' tula de que bira nacan zi inaojê' ca rna lao ley pca'n Diuzi lao na'a Moisés. Lêscan' baneziyaquê' rnao' de que bira nacan zi uzuyaquê' tu xêdyidao' zi'iyaquê', ni siquiera ta inaoyaquê' ca naca costumbre gula quiero. ²² Na'ra ¿bizi huero? Pues huaneziyaquê' bazao'. ²³ Mejorla huelo' ca inando' luê'. Entre nêto' ni nita' tapa ja be'mbyu, ben' binehue cumplir tu di'idza' bê'lêyaquê' Diuzi dza na'te. ²⁴ Pues na' uquiê'jê' uyolêjê' lu'u idao' rnabê'ra, huu' gasto quiejê' tacuenda ichugojê' guitza' guichojê' tzehua'ajê' lu'u idao' rnabê'ra gun quie

Diuzi. Lëscan' luë' tzhua'alo' gun quie Diuzi lu'u idao' rnabë'ra. Cana' huelo' tacuenda na' ilë'ë yaca benë' de que rnaocazo' costumbre quiero. ²⁵ Babëcazindo' tu guichi use'ela'ndo' lao yaca ben' binaca ben' Israel, ben' barnao xneza Jesús, gudyindo'jè' ca naca pensari quiero de que bireya'ala' gaojè' bè'ëla' bdyia benë' ru'aba ta bè'yaquë' idolo quiejè'. Lëzi bireya'ala' gaorëyaquë' bè'ëla' quie nu bia bibro ren quie hora gutiba', ni siquiera ren quieba'. Lëscana' bireya'ala' gatalëjè' nigula binaca žgulajè'. —Pues cana' unayaquë' gudyijè' Pablo.

Bëxo yaca benë' Pablo lu'u idao' rnabë'ra bëjè' lëbë' preso

²⁶ Caora beteyu dza tula, bë Pablo gasto quie tapa ben' zu na' tacuenda tzhua'ayaquë' gun quie Diuzi lu'u idao' rnabë'ra. Ude beyudyi na', uquië' Pablo leyaquë' zioyaquë' lu'u idao' rnabë'ra tacuenda tzetixogue'në' yaca pxuzi bi dza tzhua'ajè' gun quie Diuzi lu'u idao' rnabë'ra.

²⁷ Pues cana' bzujè' di'idza' huejè' lao gadyi dza, pero binedila lao gadyi dza caora blë'ë yaca ben' uza' ja ciudad nebaba Asia rda Pablo lu'u idao' rnabë'ra. Caora na' bdza'jè' betupajè' laguedyijè' bëxoyaquë' Pablo. ²⁸ Caora na' unëyaquë' zidzo unayaquë':

—¡Ulegacalë nëto', le'e ben' Israel! Abëxondo' ben' ni, porque lëbë' rdanë' duze yedyi layu rnënë' contra ra'o, rnënë' contra ley pca'n Diuzi lao na'a xuzixta'oro Moisés, rnënë' contra idao' rnabë'ra quiero. Pues ptitonë' idao' rnabë'ra quiero como uquië'në' ben' griego, ben' binaca ben' Israel, lu'e ni.

²⁹ Cana' unayaquë', porque blë'ëyaquë' ciudad na' rdalë Pablo tu ben' griego lao Trófilo. Naquë' ben' ciudad Efeso. Quie lena' racajè' pensari de que uquië' Pablo lëbë' lu'u idao' rnabë'ra na'.

³⁰ Na'ra como bdza' zë ben' ciudad na', labedupatejè' uyu'ujè' bebiojè' Pablo lu'u idao' rnabë'ra lapsiotejè' puerta idao' rnabë'ra na'. ³¹ Na' baru-tiyaquë' Pablo caora bdyin di'idza' ga nita' comandante quie soldado de que legazi raca huedila entre yaca ben' ciudad Jerusalén. ³² Cana' labedupate comandante, len yaca capitán, len yaca soldado quienë', zioyaquë' tariara bdyinyaquë' ga yu'u ja benë' rdila. Caora blë'ëyaquë' abdyin comandante lënë' soldado quienë', na' psanjè' ru'ëyaquë' quie Pablo. ³³ Caora na' zio comandante ubiga'në' ga zë Pablo, bënë' mandado bëxo yaca soldado lëbë' pquioyaquë' lëbë' chopo cadén. Beyudyi na', pquëpinë' yaca ben' nita' na' rëbinë' leyaquë':

—¿Nu ben' niga? ¿Biži bënë'?

³⁴ Pero yaca ben' na' uzulaoyaquë' rnëyaquë' zidzo udeudela. Tantozi rueyaquë' ru'be, biuyofne'e comandante bi nayaquë'. Que lena' bënë' mandado tzhua'a yaca soldado Pablo lu'u cuarto ga nita'jè'. ³⁵ Biži na' cati abdyinyaquë' ga cuëyaquë' nëpi' quie cuarto na', bi'ayaquë' Pablo ta urëyaquë' nëpi' na', porque lega rudzun yaca benë' ga zio soldado. ³⁶ Na'ra yaca ben' ciudad na' ziojè' zenaoyaquë' lejè' rnëyaquë' zidzo najè':

—¡Gutilenë'!

Con cabë' una Pablo gualënë' cuinnë' lao ja ben' ciudad Jerusalén

³⁷ Biži tu binedze' ja soldado Pablo lu'u cuarto ga nita'jè', na' una Pablo di'idza' griego unë' gudyinë' comandante:

—¿Bigunlo' lato hue'lia' luë' tu chopo di'idza'?

Na'ra una comandante na' gudyinë' Pablo:

—¿Cómo raco' di'idza' griego? ³⁸ ¿Quele luë' naco' ben' Egipto, ben' bebio lao tapa mila benë' ta udilalëyaquë' gobierno dza na'? ¿Quele luë' ptupo' leyaquë' lao paraje ga bdyia yu'u? ¿Quele nacarao' xan' ja ben' ruti benë'?

³⁹ Na'ra bequëbi Pablo rëbinë' lëbë':

—Quele nê'ëdi', porque naca' ben' Israel. Uza' ciudad Tarso. Pues ciudad quia' nacan tu ciudad belao entre yaca ciudad nebaba Cilicia. Pero na'a chi huu' tu cule, gunlo' permiso inia' tu chopa di'idza' lao yaca ben' nita' ni.

⁴⁰ Pues como bë' comandante lëbë' permiso ta inënë' lao yaca ben' nita' na', caora na' yesu Pablo lao nêpi' na', bënë' seña conlë na'anë' ta inita'yaquë' chizi. Caora unita'yaquë' chizi yugutejë', hora na' uzulaonë' rnënë' di'idza' hebreo gudyinë' ja ben' nita' na':

22

¹—Bicha' ben' Israel, ni hua' defender cuina'. Ulezëcara nagale quia'.

² Caora beyaquë' rnë Pablo di'idza' hebreo, mazera bega'një' chizi. Na'ra unë' rëbinë' leyaquë':

³—Nacaria' ben' Israel ca le'e. Gologa' tu ciudad nebaba Cilicia laona Tarso. Pero ciudad Jerusalén niga bgula'. Lëzi zë iza uya'a escuela ni ga psëdi maestro Gamaliel nê'ëdi' yugulu con cabë' rna ley pca'n Diuzi lao na'a xuzixta'oro Moisés dza na'te. Du guicho du la'adya' bia' mandado cabë' pensari guca' una Diuzi nê'ëdi', laga ca ruele le'e na'a. ⁴ Lëscan' bëria' contra yaca ben' nao xneza Jesús. Begunni'a leyaquë' hasta bia' balajë' preso bdzi'ayaquë' lu'u dyiguiba ta gatijë', len be'mbyu, len nigula. ⁵ Pues naca xan' pxuzi len yaca los demás ben' rnabë' testigo de que benyaquë' nê'ëdi' guichi nu'a za'a lao ja bichiro ben' Israel, ben' nita' ciudad Damasco. Dyë'ëdi neziyaquë' uya'a yediloga' yaca ben' nao xneza Jesús ta hua'ayaquë' preso yequi'ayaquë' ciudad Jerusalén ni ta gacajë' castigo.

Pablo na' bë'në' di'idza' yugulu con ca uzacanë' dan' bë'në' contra yaca ben' quie Jesús

(Hch. 9.1-19; 26.12-18)

⁶ Na' za' tu neza dza na', bagazi idyina' ciudad Damasco, caora na' cadu la'odza tu sasazi uyëzi tu xni' gui' za'n guibá uyëchon nê'ëdi' ga za' tu neza na'.

⁷ Caora na' bdi'a' yu beda' unë tu ben' una nê'ëdi': "Saulo, ¿bixquien' ru' contra nê'ëdi'?" ⁸ Na'ra unab'a' rëba'në': "¿Nu'zi luë', Señor?" Hora na' unë' rëbinë' nê'ëdi': "Nê'ëdi' Jesús, ben' yedyi Nazaret. Naca' ben' ruelo' contra." Cana' unë' nê'ëdi'. ⁹ Pues yaca ben' za'lia', legazi bdzebiyaquë', porque blë'ëyaquë' xni' gui', pero biuyoñe'eyaquë' xti'idza' ben' unë nê'ëdi'. ¹⁰ Na' agudya'në': "¿Bizi ca re'enlo' hua', Señor?" Na'ra unë' rëbinë' nê'ëdi': "Beyasa, uyo ciudad Damasco. Bë' bazulo' ciudad na', naise'ela' nu ben' ina luë' bi huelo'." Cana' unë' nê'ëdi'. ¹¹ Pero como dyin quie xni' gui' na', pchulan laohua', bira blë'ëda'. Quie lena' bëxo yaca ben' za'lia' na'a bdyinndo' ciudad Damasco na'.

¹² Pues ciudad na' zu tu ben' lao Ananías. Naquë' ben' nao ley pca'n Diuzi lao na'a xuzixta'oro Moisés. Yugu yaca ben' Israel nita' ciudad Damasco nayaquë' quienë' de que naquë' ben' huen gula. ¹³ Caora na' bida Ananías denë'ë nê'ëdi'. Cati bla'në' na', unë' nê'ëdi': "Bicha' Saulo, abdyin hora yelë'ëlo' tatula." Caora unë' cana' labeyacate laohua'. Belë'ëda' dyë'ëdi. ¹⁴ Na'ra unë' rëbinë' nê'ëdi': "Ulio Diuzi luë' desde dza na'te ta inezilo' ca re'en Diuzi gaca, lëzi ta ilë'ëlo' zi'inë', ben' naca la'iya quienë', lëscan' ta yelo' xchi'në'. ¹⁵ Na'ra re'en Diuzi gaco' testigo lao yaca ben' nita' duze yedyi layu, ta yëbo'yaquë' cabë' babelo', cabë' bablë'ëlo'. ¹⁶ Na'ra, bitzëlo'. Uzuli, bë' lato hue' benë' laolo'. Ulidzo' Jesús na' uzëtolo' laohuë' tacuenda yeyula dula' xquia quio'." Cana' una Ananías cati bidë' denë'ë nê'ëdi'.

Pablo na' bē'nē' di'idza' cabē' guca use'ela' Diuzi lēbē' yetixogue'nē' ben' binaca ben' Israel con cabē' rna xti'idza' Diuzi

¹⁷ 'Na'ra cati bedyina' ciudad Jerusalén, uya'a lu'u idao' r nabē'ra na', bia' orar. ¹⁸ Pues guca quia' ca tu ben' uxusa, blē'ēda' Jesús. Hora na' unē' nē'ēdi': "Labegazi yeza'lo' ciudad Jerusalén niga, porque bihuejē' cuenda ca di'idza' quia' yēbo'jē'!" ¹⁹ Na'ra gudyā'nē': "Pero señor, dyē'ēdi nezijē' con cabē' bia' dza na', uyu'a lu'u yaca sinagoga radiloga' yaca ben' nao xneza Jesús ta yequi'ayaquē' udzi'ajē' dyiguiba ru'ayaquē' zi'. ²⁰ Lēzi cati bētiyaquē' Esteban, ben' udixogue' xti'idzo', guca' de acuerdo dan' bētiyaquē' lēbē'. Udapa' gaban quie yaca ben' bēti lēbē'." Cana' gudyā' Jesús. ²¹ Na'ra una Jesús nē'ēdi' tatula: "Labe uyo, porque rse'ela' luē' zitu' ga nita' ja ben' binaca ben' Israel ta tzetixogue'lo' leyaquē' con cabē' rna xti'idza'." Pues cana' guca quia' cati uzulaohua' rnaohua' xneza Jesús.

Gu'un comandante quinē' Pablo

²² Hora na' bira bzēnagajē' ca di'idza' una Pablo, na' unēyaquē' zidzo nayaquē':

—¡Bira reya'ala' suē' dyilayu! ¡Gutilenē'!

²³ Na'ra bipsan ja ben' nita' na' rnēyaquē' zidzo. Yela' rdza' quiejē' bzeyaquē' gaban quiejē' ladza. Lēzi bzerēyaquē' bēxte ladza. ²⁴ Quie lena' bē comandante mandado ta udze'yaquē' Pablo lu'u cuarto quiejē' na'. Pero lēzi bēnē' mandado qui yaca soldado lēbē' con guidi tacuenda na' a la fuerza yēbinē' leyaquē' ca bi falta quienē' de, dan' rnē yaca ben' na' zidzo contra lēbē'. ²⁵ Pues banuquioyaquē' Pablo ta quiyaquē' lēbē' caora unēnē' gudyinē' capitán na':

—Binacan de acuerdo con lao ley quile nē'ēdi', porque naca' cuenda quie ciudad Roma. Pues sin nica nehuelo' justicia quia' lao juez, bide derecho quio' huu' nē'ēdi' castigo chi binezo' de falta quia'. —Cana' una Pablo gudyinē' capitán.

²⁶ Na'ra caora be capitán na' ca una Pablo, uyonē' yetixogue'nē' comandante gudyinē' lēbē':

—Gapo' cuidado bi huelo' quie ben' ni, porque aonē' nē'ēdi' de que naquē' cuenda quie ciudad Roma. —Cana' unē' gudyinē' comandante.

²⁷ Cana' zio comandante ga zē Pablo unabē' gudyinē' lēbē':

—¿Balo' naco' cuenda quie ciudad Roma?

Na' bequēbi Pablo gudyinē' comandante:

—Aja', naca' cuenda quie ciudad Roma.

²⁸ Na' gudyi comandante lēbē':

—Pues cati guca' nē'ēdi' cuenda quie ciudad Roma, lega dumi ze gula udižuga'.

Na'ra una Pablo:

—Pero nē'ēdi' banaca' cuenda quie ciudad Roma desde cati golotia'.

²⁹ Pues cati be yaca ben' banita'ja quija lēbē' de que naca Pablo cuenda quie ciudad Roma, bebiga'jē' ga zēnē'. Hasta cuin comandante na' bdzebinē' dan' ilē'ēti'zi ca bēnē' Pablo castigo sin binegaca justicia quienē' lao juez.

Cabē' guca psedyinjē' Pablo lao ja ben' r nabē' quie ben' Israel

³⁰ Na'ra beteyu dza tula na', gu'un comandante inezinē' dyē'ēdi bixquien' rao yaca ben' Israel Pablo xquia. Quie lena' bexēdyijē' cadē na' nerionē', bē comandante na' mandado ta yedupa yaca pxuzi lente yugu yaca los demás ben' r nabē' quie ben' Israel, ben' nita' ciudad Jerusalén. Caora

babedupayaquë' na', na'ra ulio comandante na' Pablo lu'u cuarto ga denë' psedyinnë' lëbë' lao yaca ben' babedupa na'.

23

¹ Caora bazë Pablo lao ja ben' r nabë' quie idao' r nabë'ra na', na'ra una'në' dyë'ëdi leyaquë' gudyinë' lejë':

—Bicha', hasta na' zucaza' rda'a re' chizi laxta'ohua' lao Diuzi.

² Na' xan' pxuzi laonë' Ananías, bënë' mandado yaca ben' zë ga'ala' ga zë Pablo ta capayaquë' xaguë' dan' unë' cana'. ³ Caora na' una Pablo gudyinë' lëbë':

—¡Diuzi huenë' luë' castigo dan' biruelo' tuzi con cabë' rna lë'ë ley. Re'lo' na' ta huelo' justicia quia' con cabë' rna lë'ë ley, ¿bixquien', pues, ruelo' contra ley na', ru' mandado capa benë' xaga'?

⁴ Na' yaca ben' nita' bago na' unajë' gudyijë' lëbë':

—¿Cana' biruelo' bala'ana xan' pxuzi, ben' quie Diuzi?

⁵ Na' bequëbi Pablo gudyinë' lejë':

—Bicha', binezda' chi naquë' xan' pxuzi. Pues chan' nezda' naquë' xan' pxuzi, biunia' cana', porque rnën lë'ë ley quiero de que: “Reya'ala' huero bala'ana nu ben' r nabë' quiero.”

⁶⁻⁸ Caora na' gucabë' Pablo de que bala ja ben' r nabë' nita' na' nacajë' ben' partido saduceo, na' ibalajë' nacajë' ben' partido fariseo. Pero yaca ben' partido saduceo nayaquë' de que yaca ben' gati biyebanjë'. Lëzi nayaquë' ganu ángel zu, ni bichi be. Pero biži yaca ben' partido fariseo na', binacayaquë' tuzi con cabë' rna ja ben' partido saduceo na'. Quie lena' unë Pablo zidzo rëbinë' leyaquë':

—Bicha', naca' ben' quie partido fariseo. Lëzi xuza' naquë' ben' partido fariseo. Pero dan' rnia' huadyin dza yeban ben' huati, quie lena' rao yaca benë' në'ëdi xquia.

Cana' una Pablo rëbinë' lejë'. Na'ra dan' unë' cana', uzulao ja ben' partido fariseo ruelëyaquë' ben' partido saduceo huenë. Bibega'nyaquë' de acuerdo entre lao chopa cue'yaquë'. ⁹ Pues yugutejë' uzulaojë' rnëjë' zidzo hasta uzuli chopa tzona ben' naca quie partido fariseo, unayaquë' rëbiyaquë' yaca los demás ben' r nabë':

—Ben' ni, bibi tamedian bënë'. Mejorla bihueronë' castigo, porque chica abida nu ángel o chi nu bichi be bë'lë lëbë' di'idza'. Pues gaparo cuidado bihuero contra Diuzi. —Pues cana' unayaquë'.

¹⁰ Na' como legazi racagazi huenë na', bdzebi comandante hueyaquë' zi' quie Pablo. Cana' bënë' mandado tzio yaca soldado ta yebioyaquë' Pablo lado ja ben' nita' na' ta yequië'yaquë' lëbë' tatula lu'u cuarto quiejë'.

¹¹ Na'ra bezu rdze' tula, ptilalao Jesús Pablo rëbinë' lëbë':

—Bidzebo', Pablo, porque con cabë' babëlo' baodixogue'lo' ben' ciudad Jerusalén con cabë' unia', lëscan' ise'ela' luë' ciudad Roma ta tzetixogue'lo' ben' ciudad na' con cabë' unia'. —Cana' una Jesús gudyinë' Pablo.

Bapsaque' ja ben' Israel cabë' huejë' gutijë' Pablo

¹² Biži beteyu na', bala ja ben' Israel gucayaquë' de acuerdo ta gutiyaquë' Pablo. Pues hasta bguntejë' lao Diuzi unajë' hue Diuzi leyaquë' castigo chi bigutiyaquë' Pablo. Lëscan' nayaquë' de que bibi gaoyaquë', bibi yo'oyaquë' tu binegutijë' Pablo na'. ¹³ Mazla chopa galo be'mbyu naca bëjë' compromiso huejë' cana'. ¹⁴ Hora na' uyoyaquë' yena'yaquë' yaca xan' pxuzi len yaca los demás ben' r nabë' quie ben' Israel gudyijë' lejë':

—Pues nēto' babguntendo' lao Diuzi gutindo' Pablo. Baonabando' Diuzi huenē' nēto' castigo chi bigutindo' Pablo. Babguntendo' laonē' bibi gaondo', bibi yo'ondo' tu binegutindo' lēbē'. ¹⁵ Na'ra huele tuhuen gacalēle nēto'. Yēbile comandante ta yeguidē' ni uxe tatula, idehua'anē' Pablo na' laole. Pues yēbilenē' de que re'enle uquēpilenē' mazera como si fuera ta inezile dyē'ēdi quie asunto quienē'. Na'ra nēto' ucachi'laondo' tu neza gutindo'nē' bē' yedenē'. —Cana' unajē' gudyijē' lejē'.

¹⁶ Pero bizi na', be zi'i zan Pablo cabē' unajē' quie Pablo. Quie lena' uyobi' yena'bi' Pablo ga zunē' lu'u cuarto quie ja soldado yetixogue'bi' lēbē' con cabē' unayaquē' quienē'. ¹⁷ Caora na' guzi Pablo capitán gudyinē' lēbē':

—Uquiē'cara bi' niga yehua'abi' lao comandante, porque naca tu di'idza' belao hue'lēbi' lēbē'.

¹⁸ Cana' uquiē' capitán lēbi' ga re' comandante gudyinē' lēbē':

—Za' dehua'a bi' niga laolo' ni, porque cana' una preso, ben' lao Pablo. Lēbē' unē' naca tu di'idza' belao hue'lēbi' luē'.

¹⁹ Bizi bē' beyudyi una capitán cana', bēxo comandante na'a zi'i zan Pablo uquiē'nē'bi' tzala'la rēbinē'bi':

—¿Bizi ca re'enlo' inao' nē'ēdi'?

²⁰ Na' nabi' rēbibi' lēbē':

—Rnia' luē' de que yaca ben' Israel, agucayaquē' de acuerdo ta idenabajē' laolo' iquiē'lo' tío quia' Pablo, tzehua'alo'nē' lao xan' pxuzi len lao yaca los demás ben' r nabē' uxe. Pues inayaquē' de que re'enyaquē' uquēpiyaquē' lēbē' mazera ta inezirajē' dyē'ēdi asunto quienē'. ²¹ Pero bigalelo' quieyaquē', porque mazla chopa galo yaca be'mbyu apcachi'laojē' rbē'nidyiaquē' ta gutiyaquē' tío quia'. Pues tantozi re'enyaquē' gutiyaquē' tío quia' Pablo, aonabayaquē' hue Diuzi leyaquē' castigo chi bigutiyaquē' tío quia'. Lēzi unayaquē' bibi gaojē', bibi yo'ojē' tu binegutiyaquē' tío quia'. Pues banita'jē' listo guida tío quia'. Rbezazijē' luē' chi ise'elo' tío quia'. —Cana' una zi'i zan Pablo gudyibi' comandante.

²² Na'ra gudyi comandante lēbi' de que nitu nunu yēbibi' con cabē' unabī' bagudyibi' lēbē'. Na' ude beyudyi na', bebionē' lēbi'.

Cabē' guca use'ela'yaquē' Pablo lao Félix, ben' naca gobernador

²³ Caora na' beyēzi comandante chopa ben' naca capitán gudyinē' lejē':

—Re'enda' ise'ela' Pablo ciudad Cesarea. Pues utupale yaca soldado tzehua'ayaquē' lēbē' ciudad na'. Na'ra utupale chopa gayuhua soldado tzio ni'azi, len itzona galo chi ben' cuia bia, len ichopa gayuhua yaca ben' hua' lanza. Re'enda' za'le na'a yēla du las nueve. —Cana' una comandante gudyinē' yaca capitán.

²⁴ Pero lēzi gudyinē' lejē' ucuezayaquē' tu bia ta cuia Pablo tziolēyaquē' lēbē' ciudad Cesarea como re'ennē' usedyinyaquē' lēbē' dyē'ēdi lao ben' naca gobernador, ben' lao Félix. ²⁵ Caora na' bē comandante tu guichi ta hua'ajē' ta hue'jē' gobernador. Na' lē'ē guichi rnēn cana': ²⁶ “Estimado gobernador Félix, rgapa' luē' diuzi. ²⁷ Uzi'ze quia' rguixogui'a luē' cabē' naca tu asunto entre ja ben' Israel nita' ni, len tu ben' bēxojē' lao Pablo. Azio chopa tzona dza bagu'unayaquē' gutijē' lēbē'. Pero como unezda' naquē' cuenda quie ciudad Roma, betupa' ja soldado quia' uya'lia' leyaquē' ga nita'jē' gutijē' lēbē'. Pues psela' lēbē' bibētijē' lēbē'. ²⁸ Na'ra como gu'unda' inezida' bixquien' dan' raoyaquē' lēbē' xquia, uqui'anē' lao xan' pxuzi len lao yaca los demás ben' r nabē' quiejē'. ²⁹ Pues ga beyudyi unayaquē' de que por ley quieziaquē' raojē' lēbē' xquia. Pero según ley quiero, ley quie ben' romano, bibi razón de chi gutiyaquē' lēbē', ni siquiera tzu'ugalanē' lu'u dyiguiba. ³⁰ Pero bizi na'

aoderala cati beda' di'idza' banacayaquë' de acuerdo ta gutijë' lëbë'. Quie lena' beguiloga' modo use'ela'në' laolo' na'. Lëzi bia' mandado tziorë yaca ben' rao lëbë' xquia tacuenda yetilajë' di'idza' laolo'. Lëzin na' rguixogu'ia luë'." Pues cana' unën lë'ë guichi use'ela' Claudio Lisias lao gobernador Félix.

³¹ Na' según ca mandado bë comandante, uquië'yaquë' Pablo du rëla hasta bdyinyaquë' yedyi Antipatris. ³² Caora beteyu na', bebi' yaca soldado zio ni'azi bedyinyaquë' ga zu cuarto uza'yaquë'. Pero yaca soldado dyia bia na', ziolëziyaquë' Pablo hasta idyinjë' ciudad Cesarea. ³³ Cati bdyinyaquë' ciudad na', psedyinyaquë' Pablo len guichi nu'ajë' lao ben' gobernador. ³⁴ Na' unë ben' naca gobernador lë'ë guichi na'. Beyudyi unë'n na', unabë' Pablo gaži uza'në'. Caora bequëbi Pablo de que naquë' ben' quie ciudad nebaba Cilicia, ³⁵ caora na' una gobernador rëbinë' Pablo:

—Hua' justicia quio' cati guida ja ben' rao luë' xquia.

Na' bënë' mandado ta gapa yaca soldado quienë' lëbë' lu'u lidyi rey Herodes. Cana' guca psedyinyaquë' Pablo lao gobernador Félix.

24

Cabë' guca bë' Pablo defender cuinnë' lao Félix

¹ Na'ra cati aode ga'yo' dza na', bdyinrë Ananías ciudad Cesarea na', len ibala yaca ben' rnabë' quie ja ben' Israel, len itu ben' laonë' Tértulo, ben' sëlë leyaquë' lao gobernador na'. Bdyinyaquë' lao gobernador na' ta gaoyaquë' Pablo xquia. ² Cati yexi' soldado Pablo psedyinjë' lëbë' lao gobernador, caora na' uzulao Tértulo raonë' Pablo xquia në' rëbinë' Félix na':

—Zucazindo' contento rnabë'lo' nëto', Señor Gobernador, porque por pensari dya'a quio', banaca ja ben' quie yedyi de acuerdo con cabë' bao', porque taže bagucalao' nëto'. ³ Pues yugulundo' rnando' luë' xcalelo', Señor Gobernador, porque raxecazindo' yugu con cabë' ruelëlo' nëto'. ⁴ Na'ra ta biutzëndo' luë', rnaba' tu cule laolo', chi huu' tu huen, uzënego' con cabë' inando' luë' tzadica'. ⁵ Pues cani nacan quie ben' ni naquë' ben' zëdi gula. Rdanë' duze yedyi layu rbionë' yaca benë' chopa cue' de entre yaca ben' Israel. Lëzi naquë' xan' ja ben' nao xneza Jesús, ben' yedyi Nazaret. ⁶ Pues re'ennë' utitunë' idao' rnabë'ra quiendo'. Re'ennë' iquie'në' ben' binaca ben' Israel lu'e na'. Pero lena' nacan žudyi gula según ca naca ley quiendo'. Quie lena' bëxondo'në' ta re'enndo' huendo' justicia de acuerdo con cabë' rna lë'ë guichi ley quiendo'. ⁷ Pero bizi na' cati bla' comandante Lisias, a la fuerza begubanë' bequie'në' lëbë'. ⁸ Na' unë' de que yaca ben' rao lëbë' xquia reya'ala' guidajë' laolo' ni. Quie lena' babla'ndo' laole. Pues mejorla cuincazo' uquëpilo'në' ta yetila di'idza' bixquien' raondo'në' xquia. —Cana' una Tértulo gudyinë' gobernador.

⁹ Na'ra yaca ben' Israel nita'rë na', lëzi unayaquë' de que tabala na' ca una Tértulo. ¹⁰ Caora na' bë ben' naca gobernador seña conlë në'ë lao Pablo ta inezi Pablo ta sulaonë' inënë' huenë' defender cuinnë'.

Na' una Pablo rëbinë' ben' naca gobernador:

—Legazi redaohueda' hua' defender cuina' inia' laolo' ni, porque nezda' azio zë iza naco' juez lao ja ben' Israel. ¹¹ Na' binegaca chipchopa dza bedyina' ciudad Jerusalén ta tzionla'adya' Diuzi. ¹² Nitu ganu rnëlia', ni tazëdi biudiloga' lu'u idao' rnabë'ra na', ni lu'u yaca sinagoga, ni lao ciudad na', nitugazi. Pues nita' ja testigo quia'. Huanëyaquë' chi nacan tali, chi binacan tali, con cabë' rnia' luë'. ¹³ Yaca ben' ni, bibi prueba decazi quiejë' dan' raoyaquë' në'ëdi' xquia. ¹⁴ Pero claro gula re'enda' inia' luë' de que

rionla'adya' Diuzi quie xuzixta'ondo', pero de modo tula, modo cubila. Ben' ni biraxeyaqué' modo quia' nayaqué' binacan dya'a. Pero rnaohua' yugulu con cabè' rnèn lè'è guichi ley pca'n Diuzi lao na'a xuzixta'ondo' Moisés len con cabè' rnèn lè'è guichi bē yaca los demás ben' uidxogue' con cabè' rna xti'idza' Diuzi dza na'te. ¹⁵ Rbeza' idyin dza useban Diuzi yugu ben' huati, chi ben' bē tadya'a, chi ben' bē tamedian. Quie lena' yugu dza, yugu yēla, rapa' cuidado tacuenda ta'a tu neza dya'a, gaca yēri laxta'ohua' lao Diuzi, len lao yaca benè'. ¹⁶ Cala tuza' nē'ēdi' rbeza' idyin dza useban Diuzi yaca ben' huati, dechan' len zē ja ben' yedyi quia', ben' Israel, rbezarēyaqué' dza useban Diuzi yaca ben' huati.

¹⁷ Na'ra como baguca zē iza rda'a du yedyi quie ja ben' binaca ben' Israel, na' bedyina' yedyi quia' ta hua'a yaca ben' yēchi' nita' yedyi na' caridad, lēzi ta udzi'a gun quie idao' rnabè'ra na'. ¹⁸ Na'ra ude beyudyi bzua' di'idza' según ley quiendo' tacuenda gaca' ben' laxta'o yēri lao Diuzi, bibi zēdi udiloga', biyetupa' nu yaca benè'. Zua' rudzi'a gun quie idao' rnabè'ra na' cati dexaca tu chopa ja ben' Israel nē'ēdi', ben' uza' yu nebaba Asia. ¹⁹ Na' yaca ben' dexaca nē'ēdi' lu'u idao' rnabè'ra na', reya'ala' guidajē' niga tacuenda na' chi gaoyaqué' nē'ēdi' xquia. Pues a ver bi inayaqué' chi de bi de quiejē' conlè nē'ēdi'. ²⁰ Na' chi bisaque' guidajē', reya'ala' ina ben' nita' niga chi bedzelejē' nu causa quia' cati zua' lao xan' pxuzi len lao yaca los demás ben' rnabè' quie ben' Israel. ²¹ Pues chica raqueyaqué' bia' tamedian hora zua' laoyaqué' na' unia' zidzo rēba'yaqué': "Dan' rnia' huadyin dza yeban ben' huati tatula, quie lena' rao yaca benè' nē'ēdi' xquia ni." —Cana' una Pablo rēbinè' gobernador na'.

²² Na'ra ba'ala'cazi dyē'ēdi' banezi Félix naca ja ben' nao xneza Jesús ben' huen, bipsannè' Pablo libre. Na' pca'nnè' asunto quienè' cana'zi, porque gu'unnè' uquēpinè' comandante Lisias mazara. Quie lena' unè' gudyinè' lejè':

—Ruen zi cuezaro guida comandante Lisias tacuenda iyudyi asunto quiele ni.

²³ Caora na' bē Félix mandado gudyinè' capitán ta gapanè' Pablo, pero bibènè' quienè' bizinaquezi, porque naca Pablo ben' bala'ana. Lēzi bē' Félix lato guida ja ben' amigo quie Pablo tzeyubijē' lèbè'.

²⁴ Na'ra zio Félix yedyi tula, pero guca chopa tzona dza bedyinnè' ciudad Cesarea tatula lènè' žgulè'. Na' žgulè' laonè' Drusila, naqué' ben' Israel. Caora na' be' Félix mandado ta tzexi' soldado Pablo ta hue'lènè' lèbè' di'idza' yenè' hue' Pablo di'idza' quie xneza Jesús. ²⁵ Conforme na', bē'lè Pablo Félix len žgulè' di'idza'. Na' una Pablo rēbinè' leyaqué' de que bireya'ala' hueyaqué' ca tu ta rnazin quieyaqué', dechan' reya'ala' hueyaqué' ca re'en Diuzi ta gaca huen quieyaqué' cati idyin dza hue Diuzi juicio lao duze yedyi layu. Pues caora be' Félix di'idza' una Pablo, legazi bdzebinè', porque dyē'ēdi' nezinè' binaonè' neza dya'a. Quie lena' unè' rēbinè' Pablo:

—Tu cana'gazi, mejorla beyo. Pues cati gunan lato hueyēža' luè' tatula.

²⁶ Cana' gudyi Félix Pablo. Pero como rbezè' ta hue' Pablo lèbè' dumi tacuenda na' yebionè' lèbè' lu'u dyiguiba, quie lena' rēzi Félix na' lèbè' tzadi tzadi ta ru'elènè' lèbè' di'idza'. ²⁷ Cana' guca quie Pablo lao chopa izara. Na'ra bdyin hora bero Félix na' de gobernador. Caora na' uyēzi itu ben' tula lao lazè', ben' lao Porcio Festo. Na'ra como re'en Félix gaqué' yaca ben' Israel amigo, pca'nzinè' Pablo lu'u dyiguiba.

25

Cabè' guca bè' Pablo defender cuinnè' lao gobernador Festo

¹ Na' babdyin Festo ciudad Cesarea tacuenda huenè' de gobernador. Bizi na' aoca tzona dza bdyinnè' na', uza'nè' zionè' ciudad Jerusalén. ² Na'ra cati bdyinnè' ciudad Jerusalén, zio yaca xan' pxuzi len ibalara ben' rnabè' quie ben' Israel tzeyubiyaquè' lèbè' ta gaoyaquè' Pablo xquia. ³ Unabayaquè' chi huenè' tu cule huenè' mandado tzexi' yaca soldado Pablo ta yedyinnè' ciudad Jerusalén tatula. Pero bapsaque'yaquè' bi hueyaquè' gutiyaquè' Pablo du tu neza. ⁴⁻⁵ Caora na' bequèbi Festo gudyinè' lejé':

—Pues lazeya'atia' luegozi ciudad Cesarea. Como na' zu Pablo naquè' preso, quie lena' rnìa' le'e de que reya'ala' sa'lè nu ben' rnabè' quiele len nè'èdi'. Chi nezile bènè' tamedian, huazaque' gaolenè' xquia laohua' ciudad na'.

⁶ Na' Festo uzunè' ciudad Jerusalén cadu xu'una chi dza. Caora na' beza'nè' zeyonè' bedyinnè' ciudad Cesarea. Beteyu dza tula, yaque'nè' xlatonè' ga rueyaquè' junta. Bènè' mandado ta tzio nu soldado tzexi'yaquè' Pablo.

⁷ Na'ra cati uyu'u Pablo ga re' Festo na', hora na' laobiga'te yaca ben' za' ciudad Jerusalén gan' bazènè', uzulaojè' raoyaquè' lèbè' xquia huala gula lao Festo. Pero ni tu prueba quieyaquè' bide.

⁸ Bizi caora na' be' Pablo defender cuinnè' unè' canì:

—Rnìa' le'e nitu tamedian nehua'. Nica bèza' contra ley quie ja ben' Israel, ni contra idao' rnabè'ra zu Jerusalén, ni contra rey César quie ben' romano. —Cana' una Pablo gudyinè' Festo.

⁹ Na'ra como Festo gu'unnè' gaquè' amigo len ja ben' Israel, unè' gudyinè' Pablo:

—A ver bi ca nao'. ¿Zulo' dispuesto tzio' ciudad Jerusalén tacuenda na' hua' justicia quio' na'la?

¹⁰ Pero bequèbi Pablo gudyinè' lèbè':

—Ni zucaza' laolo' ga reya'ala' gaca justicia quia', porque ni re' juzgado ga re' juez quie rey César. Bireya'ala' tza'a lao ben' Israel. Pues luè' nezo' dyè'èdi nitu lasa bibia' contra ley quie ben' Israel. ¹¹ Pues rnìa' luè' de que chi tali na' bia' tu tamala ta nu'an castigo para gatia', zua' dispuesto huèlo' mandado guti ja soldado nè'èdi'. Pero chi binacan li ca naca dan' raojè' nè'èdi' xquia na', na'ra nitu nunu de derecho quie usedyinyaquè' nè'èdi' lao na'a yaca ben' Israel. Re'enda' tza'a lao rey César ta huenè' justicia quia'. —Cana' una Pablo gudyinè' lèbè'.

¹² Na'ra Festo na', bè' beyudyi bè'lènè' di'idza' yaca ben' ru'e lèbè' consejo quie asunto quie Pablo, unè' gudyinè' lèbè':

—Pues como baonao' de que re'leno' tzio' lao rey César ta gaca justicia quio', pues na'la tziotzazo' gaca justicia quio'. —Cana' una Festo gudyinè' Pablo.

Cabè' guca psedyinjè' Pablo lao rey Agripa

¹³ Na'ra aoca chopa tzona dza na', cati bdyin tu rey tula laonè' Agripa lenè' bi' zannè' Berenice. Bdyinyaquè' ciudad Cesarea ta bgapayaquè' Festo diuzzi. ¹⁴ Bizi na' como bega'njè' na' zè dza, lena' uzulao Festo ru'elènè' rey na' di'idza' quie asunto quie Pablo. Quie lena' unè' rëbinè' rey na':

—Niga zu tu ben' zu niga, ben' pca'n Félix preso cati uyonè' de gobernador.

¹⁵ Bizi cati uya'a ciudad Jerusalén na', bla' yaca xan' pxuzi len yaca los demás ben' rnabè' quie ben' Israel udaoyaquè' lèbè' xquia. Na' unabajè' nè'èdi' ta hua' mandado guti soldado lèbè'. ¹⁶ Pero bequèba' rëba'yaquè' de que

binacan de acuerdo con lao ley quie ben' romano hue nu ben' rnabē' mandado guti soldado nu benē' chan' binegaca justicia quienē' bide prueba chi tamala bēnē'. Pues ruen zi hue'nē' declaración ta huenē' defender cuinnē' lao nu ben' rao lēbē' xquia. ¹⁷ Quie lena' cati bla'yaquē' niga, biudzēda'. Beteyu na'tezi laore'tia' xlatoga' bētia' mandado ta tzexi'yaquē' lēbē'. ¹⁸ Na'ra guqueda' de que huaoyaquē' lēbē' xquia huala gula, pero biubinyaquē' birla inayaquē' contra lēbē'. ¹⁹ Quie ley quiezijē' uyu'uyaquē' huedila len lēbē'. Lēzi unayaquē' quie tu ben' aguti dza na'la laonē' Jesús. Pues quie ben' na' lao Jesús, rna Pablo agutinē' bebannē' zuē'. Quie lēzin udaoyaquē' lēbē' xquia. ²⁰ Na' como birbinda' nacala hua' gaca reglo quiejē', unaba' Pablo chi zunē' dispuesto tzionē' ciudad Jerusalén ta gaca reglo asunto quienē' dan' raojē' lēbē' xquia. ²¹ Pero como unē' re'ennē' tzionē' lao rey César ta gaca reglo quienē', bia' mandado ta gapazi ja soldado lēbē', porque reya'ala' ise'ela'nē' lao rey César na'.

²² Caora na' una rey Agripa gudyinē' Festo:

—Lēzi re'enda' hue'lia' lēbē' di'idza'.

Na' bequēbi Festo rēbinē' lēbē':

—Uxetēzi hue'lao'nē' di'idza'.

²³ Beteyu na' uzutza'o rey Agripa len Berenice uyu'uyaquē' lu'u tu cuarto ga re' Festo. Lēscan' uyu'urē' ja xan' soldado len yaca ben' rnabē' lao ciudad na'. Bē' bdyinjē' na', hora na' bē' Festo mandado yaxi'jē' Pablo. ²⁴ Na'ra una Festo rēbinē' yaca ben' nita' na':

—Pues ni rnia' luē' na', rey Agripa, len yugulu yaca ben' nita'lēro niga cabē' naca quie ben' bazē laoro niga. Pues zē yaca ben' Israel legazi rnēyaquē' contra lēbē'. Tanto ca ciudad Jerusalén, como ciudad Cesarea niga, birsanjē' rnabayaquē' nē'ēdi' ta hua' mandado guti soldado lēbē'. ²⁵ Pues bide razón guti soldado lēbē', porque bide prueba chi bi tamala bēnē'. Pero como cuinnē' unē' de que re'ennē' tzionē' ciudad Roma ta gaca reglo quienē' lao rey César, pues quie lena' psaque'da' ise'ela'nē' ciudad Roma. ²⁶ Pero bisaque' ise'ela' tu guichi lao rey César, porque binenezda' chi nacan tabala bēnē' tamala. Quie lena' rapa' gusto zēlo' niga, oh rey Agripa, tacuenda uquēpilo'nē' mazera chi bēnē' tamedian cuenda na' inezida' bi di'idza' udyia' lē'ē guichi ise'ela' lao rey César. Por lena' yaxi'jē' ben' ni laole tacuenda na' uquēpilo'nē' dyē'ēdi. ²⁷ Porque binacan huen ise'ela' nu preso lao rey César, chan' binezda' bixquien' dan' raojē' lēbē' xquia.

26

Ca guca bē' Pablo defender cuinnē' lao rey Agripa

¹ Na'ra una rey Agripa rēbinē' Pablo:

—Inēlo' huu' defender cuinlo' na'a.

Hora na' ulisa Pablo nē'ē bēnē' seña inēnē' unē' rēbinē' rey Agripa con cabē' guca quienē':

² —Pues rey Agripa, re'enda' inia' de que rapa' gusto zua' laolo' hua' defender cuina', porque binacan li con cabē' na yaca ben' Israel contra nē'ēdi'. ³ Nezda' nubē'lo' dyē'ēdi ca costumbre de quie ben' Israel. Lēscan' nezda' nubē'lo' dyē'ēdi cabē' natza'la pensari quie tu cue' huio entre ra'o ben' Israel. Lena' rnaba' tu cule uzēnago' cabē' inia' luē' con paciencia.

Una Pablo cabē' bēnē' cati binenaonē' xneza Jesús

⁴ 'Pues yugu ja ben' Israel nezijē' cabē' bia' desde cati nacatia' xcuidi' zua' yedyi quia', lente ciudad Jerusalén. ⁵ Lēzi nezijē' dyē'ēdi de que desde

cati nacatia' bi' ru'abe, naca' ben' partido fariseo. Reya'ala' gacajè' testigo quia' de que nacan tali ca nia'. Dyè'èdi nezo' cabè' rue ben' partido fariseo rnaorayaquè' du guicho du la'adyi'jè' ley pca'n Moisés para ra'o. ⁶ Na'ra nia' huadyin dza useban Diuzi yugulu ben' huati con cabè' una Diuzi gudyinè' xuzixta'oro. Pues quie lèzin na' rao ben' Israel nè'èdi' xquia. ⁷ Hasta yugulu lao chipchopa cue' laguedyiro ben' Israel rbezayaquè' su di'idza' gaca con cabè' una Diuzi. Quie lena' rionla'adyi'yaquè' lèbè' rueyaquè' bala quienè' du dza, du yèla. Pues Señor Rey, como lèscan' na yaca ben' Israel rbezayaquè' dza useban Diuzi yaca ben' huati, ¿cómo, pues, araoyaquè' nè'èdi' xquia dan' rbezaria' dza useban Diuzi yaca ben' huati laga ca leyaquè'? ⁸ Chi nayaquè' useban Diuzi ben' huati, ¿bixquien' nayaquè' pensari tondo quia' nia' pseban Diuzi Jesús?

Bdze' Pablo di'idza' cabè' bènè' contra ben' nao xneza Jesús dza na'la

⁹ Pues dza na'te bècaza' pensari hua' contra yaca ben' nao xneza Jesús, ben' yedyi Nazaret. ¹⁰ Cana' bècaza' contra lejè' ciudad Jerusalén. Na' bdzi'a yaca ben' zè lu'u dyiguiba con nu ja ben' nao xneza Jesús. Pues quie tu guichi ben ja xan' pxuzi nè'èdi', lena' bi'an fuerza bia' cana'. Lèzi gucalia' ja xan' pxuzi de acuerdo hora bëyaquè' mandado gati yaca ben' quie Jesús. ¹¹ Lèzi cana' guca zè lasa bia'yaquè' castigo tacuenda na' usanjè' bira inaoyaquè' xneza Jesús. Cana' bia' yugu ciudad con ga zu idao' sinagoga. Hasta du ciudad re' zitu' uya'a yadiloga'yaquè' como legazi bdzè'èda' leyaquè'.

Bè' Pablo di'idza' tatula con cabè' uzacanè' tu neza Damasco (Hch. 9.1-19; 22.6-16)

¹² Quie lena', uya'a ciudad Damasco dza na', como ulio ja xan' pxuzi nè'èdi' ta tza'a ciudad na'. Na' benjè' tu guichi bia' tacuenda udzi'a ben' nao xneza Jesús lu'u dyiguiba. ¹³ Pero, señor rey, re'enda' inia' tu ta guca quia' tu neza. Pues caora za'a tu neza Damasco cadu la'odza, blè'èda' tu xni' gui' ta'n guibá. Na' ure' xni' ga ziondo' tu neza na'. Lèxni' gui' na' nacaran fuerte cabè' xni' obidza. ¹⁴ Quie lena' bdindo' yu yugutendo'. Hora na' beda' unè' tu ben' rèbinè' nè'èdi': "Saulo, ¿bixquien' ruelo' contra nè'èdi'? Pues cuinzo' ruelo' contra ca quie tu bëdyihuaga rulibiba' nu lè'è yaga duchi' nu'a xa'mba' ta rulaohuè'ba', cana' cuinziba' racaba' zi'." ¹⁵ Na'ra caora na' unia' gudyane': "¿Nu'zi luè', Señor?" Na'ra una Señor Jesús rèbinè' nè'èdi': "Nè'èdi' Jesús. Naca' ben' ruelo' contra. ¹⁶ Pero na' beyasa, porque bedetila' luè' tacuenda inaolo' xneza' yèbo' benè' con cabè' guca quio' blè'èlo' nè'èdi' ni. Lèscan' yèbo'yaquè' con cabè' ulu'ena' luè' du dza zezara'. ¹⁷ Re'enda' tzio' tzetixoguelo' benè' con cabè' unia', chi ben' Israel, chi ben' tula, con nutezi. Na' nè'èdi' gacalia' luè' chan' bi tamala hueyaquè' quio'. ¹⁸ Na' ise'ela' luè' tacuenda na' uzioñe'elo' benè' con cabè' naca xneza', porque rdayaquè' lao lato lao chula rnaojè' neza xi'ibi' quie Satanás. Abdyin hora ta tayaquè' lao lato lao xni' inaojè' xneza Diuzi zu guibá. Cana' re'ennan tacuenda si'ze Diuzi dula' xquia quiejè' gacajè' tuze len yaca los demás ben' nao xneza', ben' aodibi Diuzi laxta'o." Cana' una Jesús gudyinè' nè'èdi' tu neza dza na'.

Una Pablo cabè' guca bzunè' di'idza' con cabè' gudyi Jesús lèbè'

¹⁹ Quie lena', señor rey Agripa, bzua' di'idza' con cabè' una Jesús gudyinè' nè'èdi' desde guibá ga zunè'. ²⁰ Tanèro uya'a yetixogui'a ben' ciudad Damasco con cabè' rna xti'idza' Diuzi. Ude beyudyi na', uya'ria' ciudad Jerusalén yetixogui'a ben' nita' na'. Hasta yugu yedyi nebaba estado Judea uya'. Lèscan' uya'a yetixogui'a nutezi ben' binaca ben' Israel. Cana' bia'

uya'a gatezi yedyi, porque re'en Diuzi utza'jè' pensari quiejè' inaojè' xnezè'. Lëscan' gudya'yaquè' reya'ala' tajè' neza dya'a tacuenda inezi ja benè' tabala na' aptza'jè' pensari quiejè'. ²¹ Quie lëzin bëxo ja ben' Israel në'èdi' cati uyu'a lu'u idao' r nabè'ra zu ciudad Jerusalén. Pues hora na' gu'unyaquè' gutiyaquè' në'èdi'. ²² Pero como bagucalè Diuzi në'èdi', hasta hora na' rda'a ni rguixogui'a benè' con cabè' rna xti'idza' Diuzi, la'achi ben' uña'a, la'achi ben' yèchi, con nutezi benè'. Rguixogui'a benè' con cabè' una Moisés len yaca los demás ben' profeta bi ta zaza'ra. Quele ta racazi la'adya' rguixogui'a yaca benè', dechan' ca una Diuzi. ²³ Nia' con cabè' unao xuzixta'oro de que según ca mandado bë Diuzi, yedzagalao ben' Cristo gatinè' huebannè' tatula gaquè' ben' nêro entre yaca ben' useban Diuzi. Caora na' quixogue'nè' ja benè', chi ben' Israel, chi ben' tula, de que tabala na' naquè' ben' ute usela con nutezi ben' nao xnezè'.

Bè' Pablo di'idza' cuenda gale rey Agripa inaojuè' xneza Jesús

²⁴ Cana' una Pablo ru'enè' di'idza' ta gacalenè' cuinnè'. Caora na' unè Festo na' zidzo rëbinè' Pablo:

—¡Pablo, aracatondolo! Tantozi rsèdio' guichi, baodyiagui' pensari quio'.

²⁵ Na'ra bequëbi Pablo rëbinè' lëbè':

—Quele racatondoga', señor Festo, dechan' puro di'idza' li nia'. ²⁶ Dyè'èdi nezi rey Agripa con cabè' nia'. Quie lena' birdzeba' inia' laonè' como nacan seguro babenè' cabè' bë Jesús, porque cala nagachi'zi uda Jesús psëdinè' benè'.

²⁷ Na'ra una Pablo rëbinè' rey Agripa:

—A ver bi ca nao'. ¿Ralelo' con cabè' una yaca ben' udixogue' xti'idza' Diuzi dza na'la? Seguro na' ralelo' quiejè'.

²⁸ Na'ra una rey Agripa rëbinè' Pablo:

—Iledao'zi bihuelo' gan gaca' ben' nao xneza Jesús.

²⁹ Na'ra una Pablo rëbinè' rey na':

—Chi ledao'zi o chi tazera hua' gan, re'en Diuzi utza'lo' pensari quio' inaolo' xneza Jesús como ca në'èdi', luè' len yugulu ben' nita' niga rzënaga ca nia', pero sin narioyaquè' cadén con ca naca quia'.

³⁰ Na'ra bë' beyudyi una Pablo, bezuli rey Agripa lënë' Berenice lënë' gobernador Festo lënë' yaca los demás ben' re' na'. ³¹ Yugulujè' ziojè' tzala'la ta hue'jè' di'idza' nacala ca huejè' quie Pablo. Na'ra unajè' de entre lejè':

—Pues ben' niga, bisaque' huero mandado gatinè', ni siquiera udze'ronè' lu'u dyiguiba, porque bibi tamala bënë'. —Cana' unajè' entre lejè'.

³² Na'ra una rey Agripa rëbinè' Festo:

—Huazaque' usanronè' chan' cuinnè' biunabè' tzionè' gaca justicia quienè' lao rey César. Quie lena' bisaque' usanronè'. —Cana' una rey Agripa rëbinè' Festo na'.

27

Cabè' guca use'ela'jè' Pablo ciudad Roma naquè' preso

¹ Na'ra psaque'yaquè' ise'ela'yaquè' Pablo ciudad Roma. Lëzi në'èdi', Lucas, uza'lia'nè' ciudad na'. Na'ra psedyinjè' Pablo len yaca los demás ben' preso lao na'a tu capitán, ben' lao Julio. Naquè' xan' tu cue' soldado, ben' rue mandado quie rey César. ² Uyu'undo' tu barco yaca ciudad Adrimittio. Cati banacate barco na' puesto yeza'n tziona yaca yedyi ga nebaba Asia, caora na' uyu'urè'itu ben' lao Aristarco len nëto' lu'u barco na'. Naquè' ben' ciudad Tesalónica ga nebaba Macedonia. ³ Na'ra beteyu dza tula bdyinndo' ciudad Sidón. Bizì Julio na' bënë' huen quie Pablo, bë'nè' lëbè' lato tzionè' tzeyubinè'

ga zu yaca amigo quienè'. ⁴ Na' guca chopa tzona dza uza'ndo' ciudad Sidón yu'undo' lu'u barco na' ziondo' tzala' isla Chipre. Caora na' rda tu be bedun' fuerte bza'agan barco de modo que bisaque' sa'n lao nisa na'. Quie lena' udendo' zaquè' yega'la cuèta isla na' ga biruen be bedun'. ⁵ Cana' bedendo' ga nebaba Cilicia len ga nebaba Panfilia bdyinndo' ciudad Mira ga nebaba Licia.

⁶ Pues ciudad Mira na' yexaca capitán na' tu barco uza'n ciudad Alejandría. Lëbarco na' banacaten puesto ta tziona ga nebaba Italia. Caora na' bē capitán na' mandado tzu'undo' lu'u barco tacuenda na' tziozindo' mazera. ⁷ Na'ra du chopa tzona dza biuzaque' sa' barco taria dan' bza'aga be bedun' barco. Quie lena' canezi bedyinndo' ciudad Gnido. Lëscan' como nerda be bedun' gan' ziondo' ruza'agan barco, canezi uza' barco bdyinndo' itzala' isla Creta ga re' ciudad Salmón. Pero tu udezindo' na', uyèchondo' ga re' isla na', ga birda be uza'agan barco. ⁸ Pero lëscan' canezi uzaque' bdyinndo' ga laona Buenos Puertos. Na' nacan ga'ala' para ciudad Lasea.

⁹ Pues como taže udzèndo', baruen žudyi dan' rdando' lao nisa, porque babezi' tiempo quie be bedun' fuerte gula. ¹⁰ Quie lena' una Pablo rëbinè' yaca ben' nita' na':

—Señores, žudyi gula nacan chi tziolëziro barco lao nisa ni, porque huaca cuiagui' barco lente yua' quien lao nisa ni. Lëzi ruen žudyi udyiagui'ro cuinro. —Cana' una Pablo gudyinè' lejè'.

¹¹ Pero capitán na', bibënë' casa quie Pablo den' gulenè' di'idza' unè xan' barco len di'idza' unè yaca ben' rusa' len. ¹² Pero como Buenos Puertos binacan dya'a para cuezando' te tiempo quie be bedun', yugulujè' gu'unjè' yeza'ndo' gan' na', porque gu'unjè' idyinnndo' ciudad Fenice. Naca Fenice ciudad ga nebaba isla Chipre birdacazi be bedun' fuerte.

Cabè' guca ziojè' lao nisa, ben nisayo be bedun'

¹³ Na'ra uzulao rda be, pero cala be bedun', be ba'azi na' za' be zaca' surla. Pues quie lena' guqueyaquè' huazaque' tzioyaquè' mazera. Caora na' uza'ndo' ziondo', pero bedendo' ga'ala' ru'a isla Creta. ¹⁴ Pero zabeza'ndo' caora uzulao rda tu be bedun' fuerte gula ta za' zaca' noreste ga re' isla Creta. Bza'agan barco de modo que biuzaque' sa' barco lao nisa. ¹⁵ Quie lena' re'en ca re'ennan, bebi'lèndo' barco gan' ziondo' na', porque be bedun' na' psebi'ina len. ¹⁶ Na'ra bedendo' xcu'udzu tu isla dao' laona Clauda ga birda be bedun'. Pero zèdi gula gucan bapcuèndo' tu barco dao' ta za' lao nisa rala' barco že len. ¹⁷ Lëscan' bapquiundo' riata duže barco že na' tacuenda gacalen len biyeton lu'u nisa. Pero como rdzebiyaquè' idyin barco ga naca puro yožo, ga laona yožo sirte, na' rdzebiyaquè' hueto barco lu'u yožo na', quie lena' pquinuyaquè' la'ari' že ta rusa' barco. Bëjè' cana' tacuenda na' biidyin barco ga re' yožo na', den' bdyiga be len zion ga tula. ¹⁸ Na'ra beteyu dza tula nerda be bedun' fuerte gula. Quie lena' uzulaoyaquè' ru'unyaquè' yua' nu'a barco lu'u nisa. ¹⁹ Pues biži na', dza uyune nerdacazi be bedun' na', birbezan. Quie lena' uru'undo' bicala ta nu'a barco lu'u nisa tacuenda gaca barco dza' biyeton lu'u nisa. ²⁰ Zidza guca biblè'èndo' ni tu bélo dyian guibá. Pues ni obidza biblè'èndo' tantozi ure' beo ben yusiu'. Quie lena' guquendo' de que huaticazindo' lu'u nisa.

²¹ Como azio zidza binegaondo', caora na' uzuli Pablo unè' gudyinè' nètò': —Señores, como bigulele cabè' unia' dza na', bigu'unle yega'nro isla Creta, quie lena' raca tamala quiero niga aoniti yua' nu'a barco. ²² Pero na'a bidèbile, porque ba'ala'cazi huabiagui' barco, ra'o na' bigatiro. ²³ Pues naca' ben' quie Diuzi. Yugu dza rionla'adya' lèbè'. Na'ra nidze' use'ela' Diuzi tu

ángel quienè' detilalaonè' nè'èdi'. ²⁴ Na' unè' gudyinè' nè'èdi': "Bidzebo', Pablo, porque tanun quie Diuzi na' tzesèlo' lao rey César. Quie lena' bigati ni tu ben' za'lè luè' lu'u barco." Pues cana' una ángel rèbinè' nè'èdi'. ²⁵ Na' nia' le'e bidzebile, porque nacan seguro uzu Diuzi di'idza' quienè' con cabè' unanè' nè'èdi'. ²⁶ Pero decazide idyinro tu isla ga ilaro. —Pues cana' una Pablo rèbinè' lejè'.

²⁷ Pero cana'zi guca quie barco. Bdyiga be len hasta guca chida' dza bdyinndo' ga re' tu nisadao' laona Adria. Pues du gatzo yèla gucabè' ben' rapa barco de que baredyinndo' ru'a yu bidyi. ²⁸ Na'ra caora brixiaquè' yela' zitu' quie nisa, gucan treinta y seis metro. Pues itu chi' brixiaquè' tatula, gucan veintisiete metro. ²⁹ Na'ra como bdzebiyaquè' idyinjè' ga re' yaca yo yela cuiagui' barco, quie lena' ziojè' zbam barco pchizayaquè' tapa guíba zi'i pquiojè' riata zion lu'u nisa tacuenda cue' barco tuzi lugar. Na'ra du rdèbitzeguejè' ulezajè' tzeni'. ³⁰ Pero yaca ben' rapa barco gu'unyaquè' tzioyaquè' huežuno. Quie lena' uzulaoyaquè' rchizayaquè' barco dao' lao nisa, dechan' uzi'jè' yè' unajè':

—Nèto' ichizando' yaca guíba zi'i tacuenda cue' barco dyè'èdi birudyiga be len.

³¹ Bizi udxogué' Pablo capitán na' lente yaca los demás soldados con cabè' rue ben' rapa barco unè' rèbinè' lejè':

—Chi abžuno yaca ben' niga lu'u barco, bira saque' ilale. Huatile lu'u nisa ni.

³² Quie lena' uchugu yaca soldado riata ta nerio barco dao' bguinun lu'u nisa.

³³ Na'ra du bala unèyue Pablo lejè' gaojè' ledao' unè' rèbinè' leyaquè':

—Azio tu chida' binegaoro, canezi gusiro. ³⁴ Pues na' rnaban gaoro ledao' tacuenda yezi'ro fuerza tatula. Bidzebile, porque ganu le'e gati, ni tule bigacale zi'.

³⁵ Ude beyudyi una Pablo cana', bèxonè' tu yèta xtila bè'lènè' Diuzi di'idza' gudyinè' Diuzi diuxcalelo'. Na'ra bžuzunè'n uzulaohuè' raonè'n. ³⁶ Caora na' uzulao yugojè' raorèyaquè' užela'adyi'jè' aodaoyaquè' abelojè' dyè'èdi. ³⁷ Entre tu nèto' yu'u lu'u barco, nacando' doscientos setenta y seis ben' udao yèta xtila. ³⁸ Ude beyudyi udaojè' abelojè', na' uru'unjè' mazera trigo lu'u nisa ta yedza' barco.

Barco ga yu'uljè' Pablo udyiagui'n lu'u nisa

³⁹ Caora uyeni' na', blè'è ben' rapa barco de que ru'a yu bidyi bedyinndo', den' gabi bezaquejè' ga parte. Pero caora blè'èyaquè' re' tu ca lagun ga naca puro yožo, gu'unjè' udyigajè' barco na'. ⁴⁰ Caora na' uchugoyaquè' riata nario guíba zi'i tacuenda na' sa' barco tatula. Na'ra bega'n guíba zi'i lu'u nisa. Lèscan' uxèdyijè' du nario yaca yaga ta'a ta rusa'yaquè' barco. Lèscan' pquioyaquè' tu la'ari' že sibi guicho barco na' tacuenda udyiga be len idyinndo' ru'a yu bidyi ga naca puro yožo. ⁴¹ Pero bizi na' ude barco ga regu'udi' chopa benono na'. Lègan' na' bèto barco lu'u yožo re' lu'u nisa. Na' bega'n barco lagazi bèton lu'u yožo na'. Bira užaque' yerona. Como legazi bdyiga benono len, uzulao byožo zbam barco. ⁴² Caora na' gu'un yaca soldado gutijè' ben' preso tacuenda na' bisaque' užunoyaquè' xubayaquè' lao nisa. ⁴³ Pero bibè' capitán na' lato gutijè' ben' preso, porque bire'ennè' gutijè' Pablo. Pues quie lena' bènè' mandado con yaca ben' raca ržuba yao ta yerojè' lu'u barco idyinjè' ru'a yu bidyi. ⁴⁴ Lèscan' gu'unnè' yero nu ben' biraca žuba yao, pero re'ennè' xubajè' nu lao pedazo yaga quie barco

tacuenda idyinrējē' ru'a yu bidyi. Cana' użacando' bēndo' gan berondo' lu'u barco ulando' bedyinndo' ru'a yu bidyi.

28

Cabē' guca bdyin Pablo ga re' tu isla lao Malta

¹ Na'ra bē' ulando' bedyindo' ru'a isla, bedzelendo' yaca ben' nita' isla. Biži na' unayaquē' nēto' de que isla na' laona Malta. ² Caora na' beyēchi'la'adyi'jē' nēto', ulēchijē' tu gui' ze bējē' invitar cue'ndo' ru'a gui' tacuenda yedze'endo', porque binecuez nisa yo na' beyagando'. ³ Na'ra yexi' Pablo ledao' huaga bidyi ta udyianē'n lao gui'. Caora zēnē' rudyianē' huaga na', bero tu bēla snia lu'u huaga. Bzunoba' dan' rdzebiba' gatiba' lu'u gui'. Caora na' udi'idyi'ba' na'a Pablo udi'inraba'n bigu'umba' usamba' nē'ē. ⁴ Caora blē'ē ja ben' nita' na' cabē' guca quie Pablo, na'ra unayaquē' rēbiyaquē' laguedyiyaquē':

—Seguro na', ben' ni bētiē' benē', porque ba'ala'cazi bigutinē' lu'u nisa ulanē', re'encazi Diuzi gatinē'.

⁵ Pero psisi Pablo lēba' bguinoba' lu'u gui'. Gabi guca quienē'. ⁶ Pues yaca ben' nita' na' bega'nyaquē' rbezajē' tzu'u nē'ē gui' igu'unnē' layu gatinē'. Pero cati ude tiempo blē'ēyaquē' gabi guca quienē', na'ra ptza'jē' pensari quiejē' najē' naca Pablo tu diuzi.

⁷ Na'ra ga bdyinndo' nacan ga'ala' ga de layu quie tu ben' lao Publio. Naquē' ben' rnabē' quie ben' nita' isla Malta. Bēnē' invitar nēto' sulēndo' lēbē' lidyinē'. Lao tzōna dza uzundo' lidyinē' con ta bdzioguendo' bē'nē'n.

⁸ Na' guca dza na' de xuzi Publio lao belaga dan' raca zhue'nē'. Uyu'unē' tala, guquē' pquieco'. Biži uyo Pablo yeyubinē' lēbē' bda'nē' nē'ē lē'ēnē' beyacanē'. ⁹ Biži yaca ben' nita' isla na', ben' raca zhue', caora unezijē' cabē' guca quie xuzi Publio, na'ra bla'jē' gan' nita'ndo' beyue Pablo leyaquē'.

¹⁰ Quie lena' legazi bedaohuejē' uzulēndo' lejē'. Lēzi caora bdyin hora ta yeza'ndo', bidayaquē' dehua'ayaquē' con ta rdzioguendo'.

Ca guca bdyin Pablo ciudad Roma

¹¹ Bē' baode tzona biu', bedzelendo' tu barco ta uza' ciudad Alejandría. Bazio tzona biu' bega'nnan isla Malta tu ude biu' zaga. Guicho barco na' da' chopa ídolo. Tuna laona Cástor, na' ituna laona Pólux. Caora na' uyu'undo' lu'u barco na' beza'ndo' isla Malta ¹² bdyinndo' ciudad Siracusa ga bega'ndo' tzona dza. ¹³ Na' uyu'undo' lu'u barco tatula uza'ndo' na' bedendo' ru'a yu bidyi hasta bdyinndo' ciudad Regio. Beteyu dza tula, uzulao rda tu be bedun' ta za' zaca' sur. Quie lena' uza'ndo' ziondo', pero chopa dzazi guca bdyinndo' ciudad Puteoli. Na'ra ciudad Puteoli berondo' lu'u barco. ¹⁴ Lēyedyi na' bedilando' chopa tzona ben' nao xneza Jesús. Bējē' invitar nēto' ta yega'nlēndo' leyaquē' tu xman. Ude beyudyi na', uza'ndo' ni'ando' ziondo' ciudad Roma. ¹⁵ Na'ra ciudad Roma nita' ja bichiro ben' nao xneza Jesús. Caora beyaquē' baziondo' quiejē', bidayaquē' delezayaquē' nēto' tu neza. Balajē' bidajē' hasta ga laona Foro de Apio, ibalajē' bidajē' hasta ga laona Tres Tabernas. Catí blē'ē Pablo bazējē' rbezajē' idyinnē', lega bedaohuenē' gudyinē' Diuzi diuxcalelo'. ¹⁶ Na'ra caora bdyinndo' ciudad Roma, psedyin capitán yaca ben' preso lao xan' ben' rapa preso, pero bē'nē' Pablo lato ga sunē' aparte conlē tu soldado, ben' gapa lēbē'.

Pablo na' bdze'nē' di'idza' lao ben' Israel, ben' nita' ciudad Roma

¹⁷ Baguca tzona dza, guži Pablo yaca ben' rnabē' quie ben' Israel nita' ciudad Roma. Na'ra cati babedupajē' unē' gudyinē' lejē':

—Bicha', re'enda' inia' le'e bibi tamala bia' contra laguedyiro ben' Is-rael. Lëscan' cala psanla'adya' costumbre quie xuzixta'oro. Ba'ala'cazi bibi tamala bia', bëyaquë' në'ëdi' preso ciudad Jerusalén psedyinyaquë' në'ëdi' lao ben' rnaabë' quie ben' romano. ¹⁸ Na'ra ude beyudyi pquëpi yaca ben' rnaabë' në'ëdi', gu'unyaquë' yeroga' libre, porque gabi dula' xquia quia' de hueyaquë' mandado gatia'. ¹⁹ Pero como yaca ben' Israel bigu'unjë' yeroga' libre, unaba' gaca justicia quia' lao rey César. Pues cala re'enda' gaohua' yaca ben' yedyi quia' xquia, pero tuz ca re'enda', re'enda' gaca justicia. ²⁰ Caora na' baguza' le'e, porque re'enda' deyubile në'ëdi' ta hue'lia' le'e di'idza'. Pues nun quie rbeza' idyîn dza useban Diuzi yugu ben' huati, laga ca rbezale le'e len yaca los demás ben' Israel, lena' pquioyaquë' në'ëdi' con cadén. —Cana' una Pablo gudyinë' lejë'.

²¹ Na'ra unayaquë' rëbiyaquë' Pablo:

—Binela' guichi quie ben' nita' ciudad Jerusalén. Binenayaquë' nëto' quie asunto quio'. Lëscan' nu bichiro ben' Israel, ben' uza' na' bla' niga, cala nayaquë' naco' ben' mala. ²² Na'ra re'ennido' cuinzo' yëbo' nëto' con cabë' naca pensari quio', porque duže parte rnayaquë' contra pensari netza' quio'. —Cana' unayaquë' gudyijë' Pablo.

²³ Cana' guca bzujë' tu dza na' bdyin ja ben' zë žan yu'u gan' zu Pablo na'. Caora bdyin ja benë' na', uzulaonë' rguixogue'në' leyaquë' con cabë' naca Diuzi ben' rnaabë'ra lao yugulute. Cana' zila hasta zadzë' uduxogue'në' lejë' con cabë' rna di'idza' bzu Moisés len yaca los demás ben' profeta lë'ë guichi tacuenda inaojë' xneza Jesús. ²⁴ Biži na' ca di'idza' gudyi Pablo leyaquë', balajë' bzë'nagajë' gulejë', pero ibalajë' bigulecazijë' con cabë' unë' gudyinë' lëjë'. ²⁵ Na'ra como binaga'nyaquë' de acuerdo entre lejë', uzulaojë' redzatzayaquë'. Na'ra una Pablo gudyinë' leyaquë':

—Biži bigala'adyi'le di'idza' li unë Bichi Be quie Diuzi dza na'te caora use'elë' xuzixta'oro Isafas rëbinë' lëbë' cani:

²⁶ Uyo yeguëdyi ben' Israel con cabë' una Diuzi porque unë' de que:

Ba'ala'cazi ise'ela' nu ben' quixogue' leyaquë' con cabë' rna xti'idza', bihue quieyaquë'n.

Ba'ala'cazi ilë'ëyaquë' dyë'ëdi cabë' naca xneza', bitzu'uyaquë' pensari inaoy-aquë'n.

²⁷ Ben' zidi gula nacajë'.

Bire'enjë' yeyaquë' con cabë' rna xti'idza'.

Bire'enjë' inezijë' cabë' naca xneza'.

Bire'enjë' utza'jë' pensari quiejë' tzu'ujë' pensari quia' ta bira inao dula' xquia quieyaquë' leyaquë'.

Cana' una Bichi Be quie Diuzi dza na'te.

²⁸ Na'ra nernë Pablo rëbinë' lëjë':

—Ulezëcara nagale dyë'ëdi, porque ni rnia' le'e de que abdyin dza ise'ela' Diuzi ben' quixogue' con cabë' rna xti'idzë' de entre ben' binaca ben' Israel tacuenda ute uselanë' leyaquë' idyinyaquë' guibá ga zu Diuzi. Lejë' sí, re'encazijë' yeyaquë' con cabë' rna xti'idza' Diuzi. —Cana' una Pablo gudyinë' lejë'.

²⁹ Na'ra dan' unanë' cana', legazi uzulaoyaquë' ruejë' huenë de entre leyaquë' bedzatzajë' zeyojë'.

³⁰ Biži Pablo na' uzunë' ichopa iza ciudad Roma rguizonë' quie yu'u ga zunë' lao xa'nnan. Redaohuenë' nutezi ben' rio rayubi lëbë'. ³¹ Bë'yaquë' lato rguixogue'në' benë' naca Diuzi ben' rnaabë' lao yugolute. Lëscan' bë'yaquë' lato rguixogue'në' benë' con cabë' rna xti'idza' Señor quiero Jesucristo. Nunü bë' lëbë' zëdi.

Pues cana' užaca Pablo dza na'te. Amén.

DI'IDZA' BZU SAN PABLO APÓSTOL LĚ'Ě GUICHI, USE'ELA'NĚ'N LAO CIUDAD ROMA

Baose'ela' Pablo guichi ni lao ben' nao xneza Jesús, ben' nita' ciudad Roma

¹ NĚ'ĕdi', Pablo, naca' ben' zulao xa'nro Jesucristo. Ulio Diuzi bdĚ'nĚ' nĚ'ĕdi' apóstol quienĚ' ta tzetixogui'a yaca benĚ' di'idza' la'iya quienĚ'.

² Azio zĚ ĩza bĚ Diuzi ca unanĚ' huenĚ' con cabĚ' rna di'idza' la'iya quienĚ'. Quie lena' bĚnĚ' mandado bzu yaca ben' naca profeta quienĚ' xti'idzĚ' lĚ'Ě guichi. ³ LĚdi'idza' na' rguixogue'n quie xa'nro Jesucristo, ĩi' Diuzi. Na'ra con cabĚ' gologuĚ' guquĚ' be'mbyu, cana' naquĚ' ĩi' suba rey David. ⁴ Pero con cabĚ' gutiĚ' bebannĚ' tatula, lena' bzioĚ'e Bichi Be quie Diuzi ra'o de que naca Jesucristo ĩi' Diuzi, ben' de yela' rnabĚ' quie. ⁵ Nun quie Jesucristo bĚ Diuzi tu cule zĚ quiendo', use'elĚ' nĚto' tzetixogue'ndo' xti'idzĚ' cuenda gata' ben' nao xneza Jesús duze yedyi layu huejĚ' Jesucristo ben' zĚ. ⁶ LĚscan' le'e, ulio Diuzi le'e gacale ben' nao xneza Jesús.

⁷ Lena' use'ela' guichi ni lao le'e ben' nita' ciudad Roma nun quie nedyĚ'Ě Diuzi le'e, ulionĚ' le'e gacale ben' la'iya quienĚ'. Rulidza' XuziĚo Diuzi len xa'nro Jesucristo ta huela'iyajĚ' le'e, cuĚchijĚ' chizi lu'u guichi laxta'ole.

Gu'un Pablo tzioguĚ' ciudad Roma

⁸ TanĚro re'enda' inia' le'e de que lao Jesucristo rulidza' Diuzi yĚpa'nĚ' diuxcalelo' por lao le'e, como dan' yugulu ben' nita' lao yedyi layu arĚyaquĚ' ca tadya'a ruele, rue quiele quie Diuzi. ⁹ Du guicho du la'adya' rua' ca mandado rue Diuzi nĚ'ĕdi', rguixogui'a yaca benĚ' cabĚ' naca quie ĩi'inĚ'. Naca Diuzi testigo de que yugu dza reza'la'adya' le'e rulidza' Diuzi ta gacalĚnĚ' le'e.

¹⁰ Yugu dzacazi rulidza' Diuzi chi rapĚ' gusto ta guida' ideyuba' le'e. ¹¹ Cana' re'enda' idena'a le'e ta idesĚdira' le'e ta tzioĚ'e'le mazara ca naca pensari quie Diuzi cuenda huera quiele xti'idza' Diuzi. ¹² Cana' re'enda' cuenda uxela'adya' le'e, hue quiele xti'idza' Diuzi, lĚscan' cuenda uxela'adyi'le nĚ'ĕdi', hue quia' xti'idza' Diuzi ca naca quiero rzudyi'ilĚro Diuzi.

¹³ Bicha', re'enda' inezile lega raca' pensari guida' ideyuba' le'e pero birzaque'da'. Re'enda' guida' ta gacalia' le'e inaorale mazara xneza Diuzi cabĚ' bia' gacalia' yaca ben' tula, ben' nita' yedyi tula. ¹⁴ Lega de compromiso quia' quixogui'a yugulu benĚ' xti'idza' Diuzi, la'acazi ben' nita' lao ciudad zĚ, la'acazi ben' nita' lao yedyi dao', la'acazi ben' rioĚ'e'e, la'acazi ben' birioĚ'e'e.

¹⁵ Por tu parte quia', zucaza' dispuesto guida' laole ciudad Roma idetixogui'a le'e di'idza' la'iya quie Diuzi.

Napan fuerza valor xti'idza' Diuzi

¹⁶ Biredue'da' quixogui'a ja benĚ' di'idza' la'iya quie Diuzi, como dan' napan fuerza valor quienĚ' ta ute uselanĚ' nutezi ben' hue quie xti'idzĚ' gata' yela' neban quienĚ' tuzioli. Tabelaora na' te ĩla yaca ben' Israel, pero lĚscan' nacan belao te ĩla yaca ben' tula, ben' binaca ben' Israel. ¹⁷ Rguixogue' di'idza' la'iya quie Diuzi ra'o cabĚ' re'ennĚ' sudyi'ilĚro lĚbĚ' ta ĩlĚ'ĚnĚ' ra'o ben' laxta'o yĚri. Tuzi ta huero sudyi'ilĚro lĚbĚ', cana' ĩlĚ'ĚnĚ' ra'o ben' laxta'o yĚri. Lena' rguixogue'n lĚ'Ě guichi la'iya quie Diuzi cani: "Nu ben' ĩlĚ'Ě Diuzi ben' laxta'o yĚri, hue' Diuzi lĚbĚ' yela' neban tuzioli nun quie dan' rzudyi'ilĚnĚ' lĚbĚ'."

Napa yugulu benĚ' dula' xquia

¹⁸ Na' zu Diuzi guibá huené' castigo quie yugulu ben' mala, ben' rue ta biraxené'. Yela' ben' mala quiejé' biruejé' lato tz'u'ujé' pensari quie Diuzi ta inezijé' ta naca tali quie Diuzi. ¹⁹ Dyé'édi nezijé' zu Diuzi guibá, como dan' cuin Diuzi blu'ené' leyaqué' zuné' guibá rlé'ëyaqué' ta bzaloné' uléchiné' lao yedyi layu. ²⁰ Rulu'ecazin zu Diuzi guibá la'acazi bisaque' ilé'ërogué', porque huazaque' ilé'ëro ta uléchiné' lao yedyi layu. Desde dza bzalo Diuzi yedyi layu, bablu'en zucazi Diuzi guibá, de yela' rnabé' quiené' tuzioli. Quie lena' bisaque' ina yaca bené' binezijé' chi zu Diuzi guibá. ²¹ Ba'ala'cazi nezijé' zu Diuzi guibá, birapala'njé' lèbè', nica rèbjé' lèbè' diuxcalelo', pero yu'uayaqué' pensari mala, pensari bibizaca'n. Naca laxta'ojé' laxta'o yaladyi', rdayaqué' lao lato lao chula. ²² Ba'ala'cazi najé' nacajé' ben' rioñe'e, dechan' birioñe'ejé'. ²³ Lao laza rionla'adyi'jé' Diuzi, ben' zu tuzioli, rionla'adyi'jé' yaga ta pcha'a yaca bené', bëjë' forma quie bené' ta bizu tuzioli. Hasta rionla'adyi'jé' yaga pcha'a yaca bené', bëjë' forma quie nu bguini, nu bëla, nu bia zu tapa ni'e.

²⁴ Quie lena' apsanla'adyi' Diuzi lejé' ta ruejé' tamala ca raxejé'. Quie lena' ruelèjé' laguedyijé' ta naca stu' sla'na. ²⁵ Cana' raca quiejé', como dan' birue quieyaqué' xti'idza' Diuzi. Quie lena' apsanla'adyi' Diuzi lèjé' ta hue quieyaqué' ta binaca tali. Cala Diuzi rionla'adyi'jé'. Lao laza Diuzi, rionla'adyi'jé' ta bzalo Diuzi uléchiné' lao yedyi layu. Birionla'adyi'jé' tuzi Diuzi, ben' reya'ala' tzionla'adyi'jé' tuzioli. Amén.

²⁶ Quie lena' apsanla'adyi' Diuzi leyaqué' ta rueyaqué' ta naca stu' sla'na quiejé'. Hasta nigula quiejé' bira re'enjé' gasilèjé' be'mbyu quiejé'. Bare'enjé' gasilèjé' laguedyijé' nigulajé' ta hueljé' laguedyijé' nigulajé' ta naca stu' sla'na. ²⁷ Lèscan' ca raca quie yaca nigula quiejé', cana' racaré quie yaca be'mbyu. Bira re'enjé' gasilèjé' nigula quiejé'. Barza'la'adyi'jé' gasilèjé' laguedyijé' byujé' ta hueljé' laguedyijé' byujé' ta naca stu' sla'na. Tanun quie ruejé' cana', racajé' castigo rbiagui'neza cuerpo quiejé'.

²⁸ Como bire'enyacué' huebè'yaqué' Diuzi, lena' apsanla'adyi' Diuzi leyaqué' ta yu'uayaqué' pensari bayatza rueyaqué' ta naca stu' sla'na. ²⁹ Lega raxejé' huejé' tabayatza. Rutila rudzagajé' con nutezi nigula, rguijojé' ga huejé' tamala, rzala'adyi'jé' dumi, re'enjé' gaca tamala quie laguedyijé', racazè'jé', rutijé' bené', rguijojé' dila, rzi'jé' yé', rlé'èjé' laguedyijé' ben' mala, ru'eyacué' di'idza' bizu. ³⁰ Rnèjé' contra nutezi bené', barnaya'jé' Diuzi, birapajé' respeto yaca bené', ruejé' cuinjé' ben' ze, rguijojé' ruejé' tamala, biralejé' quie xuzi zna'jé'. ³¹ Birioñe'ejé' biruzujé' di'idza', binedyè'ejé' familia quiejé', birzi'zejé' quie bené', bireyèchi'la'adyi'jé' bené'. ³² Ba'ala'cazi nezijé' cabé' nachuguli Diuzi quiejé' huejé' castigo quiejé' tziojé' lao gui' gabila, nenaøjé' neruejé' pensari mala quiejé', redaohuejé' re'enjé' hue yaca ben' tula cabé' ruejé'.

2

Puro ta naca tali ina Diuzi

¹ Quie lena' bide bihuele ta huele defender cuinle lao Diuzi, nuti'tezi nacale, chi rnale rue laguedyile tamala, na' le'e tu lèbizi ziole ruele cabé' tamala rnale rue laguedyile. Conlè di'idza' rero lu'u ru'ale rulu'en lèscan' le'e nacale ben' mala. ² Neziro ta naca tali rhuguli Diuzi huené' castigo nu ben' rue tamala. ³ Le'e rnale rue laguedyile tamala, na' lèbizi ziole ruele tamala, ¿raquele bihue Diuzi le'e castigo? ⁴ ¿Quele aoquixile binezile ga huen dyin yela' ben' huen quie Diuzi? ¿Quele binezile rue Diuzi tahuen quiele

rbezè' yetza'le pensari quiele inaole xnezè'? ⁵ Pero ben' yaladyi' nacale, bire'enle yetza'le pensari quiele. Quie lena' huata' castigo huala quiele dza hue Diuzi juicio. Huachugulinè' ta tzu'u ni'a xnezi quiele. ⁶ Huaguizunè' quie quiero según ca bëro. ⁷ Hue'nè' yela' neban tuzioli yaca ben' biyeyati hue tahuen yugu dza, yaca ben' re'en gata' yela' bala'ana quiejè' lao Diuzi, yaca ben' rbeza gata' quieyaquè' ta biyeyudyi yedu. ⁸ Pero huadza' Diuzi huenè' castigo yaca ben' bire'en uzu di'idza' quienè', yaca ben' bire'en inao neza li quienè', yaca ben' re'en inao neza mala. ⁹ Yugulu ben' rue tamala yedzagalaoyaquè', huata' tazèdi gula quieyaquè'. Chi ben' Israel yedzagalaorayaquè', pero chi ben' tula, lèscan' yedzagalaoyaquè'. ¹⁰ Pero yugulu ben' rue tahuen, hue Diuzi leyaquè' ben' ze, cuèchinè' chizi laxta'oyaquè'. Chi ben' Israel hueranè' leyaquè' ben' zera, pero chi ben' tula, lèscan' huenè' leyaquè' ben' ze.

¹¹ Cana' hue Diuzi, porque birue Diuzi natza'la quie yaca benè', tuzcazi ca ruenè'. ¹² Pues yugulu ben' rue xquia, pero binezije' con cabè' rna lè'è guichi ley na' pca'n Diuzi lao na'a Moisés, huachuguli Diuzi lèjè', pero bihue Diuzi cuenda con cabè' rna lè'è guichi ley na'. Lèscan' yaca ben' rue xquia nezije' con cabè' rna lè'è guichi ley na', huachuguli Diuzi lèjè' huenè' cuenda con cabè' rna lè'è guichi ley na'. ¹³ Birlè'è Diuzi ben' laxta'o yèri ben' ruzè nagazi con cabè' rna lè'è guichi ley na', na' biruzunè' di'idza' con cabè' rnan. Rlè'è Diuzi ben' laxta'o yèri ben' ruzè naga con cabè' rna lè'è guichi ley na', na' ruzunè' di'idza' con cabè' nan. ¹⁴ Na'ra quie ja ben' binaca ben' Israel, cati ruzujè' di'idza' con cabè' rnan lao guichi ley na', la'acazi binezije' chi de guichi ley pca'n Diuzi lao na'a Moisés, lena' rulu'en naca pensari quiejè' conforme con cabè' rnan lè'è guichi ley na'. ¹⁵ Pues nun quie naojè' neza dya'a, lena' rulu'en yu'ujè' pensari con cabè' rnan lè'è guichi ley quie Diuzi. Ca naca pensari yu'ujè', lena' rulu'en quiejè' nezcazije' ca re'en Diuzi huejè'. Cuincazi pensari quiejè' yu'ujè' rchugulina quiejè' chi ruejè' tahuen, chi ruejè' tamala. ¹⁶ Dza hue Diuzi juicio huachugulinè' con cabè' bë yaca ben' raque nagachi'zi bëjè' bin' bëjè'. Lao na'a Diuzi huachuguli Jesucristo yaca benè' conforme con cabè' rna di'idza' la'iya quienè'. Lèdi'idza' na' rguixogul'a yaca benè'.

Ni rnan quie ben' Israel len guichi ley pca'n Diuzi lao na'a Moisés

¹⁷ Pero le'e rnale nacale ben' Israel. Raquele huezi' Diuzi le'e nun quie naole guichi ley pca'n Diuzi lao na'a Moisés. Ruele dzalo inale nacale ben' quie Diuzi. ¹⁸ Nezile ca re'en Diuzi hue yaca benè'. Lèscan' rsèdile con cabè' rna lè'è guichi ley quie Diuzi ta inezile bi huele huele tadya'a. ¹⁹ Raquele rioñe'ele, bidzebile uzioñe'ele ben' birioñe'e. Raquele dyin quiele uzioñe'ele ben' rda lao lato lao chula. ²⁰ Raquele inezile usèdile yaca ben' birioñe'e. Raquele inezile ulu'ele yaca ben' binenezi con cabè' rna lè'è guichi ley pca'n Diuzi lao na'a Moisés ga rguixogue'n quie yela' rioñe'e len yela' li quie Diuzi. ²¹ Chi le'e rusèdile ben' tula, ¿bixquien' birusèdile cuinle? Chi le'e yèbile benè' bireya'ala' cuanle quie benè', ¿bixquien' rbanle quie benè'? ²² Chi le'e yèbile benè' bireya'ala' utilale nigula tula, ¿bixquien' rutilale nigula tula? Chi le'e ratzale ilè'èle yaca ídolo, ¿bixquien' ru'ule lu'u idao' ga rdyia yaca ídolo rbanle ta zaca' ta yu'u dumi quieyacan? ²³ Ruele dzalo inale tadya'a naca guichi ley pca'n Diuzi lao na'a Moisés, pero rutitule Diuzi biruzule di'idza' cabè' di'idza' rnèn lè'è guichi ley na'. ²⁴ Quie lena' rna lè'è guichi ley na' cani: "Yaca ben' binaca ben' Israel, rnèbizoyaquè' quie Diuzi, pero dula' quiele rnajè' cana'."

²⁵ Talicazi de ga huen dyin uzule tu xëdyidao' cuinle ca mandado bē Diuzi dza na', pero solamente chi hue quiele quie guichi ley pca'n Diuzi lao na'a Moisés. Porque chi bihue quiele quie guichi ley na', na' naca quiele ca quie ben' bizu xëdyidao' cuine. ²⁶ Na' chi ruzu ben' bizu xëdyidao' cuine di'idza' quie guichi ley pca'n Diuzi lao na'a Moisés, na' hualë'ë Diuzi lëjè' ca quie ben' zu xëdyidao' cuine. ²⁷ Pues yaca ben' bizu xëdyidao' cuine, pero ruzuyaquë' di'idza' con cabè' rna lë'ë guichi ley pca'n Diuzi lao na'a Moisés, lëjè' huachugulijè' quiele le'e, ben' biruzu di'idza' con cabè' rnan, la'acazi napale le'e guichi quie ley, la'acazi zu xëdyidao' cuinle. ²⁸ Binaca dugalo ben' Israel yaca ben' bëruezi con cabè' rna Diuzi. Lëscan' binaca dugalo ben' Israel yaca ben' zu xëdyidao' cuine, pero birue quienë' xti'idza' Diuzi. ²⁹ Na' naca dugalo ben' Israel ben' rue quie du guicho du la'adyi' ca na Diuzi. Lëscan' cati hue quiero du guicho du la'adyi'ro con cabè' rna Diuzi, lena' rulu'en dugalo nacaro ben' zu xëdyidao' cuinro. Nu ben' rue quie con cabè' rna Diuzi, rlë'ë Diuzi lëbè' ben' laxta'o yëri.

3

¹ ¿Ca bizi nacara tahuen quie ben' Israel ca ben' binaca ben' Israel? ¿Gaži huen dyin chi zu ben' Israel tu xëdyidao' cuinjè'? ² Taže nacara huen quiejè', tazè rson de nacara tahuen quiejè'. Pues pca'n Diuzi di'idza' quienë' lao na'ayaquë'. ³ Tali na' bigule bala ja ben' Israel con cabè' gu'un Diuzi huejè' dza na', pero quie lena', ¿bi pensari huero? ¿Huero pensari lëscan' bihue Diuzi cabè' unanë' huenë'? ⁴ ¿Bireya'ala' huero pensari cana'! Seguro na' hue Diuzi cabè' unanë' huenë' conforme cabè' naca tali, la'acazi chi ben' huizi' yè' yugulu ben' nita' lao yedyi layu. Lena' rguixogue'n lë'ë guichi la'iya quie Diuzi cani:

Tanun quie di'idza' rero lu'u ru'a Diuzi, banezi ja benë' naca Diuzi ben' rue tali.

Cati ilë'ëyaquë' ca rue Diuzi, na' inajè': "Diuzi naquë' ben' laxta'o yëri."

⁵ Pero chi nacan tali de que por nun quie yela' ben' mala quiero, lena' rulu'en naca Diuzi ben' huen, ¿ca bi pensari reya'ala' huero? ¿Huero pensari naca Diuzi ben' mala chi huenë' castigo nu ben' mala? (Pensari quie benë' rnia', cala pensari quie Diuzi.) ⁶ Bireya'ala' huero pensari naca Diuzi ben' mala. Chi naca Diuzi ben' mala, bide derecho quienë' ichugulinë' ben' nita' lao yedyi layu, inanë' nu ben' bē tahuen, nu ben' bē tamala.

⁷ Lëscan' chi nacan tali de que por nun quie yela' huizi' yè' quiero, lena' rulu'en naca xti'idza' Diuzi di'idza' li, ¿bixquien' hue Diuzi castigo nu ben' huizi' yè'? ⁸ Chi tali nacan cana', ¿cala tahuen na' huero tamala tacuenda gata' tadya'a? Cana' na bala ja benë', rnajè' cana' inando' rguixogue'ndo' benë'. Pero pensari mala yu'ujè', como dan' cala cana' inando' rguixogue'ndo' benë'. Dula' quiezijè' hue Diuzi lëjè' castigo.

Napa yugulu benë' dula' xquia

⁹ ¿Ca bi pensari reya'ala' huero? ¿Huero pensari naca ben' Israel ben' dya'ara ca ben' tula, ben' binaca ben' Israel? ¿Bisague'! Bireya'ala' huero pensari cana', como dan' napa yugulu benë' dula' xquia, la'acazi ben' Israel, la'acazi ben' binaca ben' Israel. Yugulujè' rnao dula' xquia quiejè' lëjè'.

¹⁰ Cana' rguixogue'n lë'ë guichi la'iya quie Diuzi cani:

Ganu ben' laxta'o yëri zu, ni tuyaquë'.

¹¹ Bizu ben' rioñe'e.

Bizu ben' nuebè' Diuzi.

¹² Yuguluyaquë' rdayaquë' lao lato lao chula.

Rnaoyaquë' neza mala ga cuiagui'yaquë'.
Bizu ben' rue tahuen, ni tuyaquë'.

¹³ Ca tu yerobá neyalon ga rla' zigo, cana' naca di'idza' rero lu'u ru'ayaquë'.
Ta rzi'jé' yé' ru'elëjé' benë' di'idza'.

Ca veneno quie bêla naca di'idza' rero lu'u ru'ayaquë'.

¹⁴ Rudze/de'yaquë' laguediyaquë', rnëjé' di'idza' zi'.

¹⁵ Tariara rdayaquë' rbe'nidiyaquë' benë' ta gutiyaquë' leyaquë'.

¹⁶ Con ga zioyaquë' rudyiagui'yaquë' benë', ruca'nyëchi'yaquë' laguediyaquë'.

¹⁷ Bineziyaquë' tzu'ulëyaquë' laguediyaquë' dyë'ëdi.

¹⁸ Ni siquiera ruejé' pensari chi hue Diuzi lëjé' castigo.

¹⁹ Cana' rnën lë'ë guichi la'yi quie Diuzi. Na'ra na'o neziro con cabë' rna lë'ë guichi ley pca'n Diuzi lao na'a Moisés dza na'te. Neziro rnabë'n lao ja ben' nao len cuenda biibin yaca benë' bi yequëbiyaquë' lao Diuzi dza gaca juicio, dza rue yugulu benë' cuenda lao Diuzi. ²⁰ Pero quele por nun quie dan' rue quiero con cabë' rna lë'ë guichi ley pca'n Diuzi lao Moisés ilë'ë Diuzi ra'o ben' laxta'o yëri. Conforme con cabë' rna lë'ë guichi ley na' neziro de dula' xquia quiero.

Ilë'ë Diuzi ra'o ben' laxta'o yëri tanun quie dan' rzudyi'ilëro Cristo

²¹ Pero na'a barioñe'ero cabë' nacan ilë'ë Diuzi ra'o ben' laxta'o yëri. Cala por nun quie chi hue quiero con cabë' rna lë'ë guichi ley pca'nnë' lao na'a Moisés ilë'ënë' ra'o ben' laxta'o yëri. Lena' rguixogue'n lë'ë guichi ley na' lente ja guichi bë ja ben' udixogue' di'idza' quie Diuzi dza na'te. ²² Tanun quie dan' rzudyi'ilëro Jesucristo, cana' ilë'ë Diuzi ra'o ben' laxta'o yëri. Ilë'ë Diuzi ben' laxta'o yëri yugulu ben' rzudyi'ilë lëbë'. Tuz ca ilë'ënë' ben' rzudyi'ilë Jesucristo, ilë'ënë' ra'o ben' laxta'o yëri, la'acazi ben' Israel, la'acazi ben' binaca ben' Israel. ²³ Yuguluro de dula' xquia quiero. Yuguluro biuzuero huero yugulu ca re'en Diuzi huero. ²⁴ Pero naca Diuzi ben' huen ilë'ënë' ra'o ben' laxta'o yëri. Bibiquizuroguë' ilë'ënë' ra'o ben' laxta'o yëri como dan' Cristo Jesús gutinë' udizuguë' quie dula' xquia quiero, cana' ru'en lato ilë'ë Diuzi ra'o ben' laxta'o yëri. ²⁵ Use'ela' Diuzi Cristo lao yedyi layu ta gutië' lë'ë yaga cruzo ta gata' yela' huenitilao quiero lao Diuzi. Tanun quie lena' huezi'ze Diuzi quie dula' xquia quie nu ben' sudyi'ilë Cristo. Cana' bë Diuzi lao na'a Cristo ta tzioñe'ero naca Diuzi ben' rue ta yu'u ni'a xnezi. Pues talicazi cabë' bë Diuzi, ulezë' bibënë' castigo quie yaca ben' bë xquia tu bineguida Cristo. ²⁶ Lëscan' bë Diuzi cana' ta tzioñe'ero biusan Diuzi huenë' ta yu'u ni'a xnezi dza quiero, dza rdaro lao yedyi layu. Pues ta yu'u ni'a xnezi neruenë', rlë'ënë' yaca ben' rzudyi'ilë Jesús ben' laxta'o yëri.

²⁷ Bireya'ala' huero cuinro ben' ze tanun quie dan' rlë'ë Diuzi ra'o ben' laxta'o yëri. ¿Bixquien' bireya'ala' huero cuinro ben' ze? Bireya'ala' como dan' cule quie Diuzi na' rlë'ënë' ra'o ben' laxta'o yëri, quele yela' ben' huen quiero. Rlë'ë Diuzi ra'o ben' laxta'o yëri por nun quie rzudyi'ilëro Cristo, cala por nun quie chi ruero ca mandado rue lao ley quienë' pca'nnë' lao na'a Moisés. ²⁸ Quie lena' rioñe'ero rlë'ë Diuzi ra'o ben' laxta'o yëri chi rzudyi'ilëro Cristo, cala por nun quie chi bëro, chi bibëro ca mandado rue lao ley quienë'.

²⁹ ¿Bizi ca inale? ¿Inale tu cue'zi yaca ben' Israel rnabë' Diuzi? ¿Binezile rnabë'rë Diuzi lao yaca ben' binaca ben' Israel? Claro na' rnabë'cazi Diuzi lao yugulu benë'. ³⁰ Cala zë diuzi zu, tuzi Diuzi zu. Tanun quie chi rzudyi'ilëro Cristo ilë'ë Diuzi ra'o ben' laxta'o yëri, la'acazi nacaro ben' Israel, la'acazi binacaro ben' Israel. ³¹ Na'ra ¿ca bi pensari huero? ¿Huero pensari bibi zaca' ley na', como dan' rzudyi'ilëro Cristo na'a? Bireya'ala' huero pensari cana',

dechan' reya'ala' huero pensari decazi ga huen dyin ley na' ta pca'n Diuzi lao na'a Moisés.

4

Ni nan cabë' di'idza' bega'nlë Diuzi Abraham

¹ ¿Ca bi pensari reya'ala' huero quie xuzixta'oro Abraham? ² Chi tanun quie yela' ben' huen quienë', blë'ë Diuzi lëbë' ben' laxta'o yëri, na'ra napa Abraham derecho huenë' cuinnë' ben' ze lao Diuzi. ³ ¿Ca bi'zi rnan lë'ë guichi la'ia quie Diuzi? Pues rnan cani: "Bzudyi'ilë Abraham Diuzi. Con lëzin blë'ë Diuzi lëbë' ben' laxta'o yëri." ⁴ Chi huero tu dyin, binacan cule quie xa'nro quizuguë' ra'o. Pues ta reya'ala' quizuguë' ra'o. ⁵ Pero chi rzudyi'ilëro Cristo, chi por lëzin hualë'ë Diuzi ra'o ben' laxta'o yëri, lena' nacan cule bë Diuzi quiero, cala ta reya'ala' huenë' quiero. ⁶ Cana' una rey David dza na'te. Ünë' cabë' redaohue benë' rlë'ë Diuzi lëbë' ben' laxta'o yëri tanun quie rzudyi'ilënë' Diuzi. Redaohue ben' babeguba Diuzi dula' xquia quie, ben' bihue Diuzi cuenda cabë' tamala bënë'. ⁷ Lena' rguixogue'n lë'ë guichi la'ia quie Diuzi cani:

Redaohue yaca benë' bezi'ze Diuzi dula' xquia quie.

Redaohuejë' chi bihue Diuzi lëjë' castigo quie tamala quiejë'. ⁸ Redaohue nu ben' bihue Diuzi cuenda quie dula' xquia quie, ben' rzudyi'ilë Diuzi.

Cana' rnën lë'ë guichi la'ia quie Diuzi. ⁹ Na'ra rnaba' le'e: ¿Ca bi pensari ruele? ¿Ruele pensari huezi'ze Diuzi dula' xquia quie tu cue'zi yaca ben' Israel, ben' zu xëdyidao' cuine? ¿Binezile huezi'zerë Diuzi dula' xquia quie yaca ben' tula, yaca ben' bizu xëdyidao' cuine: Neziro dyë'ëdi blë'ë Diuzi Abraham ben' laxta'o yëri tanun quie dan' bzudyi'ilënë' Diuzi. ¹⁰ ¿Bata blë'ë Diuzi Abraham ben' laxta'o yëri? ¿Blë'ënë' lëbë' ben' laxta'o yëri tu binesu xëdyidao' cuine, o cati babzu xëdyidao' cuine? Pues tu binesu xëdyidao' cuine blë'ë Diuzi lëbë' ben' laxta'o yëri. ¹¹ Pero tanëro bzudyi'ilë Abraham Diuzi, na'tera blë'ë Diuzi lëbë' ben' laxta'o yëri. Beyudyi blë'ë Diuzi lëbë' ben' laxta'o yëri, na'ra bzujë' tu xëdyidao' cuinnë' como seña de que rlë'ë Diuzi lëbë' ben' laxta'o yëri tanun quie dan' rzudyi'ilënë' Diuzi. Quie lena' naca Abraham xuzixta'o yugulu ben' laxta'o yëri, ben' rzudyi'ilë Diuzi, ben' bizu xëdyidao' cuine. ¹² Lëscan' quie lena' nacarë Abraham xuzixta'o yaca ben' zu xëdyidao' cuine, ben' rzudyi'ilë Diuzi cabë' bzudyi'ilë Abraham Diuzi dza na'te caora binesu xëdyidao' cuinnë'.

Tanun quie rzudyi'ilëro Diuzi, cana' uzunë' di'idza' ca unë' huenë' quiero gacalënë' ra'o

¹³ Bega'nlë Diuzi Abraham len zi'isubanë' di'idza' ta yega'n quiejë' duze yedyi layu dza zaza'ra. Pero bega'nlë Diuzi Abraham di'idza' tanun quie bzudyi'ilënë' Diuzi. Lena' blë'ë Diuzi Abraham ben' laxta'o yëri, cala tanun quie guichi ley pca'n Diuzi lao na'a Moisés. ¹⁴ Chi nacan tali yega'n duze yedyi layu para tu cue'zi ben' rue quie ca mandado rue lao guichi ley pca'n Diuzi lao na'a Moisés, na'ra bisaque' inaro zaca' sudyi'ilëro Diuzi, bisaque' inaro zaca' di'idza' cabë' di'idza' began'nlë Diuzi Abraham. ¹⁵ Pero binacan tali cana', como dan' nusa' ley na' castigo quie yaca ben' birue quieyaquë' con cabë' rnan. Pero bigata' falta quie nu ben' binezi con cabë' rnan, na'ra birue quieyaquë'n.

¹⁶ Tanun quie bzudyi'ilë Abraham Diuzi, cana' udapa Diuzi compromiso uca'nnë' duze yedyi layu lao na'a Abraham. Cala ta quizu Abraham Diuzi uca'n Diuzi duze yedyi layu lao na'anë'. Pero bë Diuzi cana' tacuenda xela'adyi' yugulu zi'isuba Abraham de que gacacazi con cabë' una Diuzi

huenë'. Cani nacan. Cala tuzi ben' nao ca mandado rue lao guichi ley udapa Diuzi compromiso, pero lëscan' udapa Diuzi compromiso con nu ben' rzudyi'ilë Diuzi cabë' bzudyi'ilë Abraham Diuzi. Cana' pca'n Diuzi naca Abraham xuzi yugulu ben' rzudyi'ilë Diuzi. ¹⁷ Bagulecazi Abraham con cabë' rguixogue'n lë'ë guichi la'iya quie Diuzi ga una Diuzi cani: "Bapca'na' luë' xuzi yugulu ben' za' yedyi zitu', yugulu ben' rzudyi'ilë në'ëdi'." Cana' rnan lë'ë guichi. Naca Diuzi ben' useban ben' huati. Naca Diuzi ben' bzalo yugulu ta bide dza na'te.

¹⁸ La'acazi guque Abraham bigaca quienë' cabë' una Diuzi huenë' quienë', bipsannë' uzudyi'ilënë' Diuzi, ulezë' hue Diuzi quienë' cabë' unë' huenë' quienë'. Cana' guca quie Abraham naquë' "xuzi yugulu ben' za' yedyi zitu', yugulu ben' rzudyi'ilë Diuzi", conforme con ca gudyi Diuzi lëbë' dza na'te: "Gaca tazë z'isubo'." ¹⁹ La'acazi napa Abraham cadu tu gayuhua iza, bipsannë' rbezë' gaca quië' cabë' compromiso udapalë Diuzi lëbë'. Bipsannë' rbezë' la'acazi banaquë' ben' gula, la'acazi banacarë z'gulë' ben' gula. Baode tiempo quie nigula quienë' bibi'anë' xcuidi'. Baidyin hora gatiyaquë'. ²⁰ Bibënë' pensari mala, bipsannë' rbezë' gaca quienë' cabë' compromiso udapalë Diuzi lëbë'. Cana' bënë' uzudyi'ilënë' Diuzi udapë' lëbë' bala'ana. ²¹ Dyë'ëdi unezi Abraham napa Diuzi fuerza valor ta uzuë' di'idza' cabë' compromiso rapalënë' benë'. ²² Quie lena' blë'ë Diuzi Abraham ben' laxta'o yëri.

²³ Na'ra dza na'te bë Diuzi mandado bzu yaca benë' di'idza' quienë' lë'ë guichi ta rguixogue'n cabë' guca quie Abraham, bzudyi'ilënë' Diuzi blë'ë Diuzi lëbë' ben' laxta'o yëri. Pero cala para tuzi lëbë' bë Diuzi mandado bzujë' di'idza' quienë' lë'ë guichi. ²⁴ Lëscan' bë Diuzi mandado bzujë' di'idza' quienë' lë'ë guichi ta ineziro ra'o hualë'ë Diuzi ra'o ben' laxta'o yëri, chi rzudyi'ilëro lëbë', ben' pseban Jesús, ben' naca za'nro. ²⁵ Tanun quie guti Jesús lë'ë yaga cruzo bebannë', ru'en lato yezi'ze Diuzi dula' xquia quiero. Lëscan' tanun quie bebannë' ru'en lato ilë'ë Diuzi ra'o ben' laxta'o yëri.

5

Tahuen naca quiero ilë'ë Diuzi ra'o ben' laxta'o yëri

¹ Na'ra como dan' rlë'ë Diuzi ra'o ben' laxta'o yëri por nun quie rzudyi'ilëro xa'nro Jesucristo, quie lena' rbe' chizi laxta'oro lao Diuzi. ² Naca Cristo ben' sëlë ra'o lao Diuzi por nun quie dan' rzudyi'ilëro lëbë'. Quie lena' huela'iya Diuzi ra'o inaoro xnezë' du guicho du la'adyi'ro. Quie lena' redaohuero rbezaro yeyoro ga zu Diuzi guibá. ³ Lëscana' redaohuero cati raca zëdi quiero yedzagalaoro, porque neziro chi yedzagalaoro, cana' huacalë Diuzi ra'o ta suero inaoro xnezë' dyë'ëdi. ⁴ Lëscan' chi suero inaoro xnezë' dyë'ëdi, cana' yedaohue Diuzi ca ruero. Lëscan' chi yedaohue Diuzi ca ruero, cana' rbezaro dyë'ëdi yeyoro guibá ga zuë'. ⁵ Zuro contento biyehuëdiro rbezaro yeyoro guibá ga zu Diuzi como dan' use'ela' Diuzi Bichi Be quienë', bagucalënë' ra'o ta idyë'ëro Diuzi, bayu'uro yela' nedyë'ë quie Diuzi lu'u guicho laxta'oro.

⁶ Caora cati bibi de huero ta ute uselaro cuinro lao Diuzi, na'ra bida Cristo gutinë' lë'ë yaga cruzo. Ca bdyin hora gu'un Diuzi gaca, caora na' guti Cristo ta gažo dula' xquia quie ja ben' binuebë' Diuzi. ⁷ Nunu re'en gati lao laza ben' tula. Derepente ga zu benë' gue'ennë' gatië' lao laza ben' tula, ben' huen gula. ⁸ Pero cablë'ëro cabë' bë Diuzi nedyë'ënë' ra'o use'elë' zi'inë' gutië' lë'ë yaga cruzo cuenda gažo dula' xquia quiero caora cati nenacaro ben' de dula' xquia quie. ⁹ Na'ra barlë'ë Diuzi ra'o ben' laxta'o yëri tanun quie dan' guti Cristo lë'ë yaga cruzo. Lëscan' por nun quie lëbë' bihue Diuzi ra'o castigo dza

gaca juicio lao yedyi layu. ¹⁰ Caora cati nenacaro enemigo quie Diuzi, na'ra ulêchitza'o cuin Diuzi ra'o len lëbë' cuenda tzu'ulêronë' tuže. Cana' bë Diuzi tanun quie dan' guti ži'inë' lë'ë yaga cruzo. Quie lena' seguro nacan yezi' Diuzi ra'o por nun quie dan' guti beban ži'inë', banacalëronë' tuže. ¹¹ Cala tuzi ulêchitza'o Diuzi ra'o, pero lëscan' rna' ruhuianë' ra'o por nun quie ži'inë' Jesucristo. Pues lao na'a Jesucristo nacalëro Diuzi tuže rbe' chizi laxta'oro.

Ni rguixogue'n cabë'bë Adán len cabë' bë Cristo

¹² Tanun quie tuzi be'mbyu guta' dula' xquia lao yedyi layu. Na'ra como dan' guta' dula' xquia lao yedyi layu, cana' guta'rë yela' guti quie yugulu benë', como dan' yugulu benë' napajë' dula' xquia. ¹³ Desde dza na'te, dza bineca'n Diuzi ley quienë' lao na'a Moisés, baquezi napa yaca ben' nita' lao yedyi layu dula' xquia. Pero uleza Diuzi bibë Diuzi leyaquë' castigo dza na'te como dan' binuca'nnë' ley quienë'. ¹⁴ Guticazi yaca ben' unita' dza uda Adán lao yedyi layu hasta ben' unita' dza uda Moisés lao yedyi layu. Caora bdyin dza quieyaquë' gutiyaquë' como dan' napajë' dula' xquia. Guticaziyaquë' la' acazi netza' tamala bëyaquë' cala ca tamala bë Adán. Bibzu Adán di'idza' ca mandado bë Diuzi lëbë'.

¹⁵ Netza' ca naca ta udilo' Adán. Netza' ca naca tadya'a rue Diuzi quiero ra'o. Tanun quie ta udilo' tuzi be'mbyu Adán guta' yela' guti quie ja ben' nita' lao yedyi layu. Pero netza' cabë' bë Diuzi, bënë' quiero tu cule že. Bënë' tahuen gula quie yaca ben' nita' lao yedyi layu. Gun Diuzi ra'o yela' neban tuzioli por nun quie yela' bzu di'idza' quie tuzi be'mbyu Jesucristo. Biuquizunë' ra'o quie yela' naban gunnë' ra'o tuzioli. ¹⁶ Netza' ta udilo' Adán, binacan cabë' tadya'a rue Diuzi quiero gunnë' ra'o yela' neban tuzioli. Tanun quie ta udilo' Adán, biuzaque' ilë'ë Diuzi ra'o ben' laxta'o yëri. Pero por nun quie tadya'a bë Diuzi quiero ra'o, rlë'ënë' ra'o ben' laxta'o yëri, bezi'ženë' taže quiero ca naca dula' xquia quiero. ¹⁷ Guta' yela' guti quie yaca benë' tanun quie ta udilo' tuzi be'mbyu. Pero yaca ben' rue quie xti'idza' Diuzi, hualë'ë Diuzi leyaquë' ben' laxta'o yëri, huela'iya Diuzi leyaquë', huata' yela' neban cubi quieyaquë' por nun quie yela' bzu di'idza' quie tuzi be'mbyu Jesucristo.

¹⁸ Tanun quie ta udilo' Adán guta' tu castigo lao yuguluro. Pero tanun quie yela' bzu di'idza' quie Jesucristo, hualë'ë Diuzi yugulu ben' rue quie xti'idzë' ben' laxta'o yëri, bigata' castigo quieyaquë'. ¹⁹ Cani nacan. Tanun quie ta udilo' tuzi be'mbyu, blë'ë Diuzi yuguluro ben' napa dula' xquia. Pero tanun quie yela' bzu di'idza' quie tuzi be'mbyu, rlë'ë Diuzi ra'o ben' binapa dula' xquia.

²⁰ Udixu Diuzi ley quienë' lao yedyi layu ta ulu'en lega napajë' xquia. Pero tu yu'uyaquë' rueyaquë' xquia že, lëscan' beyëchi'la'adyi' Diuzi leyaquë' taže.

²¹ Cani nacan. Tanun quie dula' xquia napa yaca benë', quie lena' guta' yela' guti quiejë'. Pero lëscan' tanun quie yela' ben' huen quie Diuzi, quie lena' guta' ilë'ënë' ra'o ben' laxta'o yëri, hue'në' ra'o yela' neban tuzioli por nun quie Señor quiero Jesucristo.

6

Bira gacaro pensari huero tamala, reya'ala' gacaro pensari gaparo Cristo bala'ana

¹ ¿Ca bi pensari reya'ala' huero? ² ¿Huero pensari huero tamala cuenda ulu'ë Diuzi ra'o ca naca yela' ben' huen quienë' ina'në' ra'o nacala gaca quiero? ¿Bireya'ala' huero pensari cana'! Naca quiero ca quie ben' baguti, bira rnabë' dula' xquia quiero ra'o. ¿Cómo pues huero seguir huero xquia?

³ ¿Binezile ca guca quiero dza gucaro bautismo? ¿Binezile gucaro bautismo ta ulu'en banacalëro Cristo Jesús tuže, lëscan' ta ulu'en banaca quiero ca quie ben' guti lë'ë yaga cruzo? ⁴ Tanun quie gucaro bautismo naca quiero ca quie ben' baguti, ben' bade lu'u yerobá conlë Cristo. Pero lëscan' naca quiero ca quie ben' babeban, ben' bade yela' neban cubi quie. Naca quiero ca quie ben' beban cabë' beban Cristo, bebannë' lao na'a Diuzi, ben' de yela' huaca quie.

⁵ Porque chi tanun quie yela' guti quie Cristo naca quiero ca quie ben' huati, nã' nacalëro lëbë' tuže, lëscan' tanun quie yela' beban quie Cristo naca quiero ca quie ben' beban, na' lëscan' quie lena' nacalëronë' tuže. ⁶ Caora guti Cristo lë'ë yaga cruzo, caora na' guca quiero ca quie gutirë pensari mala quiero cuenda bira huero ta rnazin quiero, bira inabë' pensari mala ra'o, bira ru'en lato huero mandado ca mandado rue pensari mala quiero ra'o. ⁷ Porque bira saque' inao benë' pensari mala quieyaquë' cati bagutiyaquë'. ⁸ Chi tali apsanro tamala quiero, lena' rulu'en anaca quiero ca quie ben' bagutilë Cristo. Cana' xela'adyi'ro huazulëro lëbë' tuzioli. ⁹ Porque neziro caora beyudyi guti beban Cristo, na'ra tuzioli bira gatinë'. Bira saque' hue yela' guti lëbë' gan tatula. ¹⁰ Caora guti Cristo lë'ë yaga cruzo, para tuzioli udižuguë' quie dula' xquia quiero. Na'ra nabannë' zuë' guibá naquë' ben' bala'ana že lao Diuzi. ¹¹ Na'ra quie le'e, bira gacale pensari huele tamala, reya'ala' gacale pensari gapale Diuzi bala'ana como dan' nacalële Cristo Jesús, ben' naca Señor quiero, tuže.

¹² Quie lena' bihue'le lato inabë' pensari mala quiele le'e huele ca tamala rnan guicho laxta'ole huele. ¹³ Bihue'le lato huelële cuerpo quiele tamala. Ta reya'ala' huele, huelële Diuzi tuže como dan' banaca quiele ca quie ben' baguti, ben' beban lao na'anë'. Ta reya'ala' huele, hue'le lato huelële cuerpo quiele tadya'a. ¹⁴ Porque bira saque' inabë' pensari mala quiele le'e. Bira nadele cuenda lao na'a ley pca'n Diuzi lao na'a Moisés, banadele cuenda lao na'a yela' reyëchi'la'adyi' quie Diuzi.

Ni rguixogue'n tu di'idza' cabë' naca quie ben' zu lao xa'ne

¹⁵ ¿Na'ra bizi huero? ¿Huero xquia como dan' bira nadero cuenda lao na'a ley pca'n Diuzi lao na'a Moisés, dechan' nadero cuenda lao na'a yela' reyëchi'la'adyi' quie Diuzi? ¿Bisake' huero can'! ¹⁶ Pero dyë'ëdi nezile cabë' naca quie nu ben' zu lao xa'ne. Re'en ca re'enna uzujë' di'idza' ca mandado rue xa'ne. Cana' naca quiero. Chi uzuro di'idza' cabë' mandado rue pensari mala quiero, lena' udyiaguin' ra'o, biyezi' Diuzi ra'o gunnë' yela' naban quiero tuzioli. Chi uzuro di'idza' ca mandado rue Diuzi, lena' gacalën ra'o yezi' Diuzi ra'o gunnë' yela' naban quiero tuzioli. ¹⁷ Pero xcale Diuzi, bira rzule di'idza' ca mandado rue pensari mala quiele, cabë' bële dza na'te. Pero na'a baruzule di'idza' du guicho du la'adyi'le ca mandado rue xti'idza' Diuzi ta pca'nnë' laohuele. ¹⁸ Banacale ben' libre ta huele tadya'a inaole xneza Diuzi. ¹⁹ (Tanun quie dan' binetzioñe'ele dyë'ëdi cabë' rnia' le'e, lena' rnia' le'e itu chopa la'ana ta gacalën le'e.) Cani nacan. Cabë' bële dza na' ulisa ni'a na'ale bële tamala, bële ta bireya'ala' huele, cana' hualisa ni'a na'ale huele tadya'a, huele ta reya'ala' huele, tacuenda talicazi nacale ben' quie Diuzi.

²⁰ Caora neyu'ule pensari mala dza na', unabë'n le'e ca xa'nle, quie lena' bibzule pensari huele tahuen ca tahuen re'en Diuzi huele. ²¹ ¿Pero bizi bële gan unaole neza mala? Na'ra lena' ruen yela' stu' quiele. Ze'lao ituzi yela' guti ulezale yeyole lao gui' gabila. ²² Pero na'a bira yu'ule pensari mala inabë'n le'e ca xa'nle. Baoyu'ule pensari quie Diuzi ta huele tahuen ca re'en Diuzi huele. Cana' si huele gan. Cana' talicazi nacale ben' quie Diuzi. Ze'lao

cana' gun Diuzi yela' neban ta biyeyudyi yedu quie. ²³ Ga yeyudyi gažo dula' xquia quiero yeyoro lao gui' gabila. Pero netza' quie Diuzi gunnè' yela' neban quiero tuzioli tanun quie nacalëro Cristo Jesús, ben' naca Señor quiero, tuže.

7

Ni rguixogue'n tu di'idza' cabè' naca quie tu nigula bazulè be'mbyu

¹ Bicha', le'e nuebè'le nezile bi nan lè'è guichi ley pca'n Diuzi lao na'a Moisés. Nezile rnabè' guichi ley na' ra'o solamente dza nebanro rdaro lao yedyi layu. ² Rnia' le'e tu di'idza'. Cani nacan quie tu nigula bazulè be'mbyu. Biru'e guichi ley na' lato usan nigula be'mbyu quiè' tu nenebannè' nerda be'mbyu quiè' lao yedyi layu. Pero chi baguti be'mbyu quiè', anaquè' libre yezi'nè' ben' tula. Bira naca quiè' be'mbyu na' lao guichi ley. ³ Quie lena' chi baptilè' be'mbyu tula tu neneban be'mbyu quiè', na'ra xquia ruenè' quienè'. Pero chi baguti be'mbyu quiè', anaquè' libre yezi'nè' ben' tula, bira naca quiè' be'mbyu na' lao guichi ley. Bibi dula' xquia de quienè'.

⁴ Lëscan' cana' nacan quiele, bicha'. Le'e banacalèle Cristo tuže. Banaca quiele ca quie nigula baguti xquiuhue. Bira nacale cuenda lao guichi ley pca'n Diuzi lao na'a Moisés. Banacale cuenda quie Cristo, ben' baguti beban. Cana' naca quiero nacaro ladyina'a Diuzi. ⁵ Na'ra cabè' guca quiero dza na'te, bëro ta rnazin quiero. Unan quiero huero ta biru'en lato huero lè'è guichi ley pca'n Diuzi lao na'a Moisés. Tanun quie biru'en lato huero bi cosa lè'è guichi ley na', lena' unan quiero uchisa ni'a na'aro huero tamala. ⁶ Pero bira inabè' guichi ley pca'n Diuzi lao na'a Moisés ra'o. Nacaro libre huero ca re'en Diuzi huero, bayu'uro pensari quienè' ta yecubinè' pensari quiero. Bira naca quie guichi ley na' para inabè'n ra'o.

Ni rguixogue'n quie pensari mala yu'u lu'u guicho laxta'oro

⁷ Na'ra, ¿ca biži inaro? ¿Inaro naca guichi ley na' tamala? ¡Bireya'ala' inaro cana' como dan' binaca guichi ley na' tamala! Pero rguixogue'cazin ra'o cabè' naca tamala. Ni siquier a binezida' tamala na' rza'la'adyi'ro ta de quie laguedyiro, chi birguixogue'n lè'è guichi ley na' de que: “Bireya'ala' sa'la'adyi'ro ta de quie laguedyiro.” ⁸ Pero tanun quie rguixogue' guichi ley na' cabè' bireya'ala' huero, quie lena' uzulao pensari mala quia' huen nè'èdi' mandado hua' ta rnazin quia'. Porque según cabè' rguixogue' lè'è guichi ley na', cana' ineziro bi huero huero tamala, bi huero huero tahuen. ⁹ Guca tu ta guca tiempo biunezda' cabè' rguixogue'n lè'è guichi ley na'. Quie lena' biunezda' de dula' xquia quia'. Pero caora bdyin hora unezda' cabè' rguixogue'n lè'è guichi ley na', caora na' za' pensari mala quia', bèlèn nè'èdi' ta hua' ta biru'en lato hua'. Caora na' unezda' de dula' xquia quia', huaca hue Diuzi nè'èdi' castigo. ¹⁰ Ulèchi Diuzi guichi ley quienè' ta gacalènè' yaca ben' nita' lao yedyi layu cuenda suyaquè' contento. Pero por tu parte quia' nè'èdi', lao na'a Diuzi unezda' de dula' xquia quia', huen žudyi huenè' nè'èdi' castigo. Cana' guca quia'. ¹¹ Tanun quie guichi ley na', aozì' pensari mala quia' nè'èdi' yè'. Cana' guta' dula' xquia quia', bèn žudyi hue Diuzi nè'èdi' castigo.

¹² Pero naca la'iya guichi ley pca'n Diuzi lao na'a Moisés. Naca la'iyen, nacan li, nacan huen ca mandado rue lao guichi ley na'. ¹³ Na' inaba' le'e tu pregunta, ¿naca dula' quie guichi ley na' guta' dula' xquia quia', huen žudyi hue Diuzi nè'èdi' castigo? ¡Binacan cana'! Binaca dula' quie guichi ley na', nechan' dula' quie dula' xquia quia'. Conlè ta naca tadya'a uži' dula' xquia quia' nè'èdi' yè'. Cana' naca dyyin quie guichi ley quie Diuzi. Nacan ta ulu'en ra'o ca tamala gula naca dula' xquia quiero.

¹⁴ Neziro nusa'a guichi ley na' pensari quie Diuzi, pero nē'ēdi' biyu'a pensari quie Diuzi, yu'a pensari mala ca pensari yu'u yaca ben' nita' lao yedyi layu. ¹⁵ Binezda' bi ruen quia'. Tu ta bireya'ala' hua', lēlena' rua', la'acazi nezda' tamala na'. ¹⁶ Pero chi rua' tu ta bireya'ala' hua', lena' rulu'en nezda' naca dya'a guichi ley quie Diuzi. ¹⁷ Pensari mala quia' yu'u lu'u guicho laxta'ohua', lena' rñabē'n nē'ēdi' hua' tamala. Raca quia' ca quie ben' tula, ben' mala, rñabē'nē' nē'ēdi'. ¹⁸ Nezda' ca naca pensari yu'a nē'ēdi'. Biyu'a pensari dya'a ca pensari quie Diuzi. Yu'a pensari mala ca pensari yu'u yaca ben' nita' lao yedyi layu. Rñēn lu'u guicho laxta'ohua' hua' tahuen, pero bigaca' hua'n. ¹⁹ Birua' tadya'a cabē' re'enda' hua', nechan' tamalala rua', ta bire'enda' hua'. ²⁰ Na'ra chi birua' tadya'a cabē' re'enda' hua', lena' ulu'en rñabē'n pensari mala quia' nē'ēdi'. Raca quia' ca quie ben' tula, ben' mala rñabē'nē' nē'ēdi'. ²¹ Cana'naca ta raca quia'. Cati ruzua' pensari hua' tahuen, cana' reyudyi quia' tamalala rua'. ²² Nezicazida' naca huen guichi ley quie Diuzi. ²³ Pero lēscan' nezda' ca naca pensari yu'u lu'u guicho laxta'ohua', yu'un pensari mala ca pensari yu'u yaca ben' nita' lao yedyi layu. Na'ra bire'en pensari mala quia' hua' tahuen cabē' re'enda' hua'. Cana' rñabē'n pensari mala quia' nē'ēdi'. Raca quia' ca quie ben' yu'u lu'u dyiguiba, ben' binaca libre.

²⁴ ¡Bayēchi' gula raca quia'! ¿Nuži gacalē nē'ēdi' usana' pensari mala yu'u lu'u guicho laxta'ohua', pensari re'en udyiagui'n nē'ēdi'? ²⁵ Tuzi Diuzi gacalēnē' nē'ēdi' lao na'a zi'inē' Jesucristo, ben' naca Señor quiero. ¡Xcale Diuzi taže bagucalēnē' nē'ēdi' como cabē' guca quia', gu'unda' hua' mandado ca mandado rue lao guichi ley quie Diuzi, pero biguca' como dan' unabē'n pensari mala quia' nē'ēdi'. Unabē'n nē'ēdi' cabē' rñabē' ben' naca xa'n tamala.

8

Racalē pensari quie Diuzi yu'u lu'u guicho laxta'oro ra'o

¹ Na'ra bigata' castigo quie ben' nacalē Cristo Jesús tuže. Bira inabē' pensari mala ra'o ca pensari mala yu'u lu'u guicho laxta'o yaca ben' nita' lao yedyi layu, nechan' inabē'cazi pensari quie Diuzi yu'u lu'u guicho laxta'oro ra'o. ² Dyin quie pensari quie Bichi Be quie Diuzi yu'u lu'u guicho laxta'oro, lena' uselan ra'o gacaro libre. Birabi dula' xquia quiero gata' lao Diuzi huenē' ra'o castigo. Lēscan' dyin quie pensari quie Diuzi gata' yela' neban quiero tuzioli tanun quie dan' nacalēro Cristo Jesús tuže. ³ Porque bē Diuzi gan bēnē' ta biuzaque' hue guichi ley pca'nnē' lao na'a Moisés. Tanun quie pensari mala yu'u lu'u guicho laxta'oro, biuzaque' yeguba guichi ley na' dula' xquia quiero. Quie lena', use'ela' Diuzi zi'inē' ta yegubē' dula' xquia quiero. Guquē' be'mbyu ca ra'o, ben' de dula' xquia quie, pero lēbē' bibi dula' xquia quē' de. Cana' bē Diuzi use'ela'nē' zi'inē' gutinē' lao lazaro guquē' ca gūn hue'ro Diuzi ta yezi dula' xquia quiero. Na' biži lao na'a zi'inē' guquē' be'mbyu bidē' lao yedyi layu, bēnē' gan begubē' dula' xquia quiero ta bira inabē'n ra'o. ⁴ Cana' bē Diuzi gucalēnē' ra'o tacuenda huero tadya'a con cabē' rñan lē'ē guichi ley quienē'. Bira inaoro huero ca naca pensari mala yu'u lu'u guicho laxta'oro ra'o, ben' de dula' xquia quie. Pero inaoro huero ca naca pensari quie Bichi Be quie Diuzi yu'u lu'u guicho laxta'oro.

⁵ Yaca ben' nao ca naca pensari mala yu'u lu'u guicho laxta'ojē', lega raxeyaquē' huejē' ta rñazin quiejē'. Pero yaca ben' nao ca naca pensari quie Bichi Be quie Diuzi yu'u lu'u guicho laxta'ojē', lega raxejē' uzujē' di'idza' ca mandado rue Diuzi. ⁶ Chi inaoro huero ca naca pensari mala yu'u lu'u guicho laxta'oro, lena' udyiagui'n ra'o lao Diuzi. Pero chi inaoro huero ca naca

pensari quie Bichi Be quie Diuzi yu'u lu'u guicho laxta'oro, lena' gata' yela' neban quiero biyeyudyi yedu quie, huabe' chizi laxta'oro. ⁷ Naca enemigo quie Diuzi yaca ben' nao rue pensari mala ca pensari mala yu'u lu'u guicho laxta'ojë'. Nica re'enjë', nica nezijë' bi huejë' ta huejë' mandado ca mandado rue lao guichi ley quie Diuzi. ⁸ Yaca ben' raxe hue pensari mala ca pensari mala yu'u lu'u guicho laxta'ojë', biilë'ë Diuzi lëjë' gusto cabë' rueyaquë'.

⁹ Pero le'e binacale ben' nao rue pensari mala ca pensari mala yu'u lu'u guicho laxta'o yaca ben' nita' lao yedyi layu. Nacalë ben' nao rue pensari quie Bichi Be quie Diuzi, como dan' yu'u pensari quie' lu'u guicho laxta'ole. Nu ben' biyu'u pensari quie Cristo lu'u guicho laxta'ohue, binaquë' ben' quie Cristo. ¹⁰ Chi nacalëro Cristo tuže, la'acazi gati cuerpo quiero tanun quie dula' xquia quiero, pero ca naca quie bichi be quiero, bigatin nabannan como dan' nacalëro Cristo tuže rlë'ë Diuzi ra'o ben' bira de dula' xquia quie. ¹¹ Quie lena' chi tali yu'uro pensari quie Bichi Be quie Diuzi lu'u guicho laxta'oro, la'acazi gatiro, useban Diuzi ra'o gunnë' yela' neban cubi ta biyeyudyi yedu quie. Na' Diuzi, ben' pseban Cristo Jesús, lëlëbë' usebannë' ra'o lao na'a Bichi Be quienë', ben' yu'u lu'u guicho laxta'oro.

¹² Cani nacan bicha', nacaro obligado, pero binacaro obligado huero inaoro con cabë' rna pensari mala yu'u lu'u guicho laxta'oro. ¹³ Porque chi huero inaoro ca rue pensari mala yu'u lu'u guicho laxta'oro, na'ra bë' gatiro, bigata' yela' neban tuzioli quiero. Pero chi hue quiero con cabë' rna Bichi Be quie Diuzi, chi bihuero cuenda con cabë' rna pensari mala yu'u lu'u guicho laxta'oro, na'ra bë' gatiro, huata' yela' neban quiero tuzioli.

¹⁴ Naca zi'i Diuzi yugulu ben' nao ruzu di'idza' con cabë' rna Bichi Be quienë'. ¹⁵ Ca naca pensari bdze' Diuzi lu'u guicho laxta'oro, binacan pensari ta idzebiro ca idzebi ben' zu lao xa'n tamala. Pero tanun quie pensari quie' yu'un lu'u guicho laxta'oro, nacaro zi'inë', na' yëbironë': "Xuzä' Diuzi."

¹⁶ Racalë pensari quie Bichi Be quie Diuzi pensari quiero ta xela'adyi'ro nacaro zi'i Diuzi. ¹⁷ Dan' nacaro zi'i Diuzi, cana' gunnë' ra'o ca ta unë' gunnë' ra'o dza na'te. Conlë Cristo gata' yela' neban quiero tzesulëronë' tuzioli. Na' chi raca zëdi quiero dza rdaro lao yedyi layu tanun quie naoro xneza Cristo, lëscan' huadyin dza yedyinro guibá tzhauero tuže len Cristo.

¹⁸ Taže tazëdi de quiero dza rdaro lao yedyi layu tanun quie dan' naoro xneza Cristo, pero cati abedyinro guibá inaro tadao' bicu' tazëdi guca quiero. Inaro nacara tahuen gula gaca quiero cati bedyinro guibá. ¹⁹ Yugulu ta uduxu Diuzi lao yedyi layu rbezan dza yedupa yedzaga yugulu ben' naca zi'i Diuzi guibá. ²⁰ Yugulu ta uduxu Diuzi lao yedyi layu naca bayëchi' quien, pero cala dula' quien naca bayëchi' quien. Dyin bë Diuzi naca bayëchi' quien, pero bzucazi Diuzi dza, dza yecubinë' yeyuenë' yugulu ta de lao yedyi layu. ²¹ Huadyin dza yezi yeyëri yugulu ta uduxu Diuzi lao yedyi layu. Bira gaca bayëchi' quien, bira yedzagalaona. Huega'n tzaon'a dza zuro guibá nacaro libre ra'o, ben' naca zi'i Diuzi. Lëdza na' yega'n dya'a gula quiero.

²² Neziro redzagalao yugulu ta uduxu Diuzi lao yedyi layu ca quie redzagalao nu nigula re'en galo xcuidi' quie. ²³ Cala tuzi ta uduxu Diuzi lao yedyi layu redzagalaona, pero lëscan' ra'o, ben' nao xnezë', redzagalaoro la'acazi yu'u pensari quie Bichi Be quie Diuzi lu'u guicho laxta'oro. Bablë'ëro tadya'a na' yu'uro pensari quie Bichi Be quie Diuzi. Neziro huadyin dza inabë' puro pensari quie Bichi Be quie Diuzi ra'o, bira inabë' pensari quiero ra'o. Lega rbezaro dza yezi' Diuzi ra'o nacaro zi'inë' sulëronë' naquë' Xuzi. Na' dza na' yecubi Diuzi cuerpo quiero ta iyacan cuerpo dya'atzegue, cuerpo bicuiagui'n. ²⁴ Lëdza na' rbezaro gaca quiero con cabë' una Diuzi gaca quiero tanun quie bapte pselanë' ra'o. Chan' baguca quiero tu ta ulezaro gaca

quiero, na'ra bira zu cuezaro gaca quiero. ²⁵ Pero chi binegaca quiero tu ta cuezaro gaca quiero, na'ra ruen zí cuezaro dyë'ëdi idyin dza gaca quiero cabë' rbezarro gaca.

²⁶ Lëscan' racalë pensari quie Bichi Be quie Diuzi ra'o ga racaro falta. Nica neziro hue'lëro Diuzi di'idza' ca reya'ala' huero. Pero ca pensari quie Bichi Be quie Diuzi yu'u lu'u guicho laxta'oro, con len racalën ra'o ulidzaro Diuzi cabë' reya'ala' ulidzaronë' nun quie dan' biredzelerro bi di'idza' yëbironë'.

²⁷ Rezi' Diuzi cuenda ca naca pensari yu'u lu'u guicho laxta'oro. Nezi Diuzi bi na Bichi Be quienë', porque rulidza Bichi Be quienë' lëbë' conforme ca re'en Diuzi gaca quie yaca ben' quienë', yaca ben' nao xnezë'.

Con bitezi tazëdi gaca quiero huero gan

²⁸ Neziro con bitezi gaca quiero, huacalë Diuzi ra'o yega'nro huen, ra'o, ben' dyë'ë Diuzi, ra'o, ben' ulionë' según ca unanë' huenë' quiero dza na'te.

²⁹ Desde dza na'te nezi Diuzi huadyin dza sudyi'ilëronë'. Cana' psere Diuzi ra'o dza na'te ta yedyinro iyacaro ta gacaro cabë' naca zi'inë' Cristo. Cana' yedyin Cristo naquë' ben' belaora lao yaca ben' rzudyi'ilë Diuzi. ³⁰ Na'ra como psere Diuzi ra'o dza na'te ta gacaro ben' quienë', lëscan' uliorënë' ra'o ta huero mandado quienë'. Na'ra como ulionë' ra'o huero mandado quienë', lëscan' pca'nrenë' ra'o ben' laxta'o yëri. Na'ra como pca'nnë' ra'o ben' laxta'o yëri, lëscan' bërënë' ra'o ben' bala'ana, ben' inita'lë lëbë' guibá.

³¹ Quie lena', ¿ca bi pensari reya'ala' huero? Pues como zu Diuzi racalënë' ra'o, nunu gaca udyiagui' ra'o. ³² Na'ra como bibeguë' Diuzi guida zi'inë', pero use'ela'cazine' lëbë' lao yedyi layu ta gutië' lë'ë yaga cruzo lao lazaro, lëscan' biyeguë' Diuzi gunnë' ra'o yugulu tahuen ta rdzioguero nuzuë' zi'inë' Jesucristo ta gacalënë' ra'o. ³³ ¿Nuži napa derecho gao ra'o xquia, ra'o, ben' ulio Diuzi? Naca cuin Diuzi ben' pca'n ra'o ben' laxta'o yëri. ³⁴ ¿Nuži napa derecho ichuguli quiero gacaro castigo? Naca cuin Cristo ben' guti lë'ë yaga cruzo pseban Diuzi lëbë', zuë' cuëta lë'enë' zaquë' yebë, rulidzë' lëbë' por ra'o. ³⁵ Con bitezi gaca quiero biyeyudyi yedu nadyë'ë Cristo ra'o. La'acazi redzagalaoro, la'acazi raca zëdi quiero, la'acazi ruelëjë' ra'o bizinaquezi, la'acazi bide ta gaoro, la'acazi bide žaba quiero, la'acazi naca zudyi quiero, la'acazi ruzegadyijë' gutijë' ra'o, biyeyudyi yedu nadyë'ë Cristo ra'o. ³⁶ Rguixogue'n lë'ë guichi la'iya quie Diuzi ca tazëdi gaca quiero cani: Tanun quie rdza' yaca benë' dan' naoro xneza Diuzi, cana' re'enjë' gutijë' ra'o.

Ca ruti ja benë' beco' zi'ila' yugu dza, cana' re'enjë' gutijë' ra'o.

Cana' rnën lë'ë guichi la'iya. ³⁷ Na'rnia' le'e, con bitezi tazëdi za' gaca quiero, huero gan como dan' zu Cristo napë' ra'o cuidado nadyë'ënë' ra'o.

³⁸ Nezda' dyë'ëdi con bitezi za' gaca quiero, biyeyudyi yedu nadyë'ë Diuzi ra'o. La'acazi guti benë' ra'o, la'acazi gaca zëdi quiero dza rdaro lao yedyi layu, la'acazi rue yaca ángel condre ra'o, la'acazi ruelë yaca taxi'ibi' ra'o bizinaquezi, la'acazi bi raca quiero na'a, la'acazi bi raca quiero uxe huidzo,

³⁹ la'acazi bi raca quiero guibá, la'acazi bi raca quiero lao yedyi layu, la'acazi nuti'tezi za' huelë ra'o bizinaquezi, biusanla'adyi' Diuzi ra'o, biyeyudyi yedu nadyë'ënë' ra'o como dan' nacalëro Cristo Jesús, ben' naca Señor quiero, tuže.

9

Ulio Diuzi ben' Israel dza na'te

¹ Tali rnia' le'e, como naca' ben' quie Cristo, quele yë' rzi'a. Cabë' rnia' le'e nacan tali, como dan' yu'u pensari quie Bichi Be quie Diuzi lu'u guicho laxta'ohua'. ² Lega rdëbida' quie ben' yedyi quia'. Lega raca bayëchi' lu'u

guicho laxta'ohua' por lèjè'. ³ Zua' dispuesto udze'de' Diuzi nē'ēdi', zua' dispuesto usanla'adyi' Cristo nē'ēdi', zua' dispuesto bi ta gaca quia', chan' gaca tahuen quie yaca ben' yedyi quia'. ⁴ Nacajè' ben' Israel, ben' naca zi'isuba xuxixta'ohua' Jacob. Rlè'ē Diuzi leyaquè' ca quie zi'inè'. Uzulè Diuzi leyaquè' dza na'te, blu'enè' leyaquè' yela' huaca quie'. Udixogue'nè' leyaquè' ca unanè' huenè' quiejè'. Pca'nnè' guichi ley quienè' lao na'a laguediyijè' Moisés. Gudyinè' lèjè' ca reya'ala' huejè' ta tzionla'adyi'jè' lèbè'. Yega'nlnè' leyaquè' di'idza' ca huenè' gacalènè' leyaquè'. ⁵ Nacajè' zi'isuba yaca xuxixta'ohua', ben' unita' dza na'. Caora bida Cristo, ben' use'ela' Diuzi, guquè' be'mbyu naquè' zi'isuba yaca ben' Israel. Lèbè' naquè' Diuzi, ben' rnabè' lao yugulute. Naquè' ben' la'iya tuzioli. Amén.

⁶ Pero quele inia' biuzu Diuzi di'idza' ca di'idza' bega'nlnè' ben' Israel. Cala yugulu ben' Israel nacajè' dugalo ben' quie Diuzi. ⁷ Lèscan' cala yugulu ben' Israel nacayaquè' dugalo zi'isuba xuxixta'ohua' Abraham según ca naca di'idza' bega'nle Diuzi Abraham, porque una Diuzi rēbinè' Abraham: "Lao na'a zi'ilo Isaac huanita' dugalo zi'isubo'." ⁸ Quie lena' reya'ala' tziōñero cala yugulu ben' Israel nacayaquè' dugalo ben' quie Diuzi. Balazi ben' Israel, ben' rue quie xti'idza' Diuzi, leyaquè' nacayaquè' dugalo ben' quie Diuzi, dugalo ben' zi'isuba Abraham. ⁹ Porque caní naca di'idza' bega'nle Diuzi Abraham: "Caora babediyin hora, huedena'a luè' huela'iya' zgulo' Sara cuenda hua'anè' xcuidi' quio'." Cana' tziōñero naca ben' rue quie xti'idza' Diuzi dugalo ben' quie Diuzi como dan' naca quieyaquè' ca quie Isaac, ben' golo de acuerdo con cabè' di'idza' bega'nle Diuzi Abraham. ¹⁰⁻¹³ Dera mazara di'idza' re'enda' inia' le'e. Caora babgula Isaac, na' bi'a nigula quie' Rebeca xcuidi' guidi'. Na'ra una Diuzi rēbinè' nigula quie Isaac: "Huanabè' bidao' galo taorupe lao bidao' golo tanèro." Lena' naca de acuerdo con ca una Diuzi caní: "Huella'iya' Jacob, pero bihuella'iya' Esaú." Cana' una Diuzi la'acazi binegalo yaca xcuidi' guidi', binehuejabi' tahuen, binehuejabi' tamala. Lena' ineziro napa Diuzi derecho huella'iyane' nu ben' re'ennè' huella'iyane', biruenè' cuenda la'acazi bèjè' tahuen, la'acazi bèjè' tamala.

¹⁴ ¿Bizi inaro chi? ¿Inaro birue Diuzi tadya'a? ¿Bireya'ala' inaro birue Diuzi tadya'a! ¹⁵ Porque caní una Diuzi rēbinè' Moisés dza na'te: "Hueyèchi'la'adya' nu ben're'enda' yeyèchi'la'adya'. Idyè'èda' nu ben' re'enda' idyè'èda'." ¹⁶ Quie lena' inia' le'e, cala ra'o huero mandado yeyèchi'la'adyi' Diuzi ra'o, nechan' según ca mandado hue cuinnè' yeyèchi'la'adyi'nè' ra'o. ¹⁷ Lè'ē guichi la'iya quie Diuzi rguixogue'n ra'o cabè' una Diuzi gudyinè' ben' naca rey quie nación Egipto dza na'. Cani una Diuzi rēbinè' lèbè': "Baolioga' luè' gaco' rey ta ilè'ē yugulu benè' ca naca yela' huaca quia', lèscan' ta huebè'jè' nē'ēdi' duze yedyi layu." ¹⁸ Quie lena' inia' le'e, caní naca quie Diuzi: Reyèchi'la'adyi'nè' nu ben' re'ennè' yeyèchi'la'adyi'nè'. Lèscan' usanla'adyi'nè' nu ben' re'ennè' usanla'adyi'nè'.

¹⁹ Pero le'e inale: "Chi yugulu ta ruero nacan mandado quie Diuzi, na'ra ¿bixquien' rugapa Diuzi ra'o dula' xquia por nun quie ta ruero rdaro lao yedyi layu? ¿Tu ta re'en Diuzi gaca, bizi huero ta bigacan?" ²⁰ Pero rnaba' le'e, ¿nuzi nacaro tzu'uro huedila huenè lèro Diuzi? Rnia' le'e, binapa tu yeso' derecho inèn yèbin ben' rue len: "¿Biquien' bzalolo' nē'ēdi' cani?" ²¹ Pues napa ben' rue yeso' derecho si'nè' gun', huenè' bitezi yeso' rapanè' gusto huenè'. Con tuzi gun' senè' napè' derecho huenè' yeso' tza'o, o huenè' yeso' corriente.

²² Napa Diuzi derecho idza'nè' huenè' castigo nu ben' reya'ala' gata' castigo quie como dyè'ēdi rbeza Diuzi yetza'jè' pensari quiejè'. ²³ Cana' bè Diuzi, dyè'ēdi ulezanè' quie yaca ben' unita' dza na'. Cana' blu'enè'

ra'o naquë' ben' žela'adyi', ben' reyëchi'la'adyi' ra'o. Desde dza na'te zuë' rbezë' ta udze'në' xnezi quiero tacuenda idyin dza tzasulëronë' guibá. ²⁴ Ulio Diuzi ra'o lao rupa cue'ro len ben' Israel len ben' za' yedyi tula. ²⁵ Lëcana' rguixogue'n lë'ë guichi la'ya quie Diuzi ta bë ben' lao Oseas: Huabio Diuzi yaca ben' za' yedyi tula ta gacajë' ben' quienë'. Huadyë'ë Diuzi yaca ben' binaca ben' Israel, ben' nunu nadyë'ë.

²⁶ Lëscan' lëyaca yedyi ga nita' ben' binuebë' Diuzi, ga una Diuzi: “Binacale ben' quia’.”

Lëben' na' iyacajë' ži'i Diuzi, ben' neban tuzioli.

²⁷ Pero quie ben' Israel una Isaías caora unë' cani: “La'acazi naca ben' Israel tazëgula ca naca yozo de ru'a nisadao', quele yugojë' inaojë' xneza Diuzi, tu chopazijë' inaojë' xneza Diuzi ute usela Diuzi lëjë'. ²⁸ Tu sasazi uzu Diuzi di'idza' quienë' huenë' castigo lao duze yedyi layu.” ²⁹ Lëscan' dza na'te unë Isaías cani:

Chi bipca'n Diuzi ži'isubaro lao yedyi layu dza na', babega'nnan bayëchi' gula quiero cabë' bayëchi' gula bega'nnan quie ben' yedyi Sodoma len ben' yedyi Gomorra.

Cabë' naca quie yaca ben' Israel

³⁰ ¿Ca bi pensari reya'ala' huero? Pues reya'ala' huero pensari de que yaca ben' binaca ben' Israel, ben' birnao guichi ley pca'n Diuzi lao na'a Moisés, pues baguca quiejë' rlë'ë Diuzi lëjë' ben' laxta'o yëri nun quie na' rzudyi'ilëjë' Jesús. ³¹ Pero netza'n quie ben' Israel. Nernaøjë' guichi ley pca'n Diuzi lao na'a Moisés tacuenda ilë'ë Diuzi leyaquë' ben' laxta'o yëri. Chan' dula'adyi'yaquë' ruzujë' di'idza' huejë' yugulu ca mandado rue lao guichi ley na', na'ra ilë'ë Diuzi leyaquë' ben' laxta'o yëri. Pero bibëyaquë' gan, bibzujë' di'idza' huejë' yugulu con cabë' rna lë'ë quichi ley na'. Quie lena' bibëjë' gan ilë'ë Diuzi lëjë' ben' laxta'o yëri. ³² ¿Bixquien' bibëjë' gan? Pues bibëjë' gan como dan' re'enjë' huejë' cuinzijë' ben' laxta'o yëri. Binezijë' ilë'ë Diuzi ra'o ben' laxta'o yëri por nun quie chi rzudyi'ilëro Cristo. Quie lena' naca quiejë' ca quie ben' ucha'o yo, bgudyinë' yu tu neza, bibënë' gan idyinnë' ga zionë'.

³³ Lena' rguixogue'n quieyaquë' lë'ë guichi la'ya quie Diuzi cani:

Baose'ela' Diuzi ži'inë' lao yedyi quie ben' Israel, pero psebiljë' lëbë'. Quie lena' raca quieyaquë' ca quie ben' ru'u yo ni'e, bgudyinë' yu tu neza. Pero nu ben' rzudyi'ilë ži'inë', bigaca bayëchi' quienë', huega'nnë' huen.

10

¹ Bicha', du guicho du la'adya' rulidza' Diuzi re'enda' yetza' yaca ben' Israel pensari quieyaquë' gata' yela' neban quiejë' tuzioli. ² Nia' le'e tali na' re'enjë' tzionla'adyi'jë' Diuzi, pero binezijë' bi huejë'. ³ Binezijë' bi huejë' ta ilë'ë Diuzi lëjë' ben' laxta'o yëri. Na' re'enjë' huejë' cuinzijë' ben' laxta'o yëri. Racajë' pensari chi uzujë' di'idza' ca mandado rue lao guichi ley pca'n Diuzi lao na'a Moisés, cana' ilë'ë Diuzi lëjë' ben' laxta'o yëri. ⁴ Pero biruejë' ca re'en Diuzi huejë', porque tanun quie dan' inaoro xneza Cristo, cana' ilë'ë Diuzi ra'o ben' laxta'o yëri, cala porque dan' uzuro di'idza' ca mandado rue lao guichi ley quienë'.

⁵ Na'ra bzu Moisés di'idza' lë'ë guichi ta rguixogue'në' ra'o de quie chi tali uzuro di'idza'ca mandado rue lao guichi ley pca'n Diuzi lao na'anë', chi ni tu lasa bigaparo falta lao dza rdaro lao yedyi layu, na'ra por lena' gun Diuzi ra'o yela' neban tuzioli. Pero nunu yezue hue gan huejë' cana'. ⁶ Pero ta gun Diuzi ra'o, gunnë' yela' neban quiero tuzioli tanun quie dan' rzudyi'ilëro Cristo. Biruen zi tzioro guibá tzexi'ro Cristo yeyëzinë' gacalënë' ra'o. ⁷ Lëscan'

biruen zi yeyëziro ga nita' ben' huati tzezi'ro Cristo yeguidë' gacalënë' ra'o.
⁸ Pero ¿ca biži rnan lë'ë guichi la'iya? Cani rnan: “Con di'idza' yero lu'u ru'aro, con pensari yu'u lu'u guicho laxta'oro, con lëzin gun Diuzi ra'o yela' neban quiero tuzioli.” Lena' rguixogue'ro benë'.
⁹ Porque chi inaro naca Cristo xuzi xa'nro zaquë'lao lao benë', chi yu'uro pensari tali na' pseban Diuzi lëbë', na'ra gun Diuzi ra'o yela' neban tuzioli.
¹⁰ Cani nacan: Tanun quie dan' yu'u pensari lu'u guicho laxta'oro pseban Diuzi Cristo, quie lena' ilë'ë Diuzi ra'o ben' laxta'o yëri. Lëscan' tanun quie di'idza' rero lu'u ru'aro inaro naca Jesucristo xuzi xa'nro zaquë'lao lao benë', quie lena' gun Diuzi ra'o yela' neban tuzioli.

¹¹ Lë'ë guichi la'iya rguixogue'n rnan caniga: “Nu ben' rzudyi'ilë lëbë', bigaca bayëchi' quienë' huega'nnë' huen.”
¹² Pues tuzi ca zaca'ro lao Cristo, la' acazi ben' Israel, la'acazi ben' za' yedyi tula, como dan' naca Cristo xuzi xa'n yuguluro, taže huela'iyane' nu ben' rulidza lëbë'.
¹³ Porque tali nacan ca nan lë'ë guichi la'iya cani: “Yugulu ben' uzëto laohuë', ben' ina naca Cristo xuzi xa'nnë', hue'në' leyaquë' yela' neban tuzioli.”
¹⁴ Pero bisaque' uzëtayaquë' laohuë' inayaquë' naca Cristo xuzi xa'nnë' chi birzudyi'ilëjë' lëbë'. Lëscan' bisaque' sudyi'ilëjë' lëbë' chi binenezijë' cabë' bënë'. Lëscan' bisaque' inezijë' cabë' bënë' chi nunu yëbi leyaquë'.
¹⁵ Lëscan' bisaque' yëbi benë' leyaquë' chi bizu ben' use'ela' lëjë'. Lëcana' nan lë'ë guichi la'iya quie Diuzi can: “Tadya'a gula rue yaca ben' rguixogue' xti'idza' Diuzi.”

¹⁶ Pero cala yugulu benë' rue quieyaquë' con cabë rna Diuzi cuenda hue' Diuzi lëjë' yela' neban tuzioli. Nacan ca una Isaías dza na'te rëbinë' Diuzi: “Tu chopazi benë' rue quieyaquë' di'idza' la'iya quio' ta yëbindo'jë’.” Cana' unë' rëbinë' Diuzi.
¹⁷ Na'ra nia' le'e, chi yero uzënagaro di'idza' la'iya quie Diuzi, lena' ruen mandado quiero sudyi'ilëro Cristo.

¹⁸ Pero rnaba' le'e tu di'idza': ¿Biži raca quie ben' Israel? ¿Raca quiejë' binezijë' con cabë' rna di'idza' la'iya quie Diuzi? Calá raca quiejë' cana'. Claro nezijë' con cabë' rna di'idza' la'iya quie Diuzi, porque rnan lë'ë guichi la'iya quie Diuzi can:

Duže yedyi ga rda ben' Israel nu'ayaquë' guichi ga yu'u di'idza' la'iya quie Diuzi.

¹⁹ Tatula rnaba' le'e: ¿Bi ca nale? ¿Nale binezi ben' Israel de que ulio Diuzi ben' za' yedyi tula ta gacayaquë' ben' quienë'? Pues nezijë', porque dza na'te, dza uda Moisés lao yedyi layu, bzunë' di'idza' lë'ë guichi con cabë' una Diuzi rëbinë' ben' Israel can:

Tanun quie cuioga' ben' za' yedyi tula, ben' binaca ben' Israel ta huela'iya' leyaquë', cana' gacazë'le leyaquë'.

Tanun quie gacalia' ben' tula, ben' nale ben' tondo, cana' idza'le leyaquë'.

²⁰ Lëscan' dza uda Isaías lao yedyi layu, bibdzebinë' bzunë' lë'ë guichi con cabë' una Diuzi can:

Yaca ben' binaca ben' Israel, barnaoyaquë' xneza'.

Yaca ben' binaca ben' Israel, baruela'iya' leyaquë'.

²¹ Lëscan' dza na' una Isaías cabë' bë ja ben' Israel unë' rëbinë' leyaquë': “Yugu dza rëbi Diuzi lëjë', pero yela' yeladyi' quiejë' biruzënjagë’.”

11

Baolio Diuzi bala ben' Israel

¹ Na'ra inaba' le'e: ¿Apsanla'adyi' Diuzi yaca ben' Israel? Pues bip-sanla'adyi' Diuzi leyaquë'. Hasta në'ëdi' ulio Diuzi naca' ben' Israel. Naca' zico' ži' isuba Abraham. Naca' familia quie Benjamín, ben' uzu tiempote.

² Desde dza na'te beyuebë' Diuzi ben' Israel ulionë' lëjë' gacajë' ben' quienë'. Biusanla'adyi' Diuzi leyaquë'. ¿Binezile con cabë' rnan lë'ë guichi la'iya quie Diuzi ga rguixogue'n quie profeta Elías? Bigala'adyi'le cabë' bë profeta Elías, zuë' rulidzë' Diuzi udaohuë' yaca ben' Israel xquia. ³ Unë' rëbinë' Diuzi: “Xuza' Diuzi, abëti ben' Israel yugulu ben' rguixogue' di'idza' quio'. Apquinuyaquë' labecugo na' nueyaquë' guixi'dao' ga rionla'adyi'yaquë' luë'. Tuza' në'ëdi' babega'na'. Lëzi bare'enjë' gutijë' në'ëdi'.” ⁴ Pero na' una Diuzi gudyinë' lëbë': “Cala tuzo' luë' bega'nlo'. Nenita' igadyi mila ben' naca ben' quia', ben' birionla'adyi' ta pcha'a benë' najë' Diuzi quiejë'.” ⁵ Cabë' guca dza na'te, cana' racan na'a. Nenita' tu chopa ben' Israel, ben' du guichi du dula'adyi' rue quie xti'idza' Diuzi. Gusto quie Diuzi baolionë' leyaquë' gacajë'ben' quienë'. ⁶ Porque cala ulio Diuzi lëjë' tanun quie dan' bi cosa bëyaquë'. Chi tali rbio Diuzi ra'o tanun quie bi cosa ruero, lena' huero obligado Diuzi cuionë' ra'o gacaro ben' quie'. Pero bisaque' huero obligado Diuzi, gusto quienë' rbionë' nu ben' re'en cuionë' gaca ben' quienë'.

⁷ ¿Ca biži inaro quie ben' Israel? Bibëjë' gan yugulujë' gata' yela' neban quiejë' tuzioli. Yaca ben' ulio Diuzi, lëjë' sí, bëjë' gan. Psanla'adyi' Diuzi yaca los demás ben' Israel, ben' yaladyi'. ⁸ Cana' rguixogue'n lë'ë guichi la'iya quie Diuzi cani: “Yela' yeladyi' quiejë' apchula Diuzi pensari quiejë' ta bitzioñe'ejë' con cabë' rna di'idza' la'iya quienë'. La'acazi rlë'ëjë' dyë'ëdi, ruejë' ca ben' birlë'ë. La'acazi reyaquë' dyë'ëdi, ruejë' ca ben' bire. Cana' raca quiejë' hasta na'adza.” ⁹ Lëscan' quie ben' Israel una rey David dza na' con cabë' rnën cani:

Ruen zudyi quie ta de quiejë'.

Con ta raxejë' gaojë' yo'ojë', con ta raxejë' huejë', lëlena' udyiagu'i'n leyaquë'. Lëlena' uca'nnan leyaquë' mala lao Diuzi, huenë' lëjë' castigo.

¹⁰ Huechula laoyaquë' ta billë'ëyaquë' tuzioli.

Lëscan' gacajë' bego tuzioli.

Cana' una rey David dza na'te.

¹¹ Na'ra inaba' le'e: ¿Yela' yeladyi' quie ben' Israel apsanla'adyi' Diuzi leyaquë' tuzioli? Cala tuzioli apsanla'adyi' Diuzi leyaquë'. Pero racalë Diuzi ben' binaca ben' Israel ta hue quieyaquë' xti'idzë', na' gata' yela' neban quiejë' tuzioli cuenda ilë'ë ben' Israel cabë' tahuen na' raca quie ben' binaca ben' Israel. Cana' huenan quie ben' Israel inaojë' xneza Cristo gata'rë yela' neban quiejë' tuzioli. ¹² Tahuen guca quie ben' binaca ben' Israel caora quixui ben' Israel bibë quiejë' xti'idza' Diuzi. Pero huacara huen gula quie ben' binaca ben' Israel caora idyin dza inao yaca ben' Israel xneza Cristo, na' gata' yela' neban quiejë' tuzioli.

¹³ Pero re'enda' inia' le'e itu di'idza', le'e ben' binaca ben' Israel. Pues tanun quie dan' use'ela' Diuzi në'ëdi' ta quixogui'a le'e xti'idza' Diuzi, lena' nacan belao ca dyin quie Diuzi rua'. ¹⁴ Cana' rëpa' ben' Israel, ben' yedyi quia', cuenda huenan quieyaquë' inaoyaquë' xneza Cristo cabë' rnaole le'e, na' gata'rë yela' neban quiejë' tuzioli. ¹⁵ Caora blë'ë Diuzi bire'en ben' Israel inaoyaquë' xneza Cristo, na'ra udiloguë' yaca ben' za' yedyi tula, yaca ben' re'en inao xneza Cristo. Pero cala bire'en Diuzi inao ben' Israel xneza Cristo. Lega re'en Diuzi inaojë' xneza quienë'. Lega yedaohue Diuzi caora idyin dza inao yaca ben' Israel xneza Cristo. Lëdza na' gaca quiejë' ca quie ben' baguti beban tatula. ¹⁶ Chi banuela'iya Diuzi yëzo yëta xtila ta gaca pan, lëscan' naca la'iya pan ta bro lu'u horno. Lëscan' cana' nacan quie nu yaga. Chi banuela'iya Diuzi lue yaga, lëscan' naca la'iya taca' yaga. Lëscan' nacaré quie ben' Israel. Chi bë xuzixta'ojë' quie Diuzi, lëscan' idyin dza hue žico' ži'isubajë' quie Cristo.

¹⁷ Naca yaca ben' Israel ca quie tu yaga olivo. Naca bala ben' Israel ca quie taca' yaga olivo. Yela' yeladyi' quiejë' baochugu apsanla'adyi' Diuzi lëjë', pero baozi' Diuzi le'e, ben'za' yedyi tula. Banaca quiele ca quie taca' yaga guixi' nadilaten yaga olivo. Cana' gaca huen quiele, na' huaca yezi'le fuerza quie Diuzi cabë' rezi' taca' yaga fuerza quie luenä. ¹⁸ Pero bihuele cuinle ben' ze dan' baochugu Diuzi taca' yaga olivo, bë Diuzi quiele ca quie yaga nadilaten yaga olivo. Bigala'adyi'le cala por nun quie le'e nezi' lue yaga fuerza, dechan' por nun quie lue yaga nezi'le le'e fuerza.

¹⁹ Durpende yëbile në'ëdi': "Hue'encazi, pero baochugu Diuzi taca' yaga olivo tacuenda gaca nëto' ben' quienë' lao laza ben' Israel." ²⁰ Pero rëpa'le'e: "Baochugu Diuzi taca' yaga olivo, inaro ben' Israel, como dan' psebi'jë' Cristo. Pero le'e, ben' binaca ben' Israel, por nun quie dan' barnaole xneza Cristo nacalële Diuzi tuze. Quie lena' gapale cuidado bihuele cuinle ben' ze. ²¹ Cana' nacan porque bibezi'ze Diuzi nu ben' Israel, dan' psebi'jë' Cristo. Na'ra lëcana'zi huaca bis'i'ze Diuzi nu ben' za' yedyi tula chi biinaojë' xneza Cristo. ²² Na' ulehuecara pensari ca naca yela' ben' huen quie Diuzi. Pero lëscan' naca Diuzi ben' de pensari. Dyë'ëdi rna'në' huenë' castigo nu ben' bire'en hue quie di'idza' quie'. Pero le'e, taže bagucalë Diuzi le'e. Pero ruen zi inaole xneza Diuzi gapalenë' bala'ana, porque chi bihue quiele di'idza' quie', lëscan' le'e, hue Diuzi le'e castigo. ²³ Porque chi ye utza' ben' Israel pensari quiejë' inaojë' xneza Cristo, na'ra yezi' Diuzi lëjë' utilanë' lëjë' yaga olivo tatula. Decazi yela' huaca quie Diuzi huenë' cabë' re'ennë' huenë'. ²⁴ Pues ulio Diuzi le'e gacale ben' quienë', la'acazi nacale ca quie tu yaga guixi', la'acazi binacale ben' Israel, pero mazara gue'en Diuzi ben' Israel gacajë' ben' quienë' utilanë' lëjë' yaga olivo tatula.

Huadyin dza inao yaca ben' Israel xneza Cristo

²⁵ Re'enda' inia' le'e tu di'idza' con cabë' baodixogue' Diuzi në'ëdi' cuenda inezile cabë' gaca, na' bihuele cuinle ben' ze. Tali na' apsanla'adyi' Diuzi bala ben' Israel tanun quie yela' yeladyi' quiejë'. Pero caora abeya ben' re'en inao xneza Cristo, ben' za' yedyi tula, na'tera yezulao Diuzi yeyuenë' ben' Israel tuze tatula. ²⁶ Lëdza na' sulao inao yugulu ben' Israel xneza Cristo. Cana' rguixogue'n lë'ë guichi la'ia quie Diuzi cani: Lado ben' Israel huario tu ben' yedyi quiejë', ben' uzioñe'e lëjë'.

Lëben' na' yegubë' tamala quie ben' Israel.

²⁷ Cana' uzu Diuzi di'idza' con cabë' di'idza' bega'nlnë' xuzixta'o ben' Israel unë' yezi'zenë' dula' quieyaquë'. Cana' rnën lë'ë guichi la'ia quie Diuzi.

²⁸ Pero na'a barue ben' Israel condre Diuzi. Biralejë' guti Cristo lë'ë yaga cruzo cuenda gata' yela' neban quiejë' tuzioli. Pero como biralejë', lena' rguilo Diuzi le'e, ben' za' yedyi tula, nu le'e re'en inao xneza Cristo. Pero nadyë'ëcazi Diuzi ben' Israel. Lena' ulionë' xuzixta'ojë' gacajë' ben' quienë'.

²⁹ Uzu Diuzi di'idza' quienë' cabë' unanë' huenë'. Como ulio Diuzi ben' Israel gacajë' ben' quienë', lena' biusanla'adyi'në' leyaquë' tuzioli. ³⁰ Lële'e, ben' binaca ben' Israel, bibë quiele quie Diuzi dza na'te, pero caora uru'un ben' Israel Cristo tzala'la, na'ra bezulao Diuzi yeyuenë' le'e tuze beyëchi'la'adyi'në' le'e. ³¹ Na'ra cala le'e, nechan' yaca ben' Israel, lëleyaquë' birue quiejë' quie Diuzi. Pero huadyin dza yeyëchi'la'adyi' Diuzi ben' Israel tatula cabë'beyëchi'la'adyi'në' le'e. ³² Porque tuzi ca bë Diuzi, baochugulinë' de dula' xquia quie yuguluro. Na'ra quie lena' tuzi ca huenë', yeyëchi'la'adyi'në' yuguluro.

³³ Biiyeyudyi yedu yela' rioñe'e, yela' nezi quie Diuzi. Bisaque' huebë'ro dužete ca naca pensari quienë', ca naca xnezë'. ³⁴ ¿Nuži saque' tzioñe'e dužete pensari quie Diuzi? ¿Nuži saque' usëdi lëbë'? ³⁵ Nunu saque' yëbi Diuzi: "Tu cani reya'alo' quia'." ³⁶ Porque bzalo Diuzi yugulu ta de, yela' na' yugulu ta de nacan quienë'. Ben' ze, ben' bala'ana naca Diuzi tuzioli. Amén.

12

Ni rguixogüe'n cabë' reya'ala' hue ben' quie Diuzi, ben' naca la'ia

¹ Na'ra, bicha', babeyëchi'la'adyi' Diuzi le'e. Quie lena' du guicho du la'adya' inia' le'e reya'ala' tzesanle cuinle lao Diuzi, huele cuinle ca gun quie Diuzi ta biiyeyula yelen. Gacale ben' naca la'ia, cana' yeyula'adyi' Diuzi le'e. Cana' reya'ala' huele tzionla'adyi'le Diuzi. ² Bireya'ala' yenaole pensari mala quie ja ben' nita' lao yedyi layu. Reya'ala' yetza'le pensari quiele, yenaole xneza Diuzi cuenda yetza'nän quiele yugulu ca ruele. Cana' inezile ca re'en Diuzi huele, porque ca re'en Diuzi huero nacan ta gacalën ra'o, nacan ta yeyula'adyi'në' ra'o, nacan tadya'a gula.

³ Yela' ben' huen quie Diuzi ulionë' në'ëdi' ta uzioñe'eda' le'e. Lena' inia' le'e bireya'ala' huele cuinle ben' ze. Du guicho du la'adyi'le reya'ala' huele pensari dya'a según cabë' nue Diuzi quie quiele barue quiele xti'idza'në'.

⁴ Porque cani nacan: Tuzi cuerpo quiero naca, pero taže netza' tu tu parte quien, taže netza' dyin quie quien. ⁵ Lëscan' cana' naca quie ra'o ben' nao xneza Jesús. La'acazi nacaro ben' zë, nacaro tu cue' ben' nacalë Cristo tuže. La'acazi netza' dyin quie Diuzi huero quie quiero, naca yuguluro tuže.

⁶ Netza' ta banegun Diuzi quiero tu turo. Reya'ala' huero dyin dya'a según ta banegun Diuzi quiero tu turo. Chi banegun Diuzi quiero uzioñe'ero benë' con cabë' rna di'idza' la'ia quienë', na'ra lena' reya'ala' huero según cabë' nue Diuzi quie quiero barue quiero xti'idza'në'. ⁷ Chi banegun Diuzi quiero gacalëro benë', na'ra reya'ala' gacalërojë' dyë'ëdi. Chi neziro uzioñe'ero benë' con cabë' rna xti'idza'Diuzi, cana' reya'ala' huero. ⁸ Chi neziro hue'ro benë' di'idza' zela'adyi', cana' reya'ala' huero. Chi de dumi quiero, reya'ala' gacalëro benë', bihuero cuenda chi yeyuejë' laohue. Chi neziro udze'ro xnezi bi dyin hue ja benë', cana' reya'ala' huero du guicho du la'adyi'ro. Chi neziro yeyëchi'la'adyi'ro ben' yëchi', cana' reya'ala' huero du guicho du la'adyi'ro, bihuerojë' stu'.

Ni rguixogüe'n cabë' reya'ala' hue ben' nao xneza Cristo

⁹⁻¹⁰ Bireya'ala' idyë'ëro laguedyiro de ladzazi, pero du guicho du la'adyi'ro reya'ala' idyë'ëro ben' bichiro, ben' nacalëro Cristo tuže. Puro tadya'a reya'ala' huero, bihuero tamala. Reya'ala' gaparo laguedyiro bala'ana yuguluro.

¹¹ Bireya'ala' huero yela' huëdi, den' dula'adyi'ro reya'ala' huero dyin. Lëscan' dula'adyi'ro reya'ala' huero cabë' mandado re'en Diuzi huero.

¹² Reya'ala' suro contento cuezaro dyë'ëdi dza yezi' Diuzi ra'o. Reya'ala' si'zero biidza'ro cati raca zëdi quiero. Bireya'ala' usanro ulidzaro Diuzi.

¹³ Reya'ala' gacalëro laguedyiro ben' nao xneza Cristo, ben' bide quie. Reya'ala' gapachi'ro nu ben' za' žan yu'u quiero.

¹⁴ Reya'ala' yëbiro Diuzi huela'ianë' nu ben' za' rdila rnë len ra'o. Bireya'ala' udze'de'ro benë'.

¹⁵ Reya'ala' yedaohuelëro laguedyiro cati raca tadya'a quieyaquë'. Reya'ala' yeyëchi'la'adyi'le laguedyiro cati raca tazëdi quieyaquë'.

¹⁶ Reya'ala' huero tuže yuguluro. Bireya'ala' yežë'ro laguedyiro. Bireya'ala' huero yaladyi' ben' yëchi'. Bireya'ala' huero cuinro ben' ze.

¹⁷ Bireya'ala' gacalëro lëbi ben' mala. Reya'ala' huero bala tzu'ulëro laguedyiro dyë'ëdi. ¹⁸ Por tu parte quiero, huero bi huero tacuenda nita'lëro yugulu benë' dyë'ëdi, ta bibi zëdi gata'. ¹⁹ Na'ra bicha', nedyë'ëda' le'e, inia' le'e bireya'ala' yeyuero laohue quie ben' mala. Naoyubi Diuzi bi huenë' quie ben' mala. Cana' rguixogue'n lë'ë guichi la'ya quie Diuzi de que nacan cuenda quie Diuzi huenë' benë' castigo, cala ra'o. Cana' una Diuzi. ²⁰ Lëscan' una Diuzi de que chi rdue ben' rudie ra'o, reya'ala' hue'rojë' ta gaojë'. Chi rbilijë', reya'ala' hue'rojë' ta yo'ojë', porque chi huero cana', huacabë'jë' nacaro ben' huen yedue'jë'. Cana' una Diuzi. ²¹ Bihue'ro lato hue tamala ra'o gan, reya'ala' huero gan lao tamala, huero puro tahuen.

13

¹ Yuguluro reya'ala' uzuro di'idza' cabë' mandado rue nu ben' quie gobierno, porque Diuzi ulëchinë' ben' quie gobierno. Bizu ben' quie gobierno chan' biulëchi Diuzi lëbë'. ² Nu ben' biruzu di'idza' cabë' mandado rue ben' quie gobierno, na' ruetenë' contra Diuzi, de dula' xquia quienë', hue Diuzi lëbë' castigo. ³ Birdzebi ben' rue tadya'a ben' quie gobierno. Pero sí, rdzebi ben' rue tamala ben' quie gobierno dan' gata' castigo quiejë'. Chi re'enro suro contento, chi re'enro birdzebiro ben' quie gobierno, na'ra reya'ala' taro dula'adyi'ro huero tahuen. Cana' gacabë' ben' quie gobierno nacaro ben' huen. ⁴ Cana' reya'ala' huero como dan' ulëchi Diuzi gobierno ta gaca huen quiero. Chi birdaro dula'adyi'ro bihuero tahuen, reya'ala' yeyuero pensari quiero como dan' naca cuenda quie gobierno huejë' ra'o castigo. Mandado quie Diuzi na' rue gobierno mandado gaca castigo ben' rue tamala. ⁵ Quie lena' reya'ala' uzuro di'idza' cabë' mandado rue nu ben' quie gobierno, no solamente ta bigata' castigo quiero, pero lëscan' como dan' nacan tahuen, nacan ta reya'ala' huero. ⁶ Quie lena' reya'ala' quizuro impuesto como dan' rue ben' quie gobierno mandado quie Diuzi cabë' dyin ruejë'.

⁷ Reya'ala' quizuro chi zu ta reya'ala'quizuro. Reya'ala' quizuro dumi ta rtupa ben' yedyi. Reya'ala' quizuro impuesto quie gobierno. Reya'ala' gapala'nro yugulu ben' r nabë'. ⁸ Chi zu ta reya'ala' quizuro quie benë', reya'ala' useyudyi quizuron. Pero bireya'ala' usanro idyë'ëro laguedyiro. Chi nedyë'ëro laguedyiro, con lëzin babzuro di'idza' cabë' mandado rue lao guichi ley quie Diuzi yuguluten. ⁹ Lë'ë guichi ley quie Diuzi rguixogue'n ra'o de que bireya'ala' gasilëro nigula quie ben' tula. Lëscan' quie nigula, bireya'ala' gasilënë' be'mbyu tula. Bireya'ala' gutiro benë', bireya'ala'cuanro quie benë', bireya'ala' si'ro benë' yë', bireya'ala' sa'la'adyi'ro ta de quie benë'. Cana' rnan lë'ë guichi ley quie Diuzi. Pero lëscan' rguixogue'n ra'o de que reya'ala' idyë'ëro benë' cabë' nadyë'ëro cuinro. Chi huero cana', banaca quiero babzuro yugulu di' idza' cabë' mandado rue Diuzi lë'ë guichi ley quienë'. ¹⁰ Chi nadyë'ëro benë', bihuerojë' mala. Cana' huero uzuro di'idza' dyë'ëdi ca mandado rue Diuzi lë'ë guichi ley quienë'.

¹¹ Como cana' nacan, reya'ala' huero pensari ca tu dza rdaro lao yedyi layu. Reya'ala' huebë'ro abdyin hora yeyu'uro pensari dyë'ëdi, como dan' barueran bago dza yezi' Diuzi ra'o, cala ca dza na'te, dza uzulaoro inaoro xneza Cristo. ¹² Ilë'ëti'zi rdziogue iyudyi dza rdaro lao yedyi layu idyin dza yezi' Diuzi ra'o. Quie lena' bireya'ala' huero tamala ca ben' rda lao lato lao chula. Reya'ala' biidzebiro suro listo sëraro ca zë soldado, ben' napa fuerza, ben' rda te dza. ¹³ Reya'ala' taro dyë'ëdi ca ben' rda te dza. Bireya'ala' taro huero hue'e. Bireya'ala' taro ga ruejë' lani, ga ruejë' ru'be, ga ruejë' huedila. Bireya'ala' talëro nigula con ganzi. Bireya'ala' taro quiloros zëdi quiloros dila.

¹⁴ Reya'ala' taro yenaoro tuže Jesucristo dyë'edi. Bitaro huero ta rnazin quiero.

14

Bireya'ala' inëbızoro laguedyiro ben' nao xneza Jesús

¹ Reya'ala' hue'lële ben' zaozulao inao xneza Jesús di'idza' zela'adyi'. Bitzu'ule huedila huenë tu ta binaca. ² Por ejemplo, bala ben' nao xneza Jesús rnajë' ru'en lato gaoro biti'tezi ta de. Na' ibala ben' nao xneza Jesús, ben' zaozulao inao xnezanë', rnajë' bireya'ala' gaoro bë'ëla'. Quie lena' puro yëza cuan gaojë'. ³ Na' yaca ben' rao biti'tezi ta de, bireya'ala' ilë'ëyaquë' mala ben' rao puro yëza cuan. Bireya'ala' inëbizoyaquë' laguedyijë' como dan' rupa cue'ljë' nacajë' ben' nao xneza Jesús. ⁴ ¿Nuži bë le'e mandado inëbizole laguedyile, ben' naorë xneza Diuzi? Nacan cuenda quie xa'një' chi ruejë' tahuen, chi ruejë' tamala, cala cuenda quiele. Pero huacacazi huen quiejë', como dan' de yela' huaca quie Diuzi ta uca'nnë' lëjë' huen.

⁵ Re'enda' inia' le'e itu ejemplo: Yu'u bala ben' nao xneza Jesús rnayaquë' tuzi dza naca la'iya tzion'la'adyi'ro Diuzi, cala biti'tezi dza nacan dza huen. Na' yu'u ibala ben' nao xneza Jesús rnajë' biti'tezi dza nacan dza huen tzion'la'adyi'ro Diuzi. Quie quiele reya'ala' huele pensari inezile dyë'edi ta huele cabë' reya'ala' huele. ⁶ Na'ra quie ben' rna tuzi dza naca la'iya tzion'la'adyi'ro Diuzi, cala yugu dza nacan huen, ruejë' cana' ta gapala'një' Cristo. Lëscan' yaca ben' rna biti'tezi dza nacan dza huen tzion'la'adyi'ro Diuzi, ruejë' cana' ta gapala'nrëjë' Cristo. Na'ra quie ben' rna ru'en lato gaoro biti'tezi ta de, na' ruejë' cana' ta gapala'një' Cristo. Lëscan' ben' rao puro yëza cuen, na' ruejë' cana' ta gapala'nrëjë' Cristo, na' yëbijë' Diuzi diuxcalelo'.

⁷ Ni tu ra'o binitaro tuzi cabë' nita'ro lao yedyi layu. Ni tu ra'o bigatiro tuzi cabë' gatiro lao yedyi layu. Zu Cristo rna' ruhuanë' ra'o. ⁸ Chi zuro nabanro lao yedyi layu, na' zuro nabanro ta gapala'nro Cristo. Lëscan' chi gatiro yeyoro guibá, na' gatiro yeyoro guibá ta gapala'nro Cristo. La'acazi nabanro, la'acazi gatiro, pero nacaro ben' quie Cristo. ⁹ Cana' nacan como aguti Cristo bebannë' naquë' xuzi xa'n yugulu benë', la'acazi ben' neban, la'acazi ben' huati.

¹⁰ Pero le'e, ¿bixquien' rnëbizole ben' bichile ben' nao xneza Jesús? ¿Bixquien' režë'le laguedyile? Pues yuguluro naca quiero yedyinro lao Cristo huero cuenda cabë' bëro, chi bëro tahuen, chi bëro tamala. ¹¹ Lena' rguixogue'n lë'ë guichi la'iya quie Diuzi cabë' unanë' cani:

Como nacan tali nabana', lëscan' nacan tali idyin dza quitzu žibi yugulu benë' laohua', hueyaquë' në'edi' ben' ze.

Cana' una Diuzi dza na'te. ¹² Cana' nacan huadyin dza quie quiero huero cuenda lao Diuzi cabë' bëro dza udaro lao yedyi layu.

Reya'ala' inaoro neza dya'a

¹³ Quie lena' bireya'ala' inëbızoro laguedyiro. Mejorla huero pensari inaozo neza dya'a cuenda biixixi laguedyiro huejë' tamala por dula' quiero. ¹⁴ Na'ra quie bë'ëla', cala cuinnan nacan žudyi nu gao len. Lena' banezda' dyë'edi como naca' ben' nao xneza xa'nro Jesús. Pero chi rue bala benë'pensari naca žudyi gaojë' bë'ëla', na'ra para lëjë' sí, binacan huen gaojë'n, como dan' raquejë' žudyi nacan gaojë'n. ¹⁵ Chi por nun quie dan' re'enro gaoro bi cosa utëbiro pensari quie yaca bi' bichiro, ben' nao xneza Jesús, na'ra lena' rulu'en rdziogue idyë'ëro yaca ben' bichiro. Bihuero ta yega'n yaca ben' bichiro mala lao Diuzi por nun quie dan' re'enro gaoro bi cosa. ¹⁶ Biutëbiro pensari quie bichi laguedyiro, ben' nao xneza Jesús.

Bihuero bi cosa re'enro huero, la'acazi naparo derecho hueron, la'acazi neziro cala tamala chi hueron. ¹⁷ Binacan belao bi ta gaoro, bi ta yo'oro. Pero tabelao na' inaro tuzi pensari dya'a. Tabelao na' cue' chizi laxta'oro, suro contento tanun quie dan' yu'u lu'u guicho laxta'oro pensari quie Bichi Be quie Diuzi. ¹⁸ Redaohue Diuzi nu ben' rue cana', ben' nao xneza Cristo dyë'ëdi. Lëscan' hualë'ë yaca benë' lëbë' ben' huen.

¹⁹ Cana' huero seguir inaoro huero tadya'a cuenda na' cue' chizi laxta'oro, gacalëro laguedyiro ta tzioñe'ejë' mazara con cabë' rna xti'idza' Diuzi.

²⁰ Binaca huen te cana'zi dyin quie Diuzi por nun quie bi ta re'enro gaoro. Banezcaziro baben Diuzi lato gaoro yugulu ta de ta gaoro. Pero tamala na' gaoro bi cosa chi por lena' utëbiro pensari quie laguedyiro yela' na' huejë' ta bireya'ala' huejë'. ²¹ Mejorla biyo'oro bigaoro bi cosa, bihuero bi cosa chi por lena' utëbiro pensari quie ben' bichiro, ben' naorë xneza Jesús, yela' na' huenë' tu ta bireya'ala' huenë'. ²² Reya'ala' gaparo cuidado cabë' ruero cuinro lao Diuzi. Bihuero cuinro ben' ze nun que nacaro ben' quie Diuzi. Tahuen na' naca quiero chi bigao pensari quiero ra'o xquia cabë' ta ruero. ²³ Chi ineziro nacan xquia tu ta inan quiero huero, na' bireya'ala' hueron. Nacan xquia quiero chi hueron. Lëscan' reya'ala' ineziro dyë'ëdi chi nacan huen, na' hueron. Chi neziro dyë'ëdi binacan huen, mejorla bihueron como dan' nacan xquia quiero chi hueron.

15

Huero tahuen quie laguedyiro cala para ra'ozi

¹ Ra'o, ben' bazio tiempo nao xneza Cristo, reya'ala' gacalëro laguedyiro, ben' zaozulao inao xneza Cristo. Naca cuenda quiero gacalërojë' huero tahuen quiejë', cala para ra'ozi. ² Yuguluro reya'ala' huero tahuen quie laguedyiro, reya'ala' gacalërojë' tzioñe'eyaquë' mazara, na' huebë'jë' Diuzi hue quiejë' xti'idza'në'. ³ Cana' reya'ala' huero como dan' Cristo bibënë' huen para cuinzinë', pero lëscan' bënë' huen para yugulu benë'. Guca quienë' cabë' rguixogue'n lë'ë guichi la'ia quie Diuzi de que nu ben' rutasi runio Diuzi, lëscan' rutasi runiorënë' Cristo. Cana' rnën lë'ë guichi. ⁴ Na' rnia' le'e, yugulu ca di'idza' bzuyaquë' lë'ë guichi la'ia quie Diuzi dza na'te, nacan ta gacalën ra'o ta tzioñe'ero mazara Diuzi. Lëscan' nacan ta uxela'adyi'n ra'o ta cuezaro dyë'ëdi dza yezi' Diuzi ra'o biyeyatiro. ⁵ Rulidza' Diuzi gacalënë' le'e tzu'ulële laguedyile dyë'ëdi ca reya'ala' huele le'e, ben' nao xneza Cristo. Naca Diuzi ben' racalë ra'o cuezaro dyë'ëdi. Naca Diuzi ben' ru'elë ra'o di'idza' zela'adyi'. ⁶ Cana' naca quiero cuenda yuguluro huero tuze gaparo Diuzi bala'ana. Naca Diuzi xuzi xan' Señor quiero Jesucristo.

Lëscan' bida Cristo lao yedyi layu cuenda inao yaca ben' binaca ben' Israel xnezanë', na' gapajë' Diuzi bala'ana

⁷ Reya'ala' huelëro laguedyiro tuze cabë' bëlë Cristo ra'o tuze. Cana' gapala'nro Diuzi bala'ana. ⁸ Pero rnia' le'e, bida Cristo lao yedyi layu ta gacalënë' ben' Israel, na' uzunë' di'idza' cabë' di'idza' bega'nle Diuzi xuzixta'ohua' dza na'te. Bidë' ta ilë'ë ben' Israel naca Diuzi ben' ruzu di'idza'. ⁹ Lëscan' bida Cristo lao yedyi layu cuenda inao yaca ben' binaca ben' Israel xnezë', na' gapajë' Diuzi bala'ana tanun quie dan' beyëchi'la'adyi' Diuzi leyaquë'. Lena' rguixogue'n lë'ë guichi la'ia quie Diuzi cani: Quie lena' gapa yaca ben' za' yedyi tula Diuzi bala'ana. Quie lena' gulayaquë' himno ta gapala'një' lëbë'.

¹⁰ Lézi zu itu cue' lë'ë guichi la'ia ga rguixogue'nan cani:

Reya'ala' yedaohuele le'e, ben' za' yedyi tula, len le'e, ben' Israel, ben' quie Diuzi.

¹¹ Lëzi zu itu cue' lë'ë guichi la'iya ga rguixogue'nan cani:

Ulegapa Diuzi bala'ana yugulu le'e, ben' za' yedyi tula.

Ulequixogue' yaca benë' ca ben' ze naca Diuzi yugulu le'e, ben' binaca ben' Israel.

¹² Lëscan' Isaías, ben' uzu dza na'te, bzunë' di'idza' lë'ë guichi de que:

Hualo tu zi'i suba Isai.

Lëbë' gague' rey inabë'në' lao yaca ben' binaca ben' Israel.

Sudyi'ilëyaquë' lëbë' ta uca'nnë'yaquë' huen lao Diuzi.

Cana' rnan lë'ë guichi na'.

¹³ Na'ra në'ëdi' rulidza' Diuzi, ben' nuxela'adyi' ra'o, ta tzu'ule gusto cue' chizi laxta'ole como dan' barue quiele xti'idza'në'. Lëscan' rulidza'në' ta gaca zela'adyi' dyë'ëdi guicho laxta'ole tanun quie dan' baoyu'ule pensari quie Diuzi.

¹⁴ Na'ra bicha', banezda' dyë'ëdi nacale ben' huen, ben' rioñe'e. Nezile uzioñe'ele usëdile laguedyile, ben' nao xneza Cristo. ¹⁵ Cabë' di'idza' bzua' lë'ë guichi ni, biberugueda' inia' le'e cabë' reya'ala' tzioñe'ele cuenda bigalala'adyi'le cabë' unia' le'e. Cana' bia' por nun quie mandado pca'n Diuzi lao na'a, use'elë' në'ëdi' ¹⁶ tzaya' dyin quie Cristo entre yaca ben' binaca ben' Israel. Nacan mandado hua' tzetixogui'ajë' xti'idza' Diuzi cuenda hue quieyaquë' xti'idzë', yela' na' gata' yela' neban quiejë' tuzioli, na' yedyinyaquë' dyë'ëdi lao Diuzi. Cana' yezi' Diuzi lëjë', na' nacajë' ben' la'iya, ben' yu'u pensari quienë' lu'u guicho laxta'ohue.

¹⁷ Como naca' ben' quie Cristo Jesús, redaohueda' bia' ca mandado bë Diuzi në'ëdi'. ¹⁸ Re'enda' inia' le'e cabë' bëla'iya Cristo në'ëdi' bia' cabë' mandado bënë' në'ëdi'. Lëzin inia' le'e cala bilä di'idza' inia' le'e. Gucalë Cristo në'ëdi' udixogui'a ben' binaca ben' Israel xti'idza' Diuzi, na'tera barue quieyaquë' xti'idza'në'. ¹⁹ Cana' bia' udixogui'ajë' xti'idza' Diuzi, bia' yela' huaca quienë', gucalë Bichi Be quienë' në'ëdi'. Cana' bia' apseyudya' bia' mandado udixogui'a benë' xti'idza' Diuzi. Cana' bia' udixogui'a yaca ben' ciudad Jerusalén xti'idza' Diuzi. Lagazi cana' babia', baoya'a hasta ga rzulao yu nebaba Ilírico. ²⁰ Cana' bia', bia' bala, uya'a yedyi ga binenezijë' chi zu Cristo udixogui'ajë' xti'idza' Diuzi. Cana' bia' cuenda tza'a yedyi tula ga nunu netzio tzetixogue' xti'idza' Diuzi. ²¹ Pero mejorla hua' seguir con cabë' rnan lë'ë guichi la'iya quie Diuzi cani:

Huanezi yaca ben' binenezi quienë'.

Huayõe'e yaca ben' binetzioñe'e quienë'.

Bë Pablo pensari tzioguë' ciudad Roma

²² Quie lena' biuzaque'da' guida' idena'a le'e como dan' bibënan lato la'acazi gu'unda' guida'. ²³ Pero como abeyudyi compromiso napa' conlë yaca yedyi ga baodia', lëscan' como bazio zë iza raca' pensari guida' ideyuba' le'e, ²⁴ quie lena', caora tza'a nación España, cana' re'enda' tia' ciudad quiele. Na' rapa' gusto yega'na' sulia' le'e ga'aca tu ta gunnan lato. Yeyudyi na', chi huele cule, gacalë në'ëdi' tzu'a neza tatula tza'a España. ²⁵ Pero na'a raoyen yeya'a ciudad Jerusalén tzehua'a lë'ëti' dumi ta gacalën yaca ben' bichiro, ben' nao xneza Jesús nita' na'. ²⁶ Cana' re'ennan hua', como dan' yaca ben' nao xneza Jesús nita' yu nebaba Macedonia, len yaca ben' nao xneza Jesús nita' yedyi Acaya, bauptapajë' dumi ta ise'ela'yaquë'n quie ben' yëchi', ben' nao xneza Jesús nita' ciudad Jerusalén. ²⁷ Redaohue ben' ptupa dumi como neziyaquë' nacan tahuen gacalëjë' laguedyijë', ben' nao xneza Jesús. Na'ra

yu'un xnezi ta ruejè', porque rueyaquè' ta reya'ala' hueyaquè' quie ben' nita' ciudad Jerusalén. Cana' nacan, como dan' lao na'a ben' nita' ciudad Jerusalén barue quieyaquè' xti'idza' Diuzi barnaoyaquè' xneza Cristo. Na'ra lèjè' sí, reya'ala' gacalèjè' ben' nita' ciudad Jerusalén con ta de quieyaquè'. ²⁸ Caora abeyudyi yehua'a dumi laoy yaca ben' nao xneza Cristo nita' ciudad Jerusalén, na'ra tza'a España tia' ideyuba' le'e. ²⁹ Nacan tali tuže huela'iya Cristo ra'o caora idyina' yedyi quiele.

³⁰ Bicha', re'enda' gacalèle nē'ēdi'. Re' enda' huero tuže huero ca re'en Diuzi huero du guicho du la'adyi'ro. Chi huele cule, ulidzale Diuzi por nē'ēdi'. Laohue xa'nro Jesucristo rnaba' le'e ulidzale Diuzi por nē'ēdi'. Lēscan' como dan' nadyè'èle nē'ēdi' cabè' bzioñe'e Bichi Be quie Diuzi le'e, rnaba' le'e ulidzale Diuzi por nē'ēdi'. ³¹ Ulidzale Diuzi ta ucuasa ucui'onè' nē'ēdi' quie tamala re'en hue yaca ben' nita' estado Judea quia', ben' binao xneza Cristo. Lēscan' ulidzale Diuzi para yaca ben' nita' ciudad Jerusalén, ben' nao xneza Cristo, ta si'yaquè' nē'ēdi' dyè'ēdi gacalia'yaquè'. ³² Cana' rnaba' le'e ulidzale Diuzi por nē'ēdi' cuenda idyina' dyè'ēdi idena'a le'e sua' contento yezila'adya' tu chi'. ³³ Rulidza' Diuzi, ben' cuèchi chizi laxta'oro, ta ina' ihuianè' yugulule. Amén.

16

Rugapa Pablo diuzi yaca ben' nao xneza Jesús

¹ Redaohueda' idyin ben' zanro Febe yedyi quiele. Taze racalènè' ben' nao xneza Cristo nita' yedyi Cencrea. ² Si'le lèbè' dyè'ēdi ca rue ben' nao xneza Cristo. Gacalènè' tu ta rdzioguenè', porque ben' zè bagucalènè'. Lēscan' bagucalènè' nē'ēdi'.

³ Ugapale diuzi Priscila len Aquilo. Nacayaquè' ben' compañero quia'. Aracalèyaquè' nē'ēdi' ruendo' dyin quie Cristo Jesús. ⁴ Bibdzebiyaquè' gatiyaquè' gucalèjè' nē'ēdi' caora aruen žudyi guti yaca benè' nē'ēdi'. Quie lena' inia' diuxcaleyaquè' gucalèjè' nē'ēdi'. Pero cala tuza' nē'ēdi' inia' diuxcaleyaquè', lēscan' yugulu ben' nao xneza Cristo, ben' binaca ben' Israel, inajè' diuxcaleyaquè'. ⁵ Ugapale diuzi yaca ben' bichiro, ben' regu'udi' žan yu'u quie Priscila len Aquilo. Lēscan' ugapale diuzi Epeneto, ben' naca amigo quia'. Lèbè' naquè' ben' nēro, ben' unao xneza Cristo entre yaca ben' nita' yu nebaba Acaya. ⁶ Ugapale diuzi María, ben' ruelèle dyin quie Diuzi tuže. ⁷ Ugapale diuze ben' yedyi quia' Andrónico, len Junias, ben' uya'lia' dyiguiba tuže. Anezi yaca apóstol nacayaquè' ben' huen gula. Tu binenaohua' xneza Cristo, barnaoyaquè' xneza Cristo.

⁸ Ugapale diuzi Amplias, ben' naca amigo quia', ben' naorè xneza Cristo. ⁹ Ugapale diuzi Urbano, ben' naca compañero quiendo'. Aracalènè' nēto' ruendo' dyin quie Cristo Jesús. Lēscan' ugapale diuzi Estaquis, ben' naca amigo quia'. ¹⁰ Ugapale diuzi Apeles, ben' nao du guicho du la'adyi' xneza Cristo. Lēscan' ugapale diuzi yaca ben' naca familia quie Aristóbulo. ¹¹ Ugapale diuzi Herodión, ben' naca ben' yedyi quia'. Lēscan' ugapale diuzi yaca ben' naca familia quie Narciso, con nuyaquè' naoyaquè' xneza Cristo. ¹² Ugapale diuzi Trifena len Trifosa. Nacajè' ben' rue dyin quie Cristo. Lēscan' ugapale diuzi Pérsida, ben' naca ben' zanro tanun quie barnaorènè' xneza Cristo. Taze bazioguè' naohuè' ruenè' dyin quie Cristo. ¹³ Ugapale diuzi Rufo, ben' rue quie xti'idza' Cristo dyè'ēdi. Lēscan' ugapale diuzi žna'nè' como rlè'ènè' nē'ēdi' ca ži'inè'. ¹⁴ Ugapale diuzi Asíncrito, len Flegonte, len Hermes, len Patrobas, len Hermas, len yaca los demás ben' bichiro, ben' nao xneza Jesús,

ben' regu'udi' len leyaquë' na'. ¹⁵ Lëscan' ugapale diuzi Filólogo len Julia. Ugapale diuzi Nereo len bi' zannë'. Lëscan' ugapale diuzi Olimpás len yaca los demás ben' bichiro, ben' nao xneza Cristo, ben' regu'udi' len leyaquë' na'.

¹⁶ Quëdyile laguedyile dyë'ëdi. Gaole xagajë' tu psitu, na' yëbileyaquë' padiux. Yaca los demás ben' nao xneza Jesús, ben' nita' yedyi tula, rugapajë' le'e diuzi.

¹⁷ Na'ra inia' le'e itu di'idza', bicha'. Gapale cuidado ina'le dyë'ëdi nu ben' hue le'e chopa tzona cue', ben' udze' le'e neza tula ta binaca quie Diuzi. Bihuelële leyaquë' tuze, ¹⁸ como dan' cala mandado quie xa'nro Jesucristo ruejë', dechan' ta racazi la'adyi'jë' ruejë' cana'. Rdalëyaquë' di'idza' huizi' yë' quieyaquë' huejë' gan ben' binenezi cabë' nacayaquë'. ¹⁹ Anezi yaca benë' cabë' naca le'e, barnaole xneza Cristo. Quie lena' zua' gusto, re'enda' huele seguir huele puro tadya'a, bihuele ni tu tamala. ²⁰ Ilë'ëti'zi idyin dza quizo Diuzi tu castigo huala gula quie xan' taxi'ibi' Satanás. Bira huelënan le'e. Naca Diuzi ben' cuëchi chizi guicho laxta'oro. Rulidza' xa'nro Jesucristo huela'iyane' le'e. ²¹ Na' Timoteo, ben' ruelë në'ëdi' dyin quie Diuzi tuze, rugapanë' le'e diuzi. Lëscan' rugapa ben' yedyi quia' Lucio, lënë' Jasón, lënë' Sosipater le'e diuzi.

²² Lëscan' në'ëdi', Tercio, ben' bzu di'idza' lë'ë guichi niga, rugapa' le'e diuzi laohue Cristo.

²³ Lëscan' Gayo, ben' zua' zan yu'u quie, ben' run posada yuguluro ben' nao xneza Cristo, len Erasto, ben' naca tesorero quie yedyi ni, rugapanë' le'e diuzi. Lëscan' rugapa ben' bichiro Cuarto le'e diuzi.

²⁴ Rulidza' xa'nro Jesucristo huela'iyane' yugulule. Amén.

Ga iyudyi carta ni rapa Pablo bala'ana Diuzi

²⁵ Lëscan' rulidza' Diuzi ta gacalënë' le'e ta biidzebile inaole xneza Cristo gata' quiele yela' neban tuzioli con cabë' rna xti'idza' Diuzi. Cana' baodixogui'a le'e de acuerdo con cabë' una cuin Cristo. Cana' bë Diuzi pensari huenë' dza na'te, dza binesi' laze cue' yedyi layu. Pero baquezi biuna Diuzi ca huenë' quiele. ²⁶ Ulezë' hasta hora, na'tera barnezan quie pensari bë Diuzi dza na'te. Barnezan por nun quie di'idza' la'iya bzu ben' unita' dza na' lë'ë guichi, ben' udixogue' xti'idza' Diuzi. Na'ra babë Diuzi mandado inezi yugulu ben' nita' lao yedyi layu con cabë' rna di'idza' la'iya quienë' cuenda na' hue quieyaquë' di'idza' quienë'. Tuzioli zu Diuzi.

²⁷ Tuzi Diuzi zu. Tuzi lëbë' naquë' ben' rioñe'e. Tuzioli reya'ala' gaparo Diuzi bala'ana laohue zi'inë' Jesucristo. Amén.

GUICHI NĒRO BĒ SAN PABLO APÓSTOL USE'ELA'NĒ'N LAO CIUDAD CORINTO

Guichi ni use'ela' Pablo lao yaca ben' quie Jesús, yaca ben' nita' ciudad Corinto

¹ Nē'ēdi', Pablo, naca' ben' bdē' Diuzi. Según ca re'ennē' bdē'nē' nē'ēdi' ta tza' tzetixogui'a benē' xti'idza' Jesucristo. Nē'ēdi'lia' ben' bichiro Sóstenes ² bēndo' guichi ni pse'ela'ndo'n lao le'e, ben' quie Diuzi, ben' nita' ciudad Corinto. Le'e nacale ben' banue Cristo Jesús tuže. Ulio Diuzi le'e ta gacale ben' la'ia quiēnē'. Bē Diuzi nombrar le'e ben' quiēnē' lente nuti'tezi ben' rulidza Señor quiero Jesucristo. Naca Jesucristo Señor quiero lente Señor quieyaquē'. ³ Rulidza' Xuziro Diuzi lēnē' Señor quiero Jesucristo ta huela'iaquē' le'e, cuēchiyaquē' chizi lu'u guicho laxta'ole.

Ni rguixogue'n cabē' hue Cristo huela'ianē' ra'o

⁴ Rēbica' Diuzi diuxcalelo' ca naca quiele babēla'ianē' le'e tanun quie Cristo Jesús. ⁵ Dan' banacale tzaže lēle Cristo, lēlena' bē Diuzi tahuen gula quiele, racalēnē' le'e ta quixogue'le benē' xti'idza'nē' dyē'ēdi, lēscan' racalēnē' le'e ta tzioñe'eralē mazara quiēnē'. ⁶ Cana' baguca quiele bega'n xti'idza' Cristo lu'u guicho laxta'ole, banezile naca xti'idzē' di'idza' li. ⁷ Lēlena' bibi idzioguele huela'ia Diuzi le'e tu raca rbezale dza yeguida Señor quiero Jesucristo. ⁸ Huacalēnē' le'e inaole tuzi xnezē' hasta yeyudyi yedu quie lao yedyi layu tacuenda ni tu nunu bisaque' gaojē' le'e xquia dza cati yeguida Señor quiero Jesucristo. ⁹ Huazucazi Diuzi di'idza' quiēnē' cabē' unanē' huenē'. Lēbē' uliogué' le'e ta sēlēle tuže len zi'inē' Jesucristo, ben' naca Señor quiero.

Ni nan cabē' guca bro chopa tzona cue' entre yaca ben' quie Jesús

¹⁰ Bicha', rzēto'ga' lao Señor quiero Jesucristo, rnēyēcha' laole ta tzu'ule de acuerdo, bigacale chopa tzona cue'. Bitilalēle laguedyile. Huele tuzi pensari cabē' inēle yugulule. ¹¹ Cana' rnia' le'e, bicha', como dan' por nun quie yaca ben' familia quie Cloé nezda' de tazēdi quiele lēle laguedyile. ¹² Quie lena' nezda' balale rñale: "Naca' ben' quie Pablo." Na' ibalale rñale: "Naca' ben' quie Apolos." Na' ibalale rñale: "Naca' ben' quie Pedro." Na' ibalale rñale: "Naca' ben' quie Cristo." ¹³ Pero rñaba' le'e ¿guca Cristo zē cue'? ¿Raquēle nē'ēdi' gutia' lē'ē yaga cruzo por le'e? Lēzi rnabaria': ¿Laohua' nē'ēdi' bzētoyaquē' caora bē'yaquē' laole? ¹⁴ Diuxcale Diuzi nitule bibi'a laole. Tuzi Crispo len Gayo, lēziyaquē' bi'a laoyaquē'. ¹⁵ Pues nitu nitule bireya'ala' inale bzētojē' laohua' caora bē'yaquē' laole. ¹⁶ Ta rezala'adya' bi'a lao yaca ben' familia quie Estéfanas. Bira rezala'adya' nurla bi'a laohue. ¹⁷ Lēla ta hua' lao yaca benē' use'ela' Cristo nē'ēdi', den' ta quixogui'ayaquē' xti'idza'nē' tacuenda gata' yela' neban quieyaquē' tuzioli. Rguixogui'a benē' di'idza' yalo, di'idza' ta tzioñe'eyaquē' tacuenda biten cana'zi quie Cristo dan' gutinē' lē'ē yaga cruzo.

Naca Cristo ben' yu'u yela' rioñe'e quie Diuzi

¹⁸ Yaca ben' nao neza yeyo lao gui' gabila, raquēyaquē' di'idza' tondo, di'idza' rguixogue'ro cabē' guca quie Cristo gutinē' lē'ē yaga cruzo. Pero yaca ben' nao neza yeyo ga zu Diuzi guibá, nezijē' di'idza' na' rguixogue'n quie yela' huaca quie Diuzi. ¹⁹ Cana' rnēn lē'ē guichi la'ia quie Diuzi cani:

Udyiaguí' Diuzi yela' rioñe'e quie yaca ben' na rioñe'eyaqué', den' quie Diuzi na' birioñe'eyaqué'.

Uca'n Diuzi tzala'la yela' nezi quie yaca ben' na neziyaqué', den' bineziyaqué' chi zu Diuzi.

²⁰ Tana' rnia' le'e, ¿ga yeyudyi yedu quie yela' rioñe'e quie yaca ben' na rioñe'eyaqué', quie yaca ben' naca maestro, quie yaca ben' yu'u rnê? Lao na'a Diuzi abetza' yela' rioñe'e quie yaca ben' nita' lao yedyi layu, abeyacan di'idza' tondo. ²¹ Diuzi, ben' nezi yugulute, bënê' de que bisaque' huebê' yaca ben' nita' lao yedyi layu lëbê' conlê pensari quieziyaqué'. 'Quie lena' redaohue Diuzi hue'nê' yela' naban tuzioli yaca ben' rzudyi'ilê lëbê', yaca ben' rue quie xti'idza'nê'. Pero yaca ben' birue quie xti'idza'nê', rnayaqué' di'idza' tondo di'idza' quienê'.

²² Yaca ben' Israel, re'enjê' ilê'ejê' hue Diuzi yela' milagro quienê'. Yaca ben' griego, re'enjê' yejê' puro di'idza' quie yaca ben' na rioñe'e, yaca ben' nezi biraca lao yedyi layu. ²³ Pero ra'o rguixogue'ro quie Cristo, ben' guti lë'ê yaga cruzo. Tana' lena' rdza' yaca ben' Israel ra'o, lëscan' rna yaca ben' binaca ben' Israel di'idza' tondo rguixogue'ro. ²⁴ Pero para yaca ben' ulio Diuzi, la'achi ben' Israel, la'achi ben' binaca ben' Israel, naca Cristo ben' rue yela' huaca, ben' yu'u yela' rioñe'e quie Diuzi. ²⁵ Derla yela' rioñe'e quie Diuzi, cala ca ta rioñe'e quie yaca benê'. Lëscan' derla yela' huaca quienê', cala ca ta rue yaca benê'. ²⁶ Lëzi le'e bicha', reya'ala' tzu'ule pensari con cabê' bê Diuzi ulionê' le'e ba'ala'cazi tu chopazile nacale ben' rioñe'e con cabê' rioñe'e yaca ben' nita' lao yedyi layu, ba'ala'cazi tu chopazile nacale ben' rnabê', ben' familia belao. ²⁷ Cani bê Diuzi, lao laza ben' na rioñe'e bi raca lao yedyi layu, ulio Diuzi le'e ta gata' yela' stu' quieyaqué' como rnayaqué' binacale ben' rioñe'e. Lëscan' lao laza ben' belao lao yedyi layu, ulio Diuzi le'e ta gata' yela' stu' quieyaqué' como rnayaqué' binacale ben' belao. ²⁸ Cana' bê Diuzi ulioguê' yaca ben' binaca ben' belao, yaca ben' ca guicho ca lao, tachuenda inezi ben' rue belao lao yedyi layu de que birlê'ê Diuzi leyaqué' ben' belao. ²⁹ Quie lena' nitu nitu nunu saque' hue ze cuine lao Diuzi. ³⁰ Lao na'a cuin Diuzi nacalêle Cristo tuze. Lëscan' lao na'a Diuzi naca Cristo yela' rioñe'e quiele. Lëscan' por nun quie Cristo babezi Diuzi dula' xquia quiele, banacale ben' la'iya quienê', bapte psela Diuzi le'e. ³¹ Lë'ê guichi la'iya quie Diuzi rnên cani: Bihuero cuinro ben' ze, huero Cristo ben' ze.

2

Udixogue' Pablo xti'idza' Cristo, ben' guti lë'ê yaga cruzo

¹ Le'e, bicha', cati bida' bedenia' le'e di'idza' quie Diuzi, unia' le'e tu ta binetzioñe'ele quie pensari quienê', pero biunia' le'e di'idza' zëdi. ² Caora cati uzulia' le'e dza na', unia' le'e quie Cristo, ben' guti lë'ê yaga cruzo. Lëzin unia' le'e, biunia' le'e birla tatula. ³ Caora uzulia' le'e dza na', du rëza' du rdzëba', unia' le'e xti'idza' Diuzi. ⁴ Cati unia' le'e dza na', di'idza' quie Diuzi unia'. Biunia' le'e di'idza' con cabê' rnê ben' uyo escuela zë iza tachuenda cana'zi hua' gan galele quia', pero bia' gan gulele por nun quie gualê Bichi Be quie Diuzi nê'edi', bê Diuzi yela' huaca quienê'. ⁵ Cana' bia' quiele tachuenda galele por nun quie yela' huaca quie Diuzi, cala por nun quie pensari yu'u yaca ben' nita' lao yedyi layu.

Diuzi ruzioñe'enê' ra'o lao na'a Bichi Be quienê'

⁶ Pero yaca ben' banao xti'idza' Diuzi dyê'edi, ra'o sí, conlê pensari quie Diuzi rguixogue'ro benê' xti'idza' Diuzi. Birguixogue'rojê' conlê pensari yu'u yaca ben' nita' lao yedyi layu, ni quele conlê pensari yu'u yaca ben'

rnabè' quieyaquè'. Hueyudyi huedu pensari quiejè', bira bide hueyaquè'.
 7 Pero di'idza' rguixogue'rojè' nacan pensari quie Diuzi, nacan pensari cubi ta binuero ta zabzioñe'enè' ra'o cabè' psaque'nè' huenè' tadya'a gula quiero caora na' tu binecuer' lao yedyi layu. 8 Pero yaca ben' rnabè', yaca ben' nita' lao yedyi layu, birioñe'eyaquè' ca naca pensari quie Diuzi. Chan' uyoñe'eyaquè' pensari quie Diuzi, bibda'yaquè' ben' naca Señor quiero lè'è yaga cruzo. 9 Pero, como rnan lè'è guichi la'ya quie Diuzi cani: Bapcueza Diuzi tadya'a gula quie ra'o, ben' nedyè'è lèbè'. Ca ta pcuezanè' quie ra'o, quiero, nacan ta binelè'èro, nacan ta bineyero, nacan ta binuero pensari.

Cana' rnèn lè'è guichi la'ya quie Diuzi. 10 Lena' abzioñe'e Diuzi ra'o lao na'a Bichi Be quienè'. Rioñe'e Bichi Be quie Diuzi yugulute, rioñe'enè' yugulu pensari quie Diuzi.

11 ¿Nuži nezi ca naca pensari yu'u lu'u laxta'o benè'? Biži bichi be yu'uyaquè', tuzi lena' nezin ca naca pensari racayaquè'. Lèscana' ca naca pensari raca Diuzi, tuzi Bichi Be quienè' anezirènè' can' gaca. 12 Bira yu'uro pensari ca pensari yu'u yaca ben' nita' lao yedyi layu. Yu'ucazi Bichi Be quie Diuzi lu'u laxta'oro ta tzioñe'ero ca naca tadya'a gula pcuezè' quiero. 13 Ra'o rnèro según ca naca pensari bdze' Bichi Be quie Diuzi lu'u guichoro laxta'oro, cala según ca naca pensarizi quiero. Cana' ruxi'idze'ro yaca ben' yu'u pensari quie Diuzi ca naca pensari quie Diuzi yu'ujè'.

14 Yaca ben' biyu'u Bichi Be quie Diuzi, rsebi'yaquè' con cabè' rna Bichi Be quie Diuzi. Nayaquè' di'idza' tondo na'. Birioñe'eyaquè'n dan' ruen zi tzu'uyaquè' Bichi Be quie Diuzi ta tzioñe'eyaquè'n. 15 Nu ben' yu'u Bichi Be quie Diuzi, huayoñe'eyaquè' ca naca pensari quie Diuzi. Pero nu ben' biyu'u Bichi Be quie Diuzi, bitzioñe'eyaquè' ca naca pensari quie yaca ben' yu'u Bichi Be quie Diuzi. 16 Con ca rna lè'è guichi la'ya quie Diuzi cani: “¿Nužira te tzioñe'e yugu ca naca pensari quie Diuzi? Tanto naquè' ben' rioñe'e, nitu nitu nunu gaca uxi'idze' lèbè'.” Cana' rnèn lè'è guichi la'ya quie Diuzi. Pero ra'o baoyu'uro pensari quie Cristo.

3

Pablo len Apolos, tzaže rueyaquè' dyin quie Diuzi

1 Na'ra, bicha', bisaque' inia' le'e di'idza' ca ben' rue quie cabè' re'en Bichi Be quie Diuzi gaca, pero rnanan inia' le'e ca ben' nenaole nerue ca pensari yu'u yaca ben' nita' lao yedyi layu. Nacale ca quie xcuidi' como dan' binerioñe'ele dyè'èdi quie Cristo. 2 Psèdia' le'e di'idza' yalozi dza na'la. Bipsèdia' le'e di'idza' zèdi como dan' biyulaole tzioñe'ele di'idza' zèdi. Quie lena' naca quiele ca quie tu xcuidi' nera'adyi'. Puro nidyi' ra'adyi'bi' como dan' binegacabi' gaobi' yèta. Ca naca quie xcuidi' binegaca gao yèta, lèscan' nacaré quiele, binetzulaole tzioñe'ele pensari zèdi ca ta rnia' le'e. Bigucale tzioñe'ele dyè'èdi dza na'la, lèscan' hasta na'a birioñe'ele dyè'èdi. 3 Nenaole neruele ca pensari yu'u yaca ben' nita' lao yedyi layu, cana' racažè'le laguedyle. Neruele chopara' di'idza', cana' rbiole cuinle zè cue'. Lena' rnia' le'e como dan' neruele ca pensari yu'u yaca los demás ben' nita' lao yedyi layu. 4 Rnia' le'e can', como dan' balale rnale: “Naca' ben' quie Pablo.” Na' ibalale rnale: “Naca' ben' quie Apolos.” Dan' ruele cana', lena' rnia' le'e nenaole neruele ca pensari yu'u yaca los demás ben' nita' lao yedyi layu.

5 Rnaba' le'e: ¿Nuži Pablo? ¿Nuži Apolos? Nacando' ben' quie Diuzi ruendo' cabè' mandado ruenè'. Ta una Diuzi nètò' bëndò' udxogüe'ndo' le'e di'idza' quienè' ta gulele. Quie quiendo' bzundo' di'idza' según cabè' bè' Diuzi laze huendo'. 6 Nè'èdi' guza' bini. Na' Apolos bdze'bi'n nisa, pero Diuzi gualènè'n

ta uyežin. ⁷ Tana' lena' rnìa' le'e, binaca ben' guza bini len ben' bdze' nisa ben' ze. Tuzi Diuzi naquë' ben' ze ta gualënë'n ta uyežin. ⁸ Ca quie ben' guza bini, ca quie ben' bdze' nisa, tuzi naca dyin bëyaquë'. Huaguižucazi Diuzi quie quieyaquë' ca naca dyin na' bëyaquë'. ⁹ Nê'ëdi'lia' Apolos nacando' tuže ruendo' cabë' mandado rue Diuzi.

Na'ra bizi le'e nacale ca quie layela ga raza Diuzi. Lëscan' nacale ca quie tu yu'u ta ruenë'. ¹⁰ Nê'ëdi' naca' ca quie ben' rucua'. Bde' Diuzi nê'ëdi' ta ucua'a ga sulao besu. Bizi ben' tula ucua'në' besu. Reya'ala' gapajë' cuidado cabë' huejë' ucua'jën. ¹¹ Tuzi Jesucristo naquë' ca quie ga rzulao rcua'ro. Ganura nunu zu naca quie ca quie ga rzulao rcua'ro. ¹² Huazaque' huero tu dyin dya'a ucua'ro con oro, o conlë plata, o conlë yo zaca'n za'ala'. Lëzi huazaque' huero tu dyin bibi zaca'n ucua'ro con yaga, o conlë la'aga' bidyi, o conlë guiži cabë' re'enro gacan. ¹³ Pero dza gaca juicio, caora na' de yezacalao ca naca dyin bëro tu turo. Lëdza na' udze' Diuzi lagui' ta ulu'en bi naque dyin bëro tu turo, chi uyeinan, chi biuyeinan. ¹⁴ Nu ben' bë dyin biuyei, hue'cazi Diuzi quie dyin na' bëyaquë'. ¹⁵ Pero nu ben' bë dyin uyei, bibi de hue' Diuzi quie dyin na' bëyaquë', huabiagui' dyin quieyaquë'. Cuinyaquë' bicuiagui'yaquë', pero canezi telayaquë' bitzeiyaquë'.

¹⁶ ¿Bizi binezile nacaro ra'o idao' quie Diuzi? ¿Binezile baoyu'u Bichi Be quie Diuzi lu'u guicho laxta'oro? ¹⁷ Udyiagui' Diuzi nu yaca ben' udyiagui' idao' quienë', como dan' naca la'ia idao' quienë'. Na'ra ra'o nacaro idao' quie Diuzi.

¹⁸ Bitzioguele yë'. Chi raquele nacale ben' rioñe'era, pero pensari quiezile raquele, cala pensari quie Diuzi, na' ulesan pensari quiele tacuenda uzioñe'e Diuzi le'e, tzu'ule pensari quienë'. ¹⁹ Rlë'ë Diuzi pensari tondo ca pensari yu'u yaca ben' nita' lao yedyi layu. Lena' rnën lë'ë guichi la'ia quie Diuzi cani: "Conlë di'idza' rero lu'u ru'a ben' rioñe'e, hualu'e Diuzi di'idza' tondo nayaquë'." ²⁰ Lëzirë rnën lë'ë guichi la'ia quie Diuzi cani: "Anezi Diuzi naca pensari quie ben' rioñe'e pensari tondo." Cana' rnën lë'ë guichi la'ia quie Diuzi. ²¹ Quie lena', bireya'ala' huele cuinle ben' ze por nun quie ruele taže tu cue' ben' quiele inaoles leyaquë'. Rnìa' le'e, yugulute banaca quiele, ²² la'achi nê'ëdi', la'achi Apolos, la'achi Pedro, la'achi yedyi layu, la'achi yela' naban, la'achi yela' guti, la'achi na'a, la'achi uxe, yuguten banaca quiele. ²³ Nacale cuenda quie Cristo, na' naca Cristo cuenda quie Diuzi.

4

Ni rguixogue'n con cabë' bë yaca apóstol

¹ Reya'ala' ilë'ële nêto' ca ben' rue mandado quie Cristo. Nudë'në' nêto' naca ladyina'ando' ta usëdindo' benë' di'idza' quie Diuzi, di'idza' ta bineyëjë'. ² Na'ra nu ben' naca ladyinë'ë, reya'ala' ulu'eguë' naquë' ben' zudyi'ilë laguedyi. ³ Pero nê'ëdi' birdëbida' la'achi ichugubë'le quia' cabë' rua', rua' mandado quie Diuzi. Lëscan' birdëbida' la'achi ichugubë' yaca ben' rnabë' nê'ëdi'. Ni siquiera birchugubi'a cuina'. ⁴ Ca naca pensari quia', biraona nê'ëdi' xquia. Pero chi napa' dula', huachugubë' Diuzi nê'ëdi'. ⁵ Pero le'e, biichugubë'le quie benë' chi binedyin hora. Cuezale yeguida Diuzi yebioguë' yugulu ta negachi'. Caora na' ulu'e Diuzi bi naca pensari yu'u lu'u guicho laxta'o benë', na' huenë' leyaquë' ben' ze según chi bëjë' tahuen, o chi bëjë' tamala.

⁶ Bicha', ca ta rnìa' le'e, nacan ta gacalën le'e. Lena' rnìa' le'e tu di'idza' cabë' rue Apolos len nê'ëdi'. Reya'ala' huele ca ruendo' nêto'. Reya'ala' inaoles usëdile dyë'ëdi con cabë' rna lë'ë guichi la'ia quie Diuzi. Bihuele zë cue'.

Biuxa'ale laguedyile rnale tuzi tu cue' ben' quiele nacale ben' huen. ⁷ ¿Nuži bē le'e ben' huenra ca los demás? ¿Cala Diuzi bēnnē' yugulu ta de quiele? Chi Diuzi babēnnē' yugulu ta de quiele, ¿bixquien' racale pensari ta bēzile cuinzile de quiele?

⁸ Baruele le'e ca rue ben' uña'a. Raquiele bade yugulute quiele, bira rdzioguele. Ruele cuinle ca yaca rey. Na' biži nēto' apsanla'adyi'le nēto'. Biži chan' tali nacale rey, huendo' le'e tuze, inabē'lēndo' le'e. ⁹ Parece bē Diuzi nēto' yenaondo' ca quie ben' de dula' xquia quie, ben' reya'ala' gati. Pues hasta reban yaca laguedyindo' nēto', reban yaca ángel nēto', reban yaca los demás benē' nēto'. Cana' raca quiendo'. ¹⁰ Rlē'ē yaca benē' nēto' ben' tondo, dan' redzagalaondo' rguixogue'ndo' di'idza' quie Cristo. Na' biži le'e rlē'ēle cuinle ben' rioñe'era, ben' naora xneza Cristo. Pero rlē'ēle nēto' ben' bibi zaca'. Na' biži le'e rlē'ēle cuinle ben' zaca'. Rapala'n yaca benē' le'e, na' biži nēto' birapala'nyaquē' nēto'. ¹¹ Lente na'a rsacazi'ndo' ta gaondo' len ta yo'ondo' lente žabando' ta gaondo'. Na' biži yaca benē' rueyaquē' nēto' bizinaquezi. Bisu lidyindo'. ¹² Rexaquendo' ruendo' dyin lēndo' na'ando'. Na' biži yaca benē' rutasi runioyaquē' nēto'. Pero bigacando'jē' lēbi, rulidzando'jē' di'idza' gaxo gula. Rzuendo' cati rueyaquē' nēto' bizinaquezi. ¹³ Biži rudyiala'adyi'yaquē' nēto', pero rnēlēcazindo'jē' di'idza' žela'adyi'. Ca rlē'ējē' tu bēbi ta de lao yedyi layu, cana' rlē'ējē' nēto'. Hasta na'a rlē'ējē' nēto' cana'.

¹⁴ Bihua' guichi ni ta yedue'lēlen. Tu ta hua' gunna' le'e tu consejo como dan' nacale ca quie ži'ina', ben' nedyē'ēda'. ¹⁵ Ba'ala'cazi na'a nita' zē ben' usēdi le'e, ben' rnē quie Cristo, biguca zē ben' apsēdi le'e tanēro. Naca' tuza' nē'ēdi' ca quie xuzile nun quie naca ben' nēro uidxogui'a le'e xti'idza' Diuzi, uyu'ule xneza Cristo gulele quienē', pte pselanē' le'e. ¹⁶ Lena' rnia' le'e, huele con cabē' ruecaza' nē'ēdi'.

¹⁷ Tana' lena' ise'ela' Timoteo laole. Naquē' ben' nedyē'ētzegueda'. Raqueda'nē' ca ži'ina', ben' rue quie xti'idza' Diuzi. Usala'adyi'nē' le'e huele con cabē' rua' como ca naca' ben' quie Cristo. Lēlena' rusēdia' yaca benē' nao xneza Cristo con ga baoya'a. ¹⁸ Pero ca naca bala le'e, aozulaole huele cuinle ben' že dan' racale pensari biguida' idena'a le'e. ¹⁹ Pero chi Diuzi gunnē' lato idena'a le'e, laguidategaza'. Lēcana' guida' idena'a yaca ben' na' ta ilē'ēda' chi tali uzuyaquē' di'idza' o chi bē' rnaziyaquē'. ²⁰ Porque chi galero quie yela' rnabē' quie Diuzi, bireya'ala' galero de di'idza'zi, den' reya'ala' galero du guicho du la'adyi'ro hue quiero xti'idza'nē'. ²¹ ¿Cabizi re'enle ta hua' quiele bē' guida'? ¿Re'enle hua' le'e castigo, o re'enle huelia' le'e di'idza' yun', di'idza' žela'adyi'?

5

Gayezacalao Pablo quie ben' rue tamedian

¹ Banezile zu tu ben' ladole anuenē' lažna'zinē' žgulanē'. Lena' nacan median gula quienē', bēnē' ca ta bireya'ala' huenē'. Ni yaca ben' binezi chi zu Diuzi, birueyaquē' cabē' bē ben' na'. ² ¿Bixquien' raca quiele uxa'ale quie ben' bē cana'? ¿Reya'ala' gaquiele bayēchi' quie ben' bē can'! Reya'ala' yebiolenē' ladole, dan' baoquixinē' bēnē' can'. ³ Ba'ala'cazi bisaquē' sulia' le'e, gaca quiele como ca zulia' le'e conlē pensari quia'. Quie lena' rzētoga' lao Señor quiero Jesucristo baochugubi'a quie ben' bē cana'. ⁴ Cati yegu'udi'le huazulēcaza' le'e la'acazi pensari quieza'. Lēscan' huazulē yela' huaca quie Señor quiero Jesús le'e. ⁵ Reya'ala' yebirole ladole ben' bē cana'. Reya'ala' usanla'adyi'lenē' gaque quie xan' taxi'ibi' lēnē' tacuenda yedzagalaonē' can'

bënë'. Cana' huele quienë' tacuenda gaca yezi' Señor quiero Jesucristo bichi be quienë' dza cati yeguidë' tatula lao yedyi layu.

⁶ Bireya'ala' uxa'ale quie ben' bē tamala. ¿Bizi binezile con ca naca di'idza' rnēn lē'ē guichi: "Con lē'ēti'dao' levadura rēzin dužete yezo yēta xtila ta rēzin racan taze"? ⁷ Ca rue levadura, cana' ruerē tamedian. Tana' reya'ala' yebiole ladole ben' bē tamedian ta biuxinunē' yaca ben' naca laguedyiro. Tana' lena' huaca quiele ca quie yezo yēta xtila bitzu'u levadura. Nacale ben' laxta'o yēri como dan' aodizu Cristo dula' xquia quiele. Ca bē ben' Israel dza na'la, bētiyaquē' beco' zi'ila' ta rueyaquē' lani pascua, cana' nacarē quie Cristo, gutiguē' lē'ē yaga cruzo por ra'o. ⁸ Tana' lēlena' reya'ala' inaoro xnezē' du guicho du la'adyi'ro. Chi naoro xnezē' du guicho du la'adyi'ro, naca quiero ca quie yēta xtila biyu'u levadura. Chi biinaoro xnezē' du guicho du la'adyi'ro, naca quiero ca quie yēta xtila yu'u levadura.

⁹ Lē'ē guichi tula ta bia' dza na'la, unia' le'e quie ben' rdalē nigula binaca zgulē'. Unia' le'e bireya'ala' huele lato sunē' ladole dan' ruenē' tamedian.

¹⁰ Pero biunia' le'e ta bira huelēle tuze yugulu ben' rda lao yedyi layu, la'achi ben' rdalē nigula binaca zgulē', la'achi ben' rza'la'adyi'tzegue dumi, la'achi ben' uban, la'achi ben' rionla'adyi' nu yo o nu yaga. Pues ta bira huelēle tuze yugulu ben' rda lao yedyi layu, re'ennan zizeza'le lao yedyi layu, pero bisaque'. ¹¹ Tuz cani rnia' le'e, bihuelēle tuze ben' na naquē' bichiro ben' nao xneza Jesús chi ruenē' ta rnazin quienë'. Gapale cuidado quie nu ben' na naquē' ben' quie Cristo, pero rdalēnē' nigula binaca zgulē', o chi rza'la'adyi'nē' dumi, o chi rionla'adyi'nē' nu yo o nu yaga, o chi rnēnē' di'idza' lē'ē, o chi ri'oguē' rbannē' quie benē'. Lēben' rue cana', nica gaolēlenē' tzaže. ¹²⁻¹³ Ca naca nē'ēdi', binacan ladyina'a ta ichugubē'a quie yaca ben' binao xneza Cristo. Nacan ladyina'a Diuzi ta ichugubē'nē' quiejē'. Pero le'e, reya'ala' ichugubē'le quie yaca ben' na naonē' xneza Jesús, ben' rda ladole, pero biruenē' tadya'a. Reya'ala' cuiole yaca ben' rue tamedian ladole, bisulēle lējē'.

6

Bireya'ala' gaoro laguedyiro ben' quie Jesús xquia lao juez, ben' binaca ben' quie Jesús laguedyile

¹ Chi le'e re'enle gaole xquia laguedyile ben' quie Jesús, ¿bixquien' reyažole ziole tzataole xquia lao juez, ben' binaca ben' quie Jesús? ¿Binezile reya'ala' tziole lao yaca ben' naca ben' quie Jesús ta gaole xquia laguedyile ben' quie Jesús? ² ¿Binezile yugulu ra'o, ben' quie Jesús, huachuguliro yaca ben' binaca ben' quie Jesús dza gaca juicio? Chan' le'e huachugulile yaca ben' binaca ben' quie Jesús, ¿bixquien' raquele bigacale ichugulile laguedyile ben' quie Jesús ta cuēchitza'ole tazēdidao' raca quiele? ³ ¿Lēzi binezile ra'o ichuguliro quie yaca āngel zu guibá? Na'ra chi gacale cuēchitza'ole tazēdi ta raca guibá, lēzi gacarēle cuēchitza'ole tazēdidao' ta raca lao yedyi layu. ⁴ Chi de tazēdidao' quiele dza rdale lao yedyi layu, ¿bixquien' ruele ladyina'a ben' binaca ben' quie Jesús ta cuēchitza'ohuē' tazēdidao' raca quiele? ⁵ Ta nacan' inia' le'e can' ta yedue'le. ¿Bixquien' raquele bizu tu ben' rioñe'e ladole ta cuēchitza'onē' tazēdidao' quiele rata' lado yaca laguedyiro, ben' quie Jesús? ⁶ Ni lē'ēti' birexada' ca ruele raole xquia laguedyiro, ben' quie Jesús, lao yaca juez, ben' binaca ben' quie Jesús.

⁷ Tali rnia' le'e, nacan mala gula tilalēle laguedyile, ben' quie Jesús. Nacalan dya'a usanle sule chizi chi nu bi rue quiele, chi baolanyaquē'

quiele. ⁸ Pero le'e, rsacale laguedyiro, ben' quie Jesús, bizinaquezi, na' rbanle quieyaquë'.

⁹⁻¹⁰ ¿Binezile yaca ben' rue con ganzi tamedian binacayaquë' cuenda lao na'a Diuzi? Lena' bitzioguele yë'. Nu ben' ru'abe rasilë nigula, len nu ben' rionla'adyi' nu yo o nu yaga, len nu ben' bazulë nigula quienë', pero rasilënë' nigula tula, len nu ben' reyasilë laguedyi byu, len nu ben' uban, len nu ben' rza'la'adyi' dumi, len nu ben' hue'e, len nu ben' rguitulë di'idza' bižu, len nu ben' rue trampa len laguedyi, leyaca ben' na', binacayaquë' cuenda lao na'a Diuzi. ¹¹ Lëscan' rnëria' quiele, cana' bërële le'e dza na'. Pero na'a banacale ben' laxta'o yëri lao Diuzi, banacale ben' la'iyia quienë'. Por nu'n quie Señor quiero Jesucristo len Bichi Be quie Diuzi uzi'ze Diuzi dula' xquia quiele.

Naca la'iyia cuerpo quiero

¹² Cani rna bala benë': "Ru'en lato ta huero con bitezi re'enro huero." Tabalacazi, pero cala yugulu ta re'enro huero nacan huen quiero huero. Tabala ru'en lato huero con bitezi re'enro huero, pero bihue'ro lato gacan xa'nro inabë'n ra'o. ¹³ Lëscan' tali ca rna benë': "Udixu Diuzi yela' huao ta gaoro. Lëscan' bzalo Diuzi budungo quiero ta tzu'un ta raoro." Pero huadyin dza hue Diuzi bira inaban gaoro. Cana' hue Diuzi yeyudyi quie yela' huao len quie budungo quiero. Cala bë Diuzi cuerpo quiero ta huero bizinaquezi talëro nigula. Nacacazi quie Cristo cuerpo quiero. Naca Cristo xa'n cuerpo quiero. ¹⁴ Con cabë' bë Diuzi besebannë' Señor quiero, lëscana' huerënë' yesebannë' ra'o lao na'a yela' rnabë' quië'.

¹⁵ ¿Biži binezile nacacazi quie Cristo cuerpo quiele? ¿Binezile bireya'ala' usedyınle cuerpo quiele lao na'a nigula ruti' gusto quie? Nitu nitu bireya'ala' huele can'. ¹⁶ ¿Lëzi, binezile ca naca quie be'mbyu ptila nigula ruti' gusto quie? Cani rnën lë'ë guichi la'iyia quie Diuzi: "Quie lao rupateyaquë' naca quieyaquë' ca quie tuzi benë'." Cana' rnën lë'ë guichi la'iyia quie Diuzi.

¹⁷ Na'ra yaca benë' nao xneza Cristo, banaca bichi be quiejë' tuzi len Cristo.

¹⁸ Biutilale nigula binaca žgulale. Chi utilale nigula binaca žgulale, lena' udyiagui'le cuerpo quiele, cala ca tamedian tula huele. ¹⁹ ¿Biži binezile naca cuerpo quiele ca quie tu idao' quie Diuzi? ¿Binezile bayu'ule Bichi Be quie Diuzi? Binacaro xa'n cuerpo quiero. Diuzi si, naquë' xa'n cuerpo quiero. ²⁰ Diuzi baodizuguë' quie dula' xquia quiero. Lena' reya'ala' tzionla'adyi'ronë', bireya'ala' huero tamedian conlë cuerpo quiero.

7

Ga rguiogue'n quie ben' rzi' laguedyi

¹ Niga yequëba' quie guichi use'ela'le laohua' dza na'. Tali rnïa' le'e quie yaca bi' ru'abe, nacalan dya'a quiebi' zubi' cuinzibi' bisi'bi' nigula. ² Pero chi huen zudyi quiebi' talëbi' nigula, na'ra nacalan dya'a quiebi' si'bi' nigula gaca žgulabi', cala ca ta talëbi' nigula. Lëzi cana' quie yaca nigula, chi huen zudyi quiebi', nacalan dya'a quiebi' si'bi' be'mbyu bi' gaca xquiubi'. ³ Chi le'e baozi'le nigula para žgulale, reya'ala' idyë'ële nigula quiele dyë'ëdi. Lëzi cana' nigula, reya'ala' idyë'ënë' ben' quienë' dyë'ëdi. ⁴ Na' nigula bazulë laguedyi, bira nacanë' xa'n cuerpo quienë', banaca xquiunë' xa'n cuerpo quienë'. Lëzi be'mbyu bazulë laguedyi, bira nacanë' xa'n cuerpo quienë', banaca žgulanë' xa'n cuerpo quienë'. ⁵ Tana' lena' rnïa' le'e be'mbyu, biusanle gasilële žgulale. Lëzi rnïa' le'e nigula, biusanle gasilële xquiule. Lëlena' chi rega'nlele laguedyile di'idza' ta usanle bigasilële laguedyile tu chopa dza ta hue'lële Diuzi di'idza', caora na' ru'en lato bigasilële laguedyile. Te beyudyi bë'lële Diuzi di'idza', na'tera reya'ala' sulële laguedyile tatula

tacuenda bihue xa'n taxi'ibi' le'e gan huele tamedian, porque dan' bibële gan inabë'le cuinle.

⁶ Ca rní'a' le'e niga binacan ta huelia' le'e zëdi. Cala rní'a' le'e biru'en lato si'le nigula gaca žgulale. Rnía' le'e si'le nigula gaca žgulale chi re'enle, cala tamedian na' huele. ⁷ Nê'ëdi' re'enda' chan' yugulule suele huerële ca rua', nunu sulële. Pero Diuzi banegunnë' quie tu turo, chi suero bisuero nunu sulëro, dan' netza' tu turo. Binaca tuzi ca nacaro.

⁸ Rnía' le'e quie yaca bi' ru'abe len yaca nigula banati xquiuhue, nacalan dya'a quieyaquë' nunu sulëyaquë' su cuinziyaquë' con ca zua' nê'ëdi', nunu zulia'. ⁹ Pero chi bisueyaquë' suyaquë' cuinziyaquë', nacalan dya'a si'yaquë' laguediyaquë', cala ca ta sa'la'adyi'yaquë' sulëjë' laguediyijë' inan quiejë' huejë' tamedian.

¹⁰ Ca rní'a' quie yaca nigula bazulë laguedyi, dula'adya' rní'a' biru'en lato usannë' xquiunë'. Ta rní'a' niga nacan mandado quie Cristo, cala ta racazi la'adya'. ¹¹ Chi nu nigula apsannë' xquiunë', reya'ala' sunë' cuinzinë'. Chi bire'ennë' sunë' cuinzinë', reya'ala' yega'ntza'olënë' xquiunë' tatula. Biru'en lato yezi'në' be'mbyu tula. Lëscan' biru'en lato usan be'mbyu žgulanë' na' yezi'në' nigula tula.

¹² Na'ra quie yaca los demás, rní'a' ca naca pensari quia', cala mandado quie Cristo. Chi zu ben' zu nigula quienë', na'ra binaca nigula quie' ben' nao xneza Jesús, pero racacazi nigula conforme sulënë' lënë', biru'en lato usannë' nigula quienë'. ¹³ Lëscan' chi zu nigula zu be'mbyu quie, na'ra binaca be'mbyu quie' ben' nao xneza Jesús, pero racacazi be'mbyu conforme sulënë' lënë', biru'en lato usannë' be'mbyu quienë'. ¹⁴ Huaca huen quie ben' binao xneza Jesús chi sulënë' nigula, ben' nao xneza Jesús. Lëzirë quie nigula binao xneza Jesús, huaca huen quienë' sulënë' be'mbyu, ben' nao xneza Jesús. Lëzirë quie nu ži'iyaquë', huaca huen quieyacabi' chi nao xuziyacabi' zna'yacabi' xneza Jesús. Chi usan ben' nao xneza Jesús nigula quienë' o chi usan nigula nao xneza Jesús be'mbyu quienë', bihuen dya'a quie ži'iyaquë'. Huen quieyacabi' ca quie ži'i ben' binao xneza Jesús. ¹⁵ Pero chi ben' binao xneza Jesús bira re'ennë' sulënë' laguedyinë', ben' nao xneza Jesús, na'ra hue'le lato usan ben' binao xneza Jesús laguedyinë'. Caora na' naca ben' nao xneza Jesús libre. Pues ulio Diuzi le'e ta cue' chizi laxta'ole bitilalële laguedyile. ¹⁶ Na'ra luë' nigula, ¿cómo nezo' biidyin dza inao ben' quio' xneza Jesús? Lëscan' luë' be'mbyu, ¿cómo nezo' biidyin dza inao nigula quio' xneza Jesús?

¹⁷ Reya'ala' inaoro huero cabë' banegun Diuzi quie tu turo cati ulionë' ra'o gacaro ben' quienë'. Cana' rní'a' con gatezi ga tza', gan' nita' yaca ben' nao xneza Jesús. ¹⁸ Chi ra'o zuro tu xëdyidao' ca xëdyi ruzu yaca ben' Israel ži'iyaquë' byu, cala bizëdi huena. Lëzi cati dza ulio Diuzi ra'o, chi bizuro xëdyidao', cala bizëdi huena. ¹⁹ Birueten baiguin chi su xëdyidao' cuinro, o chi bisu xëdyidao' cuinro. Chi naoro hue quiero xti'idza' Diuzi, lëlena' rueten baiguin hueron. ²⁰ Ca banegun Diuzi quie tu turo dza ulio Diuzi ra'o gacaro ben' quienë', cana' reya'ala' inaoron. ²¹ Chi le'e gucale ben' zu lao xa'ne cati ulio Diuzi le'e, bidëbile biquilole rchinle ga tula. Pero chi idyin dza gata' tu tahuen quiele ta yeza'le ga zule lao xa'ne, reya'ala' yeza'le. ²² Chi zule lao xa'ne cati ulio Diuzi le'e, banacan quiele na'a ca quie ben' bizu lao xa'ne. Banacale ben' rue mandado quie Diuzi. Lëzi chi bizule lao xa'ne cati ulio Diuzi le'e, banacan quiele na'a ca quie ben' zu lao xa'ne, dan' banaca Cristo xa'nle. ²³ Taže bagucalë Diuzi le'e baodižunë' dula' xquia quiele. Quie lena' bihue'le lato chi re'en yaca benë' huele tamedian. ²⁴ Lëlena' rní'a' le'e bicha',

ca dyin bëro banegun Diuzi quie tu turo dza ulio Diuzi ra'o, cana' reya'ala' huero biusanron inaoron.

²⁵ Ni inia' le'e quie ben' binesi' laguedyi. Ca naca pensari quia' inia' le'e quieyacabi', binacan mandado quie Cristo. Rnia' le'e pensari quia' como beyëchi'la'adyi' Diuzi në'ëdi', bdë'në' në'ëdi' ben' quie', ben' rnë tabala.

²⁶ Ca naca pensari quia' inia' de que, nacalan dya'a bisi' be'mbyu nigula, dan' babbayin tiempo gaca zëdi gula lao yedyi layu. ²⁷ Chi bazulële nigula, biusanlenë'. Lëzi chi binesulële nigula, biquilolenë'. ²⁸ Pero chi re'enle si'le nigula sulële, binacan xquia. Lëzi bi' nigula, chi re'embi' si'bi' be'mbyu, binacan xquia. Pero quie yaca ben' si' laguedyi, huata' tazëdi quieyaquë' lao dza rdayaquë' lao yedyi layu. Na' re'enda' cuëchitza'ohua' cabë' tazëdi gata' quiele.

²⁹ Bicha', ta re'enda' inia' le'e, baruen bago yeyudyi yedu yedyi layu. Quie lena' chi bazulële nigula, hue quiele xti'idza' Diuzi como ca quie bizulële nigula. ³⁰ Lëzi le'e ben' raca yela' yëchi' quie, hue quiele xti'idza' Diuzi como ca ben' biraca yela' yëchi' quie. Lëzi le'e ben' ruzidyi redaohue, hue quiele xti'idza' Diuzi como ca quie ben' biruzidyi biredaohue. Lëzi le'e ben' ra'o ta de lao yedyi layu, hue quiele xti'idza' Diuzi como ca quie ben' biga'o ta de lao yedyi layu. ³¹ Lëzi le'e ben' babë gan ta de lao yedyi layu, hue quiele xti'idza' Diuzi como ca quie ben' bibë gan ta de lao yedyi layu. Rguixogui'a cana' dan' baza' dza yeyudyi yedu yedyi layu.

³² Re'enda' sule huen bidëbile. Yaca ben' binesi' laguedyi, rueyacabi' pensari ta hue quieyacabi' xti'idza' Diuzi ta zuyacabi' huen lao Cristo. ³³ Pero yaca ben' bazulë nigula, rueyaquë' pensari ga tzexi'yaquë' ta rdziogue nigula quienë'. ³⁴ Netza' quie nigula bazulë be'mbyu, netza' quie nigula cuidi'. Na' nigula cuidi' ruebi' pensari ta hue quiebi' xti'idza' Diuzi ta gacabi' ben' laxta'o yëri lao Cristo. Pero nigula bazulë be'mbyu, ruenë' pensari rdëbinë' bi huenë' ta zunë' huen len xquiunë'.

³⁵ Cana' rnia' le'e dan' re'enda' gata' tadya'a quiele, bire'enda' gata' tazëdi quiele. Re'enda' sule contento huele mandado quie Cristo du guicho du la'adyi'le.

³⁶ Chi le'e rdëbile quie zi'ile nigula si'bi' be'mbyu, dan' bate yela' cuidi' quiebi', chi racale pensari huele quie zi'ile nigula can', abihuena hue'le lato ta si' be'mbyu lëbi'. Binacan xquia si' be'mbyu lëbi'. ³⁷ Pero lëzi chi le'e bire'enle si' be'mbyu zi'ile nigula, chi du guicho du la'adyi'le racale pensari bisi' be'mbyu lëbi', abihuena bihue'le lato si'bi' lëbi'. Cala tamedian na', nacan dya'a. ³⁸ Lëlena' rnia' nacan dya'a hue'le lato si' be'mbyu zi'ile nigula, pero nacateran dya'a chi bihue'le lato si'bi' lëbi'.

³⁹ Chi nu nigula bazulënë' xquiunë', biru'en lato usannë' lëbë' tu raca nebannë'. Chi xquiunë' bagutinë', cana'ra ru'en lato yezi'në' be'mbyu tula, pero con chi ben' nao xneza Jesús. ⁴⁰ Ca naca pensari quia' nia' de que nacalan dya'a quie nigula guti xquiuhue, chi nunu be'mbyu yezi'në'. Ca naca pensari quia' rnia', pero lëscan' nacan pensari quie Bichi Be quie Diuzi.

8

Ni rnan quie yela' huao bdyia yaca benë' lao idolo

¹ Ga ni rnia' quie yela' huao rudyia yaca benë' lao idolo. Pues tali na' ca rna yaca benë': Yuguluro neziro bibi zaca' yaca idolo. Pues nun quie baneziro cana', bireya'ala' huero cuinro ben' ze, den' reya'ala' edyë'ëro laguedyiro tacuenda huebë'raro xneza Diuzi mazera. ² Chi raquero nacaro ben'

rioñe'etzegue, lena' rulu'en ni lë'ëti' birioñe'ero cabë' reya'ala' tzioñe'ero.

³ Chi nedyë'ëro Diuzi, nubë'cazi Diuzi ra'o.

⁴ Na'ra quie yela' huao rudya yaca benë' lao ídolo quieyaquë', tali rnìa' bibi zaca' yaca ídolo rionla'adyi' yaca ben' nita' lao yedyi layu. Tuzi Diuzi zu guibá zaca', ganura diuzi tula zu. ⁵ Ba'ala'cazi chi rna yaca benë' naca zë diuzi zu guibá, ba'ala'cazi rnayaquë' naca zë diuzi nita' lao yedyi layu, ba'ala'cazi rnayaquë' nita' ben' zë, ben' naca Señor quiero, ⁶ pero ra'o nezìro tuzi Diuzi zu. Lëlëbë' naquë' Xuzi. Lëlëbë' bzaloguë' yugulu ta de guibá len lao yedyi layu. Bzalarënë' ra'o, ben' nita' lao yedyi layu. Lëscan' tuzi Jesucristo naquë' ben' Señor quiero. Yugulute ta de guibá len lao yedyi layu nacan quienë'. Lente ra'o nacarëro quienë'.

⁷ Pero cala nezi yugulu ben' nao xneza Jesús de que bibi zaca' ídolo. Dza na'la uyonla'adyi'yaquë' nu ídolo. Na' caora raoyaquë' na'a, reza'la'adyi'yaquë' quie yela' huao bdyia yaca benë' lao ídolo. Na'ra como binetzioñe'eyaquë' dyë'ëdi quie xti'idza' Diuzi, raqueyaquë' rueyaquë' tamedian chi raoyaquë' yela' huao ta bdyia benë' lao ídolo. ⁸ Pero cala por nun quie yela' huao ta raoro ilë'ë Diuzi ra'o ben' huen. Biinaro nacaro ben' mala chi gaoro bi ta dyia nu lao ídolo. Lëzi binaro nacaro ben' huen chi bigaoro bi ta dyia lao ídolo. ⁹ Dyë'ëdi baneziro para ra'o ru'en lato chi gaoro, chi bigaoro, ta rudya yaca benë' lao ídolo. Pero yaca ben' binetzioñe'e dyë'ëdi quie xti'idza' Diuzi, bineziyaquë' ru'en lato chi gaoro, chi bigaoro. Quie lena' reya'ala' gaparo cuidado ta bihuero ta quixi yaca ben' binetzioñe'e dyë'ëdi quie xti'idza' Diuzi. ¹⁰ Tu di'idza' rnìa' le'e. Chi le'e cue'le gaole ga bdyiaquë' yela' huao lao ídolo, chi guida tu ben' nao xneza Jesús, ben' binetzioñe'e dyë'ëdi quie xti'idza' Diuzi, chi ilë'ënë' le'e gan' re'le raole, na' ruen žudyi gue'ennë' gaorënë' yela' huao bdyia yaca benë' lao ídolo. ¹¹ Na'ra chi gacan can', bibële huen. Por nun quie yela' rioñe'e quiele, bële ta uquixi tu ben' nao xneza Jesús, ben' binetzioñe'e dyë'ëdi quie xti'idza' Diuzi. Lëscan' por lëbë' guti Cristo lë'ë yaga cruzo. ¹² Lao Cristo gata' dula' xquia quiele chi por le'e aoquixi ben' nao xneza Jesús, ben' binetzioñe'e dyë'ëdi quie xti'idza' Diuzi. ¹³ Quie lena' chi por nun quie udaohua' yela' huao bdyia yaca benë' lao ídolo, chi cana' dula' quia' na' uquixi itu ben' nao xneza Jesús, nacalan dya'a bira gaohua' bë'ëla' bdyia yaca benë' lao ídolo tacuenda bihuen žudyi dula' quia' na' uquixi ben' bicha', ben' nao xneza Jesús.

9

Ni rnan quie yela' rnabë' quie yaca apóstol

¹ ¿Binezile napa' derecho? ¿Binezile naca' apóstol? ¿Binezile blë'ëda' Jesús Señor quiero? Dyin quie Diuzi bia' dza na' uđixogu'a le'e xti'idza' Diuzi banacale ben' nao xneza Jesús. ² Nita' ben' birezaque në'ëdi' chi naca' apóstol. Pero le'e, decazide reya'ala' yezaquele në'ëdi' chi naca' apóstol, dan' dyin quia' na' nacale ben' nao xneza Jesús. Lena' nacan prueba tali na' naca' apóstol.

³ Ni yequëba' quie yaca ben' rnë condre në'ëdi': ⁴ Napa' derecho inaba' ta gunle ta gaohua' len ta yo'oga'. ⁵ Lëzirë napa' derecho si'a nigula nao xneza Jesús gaca žgula' con ca rue yaca los demás apóstoles, lenlë yaca ben' bichi Jesús, len Pedro. ⁶ ¿Bixquien' racale pensari rupazi Bernabé len në'ëdi', bibi derecho napando' inabando' le'e gunle ta huendo' gasto quiendo' caora cati rdando' rguixogue'ndo' yaca benë' xti'idza' Diuzi? ⁷ ¿Binezile ganu nunu soldado rguizuguë' cuinzë' ta gaconë' len ta gaonë'? ¿Lëzi binezile quie ben'

raza bedzuli'? Napë' derecho gaohuë' ta razë'. ¿Lëzirë binezile quie ben' rapa beco' zi'ila'? Napë' derecho si'në' nidyi' quieba' yo'oguë'. ⁸ Bireya'ala' huele pensari ta racazi la'adya' rnia', porque lëscan' cana' rnën lë'ë guichi ley quie Moisés. ⁹ Lë'ë guichi na' rnën cani: "Bireya'ala' udze'ro du ru'a bëdyihuaga caora rdaba' rutzutzu rulioba' bdyigo' quie trigo ta ero bini quien."

Con ca rna lë'ë guichi, cala quie bëdyihuagazi rnën. ¹⁰ Lëzi rnërën quie ra'o benë', porque uduxu Diuzi ley quienë' ta gacalën ra'o. Pues lao tu ben' ruzolo yu, len itu ben' rchugo trigo, rupayaquë' rbezayaquë' yezi'yaquë' usecho quieyaquë'. ¹¹ Para le'e nacando' ca quie ben' guza bini trigo, dan' bëndo' dyin quie Diuzi uduxogue'ndo' le'e xti'idzë'. Lëlena' ¿bixquien' raquele pensari bireya'ala' si'ndo' usecho? ¿Bixquien' raquele pensari binapando' derecho inabando' gacalële nêto' ta rdzioguendo' ta gaondo' len ta yo'ondo' tu nerdando' lao yedyi layu? ¹² Naparando' derecho inabando' le'e gacalële nêto' cala ca yaca ben' tula.

Pero ni tu lasa binenabando' le'e gacalële nêto'. Yugulute baozuendo' tacuenda bicezezan quixogue'ro yaca benë' cabë' una Cristo, cabë' bënë' quiero. ¹³ Banezile ca naca quie ben' napa dyin quie idao'. Por nun quie dyin hueyaquë' lu'u idao', cana' hueyaquë' gan ta gaoyaquë'. Lëscan' nezile nun quie rapayaquë' ru'aba ta zu lu'u idao', cana' napayaquë' derecho gaoyaquë' bë'ëla' dyia ru'aba nacan gun quie Diuzi. ¹⁴ Lëzirë cana' re'en Cristo gaca quie nêto', ben' rguixogue' di'idza' la'iya quië'. Tanun quie rdando' rguixogue'ndo' yaca benë' di'idza' la'iya quië', cana' napando' derecho inabando' le'e gunle ta gaondo', len ta yo'ondo', len ta gaondo'. ¹⁵ Pero ni tu lasa binehuena' le'e zëdi inaba' ca ta reya'ala' gunle nê'ëdi'. Lëzi cala rua' guichi ni ta inaba' gunle nê'ëdi' bi cosa. Zua' dispuesto gatia' lao laza inaba' le'e bi cosa, chi por lena' biyega'nro huen, na' bisua' contento.

¹⁶ Birua' ze cuina' nun quie nacan dyin quia' rguixogui'a benë' xti'idza' Diuzi. Nacan ladyina'a rguixogui'a'. Re'en ca re'enna ruzua' di'idza' rguixogui'an, porque huaca bayëchi' quia' chi usana' biquixogui'a benë' xti'idza' Diuzi. ¹⁷ Chi quixogui'a benë' xti'idza' Diuzi de gustozi, huega'nnan huen quia'. Chi quixogui'ayaquë' xti'idza' Diuzi con ganzi, decazide nacan ladyina'a ta pca'n Diuzi lao na'a. ¹⁸ ¿Cabizi yega'nnan huen quia'? Cani yega'nnan huen quia': Huabe' chizi gula lu'u guicho laxta'ohua' nun quie bibi unaba' le'e caora uduxogui'a le'e xti'idza' Diuzi. Ba'ala'cazi napa' derecho inaba' le'e, bibi unaba' le'e.

¹⁹ Ba'ala'cazi binaca' ben' zulao xa'ne, rua' ca quie ben' zulao xa'ne tacuenda hua' gan inao benë' zë xneza Cristo. ²⁰ Cati zua' lado yaca ben' Israel, rua' ca rueyaquë'. Ca naoyaquë' ley pca'n Diuzi lao na'a Moisés dza na'a, cana' rnaoria' ley na'. Cana' rua' ba'ala'cazi binaca' cuenda len leyaquë' ta inao'hua' ley na', pero naohua' ley na' tacuenda hua' gan inaoyaquë' xneza Cristo. ²¹ Lëzi cati zua' lado yaca ben' binao ley pca'n Diuzi lao na'a Moisés, binaohua' ley na' tacuenda hua'yaquë' gan inaoyaquë' xneza Cristo. Pero cala binaohua' ley, porque rnaocaza' ley quie Diuzi nun quie rnaohua' ley quie Cristo. ²² Lëzi cati zua' lado yaca ben' binetziõe'e dyë'ëdi quie xti'idza' Diuzi, birua' cuinza' ben' rioñe'e tacuenda hua' gan' inao'rayaquë' mazera xneza Jesús. Cana' rua' cati zua' lado yugulute benë' ga ra'a, rueria' lëbizi len leyaquë' tacuenda inaoyaquë' xneza Jesús gata' yela' neban quiejë' tuzioli. ²³ Cana' rua' tacuenda ye yaca benë' xti'idza' Diuzi gata' yela' neban quieyaquë' tuzioli. Cana' rua' tacuenda hua' tu parte quia' nacan cuenda quia' quixogui'a xti'idza' Diuzi. ²⁴ Banezile ca naca quie ben' ru'u carrera. Ba'ala'cazi tapa ga'yo'yaquë' tzu'uyaquë' be, pero tuzë' hue gan premio. Lëzi le'e, ulenao xneza Jesús du guicho du la'adyi'le

tacuenda huele gan premio quien. ²⁵ Yaca ben' rue deporte gapayaquë' cuinyaquë' dyë'ëdi tacuenda gacayaquë' ben' tzutzu huala. Cana' rueyaquë' cuenda hueyaquë' gan tu coron de la'aga'. Na'ra coron la'aga' hueyaquë' gan, huabidyin huabiagui'n, biden tuzioli. Pero ca naca premio gun Diuzi ra'o, biibidyin bicuiagui'n, den tuzioli. ²⁶ Quie lena', por tu parte quia' në'ëdi', bita' ca rda ben' laochula, bihua' ca rue ben' rdilalë be ladzazi. ²⁷ Biru'a lato hua' ca ta rna cuerpo quia'. Bire'enda' huen zudyi quia' idza' Diuzi në'ëdi', dan' biunaohua' xti'idza' Diuzi dza caora psëdia' yaca benë' ta inaoyaquë' xti'idza' Diuzi.

10

Ga rnën condre yaca ídolo

¹ Bicha', rnia' le'e ta yeza'la'adyi'le cabë' guca quie yaca xuzixta'oro. Yuguluyaquë' unaoyaquë' tu plari nacan beo ta bzë Diuzi ladza dza broyaquë' nación Egipto. Lëzi yuguluyaquë' uderëyaquë' lu'u nisadao' laona Nisadao' Zna. ² Gucayaquë' tuze len Moisés dza na'te caora unaoyaquë' plari nacan beo udeyaquë' lu'u Nisadao' Zna. ³ Bë Diuzi yela' huaca quienë' pchizë' yela' huao ta udao yugulute yaca xuzixta'oro, ben' ziolë Moisés tzaže. ⁴ Lëzirë bë Diuzi yela' huaca quienë' uliogüë' nisa lu'u yo ta hue'e yugulute yaca xuzixta'oro. Lëyo ga bro nisa rnën quie Cristo, ben' ziolë leyaquë'. ⁵ Pero ude gatzoyaquë' gutiyaquë' lao lato ga bidyia yu'u nun quie biyaxe Diuzi ca bëyaquë'.

⁶ Ca beyëchi' gula guca quieyaquë', reya'ala' huero pensari ta bihuero tamedian ca tamedian bë xuzixta'oro. ⁷ Lëscan' bireya'ala' tzionla'adyi'ro nu ídolo cabë' bë bala yaca xuzixta'oro. Lena' rnën lë'ë guichi la'iya quie Diuzi cani: "Biži yaca benë' ure'yaquë' udaoyaquë' hue'eyaquë'. Bëyaquë' lani ta uyonla'adyi'yaquë' ídolo quieyaquë'." Cana' nan lë'ë guichi la'iya quie Diuzi. ⁸ Quie lena' bihuele bizinaquezi utilale nigula binaca žgulale con cabë' bë yaca xuzixta'oro. Por len guti galobetzona milayaquë' lao tu dzazi. ⁹ Lëzi bireya'ala' huero bizinaquezi cabë' bë yaca xuzixta'oro bdza' Diuzi leyaquë'. Caora beyudyi yela' žela'adyi' quie Diuzi, use'elë' bëla ta udi'imba' leyaquë' gutiteyaquë'. ¹⁰ Bireya'ala' inaro di'idza' bižu condre Diuzi cabë' una yaca xuzixta'oro dan' unajë' bigucalë Diuzi leyaquë'. Caora na' use'ela' Diuzi tu ángel quië' ta bëtinë' leyaquë'.

¹¹ Ca ta užaca yaca xuzixta'oro tiempote nacan ta huero pensari bihuero ca bëyaquë'. Por lena' bzu Moisés di'idza' lë'ë guichi la'iya quie Diuzi ta gacalën ra'o dza rdaro nebanro baruen bago yeyudyi yedyi layu. ¹² Cani rnia', ra'o raquero zioro dyë'ëdi' inaro xneza Diuzi, pero reya'ala' gaparo cuidado ta biiquixiro huero con ganzi. ¹³ Con bitezi prueba gaca quiero, huacalë Diuzi ra'o ta sueron. Sudyi'illëro Diuzi bihuenë' lato gata' prueba quiero bisuero. Cati gata' prueba quiero, biusanla'adyi'në' ra'o, gacalënë' ra'o ta bihuero tamedian.

¹⁴ Lëlena' rnia' le'e ben' bicha', ben' nedyë'ëda'. Ibiga'le tzala'la, bitzionla'adyi'le yaca ídolo. ¹⁵ Rnia' le'e como ca ben' banezi con cabë' rna xti'idza' Diuzi. Huanezile cabë' naca di'idza' baonia' le'e, chi nacan huen, chi binacan huen. ¹⁶ Caora yo'oro vino nisa bedzuli' rëbiro Diuzi diuxcalelo', caora na' reza'la'adyi'ro nacalëronë' tuze nun quie ulato ren quienë' ta gaca huen quiero. Lëscan' caora gaoro yëta xtila rulidzaronë', caora na' reza'la'adyi'ro nacalëronë' tuze nun quie gutinë' lë'ë yaga cruzo ta gaca huen quiero. ¹⁷ Ba'ala'cazi nacaro ben' zë, tuzi yëta xtila gaoro yuguluro. Quie lena' nacalëro tuzi len Cristo.

¹⁸ Ina'le dyë'ëdi cabë' rue yaca ben' Israel. Caora raoyaquë' ta rudyi-ayaquë' ru'aba quie Diuzi, lena' rlu'en quieyaquë' rionla'adyi'yaquë' Diuzi. ¹⁹ Pero ¿bizi inaro quie ben' rudyia bē'ēla' lao ídolo? Inaro bibi zaca' ídolo rionla'adyi'yaquë'. Inaro quie bē'ēla' rudyiayaquë' lao ídolo binaca la'iya bē'ēla', bē'ēla'zi nacan. ²⁰ Caora rudyiayaquë' bē'ēla' ru'aba quieyaquë', cala rionla'adyi'yaquë' Diuzi, taxi'ibi'la rionla'adyi'yaquë'. Bire'enda' huele tuže len yaca taxi'ibi'. ²¹ Bisaque' gacalëro Cristo tuže chi nacalëro yaca taxi'ibi' tuže. Bisaque' tzionla'adyi'ro Cristo chi rionla'adyi'ro yaca taxi'ibi'. ²² ¿Bixquien' re'enle idza' Diuzi le'e? ¿Bixquien' ruera le'e že ca Diuzi?

Ni nan ca reya'ala' gacalëro ben' bichiro, ben' binetziñe'e dyë'ëdi quie xti'idza' Diuzi

²³ Tali na' huaca huero yugulute ta re'enro huero, pero cala yugulu ta re'enro huero nacan dya'a quiero, cala yugulu ta re'enro huero huacalën ra'o ta tzioro inaoro xneza Jesús. ²⁴ Bireya'ala' huero yaladyi' lëro laguedyiro. Reya'ala' huero tahuen gacalëro laguedyiro.

²⁵ Ta ruti'yaquë' lao ye'eya, huaca gaoro yuguluten. Nica inabaziro ga yexi'yaquë'n. Lena' binacan ta idëbïro bē' gaoron. ²⁶ Binacan ta idëbïro, dan' yugulute ta de lao yedyi layu nacan ladyina'a Diuzi.

²⁷ Chi re'en tu ben' binao xneza Jesús tzioro ta gaolëronë' tzaže, chi re'enro tzioro, huaca gaoro yugulute ta gunnë'. Nica inabazironë' ga yexi'në'n. Lena' binacan ta idëbïro bē' gaoron. ²⁸ Pero bigaoron chi inanë' ra'o: "Yela' huao niga nacan ta bdyiando' lao yaca ídolo." Chi cana' unë', bigaocaziron ta inezi ben' na' bireya'ala' gaoron chi nezïro bē'ēla' ta bdyiayaquë' lao ídolo. ²⁹ Anezda' de que nezile bireya'ala' gaoron, pero ben' na' binezinë' bireya'ala' gaoron.

Pero huanaba ben' re'en gao bē'ēla': "¿Bixquien' nao' bireya'ala' gaohua' bē'ēla' ta dyia lao ídolo, chan' anezda' binaca la'iya bē'ēla', bē'ēla'zi nacan? Lena' biuzagan nē'ëdi' ta bigaohua'n. ³⁰ Chi yēpa' Diuzi diuxcalelo' bē' gaohua'n, ¿bixquien' inë benë' condre nē'ëdi' bē' gaohua'n?" ³¹ Pues cani yequëba' ben' una nē'ëdi' cana': Chi gaoro bi cosa, chi bigaoro bi cosa, chi yo'oro bi cosa, chi biyo'oro bi cosa, con bitezi huero, hueron ta huero Diuzi ben' že. ³² Reya'ala' gaparo cuidado ta bihuero con ganzi ta biiquixi yaca benë', la'achi ben' Israel, la'achi ben' binaca ben' Israel, la'achi ben' nao xneza Cristo. ³³ Por tu parte quia' nē'ëdi', quele beyudyi raca' ta gaca tahuen quia' cuinza', den' lëscan' para yugulute yaca benë', raca' ta gaca tahuen quieyaquë' gata' yela' neban quieyaquë' tuzioli.

11

¹ Cabë' rua' rnaohua' xneza Cristo, lëscan' le'e reya'ala' inaorële huerële ca rua'. ² Bicha', redaohueda' rlë'ëda' cabë' ruele reza'la'adyi'le nē'ëdi', banaole dyë'ëdi con cabë' baonia' le'e. ³ Re'enda' tzioñe'ele de que naca Cristo ben' rnabë' ra'o. Lëzi cabë' ra'o rnabë'ro nigula quiero, cana' Xuzïro Diuzi arnabë'në' Cristo. ⁴ Chi utacoro guichoro caora cati hue'lëro Diuzi di'idza', o chi caora cati quixogue'ro yaca benë' xti'idza' Diuzi gan' yegu'udi'ro huero culto, cana' biraparo bala'ana Cristo, ben' rnabë' ra'o. ⁵ Pero netza' quie yaca nigula, chi biutaconë' guichonë' caora cati hue'lënë' Diuzi di'idza', o chi caora cati quixogue'në' yaca benë' xti'idza' Diuzi gan' yegu'udi'ro huero culto, cana' birapanë' bala'ana xquiunë', ben' rnabë' lëbë'. Lena' nacan ca quie tu nigula baochibi guichogue. ⁶ Yaca nigula reya'ala' uchibinë' guichonë' chi bire'ennë' utaconë' guichonë' caora cati hue'lënë' Diuzi di'idza'. Pero chi redue'në' uchibinë' guichonë', reya'ala' utaconë'

guichonë'. ⁷ Pero bireya'ala' utaco be'mbyu guichonë', dan' neya'anë' ca Diuzi, huenë' ze Diuzi. Pero nu nigula huenë' ze be'mbyu. ⁸ Diuzi, cati bzaloguë' bëguë' be'mbyu, cala nigula uzi'guë' bëguë' be'mbyu. Pero cati bzaloguë' bëguë' nigula, na'ra uzi'guë' be'mbyu bëguë' nigula. ⁹ Por nun quie be'mbyu bë Diuzi nigula. Cala por nun quie nigula bë Diuzi be'mbyu. ¹⁰ Tana' lena' reya'ala' utaco nigula guichonë' ta ulu'en rapanë' bala'ana yaca be'mbyu, dan' naca be'mbyu ben' rnabë' quienë'. Lëscana' ruerë yaca ángel rapayaquë' bala'ana Diuzi. ¹¹ Pero re'en Diuzi huero dyin quienë'. Rnaban yuguluro hueron, chi be'mbyu, chi nigula. ¹² Nacan tabala uzi' Diuzi be'mbyu bzaloguë' bëguë' nigula. Lëzirë nacan tabala nigula baraloguë' quie be'mbyu. Pero dyin bë Diuzi bazu rupateyaquë'.

¹³ Le'e ulehuecara pensari chi nacan huen, chi binacan huen, chi biutaco nigula guichonë' caora hue'lënë' Diuzi di'idza'. ¹⁴ ¿Binezile nacacazin yela' stu' quie be'mbyu cuia guitza' guichonë' tona? ¹⁵ Pero nacacazin bala'ana quie yaca nigula cuia guitza' guichonë' tona. Bë Diuzi guitza' guichonë' tona ta utacon guichonë'. ¹⁶ Lëzirë rnía' le'e chi nita' ben' biraxe ca baonia', reya'ala' ineziyaquë' nacan tabala ca baonia'. Nëto' len yaca los demás ben' nao xneza Jesús, naca tuzi ca di'idza' rnëndo'.

Ni nan cabë' bibëjë' huen caora udaoyaquë' rtze' quie Cristo

¹⁷ Ta rnía' le'e niga binacan ta yedaohueda' ca bële, dan' na yaca benë' de que lao laza huele tadya'a, ruele tamedianla gan' regu'udi'le ruele culto. ¹⁸ Cana' rna yaca benë' de que gan' regu'udi'le ruele culto rela' laguedyile binacale tuzi. Lëlena' raqueda' nacan tabala con cabë' na yaca benë'. ¹⁹ Cala ta reya'ala' huele ruele barbiole laguedyile chopá tzona cue'. Rauele chi huele cana', cana' inezile nu ben' nao xneza Jesús du guicho du la'adyi', pero pensarizi huele huele cana'. ²⁰ Le'e dan' ruele cana', bibi zaca'n regu'udi'le raole reza'la'adyi'le Cristo. ²¹ Gan' regu'udi'le ta gaole binacan huen biraole tzaže. Balale lاربialaotele raole. Na' ibalale rega'nle sin gaole. Na' ibalale ri'ole zudyile. ²² ¿Bixquien' rauele bizu yu'u quiele ga gaole, ga yo'ole? Dula' quiele ružidyí yaca benë' di'idza' la'íya quie Diuzi. Lëzirë dula' quiele redue' ben' bi de ta gaó. ¿Cabizi re'enle inia' le'e? ¿Re'enle inia' le'e ruele tahuen? Bisaque' inia' le'e ruele tahuen.

Ni rguixogue'n ga ze'lao beyudyi udao Jesús rtze' quie lani Pascua

(Mt. 26.26-29; Mr. 14.22-25; Lc. 22.14-20)

²³ Na'ra ta inia' le'e niga nacan ta una Cristo në'ëdi': Zadze' dza caora ilë'ëti'zi guxuyaquë' lëbë', caora na' uzi'në' tu yëta xtila ²⁴ gudyinë' Diuzi: "Diuxcalelo!". Te na' bžuzunë'n na' unë': "Ulegao yëta xtila ni. Lena' nacan ca quie cuerpo quia'. Huatia' cuenda gata' yela' huezi'že quiele lao Diuzi. Cabë' bëlia' le'e niga, cana' huerële ta yeza'la'adyi'le në'ëdi' cabë' bia' quiele." ²⁵ Lëzirë beyudyi udaohuë', uzi'në' tu copa bazënë'n. Na'ra unë': "Vino nisa bedzuli' yudzu copa ni nacan ca quie ren quia'. Lena' ilatoga' gatia' cuenda yega'ntza'olë Diuzi le'e tacubila. Con bë' yo'ole vino nisa bedzuli' gan' yegu'udi'le, cana' huele ta yeza'la'adyi'le cabë' bia' quiele." Cana' una Cristo. ²⁶ Na' nia' le'e de que con cabë' gaoro yëta xtila yo'oro nisa bedzuli' gan' yegu'udi'ro, lena' yeza'la'adyi'ro cabë' guca quie Cristo gutië' lë'ë yaga cruzo. Cana' yeza'la'adyi'roguë' hasta dza cati yeguidë' lao yedyí layu tatula.

Ni rnan gaparo cuidado bë' gaoro rtze' quie Cristo

²⁷ Chi gaoro yo'oro con ganzi bë' yeza'la'adyi'ro cabë' bë Cristo quiero, lena' saquero quienë' ca quie ben' bibi zaca'n cuerpo quie, ben' bibi zaca'n ren quie. ²⁸ Reya'ala' yeyuero pensari chi ruero tamala, na'tera ixubalëpiro

lao Diuzi ta yezi'ženē' quiero bē' gaoro yeza'la'adyi'ro Cristo. ²⁹ Porque nacacazin dula' xquia quiero lao Diuzi chi raoro ri'oro yeza'la'adyi'ro Cristo con ganzi, bihuero pensari chi quie Cristo hueron bē' gaoro yo'oro. ³⁰ Quie lena' bala le'e baraca zhue'le, ibala le'e binapale fuerza, ibala le'e ratile. ³¹ Chi yeyuero pensari chi ruero tamala, na'tera ixubalēpiro tacuenda yezi'ze Diuzi quiero, chi huero cana', bigata' dula' xquia quiero lao Diuzi. ³² Pero cati rdilanē' ra'o, nacan ta bihuero tamedian ta bigata' castigo quiero ca castigo gata' quie yaca ben' binao xneza Jesús dza hue Diuzi juicio lao yedyi layu.

³³ Lēlena' ben' bicha', bē' yegu'udi'le gan' gaole bē' yeza'la'adyi'le quie Cristo, reya'ala' cuezale guida laguedyile ta gaole tzaže. ³⁴ Chi barduele gaole, reya'ala' gaole zan yu'u quiele, na'tera tziolo gan' yegu'udi'le gaole rtze' quie Cristo, pero cala con ganzi tacuenda bigata' castigo quiele lao Diuzi. Lēzi hueria' arreglo ca yaca ta began' bē' guida' tatula ideyuba' le'e.

12

Netza' ta banegun Diuzi quie tu turo

¹ Bicha', re'enda' inia' le'e ta inezile ca naca ta banegun Diuzi quie tu turo ra'o ben' nao xneza Jesús.

² Le'e dyē'ēdi nezile ca guca quiele dza biunaole xneza Jesús, bipsanle unaole nu ídolo bero quiele. ³ Tana' lena' re'enda' inezile nitu nunu ina utasi unia Cristo chi nacan tabala yu'uyaquē' Bichi Be quie Diuzi. Lēzirē re'enda' inezile nitu nunu ina du guicho du la'adyi': "Naca Cristo Señor quia", chi biyu'uyaquē' Bichi Be quie Diuzi.

⁴ Ca naca ra'o ben' nao xneza Jesús, netza' ta banegun Diuzi tu turo ta uzuro di'idza' quienē' inaooro xnezē'. Pero tuzi Diuzi zu guibá banegunnē' quiero. ⁵ Tazē modo de ta huero inaoro xneza Diuzi, pero cala zē diuzi zu, tuzi Diuzi zu guibá inaooro xnezē'. ⁶ Tazē modo de ta hue Diuzi ca re'ennē' huenē', pero tuzi Diuzi zu guibá huenē' yugulu ca re'ennē' huenē'. ⁷ Diuzi rulu'ecazinē' ra'o yu'ucaziro Bichi Be quienē' ta gata' tadya'a quiero yuguluro. ⁸ Diuzi, conlē Bichi Be quienē', banegunnē' bala ra'o ta tziōñe'ero dyē'ēdi con cabē' rna di'idza' la'iya quienē'. Lēzirē Diuzi, conlē Bichi Be quienē', banegunnē' ibala ra'o ta neziro dyē'ēdi ca naca pensari quienē'. ⁹ Lēzirē Diuzi, conlē Bichi Be quienē', banegunnē' ibala ra'o ta sudyi'ilēronē' dyē'ēdi. Ibala ra'o banegunnē' ta yeyuero ben' raca zhue'. ¹⁰ Ibala ra'o banegunnē' ta huero yela' huaca quienē'. Ibala ra'o banegunnē' ta tzetixogue'ro yaca benē' di'idza' la'iya quienē'. Ibala ra'o banegunnē' ta yezaquero nu ben' yu'u bichi be xi'ibi', nu ben' yu'u Bichi Be quie Diuzi. Lēzi ibala ra'o banegunnē' ta inēro di'idza' binaca xti'idza'ro. Ibala ra'o banegunnē' ta yexi'idze'ro benē' bi re'en ina di'idza' binaca xti'idza'ro. ¹¹ Tuzi Bichi Be quie Diuzi ru'enē' laze banegunnē' quie quiero según ca re'en Diuzi gaca quiero.

Ba'ala'cazi netza' quie tu turo, yuguluro nacalēro Cristo tuze

¹² Ba'ala'cazi tuzi naca cuerpo quiero, pero naya'n zē cue'. Cana' nacaré quie ra'o ben' nao xneza Jesús. ¹³ La'achi ben' Israel, la'achi ben' tula, la'achi ben' zu lao xa'ne, la'achi ben' bizu zu lao xa'ne, con nutezi, nacalēro Cristo tuzi. Naca quiero ca quie tuzi benē' nun quie yugulutero yu'uro Bichi Be quie Diuzi. Tuzi Bichi Be quie Diuzi zu. Lao na'a Bichi Be quie Diuzi nacaro tuze len lēbē'.

¹⁴ Naya' cuerpo quiero zē cue', cala tu cue'zin. ¹⁵ Inaro chi ni'aro inēn inan: "Dan' binaca' na'alo', bineya'a naca' cuerpo quio'." Ba'ala'cazi ina ni'aro cana', neya'cazin de cuerpo quiero. ¹⁶ Lēzirē inaro chi nagaro inēn

inan: “Dan' binaca' laolo', bineya'a naca' cuerpo quio'.” Ba'ala'cazi ina nagaro cana', neya'cazin de cuerpo quiero. ¹⁷ ¿Bizi huero yero chi naca cuerpo quiero tulizi laoro? ¿Bizi huero ilè'èro chi naca cuerpo quiero tulizi nagaro? ¹⁸ Pero Diuzi bzalonè'n bē'nē'n quie quien según ca re'ennē'. ¹⁹ Chi tu cue'zin naca cuerpo quiero, gabi de huenan. ²⁰ Lēscan' ba'ala'cazi naya' cuerpo quiero zē cue', pero nacacazin tuzi.

²¹ Laoro bisaque' yēbin na'aro: “Birquinda' luē'.” Lēzi guichoro bisaque' yēbin ni'aro: “Birquinda' luē'.” ²² Na' bizi tu ta neya' cuerpo quiero nacan yun'la'adyi', nacaran belao para cuerpo quiero. ²³ Dan' nacan yun'la'adyi' naya' cuerpo quiero, gapachi'ron dyē'ēdi. Dan' nacan ta biilē'ē benē' naya' cuerpo quiero, utacaron la'ari'. ²⁴ Pero biutacaro la'ari' nu guichoro nu laoro, como dan' nacan ta ilē'ē benē'. Cana' ta naya' cuerpo quiero nacan yun'la'adyi', lēparte na' nacaran tabelao para cuerpo quiero. Cana' bē Diuzi bzalonē' ra'o ²⁵ tacuenda gaca tahuen quie cuerpo quiero, ta bigata' zēdi quie yaca ta naya' cuerpo quiero. Yuguluro ben' nao xneza Jesús, nacaro ca quie cuerpo quie Cristo dza rdaro lao yedyi layu. ²⁶ Tana' lena' chi tu parte ta naya' cuerpo quie Cristo redzagalaona, lēzirē yedzagalaorē yugulu ta naya' cuerpo quie Cristo. Lēscan' chi tu parte ta naya' cuerpo quie Cristo nacan dya'a, lēlena' nacan dya'a quie yugulute ta naya' cuerpo quie Cristo.

²⁷ Tahuen para ra'o nacan con baonia' le'e. Bizi na'a ta re'enda' inia' le'e nacaro ca quie cuerpo quie Cristo. Quie tu tu ra'o nacaro ca quie ta naya' cuerpo quie Cristo. ²⁸ Tana' lena' ulio Diuzi ra'o, ben' nao xneza Jesús, ta huero zē cue' dyin quienē' ca re'ennē' huero. Tanēro ulioguē' ben' naca yaca apóstol. Taorupe ulioguē' yaca ben' rguixogue' benē' di'idza' la'iya quienē'. Taoyune ulioguē' ben' ruzioñe'e laguedyi di'idza' la'iya quienē'. Taodape ulioguē' ben' rue yela' huaca quienē'. Na' ulioguē' ben' reyue ben' raca zhue'. Na' ulioguē' ben' racalē laguedyi. Na' ulioguē' ben' rudze' ni'a xnezi. Na' ulioguē' ben' raca inē di'idza' binaca xti'idza'yaquē'. ²⁹ Cala yuguluro nacaro apóstol. Cala yuguluro nacaro ben' rguixogue' benē' di'idza' la'iya quie Diuzi. Cala yuguluro nacaro ben' ruzioñe'e laguedyi di'idza' la'iya quie Diuzi. Cala yuguluro ruero yela' huaca quienē'. ³⁰ Cala yuguluro reyue ben' raca zhue'. Cala yuguluro racaro inēro di'idza' binaca xti'idza'ro. Cala yuguluro racaro yexi'idze'ro yaca benē' bi re'en ina di'idza' binaca xti'idza'ro. ³¹ Reya'ala' gue'enro gun Diuzi tadya'ara quiero. Pues ca rua' nē'ēdi', re'enda' uzioñe'era' le'e tu ta nacara dya'a para le'e.

13

Reya'ala' idyē'èro laguedyiro

¹ Na'ra nia' le'e, ba'ala'cazi raca' yugulu di'idza' de lao yedyi layu, ba'ala'cazi raca' inia' di'idza' ca di'idza' raca yaca ángel, pero chi binedyē'ēda' yaca benē', bibi zaca' ca ta raca' lao Diuzi. Naca' ca quie tu instrumento birgüedyin lēbi. ² Ba'ala'cazi rguixogui'a benē' di'idza' la'iya quie Diuzi, ba'ala'cazi rionē'eda' yugulu ta nacan zēdi tzioñe'ero, ba'ala'cazi nezda' yugulu bi ta raca lao yedyi layu, ba'ala'cazi tanto raleda' quie Diuzi, huaca inia' ga zu tu ya'a ta tzion igu'unnan tzala'la, pero chi binedyē'ēda' yaca benē', bibi zaca' lao Diuzi. ³ Ba'ala'cazi rguisiria' bi ta de quia' ru'a yaca ben' yēchi', ba'ala'cazi usedyina' cuerpo quia' ta uzei yaca ben' rudie nē'ēdi', pero chi binedyē'ēda' yaca benē', bibi gan de bia' lao Diuzi.

⁴ Chi nedyē'èro yaca benē', nacaro ben' zela'adyi', nacaro ben' huen. Binacaro ben' zē', binacaro ben' huexa'a, ben' rue ze cuine. ⁵ Chi nedyē'èro yaca benē', biulidzaroyaquē' di'idza' lē'ē, biulidzaroyaquē' di'idza' xa'a.

Chi nedyë'ëro yaca benë', quilorro modo para bi huero para gacalëroyaquë', biidza'ziroyaquë', biudze'la'adyi'royaquë'. ⁶ Chi nedyë'ëro yaca benë', biyedaohuero chi bi tu xquia bëyaquë'. Chi bëyaquë' tahuen, caora na' yedaohuero. ⁷ Chi nedyë'ëro yaca benë', yezi'žero quieyaquë', yezudyi'ilëroyaquë' hue'lëroyaquë' di'idza' žela'adyi'.

⁸ Chi tali nedyë'ëro yaca benë', biusanro idyë'ëroyaquë'. Hueyudyi huedu bira quixogue'ro benë' di'idza' la'iya quie Diuzi. Hueyudyi huedu bira inëro di'idza' binaca xti'idza'ro. Hueyudyi huedu quie yela' rioñe'e quie yaca benë'. Pero cala hueyudyi huedu idyë'ëro yaca benë'. ⁹ Baoyoñe'ero ga'acaga ca tu ta baoyoñe'ero. Lëzi cana'rë baoyoñe'erëro ga'acaga ca naca di'idza' quie Diuzi ta rguixogue'ro benë'. ¹⁰ Pero cati idyin dza yeguida Cristo, ben' rioñe'e yugulute, caora na' yeyudyi yedu tzioñe'ero ga'acaga, na'tera tzioñe'ero yugulu ca re'en Diuzi tzioñe'ero.

¹¹ Biži në'ëdi', caora guca' xcuidi' unia' ca rnë xcuidi', bia' pensari ca pensari quie xcuidi'. Pero caora uya'a guca' bi' huaca, hora na' bira bia' pensari quie xquidi', bia' pensari quie ben' huaca. ¹² Naca quiero ca quie ben' rna' yaohuan naca besu, birulu'en dyë'ëdi, pero huadyin dza ulu'en dyë'ëdi, na' ilë'ëro tal cabë' nacan. Nubë'da' ga'acaga ca naca bi cosa, pero huadyin dza cati huebë'da' yuguten tal cabë' nuebë' Diuzi në'ëdi'. ¹³ Quie lena' naca tzona ta biyeyudyi yedu quie. Biyeyudyi yedu zudyi'ilëro Diuzi, biyeyudyi yedu rbezaro dza tzioro tzasulëro lëbë', biyeyudyi yedu nedyë'ë Diuzi ra'o. Lao yuna cue' nacaran belao ta nedyë'ë Diuzi ra'o.

14

Biruguinte inëro di'idza' binaca xti'idza'ro

¹ Huele baiguin idyë'ële benë'. Lëzirë huele baiguin inaole huele con ca banegun Diuzi tu tule. Rueten baiguin quixogue'le benë' di'idza' la'iya quie Diuzi. ² Chi inële di'idza' binaca xti'idza'le, tuzi Diuzi nezinë' bi nale, dan' bisaque' tzioñe'e yaca benë' tula, yaca ben' biraca di'idza' ca di'idza' rnële. Chi inële di'idza' binaca xti'idza'le, conlë Diuzizi hue'lële di'idza', cala conlë benë', dan' birioñe'eyaquë' ca rnële. ³ Pero chi le'e quixogue'le benë' xti'idza' Diuzi, lena' nacan ta tzioñe'eyaquë' yedaohueyaquë' inaoyaquë' xneza Jesús. Cana' yeyuezeleyaquë'. ⁴ Lëzi chi inële di'idza' binaca xti'idza'le, lena' gacalën le'ëzi ta inaorale xneza Jesús. Pero chi quixogue'le benë' di'idza' la'iya quie Diuzi, cana' gacalële yaca los demás ben' bichiro ta inaorayaquë' mazara xneza Jesús.

⁵ Ca ta re'enda', re'enda' yugulutele inële di'idza' binaca xti'idza'le. Pero ta re'enda' mazara, re'enda' quixogue'le yaca benë' xti'idza' Diuzi. Nacaran tabelaora quixogue'le benë' xti'idza' Diuzi, cala ca ta inële di'idza' binaca xti'idza'le. Rnia' le'e can' dan' chi bizu ben' yexi'idze' le'e bi re'en ina di'idza' rnële, quie lena' bigacalen yaca ben' bichiro ta inaorayaquë' mazara xneza Jesús. ⁶ Tana' lena' bicha', chi cati guida' idena'a le'e, chi inia' le'e conlë di'idza' binaca xti'idza'ro, lëlena' bigacalën le'e. Pero chi inia' le'e conlë di'idza' naca xti'idza'ro, chi usëdia' le'e xti'idza' Diuzi, lëlena' gacalën le'e.

⁷ Cabë' quie yaca instrumento rcuedyi ben' huecuedyi, como nu flauta, como nu harpa, chi biucuedyiyaquë'n tu lëbi, biyu'u ni'a xnezi ta ru-cuedyiyaquë', bineziro bi pieza pcuedyiyaquë'. ⁸ Lëzirë quie yaca soldado, bë' sulaoyaquë' huedila, chi biucuedyiyaquë' corneta xlaton, bibi puesto suyaquë' para tilayaquë'. ⁹ Cana' nacaré quiero. Chi inëro di'idza' biraca ben' ruzënaga quiero, bisaque' tzioñe'eyaquë'. Naca quiero ca quie ben' rnë cuinze. ¹⁰ Tali na' naca zë cue' di'idza' de lao yedyi layu. Lëscan' tali na'

yugulun de ga yu'un ni'a xnezi tacuenda tzioñe'eron. ¹¹ Chi nu ben' inē nē'edi' di'idza' quienē' ta binaca di'idza' quia', bitzioñe'eda'n. Naca quia' len lēbē' cabē' ben' za' yedyi tula. ¹² Quie lena' huele baiguin ta huele ca ta banegun Diuzi le'e. Huele baiguin ta gata' entre le'e zē ben' gacalē laguedyi ben' bichiro ta inaorayaquē' mazara xneza Jesús.

¹³ Tana' lena' chi inēro di'idza' binaca xti'idza'ro, reya'ala' inabaro Diuzi gunnē' quiero ta uzioñe'ero benē' bi re'en ina di'idza' rnēro. ¹⁴ Caora ru'elia' Diuzi di'idza' binaca xti'idza', bisaque' tzioñe'e yaca ben' uzēnaga quia'. Lena' nacan ca quie ben' ru'elē Diuzi di'idza' lu'u guicho laxta'ozi. ¹⁵ ¿Cabiži reya'ala' huero? Nacan huen hue'lēro Diuzi di'idza' binaca xti'idza'ro, pero nacalan huen hue'lēro Diuzi di'idza' naca xti'idza'ro tacuenda tzioñe'e yaca benē' bi re'en ina di'idza' rnēro. Nacan huen gularo himnos conlē di'idza' binaca xti'idza'ro, pero lēzi nacalan huen gularo himnos conlē di'idza' naca xti'idza'ro. ¹⁶ Cana' reya'ala' huero, porque chi hue'lēro Diuzi puro di'idza' binaca xti'idza'ro, bitzioñe'e ben' ruzēnaga quiero bi naro. Bisaque' nu hue ra'o tuze para ulidzaro Diuzi yēbiroguē' xcalelo'. ¹⁷ Ba'ala'cazi nacan tahuen ta yēbiro Diuzi xcalelo', pero para yaca ben' bichiro, chi yēbiro Diuzi di'idza' binaca xti'idza'ro, bitzioñe'eyaquē'. Tana' lena' biracalēroayaquē' ca reya'ala' gacalēroayaquē' ta inaorayaquē' mazara xneza Jesús. ¹⁸ Rēpa' Diuzi diuxcalelo' dan' racaria' inia' di'idza' binaca di'idza' quia' mazara ca le'e. ¹⁹ Pero ga regu'udi'ro rsēdiro di'idza' la'iya quie Diuzi, rexerada' inia' ga'yo' di'idza' ta tzioñe'e yaca benē', cala ca ta inia' chi mila di'idza' binaca di'idza' quieyaquē'.

²⁰ Bicha', bitzu'ule pensari quie xcuidi'. Pero uletzu'u pensari quie ben' huaca ta bihuele con ganzi. Rnia' ta reya'ala' huele, huele ca quie xcuidi' binenezi neza mala. ²¹ Lu'u libro yu'u ley una Diuzi cani: “Huase'ela' tu ben' yedyi tula, ben' rnē di'idza' tula, ta quixogue'nē' yaca benē' ta ineziaquē' cabē' reya'ala' huejē' inaojē' xneza', pero bihueyaquē' lēbē' casa.” Cana' una Diuzi. ²² Caora inaro di'idza' binaca xti'idza'ro, lena' nacan ca quie seña ta ulu'en quie yaca ben' binao xneza Jesús ca naca yela' huaca quie Diuzi. Binacan ta ulu'en quie yaca ben' nao xneza Jesús. Pero caora quixogue'ro di'idza' la'iya quie Diuzi, lena' nacan seña ta ulu'en quie yaca ben' nao xneza Jesús, binacan ta ulu'en quie yaca ben' binao xneza Jesús. ²³ Biži con ga regu'udi'ro, chi yuguluro inēro di'idza' binaca xti'idza'ro, chi guidarē yaca ben' binao xneza Jesús ta uzēnagayaquē', ¿cala huanayaquē' ra'o nacaro ben' raca loco? ²⁴ Pero chi ga regu'udi'ro rguixogue'ro di'idza' la'iya quie Diuzi, chi guidarē yaca ben' binao xneza Jesús ta uzēnagayaquē', huacabē'yaquē' napajē' dula' xquia. Cana' hueyu'uyaquē' pensari bē' yeyaquē' xti'idza' Diuzi rguixogue'ro. ²⁵ Cana' ulu'en quieyaquē' yu'uyaquē' pensari median lu'u laxta'oyaquē'. Cana' quitzo žibiyayquē' ta ulidzayaquē' Diuzi inabayaquē' yela' huenitilao. Cana' ineziaquē' nacan tali zulē Diuzi ra'o.

Gan' regu'udi'ro reya'ala' huero puro ta yu'u ni'a xnezi

²⁶ Ta re'enda' inia' le'e, bicha', nacan cani: Gan' yegu'udi'le, reya'ala' gacalēle yaca ben' bichiro, ben' nao xneza Jesús ta inaorayaquē' mazarayaquē' xneza Jesús. Reya'ala' gulale alabanza. Reya'ala' usēdileyaquē' xti'idza' Diuzi. Reya'ala' uzioñe'eleyaquē' quie Diuzi. Hue'ennan inēle di'idza' binaca xti'idza'le, pero reya'ala' yexi'idze'leyaquē' bi re'en ina di'idza' inēle. ²⁷ Caora inēle di'idza' binaca xti'idza'le, reya'ala' inē chopale o tzonazile. Reya'ala' inē tu huio tu huiole. Lēzi reya'ala' itule yexi'idze'le bi re'en ina di'idza' rnēle. ²⁸ Chi bizu ben' yexi'idze' le'e bi re'en ina di'idza'

rnële, nacalan huen biinële di'idza' binaca xti'idza'le gan' yegu'udi'le hue'lële Diuzi di'idza'. Nacalan huen hue'lële Diuzi di'idza' lu'u guicho laxta'ozile. ²⁹ Lëzirë caora quixogue'le yaca benë' di'idza' la'iya quie Diuzi gan' regu'udi'le, reya'ala' inë chopale o tzonazile. Reya'ala' uzënaga ben' rzënaga dyë'ëdi, na' hueyaquë' pensari chi rnëyaquë' tuzi ca naca xti'idza' Diuzi. ³⁰ Pero chi udze' Diuzi tu di'idza' lu'u laxta'o tu ben' re' ga regu'udi'le, chi re'en Diuzi inë ben' na' ca di'idza' bdze'në', na'ra chi zë itu ben' rnënë', reya'ala' cue' ben' rnë tanëro tacuenda inë ben' taorupe, ben' udze' Diuzi di'idza' lu'u laxta'ohue. ³¹ Cana' reya'ala' huele, reya'ala' inële tu huio tu huiole tacuenda tziönë'e yaca los demás ben' bichiro. Cana' yedaohueyaquë' hue quieyaquë' xti'idza' Diuzi. ³² Caora rguixogue'le yaca benë' di'idza' la'iya quie Diuzi, reya'ala' quixogue'leyaquë' de gaxo gula. ³³ Cana' reya'ala' huele dan' naca Diuzi ben' rue fa yu'u ni'a xnezi. Biraxe Diuzi huero con ganzi.

Reya'ala' huele cabë' rue yaca los demás ben' bichiro, ben' nao xneza Jesüs con gatezi regu'udi'yaquë'. ³⁴ Bireya'ala' cuialao nigula inënë' con ca be'mbyu gan' yegu'udi'le ulidzale Diuzi. Nacan cuenda quie be'mbyu cuialaohuë' inënë' gan' yegu'udi'le, bicuialao nigula inënë'. Cana' na ley yu'u lu'u libro quie Diuzi. ³⁵ Chi nu nigula re'ennë' inezinë' bi re'en ina di'idza' ina ja benë' gan' yegu'udi'le, reya'ala' inabanë' xquiunë' zan yu'u quienë', dan' binacan cuenda quie nigula ta cuialaonë' inënë' con ca be'mbyu gan' yegu'udi'le ulidzale Diuzi.

³⁶ Bihuele pensari conlë le'ezi uzulao Diuzi udixogue' benë' xti'idzë'. Bihuele pensari tuzi le'ezi nezile quie xti'idza' Diuzi. ³⁷ Chi nu bala le'e raquele banegun Diuzi quiele ta quixogue'le benë' di'idza' la'iya quienë', o chi raquele conlë Bichi Be quie Diuzi rnële, reya'ala' hue quiele con cabë' rna di'idza' bzua' lë'ë guichi ni, porque nacan mandado quie Cristo. ³⁸ Chi nu ben' bire'en hue quie con cabë' rna di'idza' bzua' lë'ë guichi niga, bihuele casa quienë'.

³⁹ Cani nia' le'e ben' bicha': Reya'ala' quixogue'le benë' di'idza' la'iya quie Diuzi. Lëzi nia' le'e biuzegadyile quie ben' inë di'idza' binaca xti'idza'yaquë'.

⁴⁰ Yugulute con ca ruele, huele ta yu'u ni'a xnezi, bihuele con ganzi.

15

Cabë' guca guti beban Cristo

¹ Na'ra ben' bicha', re'enda' yeza'la'adyi'le con cabë' rna xti'idza' Diuzi udixogui'a le'e dza na'. Lëdi'idza' na' gulele quien dza na' nenaolen du guicho du la'adyi'le. ² Tanun quie bagulele quie di'idza' baonia' le'e dza na', banacale ben' de yela' neban quie tuzioli chi rue quiele xti'idza' Diuzi inaolen du guicho du la'adyi'le, binaolen con ganzi.

³ Tanëro udixogui'a le'e ta naca belao, ta binenezile. Udixogui'a le'e con cabë' una Cristo në'ëdi', con cabë' guca quienë' gutinë' lë'ë yaga cruzo ta yezi dula' xquia quiero. Cana' rnën lë'ë guichi la'iya quie Diuzi. ⁴ Beyudyi gutinë', na'ra pcachi'yaquë' lëbë'. Pero guca lao tzona dza bebannë' tatula con cabë' rnën lë'ë guichi la'iya quie Diuzi. ⁵ Tanëro ptilalaonë' Pedro. Ude na' ptilalaonë' yaca los demás apóstoles. ⁶ Lëzirë ptilalaorënë' lao ga'yo' gayuhua yaca ben' bichiro. Neneban ibalajë', na' ibalajë' baguti. ⁷ Ude beyudyi na' ptilalaorënë' Santiago len lao yugulu yaca ben' pse'elë' ta tzetixogue'yaquë' benë' di'idza' la'iya quienë'.

⁸ Ga zelao ptilalaohuë' leyaquë', na'ra ptilalaorënë' në'ëdi'. Pero tu bi-netilalaonë' në'ëdi', bia' zëdi gula, bigu'unda' inaohua' xnezë'. Cana' guca

quia' ca quie bdao' zaralo, pero zēdi gula. ⁹ Entre yaca apóstol tuza' nē'ēdi' psaca' ben' nao xneza Jesús bizinaquezi dza na'tela. Lēlena' ni lē'ēti' bibi zaca' ulio Diuzi nē'ēdi' naca' apóstol quienē'. ¹⁰ Pero nacacaza' ca naca' conlē Diuzi, dan' naca Diuzi ben' huen, beyēchi'la'adyi'nē' nē'ēdi'. Ca ta bēlē Diuzi nē'ēdi', biuden cana'zi. Babēria' dyin quie Diuzi cala ca yaca los demás ben' rguixogue' di'idza' la'iya quienē'. Calā nia' cuinza' bia' dyin quie Diuzi. Gucalecazi Diuzi nē'ēdi' dan' naquē' ben' ze beyēchi'la'adyi'nē' nē'ēdi'. ¹¹ Calā bihuen chi nē'ēdi', chi ben' tula, baodixogue'ndo' le'e di'idza' la'iya quie Diuzi. Ta naca belaora udixogue'ndo' le'e xti'idzē', na' agulele.

Naca tali yeban yaca ben' baguti

¹² Chi nēto' rdando' rguixogue'ndo' yaca benē' de que guti beban Cristo ꝯna'a bixquien' balale rnale bira yeban yaca ben' baguti? ¹³ Porque chi nacan tali bira yeban yaca ben' baguti, bisaque' inando' beban Cristo. ¹⁴ Chi nacan tali guti Cristo bibebannē', bisaque' inando' zaca' di'idza' quie Diuzi rguixogue'ndo' yaca benē', lēzi bisaque' inando' zaca' inaole xnezē'. ¹⁵ Chi nacan tali guti Cristo bibebannē', chi nacan tali biyeseban Diuzi yaca ben' aguti yaca, chi nacan cana', yē' rzi'ndo' benē' rguixogue'ndo'yaquē' beseban Diuzi Cristo. ¹⁶ Chi nacan tali biyeseban Diuzi yaca benē' baguti, bisaque' inando' besebannē' Cristo. ¹⁷ Chi nacan tali bibeban Cristo, bisaque' inando' zaca' inaole xnezē', lēzi bisaque' inando' bira nao dula' xquia quiele le'e. ¹⁸ Chi nacan tali cana', lēscan' bisaque' inando' huazi' Diuzi yaca ben' nao xnezē' caora gatiyaquē'. ¹⁹ Ca bayēchi' gula nacan quiero, chi nacan tali dza rdaro na'azi lao yedyi layu zaca' inaoro xneza Cristo, pero bibi zaca'n unaoro xneza Cristo caora gatiro.

²⁰ Pero nacan tali beban Cristo. Cana' ineziro yebanro ra'o len yaca los demás ben' nao xnezanē'. Ba'ala'cazi chi bagutiro, neziro huadyin dza useban Diuzi ra'o. Na'ra para tuzioli bira gatiro tatula. ²¹ Dyin quie tu ben' uzo tiempote rati yaca benē'. Pero dyin quie ben' use'ela' Diuzi lao yedyi layu yeban yaca ben' guti. ²² Gatiro yugulutero tanun quie dan' nacaro zi'isuba Adán. Pero yeseban Diuzi ra'o, ben' nao xneza Cristo, tanun quie dan' nacalēro Cristo tuze. ²³ Pero según ca re'en Diuzi gaca, cana' huenē' quie quiero. Tanēro psebannē' Cristo ta ulu'enē' ra'o cabē' gaca quiero. Lēzi cana'rē useban Diuzi ra'o, ben' nao xneza Cristo, cati yeguida Cristo tatula lao yedyi layu. ²⁴ Te yeyudyi gaca can', na'ra yeyudyi quie lao yedyi layu. Lēcaora na' udyiagui' Cristo yugulu ben' rnabē', ben' bē condre lēbē'. Lēzirē te yeyudyi gaca can', tzesan Cristo yela' rnabē' quienē' uca'nnē'n lao na'a Xuzinē' Diuzi. ²⁵ Pero rnabē'cazi Cristo hasta bēnē' gan pcaxonē' yugulute ben' rudie lēbē'. ²⁶ Ze'lao na' hue Cristo mandado yeyudyi yedu quie yela' guti tuzioli. ²⁷ Mandado bē Diuzi inabē' Cristo lao yugulute. Cana' rnēn lē'ē guichi la'iya quie Diuzi. Pero ba'ala'cazi rnēn de que inabē' Cristo lao yugulute, bireya'ala' tzioñe'ero de que inabē' Cristo lao cuin Diuzi, dan' cuin Diuzi bēnē' mandado inabē' Cristo. ²⁸ Te yeyudyi bega'n yugulute lao na'a Cristo, na'tera usedyinnē' cuinnē' lao na'a Xuzinē' Diuzi, ben' bē mandado inabē'nē' lao yugulute. Cana' hue Cristo uca'nnē' yugulute ta de lao na'a Xuzinē' Diuzi. Cana' gaca Diuzi ben' žera, ben' inabē'ra.

²⁹ Lēzi nita' bala ben' ru'e lao yaca ben' neban rnayaquē' cana' re'ennan ta yeban yaca ben' baguti. ¿Bixquien' rueyaquē' cana'? Chi birbezayaquē' yeban yaca ben' baguti, ¿ga huen dyin ru'eyaquē' lao ben' neban por nun quie ben' baguti?

³⁰ ¿Bixquien' yugu dza ruen žudyi guti benē' nēto'? ³¹ Rnia' le'e, ben' bicha', yugu dza barbeza' guti yaca benē' nē'ēdi'. Nacan tali raca quia' cana' tal

como nacan tali napa' gusto dan' banacale ben' nao xneza Jesucristo. ³² Pues nē'ēdi' cabē' nia' le'e ga uya'a ciudad Efeso dza na', bedzagalaotzeguia' dula' quie yaca ben' rue ca rue lobo. Pero ¿biži gan de bia' lao Diuzi chi nacan tali biyeban yaca ben' baguti? Chi nacan tali biyeban yaca ben' baguti, mejorla huero con cabē' una yaca ben' unē: “Gaocalaro yo'ocalaro, porque la'achi uxe, la'achi huidzo, ratiro.”

³³ Bitzioguele yē'. Nacan tali con cabē' rna yaca benē': “Unitiro neza dya'a quiero chi inaoro yaca ben' rue tamedian.” ³⁴ Ulehue pensari inaole neza dya'a. Biiquixile huele tamedian. Balale le'e binenezile ca naca Diuzi. Rnia' le'e can' ta yedue'le.

Ca gaca yeban yaca ben' baguti

³⁵ Nita'cazi yaca ben' inaba nēto' inayaquē': “¿Cabiži gaca yeban yaca ben' huati?” Lēzirē inayaquē': “¿Cabiži gaca quie cuerpo quie yaca ben' huati?”

³⁶ Di'idza' tondo rnayaquē' inayaquē' cana'. Bineziaquē' ca raca quie nu ben' raza bini. Decazide yeyu'udzo' bini ta ilē yaga quien yezun lao laza bini.

³⁷ Ta razayaquē', razayaquē' bini ta itinin gacan nicuan. Cala binacan nu nicuan razayaquē', la'acazi bini trigo, la'acazi birla bini tula. ³⁸ Biži Diuzi hue'nē' laze quie quie yaca bini ta ilēyacan según ca naca yaca bini. ³⁹ Cala tu lēbizi naca cuerpo quie benē' len cuerpo quie yaca bia guixi'. Netza'la cuerpo quiero. Netza'la cuerpo quie yaca bia dyia tapa ni'e. Netza'la cuerpo quie yaca bia xile. Netza'la cuerpo quie yaca bela. ⁴⁰ Taže netza' ta dyia guibá len ta de lao yedyi layu. Netza' yela' baquitu quienan quie quienan.

⁴¹ Taže netza' xni' obidza. Taže netza' xni' biu'. Taže netza' xni' bélo. Lēzi entre yaca bélo dyia guibá, netza' yaca xni' quie quien. ⁴² Cana' nacaré quie yaca ben' huati yeban yaca. Caora bagutiro, na'ra bayu'u cuerpo quiero lu'u yu ta gu'udzona. Pero caora useban Diuzi ra'o, tuzioli bira gatiro. ⁴³ Ra'o rudze'ro lu'u yu tu ta naca gula. Pero Diuzi usebannē' tu ta naca cubi. Ra'o rudze'ro lu'u yu tu ta bira de yela' neban quie. Pero Diuzi usebannē' tu ta gata' yela' neban quie tuzioli. ⁴⁴ Ra'o udze'ro lu'u yu tu ta baguti. Pero Diuzi usebannē' tu ta bira gati tuzioli. Ca bzalo Diuzi cuerpo quie ben' gati, lēzi bzaloguē' cuerpo quie ben' bira gati tuzioli.

⁴⁵ Rnēn lē'ē guichi la'iya quie Diuzi cani: “Adán, ben' bzalo Diuzi tanēro, bē' Diuzi lēbē' yela' naban quienē'.” Cana' rna lē'ē guichi. Pero Cristo, ben' use'ela' Diuzi, bēranē' tadya'ara cala ca Adán. Lao na'a Cristo decazi yela' naban quiero biyeyudyi yedu quie. ⁴⁶ Tanēro de yela' neban quiero, pero hueyudyi huedu quien dza gatiro. Na'tera gata' yela' neban quiero, pero bira yeyudyi yedu quien. ⁴⁷ Ben' bzalo Diuzi tanēro bēguē' lēbē' de yu. Guquē' ben' de lao yedyi layu. Pero Cristo, ben' use'ela' Diuzi, naquē' ben' za' de lao guibáte. ⁴⁸ Cabē' guca Adán guquē' de yu, gucacazē' de lao yedyi layu, cana' nacaré quie yaca ben' rda lao yedyi layu. Pero ra'o, ben' nao xneza Cristo, huacarē quiero ca naca Cristo, ben' za' de lao guibáte. ⁴⁹ Como nacaré quiero ben' bzalo Diuzi bēguē' de yu, lēzirē gacarē quiero ca quie Cristo, ben' za' de lao guibáte.

⁵⁰ Re'enda' inia' le'e, ben' bicha', de que conlē cuerpo quiero nacan de yu, bisaque' yeyoro ga zu Diuzi guibá. Bisaque' uquixiro ta biru'udzo len ta ru'udzo. ⁵¹ Re'enda' inezile tu ta binezile. Cala yuguluro gati, pero yugulutero huetza'ro. ⁵² Tu sasazi yetza' cuerpo quiero cati zē'lao yero ucuedyi ángel trompeta. Lēcaora na' yeseban Diuzi yaca ben' baguti ta bira gaticaziyaquē' tuzioli. Lēzi caora na' yetza'rē Diuzi cuerpo quiero. ⁵³ Yetza' Diuzi pensari median quiero ta yeyudyi yedu quie, ta yeyu'uro pensari dya'a

ca pensari quie Diuzi ta bira yeyudyi yedu quie. Lëzi yetza' Diuzi cuerpo quiero hueyacan cuerpo bira cuiagui'n tuzioli. ⁵⁴ Cati abeyu'uro pensari dya'a ca pensari quie Diuzi ta bira yeyudyi yedu quie, lëzi cati abetza' Diuzi cuerpo quiero beyacan cuerpo bira cuiagui'n tuzioli, lëcaora na' uzun di'idza' con cabë' rnën le'e guichi la'ya quie Diuzi cani: "Birabi yela' guti gata'. ⁵⁵ Bira hue yela' guti gan gatiro. Bira sue yela' guti quiero udyiagui'n ra'o." Cana' rnën lë'ë guichi la'ya quie Diuzi. ⁵⁶ Rudyiagui' yela' guti yaca benë' por nun dan' rueyaquë' tamedian. Lëzi con cabë' rna ley udxu Diuzi tiempote, lena' raona yaca benë' xquia. ⁵⁷ Pues diuxcale Diuzi, porque dan' lao na'a zi'inë' Jesucristo, bapte pselanë' ra'o quie dula' xquia quiero, bira inaona ra'o.

⁵⁸ Lena' nia' le'e, ben' bicha', ulenao xneza Cristo du guicho du la'adyi'le, biyehuëdile. Ulehue dyin quie Diuzi yugo dza. Biusanle dyin na', porque dyë'ëdi nezile biten cana'zi ca dyin huelële Cristo.

16

Ni nan ga ptupayaquë' dumi ta gacalëyaquë' yaca ben' bichiyaquë', ben' nao xneza Jesús

¹ Bi'zi na'a rnia' le'e, reya'ala' utupale dumi ta gacalële yaca ben' bichile, ben' nao xneza Jesús. Reya'ala' huele con cabë' baonia' yaca ben' nita' yaca ciudad nebaba Galacia, yaca ben' naorë xneza Jesús. ² Yugu dza domingo reya'ala' utupale lë'ëti' ca tu ta babële gan quie lao tu xman. Cana' huele ta baden puesto cati guida'. ³ Pues caora bazulia' le'e, ero tu chopale tzehua'ayaquë' dumi lao yaca ben' bichiro, ben' nita' ciudad Jerusalén. Hua' tu guichi ta ise'ela'lëron dumi lao na'ayaquë'. ⁴ Lëzi chi rucazin baiguin, huaya'lia'yaquë' ciudad Jerusalén.

Rue Pablo pensari ta tzioguë' yaca ciudad tula

⁵ Tanëro re'enda' tia' yaca ciudad nebaba Macedonia, na'tera idyina' ciudad Corinto. ⁶ Durpende huega'na' sulia' le'e chopa tzona dza, o chi huega'na' biu' ruen zaga. Na'ra chi huele cule, gacalële në'ëdi' ta guxa' quie tu neza bë' tza'a yaca ciudad tula. ⁷ Bire'enda' tu teza' ciudad quiele, re'enda' sulia' le'e zi dza, chi Diuzi gunnë' lato. ⁸ Lëzi cati tza'a ciudad Efeso, huega'na' na' ta cueza' te lani quie usecho quie bini trigo, ⁹ porque de lato na' hua' dyin quie Diuzi. Raqueda' huaron dya'a chan' hua' can', ba'ala'cazi nita' yaca ben' zë, ben' rue condre në'ëdi'.

¹⁰ Caora bazu Timoteo lënë' le'e, huele bayudyi tacuenda suë' gusto bidëbinë'. Pues ruerënë' dyin quie Diuzi con cabë' dyin na' rua' në'ëdi'. ¹¹ Yezi'lenë' dyë'ëdi gacalënenë' ta guxunë' quie tu neza cati guidanë' idena'në' në'ëdi', porque rbezcaza' guidanë' lënë' yaca los demás ben' bichiro, ben' nao xneza Jesús.

¹² Bi'zi ben' bichiro Apolos, lega re'enda' guidalënë' yaca ben' bichiro ta idena'yaquë' le'e, pero biuzaquë' guidanë'. Huidanë' bë' tzu'unë' lato.

Ga beyudyi rapa Pablo leyaquë' diuzi

¹³ Bigasiyëläle, hue quiele xti'idza' Diuzi du guicho du la'adyi'le. Bidzebile, biyehuëdile. ¹⁴ Con bitezi ruele, biusanle idyë'ële benë'.

¹⁵ Bicha', dyë'ëdi nezile naca familia quie Estéfanos ben' nëro, ben' betza' pensari quie, barue quieyaquë' di'idza' quie Jesús entre yaca ben' nita' yaca yedyi nebaba Acaya. Bayu'uyaquë' dyin quieyaquë' gacalëyaquë' yaca los demás ben' nao xneza Jesús. ¹⁶ Re'enda' uzënegale gapala'nle leyaquë'

dyë'ëdi lente nutezi yaca ben' rue dyin quie Diuzi. ¹⁷ Como biuzaque' guidale, redaohueda' abla' Estéfanos, len Fortunato, len Acaico lao lazale. ¹⁸ Pxela'adyi'yaquë' në'ëdi' ca uxela'adyi'le në'ëdi' chan' le'e zule niga. Zaca'yaquë' gapala'nle leyaquë'.

¹⁹ Yaca ben' nao xneza Jesús, yaca ben' nita' yaca ciudad nebaba Asia, rugapayaquë' le'e diuzi. Lëzirë Aquilo len Priscila, len yaca los demás ben' regu'udi' zan yu'u quieyaquë', rugapayaquë' le'e diuzi laohue Señor quiero. ²⁰ Lëzi yugulu ben' bichiro niga, rugaparëyaquë' le'e diuzi. Ulegapa tu tule laguedyile diuzi, gaole xagayaquë' tu situ.

²¹ Në'ëdi', Pablo, babia' letra ni lë'ë guichi conlë na'a. Lena' use'ela'n laole rgapa' le'e diuzi.

²² Chi nu bala le'e binedyë'ële Señor quiero Jesucristo, ta bayëchi' gula nacan quiele. Na'ra nia' Señor quiero, naguido'.

²³ Rulidza' Señor quiero Jesucristo ta huela'iyänë' le'e taže. ²⁴ Rnia' le'e nedyë'ëda' le'e yugulutele laohue Cristo Jesús. Amén.

GUICHI URUPE BÈ SAN PABLO APÓSTOL USE'ELA'NÈ'N LAO CIUDAD CORINTO

Bè Pablo guichi ni use'ela'nè'n lao yaca ben' nao xneza Diuzi, ben' nita' ciudad Corinto

¹ Nè'èdi', Pablo, naca' ben' bdè' Diuzi. Según ca re'ennè' bdè'nè' nè'èdi' ta tza'a tzetixogui'a xti'idza' Jesucristo. Nè'èdi'lia' ben' bichiro Timoteo, bèndo' guichi ni ta ise'ela'ndo'n lao le'e, ben' nao xneza Jesús, ben' nita' ciudad Corinto. Lèscan' huase'ela'ndo' guichi ni lao yugu ben' nao xneza Jesús, ben' nita' yaca yedyi nebaba Acaya. ² Rulidza' Xuzi Diuzi lènè' Señor quiero Jesucristo ta huela'iaquè' le'e, cuèchiyaquè' chizi lu'u guicho laxta'ole.

Ni rnèn ca guca quie Pablo bedzagalaonè'

³ Rionla'adyi'ro Diuzi, ben' naca Xuzi Señor quiero Jesucristo. Lèbè' naquè' Xuzi, ben' yeyèchi'la'adyi' ra'o. Lèbè'naquè' ben' ru'elè' ra'o di'idza' zela'adyi' tuzioli. ⁴ Con bitezi tazèdi raca quiero, hue'lè Diuzi ra'o di'idza' zela'adyi' tacuenda gacaro hue' lèrèro ben' tula di' idza' zela'adyi' bè' raca tazèdi quiejè'. ⁵ Como dan' redzagalaoro tazèla cabè' ptzagalao Cristo, lèscana' tazèla ru'elènè' ra'o di'idza' zela'adyi'. ⁶ Cana' raca quiendo' tacuenda hue'lèndo' le'e di'idza' zela'adyi' yele xti'idza' Diuzi gata' yela' naban quiele tuzioli. Lèscan' cati ru'elè Diuzi nèto' di'idza' zela'adyi', lena' raca quiendo' cuenda gacalèndo' le'e ta suele cati yedzagalaole con cabè' redzagalaondo'. ⁷ Nezindo' dyè'èdi huaca tahuen quiele, como dan' cabè' redzagalaole por nun quie dan' naole xneza Cristo, cana'rè ru'elè Diuzi le'e di'idza' zela'adyi'.

⁸ Bichindo', re'ennendo' inezile ca tu naca tazèdi guca quiendo' yaca yedyi nebaba Asia. Tantozi guca zèdi gula quiendo', abedu fuerza quiendo'. Bèndo' pensari biyyudyi tazèdi quiendo' gatindo'. ⁹ Bèndo' pensari hora gatindo'. Cana' guca quiendo' cuenda blu'e Diuzi nèto' cabè' reya'ala' sudyi'lèro tuzi lèbè', ben' useban ben' baguti. Bireya'ala' gaquero huazuero cuinziro. ¹⁰ Bapcuasa pcui'o Diuzi nèto' ca tamala raca quiendo' cati beyen guti ja benè' nèto'. Chi le'e rulidzale Diuzi por nèto', nezindo' biusan Diuzi ucuasa ucu'onè' nèto' mazara. ¹¹ Lèscan' chi ja ben' zè rulidzajè' Diuzi por nèto', lèscana' ja ben' zè yèbijè' Diuzi diuxcalelo' nun quie dan' ruela'ia Diuzi nèto'.

Udixogué' Pablo bi guca quienè' dan' biuyoguè' ciudad Corinto

¹² Sundo' gusto como dan' nezindo' dyè'èdi rnaondo' tu neza la'ia rdando' du guicho du la'adyi'ndo' lao yedyi layu niga. Lèscana' rdando' dya'a conlè le'e. Pues yela' ben' huen quie Diuzi gualènè' nèto' rdando' cana', cala ta racazi la'adyi'ndo' rdando'. ¹³ Cabè' naca di'idza' ta bzundo' lè'è guichi ni, nacan puro di'idza' ta gacale ulabale, ta gacale tzioñe'ele. Rbeza' dza tzioñe'elen dyè'èdi. ¹⁴ Pero banezile cabè' inia' le'e. Banezile cati yeguida Señor quiero Jesús, cana' le'e huazule gusto cabè' bèndo' nèto'. Lèscan' nèto' huazundo' gusto cabè' bèle le'e.

¹⁵ Tantozi ruxela'adya' baoyõe'ele cabè' baodixogui'a le'e, lena' bia' pensari dza na'te guida' ideyuba' le'e luegozi tacuenda gaca chopla lasa bedeyuba' le'e. ¹⁶ Cana' guqueda' tu teza' tza' Macedonia tia' ideyuba' le'e. Na'ra cati yeza' Macedonia guqueda' yedia' yeyuba' le'e tatula. Cana' gunan le'e lato gacalèle nè'èdi' ta tzu'a neza tza' estado Judea. ¹⁷ Pero como biuzaque' tia', ¿cómo raquele bibia' pensari dya'a bibida' ideyuba' le'e?

¿Cómo raquele hua' pensari cabè' pensari rue ben' nao ta rnazin quie, ben' ru'e chopa di'idza'? ¹⁸ Pero naca Diuzi testigo quiendo' de que bibè'lèndo' le'e chopa di'idza'. ¹⁹ Pues zi'i Diuzi, ben' naca Cristo, biru'enè' benè' chopa di'idza'. Lèdi'idza' quienè' rguixogue'lia' Silvano len Timoteo le'e. Nacan tali yugulu ca unè' Cristo. ²⁰ Lao na'a Cristo uzucazi Diuzi duzete di'idza' quienè' cabè' unè' huenè'. Quie lena' caora yeyuezero Diuzi, reya'ala' yèbironè' "can' gaca" tanun quie Cristo Jesús. ²¹ Naca Diuzi ben' gun fuerza quiero ta inaoro xneza Cristo biidzebiro biusanron. Naca Diuzi ben' bdè' rà'o gacaro ben' quienè'. ²² Lèbè' gunnè' ra'o fuerza valor nacan ca quie tu sello quiero cuenda ulu'en tali nacaro ben' quienè'. Lèbè' bdze'nè' Bichi Be quienè' lu'u guicho laxta'oro ta xela'adyi'ro gun Diuzi ra'o duzete ca unè' gunnè' ra'o.

²³ Pero chi binetza'a ciudad Corinto cabè' bia' pensari dza na', rgun-tia' Diuzi naquè' testigo quia', cala bire'enda' tza'a. Por nun quie dan' reyèchi'la'adya' le'e biuya'a. ²⁴ Cala re'enndo' huendo' le'e mandado zi'laza ca ta huele inaole xneza Cristo. Pues banaole xneza Cristo fuerte gula. Ca re'enndo' huendo' quiele, re'enndo' gacalèndo' le'e sule mazara gusto.

2

¹ Quie lena' bia' pensari biguida' tatula ideyuba' le'e, porque chi guida' ideyuba' le'e, bisule gusto conlè nè'èdi' dan'rue'ni tila' le'e. ² Chi tanun quie dan' bida' bedeyuba' le'e bisule gusto, ¿nuzi yezu nè'èdi' gusto? Pues le'ezi huaca yezule nè'èdi' gusto, le'e ben' udila'. ³ Por nun quie lena' aose'ela' tu guichi laole dza na'te ta inezile ca naca pensari quia', porque bigu'unda' guida' ideyuba' le'e ta uzule nè'èdi' bayèchi' nun quie ca ruele. Ta nacalá mejor reya'ala' uzule nè'èdi' gusto. Chi zua' gusto, zela'adyi'ria' lente le'e huazule gusto yugulule. ⁴ Cati bia' guichi dza na', tantozi guqueda' bayèchi', uredya' nun quie ca ruele. Pero cala aose'ela' guichi laole ta sule bayèchi', dechan' aose'ela' guichi laole ta inezile cabè' nedyè'ètzegueda' le'e.

Ni rnèn cabè' reya'ala' yezi'zero quie ben' bē tamala

⁵ Pero chi nun quie tu ben' zu ladole guca tu bayèchi', pues cala tuzi nè'èdi' bzunè' bayèchi', pero lèscan' bzunè' lente le'e bayèchi'. Lena' inia' le'e como dan' bire'enda' hue'lia' le'e di'idza' zè. ⁶ Cabè' castigo babèle ben' na' cati begu'udi'le, con lèzin aodizunè' quie xquia quienè' cabè' bènè'. ⁷ Na'ra mejorla yezi'zele quienè' yeyuele di'idza' zela'adyi' cuenda bira gaquenè' zi'laza biyezunè' gusto nun quie raquenè' bayèchi' gula. ⁸ Quie lena' inia' le'e tatula, reya'ala' ulu'elenè' cabè' nedyè'èlenè'. ⁹ Aose'ela' guichi laole dza na' ta aodixogui'a le'e cabè' reya'ala' huele quie ben' na'. Cana' bia' le'e prueba ta inezda' chi zule dispuesto inaole huele cabè' nia'. ¹⁰ Na'ra con nu ben' si'zele con biti'tezi cabè' bènè', lèscan' nè'èdi' huezi'zeria' quienè', porque con nutezi ben' aozi'zia' quie, aozi'zia' quienè' lao Cristo por nun quie le'e. ¹¹ Cana' hua' cuenda bisi' xan' taxi'ibi' Satanás lato huelènan ra'o. Aneziro dyè'èdi' cabè' nacan yela' mala quienan.

Biuzu Pablo gusto zunè' yedyi Troas

¹² Cati bdyina' yedyi Troas ta quixogui'a di'idza' quie Cristo, cana' guca blè'èda' detzegue lato hua' dyin quie Cristo na'. ¹³ Pero biuzu guicho laxta'ohua' gusto nun quie ta bibedila' bichiro Tito. Lena' gudya' ja ben' quie Cristo nita' yedyi na' azyia'a. Na'ra beya'a yedyi nebaba Macedonia.

Conlè Cristo huero gan lao xan' taxi'ibi'

¹⁴ Reya'ala' yèbiro Diuzi diuxcalelo' nun quie conlè lèbè' nuelèro Cristo Jesús tuze huero gan lao xan' taxi'ibi'. Cana' use'ela' Diuzi ra'o ta quixogue'ro

benë' di'idza' quie Cristo ta huebë'jê' lëbë'. Lena' nacan ca quie tu ta rla' zixi zeo duze yedyi layu. ¹⁵ Lëscan' ra'o, nun quie nacaro ben' quie Cristo, nacaro ca quie tu ta rla' zixi zeo rdyinnan ga zu Diuzi, rdyinnan ga zu ja ben' nao xnezë', ben' yeyo guibá. Lëscan' rdyinnan ga zu ja ben' birue quie xti'idzë', ben' yeyo lao gui' gabila. ¹⁶ Quie ja ben' birue quie xti'idzë', ben' yeyo lao gui' gabila, naca di'idza' rguixogue'ro ca quie tu ta rla' bayatza gutin benë'. Pero quie ja ben' nao xnezë', ben' yeyo guibá, naca di'idza' rguixogue'ro ca quie tu ta rla' zixi zeo gunnan yela' neban tuzioli. ¿Nu gaca tzioñe'e cabë' nia' niga? ¹⁷ Cala rdando' ruendo' negocio conlë di'idza' la'iya quie Diuzi cabë' rue zë ben' tula, pero nêto', como re Diuzi cabë' inaro, rdando' rguixogue'ndo' di'idza' la'iya quie Diuzi du galo cabë' reya'ala' hue ben' use'ela' Diuzi. Ruendo' cabë' reya'ala' hue ben' rue dyin quie Cristo.

3

Ni rnën cabë' naca quiero nun quie bega'ntza'olë Diuzi ra'o tacubi

¹ Cati rnando'cana' ¿ca bi pensari ruele? ¿Ruele pensari ruendo' cuinndo' ben' ze? ¿O chi re'enle ulu'endo' le'e tu guichi ga rnën nacando' ben' huendo? ¿O chi re'enle inabando' le'e tu guichi cana' cabë' rue bala ja benë'? ² Bihueno' cana', como dan' le'e cuinle nacale ca quie tu guichi ga rnën nacando' ben' huen. Con tuzi le'e, na'ra gabira guichi rdziogue. Nacale ca quie tu guichi ta bë Diuzi bzunë'n lë'ë guicho laxta'ondo' cuenda ulaba yugulu benë' len inezijë' bi re'en inan. ³ Lëscan' nacale ca quie tu guichi ta bë cuin Cristo bënnë' nêto' ta usedyinndo'n. Binacale ca quie di'idza' ta bzu benë' conlë tinta. Nacale ca quie di'idza' ta bzu Diuzi neban lao na'a Bichi Be quienë'. Binacale ca quie di'idza' ta bzu Diuzi lë'ë tu yo naca tabla dza na'. Nacale ca quie di'idza' ta bzu Diuzi lë'ë guicho laxta'ondo'.

⁴ Nacan dula'adyi'ndo' cabë' rnando' como dan' lao na'a Cristo sudyi'ilëndo' Diuzi. ⁵ Quele fuerza valor quiendo' cuinzindo' ruendo' ca mandado hue Diuzi nêto', dechan' lëbë' gunnë' fuerza valor quienë' ta huendo' yugulu ca ta inanë' huendo'. ⁶ Ulio Diuzi nêto' ta huendo' dyin quienë' nun quie dan' bega'ntza'olënë' ra'o tacubi. Cala lao na'a ley bzu Diuzi lë'ë yo dza na' bega'ntza'olënë' ra'o tacubi, dechan' lao na'a Bichi Be quienë', ben' yu'u lu'u guicho laxta'oro. Ca naca ley bzu Diuzi lë'ë yo, lëley rchugulina quiero gatiro. Pero ca naca Bichi Be quie Diuzi, lëbë' gunnë' yela' neban quiero tuzioli.

⁷ Bzu Diuzi ley quienë' lë'ë yo pca'nnë'n lao na'a Moisés. Cati pca'nnë'n lao na'a Moisés, caora na' guca titi'tzegue laohuë'. Tanto guca titi'tzegue laohuë', biuzaque' ina' yaca ben' Israel laohuë'. Pero la'acazi guca titi'tzeguena, beyulacazin. Tanto nacan belao lëley na', conlë xni' quie Diuzi bdyinnan, la'acazi rchugulina quiero gatiro, ⁸ pero mazara belao'tzegue naca di'idza' pca'n Bichi Be quie Diuzi para ra'o. ⁹ Quie lena' inaro: Chi guca ley na' belao dza na', lëley na' rchugulina quiero gatiro, na'ra nacara belao'tzeguera lëdi'idza' rguixogue'n ra'o ca rue Diuzi zunë' dispuesto ta ilë'ënë' ra'o ben' laxta'o yëri. ¹⁰ Lëley na' gucan belao dza na'te, pero biutila ley na' conlë lëdi'idza' rguixogue'n ra'o zuë' dispuesto ta ilë'ënë' ra'o ben' laxta'o yëri. Lena' nacaran belao'tzegue quele ca ley na'. ¹¹ Pues chi lëley na' gucan belao dza na'te, la'acazi tu chi'zi unabë'na, na'ra belao'tzeguera naca ta inabë' tuzioli.

¹² Nun quie dan' nezindo' nacan tali cabë' nando', quie lena' birdzebindo' rguixogue'ndo' xti'idza' Diuzi zaca'lao lao ja benë'. ¹³ Biruendo' nêto' cabë' bë Moisés. Ptaconë' tu la'ari' laonë' ta biilë'ë ja ben' Israel laohuë' cati

beyulan bira guca titi'n, porque decazide yeyulacazin. ¹⁴ Pero biuyoñe'e ben' Israel, ben' unita' dza na'. Lëscan' na'a birioñe'e ja ben' Israel cati rulabajë' lë'ë guichi ga rguixogue'n quie dza bega'ntza'olë Diuzi xuzixta'ojë' tiempote. Birioñe'ejë' nun quie nechula guichojë'. Bineduba guichojë' tachula, como dan' ruen zi inaoro xneza Cristo, na' yeduban. ¹⁵ Hasta lente na'a, cati rulaba ben' Israel di'idza' bzu Moisés lë'ë guichi, nenechula guichojë' netza'la rioñe'ejë'n. ¹⁶ Pero cati inaoro xneza Cristo, na' yeduba tachula guichoro. ¹⁷ Cristo naquë' Bichi Be quie Diuzi. Nu ben' yu'u Bichi Be quie Diuzi naquë' libre. ¹⁸ Quie lena' ra'o yuguluro, como abeduba tachula guichoro, nacaro ca quie tu yaohuan rseni'n gui', pero gui' quie yela' bala'ana quie Cristo rseni'ro. Cana' naca quiero yedyinro gacaro mazara ca naca Cristo, porque yugu dza raca quiero runné' ra'o yela' bala'ana quienë'. Cana' rue Cristo, ben' naca Bichi Be quie Diuzi.

4

¹ Quie lena' biyeyatendo' como dan' bë Diuzi tu cule quiendo' bdë'në' nëto' ta huendo' tu dyin quienë'. ² Bire'enndo' huendo' ta negachi' ta naca yela' stu'. Birzi'ndo' yë'. Birguixogue'ndo' ta binaca tali. Birguixogue'ndo' ta birna di'idza' la'iya quie Diuzi. Pues tuz ta naca tali rguixogue'ndo'. Quie lena' bisaque' ina ja benë' nacando' ben' mala. Ca ta ruendo', ruendo' lao Diuzi. ³ Pero rna ja benë' nacan zëdi ta tzioñe'ejë' con cabë' rna di'idza' quie Diuzi rguixogue'ndo'. Rnajë' binacan quiejë' ta hue quieyaquë'n. Pero ben' gaca quie lao gui' gabila, lëjë' raquejë'n zëdi rnajë' binacan quiejë' ta hue quieyaquë'n. ⁴ Nun quie birue quieyaquë'n, bë xan' taxi'ibi' chula guichojë' cuenda bitzioñe'ejë' con cabë' ina di'idza' la'iya quie Diuzi, como dan' lëdi'idza' na' rguixogue'n quie Cristo. Tuzi Cristo nacaré' ben' bala'ana, ben' naca Diuzi guquë' benë', blë'ë yaca benë' lëbë'. ⁵ Cati rguixogue'ndo' di'idza' la'iya quie Diuzi, quele rguixogue'ndo' ruendo' cuinndo' ben' ze, dechan' rguixogue'ndo' yaca benë' de que naca Jesucristo Señor quiero ben' ze. Na'ra ca raca quiendo' nacando' ca ben' rue dyin zan yu'u quiele nun quie nadyë'ëndo' Jesús. ⁶ Naca Diuzi ben' bë mandado dza na'te ta galo gui' useni'na ga naca chula. Lëscan' naca Diuzi ben' bzioñe'e ra'o ca naca quienë' cuenda bira gaca guicho laxta'oro ca guicho laxta'o ben' rda lao lato lao chula. Cana' bënë' quiero cuenda yeyuebë'ro ca naca yela' huaca quienë'. Pues lëyela' huaca na'ruen rseni'na lao Jesús raca titi'n.

Reya'ala' sudyi'ilëro Diuzi dza rdaro lao yedyi layu

⁷ Pero tu ta naca huen gula, tu ta bzioñe'e Diuzi nëto', lena' yu'un lu'u guicho laxta'ondo'. Nacando' ca nu yeso' yu ta bide fuerza valor quie. Lena' rulu'en tali naca fuerza valor quiendo' fuerza valor quie Diuzi, cala quiendo'. ⁸ Ba'ala'cazi de zëdi quiendo' con gati' tezi rdando', biyela'te quiendo'. Ba'ala'cazi rdëbindo' raquendo', biyeyatendo'. ⁹ Ba'ala'cazi rue ja benë' nëto' bizinaquezi, biusanla'adyi' Diuzi nëto'. Ba'ala'cazi quijë' nëto' layu, bisuecaziyë' gutijë' nëto'. ¹⁰ Con gati'tezi rdando' raca quiendo' cabë' guca quie Jesús re'en ja benë' gutijë' nëto'. Pero rute rusela Cristo nëto'. Lena' rulu'en zu Cristo nebannë' sëlënë' nëto', bibi raca quiendo'. ¹¹ Pues yugu dza rdando' lao yedyi layu ruen zudyi guti ja benë' nëto' nun quie nacando' ben' quie Jesús. Cana' raca quiendo', como dan' cati bihue ja benë' gan gutijë' nëto', hualë'ë ja benë' zu Cristo racalënë' nëto'. Lente bë'ëla' zuba' quiendo' ta yeyudyi yedu quie, lena' rulu'en naca Jesús ben' run yela' neban quiendo' yugu dza. ¹² Nun quie rguixogue'ndo' di'idza' la'iya quie Diuzi, ruen zudyi

guti ja benè' nètò'. Pero para le'e, nun quie rguixogue'ndo' di'idza' la'iya quie Diuzi, de yela' neban quiele tuzioli.

¹³ Rnèn lè'è guichi la'iya quie Diuzi cani: "Rzudyi'ilia' con cabè' rna Diuzi. Quie lena' rguixogui'a ja benè' di'idza' la'iya quienè'." Lèscan' cana' naca quiendo'. Tuzcazi naca pensari quiendo' len pensari quie ben' bzu di'idza' lè'è guichi la'iya dza na'te. Rzudyi'ilèndo' Diuzi. Quie lena' rguixogue'ndo' benè' ja di'idza' la'iya quienè'. ¹⁴ Cana' rnando' nun quie dan' nezindo' dyè'èdi Diuzi psebannè' Jesús. Lèscana' nezindo' dyè'èdi usebannè' ra'o nun quie dan' nacalèro Jesús tuze. Cana' yezi'nè' ra'o ta tzesulèronè' guibá ga zuè'. ¹⁵ Huaca huen quiele cabè' uzacando' nètò', porque cati huela'iya Diuzi ben' zè, lèscan' ben' zè gaca yèbijè' Diuzi diuxcalenè'. Cana' huejè' Diuzi ben' zè.

¹⁶ Quie lena' biyeyatendo'. Ba'ala'cazi reyudyi redu fuerza valor quie bè'èla' zuba' quiendo', pero yugu dza rudze' Diuzi fuerza valor quienè' lu'u guicho laxta'ondo'. ¹⁷ Ca naca dza rdaro lao yedyi layu, la'acazi yedza-galaotzeguero, lè'èti'zi raca quiero nun quie dan' cati yezi' Diuzi ra'o, caora na' yeyaca dya'a te tela laohue quiero. ¹⁸ Pues cala rzèla'adyi'ro gaca quiero ta de lao yedyi layu, dechan' tahuen hue Diuzi quiero guibá ga zunè', lena' rzèla'adyi'ro gaca quiero. Cana' huero como dan' ca naca ta de lao yedyi layu, hueyudyi huedu quien, pero ca naca tahuen hue Diuzi quiero guibá ga zunè', biyeyudyi biyedu quien.

5

¹ Naca bè'èla' zuba' quiero ca quie tu yu'u ga zuro, pero hueyudyi huedu quien. Neziro dyè'èdi chi aodyiagui' bè'èla' zuba' quiero naca ca yu'u, zu tu tacubi guibá ta biyeyudyi yedu quie. Nacan ta bè Diuzi, cala ta bè benè'.

² Tu raca nezuro lao yedyi layu, rzèla'adyi'ro usanro yedyi layu yeyoro guibá yezuro lu'u bè'èla' zuba' cubi quiero. ³ Cana' yezuro lu'u bè'èla' zuba' cubi quiero ta iya'ro gacaro completo. ⁴ Pero tu raca nezuro lu'u bè'èla' zuba' gula quiero rdèbiro raquero bayèchi'. Re'enro usanro bè'èla' zuba' gula quiero ta yezuro lu'u bè'èla' zuba' cubi quiero cuenda yeyudyi yedu ca ta raca quiero lao yedyi layu, na' gata' lu'u yela' neban cubi quiero. ⁵ Diuzi na' bzioñe'enè' ra'o ca huenè' quiero. Lèbè' bdze'nè' Bichi Be quienè' lu'u guicho laxta'oro ta xela'adyi'ro talicazi huenè' quiero ca unè' huenè' quiero.

⁶ Quie lena' biyeyatero. Neziro tu raca nezuro lu'u bè'èla' zuba' gula quiero, bisaque' yeyoro guibá tzasulèro Cristo. ⁷ Rdaro rzudyi'ilèro Diuzi gacalènè' ra'o. Rdaro rzudyi'ilèro lèbè', birdaro rzudyi'ilèro ta ilè'èro ta raca lao yedyi layu. ⁸ Quie lena' nuxela'adyi'ro nacalan dya'a quiero gatiro cuenda yeyoro ta sulèro Cristo ga zuè'. ⁹ Quie lena', huero bala ta inaoro huero puro cabè' re'en Cristo, la'acazi cati nebanro, la'acazi cati bagutiro. ¹⁰ Cana' reya'ala' huero como dan' decazide yuguluro tziocaziro lao Cristo ichugulinè' quiero quie quiero, quižunè' ra'o cabè' ta bèro dza rdaro lao yedyi layu, chi bèro tahuen, chi bèro tamala.

Begantza'olè Diuzi ra'o tacubila

¹¹ Quie lena' como dan' neziro dyè'èdi reya'ala' yeyuežero xa'nro Diuzi, cana' ruela'adyi'tzeguendo' ta huendo' gan inao ja benè' xneza Jesús. Pero banezi Diuzi ca naca pensari quiendo'. Lèscan' le'e, re' enndo' inezirèle ca naca pensari quiendo'. ¹² Cala rnando' ruendo' ze cuinndo', dechan' re'enndo' sule gusto cabè' ruendo' cuenda yeqèbìle quie nu ben' rnè contra nètò', ben' re'en ilè'è ja benè' lèjè' ben' huen, pero bire'enjè' inezi ja benè' ca naca pensari yu'u lu'u guicho laxta'ojè'. ¹³ Pero chi racando' luco cabè' najè', quie Diuzi na' racando' luco. Chi biracando' luco, na'ra lena' ruen huen

quiele. ¹⁴ Nun quie nedyë'ë Cristo ra'o, decazide huero ca mandado ruenë' ra'o huero. Pues neziro dyë'ëdi guti Cristo lë'ë yaga cruzo lao laza yuguluro. Quie lena' ilë'ë Diuzi ra'o cabë' ben' bagutirë cati guti Cristo. ¹⁵ Cana' bë Cristo, gutinë' lao laza yuguluro tacuenda bira huero tuz ta yega'nnan huen quiero, pero na'ra huero tuz ta yega'nnan huen quie Cristo, ben' guti beban para ra'o. ¹⁶ Tanun quie lena', bira huero pensari ca pensari rue ja ben' nita' lao yedyi layu. Pues dza na'te bëro pensari naca Cristo benë'zi ca pensari rue ja ben' nita' lao yedyi layu, pero bira ruero pensari cana'. ¹⁷ Lëscan' quie lena', chi nuelëro Cristo tuže, abetza' Diuzi pensari quiero, abecubinë'n. Baode quie pensari gula quiero, babeyu'uro pensari cubi.

¹⁸ Cana' bë Diuzi bega' ntza'olënë' ra'o nun quie guti Cristo lë'ë yaga cruzo. Na'ra bdë' Diuzi nêto' ta tzetixogue'ndo' benë' de que zu Diuzi dispuesto yega'ntza'olënë' lëjë'. ¹⁹ Cani inando': Por nun quie guti Cristo, bega'ntza'olë Diuzi yaca benëchi'. Quie lena' zu Diuzi dispuesto si'zenë' dula' xquia quiejë'. Ulio Diuzi nêto' ta tzetixogue'ndo' benë' cabë' bë Diuzi bega'ntza'olënë' lëjë'. ²⁰ Quie lena' bdyinndo' laole gudyindo' le'e cabë' mandado bë Cristo nêto' ta yëbindo' le'e. Nacan ca quie cuin Diuzi rnënë' rëbinë' le'e cati rnando' rëbindo' le'e. Cana' mandado quie Cristo ruendo' bë' rëbindo' le'e: Ulega'ntza'olë Diuzi. ²¹ Ni tu bibi dula' xquia bibë' Cristo. Pero por nun quiero blë'ë Diuzi lëbë' ca ben' de dula' xquia quie, bënë' lëbë' castigo lao lazaro cuenda caora nuelëro lëbë' tuže, cana' ilë'ë Diuzi ra'o ben' bide dula' xquia quie.

6

¹ Quie lena', como nacando' compañero quiele, ben' rue dyin quie Diuzi, rnabayëchi'ndo' laole bichu'unle tzala' la ca naca tahuen re'en Diuzi huenë' quiele. ² Lë'ë guichi la'iya quie Diuzi rguixogue'n ca una Diuzi cani: Huadyin dza gaca huen gula quiele, nacan dza cati yeda' ulidzale nê'ëdi'. Huadyin dza ute usela' le'e, nacan dza gacalia' le'e. Cana' una Diuzi. Na'ra uzëcara nagale porque abdyin dza gaca huen quiele, abdyin dza ute usela Diuzi le'e.

³ Birguilondo' zëdi len ja benë', bire'enndo' inajë' condre dyin quie Diuzi ruendo'. ⁴ Pero yugulu ca ruendo' re'enndo' ilë'ë ja benë' nêto' ben' rue dyin quie Diuzi. Re'enndo' ilë'ëjë' nêto' cana' nun quie rzuendo' dyë'ëdi cati raca tazëdi quiendo', lëscan' cati redzagalaondo' rdzioguendo' bi cosa. ⁵ Pues guca quiendo' benjë' nêto' zi', bdze'jë' nêto' dyiguiba, bebiojë' nêto' yedyi, bëndo' dyin zi'i gula, bigusindo', uduendo'. ⁶ Bablu'endo' nacando' ben' quie Diuzi como dan' ni tu tamala biruendo'. Banezindo' con cabë' rna di'idza' la'iya quie Diuzi. Nacaro ben' zëla'adyi', ben' huen, yu'undo' Bichi Be quie Diuzi, nedyë'ëndo' benë' du guicho du la'adyi'ndo', ⁷ rguixogue'ndo' benë' di'idza' la'iya quienë', ruendo' yela' huaca quienë'. Dan' ruelëndo' benë' puro tadya'a, lena' rdando' laojë' birdzebindo' quixogue'ndo'jë' xti'idza' Diuzi, birdzebindo' ruendo' defender cuinndo' laojë'. ⁸ Bayu'u rapala'n benë' nêto', bayu'u birapala'një' nêto'. Bayu'u rnajë' quiendo' ruendo' tahuen, bayu'u rnajë' quiendo' biruendo' tahuen. Bayu'u rlë'ëjë' nêto' ca ben' rguixogue' tali, bayu'u rlë'ëjë' nêto' ca ben' birguixogue' tali. ⁹ Bayu'u birzënajë' quiendo', bayu'u rzënajë' quiendo'. Bayu'u ruen žudyi gatindo', pero bigatindo'. Bayu'u rusaca ja benë' nêto' bizinaquezi, pero bisuejë' gutijë' nêto'. ¹⁰ Ba'ala'cazi raca bayëchi' quiendo', pero zucazindo' gusto. Ba'ala'cazi nacando' ben' yëchi', pero gacalëndo' ben'zë. Ba'ala'cazi zundo' abide quiendo', pero naca quiendo' yugulu ta de.

¹¹ Bicha', le'e ben' ciudad Corinto, dyë'ëdi gula bë'lëndo' le'e di'idza'. Du guicho du la'adyi'ndo' nedyë'ëndo' le'e. ¹² Cala nêto' bizundo' gusto conlë'le'e,

dechan' le'e bizule gusto conlë nêto'. ¹³ Rnabayêcha' le'e cabê' rue tu xuzi xcuidi' lënê' zi'inê' ta idyê'êle nê'êdi' du guicho du la'adyi'le cabê' nedyê'êda' le'e du guicho du la'adya'.

Nacaro ca quie tu idao' r nabê'ra quie Diuzi

¹⁴ Bihuelêle tuze len ja ben' binao xneza Cristo. Rnaba' le'e tu pregunta: ¿Ga huen dyin chi huelê ja ben' rue ta yu'u ni'a xnezi tuze len ja ben' birue ta yu'u ni'a xnezi? ¿Biži huero gaca gui' lëbi len tachula? ¹⁵ ¿Biži gaca hue Cristo tuze conlë xan' taxi'ibi' Satanás? ¿Biži gaca hue tu ben' nao xneza Cristo conlë ben' binao xneza Cristo? ¹⁶ ¿Binezile binacan lëbi idao' r nabê'ra re' ciudad Jerusalén len ja ídolo? Pero lëscan' le'e nacale ca quie idao' r nabê'ra quie Diuzi, ben' neban tuzioli. Cana' una cuin Diuzi caora unê' cani:

Nê'êdi' sua' talia' le'e.

Nê'êdi' naca' Diuzi quiele, nacale ben' tzionla'adyi' nê'êdi'.

¹⁷ Lëscan' unarê Diuzi caniga:

Bihuelêle tuze conlë ben' birue quie di'idza' quia'.

Bihuele cabê' ta naca žudyi ruejê'.

Na'ra nê'êdi' huayezila'adya' cabê' ruele.

¹⁸ Cana' gaca' Xuzile, cana' gacale ži'ina'.

Lena' una Diuzi, tuzi lëbê' de yela' huaca quie.

7

¹ Pues bicha', ben' nedyê'êda', cana' naca di'idza' bega'nlê Diuzi ra'o huenê' quiero. Quie lena' reya'ala' gaparo cuidado bihuero xquia. Naca xquia ca quie tu nidyi' udyiaguin bē'êla' žuba' quiero len pensari quiero. Lëscan' biusanro huero Diuzi bala'ana, biusanro naoro xnezê' du guicho du la' adyi'ro.

Ben' Corinto betza'jê' pensari quiejê', bayu'ujê' pensari quie Diuzi

² Uzêcara nagale dyê'êdi ca inando' le'e. Ni tule bibêndo' quiele tamala. Ni tule bibdyiaguin'ndo' quiele. Ni tule biuzi'ndo' le'e yê'. ³ Cala raohua' le'e xquia. Nacan cabê' baonia' le'e dza na', nedyê'êda' le'e du guicho du la'adya', la'acazi chi nebana', la'acazi chi gatilia' le'e. ⁴ Lega redaohueda' zudyi'ilia' le'e. Ba'ala'cazi neruen quiero redzagalaoro, redaohuetzegueda'. Lega gusto sua' conlë le'e.

⁵ Desde dza cati bdyindo' yu nebaba Macedonia, bibi yela' huezila'adyi' guta' quiendo', dechan' guta' tazêdi con gati'tezi uyondo'. Raca huedila ga rdando', rutêbin nêto' rdzebindo'. ⁶ Pero reyuežela'adyi' Diuzi ben' raca bayêchi' quie. Lena' beyuežela'adyi' Diuzi nêto', use'ela'nê' Tito bedena'nê' nêto' redaohuendo'. ⁷ Pero cala tuzi redaohuendo' nun quie bedena' Tito nêto', lëscan' redaohuendo' como dan' le'e beyuežela'adyi'le Tito. Una Tito nêto' cabê' re'enle ilê'êle nêto'. Lëscan' una Tito cabê' raquale bayêchi' rdêbile bi raca quia'. Dan' rdêbile bi raca quia', lena' reyuežela'adyi'le nê'êdi' mazara.

⁸ La'acazi bzua' le'e bayêchi' nun quie guichi use'ela' laole dza na', bi-raquedna' zi' na'a. Pero chi guqueda'n zi' dza na'te nun quie bzua' le'e bayêchi' tu chi'zi, ⁹ redaohueda' na'a como dan' nun quie lena', betza'le pensari quiele bayu'ule pensari huen. Lena' redaohue Diuzi cabê' bèle. Lena' cala tamala bēndo' quiele bzundo' bayêchi' quiele. ¹⁰ Porque cati ruzu Diuzi ra'o bayêchi', lena' gacalên ra'o ta yetza'ro pensari quiero, yu'uro pensari quie Diuzi, gaque quiero yela' neban tuzioli. Lëpensari bayêchi' nacan pensari quie Diuzi, bireya'ala' gaquero'n zi'. Pero ca naca pensari bayêchi' raca lao yedyi layu, lëpensari na' bihuen quie ja benê' tadya'a. Huen

quiejë' ta gatijë' tuzioli yeyojë' lao gui' gabila. ¹¹ Pero le'e bële tahuen caora bzu Diuzi bayëchi' quiele. Ulena' cabë' guca quiele. Dyë'ëdi bële casa cabë' tamala guca quiele entre le'e. Du guicho du la'adyi'le uidxogue'le cabë' guca quiele. Bdza'le bdzebile cabë' tamala guca entre le'e. Lagu'untele guida'ideyuba' le'e. Laozutele dispuesto huele castigo ben' bë tamala. Lena' rulu'en quiele gabi dula' napale tanun quie ben' bë tamala. ¹² Caora use'ela' guichi quia' laole dza na', bipse'ela'n nun quie tuzi ben' bë tamala, ni quele quie tuzi ben' bega'n yela' stu' quie tanun quie ben' bë tamala, dechan' use'ela' guichi quia' laole ta inezile cabë' rdëbindo' raquendo' quiele lao Diuzi. ¹³ Pero nun quie cabë' bële, bële tahuen redaohuendo'.

Pero quele tuzi len redaohuendo', lëscan' redaohuendo' nun quie zu Tito gusto ca bële. Dyin quiele yugulule bega'n guicho laxta'onë' chizi. ¹⁴ Bron huen cabë' agucha' Tito, agucha'në' zua' contento conlë le'e. Na' gucan tali yugulu cabë' unando' le'e, lëscan' gucan tali yugulu cabë' gudyindo' Tito quiele de que zundo' contento conlë le'e. ¹⁵ Lëscan' zu Tito contento conlë le'e caora reza'la'adyi'në' le'e cabë' bële, bële ca ta unanë' quiele huele. Lëscan' zunë' contento conlë le'e cabë' bële uzi'lenë' dyë'ëdi udapalenë' bala'ana. ¹⁶ Lëscan' redaohueda' ca ruele zudyi'ilia' le'e.

8

Rguixogue' Pablo quie dumi ptupajë'

¹ Na'ra bicha', re'enndo' hue'lëndo' le'e di'idza' cabë' bë Diuzi blu'enë' yela' ben' huen quienë', bagucalënë' ben' nao xneza Jesús, ben' nita' yu nebaba Macedonia. ² La'acazi guca zëdi gula quiejë', lena' gucajë' ca prueba chi du guicho du la'adyi'jë' naojë' xneza Jesús, pero bipsanjë', nenaøjë' xnezë' nezujë' gusto gula. Ba'ala'cazi nacajë' ben' yëchi' gula, ptupajë' dumi ze. Bëjë' ca ben' bibi rdziogue. ³ Naca' testigo redaohuejë' ptupajë' ca tu uzuejë'. Pues mazara ptupajë' ca tu uzuejë'. ⁴ Unabayëchi'jë' laondo' ta hue'ndo' lato gacalëjë' ben' bichiro, ben' nao xneza Jesús. ⁵ Bëterajë' mazara ca tu guquendo' huejë'. Tanëro bega'nlëjë' Diuzi di'idza' ta hue quieyaquë' mazara quienë', lëscan' ta hue quieyaquë' mazara quiendo' según ca re'en Diuzi huejë'. ⁶ Quie lena' unabando' cule lao Tito chi bisaque' guidë' useyudyinë' ideyubinë' le'e ta utupanë' dumi ca dumi uzulaonë' rutupanë' dza na'. ⁷ Na'ra como dyë'ëdi rue quiele xti'idza' Diuzi ca re'ennë' huele, como dyë'ëdi zudyi'ilële lëbë', como dyë'ëdi rguixogue'le benë' xti'idzë', como dyë'ëdi nezile cabë' nan, como dyë'ëdi naole xnezë', como dyë'ëdi nedyë'ële nëto', lëscan' dyë'ëdi reya'ala' utuparële dumi ta gacalële yaca los demás ben' bichiro, ben' nao xneza Jesús.

⁸ Quele nia' le'e rua' mandado zi'laza huele quie dumi cabë' nia'. Nia' le'e re'enda' inezile cabë' bë ja ben' tula, ben' nao xneza Jesús. Du redaohuejë' ptupajë' dumi. Lena' re'enda' inezile cuenda huele tuzi ca bëjë'. Lena' ulu'en quiele tali nedyë'ële Diuzi. ⁹ Cana' re'enda' como dan' banezile dyë'ëdi cabë' bë Jesucristo quiele. Yela' ben' huen quienë' taže gucalënë' le'e. La'acazi naca quienë' yugulu ta de quie Diuzi, bidë' detë'ë lao yedyi layu, guquë' ben' yëchi' nun quie dan' nedyë'ëne' le'e. Dyin quienë' huata' tadya'a gula quiele guibá ga zu Diuzi.

¹⁰ Na'ra re'enda' inia' le'e ca naca pensari quia'. Baguca tu iza baozulaole dyë'ëdi. Bële huen ptupale dumi. Bële huen bedaohuele ptupalen. ¹¹ Na'ra useyudyile utupale dumi yedaohuele cabë' bedaohuele dza na'. Utupale quie quiele ca tu ta de quiele. ¹² Porque chi tali re'enro hue'ro Diuzi

gun, huayezila'adyi' Diuzi ca tu ta de quiero utuparo. Pues bigue'en Diuzi hue'ronë' tu ta bide quiero.

¹³ Na'ra nia' le'e reya'ala' gacalële laguedyile, pero quiele ta uca'n yëchi'le cuinle. ¹⁴ Reya'ala' gacalële laguedyile cuenda gabi idziogue laguedyile, gaca tuzi ca ta de quiele len laguedyile. Pues na'a como gabi rdzioguele quiele, lena' reya'ala' gacalële laguedyile ben' rdziogue. Na'ra cati idyin dza idzioguele quiele, cana' iyacalëjê' le'e gunjê' ca ta rdzioguele. Cana' yugulule birabi idzioguele quiele. ¹⁵ Lena' nacan cabê' rguixogue'n lë'ë guichi la'iya quie Diuzi cabê' bê' Diuzi dza na', pchizanê' ta naca ca yëta xtila ta gao ja ben' Israel. Lena' rnën lë'ë guichi cani: "Nu ben' bezi' tazê, bigucan sobre. Lëscan' nu ben' bezi' tadao' bicu'zi, bibdzioguen."

Use'ela' Pablo Tito len ja compañero quienê'

¹⁶ Xcale Diuzi bdze'nê' pensari lu'u guicho laxta'o Tito ta gacalënê' le'e cabê' pensari yu'a ta gacalia' le'e. ¹⁷ Na'ra yaxe Tito cabê' gucha'nê' cabê' re'enda' huenê' quiele. Como re'entzegenê' gacalënê' le'e, zunê' dispuesto ta sa'nê' ideyubanê' le'e cabê' gusto rapê'.

¹⁸ Lëscan' ise'ela'ndo' itu ben' sa'lê Tito tuze. Ja ben' nao xneza Jesús nita' tu tu yedyi ga redupajê', lega raxejê' lëbê' nun quie dyê'ëdi rguixogue'nê' benê' xti'idza' Diuzi. ¹⁹ Cala tuzi len ruen lëbê' ben' huen, lëscan' bdê' ja ben' nao xneza Jesús lëbê' ta sa'lënê' nêto' tzaže utupando' dumi ta gacalëndo' yaca los demás ben' nao Jesús, ben' bibi de quie. Lena' baruendo' na'a cuenda huendo' Cristo bala'ana, lëscan' cuenda ulu'endo' cabê' racalê ben' nao xneza Jesús laguedyijê'. ²⁰ Cana' re'enndo' huendo' cuenda bigata' tazêdi ina ja benê' contra nêto' nun quie rzi'ndo' dumi. ²¹ Pues yugulu ca ta ruendo' re'enndo' tzu'un ni'a xnezi. Cala tuzi lao Diuzi re'enndo' tzu'un ni'a xnezi, pero lëscan' lao ja benê' re'enndo' tzu'un ni'a xnezi.

²² Conlê lëjê' ise'ela'ndo' itu ben' bichiro, ben' sa'lê lëjê'. Lëben' na' dyê'ëdi ablu'en quienê' zê lasa cabê' ruenê' dyin quie Diuzi du guicho du la'adyi'nê'. Na'ra maztera ruenê' du guicho du la'adyi'nê' na'a nun quie anuxela'adyi'nê' le'e huele cabê' agucha'nê' huele. ²³ Chi inaba yaca benê' nuži Tito, na' yëbilejê' naca Tito ben' compañero quia', ben' ruelê nê'ëdi' dyin quie Diuzi ca dyin ruendo' racalëndo' le'e. Lëscan' quie ichopa ben' sa'lê Tito, nacajê' ben' use'ela' laguedyiro ben' nao xneza Jesús, ben' rapa Cristo bala'ana. ²⁴ Nun quie ta inezi ja ben' nao xneza Jesús nita' tu tu yedyi, ulelu'ejê' cabê' tali nedyê'ële ben' bichiro ben' nao xneza Jesús. Lëscan' ulelu'ejê' napando' razón cati rëbindo' benê' zucazile dispuesto ta gacalële laguedyile, ben' nao xneza Jesús.

9

Re'en Pablo gacalê ja ben' ciudad Corinto, len ja ben' ciudad Jerusalén

¹ Na'ra quie dumi reya'ala' utupale ta gacalële ben' bichiro, ben' nao xneza Jesús, biruguente ise'ela' guichi laole le'e, ben' nita' yu nebaba Acaya, ² porque nezda' dyê'ëdi zule dispuesto utupalen. Redaohueda' yëpa' ben' bichiro, ben' nita' yu nebaba Macedonia, cabê' desde iza aode zule dispuesto gacalële laguedyile. Quie lena', ben' zêja, ben' Macedonia, zujê' dispuesto gacalëjê' laguedyijê' nun quie ca ruele le'e racalële laguedyile. ³ Na'ra ise'ela' Tito len compañero quienê' laole cuenda gacalëjê' le'e utupale dumi huele tahuen cabê' agucha' ja benê' huele cuenda bigaca di'idza' falso cabê' agucha'jê'. Lena' nia' cuenda lahuetele bala cabê' baonia' le'e huele. ⁴ Porque chi nequi'a bala ja ben' nita' yu nebaba Macedonia, bire'enda'

ila'ndo' il'èndo' bibèle bala biptupale dumi. Bire'enda' gaca yela' stu' quiendo' len le'e nun quie pxela'adyi'le nètò' utupale dumi, na' biptupale dumi. ⁵ Quie lena' bia' pensari ruguinte inaba' cule lao Tito len compañero quienè' guidajè' ideyubijè' le'e cuenda gacalèjè' le'e utupalèjè' le'e dumi cabè' bega'nro di'idza' dza na'. Cana' bade dumi puestò ta ulu'en bedaohuele ptupalen, quele ptupalen de la fuerza. ⁶ Bigala'adyi'le con ca rnia' le'e: Chi gazaro tadao' bicu', lèzi tadao' bicu' usecho yezi'ro. Pero chi gazaro taže, lèzi taže usecho yezi'ro. ⁷ Quie lena' quie quiele reya'ala' utupale dumi ca tu pensari yu'u lu'u guichò laxta'ole. Bireya'ala' utupalen canezi ni a la fuerza. Reya'ala' sule gusto utupalen, como dan' nedyè'è Diuzi nu ben' ru'e gun quienè' gusto. ⁸ Cana' huela'ia Diuzi le'e taže gula cuenda gata' quiele, bibi idzioguele. Lèscan' huela'ia Diuzi le'e ta gata' quiele gacalèle ben' tula huelèlejè' tadya'a. ⁹ Cana' rnèn lè'è guichi la'ia quie Diuzi cani:

Taže racalè Diuzi ja ben' yèchi'.

Ca naca tadya'a ruenè' quiejè', biyeyudyi yedu quien.

¹⁰ Quie lena' rnia' le'e, naca Diuzi ben' run bini ta gazaro, lèscan' runnè' yela' huao ta gaoro. Lèbè' gunnè' quiele tacuenda bibi idzioguele gacalèle benè' huelèlejè' tadya'a. ¹¹ Cana' gata' yugulu cue' yela' uña'a quiele tacuenda gacalèlejè' taže. Quie lena' conlè dumi ise'ela'le lao na'ando', cana' yedao-huejè' yèbijè' Diuzi diuxcalelo'. ¹² Porque cati hue'rojè' ta ptupale ta gacalèle lèjè', cala tuzi ta rdzioguejè' hue'rojè', pero lèscan' nun quie hue'rojè' ta rdzioguejè', lena' yèbijè' Diuzi diuxcalenè'. ¹³ Cana' yeyuezejè' lao Diuzi. Lèscan' cabè' bèle quiejè', bè'lejè' ta bdzioguejè', lena' rulu'en tali rue quiele xti'idza' Cristo. Lèscan' yeyuezejè' lao Diuzi por nun quie dumi ze ptupale ta gualèle lèjè' len yugu ja ben' nao xneza Jesús. ¹⁴ Na'ra lèjè' ulidzajè' Diuzi nun quiele. Zujè' gusto conlè le'e nun quie cabè' bèle quiejè', cana' il'è'èjè' naca Diuzi ben' huen. ¹⁵ Xcale Diuzi dan' bèlènè' ra'o tadya'a. Tantozi bèlènè' ra'o tadya'a, bisuero saque' yèbironè' diuxcalelo' cabè' reya'ala' yèbironè' diuxcalelo'.

10

Una Pablo de yela' r nabè' quienè' naquè' apóstol

¹ Nè'èdi', Pablo, nun quie naca Cristo ben' reyèchi'la'adyi', ben' huen, rnabayècha' laole uzènagale ca inia' le'e. Na'ra bala le'e rnale naca' ben' rna di'idza' gaxo cati zulìa' le'e tuže, pero cati zua' zitu', naca' ben' rna di'idza' zi'laza. ² Tahuencazi chi', rnabayècha' laole uzènagale quia' dyè'èdi cati guida' ideyuba' le'e cuenda biruen zi ugunla'adya' pensari quieza' nun quie bala le'e raole nètò' xquia nale rdando' ruendo' ta racazi la'adyi'ndo', quele mandado quie Diuzi. Pues zua' dispuesto yela'lia'jè'. ³ Talicazi rdando' lao yedyi layu, pero birdilando' ca rdila ja ben' rda lao yedyi layu. ⁴ Netza'la ca ruendo' como dan' birzèndo' espada ca rzè ben' rda lao yedyi layu espada, pero napando' yela' rnabè' quie Diuzi. Conlè len suendo' udyiagu'ndo' ta naca fuerte gula rue contra Diuzi. ⁵ Cana' huendo' gan ta tzioñe'e ben' binuebè' Diuzi con cabè' rna xti'idzè'. Cana' huendo' gan quie nutezi ben' zè', nutezi ben' rudzun inezi ja benè' con cabè' rna xti'idza' Diuzi. Cana'huendo' gan ulu'endo' benè' netza'la naca pensari quie len pensari quie Cristo. Cana' huendo' gan ulu'endo'jè' ruguinte yetza'jè' pensari quiejè' ta yeyu'ujè' pensari quie Cristo inaojè' xnezè'. ⁶ Como banezile dyè'èdi con cabè' rna xti'idza' Diuzi, na'tera zundo' dispuesto ta huendo' castigo nu ben' birue quie xti'idza' Diuzi.

⁷ Le'e biruele pensari dyë'edi. Chi nu ben' zu ladole unanë' bdë' Cristo lëbë' ta gaquë' apóstol, na'ra lëben' na' reya'ala' tzioñe'enë' de que lëscan' bdë'rë Cristo nëto' ta gaçando' apóstol. ⁸ La'acazi tazë lasa baonia' le'e ben Cristo yela' rnabë' quiendo', biredue'da' inia' le'e cana' tatula. Ben Cristo yela' rnabë' quiendo' ta uzioñe'endo' le'e ta inaole dyë'edi xnezë', cala ta udyiagui'ndo' le'e. ⁹ Bire'enda' huele pensari use'ela' guichi laole ta idzebile con cabë' inën'lë'ëna. ¹⁰ Le'e rnale nuzua' lë'ë guichi puro di'idza' zi'laza, pero cati zua' ladole, rnia' le'e puro di'idza' gaxo, bireyažoga' inia' le'e di'idza' zi'laza. ¹¹ Pero nu ben' rna cana', reya'ala' inezijë' dyë'edi de que cabë' naca di'idza' ruzundo'lë'ë guichi cati zundo' zitu', cana'cazi di'idza' huazaque' hue'lëndo' le'e cati zundo' ladole.

¹² Bireyažondo' utilando' lëbi conlë lëben' rue že cuine. Pensari tondo ruejë' nun quie entre lëzijë' rlë'ëjë' cuinjë' ben' že, entre lëzijë' rlë'ëjë' cuinjë' ben' rutila lëbi. ¹³ Pero cala con ganzi yëbindo' benë' bëndo' huen, bëndo' dyin quie Diuzi. Bë' Diuzi laze quie quiendo' ga si'ndo' huendo' dyin quienë'. Lëscan' laze quiendo' guidando' hasta ciudad Corinto gan' zule. ¹⁴ Quie lena' cala rdetelando' laohue cabë' mandado bë Diuzi guidando' gan' zule. Chi tali bibë Diuzi mandado guidando' gan' zule, lena' aodetelando' laohue cabë' mandado bënë' nëto'. Pero zanëto' bidando' tanëro bedetixogue'ndo' le'e xti'idza' Diuzi. ¹⁵ Birnando' dyin bëndo' chi dyin bë ben' tula. Re'enndo' sudyi'ilële Cristo mazara cuenda saque' uzioñe'endo' le'e mazara con cabë' naca mandado bë Diuzi nëto'. ¹⁶ Cana' huaca tziondo' tzetixogue'ndo' di'idza' la'ia quie Diuzi ja yedyi nega'nra zitu' ga zule. Pero ga parte ga uyo ja ben' tula, baodixogue'jë' xti'idza' Diuzi, lëgan' na' bitziondo' nëto' biyëbindo' benë' dyin quiendo'.

¹⁷ Quie nu ben' re'en ina ja benë' nacajë' ben' že, mejorla inajë' Diuzi naquë' ben' že. ¹⁸ Porque chi hue Diuzi ra'o ben' že, talicazi nacaro ben'že, però chi huero cuinro ben' že, cala tali nacaro ben' že.

11

Una Pablo quie ja ben' huizi' yë', ben' na naca ja apóstol

¹ Rnaba' cule laole uzënegale quia' dyë'edi la'acazi chi raquele rnia' le'e pensari tondo. Con ca inia' le'e, huele cule uzënegale quia'. ² Naca dyin quie Diuzi nedyë'ëda' le'e, lena' re'enda' usedyina' le'e lao Cristo biuyoguele ben' tula yë'. Re'enda' hua' quiele ca quie rue nu xuzi nigula. Reya'ala' usedyinnë' zi'inë' cuidi' lao xquiubi' biuyogue zi'inë' ben' tula yë'. ³ Pero como conlë yela' sin' quie xan' taxi'ibi' guquen forma ca bëla uzi'n Eva yë', lëscan' rdëbëza' utëbi ben' tula pensari quiele cuenda usanla'adyi'le bira inaole tuzi xneza Cristo du guicho du la'adyi'le. ⁴ Porque dyë'edi raxele ruzënegale cabë' di'idza' na nu ben' tula, nu ben' rida rguixogue' le'e netza'la cabë' udixogue'ndo' le'e quie Jesús. Pues dyë'edi rezila'adyi'le quie bichi be tula, bichi be binaca Bichi Be quie Diuzi ta uyezila'adyi'le dza na'. Lëscan' dyë'edi ruzënegale di'idza' rguixogue' ben' tula, di'idza' binacan lëbi con cabë' rna xti'idza' Diuzi unando' le'e dza na'. ⁵ Pues rnia' cala zaca' në'ëdi' menosra cabë' nu ben' naole neza quie, nu ben' rnale naca apóstol huen gula. ⁶ La'acazi ruen zëdi quia' ta hue'lia' le'e di'idza', cala binezda' con cabë' rna xti'idza' Diuzi. Lena' bablu'endo' ladole conlë yugute cabë' bëndo' laole.

⁷ ¿Bi ca nale? ¿Tamala bia' udixogui'a le'e di'idza' la'ia quie Diuzi, na' biunaba' le'e ni tu centavo? ¿Tamala bia', bedzagalaohua' cuenda gacalia' le'e gata' tahuen quiele? ⁸ Hasta uzi'a dumi ta ben ben' nita' yedyi tula në'ëdi' cuenda tu de len bia' gasto udixogui'a le'e xti'idza' Diuzi. ⁹ Catu

uzulia' le'e dza na', bide ta hua' gasto, ni tule bibia' le'e zëdi inaba'le gunle quie gasto quia'. Pero ja ben' bichiro, ben' uza' yu nebaba Macedonia, lëjê' benjê' ta rdziogueda'. Cana' udapa' cuidado cuenda bihuelia' ni tule zëdi gunle ta rdziogueda'. Pues cana'cazi biusana' huelia' le'e cana'. ¹⁰ Tantozi nuzela'adya' nezda' dyê'ëdi con cabê' rna di'idza' li quie Cristo, lena' nezda' nunu saque' udzun cabê' zua' gusto yëba' ja ben' nita' yu nebaba Acaya ca naca tahuen bia' quiele. ¹¹ Na'ra ¿bixquien' unia' cana'? ¿Nun quie binedyê'ëda' le'e unia' cana'? Cala lena'. Nezi Diuzi con cabê' nedyê'ëda' le'e. ¹² Biusana' hua' cabê' rua' la'acazi chi zu ben' na nacarêjê' apóstol ca nêto'. Najê' de yela' rnabê' quiejê' ruejê' ca apóstol tu lëbizi cabê' nêto'. ¹³ Pero binacan con cabê' najê'. Binacajê' dugalo apóstol. Yê'zi rzi'jê' ruejê' cuinjê' ca apóstol quie Cristo. ¹⁴ Lena' binacan ta yebanero, como dan' hasta cuin xan' taxi'ibi' Satanás yê'zi rzi'nê' ruenê' cuinnê' ca tu ángel rseni'n ca xni' gui'. ¹⁵ Cana' biyebanero cabê' rue ben' naque quie xan'taxi'ibi'. Yê'zi rzi'jê' ruejê' ca ben' rue tahuen. Pero hue Diuzi lëjê' castigo con cabê' naca tamala bëjê'.

Una Pablo cabê' uzacayudyinê' dan' naquê' apóstol

¹⁶ Rnia' le'e tatula: Bihuele pensari chi raca' luco. Pero chi cana' ruele pensari, ulegun lato inia' le'e ca rnê ben' raca luco cuenda hueria' pensari ca quie ben' hue cuine ben' ze. ¹⁷ Quele mandado quie Cristo rnia' cabê' rnia' ni. Rnia' ca quie ben' raca luco. Rnia' ca quie ben' rue cuine ben' ze. ¹⁸ Nun quie nita' ben' zê ruejê' ben' ze cuinjê', lega raxejê' ta de lao yedyi layu, lëscan'rê nê'ëdi', hueria' ca quie ben' rue cuine ben' ze. ¹⁹ Cana' hua' como dan' le'e nale nacale ben' rionê'le, nale huazuele dyê'ëdi huele gan' ca na ben' luco. ²⁰ Pues le'e redaohuele huele ca mandado zi'laza huegadyijê' le'e huele quiejê'. Redaohuele cati cubajê' ta de quiele, redaohuele cati inabê'jê' le'e ta zi'laza gula, redaohuele cati gacazê'jê' le'e, hasta redaohuele cati capajê' laohuele. ²¹ Pero reduê'da' inia' le'e nêto' bibeyazondo' huelêndo' le'e cana'.

Pero cabê' rue ja ben' na', ruejê' cuinjê' ben' ze, lëscan' hueria' cuina' ben' ze la'acazi ruen zi inêria' ca ben' luco. ²² Quie lena' inaba' le'e, ¿naca ja ben' na' ben' rnê di'idza' hebreo? Lëscan' nê'ëdi', rnêria' di'idza' hebreo. ¿Nacajê' ben' Israel? Lëscan' nê'ëdi', nacaria' ben' Israel. ¿Nacajê' zi'isuba Abraham? Lëscan' nê'ëdi', nacaria' zi'isuba Abraham. ²³ ¿Tali na' nacajê' ben' rue mandado quie Cristo? Rnia' le'e cala mandado quie Cristo ruejê'. Pero nê'ëdi' sí, rua' dugalo mandado quie Cristo. Ca rnê ben' tondo, cana' rnia' niga. Pues ganura zu rue dyin quie Cristo ca nê'ëdi'. Ganura zu rguijê' ru'ejê' zi' quie ca nê'ëdi'. Ga nu ben' zu rudzejê' lu'u dyiguiba ca nê'ëdi'. Tazê lasa bën žudyi quia' guti ja benê' nê'ëdi'. ²⁴ Hasta ben' yedyi quia', ben' Israel, bëjê' nê'ëdi' castigo. Ga'yo' lasa udijê' nê'ëdi' galobechi ga huio guidi. ²⁵ Tzona lasa udijê' nê'ëdi' yaga. Itu lasa udijê' nê'ëdi' yo. Tzona lasa betu barco yu'a lu'u nisadao'. Tu lasa užuba' lao nisadao' tu dza tu yela. ²⁶ Zê lasa uza'a uya'a zitu'. Zê lasa ben žudyi quia' hua' yao ze nê'ëdi'. Zê lasa ben žudyi quia' cuan ja benê' ta de quia'. Zê lasa ben žudyi quia' hue ja ben' yedyi quia' bizinaquezi len nê'ëdi'. Zê lasa ben žudyi quia' hue ja ben' yedyi tula bizinaquezi len nê'ëdi'. Zê lasa ben žudyi quia' ga naca ciudad, ga naca lao ya'a, ga naca lao nisadao'. Zê lasa ben žudyi quia' nun quie ben' na najê' xneza Cristo, pero bë' nazijê'. ²⁷ Bia' dyin zi'i guca zëdi quia'. Zê lasa bigusia' bedu yela. Zê lasa bedzagalaohua' udua'. Zê lasa bedzagalaohua' ubilida'. Zê lasa bia' ubasi. Zê lasa bedzagalaohua' nun quie tazaga. Zê lasa bedzagalaohua' nun quie bdziogueda' zaba'.

²⁸ Cana' guca quia', pero bineyudyi ca tazëdi raca quia'. Yugu dza raqueda' rdëbida' quie ja ben' nao xneza Jesús nita' tu tu yedyi. ²⁹ Chi zu ben' rdzebi inao xneza Cristo, yeyëchi'la'adya' lëbë' ca quie nê'ëdi' naca' ben' rdzebi inao xneza Cristo. Lëscan' chi zu ben' bë yela' stu' quie laguedyi, na'ra nê'ëdi' rdze'tzegueda' quie ben' bë yela' stu'. ³⁰ Chi ru'en lato hua' cuina' ben' ze, cana' hua' cuina' ben' ze nun quie bedzagalaotzaguia' užacayudya' bia' dyin quie Diuzi. ³¹ Diuzi, ben' naca Xuzi Señor quiero Jesucristo, ben' rulidzaro ruero bala'ana laohue tuzioli, lëbë' nezinë' tali nacan ca rnia' le'e. ³² Cati uzua' ciudad Damasco, caora na' bë ben' naca gobernador quie rey Aretas mandado ta guida ja soldado gapajë' ru'a yedyi ga de neza ta guxujë' nê'ëdi' huejë' nê'ëdi' preso. ³³ Pero ja ben' compañero quia', ben' nao xneza Jesús, lëjë' bdze'jë' nê'ëdi' tu lu'u chicuiti ze, belizajë' nê'ëdi' ru'a ventan zu lë'é besu ta zu nusio ru'a yedyi. Cana' guca ula' bibëxujë' nê'ëdi'.

12

Blu'e Cristo Pablo blë'ënë' ca naca guibá

¹ Bibi zaca'n hua' cuina' ben' ze, mejorla hua' di'idza' cabë' blë'ëda' blu'e Cristo nê'ëdi' dza na'. ² Nê'ëdi', ben' nao xneza Cristo, azio chida' iza, uquië'në' nê'ëdi' guibá uyune. Binezda' chi uya'a len bë'ëla' zuba' quia', o chi biuya'a len bë'ëla' zuba' quia'. Tuzi Diuzi nezinë'. ³ Pero nezda' uquië'në' nê'ëdi' guibá, la'acazi binezda' chi len bë'ëla' zuba' o chi cala len. Nezi Diuzi. ⁴ Uquië'në' nê'ëdi' na' ga beda' di'idza' naca la'iya gula. Tantozi naca la'iya di'idza' na', biru'en lato inë' ja benë' ca naca di'idza' beda'. ⁵ Na'ra lega redaohueda' cabë' guca quia' dza na', pero bire'enda' hua' cuina' ben' ze nun quie len. Tuz ca guca quia' cati bedu fuerza quia', lëzin re'enda' yëpa' ja benë'. ⁶ Pero chi hua' cuina' ben' ze yëpa' ja benë' tahuen gula bëlë Diuzi nê'ëdi' guibá, lena' binacan pensari tondo, como dan' tali cabë' guca quia' guibá yëpa'jë'. Pero bicala yëpa'jë' cana', como dan' bire'enda' huejë' pensari naca' ben' belaura ca tu rlë'ëjë' naca'.

⁷ Tantozi naca tahuen gula ta yebanero cabë' blë'ëda' ca naca guibá, ben Diuzi nê'ëdi' tu ta tzei ila cuerpo quia' cuenda bigaqueda' cuina' naca' ben' zera ca tu ta naca'. Nacan ca quie tu yëchi' tona uyu'un lu'u cuerpo quia'. Ruen quia' ca tu bichi be quie xan' taxi'ibi' Satanás rusacan nê'ëdi' bizinaquezi. ⁸ Tzona lasa unaba' lao Cristo ta huenë' mandado ta usannan nê'ëdi' dan' yu'u ruzei rula cuerpo quia'. ⁹ Pero una Cristo nê'ëdi' cani: "Guna' luë' fuerza quia'. Conlë lëzin birabi idzioguelo', porque cati bide fuerza quio' cuinzo', cana' huazaque' guna' luë' fuerza quia'." Cana' redaohueda' bide fuerza quia' cuenda gunnë' fuerza quienë' quia'. ¹⁰ Quie lena' redaohueda' bide fuerza quia'. Redaohueda' cati rutasi runio benë' nê'ëdi'. Redaohueda' cati rdziogueda' bi cosa. Redaohueda' cati rusaca ja benë' nê'ëdi' bizinaquezi. Redaohueda' cati raca zëdi quia'. Cana' raca quia' nun quie rguixogui'a xti'idza' Cristo. Nezda' cati racabë'da' dyë'ëdi' bide fuerza quia', caora na' run Cristo nê'ëdi' fuerza quienë', pero mazara fuerza ze run Cristo nê'ëdi'.

Rdëbi Pablo quie ja ben' nao xneza Jesús, ben' nita' ciudad Corinto

¹¹ Ca ben' tondo bia', pero dula' quie le'e bia' cana', porque le'e reya'ala' inële tu cule quia'. Pües cala zaca' nê'ëdi' menosra cabë' nu ben' naole neza quie, nu ben'rnae naca apóstol huen quia'. Pero quie nê'ëdi' rnae ni lë'ëti' gabi zaca'. ¹² Caora uidxogui'a le'e xti'idza' Diuzi dza na', bëlia' le'e zela'adyi' gula, blë'ële bë Diuzi seña, bënë' yela' huaca, bënë' ta yebanero. Lena' blu'en tali naca' apóstol quienë'. ¹³ ¿Cala bëlia' le'e lëbi cabë' bëlia' ja

ben' nao xneza Jesús nita' ga tula? Biunaba' le'e ta hua' gasto quia'. Tuzi lena' bibèlia' le'e lèbi. ¡Ules'i'ze quia' cabè' tamala bia' quiele, biunaba' le'e ta hua' gasto quia'! ¹⁴ Pues na'ra sí, bazua' dispuesto guida' ideyuba' le'e taoyune. Pero tatula na'a biunaba' le'e ta hua' gasto quia' como dan' quele ta de quiele re'enda', re'enda' huera quiele quie Cristo. Pues como raqueda' le'e ca zì'ina', lena' naca cuenda quia' hua' gasto quiele. Binacan cuenda quiele huelèle nē'èdi' gasto. ¹⁵ Pues redaohueda' hua' gasto quia' cuinza'. Hasta zua' dispuesto hua' gasto fuerza quia' ta gacalia' le'e gata' tadya'a quiele. Pero cani raqueda': Ca tu mazara nedyē'ēda' le'e, cana' menosra nedyē'ēle nē'èdi'.

¹⁶ Pero bala ben' zu ladole inajè' ben' listo gula naca', najè' uzi'a le'e yē' dza na'. Cana' inajè' ba'ala'cazi dyē'ēdi nezijè' biunaba' le'e ta hua' gasto quia' dza na'. ¹⁷ ¿Bi ca nale? ¿Uzi'a le'e yē' nun quie nu ben' aose'ela' laole dza na'? ¹⁸ Pues nezile aonaba' tu cule lao Tito chi biguidè' ideyubinè' le'e. Lēscan' use'ela' itu ben' bichiro sa'lēnè' Tito. ¿Bi ca nale? ¿Uzi' Tito le'e yē'? ¿Bi ca nale? ¿Quele tali na' nē'èdi'lia' Tito, tuzi ca bēlēndo' le'e, tuzi ca naca pensari quiendo'?

¹⁹ Chi raquele rnando' aruendo' defender cuinndo' laole, bira huele pensari cana', como dan' biruendo' cana'. Ca ta ruendo' rnando' lao Diuzi nun quie nacalēndo' Cristo tuze. Pero yugu ca rnando' le'e nacan ta gacalen le'e ta huera quiele quie Cristo. Nedyē'ēda' le'e bicha'. ²⁰ Rdēbida' chan' cati guida' ideyuba' le'e neruele ca ta bireya'ala' huele. Lēscan' rdēbida' idza'le nē'èdi' ca ta inia' le'e. Rdēbida' chan' gata' tazēdi. Rdēbida' chan' neruele gacažè'le laguedyile, chan' nerdza'le laguedyile, chan' neruele yela' adyi' len laguedyile, chan' nernēle contra laguedyile, chan' neru'ele di'idza' bižu, chan' neruele cuinle ben' ze, chan' neruele ta biyu'u ni'a xnezi. ²¹ Rdēbida' gaca tastu' quia' ca ruele cati guida' ideyuba' le'e tatula. Rdēbida' huabedya' ca ruele chan' neruele cabè' dula' xquia' bēle tiempote. Rdēbida' chan' neruele tabayatza len yaca nigula, chan' nerdalēle nigula binaca žgulale. Rdēbida' chan' nenaole ca naca vicio quiele unaole dza na'.

13

Bē' Pablo lējè' consejo, bgapanē' lējè' diuzi

¹ Pues na' araca tatzona lasa rida' ideyuba' le'e. Biži ta yetilan di'idza' cati gao ja benè' laguedyijè' xquia, re'ennan chopa tzona testigo ta gacan bala chi nacan tali, chi binacan tali. ² Zua' zitu', pero guna' le'e tu consejo tatula: Chi guida' ideyuba' le'e tatula, chi neruele dula' xquia, na'ra biyeyèchi'la'adya' le'e. Cana' naca consejo bi'a ben' bē xquia dza na'. Lēscana' naca consejo bēna' yugulule cati bida' dza na' bedeyuba' le'e tachopa lasa. ³ Chi rnaban huelia' le'e cana', na'ra huata'cazi prueba ca prueba re'enle gata' chi tali rnia' lao na'a Cristo. Cala huae Cristo gaxo len le'e, dechan' ulu'enè' le'e cabè' naca yela' huaca quienè'. ⁴ Tali na' guti Cristo lē'ē yaga cruzo ca quie ben' bisaque' hue defender cuine, pero yela' huaca quie Diuzi zuè' bebannè'. Lēscan' nēto' nacarè quiendo' ca guca quienè'. Naca quiendo' ca quie ben' bisaque' hue defender cuine, pero como dan' nuelēndo' Cristo tuzi, quie lena' babēn Diuzi nēto' yela' huaca quienè' ta huendo' mandado ca mandado re'en Diuzi huelēndo' le'e.

⁵ Ulehuecara pensari ca ruele chi du guicho du la'adyi'le rnaole xneza Cristo. Ulehue prueba cuinle. ¿Binezile zu Jesucristo len le'e tuze? Pero bisulēnè' le'e tuze chi de ladzazi rnaole xnezè'. ⁶ Pues re'enda' inezile binacando' ben' huizi' yē'. ⁷ Rulidzando' Diuzi ta nitu bi tamala huele. Cala binapando' rson rulidzando' Diuzi por le'e, pero ca ta re'enndo', re'enndo' huele puro tahuen, la' acazi raquele binapando' rson. ⁸ Cana' re'enndo'

como dan' bisaque' huendo' ta birutila lëbi len xti'idza' Diuzi. Pues puro cabë' rutilan lëbi ruendo'. ⁹ Quie lena' redaohuendo' cati inaole xneza Cristo dyë'ëdi, la'acazi raquele nacando' ben' bide yela' huaca quie. Biusanndo' ulidzando' Diuzi por le'e cuenda gacalënë' le'e gacale ben' laxta'o yëri. ¹⁰ Bia' guichi ni use'ela'n laole tu zaguidara' ideyuba' le'e cuenda cati sulia' le'e biinaban inabi'a le'e zi'laza conlë yela' rnabë' ta pca'n Cristo lao na'a. Bire'enda' usanla'adyi'le bira inaole xneza Cristo.

¹¹ Na'ra bicha', hua' le'e tu despedida. Uleyue pensari quiele ga rapale falta, yeyuežela'adyi'le laguedyile, huelële laguedyile tuže, sulële laguedyile gusto. Cana' huapa Diuzi le'e cuidado. Naca Diuzi ben' cuëchi chizi laxta'oro nedyë'ënë' ra'o. ¹² Gapale diuzi quie quie laguedyile dyë'ëdi, gaole xagajë' tu psitu. ¹³ Yugulu ben' bichiro, ben' nita'ja len në'ëdi' niga, rgapajë' le'e diuzi.

¹⁴ Rulidza' Diuzi ta uca'n Señor quiero Jesucristo le'e huen. Nedyë'ë Diuzi le'e. Lëscan' zu Bichi Be quienë' conlë le'e. Amén.

DI'IDZA' BZU SAN PABLO APÓSTOL LÈ'È GUICHI, USE'ELA'NÈ'N LAO ESTADO GALACIA

Ni rguixogue'n ca naca guichi bē San Pablo

¹ Nē'ēdi', Pablo, bdē' Diuzi nē'ēdi' ta tzetixogui'a benē' xti'idzē'. Cala benē' bdē' nē'ēdi', dechan' bdē' cuin Jesucristo lēnē' Xuzi Diuzi nē'ēdi'. Naca Diuzi ben' pseban Jesucristo. ² Nē'ēdi'lia' ben' bichiro, ben' nao xneza Jesús, ben' nita' niga ga zua', bēndo' guichi ni ta ise'ela'ndo' lao le'e, ben' nao xneza Jesús, ben' nita' estado Galacia. ³ Rulidza' Xuzi Diuzi lēnē' zi'inē' Jesucristo ta huela'iyaquē' le'e cuēchiyaquē' chizi laxta'ole. ⁴ Naca Jesucristo ben' psedyin cuine gutinē' lē'ē yaga cruzo por nun quie dan' ta gažo dula' quiero quie tamala de lao yedyi layu. Cana' bēnē' quiero según ca re'en Xuzi Diuzi gaca quiero. ⁵ Ra'o na', reya'ala' gapala'nro Diuzi tuzioli! Amén.

Tuzi neza de yenaoro yeyoro guibá

⁶ Lega rebaneda' le'e ca ruele laozulaotele rusanla'adyi'le xneza Diuzi, ben' ulio le'e por nun quie nadyē'ē Cristo le'e. Baziole zenaole neza tula, pero cala neza ta yeyole guibá. ⁷ Talicazi na' tuzi neza de ta yeyoro guibá. Ca naca ta raca quiele, nita' yaca benē' ruquixiyaquē' quiele. Re'enjē' bigalele ca udixogue'ndo' le'e quie xneza Cristo yenaoron yedyinro guibá. ⁸ Udze'de' Diuzi nu ben' re'en usanla'adyi'le cabē' baodixogue'ndo' le'e dza na'te quie xneza Cristo ta re'enjē' yenaole neza tula, neza ta biyedyinle guibá. Udze'de' Diuzi nuti'tezi ben' rue cana', la'acazi nē'ēdi', la'acazi nu ángel za' guibá. ⁹ Lena' agudya' le'e dza na'te, pero na'a re'enda' inia' le'e tatula de que udze'de' Diuzi nuti'tezi ben' re'en usanla'adyi'le cabē' baodixogue'ndo' le'e quie xneza Cristo dza na'te ta yenaole neza tula.

¹⁰ La'acazi le'e birapale gusto cabē' rnia' le'e niga, pero Diuzi sí, rapē' gusto. Birguiloga' nu ben' hue nē'ēdi' ben' ze. Chan' rguiloga' nu ben' hue nē'ēdi' ben' ze, na'ra bira zaca' hua' dyin quie Cristo.

Ni rguixogue'n cabē' guca quie Pablo guquē' apóstol

¹¹ Pero reya'ala' huele pensari cabē' rnia' le'e ni, bicha'. Cala pensari quie benē' rguixogui'a le'e, dechan' pensari quie Diuzi ta yenaole xneza Cristo yeyole guibá. ¹² Cala benē' bzioñe'enē' nē'ēdi' ca naca xneza Cristo, dechan' cuin Jesucristo bzioñe'enē' nē'ēdi'.

¹³ Le'e babele cabē' guca quia' dza na' cati benaohua' rua' cabē' naca costumbre quie xuzixta'ohua' ben' Israel. Banezile lega psebi'a xneza Cristo. Uya'a yadiloga' yaca ben' nao xneza Cristo ta udyiaya'yaquē', bibeyēchi'la'adya'yaquē'. ¹⁴ Dyē'ēdi' gula benaohua' cabē' naca costumbre quie xuzixta'ohua' ben' Israel. Nunu yaca ben' gololia' lēbizi, bērayaquē' ca nē'ēdi'. ¹⁵ Pero tu binegaloga' bdē' Diuzi nē'ēdi' tanun quie dan' nadyē'ēnē' nē'ēdi'. ¹⁶ Caora abdyin hora una Diuzi, na'ra bedetilalao zi'inē' Jesucristo nē'ēdi', yela' na' quixogui'a ben' binaca ben' Israel ca naca xneza Cristo yenaoron yedyinro guibá. Beyudyi guca quia' cana', nunu yenaba' consejo. ¹⁷ Ni ciudad Jerusalén biuya'a tzenaba' consejo lao yaca ben' banaca apóstol tu binegaca' apóstol. Biuya'a na', pero biudzēda' uya'a yu nebaba Arabia. Na'tera zeza'a uya'a ciudad Damasco.

¹⁸ Baocara tzona iza, caora na' uya'a ciudad Jerusalén bedila' Pedro uzulia'nē' chi'inu' dza. ¹⁹ Nunura apóstol bedila'. Tuzi Pedro len Santiago,

ben' naca ben' bichi xa'nro Jesucristo, bedila'. ²⁰ Ruguntia' Diuzi nacan tali cabè' di'idza' ruzua' lè'è guichi niga.

²¹ Ude beyudyi na', uya'a yu nebaba Siria. Na'tera uza' za'a yu nebaba Cilicia. ²² Binuebè' yaca ben' nao xneza Cristo, ben' nita' yu nebaba Judea, nè'èdi'. ²³ Na' tu beziyaquè' con cabè' na benè' ca bia' dza na'te. Uneziyaquè' cabè' bia' beguiloga' ga nita' ben' nao xneza Cristo ta udyiaya'yaquè'. Pero na'a bira rua' cana', barda' rguixogui'a benè' xti'idza' Diuzi re'enda' inaoy-aquè' xneza Cristo. Tanun quie barnaohua' xneza Cristo na'a, ²⁴ cana' rue yaca benè' Diuzi ben' že.

2

Yaca ben' naca apóstol bējē' Pablo tuze

¹ Na'ra baguca chida' iza beya'a ciudad Jerusalén tatula. Uza'lè Bernabé nè'èdi' uquiè'ndo' Tito. ² Beya'a na' tatula porque Diuzi na' bēnè' mandado beya'a. Gan' na' bedila' ben' napa dyin quie ben' nao xneza Cristo. Caora na' bexi'idze'yaquè' con cabè' rua' rguixogui'a ben' binaca ben' Israel xti'idza' Diuzi. Cana' bia' tacuenda biten cana'zi dyin quie Cristo rua'. ³ Na' bega'nndo' di'idza' dyè'èdi. Nica bējē' mandado su compañero quia' Tito tu xēdyidao' cuine como dan' binacan obligado su tu xēdyidao' cuin ben' binaca ben' Israel. ⁴ Pero tali na' gu'un bala yaca ben' na', ben' nazi naoyaquè' xneza Cristo, su tu xēdyidao' cuin Tito. Quie lena' balarazi za'yaquè' urè'naoyaquè' nēto' ta si'jè' cuenda bi ruendo'. Biraxejè' ca ruendo' como dan' tanun quie nuendo' tuze Jesucristo nacando' ben' libre. Re'enyaquè' yenaondo' ley pca'n Diuzi lao na'a Moisés tatula. ⁵ Pero ni tzadica' bibēndo'yaquè' lato huelēyaquè' nēto' como dan' re'enndo' huele seguir inaole xneza Cristo yeyole yedyinle guibá.

⁶ Na' yaca ben' napa dyin quie ben' nao xneza Cristo yaxejè' cabè' rua' bibetza'yaquè' ca naca dyin quie Diuzi za'a rua'. Pero chi ben' napa dyin, chi ben' binapa dyin, tuzicazi ca raqueda' como dan' ilè'ècazi Diuzi ra'o cabè' naca pensari yu'u lu'u guicho laxta'oro, cala cabè' naca žabaro. ⁷ Na'ra bibetza'yaquè' ca naca dyin quie Diuzi za'a rua', gucabè'yaquè' chi Diuzi bēnè' nè'èdi' mandado rguixogui'a ben' binaca ben' Israel xti'idza' Diuzi ta hue quieyaquè' len, na' yezi' Diuzi leyaquè' guibá. Lēbi cabè' gucabè'yaquè' bē Diuzi Pedro mandado quixogue'nè' yaca ben' Israel xti'idza' Diuzi, cana' gucabè'yaquè' Diuzi bēnè' nè'èdi' mandado quixogui'a xti'idzè'. ⁸ Pues lēbi cabè' bē Diuzi ulionè' Pedro use'elè' lēbè' ta tzetixogue'nè' xti'idzè' lao ben' Israel, lēzi cana' ulio Diuzi nè'èdi' tzetixogui'a xti'idza'nè' lao yaca ben' binaca ben' Israel.

⁹ Quie lena' gucabè' Santiago, len Pedro, len Juan de que bē Diuzi tu tahuen quia', bēnè' dyin quienè' hua'. Naca Santiago, len Pedro, len Juan ben' belao, ben' rudze' xnezi quie yaca ben' nao xneza Jesús. Na' redaohueyaquè' bēnyaquè' nè'èdi'lia' Bernabé di'idza' zela'adyi'. Bega'nlēyaquè' nēto' di'idza' ta tziondo' nēto' tzetixogue'ndo' ben' binaca ben' Israel xti'idza' Diuzi, tu na' tzioyaquè' leyaquè' tzetixogue'yaquè' ben' Israel xti'idza' Diuzi. ¹⁰ Tuzi unayaquè' nēto' reya'ala' yeyēchi'la'adyi'ndo' ben' yēchi'. Pero cana'cazi rua' rapatzagua' cuidado ta rua'.

Ciudad Antioquía udila Pablo Pedro

¹¹ Na' cati bedyin Pedro ciudad Antioquía, cana' bedila' lēbè' na'. Na'ra udila' lēbè' como baoquixi pensari quienè'. ¹² Dza na' udaolè Pedro yaca ben' binaca ben' Israel. Pero cati bdyin bala ben' Israel, ben' naca amigo quie Santiago, na'ra psannè' bira udaolēnè' leyaquè'. Cana' bēnè' como dan'

rdzebinè' ben' naca tu cue' ben' Israel, ben' re'en su tu xèdyidao' cuin yaca ben' nao xneza Jesús, la'acazi ben' binaca ben' Israel. ¹³ Na'ra yaca los demás ben' nao xneza Jesús, ben' Israel, bërèyaquè' chopa neza quieyaquè' con cabè' bē Pedro. Hasta Bernabé, lēscana' bēnē' tuze uquixi pensari quie', bērenē' chopa neza. ¹⁴ Cati blē'ēda' ca ruejē', birnaojē' tali con cabè' rna xti'idza' Diuzi, na'ra unia' rēpa' Pedro zaca'lao lao yaca ben' nao xneza Jesús cani: "Luè' naco' ben' Israel, pero bira naolo' ley pca'n Diuzi lao na'a Moisés. Quie lena' rnaba' luè', ¿bixquien' re'enlo' huu' mandado inao yaca ben' binaca ben' Israel ley pca'n Diuzi lao na'a Moisés?" Cana' gucha' Pedro udilanè'.

La'acazi ben' Israel, la'acazi ben' tula, ruen zi rzudyi'ilèro Cristo ta yeyoro guibá

¹⁵ Ra'o nacaro ben' Israel. Binacaro ben' binuebē' Diuzi cabè' naca yaca los demás ben' za' yedyi tula. ¹⁶ Pero dyè'ēdi neziro biilē'ē Diuzi ra'o ben' laxta'o yēri tanun quie naoro ley pca'n Diuzi lao na'a Moisés, dechan' tanun quie chi rzudyi'ilèro Jesucristo. Quie tuzi len ilē'ē Diuzi ra'o ben' laxta'o yēri. Quie lena' lente ra'o, rzudyi'ilèro Jesucristo cuenda ilē'ē Diuzi ra'o ben' laxta'o yēri, porque cala tanun quie naoro ley pca'n Diuzi lao na'a Moisés yeyoro guibá.

¹⁷ Pero ¿biži huero chi rzudyi'ilèro Cristo, na'tera biyedyinro guibá? ¿Biži huero chi tali ruen zi inaoro ley quie Moisés ta yezi' Diuzi ra'o? ¿Inaro dula' quie Diuzi chi raparo falta biyezi'nē' ra'o? ¿Bireya'ala' inaro cana'! ¹⁸ Pero xquia nacan quiero chi yenaoro neza gula quiero tatula, na' tu chi'zi uzudyi'ilèro xneza Cristo. ¹⁹ Lao ley quie Moisés nuen quia' ca quie ben' huati, bira ruen nē'ēdi' mandado. Pero lao Diuzi sí, binatia' nabana' ruenē' nē'ēdi' mandado. ²⁰ Naca quia' ca quie ben' gutilē' Cristo lē'ē yaga cruzo. Bide yela' neban quia' cuinza', yela' neban quie Cristo rdalia' nabana' lao yedyi layu. Quie lena' decazi yela' neban quia' nabana' lao yedyi layu por nun quie dan' rzudyi'ilia' Cristo, ben' naca ži'i Diuzi, ben' nadyē'ē nē'ēdi'. Ta gaca tahuen quia' psedyinnē' cuinnē' gutinē' lē'ē yaga cruzo por nē'ēdi'. ²¹ Biusanla'adya' ca naca yela' racalē' quie Diuzi. Chi tali yezi' Diuzi ra'o por nun quie chi hue quiero cabè' na lao ley pca'n Diuzi lao na'a Moisés, na'ra huazaque' inaro bibi zaca'n guti Cristo lē'ē yaga cruzo.

3

Tuzi sudyi'ilèro Cristo ilē'ē Diuzi ra'o ben' laxta'o yēri

¹ ¡Le'e, bicha', ben' estado Gálatas, aoca tondole! ¿Nuži pquixi pensari quiele bira hue quiele xti'idza' Diuzi? Dyè'ēdi blē'ēle baodixogue'ndo' le'e cabè' guca quie Cristo gutinē' lē'ē yaga cruzo. ² Rnaba' le'e tu di'idza': Caora cati uyu'ule Bichi Be quie Diuzi, ¿tanun quie bidan' uyu'ule? ¿Uyu'ule Bichi Be quie Diuzi tanun quie bē quiele cabè' di'idza' na lao ley quie Moisés, o chi tanun quie bē quiele cabè' di'idza' udixogue'ndo' le'e? ³ ¿Biži raca quiele taze aotondole? ¿Ruele pensari cuinzile de fuerza valor quiele yenaole xneza Cristo, bira ruen zi gacalē' Bichi Be quie Diuzi le'e? ⁴ Taze baoca tazēdi quiele dan' naole xneza Cristo. Na'ra ¿bi ca nale? ¿Bibi zaca'n baozuele tazēdi guca quiele? Tahuen na' chi zaca'n gucalēn le'e. ⁵ Rnaba' le'e itu di'idza': Cati bdze' Diuzi Bichi Be quienē' lu'u guicho laxta'ole, bēnē' yela' milagro quienē' entre le'e, ¿bixquien' bē Diuzi quiele cana? Pues cala bē Diuzi quiele cana' tanun quie dan' bē quiele cabè' di'idza' na lao ley quie Moisés, dechan' bē Diuzi quiele cana' tanun quie dan' rzudyi'ilēle Cristo cabè' aodixogue'ndo' le'e.

⁶ Na' uzudyi'ilê Abraham Diuzi. Con lëzin blê'ê Diuzi lëbê' ben' laxta'o yëri, ben' nacalê lëbê' tuze. ⁷ Quie lena' reya'ala' inezile naca dugalo zi'isuba Abraham nutezi ben' rzudyi'ilê Diuzi, la'acazi ben' Israel, la'acazi ben' za' yedyi tula. ⁸ Diuzi, ben' bē mandado bzu yaca benê' xti'idzê' lë'ê guichi, unezinê' dza na'te de que sudyi'ilê yaca ben' binaca ben' Israel lëbê'. Cana' gaca quieyaquê' hualê'ê Diuzi leyaquê' ben' laxta'o yëri, ben' hue lëbê' tuze. Quie lena' una Diuzi dza na'te gudyinê' Abraham: "Huela'ia' yugulu ben' nita' lao yedyi layu tanun quio' luê'." Cana' una Diuzi gudyinê' Abraham. ⁹ Na'ra cani nacan: Huela'ia' Diuzi yugulu ben' rzudyi'ilê Cristo lëbizi cabê' bēla'ia' Diuzi Abraham dza na'te.

¹⁰ Pero udze'de' Diuzi nu yaca ben' sudyi'ilê cabê' mandado rue lao ley ta gata' yela' neban quienê' tuzioli. Lëtana' rguixogue'n lë'ê guichi la'ia' quie Diuzi cani: "Yugulu ben' rue quie cabê' mandado rue lao ley, udze'de' Diuzi leyaquê' chi bihue quieyaquê' yugulute cabê' mandado ruen." Cana' rnên lë'ê guichi la'ia' quie Diuzi. ¹¹ Tali na' cala tanun quie dan' hue quiero cabê' mandado rue lao ley ilê'ê Diuzi ra'o ben' laxta'o yëri. Lena' rguixogue'n lë'ê guichi la'ia' cani: "Tanun quie dan' sudyi'ilêro Diuzi, na'tera ilê'ênê' ra'o ben' laxta'o yëri, gunnê' ra'o yela' neban tuzioli." ¹² Pero taže netza'n quie nu ben' rue quie cabê' mandado rue lao ley. Calá sudyi'ilênê' Diuzi ta gata' yela' neban quienê' tuzioli como dan' rguixogue'n lë'ê guichi la'ia' caniga: "Nu ben' hue quie yugulute cabê' mandado rue lao ley, gata' yela' neban quienê' tuzioli." Cana' rnên lë'ê guichi la'ia'.

¹³ Nun quie guti Cristo lë'ê yaga cruzo. bibdze'de' Diuzi ra'o, bdze'de'nê' Cristo lao lazaro. Cana' rguixogue'n lë'ê guichi la'ia' quie Diuzi cani: "Udze'de' Diuzi yugulu ben' na'ala' lë'ê yaga ta gatinê'." Cana' na lë'ê guichi la'ia' quie Diuzi. ¹⁴ Cana' guca quie Cristo cuenda huela'ia' Diuzi ben' binaca ben' Israel. Como dza na'te bega'nlē Diuzi Abraham di'idza' ta huela'ia' Diuzi yugulu benê' tanun quie Abraham, na'ra lao na'a Cristo Jesús nuela'ia' Diuzi ben' binaca ben' Israel, ben' nao xneza Cristo. Cana' bzu Diuzi di'idza' ca di'idza' bega'nlēnê' Abraham. Cana' aose'ela' Diuzi Bichi Be quienê' ta gacalēnê' ra'o tanun quie dan' rzudyi'ilêro Cristo.

Ni rguixogue'n quie di'idza' bega'nlē Diuzi Abraham dza na'te

¹⁵ Na'ra, bicha', re'lenda' inia' le'e tu di'idza' quie nu ben' re'en chasa guichi quie. Caora chasa guichi tzu'un firma ta yega'ntza'oro, na'ra bisaque' uquinoron, bisaque' inaro di'idza' tula. ¹⁶ Pues bega'nlē Diuzi Abraham len zi'isubanê' di'idza' dza na'te. Pero birnên lë'ê guichi de que bega'nlē Diuzi zê zi'isubanê' di'idza', dechan' rnên bega'nlēnê' tuzi zi'isubanê' di'idza', lena' tzioñe'ero bega'nlēnê' zi'isuba Abraham, ben' naca Cristo, di'idza'. ¹⁷ Caniga nacan ta inia' le'e: Dyê'edi bega'nlē Diuzi Abraham di'idza' dza na'te. Quie lena' cati baode tapa gayuhua galobechi iza, caora na' pca'n Diuzi ley quienê' lao na'a Moisés. Pero lëley na' bisaque' uquinon con cabê' rna di'idza' bega'nlē Diuzi Abraham. ¹⁸ Chi tali na' ruen zi hue quiero cabê' mandado rue lao ley tacuenda gata' yela' neban quiero tuzioli, na'ra bisaque' inaro gata' yela' neban quiero tuzioli tuzi tanun quie dan' sudyi'ilêro Cristo. Pero bega'nlē Diuzi Abraham di'idza' de que tuzi tanun quie dan' uzudyi'ilênê' lëbê' gata' yela' neban quienê' tuzioli.

¹⁹ Na'ra, ¿ga hue dyin ley pca'n Diuzi lao na'a Moisés? Pues tanêro bega'nlē Diuzi Abraham di'idza', na'tera pca'nnê' ley quienê' lao na'a Moisés tacuenda inezi yaca benêchi' de dula' xquia quieyaquê'. Pero cala tuzioli hue ley na' dyin. Cati babdyin Cristo, ben' naca zi'isuba Abraham, ben' bega'nlē Diuzi Abraham di'idza', na'tera babeyudyi quien. Lëscan' inia' le'e itu di'idza': Caora pca'n Diuzi ley quienê', tanêro pca'nnê' lao na'a yaca ángel,

na'tera pca'n yaca ángel ley na' lao na'a Moisés. ²⁰ Pero caora bega'n'lē Diuzi Abraham di'idza' dza na'te, tu cuinzi Diuzi bega'n'lē'nē Abraham di'idza', nunu ángel, nunu ben' tula use'elē'.

Ni rguixogue'n ga hue dyin ley quie Moisés

²¹ ¿Ca biži inaro? ¿Inaro birutila di'idza' ley na' cabē' naca di'idza' bega'n'lē Diuzi Abraham? ¿Bireya'ala' inaro cana'! Porque chi saque' gata' yela' neban quiero tuzioli tanun quie dan' hue quiero cabē' mandado rue bitezi ley, na'ra tanun quie lēley na' gata' yela' neban quiero tuzioli. ²² Pero yuguluro rue dula' xquia quiero ra'o mandado. Dyē'ēdi rguixogue'n cana' lē'ē guichi la'iya quie Diuzi. Quie lena' nu ben' sudyi'ilē Cristo, con lēzin gata' cabē' di'idza' una Diuzi huenē' quiero.

²³ Tu bineguida Cristo lao yedyi layu, bē ley quie Moisés ra'o mandado. Guca quiero ca quie ben' rbeza yero lu'u dyiguiba. Ulezaro guida Cristo uzioñe'enē' ra'o ta sudyi'ilēro lēbē'. ²⁴ Naca ley quie Moisés ca quie nu maestro escuela, ben' napa xcuidi'. Cana' udapa ley ra'o tu bineguida Cristo lao yedyi layu ta sudyi'ilēro lēbē', na' yezi'ze Diuzi dula' xquia quiero, ilē'ēnē' ra'o ben' laxta'o yēri. ²⁵ Pero na'a babida Cristo, abdyin hora sudyi'ilēro lēbē'. Quie lena' bira rapa ley quie Moisés ra'o ca nu maestro escuela, bira huen ra'o mandado.

²⁶ Na'a banacale zi'i Diuzi tanun quie rzudyi'ilēle Cristo banuelenē' tuze. ²⁷ Yugulule banaole xneza Cristo bagozole nisa ta ulu'en banuele Cristo tuze. Quie lena' barlē'ē Diuzi le'e cabē' rlē'ēnē' Cristo. ²⁸ Nacaro tuzi la'acazi ben' Ísrael, la'acazi ben' za' yedyi tula, la'acazi ben' naca ca preso, la'acazi ben' rda libre, la'acazi ben'mbyu, la'acazi nigula. Chi banuero Cristo tuze, nacaro tu cue'ziro. ²⁹ Chi banuero Cristo tuze, banacaro dugalo zi'isuba Abraham. Hue Diuzi quiero yugulu cabē' di'idza' bega'n'lē Diuzi Abraham dza na'te.

4

¹⁻² Cani naca tu di'idza' ca re'enda' inia' le'e: Inaro uzu tu ben' uña'a. Gutiguē' pca'nnē' ta de quienē', uzi' tu zi'inē' byu quienē' len. Pero como nenacatebi' xcuidi', biuzaque' gaca lao na'abi' len. Re'ennan gapa ben' tula len cuidado hasta idyin dza ca una xuzibi' gaquen quiebi'. Como binedyin hora gague quiebi' ta de quie xuzibi', tu lēbiži nacān quiebi' ca quie ben' nada'o. Cabē' bigaquen quie ben' ruezi dyin žan yu'u, cana' binaquen quiebi'. Pero cati idyin hora, na'ra gaguecazin quiebi'. ³ Lēscana' naca quiero. Tu binedyin Cristo nerue dula' xquia quiero ra'o mandado. ⁴ Pero cati bdyin hora, na'tera use'ela' Diuzi zi'inē'. Bi'a tu nigula lēbē', gologuē' naquē' ben' Ísrael, bē quienē' cabē' mandado rue lao ley pca'n Diuzi lao na'a Moisés. ⁵ Cana' bidē' ulionē' pca'nnē' ra'o libre. Bira hue ley pca'n Diuzi lao na'a Moisés ra'o mandado. Cala tanun quie ley na' ilē'ē Diuzi ra'o como ca zi'inē'.

⁶ Na'ra ta ulu'en tali nacaro zi'i Diuzi, use'ela' Diuzi Bichi Be quienē' lao na'a zi'inē' Jesucristo, uyu'unē' lu'u guicho laxta'oro. Quie lena' ru'en lato yēbīro Diuzi: “Xuza' luē'.” ⁷ Cana' naca quiero. Banacaro zi'i Diuzi, bira nacaro ca ben' nada'o, ben' binaca familia. Na' como nacan tali nacaro zi'i Diuzi, cana' gun Diuzi ra'o yela' neban quiero tuzioli tzazuro guibá.

Rdēbi Pablo ca raca quie ben' nao xneza Jesús

⁸ Pero dza na'te cati binehuebē'le Diuzi, taže bedzagalaole lēle diuzi quiele dechan' cala diuzi. ⁹ Pero na'a banuebē'le Diuzi (o mejorla inaro banuebē' Diuzi le'e), žbiži raca quiele yezulaole yenaole pensari bibizaca', pensari

bihue dyin, na' yezi'le tazi' yuda' xcu'udzule tatula? ¹⁰ Neruele nenaole quie dza, quie biu', quie tiempo, quie iza, cabè' mandado rue lao ley pca'n Diuzi la'o na'a Moisés. ¹¹ Rdzeba' te cana'zi dyin bia' conlè le'e dza na' udirugui'a le'e xti'idza' Diuzi.

¹² Bicha', du guicho du la'adya' inia' le'e: Tzu'ule ca pensari quia', porque rdèbida' cabè' rua quiele. Na'ra dza na' bèlèle nè'èdi' tadya'a. ¹³ Dyè'èdi nezile cabè' guca quia' guca zhui'a cati uzulaohua' udirugui'a le'e xti'idza' Diuzi dza na'. ¹⁴ La'acazi guquele zèdi cati guca zhui'a, bipsanla'adyi'le nè'èdi', bibèle yaladyi' conlè nè'èdi'. Dechan' uzule gusto, blè'èle nè'èdi' dza na' ca quie tu àngel quie Diuzi, blè'èle nè'èdi' cabè' rlè'èle Jesucristo. ¹⁵ ¿Bizi guca quiele, bira zulèle nè'èdi' gusto? Nezda' chan' užaque' dza na', uliole yolaole bènle quia' cuenda yelè'èda' dyè'èdi. ¹⁶ ¿Bizi guca quiele barlè'èle nè'èdi' ben' mala na'a, la'acazi di'idza' li rguixogui'a le'e?

¹⁷ Na' yaca ben' re'en hue quie cabè' mandado rue lao ley pca'n Diuzi lao na'a Moisés, lega re'enyaquè' huelèyaquè' le'e tuze, pero cala ta gacalèn le'e. Re'enjè' usanla'adyi'le nètò' cuenda gacalèle leyaquè' tuze. ¹⁸ Quele tamala na' huelè benè' le'e tuze, pero reya'ala' tzu'uyaquè' pensari dya'a ta gacalèyaquè' le'e. Pero reya'ala' gacalèjè' le'e yugu dza, cala yaca dzazi cati zulia' le'e. ¹⁹ Zi'ina' dao' quia', tatula redzagalaohua' nun quiele ca redzagalao tu nigula re'en galo xcuidi' quie. Ni zua' rdèbida' quiele hasta yenaole xneza Cristo dyè'èdi tatula. ²⁰ Tahuen na' chan' zulia' le'e na'a cuenda hue'lia' le'e di'idza' dyè'èdi, pero birzaque'da' bihua' quiele como zua' zitu'.

Pablo pxi'idze'nè' tu ejemplo quie tu nigula lao Agar len itu nigula lao Sara

²¹ Le'e ben' re'en hue quie cabè' mandado rue lao ley pca'n Diuzi lao na'a Moisés, ulena chi nezile dyè'èdi cabè' rguixogue'n lè'è guichi ley na'. ²² ¿Bizi raca quiele bineyele cabè' nan? Pues rnèn quie Abraham unita' chopa xcuidi' byu quienè'. Tubi' nacabi' zi'i ben' nada'o laohuè' Agar. Itubi' nacabi' zi'i nigula quiecazinè' laohuè' Sara. ²³ Na'ra zi'i nigula nada'o, tu golozibi'. Pero zi'i nigula quiecazinè', golobi' ta uzu di'idza' ca di'idza' bega'nè Diuzi Abraham dza na'te. ²⁴ Con cabè' guca quie chopa nigula, nacan tu ejemplo ta ineziro ca naca chopa cue' compromiso bega'nè Diuzi yaca ben' Israel dza na'te. Ga zu lè'è ya'a laona Sinaí, lègan' na' bèlè Diuzi ben' Israel tu cue' compromiso, pca'nnè' ley quienè' lao na'a Moisés. Na'ra ca naca quie Agar, ben' nada'o quie Abraham, cana' nacarè quie ben' rue quie cabè' mandado rue lao ley pca'n Diuzi lao na'a Moisés. Nacajè' ca quie ben' nada'o, naca ley ca quie xa'njè', binacajè' libre. ²⁵ Pues na' como banaca quie Agar, cana' nacarèn quie lè'è ya'a Sinaí ta nega'nnan yu nebaba ben' Arabia. Lèscan' nacarèn cana' quie ciudad Jerusalén ta zu yedyi layu nun quie dan' rue ley quie Moisés yaca ben' nita' ciudad Jerusalén mandado. Hasta yugulu ben' Israel ruen mandado quieyaquè'. Naca ley quie Moisés ca quie xa'nyaquè' nun quie dan' ruen quieyaquè' mandado. ²⁶ Pero ra'o nacaro ben' ciudad Jerusalén ta zu guibá. Cana' nacaro ben' libre bira ruen ley quie Moisés ra'o mandado. ²⁷ Lena' rguixogue'n lè'è guichi la'ia quie Diuzi cani: Reya'ala' yedaohuero ra'o ben' naca ben' ciudad Jerusalén ta zu guibá. Bira naca ciudad quiero ca quie tu nigula huidyi', ben' biru'a xcuidi'. Bira naca ciudad quiero ca quie tu nigula bínuebè' yela' re rla cati ralo xcuidi'.

Porque huida ben' zè gula, ben' inita' ciudad Jerusalén ta zu guibá. Pero bira inita' ben' zè ciudad Jerusalén ta zu yedyi layu.

Cana' rguixogue'n ra'o.

²⁸ Na'ra, bicha', re'enda' inia' le'e tu di'idza': Cabè' bega'nle Diuzi Abraham di'idza' golo tu zi'inè' Isaac, cana' naca quiero. Yela' nao xneza Cristo quiero nacaro zi'isuba Abraham según ca di'idza' bega'nle Diuzi Abraham dza na'te. ²⁹ Pero cabè' guca dza na'te, psaca zi'i nigula nada'o quie Abraham zi'i nigula quiecazi Abraham bizinaquezi, cana' racarè quiero na'a. Yaca ben' rue quie cabè' mandado rue lao ley quie Moisés, rusacajè' ra'o, ben' yu'u Bichi Be quie Diuzi lu'u guicho laxta'ohue, bizinaquezi. ³⁰ Pero ¿bizi rguixogue'n lè'è guichi la'iya quie Diuzi? Pues rguixogue'n de que gudyi Diuzi Abraham ta usannè' quie nigula nada'o quienè' lènè' zi'inè', como dan' bisaque' yega'n lao na'a zi'i nigula nada'o quienè' ta de quienè'. Nacacazin ta yega'nnan lao na'a zi'i nigula quiecaze'. ³¹ Cana' rguixogue'n ra'o, bicha'. Binacaro zi'i nigula nada'o quienè', dechan' nacaro zi'i nigula quiecaze'.

5

Bihuero lato initi libertad quiero

¹ Dyin bè Cristo nacaro libre, bira rue ley quie Moisés ra'o mandado. Na' gapale cuidado bihuele lato initi libertad quiele. Bira uda'le tazi' xcu'udzule tatula ta bisuele hua'ale.

² Ulezè'naga dyè'èdi ca rnìa' nè'èdi', Pablo. Chi huele lato su tu xèdyidao' cuinle, chi por lena' huele pensari yezi' Diuzi le'e, na'ra cabè' bè Cristo para le'e, bibi zaca'n para le'e lao Diuzi. ³ Tatula quixogui'a le'e: Nutezi ben' ru'e lato su tu xèdyidao' cuine, yela' na' huenè' pensari por lena' yezi' Diuzi lèbè', na'ra nacan obligación quienè' huenè' yugulu ca mandado rue lao ley quie Moisés. ⁴ Chi huele pensari yezi' Diuzi le'e tanun quie dan' rue quiele cabè' mandado rue lao ley quie Moisés, quie lena' apsanla'adyi'le Cristo, aoru'unle tzala'la yela' racalè Diuzi. ⁵ Pero binacan cana' quiero. Rbezaro yezi' Diuzi ra'o tanun quie dan' rzudyi'ilèro Cristo baoyu'u Bichi Be quie Diuzi lu'u guicho laxta'oro. ⁶ Chi banuero Cristo Jesús tuze, gabi huenan chi zuro, chi bizuro, tu xèdyidao' cuinro ca mandado rue lao ley. Tu ta reya'ala' huero, reya'ala' inaoro xneza Cristo edyè'èro laguedyiro.

⁷ Le'e unita' dyè'èdi dza na'. ¿Nuzi bè mandado apsanla'adyi'le bira rue quiele xti'idza' Diuzi? ⁸ Binaca quie Diuzi cabè' ruele. Pues ulio Diuzi le'e ta gacale ben' quienè'. ⁹ Bigala'adyi'le ca naca quie cuba yèta xtila. Conlè ilè'èti' levadura ila'adyin duzete cuba. ¹⁰ Nuze'la'adya' gacalè Cristo le'e ta huele pensari ca pensari quia'. Pero hue Diuzi castigo nu ben' rda rutèbi guicho laxta'ole. Nutezi ben' rue cana' huenè' lèjè' castigo.

¹¹ Nita' ben' na nere'enda' sua' tu xèdyidao' cuin yaca ben' nao xneza Jesús. Nayaquè' rguixogui'a chi bizu xèdyidao' cuin yaca ben' nao xneza Jesús, biyezi' Diuzi leyaquè'. Pero cala lena' rguixogui'a. Chi tali lena' rguixogui'a, birdza' yaca ben' Israel nè'èdi'. Chi tali lena' rguixogui'a, birdza'yaquè' cabè' rnìa' quie Cristo rnìa' gutinè' lè'è yaga cruzo ta yezi' dula' xquia quiero. ¹² Pero quie nu ben' rda rutèbi guicho laxta'ole, ben' rèbi le'e biyezi' Diuzi le'e chi bizu tu xèdyidao' cuinle, na'ra mejorla tu chi'zi ichugule quiejè', bira huele lato huelèyaquè' le'e zèdi.

¹³ Pero le'e, bicha', ulio Diuzi le'e cuenda gacale libre inaole xneza Cristo. Quie lena' bireya'ala' huele ta rnazin quiele. Mejorla gacalèle laguedyile edyè'èle laguedyile. ¹⁴ Porque chi edyè'èro laguedyiro cabè' nedyè'èro cuinro, con tuzi len barue quiero cabè' yugulu mandado rue lao ley quie Moisés. ¹⁵ Pero chi tilalèro gacazè'ro laguedyiro, reya'ala' gaparo cuidado, porque ruen zudyi udyiagu'ro laguedyiro, na' udyiagu'ro cuinro.

Bihuero ta rnazin quiero, huero ca mandado rue Bichi Be quie Diuzi ra'o

¹⁶ Cani rguixogui'a le'e: Ulehue quiele ca mandado rue Bichi Be quie Diuzi le'e. Chi huele cana', huabezan quiele dan' rnaban huele ta rnazin quiele.

¹⁷ Porque chi huele ta rnazin quiele, lena' rdilalën Bichi Be quie Diuzi. Pero chi hue quiele ca mandado rue Bichi Be quie Diuzi, lena' gacalën le'e ta bihuele ta rnazin quiele. Cana' nacan porque rdilalë pensari quiele le'e, bire'ennan hue quiele cabë' mandado rue Bichi Be quie Diuzi. Quie lena' ruen zëdi quiele huele ca reya'ala' huele. ¹⁸ Chi rue quiele cabë' mandado rue Bichi Be quie Diuzi le'e, na'ra bira rue ley quie Moisés le'e mandado.

¹⁹ Dyë'ëdi neziro ca rue ben' rue ta rnazin quie. Rdalëyaquë' nigula binaca quieyaquë', ruejë' bayatza, biredue'yaquë', ²⁰ rionla'adyi'yaquë' yo yaga, ruejë' yela' brujo, rguiloyaquë' dila, racazë'yaquë' laguediyayaquë', rdza'jë' benë' con ganzi, quiezijë' re'enjë' gaca huen, rguiloyaquë' rbëchiyaquë' tu cue' ben' quieyaquë'. ²¹ Nacajë' ben' zë', rutijë' benë', rdajë' hue'e, raojë' con ta rlë'ëyaquë', tazëla tamala naoyaquë' rueyaquë'. Tatula inia' le'e cabë' gudya' le'e dza na'te: Biyezi' Diuzi nu ben' rue cana'.

²² Pero netza' ca rue ben' yu'u Bichi Be quie Diuzi. Nadyë'ëyaquë' laguediyayaquë', sujë' gusto, rbe' chizi guicho laxta'ojë', nacajë' ben' zëla'adyi', rapajë' laguediyijë' bala'ana, nacajë' ben' huen, ben' ruzu di'idza'.

²³ Biruejë' ze cuinjë', biruejë' ta rnazin quieyaquë'. Para ra'o, ben' yu'u Bichi Be quie Diuzi, birabi ley de ta ichugubë' cabë' ruero. ²⁴ Chi banuero Cristo tuze, na'ra apsanla'adyi'ro bira huero ta rnazin quiero. Ca naca quie ben' baguti, bira saque' huejë' ta rnazin quieyaquë', cana' naca quiero, bira saque' huero ta rnazin quiero. ²⁵ Pues ca naca quiero yu'uro Bichi Be quie Diuzi, cana' reya'ala' huero lato inabë'në' ra'o ca huero.

²⁶ Quie lena' bireya'ala' huero cuinro ben' ze. Bireya'ala' utituro laguedyiro ta idza'yaquë' ra'o, nica yežë'ro laguedyiro.

6

Reya'ala' gacalëro laguedyiro

¹ Bicha', chi ga nezile zu tu ben' nao xneza Cristo, pero napë' xquia, le'e ben' rue quie dyë'ëdi quie Bichi Be quie Diuzi, reya'ala' gacalële lëbë' ta usannë' bira gapë' xquia. Hue'lëronë' di'idza' zëla'adyi'. Gaparo cuidado cuinro, bihue'ro lato iquixiro ugaparo xquia cuinro. ² Lëscan' reya'ala' gacalëro laguedyiro ca tazëdi raca quieyaquë'. Chi huero cana', cana' hue quiero huero cabë' mandado bë Cristo ra'o.

³ Chi huero cuinro ben' ze, chi bire'enro bigacalëro laguedyiro, cana' barzi'ro yë' cuinro. ⁴ Yuguluro reya'ala' huero pensari chi nacan huen, chi binacan huen cabë' ta ruero. Chi neziro tali nacan tahuen cabë' ta ruero, na' reya'ala' suro contento, bihue'ro lato utëbin ra'o ca ina yaca los demás benë'.

⁵ Yuguluro reya'ala' huero bala ca naca ta raca quiero.

⁶ Nu ben' ruzioñe'e ra'o xti'idza' Diuzi, reya'ala' gacalërojë' con ta de quiero.

⁷ Bisi'le cuinle yë'. Nunu saque' utitu Diuzi. Naca quiero ca quie ben' raza bini. Ca ta gazaro layu, de yezi'ro cosecha quien. ⁸ Chi hue benë' ta rnazin quiejë', na'ra lena' udyiagui'n lëjë' lao Diuzi. Ruen zudyi biyezi' Diuzi lëjë', na' bigata' yela' neban quiejë' tuzioli. Pero chi hue nu benë' con cabë' rna Bichi Be quie Diuzi, chi hue quieyaquë' quienë', na'ra gata' yela' neban quieyaquë' tuzioli. ⁹ Cana' biyuhuëdiro huero tahuen, porque chi biyuhuëdiro huero tahuen, huela'iya Diuzi ra'o caora idyin hora. ¹⁰ Quie

lena' reya'ala' gacalëro nutezi benë', reya'ala' huero tadya'a quieyaquë'. Lëscana' ta naca belao na' gacalëro ben' bichiro, ben' nao xneza Cristo.

Ga beyudyi di'idza' bzu Pablo lë'ë guichi

¹¹ Ulena'cara ca letra yela ruzua' lë'ë guichi ni conlë na'a cuina'. ¹² Biruejë' huen yaca ben' re'en uzu tu xëdyidao' cuinle cabë' mandado rue lao ley quie Moisés. Rdzebijë' idza' ja ben' Israel lëjë' chi quixogue'jë' tuzi sudyi'ilëro Cristo, ben' guti lë'ë yaga cruzo, con lëzin yezi' Diuzi ra'o. ¹³ Pues nu yaca ben' babzu tu xëdyidao' cuine cabë' mandado rue lao ley quie Moisés, nica lëjë' birue quieyaquë' yugulu di'idza' cabë' mandado rue lao ley na'. Pero re'enjë' su tu xëdyidao' cuinle cuenda gacajë' ben' ze lao laguedyiyaquë', dan' bëjë' gan zule tu xëdyidao'. ¹⁴ Pero por tu parte quia' në'ëdi', birguiloga' bi hua' ta gaca ben' ze lao laguedya'. Tuzi ca re'enda', re'enda' gaca' ben' ze lao Jesucristo, ben' guti lë'ë yaga cruzo ta yezi dula' xquia quiero. Binacan belao chi ilë'ë yaca benë' në'ëdi' ben' ze. Lëscan' binacan belao chi ilë'ëda' leyaquë' ben' ze. ¹⁵ Chi nacalëro Cristo tuze, bibi huenan chi zu, chi bizu tu xëdyidao' cuinro cabë' mandado rue lao ley quie Moisés. Pero ruenan zi usanro pensari gula quiero huero pensari cubi ta zaza'lë Cristo. ¹⁶ Rulidza' Diuzi cuëchinë' chizi guicho laxta'ole yeyëchi'la'adyi'në' le'e, ben' nuelë Cristo tuze, yu'ule pensari cubi ta zaza'lë Cristo. Rulidza' Diuzi por yugulu ben' nao xneza Cristo, ben' naca ben' quie Diuzi.

¹⁷ Na'ra bira re'enda' huelële në'ëdi' zëdi ca naca di'idza' aodixogui'a le'e ni. Pues badyiacaza' zë xëdyi ga bën yaca benë' në'ëdi' zi', ben' rudie në'ëdi' tanun quie dan' naohua' xneza Cristo. Lëxëdyi na' rulu'en naca' ben' rue quie cabë' mandado hue Cristo në'ëdi'.

¹⁸ Bicha', rulidza' Señor quiero Jesucristo ta huela'iyane' le'e yugulule. Amén.

DI'IDZA' BZU SAN PABLO APÓSTOL LĚ'Ě GUICHI, USE'ELA'NĚ'N LAO CIUDAD EFESO

Use'ela' Pablo guichi ni lao yaca ben' nao xneza Jesús, yaca ben' nita' ciudad Efeso

¹ NĚ'ĕdi', Pablo, bdĕ' Diuzi nĚ'ĕdi' según ca re'ennĕ' huenĕ' use'ela'nĕ' nĚ'ĕdi' lao na'a ži'inĕ' Jesucristo. Bia' guichi ni use'ela'n lao le'e ben' nita' ciudad Efeso. Nacale ben' quie Diuzi. Nacale ben' nao xneza Cristo Jesús. ² Rulidza' Diuzi lĚ'nĕ' ži'inĕ' Jesucristo ta huela'iya Jesucristo le'e cuĕchiyaquĕ' chizi lu'u guicho laxta'ole.

Tazĕla babĕla'iya Diuzi ra'o ta biyeyudyi yedu quie

³ Reya'ala' huero Diuzi ben' že, ben' naca xuzi Señor quiero Jesucristo. Lao na'a Cristo tazĕla babĕla'iyane' ra'o ta biyeyudyi yedu quie cuenda na' yedyinro guibá. ⁴ Tu binecue' yedyi layu ulio Diuzi ra'o lao na'a Cristo ta gacaro ben' quienĕ'. Lĕscan' ulione' ra'o ta yezi dula' xquia quiero, na' yeyĕri guicho laxta'oro lao Diuzi. ⁵ Azio žĕ iza una Diuzi yezi'nĕ' ra'o iyacaro como ca ži'inĕ' nun quie nedyĕ'ĕnĕ' ra'o lao na'a Jesucristo. Cana' bĕnĕ' de acuerdo con ca re'ennĕ' huenĕ' quiero. ⁶ Quie lena' huero Diuzi ben' že gaparonĕ' bala'ana como dan' naquĕ' ben' že, ben' bala'ana quiero. Huero Diuzi ben' že como dan' žĕla bĕla'iyane' ra'o tanun quie nuelĕro ži'inĕ' tuže. Lega nedyĕ'ĕ Diuzi ži'inĕ'. ⁷ Tanto nedyĕ'ĕ Diuzi ra'o, apte pselanĕ' ra'o quie dula' xquia quiero tanun quie guti ži'inĕ' lĚ'ĕ yaga cruzo para ra'o, cana' uži'ženĕ' quiero. ⁸ Taže bablu'e Diuzi nedyĕ'ĕnĕ' ra'o babzioĕne' enĕ' ra'o ca naca pensari quie'. ⁹ Na'tera babzioĕne' enĕ' ra'o tu ta binezi benĕ' tiempote. Bzioĕne' enĕ' ra'o ca unanĕ' huenĕ' ise'elĕ' Cristo. ¹⁰ Según cabĕ' una Diuzi huenĕ' cati idyin hora tu dza zaza'ra, yetupanĕ' yugulu ta dyia guibá, len yugulu ta de lao yedyi layu, ta uca'nnĕ'n lao ladyina'a Cristo.

¹¹ Tanun quie nuelĕro Cristo tuže, cana' ulio Diuzi ra'o dza na'te tacuenda gunnĕ' ra'o ca ta re'ennĕ' gunnĕ' ra'o. Cana' gaca quiero cabĕ' pensari bĕ Diuzi huenĕ' quiero dza na'te, porque puro ta nacarĕ tahuen hue Diuzi. ¹² Na'ra nĕto', ben' nĕro, ben' nao xneza Cristo, guca quiendo' cana' tacuenda huendo' Diuzi ben' že gapando'nĕ' bala'ana nun quie naquĕ' ben' huen gula. ¹³ Pero lĕscan' le'e, cati babele quie di'idza' li quie Diuzi, cati babele cabĕ' hue Diuzi re'ennĕ' gunnĕ' ra'o yela' neban tuzioli, na'tera barnaole le'e Cristo, anacalĕlenĕ' tuže. Por nun quie bayu'u guicho laxta'ole Bichi Be que Diuzi, lena' rulu'en banacale ben' quie Diuzi. Cana' bĕ Diuzi según ca unĕ' huenĕ' quie Bichi Be quienĕ' dza na'te. ¹⁴ Como dan' bayu'uro Bichi Be quie Diuzi, lena' baržĕla'adyi'ro gun Diuzi ra'o yugulu cabĕ' ta unĕ' gunnĕ' ra'o cati yedyinro guibá nacaro libre. Caora na' yĕbiro Diuzi: "Diuxcalelo' naco' ben' že quiendo'."

Rnaba Pablo lao Diuzi ta uzioĕne' enĕ' yaca ben' nao xneza Cristo

¹⁵⁻¹⁶ Quie lena' birusana' rulidza' Diuzi rĕpa'nĕ' diuxcalelo' nun quiele como dan' babeda' dyĕ'ĕdi barnaole xneza xa'nro Jesús, dyĕ'ĕdi idyĕ'ĕle lagueidyile, ben' quie Diuzi. ¹⁷ Rulidza' Xuziro Diuzi, ben' de yela' huaca quie, ta gacalĕnĕ' le'e tzioĕne' ele dyĕ'ĕdi ca naca pensari quienĕ', lĕscan' ta uzioĕne' enĕ' le'e cabĕ' bĕ Cristo, bidanĕ' bĕnĕ' ca mandado bĕ Diuzi lĕbĕ' dza na'te. ¹⁸ Lĕscan' rulidza' Diuzi ta useni'nĕ' guicho laxta'ole cuenda

inezile dyë'ëdi ca naca yela' rbeza quiero yezi' Diuzi ra'o yedyinro guibá, ra'o ben' ulio Diuzi dza na'te. Lëscan' rulidza' Diuzi ta tzioñe'ele dyë'ëdi cabë' tadya'a gula gaca quiero yedyinro guibá gun Diuzi ra'o yela' neban quiero tuzioli, ra'o ben' quienë'. ¹⁹ Lëscan' rulidza' Diuzi ta tzioñe'ele quie Diuzi de yela' rnabë'tzegue quienë', birdzioguenë' yela' rnabë' ta gacalënë' ra'o, ben' quienë'. Blu'e Diuzi de yela' rnabë'tzegue quienë' ²⁰ cati psebannë' Cristo beroguë' ga redyin ben' huati, bënë' mandado cue'në' zaquë' yebë ga re'në' guibá. ²¹ Bë Diuzi nombrar Cristo ben' rnabë'ra lao yugulu ben' napa yela' rnabë', la'acazi ben' nita' lao yedyi layu, la'acazi ben' nita' guibá, la'acazi ben' nita' na'a, la'acazi ben' zaza'ra. ²² Pca'n Diuzi lao na'a Cristo yugulu ta de lao yedyi layu len yugulu ta de guibá. Lëscan' bënë' nombrar lëbë' ben' rnabë'ra lao yugulu ben' nao xnezë'. ²³ Nacaró ra'o, ben' nao xneza Cristo, tu cue'ro ben' nuelë Cristo tuže. Con Cristo naya'aro tu cue'ro. Naca Cristo ben' rnabë' lao yugulutero.

2

Yela' nedyë'ë quie Diuzi yezi'në' ra'o

¹ Dza na'te guca quiele ca quie ben' huati lao Diuzi. Dyin bë dula' xquia quiele, biyu'ule pensari bële ta rnazin quiele. ² Unaole bële ca rue yaca ben' nita' lao yedyi layu. Bë quiele quie Satanás, ben' naca xan' bichi be mala, ben' ru'e fuerza yaca ben' birue quie ca na Diuzi. ³ Cana' bëcazi ra'o yuguluro dza na'te caora biunaoro xneza Cristo. Bëro ta rnazin quiero, na' bë quiero quie pensari mala quiero. Quie lena' de ga hue Diuzi ra'o castigo huala lëbi ca yaca los demás ben' nita' lao yedyi layu. ⁴ Pero taže beyëchi'la'adyi' Diuzi ra'o. Tanto nedyë'ënë' ra'o ⁵ bënë' tacuenda gata' yela' neban quiero tuzioli caora cati psebannë' Cristo. Cana' bënë' quiero dza na'te la'acazi nenacaro ca ben' huati, neyu'uro pensari mala unabë' dula' xquia quiero ra'o. Yela' ben' huen quie Diuzi bënë' ta gata' yela' neban quiero tuzioli. ⁶ Cana' naca quiero ca quie ben' apseban Diuzi cabë' psebannë' Cristo. Cana' naca quiero yedyinro cue'lëro inabë'lëro Cristo guibá. ⁷ Cana' bënë' quiero cuenda ye inezi ben' zaza'ra dza zaza'ra cabë' taže nedyë'ënë' ra'o, taže gualënë' ra'o babënë' tahuen quiero, ben' nao xneza Cristo Jesús. ⁸ Como taže nedyë'ë Diuzi ra'o, cana' bënë' ta gata' yela' neban quiero tuzioli. Cala por nun quie dan' bi huero cuinro, na' gun Diuzi ra'o yela' neban quiero tuzioli, dechan' ta gunzi Diuzi ra'o ca regalo por nun quie ži'inë'. ⁹ Como binacan por nun quie dan' bi huero cuinro, na' gun Diuzi ra'o yela' neban quiero tuzioli, quie lena' bide bi huero ta huero cuinro ben' že lao Diuzi. ¹⁰ Cana' naca quiero, como dan' ta bë Diuzi banaoro xneza Cristo Jesús banuelëro lëbë' tuže. Cana' bënë' quiero cuenda huero tadya'a cabë' unanë' quiero huero dza na'te.

Baore' chizi guicho laxta'oro por nun quie banaoro xneza Cristo

¹¹ Quie lena' reya'ala' yeza'la'adyi'le cabë' guca quiele dza na'. Cala ben' Israel le'e. Bizu tu xëdyidao' cuinle cabë' mandado rue lao ley quie ben' Israel. Quie lena' biblë'ë ben' Israel le'e dya'a, como dan' yugulu ben' Israel bazu xëdyidao' cuinyaquë'. Tanun quie lena' nayaquë' ben' quie Diuzi lëjë', na' le'e binuebë'le Diuzi nayaquë'. ¹² Dza na'te nita'le binuebë'le Cristo, bibële cuenda ben' Israel. Nica nezile ca naca di'idza' bega'nle Diuzi ben' Israel dza na'te. Nita'le lao yedyi layu binezile chi zu Diuzi, biulezale yeyole guibá. ¹³ Pero na'a, banuelële Cristo Jesús tuže. La'acazi nica nezile chi zu Diuzi dza na'te, na'tera banezile zu Diuzi, banuebë'le lëbë'. Cana' naca quiele como dan' bida Cristo lao yedyi layu, gutinë' lë'ë yaga cruzo. ¹⁴ Cuin Cristo naquë'

ben' rbêchitza'o laxta'oro. Dyin quienê' abeyaca yugulu ben' nao xnezê' ca tu yedyizi. Banacaro ca tu yedyizi la'acazi ben' Israel, la'acazi ben' binaca ben' Israel. Lëbê' apquinoquê' yela' rudie laguedyi quiero cabê' ruquino besu zu ruza'aga benê'. ¹⁵ Caora cati guti Cristo lë'ë yaga cruzo, cana' uleza ley quie Moisés, bira inabê'n ra'o huero mandado quien. Cana' beyue Cristo chopa cue' benê' beyacaro tu cue'zi ben' cubi, ben' nuelê lëbê' tuze. Cana' bënë' quiero caora ulêchitza'ohuê' quiero. ¹⁶ Lëscan' caora guti Cristo lë'ë yaga cruzo, cana' uleza tazêdi raca entre lao rupa cue'ro. Cana' ulêchitza'ohuê' quiero conlê Diuzi. Beyuenê' ra'o tuzezi.

¹⁷ Bida Cristo lao yedyi layu, udixogue'nê' benê' xti'idza' Diuzi gudyinê' leyaquê' ca re'en Diuzi cuêchitza'ohuê' guicho laxta'oro. Udixogue'nê' le'e ben' binaca ben' Israel, ben' biunezi chi zu Diuzi. Lëscan' udixogue'nê' nêto' ben' Israel, ben' nezi zu Diuzi. ¹⁸ Dyin bê Cristo racalê Bichi Be quie Diuzi ra'o ta huebê'ro Xuziro Diuzi, la'acazi nacaro ben' Israel, la'acazi nacaro ben' za' yedyi tula. ¹⁹ Quie lena' bira nacale ca quie tu ben' za' yedyi zitul', ben' bdyin ga binaca yedyi quie, dechan' banadele cuenda lao Diuzi na'a lële yaca los demás ben' nao xneza Cristo. Banacale familia quie Diuzi. ²⁰ Naca quiero ca quie tu yu'u besu de yo. Naca yaca ben' apóstol len yaca los demás ben' profeta ca quie ga rzulao besu. Le'e nacale ca quie yo rucua'jê' besu. Naca cin Jesucristo ca quie yo belao rbêchiyaquê' ga rzulao bezu. ²¹ Lao yo belao, inaro Cristo, rucua' Diuzi yo quie besu dyê'edi. Rlisê' tu besu dya'a gula ta gaca idao' naca la'ia como dan' idao' quie Cristo na'. ²² Cana' naca quiele, banuelêle Cristo tuze. Quie lena' nacale ca quie tu idao' rnabê'ra quie Cristo. Lëscan' yugulu ra'o ben' nao xnezê', banuelêro Cristo tuze bayu'uro Bichi Be quie Diuzi, yela' na' nacaro ca quie tu idao' rnabê'ra ga zu Diuzi.

3

Bê Diuzi nombrar Pablo ta tzetixogue'nê' ben' binaca ben' Israel xti'idzê'

¹ Quie lena' nê'edi', Pablo, naca' preso dia' lu'u dyiguiba nun quie rdza' ja benê' rguixogui'a xti'idza' Cristo Jesús. Biraxejê' re'enda' gaca huen quiele le'e, ben' binaca ben' Israel. ² Nužela'adya' banezile cabê' ta ulio Diuzi nê'edi' ta quixogui'a le'e quie xti'idzê' como dan' re'ennê' yedyinle guibá. ³ Lëscan' babzioñe' Diuzi nê'edi' cabê' unanê' dza na'te huenê' quiele. Bibzioñe'enê' ben' tula. Na'tera bzioñe'enê' nê'edi' quie pensari quiê'. Lëpensari quie Diuzi babzua' lë'ë guichi ni tu chopá. ⁴ Caora bablabale quie di'idza' bzua' lë'ë guichi ni, na'tera inezcazile de que nezda' cabê' unâ Cristo huenê' quiele dza na'te. ⁵ Bibzioñe'e Diuzi yaca ben' unita' tiempote cabê' unanê' huenê' quiele. Pero na'a sí, lao na'a Bichi Be quienê', babzioñe'e Diuzi yaca apóstol quienê' len yaca los demás ben' rguixogue' xti'idzê', yaca ben' naca la'ia. ⁶ Cani naca ca una Diuzi dza na'te: Chi hue quiele le'e ben' binaca ben' Israel xti'idza' Diuzi, na'tera huela'ia Diuzi le'e, gunnê' le'e yela' neban tuzioli lëbizi ca huela'ia Diuzi nêto' ben' Israel, gunnê' nêto' yela' neban tuzioli. Lëscan' quie lena', nacaréle ben' nuelê Cristo tuze cabê' nêto'. Gun Diuzi le'e baneza ta de guibá cabê' di'idza' bega'nê Diuzi nêto' ben' Israel dza na'te por nun quie Cristo Jesús.

⁷ La'acazi bibi zaca' ta hua' dyin quie Diuzi, bënë' nombrar nê'edi' ta tza'a tzetixogui'a yaca benê' xti'idzê' cabê' unanê' huenê' dza na'te ta gacalênê' ben' nita' lao yedyi layu. Yela' rnabê' quienê' bënë' nombrar nê'edi'. ⁸ La'acazi ni lë'eti'zi bibi zaca' ta hua' dyin quie Diuzi cabê' zaca'ra los demás ben' rguixogue' xti'idzê', dechan' ulio Diuzi nê'edi', bënë' cule, use'elê' nê'edi' tzetixogui'a ben' binaca ben' Israel ca naca quie Cristo, naquê' ben'

ze, biyeyudyi yedu tahuen huenë' quiero. ⁹ Na' bë Diuzi në'ëdi' mandado yexi'idze'na' yugulu benë' ca naca quie pensari quienë' cabë' unanë' huenë' tiempo gula ta gacalënë' ben' binaca ben' Israel. Desde dza na'te nunu ben' gula nezi ca naca quie pensari quië' ca huenë' quie ben' binaca ben' Israel. Cana' naca pensari quie Diuzi, naquë' ben' raca rue yugulute. ¹⁰ Cana' bë Diuzi bënë' iyaca tuzezi ben' rue quie quienë', ben' Israel len ben' binaca ben' Israel, cuenda ilë'ë yaca ben' r nabë' zu guibá naca Diuzi ben' nayoñe'e yugulute. ¹¹ Cana' bë Diuzi, bënë' según ca unanë' huenë' quiero desde tiempo dza na'te. Nun quie lena' use'elë' zi'inë' Jesucristo, ben' naca xa'nro. Conlë lëbë' uya'lao bëyaquë' ca re'en Diuzi gaca. ¹² Tanun quie nuelëro Cristo tuze, cana' de lato hue'lëro Diuzi di'idza' cabë' ru'elëro xuzi zna'ro di'idza'. Biidzebiro bigaquero huadza' Diuzi ra'o. Cana' naca quiero dan' barue quiero quie zi'inë'. ¹³ Bidëbile ta raca quia' niga. Uzule pensari dyë'ëdi, como dan' por nun quie ta gaca huen quiele dia' ni redzagalaohua'.

Taze nedyë'ë Cristo ra'o

¹⁴ Tanto bë Diuzi tadya'a quiero, redaohueda' rguitzu ziba' laohuë' naquë' Xuzi Señor quiero Jesucristo. ¹⁵ Lëscan' naquë' Diuzi Xuzi yuguluro, la'acazi bazuro guibá, la'acazi nenita'ro lao yedyi layu. ¹⁶ Rulidza' Diuzi udze'në' fuerza valor lu'u guicho laxta'ole gacalë Bichi Be quienë' le'e. Birdziogue Diuzi fuerza valor quienë' gacalënë' le'e. ¹⁷⁻¹⁸ Cana' rulidza' Diuzi cuenda bayu'ule pensari quie Cristo lu'u guicho laxta'ole, na' inabë'n le'e dyë'ëdi. Lëscan' rulidza' Diuzi ta gacalënë' le'e ta inezile taze nedyë'ë Cristo le'e. Cana' reya'ala' inezile cuenda tzioñe'ele le'e, len yaca los demás ben' nao xneza Cristo, de que biyeyudyi yedu quie yela' nedyë'ë quie Cristo para ra'o. ¹⁹ Rulidza' Diuzi tacuenda gacalënë' le'e tzioñe'ele ca naca quie yela' nedyë'ë quie Cristo para ra'o, la'acazi bisaque' tzioñe'elen delu derë'. Cana' rulidza' Diuzi cuenda hue'le lato inabë' Diuzi le'e con ga zuzële du dza du yela.

²⁰ Na'ra reya'ala' ulidzaro Diuzi dan' naquë' ben' ze. De yela' r nabë' quienë' ta huenë' yugulute. Tazera de hue Diuzi quiero cabë' ta inabaronë' huenë'. Tazera de hue Diuzi quiero cabë' ta racaro pensari huenë'. Conlë ra'o ruelë Diuzi yela' huaca quienë'. ²¹ Naca Diuzi ben' ze. Reya'ala' ulidza yugulu ben' nao xnezë' lëbë'. Reya'ala' ulidza yugulu ben' rue quie zi'inë' Cristo Jesús lëbë'. Cana' reya'ala' gaca quienë' tuzioli. Amén.

4

Dyin quie Bichi Be quie Diuzi nacaro tuze

¹ Quie lena' du guicho du la'adya' inia' le'e reya'ala' tale dyë'ëdi como dan' ulio Diuzi le'e gacale ben' quienë'. Cana' nia' në'ëdi' dia' lu'u dyiguiba naca' preso nun quie dan' rdza' yaca benë' në'ëdi' rguixogui'a xti'idza' Diuzi. ² Bihuele cuinle ben' ze, huele gaxo conlë laguedyile. Gacale ben' zela'adyi', yeyëchi'la'adyi'le laguedyile, idyë'ële laguedyile. ³ Huele lato gacalë Bichi Be quie Diuzi le'e ta huele tuze conlë laguedyile, cana' cue' chizi guicho laxta'ole. ⁴ Naca yugulu ra'o, ben' nao xneza Cristo, tu cue'zi ben' nuelë lëbë' tuze. Tuzi Bichi Be quie Diuzi yu'uro yuguluro. Lëscan' como ulio Diuzi ra'o, tuzi naca yela' rbeza quiero rbezaro yedyinro guibá. ⁵ Cani naca quiero: Tuzi Cristo zu neziro naca xa'nro, tuzi xti'idza' Diuzi de neziro nacan ta hue quiero, tuzi bautismo de neziro nacan ta gacaro. ⁶ Tuzi Diuzi zu naquë' Xuzi yuguluro. Lëbë' r nabë'në' lao yuguluro, lëbë' rudë'në' ra'o bi dyin quienë' huero yuguluro, lëbë' runnë' fuerza valor de quiero yuguluro.

⁷ Pero quie quiero nudë' Cristo ra'o gunnë' fuerza valor bi dyin quienë' huero. ⁸ Lena' rguixogue'n lë'ë guichi la'iya quie Diuzi cani: Caora beyëpi Cristo ladza zeyonë' bedyinnë' guibá tatula, caora na' blu'en quienë' bënë' gan lao yaca ben' bdie lëbë'. Caora na' bëla'iya Cristo ra'o, bënnë' ta naca dya'a quiero.

⁹ ¿Pero biži ca inaro quie di'idza' gan' rnën cani: "Beyëpinë' zeyonë' bedyinnë' guibá tatula"? Lena' inaro tanëro uyëzinë' bdyinnë' uzunë' lao yedyi layu. ¹⁰ Na'ra lëcazë' beyëpinë' zeyonë' bedyinnë' guibá tatula ta inabë'në' lao yugulu ta naguixu Diuzi. ¹¹ Na'tera bënnë' laze nudë'në' ra'o bi dyin quienë' huero. Nudë'në' nu ben' gaca apóstol. Nudë'në' nu ben' quixogue' ca naca quie di'idza' gudyi Diuzi lëjë'. Nudë'në' ben' rguixogue' xti'idza' Diuzi cabë' ta pca'n Diuzi quiero ta gata' yela' neban quiero tuzioli. Nudë'në' ben' rudze' xnezi quie ben' nao xneza Cristo, ben' rusëdi yaca. ¹² Cana' runnë' ra'o fuerza valor huero bi dyin quienë' re'ennë' huero cuenda gacalëro laguedyiro uzioñe'erojë' ca naca quie di'idza' la'iya quienë' ta inaorayaquë' xneza Cristo mazara. ¹³ Cana' ruenë' quiero hasta idyin dza banacaro tuzi ca hue quiero xti'idzë', banacaro tuzi ca nuebë'ro lëbë' raquë' zi'i Diuzi. Cana' gacaro ben' nao du guicho du la'adyi' xneza Cristo, tzu'uro puro pensari dya'a ca pensari yu'u Cristo. ¹⁴ Bira naca pensari quiero cabë' naca pensari quie xcuidi'. Bira yetza'ro pensari quiero tu dza tu dza inaoro neza tula. Binacaro ca la'aga' bidyi ta nu'a be rguinun lao nisa. Bira hue'ro lato si' benë' ra'o yë', ben' re'en uquixi quiero, ben' re'en udze' ra'o neza tula, neza binaca quie Diuzi. La'acazi inayaquë' nacayaquë' ben' rioñe'e, bigalele quiejë'. ¹⁵ Mejorla hue quiero xti'idza' Diuzi edyë'ëro benë'. Cana' reya'ala' huero inaoro xneza Cristo, huelëronë' tuže, naquë' xa'nro ra'o, ben' nao xnezë'. ¹⁶ Ta bë Cristo nita'lëro laguedyiro dyë'ëdi gacalëro laguedyiro cuenda yuguluro hue quiero xneza Cristo mazara, edyë'ëro laguedyiro mazara.

Becubi Cristo pensari quiero

¹⁷ Cani nacan cabë' udxogui'a le'e tanun quie Cristo: Bira tale le'e ca rda ben' binuebë' Diuzi, como dan' naojë' yu'ujë' pensari tondo, pensari bibi zaca' ca naca pensari quie ben' rda ¹⁸ lao lato lao chula naca pensari quieyaquë'. Nica nezizyaquë' chi hue' Diuzi leyaquë' yela' neban tuzioli, como dan' yela' yeladyi' quiejë' nacajë' ben' laxta'o zidi. ¹⁹ Bira redue'yaquë' bi tamala rueyaquë'. Banue quieyaquë' rueyaquë' tamala. Redaohueyaquë' rueyaquë' con ta rnan quieyaquë'. ²⁰ Pero le'e, dyë'ëdi nezile, cala xneza Cristo naole chi ruele cana'. ²¹ Chi tali banezile cabë' una Cristo, chi tali banezile nacan tali cabë' unë', ²² quie lena' ruen zi usanla'adyi'le pensari gula quiele. Bira huele ta rnazin quiele, como dan' nacan tamedian gula, baoži'n le'e yë'. ²³ Reya'ala' hue'le lato yecubi Diuzi pensari quiele. ²⁴ Reya'ala' hue quiele quie pensari ta becubi Diuzi quiele, porque lëpensari na' banacan tuže len pensari quienë'. Chi inaoro lëpensari cubi na', cana' du la'adyi'ro talëro laguedyiro dyë'ëdi, huero puro tahuen.

²⁵ Quie lena' bira si'le laguedyile yë'. Puro di'idza' li hue'lële laguedyile, como dan' yuguluro nacaro tu cue' ben' nao xneza Cristo.

²⁶ Chi idza'le laguedyile, gapale cuidado ta bihuen xquia quiele. Chi rdza'le laguedyile, tu binegala dza reya'ala' layeyue'zetele laguedyile. ²⁷ Bihue'le lato huelë taxi'ibi' le'e huele tamala.

²⁸ Chi zu nule rbanle, reya'ala' usanle bira cuanle. Reya'ala' tzu'ule pensari huele dyin dya'a du guicho du la'adyi'le conlë ni'a na'ale ta gata' quiele, na' gacalële ben' bide quie.

²⁹ Biinële di'idza' mala bizinaque ulidzale benë'. Mejorla inële di'idza' dya'a ineyuele leyaquë' hueyaquë' tadya'a huela'iya Diuzi lëjë'. ³⁰ Bihuele tamala cuenda na' gaqueyëchi' Bichi Be quie Diuzi yu'ule. Bihuele cana' como dan' dyin quienë' banadele cuenda lao na'a Diuzi yezi'në' le'e yeyole guibá.

³¹ Usanla'adyi'le, bira inaya'le laguedyile, bira udiele laguedyile, bira idza'le laguedyile, bira utasi uniole laguedyile. Ni tu ta naca mala bira huelële laguedyile. ³² Mejorla tzu'ulële laguedyile dyë'ëdi, yeyëchi'la'adyi'le laguedyile, si'zele quie laguedyile cabë' baozi'e Diuzi quiele nun quie dan' nuelë tuze len Cristo.

5

Ni rnan cabë' reya'ala' taro dan' nacaro ben' quie Diuzi

¹ Nun quie nedyë'ë Diuzi le'e nacale zi'inë', cana' reya'ala' huele tuze huele ca rue Diuzi. ² Quie lena' reya'ala' edyë'ële laguedyile como ca nedyë'ë Cristo ra'o. Tanto nedyë'ënë' ra'o psedyinnë' cuinnë' gutië' lë'ë yaga cruzo ta yezi dula' xquia quiero. Ca beco' zi'ila' ruti ja benë' ta yezi dula' xquia quie lao Diuzi, cana' bë Cristo gutië' lë'ë yaga cruzo, ta yezi dula' xquia quiero. Ca yo zixi ulë'ëro yaxero taže gula, cana' yaxe Diuzi cabë' bë zi'inë' nedyë'ënë' ra'o.

³ Nun quie banacale ben' quie Diuzi, ni tu lasa, ni ledao'zi, bireya'ala' talële nutezi nigula, bireya'ala' huele biti'tezi ta naca tabayatza, bireya'ala' sa'la'adyi'le dumi. ⁴ Bireya'ala' hue'lële benë' di'idza' lë'ë, ni di'idza' tonto, ni di'idza' bayatza, porque lëdi'idza' na', bibi zaca'n para le'e. Mejorla ulidzale Diuzi huelenë' ben' ze. ⁵ Dyë'ëdi nezile chi nu ben' nue costumbre rdalënë' nutezi nigula, chi ruenë' biti'tezi ta naca tabayatza, chi rza'la'adyi'në' dumi, (tuzcazi nacan sa'la'adyi'ro dumi, len ta tzionla'adyi'ro ta naca yo o ta naca yaga), biyezi' Diuzi lëbë' ta yedyinnë' guibá ga rnahtë' Cristo len Diuzi.

⁶ Bihue'le lato si' benë' le'e yë' hue'lëyaquë' le'e di'idza' tondo inayaquë' le'e binacan mala huele can', porque hue Diuzi castigo huala nu ben' rue cana'.

⁷ Na'ra bihuelële leyaquë' tuze, ni ledao'zi.

⁸ Le'e udale lao lato lao chula dza na'te. Pero na'ra nun quie dan' nuelële Cristo tuze, cana' banayeni' laxta'ole. Quie lena' reya'ala' tale ca ben' nao xneza Cristo, ben' banayeni' laxta'ohue. ⁹ Nun quie nacale ben' nao xneza Cristo, ben' banayeni' laxta'ohue, lena' reya'ala' huele puro ta naca dya'a, puro ta naca tali, puro ta yu'u ni'a xnezi lao Diuzi. ¹⁰ Udze'le xneze ta huele pensari lëbi ca pensari quie Cristo tacuenda huele ca raxenë'. ¹¹ Bihuele ca rue ben' rda lao lato lao chula. Ruejë' ta bibizaca' lao Diuzi. Mejorla uzioñe'ele leyaquë' cuenda tzeni' guicho laxta'oyaquë' bira inoyaquë' tamala. ¹² Redue'ro huero di'idza' cabë' ruejë' nagachizi. ¹³ Pero caora uzioñe'erojé' ca naca tamala ruejë', caora na' inezijé' lega de dula' xquia quiejé', yela' na' bë' tzu'u beni' quie Diuzi guicho laxta'ojé', caora na' yenaøjé' xneza Cristo. ¹⁴ Quie lena' rguixogue'n lë'ë guichi la'iya quie Diuzi cani:

Uletëlebë le'e nita'le naca quiele ca quie ben' nita' rasi, ben' biyu'u pensari.

Ulesuli le'e nita'le naca quiele ca quie ben' huati, ben' biyu'u gracia.

Ulesu listo, porque bazu Cristo useni'në' guicho laxta'ole.

Cana' rguixogue'n lë'ë guichi la'iya.

¹⁵ Quie lena' reya'ala' gapale cuidado ca tale huele lao yaca benë'. Bitale huele ca ben' tondozi, pero ulehue ca ben' rioñe'e. ¹⁶ Biunitile tiempo quiele. Gacale listo huele tahuen, porque yugu dza de tamala. ¹⁷ Bihuetondole. Udze'le xneze ta inezile ca re'en Cristo huele. ¹⁸ Bihuele hue'e como dan'

lena' udyiagui'n pensari quiele. Mejorla hue quiele cabè' mandado rue Bichi Be quie Diuzi le'e. ¹⁹ Hue'lèle laguedyile di'idza' con cabè' rnan lè'è guichi Salmos ga yu'u di'idza' la'iya quie Diuzi. Lèscan' reya'ala' gulale himnos len cantos ta naca quie Diuzi. Cana' reya'ala' huele, huele Cristo ben' ze du guicho du la'adyi'le. ²⁰ Reya'ala' ulidzale Xuziro Diuzi yèbilenè' xcalelo' por nun quie dan' racalènè' le'e runnè' ta rdzioguele. Cana' huele uzètole lao xa'nro Jesucristo.

Ni rguixogue'n cabè' re'en Diuzi huelëro familia quiero

²¹ Huelële laguedyile ben' nao xneza Cristo tuze, porque nacale ben' rapa Cristo bala'ana.

²² Quie ja nigula bazulè be'mbyu, reya'ala' uzujè' di'idza' bi mandado rue be'mbyu quiejè' lèjè' como ca quie mandado rue Cristo. ²³ Cana' reya'ala' hue yaca nigula como dan' rna'bè' be'mbyu ina' uhuianè' nigula quie' cabè' rna'bè' Cristo ina' uhuianè' yaca ben' nao xnezè'. Naca Cristo ben' bapte psela ra'o, gutinè' lè'è yaga cruzo ta yezi dula' xquia quiero ra'o, ben' nao xnezè'. ²⁴ Como ra'o, ben' nao xneza Cristo, reya'ala' uzuro di'idza' ca mandado rue Cristo ra'o, lèscan' quie nigula bazulè be'mbyu, reya'ala' uzuè' di'idza' ca mandado rue be'mbyu quie' lèbè'.

²⁵ Na'ra quie ja be'mbyu bazulè nigula, reya'ala' edyè'èjè' nigula quiejè' cabè' nedyè'è Cristo ra'o, gutinè' lè'è yaga cruzo ta yezi dula' xquia quiero.

²⁶ Cana' bè Cristo quiero cuenda gacaro ben' naca la'iya. Conlè nisa len xti'idzè' udibinè' guicho laxta'oro, udubè' dula' xquia quiero. ²⁷ Cana' bè Cristo quiero cuenda idyino ra'o, ben' nao xnezè', laohuè' nacaro ben' babeyèri guicho laxta'ohue dyè'èdi. Ta bè Cristo bènè' quiero binaparo dula' xquia, bibi tamala de quiero, nacaro ben' naca la'iya, ben' babeyažo duze dula' xquia quie. ²⁸ Quie lena' reya'ala' edyè'èle gapale cuidado nigula quiele cabè' nedyè'èle gapale cuidado cuinle. Chi edyè'èle gapale cuidado nigula quiele, lena' huanita'le dyè'èdi, gacalèle cuinle. ²⁹ Cabè' nedyè'èro cuinro naparo cuidado cuerpo quiero, cana' nedyè'è Cristo ra'o napè' ra'o cuidado.

³⁰ Cana' rue Cristo quiero como dan' nacaro ben' quienè', nuelëro lèbè' tuze conlè yaca los demás ben' nao xnezè'. ³¹ Lèscan' naca be'mbyu lènè' nigula quienè' tuzi. Cana' rguixogue'n lè'è guichi la'iya quie Diuzi cani: "Reya'ala' usan be'mbyu xuzi znè'è gacalènè' nigula quie' tuze. Cana' banaca quiejè' ca quie tuzi bdyigo'." Cana' nan lè'è guichi la'iya. ³² Nezda' nacan zèdi ta tzioñe'ero cabè' nacan, pero cabè' rnica' niga, nacan tu ejemplo cabè' naca quiero lëro Cristo. Nacalëronè' tuzi. ³³ Quie lena' inia' le'e tatula de quie reya'ala' edyè'èle gapale cuidado nigula quiele cabè' nedyè'èle gapale cuidado cuinle. Lèscan' quie yaca nigula, reya'ala' gapajè' bala'ana be'mbyu quieyaquè'.

6

¹ Ni re'enda' inia' le'e tu di'idza' quie yaca xcuidi' cabè' reya'ala' hueyacabi'. Reya'ala' galeyacabi' quie xuzi zna'yacabi' como dan' cana' re'en Diuzi hueyacabi'. ² Ca naca mandamiento udxu Diuzi dza na'te rguixogue'n cabè' reya'ala' huero quie xuzi zna'ro, lèscan' rguixogue'n ca naca di'idza' bega'nle Diuzi ra'o chi hue quiero di'idza' unanè'. Quie lena' nan lè'è guichi la'iya caniga: "Reya'ala' gapale bala'ana xuzi zna'le. ³ Chi gapale bala'ana xuzi zna'le, na'ra gaca huen quiele sule zidza lao yedyi layu." Cana' nan lè'è guichi la'iya quie Diuzi.

⁴ Lèscan' rnica' le'e, ben' naca xuzi xcuidi', bihuele costumbre utza'le zi'ile. Mejorla usegualale zi'ile dyè'èdi, tilaleyacabi' caora hueyacabi' tamala

cuenda gacayacabi' ben' de pensari. Reya'ala' uzioñe'eleyacabi' cuenda inaoyacabi' xneza Cristo.

⁵ Lëscan' rnia' le'e, ben' nada'o reya'ala' uzule di'idza' ca mandado hue xa'nle le'e dza rdale lao yedyi layu. Reya'ala' gapale xa'nle bala'ana, reya'ala' uzule di'idza' cabè' rnanè' du guicho du la'adyi'le ca quie ben' ruzu di'idza' cabè' rna Cristo.

⁶ Cana' reya'ala' huele la'acazi zu xa'nle rna'nè' le'e, la'acazi bizunè' ina'nè' le'e. Huele mandado cabè' rue xa'nle le'e, no solamente dan' re'enle yega'nle huen laohuè', pero lëscan' dan' nacale ben' quie Cristo, ben' rue quie ca re'en Diuzi du guicho du la'adyi'. ⁷ Cana' du la'adyi'le huele dyin quie xa'nle. Bihuele pensari chi dyin quie benè'zi huele, dechan' dyin quie Diuzi.

⁸ Pues dyè'èdi nezile ga'acatezi tu tadya'a huero, huaguizu Diuzi ra'o, la'acazi nacaro ben' nada'o, la'acazi benacaro ben' nada'o.

⁹ Lëscan' rnia' le'e, ben' naca xan' ben' nada'o, huele tahuen conlë yaca ben' nada'o quiele. Bitila inèlële leyaquè'. Bigala'adyi'le tuzi Diuzi zu guibá inabè'nè' le'e cabè' inabè'le leyaquè'. Tucazi nacan ca rna'bè' Diuzi ra'o.

Reya'ala' uzalaro guicho laxta'oro

¹⁰ Na'ra, bicha', inia' le'e uzalale guicho laxta'ole nun quie nuele Cristo tuze. Huele tztuzu guicho laxta'ole nun quie naca Cristo ben' de yela' huaca quie. ¹¹ Ulehue ca re'en Diuzi huero ta ucuasa ucu'oro cuinro uzalaro guicho laxta'oro cuenda bihue xan' taxi'ibi' ra'o gan. ¹² Cana' huele nun quie cala laguedy benè' rdilalëro, dechan' rdilalëro ben' naca xan' taxi'ibi', rdilalëro ben' rue taxi'ibi' mandado, rdilalëro ben' rna'bè' lao lato lao chula. ¹³ Quie lena' ulehue dyè'èdi ca re'en Diuzi huele cuenda huele tztuzu guicho laxta'ole biusanla'adyi'le xneza Cristo caora cati ruelè xan' taxi'ibi' le'e bizinaquezi. Cana' reya'ala' huele cuenda bidzebile hue quiele xti'idza' Diuzi du guicho du la'adyi'le biyeyatile. ¹⁴ Chi huele cana', chi huele tali cabè' una Diuzi, lena' gacalën le'e ca racalë cincho ruquio lè'èle le'e. Chi huele ta yu'u ni'a xnezi quie Diuzi, lena' ucuasa ucu'on le'e cabè' rucuaa rucui'o guíba lata naco soldado ta biichugo espada lèbè'. ¹⁵ Sule listo tzirole tzetixoguel le benè' xti'idza' Diuzi cabè' rue soldado ruejè' listo racojè' žabayaquè' ruliojè' zapato. Naca xti'idza' Diuzi ta rbëchin chizi laxta'oro.

¹⁶ Pero ta naca belao ta huele, reya'ala' sudyi'ilële Cristo dyè'èdi cuenda bihue xan' taxi'ibi' gan huelën le'e bizinaquezi. Chi sudyi'ilële Cristo, lena' huen defender le'e ca rue defender guíba lata zè soldado ta biquido flecha zu gui' lèbè'. ¹⁷ Como bapte psela Diuzi le'e, reya'ala' sule puesto ca quie soldado, ben' nuzu cascó guichogue ta bibi gaca quie guichonè'. Lëscan' como naca xti'idza' Diuzi ca quie tu espada ta ben Bichi Be quie Diuzi le'e, reya'ala' guxule len sule listo ca quie soldado, ben' nuxu espada. ¹⁸ Reya'ala' uzule di'idza' hue quiele cabè' rnia' le'e. Biusanle ulidzale Diuzi. Biusanle inabalenè' gacalënè' le'e. Hue'le lato gacalë Bichi Be quie Diuzi le'e hue'lële Diuzi di'idza'. Huele listo, biyehuèdile. Ulidzale Diuzi ta gacalënè' yugulu ben' nao xneza Jesús. ¹⁹ Lëscan' ulidzale Diuzi inabalenè' gacalënè' nè'èdi' gunnè' nè'èdi' bi di'idza' hue'lia' benè'. Cana' re'en'nan cuenda iyažuga' yuxi'idze'na'yaquè' cuenda tziõe'eyaquè' hue quieyaquè' di'idza' la'íya quie Diuzi. Re'en Diuzi quixogui'ayaquè' ca unanè' huene' dza na'te use'elè' Cristo ta gata' yela' neban tuzioli para yaca ben' nita' lao yedyi layu, pero cala quie tuzi ben' Israel, lëscan' quie yaca ben' yedyi tula. ²⁰ Aose'ela' Diuzi nè'èdi' ta quixogui'a benè' xti'idza'nè', na' dia' lu'u dyiguiba niga tanun quie bire'en yaca benè' quixogui'a xti'idza'nè'. Ulidzale Diuzi gunnè' fuerza valor quia' quixogui'a benè' xti'idza' Diuzi ca reya'ala' hua'.

Rgapa Pablo ben' ciudad Efeso diuzi

²¹ Huedetixogue' Tíquico le'e ta inezile ca raca quia' niga. Dyë'ëdi nezile naca Tíquico ben' bichiro, ben' nao xneza Cristo. Du guicho du la'adyi'në' racalënë' nêto' ruendo' dyin quie Diuzi. ²² Quie lena' use'ela' lëbë' detixogue'në' le'e ca raca quiendo' niga cuenda bigaqueyëchi' guicho laxta'ole.

²³ Rulidza' Xuziro Diuzi lënë' zi'inë' Jesucristo ta cuëchiyaquë' chizi guicho laxta'ole le'e, ben' rue quie xti'idza' Diuzi. Rulidza'yaquë' ta gacalëyaquë' le'e idyë'ële laguedyile sudyi'ilële Cristo. ²⁴ Rulidza' Diuzi ta huela'iyane' yugulu le'e ben' nedyë'e Señor quiero Jesucristo tuzioli. Amén.

DI'IDZA' BZU SAN PABLO APÓSTOL LÈ'È GUICHI, USE'ELA'NÈ'N LAO CIUDAD FILIPOS

Rugapa Pablo diuzi yaca ben' nao xneza Jesús, yaca ben' nita' ciudad Filipos

¹ Nè'èdi' len Timoteo, nacando' ben' rue dyin quie Jesucristo. Use'ela'ndo' guichi ni lao yugu le'e ben' nao xneza Jesús, ben' nita' ciudad Filipos. Lëscan' use'ela'ndo'n lao yaca ben' napa dyin quie Diuzi, ben' rudze' xnezi quiele, len yaca los demás ben' racalè le'e ciudad Filipos. Nacale ben' quie Diuzi, nacale ben' nuelè Cristo Jesús tuže. ² Rulidzando' Xuziro Diuzi len Señor quiero Jesucristo ta gacalèjè' le'e huejè' cue' chizi laxta'ole.

Rulidza Pablo Diuzi ta gacalè Diuzi yaca ben' nao xneza Jesús

³ Rëpicaza' Diuzi “diuxcalelo” bè' reza'la'adya' le'e cabè' ruele. ⁴ Bè' rulidza' Diuzi redaohueda' rnaba' gaca tadya'a quie yugulule. ⁵ Pues desde dza uzulaole inaole xneza Cristo, banuelè nè'to' tuže rguixogue'le benè' di'idza' la'iya quie Diuzi. ⁶ Uzulao Diuzi ruenè' dyin dya'a quienè' lu'u guicho laxta'ole. Barzela'adya' biusan Diuzi ruenè' dyin dya'a quienè' conlè le'e hasta dza yedyin Jesucristo. ⁷ Napa' rson inia' quiele cana', porque nedyè'èda' le'e. Abèle nè'èdi' tuže con cabè' tadya'a bè' Diuzi para ra'ò. Abèle nè'èdi' tuže la'acazi dia' lu'u dyiguiba, la'acazi zua' lao yaca ben' rnabè' rua' defender xti'idza' Diuzi rguixogui'ayaquè' quie ta naca tali. ⁸ Nezi Diuzi lega re'enda' guida' ideyuba' le'e nun quie dan' nedyè'èda' le'e cabè' nedyè'è Cristo le'e. ⁹ Rulidza' Diuzi ta gacalènè' le'e ta idyè'èrale itu itule, na' inezile mazara quie Diuzi ta huele pensari dya'a, ¹⁰ na' si'le tahuen, hue quiele quie Diuzi. Cana' sí, yeyèri laxta'ole lao Diuzi, gabi dula' de quiele cati idyin dza yeguida Jesucristo. ¹¹ Cana' hue Jesucristo para le'e tacuenda huele puro tadya'a, yela' na' inezi yaca ben' nita' lao yedyi layu naca Diuzi ben' ze, ben' bala'ana.

Ta hue Pablo Cristo ben' ze, quie lena' rdanè' lao yedyi layu

¹² Bicha', re'enda' inezile ca ta aožaca' nè'èdi' bron huen, baoyèra ben' uzènaga di'idza' la'iya quie Diuzi. ¹³ Banezi yaca soldado, ben' rapa yulao', len yaca los demás benè', cabè' raca quia'. Neziyè' dia' lu'u dyiguiba por nun quie dan' naohua' xneza Cristo. ¹⁴ Lëscan' zè yaca ben' nao xneza Jesús, birdzebiyaquè' rguixogue'yaquè' benè' xti'idza' Diuzi du guicho du la'adyi'yaquè'. Ablè'èyaquè' cabè' racalè Diuzi nè'èdi', tu dia' lu'u dyiguiba.

¹⁵ Tali na' nita' bala ben' rnè quie Cristo, pero yela' zè', yela' mala quieyaquè' rnèyaquè'. Pero lëscan' nita'rè yaca ben' rnè quie Cristo du guicho du la'adyi'yaquè'. ¹⁶ Nita' bala ben' rnè quie Cristo ta huejè' cuinzijè' ben' ze. Birnèyaquè' quie Cristo du guicho du la'adyi'yaquè', den' re'enyayuè' huer-ayaquè' causa quia', dan' nezियाquè' dia' lu'u dyiguiba. ¹⁷ Pero lëscan' nita' yaca ben' rnè quie Cristo nun quie dan' nedyè'èyaquè' nè'èdi'. Neziyaquè' zua' niga ta hua' defender xti'idza' Diuzi. ¹⁸ Pero abihuena. Bicuezan yedao-hueda' nun quie rnèjè' quie Cristo, la'acazi du guicho du la'adyi'yaquè', la'acazi chi režè'yaquè' nè'èdi'.

¹⁹ Huedaohueda' dan' nezda' biti'tezi raca quia', huaroga' dya'a nun quie rulidzale Diuzi por nè'èdi', na' racalè Bichí Be quie Jesucristo nè'èdi'.

²⁰ Bire'enda' hua' tu ta gaca yela' stu' quia'. Re'enda' gaca quia' quixogui'a benè' xti'idza' Diuzi du guicho du la'adya', biyedue'da' chi bi bia'. Cana'

re'enda' hua' tacuenda tzioñe'era yaca benè' naca Cristo ben' ze, ben' bala'anara. Cana' re'enda' hua' ba'ala'cazi nebana', ba'ala'cazi gatia'. ²¹ Ta hua' Cristo ben' ze, quie lena' rda'a lao yedyi layu. Na'ra cati gatia', cana'ra bia' gan tzazulia'nè' tuzioli. ²² Pero chi nezua' nē'ēdi' lao yedyi layu, huazaque' huera' dyin quie Diuzi. Quie lena' binezda' nulan nacaran huen inahua'. ²³ Nacan zēdi ta useria' entre chopa neza. Para nē'ēdi' nacaran huen gatia' tzazulia' Cristo tuže. Cana' naca neza re'enda' inahua'. ²⁴ Pero zu itu neza reya'ala' inahua' dan' nacaran dya'a para le'e chi nezulia' le'e lao yedyi layu. ²⁵ Quie lena' nužela'adya' yega'nlia' le'e lao yedyi layu ta gacalia' le'e ta inaorale mazara xneza Cristo ta surale contento hue quiele quienè'. ²⁶ Cana' gaca huen quiele yedaohuele chi guida' ideyuba' le'e tatula.

²⁷ Nacan belao huele dyabè' tzu'ule tuže con cabè' una Cristo. Lēscan' la'achi guida' ideyuba' le'e, la'achi zua' zitu', re'enda' inezda' neyu'ule dya'a, nacale tuže ruele dyin quie Diuzi tacuenda uzēnaga yaca benè' di'idza' quienè'. ²⁸ Biidzebile quie yaca ben' rudie le'e. Dan' rudieyaquē' le'e, lena' nacan seña udyiagui'yaquē' cuinyaquē'. Quie le'e nacan seña nacale ben' bapsela Diuzi yezi'nē' le'e. ²⁹ Bē Diuzi cule quiele ulionè' le'e no solamente ta hue quiele quie Cristo, pero lēscan' ta yedzagalaole nun quie dan' nacale ben' quienè'. ³⁰ Cabè' le'e, cabè' nē'ēdi', tuzi ca zioro huero dyin quie Diuzi, biyuhēdiro. Bablē'ēle cabè' bia' dza na' bia' dyin quie Diuzi, bibehuēdia'. Na'ra banezile nerua' dyin quie Diuzi, biruhuēdia'.

2

Naca Cristo ben' belaora lao yugulute

¹ Como tali na' reyueze Cristo le'e, como tali na' nadyē'ēnē' ruxela'adyi'nē' le'e, como tali na' banacalēle Bichi Be quie Diuzi tuzi, como tali na' raque Cristo le'e, como tali na' reyēchi'la'adyi'nē' le'e, ² cana'ra reya'ala' huele tuzi ca pensari huele. Reya'ala' nadyē'ēle itu itule. Tuzi ca huele, huele tuže itu itule. Yela' na' yedaohueda' quiele. ³ Bihuele yaladyi', biuxa'ale. Huele gaxo len laguedyile, gaquele huen laguedyile ca cuinle. ⁴ Nitū nitule biquiloletadya'a quiezile, però lēscan' quilole tadya'a quie laguedyile.

⁵ Reya'ala' tzu'ule pensari cabè' pensari yu'u Jesucristo. ⁶ Ba'ala'cazi Cristo len Diuzi tuzi ca nacayaquē', bibē Cristo la fuerza huenè' cuinnē' lēbi ca Diuzi, ⁷ pero pca'nnē' tzala'la yela' rnabē' quienè', gologuē' guquē' be'mbyu, bidē' guquē' ca ben' nada'o. ⁸ Bidē' guquē' be'mbyu bdze'nē' cuinnē' lao na'a Diuzi. Bzunē' di'idza' cabè' gudyi Diuzi lēbē'. Bibebi'nē' cati bazionē' gatinē' lē'ē yaga cruzo, ba'ala'cazi yela' stu' huala na' gati benè' lē'ē yaga cruzo. ⁹ Quie lena' bzu Diuzi lēbē' naquē' ben' bala'anara quie yugulute. Quie lena' una Diuzi naca Cristo ben' belaora, nuranu ben' naca belao zu ca lēbē'. ¹⁰ Quie lena' yugulu benè', caora reyaquē' laohuē', reya'ala' quitzu zibiyaquē' lao Jesús, la'acazi ben' zu guibá, la'acazi ben' nita' lao yedyi layu, la'acazi ben' baguti. ¹¹ Cana' inayaquē' naca Jesucristo ben' belaora lao yugulute, hueyaquē' Xuziro Diuzi ben' ze.

Reya'ala' uzioñe'e yaca ben' nao xneza Jesús yaca ben' binetzioñe'e

¹² Quie lena', bicha', ben' nedyē'ēda', lēbi cabè' bē quiele cabè' di'idza' agudya' le'e dza na' caora nezulia' le'e, na'ra re'enda' hue quiele cabè' di'idza' ria' le'e, la'acazi zua' zitu' bisulia' le'e tuže. Du rdzebile, du rzizile ulehue na' rnēn Diuzi huele cuenda inaole dyē'ēdi' xneza Cristo. ¹³ Dyin quie Diuzi na' rnēn quiele uzule di'idza' quienè'. Cana' gacalē Diuzi le'e uza'laole huele cabè' re'ennē' huele.

¹⁴ Yugulu can' ruele, ulehuela dyë'edi. Bitzu'ule dila, bitzu'ule huenë, ¹⁵ cuenda bigata' dula' quiele. Re'enda' tale dyë'edi ca zi'i Diuzi lao yaca ben' mala, yaca ben' de dula' xquia quie. Nacale ca quie bélo dyia guibá ruseni'n yedyi layu nun quie dan' ruzioñe'ele benë', ben' binetzioñe'e. ¹⁶ Reya'ala' quixogue'leyaquë' xti'idza' Diuzi, di'idza' rnën quie yela' neban biyeyudyi yedu. Chi huele cana', cana' yedaohueda' dza yeguida Cristo dan' nužela'adya' biten cana'zi dyin quie Diuzi bia'. ¹⁷ Ba'ala'cazi ruen zi gatia', huedaohueda' como dan' cana' gaca' ben' naca gun quie Diuzi lëbi cabë' le'e, como nacaréle gun quie Diuzi por nun quie dan' barue quiele quienë'. Lena' yedaohueda' len le'e. ¹⁸ Cana' reya'ala' yedaohuele huelële në'edi' tuže yedaohuero.

Ise'ela' Pablo Timoteo len Epafrodito

¹⁹ Chi napa Jesús gusto, ise'ela' Timoteo ideyubinë' le'e tacuenda yedaohueda' cati yeda' di'idza' ca ta ruele. ²⁰ Tuzi Timoteo rdëbinë' len në'edi' ta yega'nle huen. Tuzi pensari racando' len Timoteo len në'edi'. ²¹ Yaca ben' tula, rguilola'adyi'yaquë' tadya'a quieziyaquë', birguilola'adyi'yaquë' tadya'a quie Cristo Jesús. ²² Banezile cabë' rue Timoteo. Bablu'enë' rdanë' neza dya'a. Lëscan' banezile cabë' bënë' rdalënë' në'edi' rguixogue'ndo' benë' xti'idza' Diuzi. Racialënë' në'edi' dyë'edi ca racialë tu xcuidi' xuzibi'. ²³ Caora banezda' nacala ca yero quia' niga, na'tera ise'ela' Timoteo ideyubinë' le'e. ²⁴ Pero nužela'adya' laguidatia' ideyuba' le'e, chi napa Cristo gusto guida'.

²⁵ Lëscan' raqueda' raoyente ise'ela' ben' bichiro Epafrodito ideyubinë' le'e. Lëlëbë' ruelia' dyin quie Diuzi, lëlëbë' redzagalaolia' tanun quie dan' rguixogue'ndo' xti'idza' Diuzi. Lëlëbë' baose'ela' le gan' zua' dza na' tacuenda gacalënë' në'edi' ta tzaxi'në' chan' bi ta rdziogueda'. ²⁶ Lega re'ennë' yeguidë' idena'në' yugulule. Lega rdëbinë' dan' nezinë' babele guca žhue'në'. ²⁷ Tali na' guca žhue'në' ilë'ëti'zi bigutinë'. Pero Diuzi gacalënë' lëbë', bigutinë'. Lëscana' gualë Diuzi në'edi', dan' beyacanë' ta bira uzua' mazara bayëchi'. ²⁸ Quie lena' lega re'enda' ise'ela'në' laole tacuenda yedaohuele ilë'ëlenë' tatula. Cana' bigacatica bayëchi' quia'. ²⁹ Ulesi' lëbë' du guicho du la'adyi'le, dan' naquë' ben' bichiro, ben' nao xneza Cristo. Reya'ala' gapale bala'ana yugulu ben' naca ca lëbë'. ³⁰ Ilë'ëti'zi bigutinë' tanun quie dan' rue quienë' di'idza' quie Cristo. Bicuenda bënë' chi gatinë' tacuenda gacalënë' në'edi' lao lazale chan' bi ta rdziogueda', como dan' biuzaque' guidale niga gacalële në'edi'.

3

Reya'ala' huebë'ro Cristo

¹ Na'ra bicha', reya'ala' yedaohuele dan' nacale ben' nao xneza Jesús. Binacan zëdi para në'edi' yenia' le'e tatula ca ta baonia' le'e dza na' lë'ë guichi, como dan' nacan belao para le'e. ² Bigalele quie yaca ben' rue ca rue yaca beco', yaca ben' rue tamala, yaca ben' rhugu cuerpo. ³ Ra'o nacaro dugalo ben' nuzu xëdyidao' cuine. Ra'o nacaro ben' rionla'adyi' Diuzi lao na'a Bichi Be quienë'. Redaohuero nacaro ben' quie Cristo Jesús. Neziro bibi zaca'n huero cuinro ben' ze por nun quie bi ruero dza rdaro lao yedyi layu. ⁴ Pero chi nacan huen huero cuinro ben' ze, naparia' derecho hua' cuina' ben' ze ca nurla ben' tula. ⁵ Pues bzuyaquë' tu xëdyidao' në'edi' caora gologa' guca' xu'una dza. Në'edi' naca' dugalo ben' Israel. Naca' zi'isuba xuzixta'oro Benjamín. Desde nacatia' xcuidi' raca' di'idza' hebreo. Gualia' ben' partido fariseo tuže. Ca rnaoyaquë' du guicho du la'adyi'yaquë' ley quie

Moisés, cana' unaohua' nē'ēdi'. ⁶ Du guicho du la'adya' psaca' ben' quie Jesús bizinaquezi dza na'. Tantozi unaohua' ley quie Moisés, nunu bē causa quia' chi udapa' dula' xquia lao Diuzi. ⁷ Pero banezda' na'a bibi zaca'n lao Diuzi yugulu ca ta guquēda' zaca'n lao Diuzi dza na'. Lena' nezda' porque dan' barnaohua' xneza Cristo na'a. ⁸ Lēscan' nezda' yugulu ta de quia' nacan ca quie ta chu'unro, ta bibi sirve. Zaca'ran huebi'a Cristo, ben' naca Señor quia', cala ca yugulu ta de quia'. Tanun quie nubi'a Cristo, pca'na' tzala'la yugulu ta de quia'. Araquēda'n ca tu bēbi, tanto zaca'ran ta huebi'a Cristo, ⁹ tanto zaca'ran tzalia' Cristo tuže. Cala por nun quie unaohua' ley quie Moisés rlē'ē Diuzi nē'ēdi' ben' laxta'o yēri, dechan' por nun quie dan' rzudyi'ilia' Cristo. Huazi' Diuzi nutezi ben' rzudyi'ilē'ē Cristo. ¹⁰ Tuzi ca re'enda', re'enda' huebi'a Cristo. Re'enda' sulē yela' huaca quienē' nē'ēdi' cabē' yela' huaca bē Diuzi psebannē' lēbē'. Lēscan' zua' dispuesto yedzagalaohua' cabē' bedzagalaonē', ba'ala'cazi huen zi gatia' cabē' gutinē'. ¹¹ Cana' re'enda' tacuenda hua' gan useban Diuzi nē'ēdi' yeroga' ga de ben' huati.

Ni rguixogue'n ca reya'ala' huero ta huero gan huebē'ro Cristo

¹² Pero biinia' babia' gan baoya'lao banubi'a Cristo. Lēscan' cala beyudyi bzioñe'e Diuzi nē'ēdi' hua' ca mandado re'ennē' hua'. Pero biusana' xneza Cristo. Re'enda' hua' gan huebi'a Cristo ca nuebē' Cristo nē'ēdi'. ¹³ Lēscan' bicha', biinia' babia' gan abeyudyi bia' cabē' re'en Diuzi hua'. Quie lena' birdēbida' ca tu ta baode baguca. Pero rua' dyabē' ta hua' ca re'en Diuzi hua' dza zaza'ra. ¹⁴ Rua' dyabē' rnaohua' xneza Cristo tacuenda yeyēzi Diuzi nē'ēdi' yeya'ga guibá. Hueyēzi Diuzi yaca ben' nuelē'ē Cristo tuže ta tzezulēyaquē' lēbē' tuzioli.

¹⁵ Yugulu le'e ben' nao neza Cristo, reya'ala' huele pensari ca pensari agudya' le'e niga. Chi le'e natza' pensari quiele, Diuzi uzioñe'enē' le'e ta huele tuzi ca pensari rua'. ¹⁶ Quie lena' sí, reya'ala' huero, reya'ala' huero tuzi pensari cabē' pensari nudze' Diuzi ra'o.

¹⁷ Bicha', cabē' rua' nē'ēdi', cana' reya'ala' huerēle. Lēscan' huele cuenda nu ben' rue cabē' bēndo' cati unita'lēndo' le'e dza na'. ¹⁸ Zē lasa baonia' le'e, na' du rbedya' hua' repetir tatula de que nita' ben' zē, ben' naca enemigo quie Cristo. ¹⁹ Naca quieyaquē' yeyoyaquē' lagui' gabila. Ta rnazin quieyaquē' rueyaquē' rnaoyaquē' quie diuzi quieyaquē'. Reya'ala' yedue'yaquē' ca rueyaquē', den' redaohuelayaquē'. Tuz ta raca lao yedyi layu ruejē' pensari. ²⁰ Pero ra'o nacaro cuenda quie Diuzi zu guibá. Rbezaro dza zeza' Jesucristo, ben' psela ra'o, ben' naca Señor quiero. ²¹ Lēbē' yetza'nē' bē'ēla' zuba' banaca bayēchi' quiero ta iyacan yen' cabē' naca cuerpo quienē' cuinnē'. Cana' huenē' quiero conlē yela' huaca de quienē' rnabē'nē' lao yugulute.

4

Reya'ala' yedaohuero nacaro ben' nao xneza Cristo

¹ Quie lena' bicha', ben' nedyē'ēda', lega re'enda' guida' ideyuba' le'e. Por le'e sua' contento nacale ca quie tu premio quia'. Rnia' le'e, ben' nedyē'ēda', ulenao xneza Cristo du guicho du la'adyi'le, biyehuēdile.

² Rnabayēcha' Evodia len Síntique ta yega'nlēleyaquē' tuzi ca reya'ala' hue yaca nigula, ben' nao xneza Cristo. ³ Lēscan' luē', ben' compañero quia', ben' ruelē nē'ēdi' dyin quie Diuzi, re'enda' gacalēlo' lērupa nigula. Leyaquē' bzagalēyaquē' nē'ēdi' cati udixogue'ndo' benē' di'idza' la'iya quie Diuzi conlē Clemente len itu yaca ben' tula, ben' bēlē nē'ēdi' dyin quie Diuzi. Bazu laoyaquē' lē'ē libro ga yu'u lao yaca ben' de yela' neban quie tuzioli.

⁴ Yugu dza reya'ala' yedaohuele, dan' nacale ben' nao xneza Cristo. Tatula rnía' le'e: ¡Yedaohuele! ⁵ Huele tahuen ta ilë'ë yugulu benë' le'e ben' žela'adyi'. Baruen bago dza yeguida Cristo.

⁶ Bidëbile chi bití'tezi raca quiele. Yëbile Diuzi chi bi raca quiele. Ulenaba Diuzi chi bi rdzioguele. Yëbilenë' diuxcalelo'. ⁷ Cana' hue Diuzi cue' chizi laxta'ole. Ca rue Diuzi, ruenë' cue' chizi laxta'oro, lena' nacaran mazara cabë' nacan ta tzioñe'ero. Lëscan' huapa Diuzi le'e cuidado ta tzu'ule pensari dya'a tanun quie sudyi'ilële Cristo Jesús.

Huero pensari quie ta naca tadya'a

⁸ Ta iyudyi di'idza' rnía' le'e bicha', ulehue pensari quie yugulu ta naca tali, len quie yugulu ta naca ta bala'ana, len quie yugulu ta naca tabala, len quie yugulu ta naca tala'iya, len quie yugulu ta raxe Diuzi, len quie yugulu ta nuzë quie nacan huen. Chi nacan dya'a, chi nacan ta ilë'ëro huen, lëlena' ulehue pensari cabë' nacan.

⁹ Ulehue ulenao ca ta bapsëdia' le'e, len ca ta blu'ena' le'e. Ulehue ulenao ca ta babele baonia', len ca ta bablë'ële bia'. Cana' selë Diuzi le'e. Naca Diuzi ben' cuëchi chizi laxta'ole.

Ben'yedyi Filipos bë'yaquë' Pablo gun

¹⁰ Lega redaohueda' laohue Cristo dan' babeza'la'adyi'le në'ëdi' tatula. Cala rnía' chi bagula'adyi'le në'ëdi'. Nezda' gu'unle gacalële në'ëdi' dza na', pero biuzaque'. ¹¹ Cala rnía' chi bi rdziogueda'. Baoyulaohua' redaohueda' con tu tadao' de quia'. ¹² Nezda' ca naca quie ben' yëchi'. Lëscan' nezda' ca naca quie ben' birdziogue. Con bití'tezi gaca quia', la'achi aodaohua' beloga', la'achi rdua', la'achi bibi rdziogueda', la'achi rdziogueda', baoyulaohua' sua' contento bira rdëbida'. ¹³ Huazueda' con bití'tezi gaca quia', dan' run Cristo në'ëdi' fuerza valor quienë' yugu dza. ¹⁴ Pero bële tu tahuen quia', beyëchi'la'adyi'le në'ëdi' ca tazëdi raca quia'.

¹⁵ Le'e ben' ciudad Filipos, nezile tu cue'zi le'e baose'ela'le gun quiele. Bigula'adyi'le ca gualia' le'e udixogui'a le'e di'idza' la'iya quie Diuzi. Lëscan' gualële në'ëdi' dza uya'a yu nebaba Macedonia caora cati uzulaohua' udixogui'a benë' di'idza' la'iya quie Diuzi. ¹⁶ Cati nezua' ciudad Tesalónica, chopa tzona lasa use'ela'le gun quiele itzani'a ta hua' gasto quia'. ¹⁷ Cala rnía' le'e ta ise'ela'le bi cosa quia'. Ca re'enda', re'enda' gata' tahuen quiele lao Diuzi dan' beyëchi'la'adyi'le në'ëdi'. Redaohueda' cati gaca quiele cana'. ¹⁸ Ta naca yalao babezi'a në'ëdi'. Mazla ca tu ta rdziogueda' use'ela'le quia' lao na'a Epafrodito. Ta use'ela'le quia' në'ëdi' nacan ca quie tu ta bë'le Diuzi rla'n zixi žeo, bezi'në'n yaxenë'n. ¹⁹ Gun Diuzi le'e yugulu ca tu ta rdzioguele como biyeya ta de quie Diuzi. Tadya'atzegue de quie Diuzi conlë Cristo Jesús. ²⁰ Reya'ala' gaparo bala'ana Xuzi Diuzi tuzioli. Amén.

Rugapa Pablo leyaquë' diuzi

²¹ Ulegapa diuzi yaca ben' quie Diuzi nita' na', yaca ben' zulë Cristo tuže. Yaca ben' bichiro, ben' zulë në'ëdi' niga, rgapayaquë' le'e diuzi. ²² Yugulu ben' rue quie xti'idza' Diuzi, ben' nita' niga, rugapayaquë' le'e diuze. Lëscan' yaca ben' quie Diuzi, ben' rue dyin žan yu'u quie ben' rnabë' quie ben' romano, rugaparëyaquë' le'e diuzi.

²³ Rnaba' huela'iya Jesucristo yugulule. Lëbë' naquë' ben' Señor quiero. Amén.

DI'IDZA' BZU SAN PABLO APÓSTOL LÈ'È GUICHI, USE'ELA'NÈ'N LAO CIUDAD COLOSAS

Rugapa Pablo yaca ben' nita' ciudad Colosas diuzi

¹ Nè'èdi', Pablo, bdè' Diuzi nè'èdi' cabè' re'ennè' gaca tacuenda tza' tzetixogui'a benè' di'idza' la'ia quie Jesucristo. Nè'èdi'lia' ben' bichiro Timoteo, ² bëndo' guichi ni, use'ela'ndo'n laole ciudad Colosas. Banacarèle ben' quie Diuzi dan' banuerèle Cristo Jesús tuze. Rnabando' huela'ia Xuziro Diuzi le'e cuèchinè' chizi lu'u guicho laxta'ole.

Rulidza Pablo Diuzi ta gacalè'nè' yaca ben' nao xneza Cristo

³ Yugu dza rèbicazindo' Diuzi diuxcalelo' tanun quiele caora rulidzando' Diuzi, ben' naca Xuzi Jesucristo. Naca Jesucristo ben' belaora quiero. ⁴ Bagudyi benè' nètò' cabè' ruele rzudyi'ilèle Cristo, nadyè'èle yaca ben' rue quie xti'idza' Diuzi. ⁵ Cana' naca quiele nun quie dan' rbezale gun Diuzi le'e tu tadya'atzegue pca'nnè' quiele guibá. Aonezile cana' bē Diuzi quiele dan' babèle cuenda quie di'idza' la'ia quie Diuzi dza na'. ⁶ Ca naca di'idza' quie Diuzi babele zio rzenan, lèdi'idza' na' barue quie yaca ben' zè, na' betza'yaquè' pensari quieyaquè', barnaoyaquè' xneza Cristo. Cana' baraca duze yedyi layu. Lèzi le'e, cana' raca quiele desde dza bele ca nadyè'è Diuzi benè', gucabè'le nacan tali. ⁷ Lèzi cana' psèdi Epafra le'e. Nacarè Epafra ben' rue dyin quie Diuzi. Nadyè'èndo'nè'. Naquè' ben' rue dyin quie Cristo conlè le'e du guicho du la'adyi'nè'. ⁸ Lèbè' bidè' bedetixogue'nè' nètò' cabè' ruele nadyè'èle benè' cabè' nadyè'è Cristo benè'.

⁹ Quie lena' binusando' rulidzando' Diuzi por le'e desde dza na' cati bendo' ca ruele nedyè'èle yaca ben' nao xneza Cristo. Binusando' rnabando' lao Diuzi ta uzioñe'enè' le'e cabè' re'ennè' huele, len cabè' re'ennè' tzu'ule pensari quienè', len cabè' re'ennè' inezile bi rue Bichi Be quienè' racalè'nè' ra'o. ¹⁰ Cana' rulidzando' Diuzi tacuenda tale cabè' reya'ala' ta ben' nao xneza Cristo ta yedaohuenè' yugulu ca ruele. Lèscan' rulidzando' Diuzi tacuenda huele dyin quie Diuzi dyè'èdi yugu ca re'ennè', lèscan' ta inezirale quie Diuzi cabè' rnabè'nè' ra'o. ¹¹ Rnabando' lao Diuzi gunnè' fuerza valor quiele tacuenda huele gan biti'tezi gaca quiele biyedzebile yedaohuele biyeyatile, na' dyè'èdi yedaohuele du usela Diuzi le'e. ¹² Reya'ala' yèbile Xuziro Diuzi diuxcalelo', dan' banuetenè' ra'o puesto ta tzu'uro ga naca xni' yezi'ro tu ta pca'n Diuzi para ra'o, ben' naca cuenda quienè'. ¹³ Aolio Diuzi le'e, bira nacle cuenda ta inabè' xan' taxi'ibi' le'e. Banue Diuzi le'e cuenda inabè' zi'inè' le'e. Nadyè'è Diuzi zi'inè'. ¹⁴ Lèbè' gutinè' lè'è yaga cruzo ta yezi' dula' xquia quiero gata' yela' neban quiero tuzioli.

Tanun quie yela' guti quie Cristo nacalèro Diuzi tuze

¹⁵ Cabè' naca quie Cristo, ben' saque' ilè'èro, cabè' na' naca quie Diuzi, ben' bisaque' ilè'èro. Naca Cristo lao Diuzi ca quie tu zi'inè' nèro. Nacarè' belaora lao yugulu ta bē Diuzi. ¹⁶ Lao na'a Cristo bē Diuzi yugulute, la'acazi ta dyia guibá, la'acazi ta zu lao yedyi layu, la'acazi ta saque' ilè'èro, la'acazi ta bisaque' ilè'èro, la'acazi yaca ben' nita' guibá, yaca ben' de yela' rnabè' quie. Lao na'a Cristo bē Diuzi yugulute, na' bega'nnan quienè'. ¹⁷ Tu binecuel' yedyi layu bazucazi Cristo. Yugulu ta de lao yedyi layu nacan la'adyi'na'anè'. ¹⁸ Naca yaca ben' nao xneza Cristo ca quie tuzi cuerpo. Naca Cristo ca quie

guicho cuerpo na'. Na' ra'o nacaro ca quie cuerpo quiené'. Tanéro beban Cristo. Quie lena' naquè' ben' belaora lao yugulute. Ganura ben' belao zu como ca lèbè'. ¹⁹ Cani nacan, como dan' cabè' naca Diuzi, cabè' na' naca Cristo. ²⁰ Tanun quie dan' guti Cristo lè'è yaga cruzo ulato ren quiené', quie lena' pca'ntza'o Diuzi yaca benè', la'acazi ben' zu yedyi layu, la'acazi ben' zu guibá.

²¹ Dza na' gucale ben' binuebè' Diuzi, ben' rudie Diuzi tanun quie dan' bèle tamedian. Pero na'a bapca'ntza'o Diuzi le'e ²² tanun quie dan' guti Cristo lè'è yaga cruzo. Cana' bē Cristo tacuenda na' nayērile lao Diuzi, bibi dula' quiele de ta usedyinnè' le'e lao Diuzi. ²³ Quie lena' reya'ala' inaorale dyè'èdi hue quiele quie Cristo. Biusanle uzalale biyebiga'le. Reya'ala' cuezale yezi' Diuzi le'e ca rnèn lè'è guichi la'iya quie Diuzi. Lèdi'idza' na' rguixogue'ro duze yedyi layu. Ca naca nè'èdi', naca' ben' rguixogue' xti'idza' Diuzi.

Bdè' Diuzi Pablo ta usèdinè' yaca ben' nao xneza Cristo

²⁴ Redaohueda' sacazi'a ta gacalia' le'e como dan' cana' nacalia' Cristo tuze con cabè' guca quiené' uzacazi'nè' ta gacalènè' yaca ben' quiené', ben' naca ca quie cuerpo quiené'. ²⁵ Bdè' Diuzi nè'èdi' ta usèdia' yaca ben' rue quie xti'idza' Diuzi. Cana' re'enda' gacalia' quixogui'a le'e yugulu con cabè' rguixogue' di'idza' la'iya quie Diuzi. ²⁶ Lena' rda'a ruzioñe'eda' ben' nao xneza Cristo con cabè' rguixogue' xti'idza' Diuzi, pero tu ta biunezi yaca ben' unita' tiempote ruzioñe'eda'yaquè' na'a. Azio zè iza de di'idza' nuchachi' Diuzi, pero na'tera bzioñe' Diuzi yaca ben' nao xneza Cristo cabè' rguixogue' di'idza' nuchachi'nè'. ²⁷ Cana' re'en Diuzi uzioñe'enè' yaca ben' quiené' cabè' rguixogue' di'idza' nagachi' quiené', dan' di'idza' dya'a nacan ta hue quieyaquè' yaca ben' binaca ben' Israel. Pues rguixogue' di'idza' nagachi' quie Diuzi cani: Zu Cristo lu'u guicho laxta'ole. Lèbè' rbezale yeguidè' yezi'nè' le'e yeyole guibá ga naca yeni' quiené'.

²⁸ Nèto' rguixogue'ndo' quie Cristo. Rnèyundo' lusèdindo' benè' du guicho du la'adyi'ndo' tacuenda usedyinnè' yaca benè' lao Diuzi gacayaquè' ben' laxta'o yèri nun quie nacalèyaquè' Cristo tuze. ²⁹ Quie lena' rua' dyin quie Diuzi du guicho du la'adya' conlè fuerza valor run Cristo nè'èdi'.

2

¹ Re'enda' inezile lega rdèbida' bi raza quiele. Lèscan' rdèbida' quie yaca ben' quie Jesús nita' yedyi Laodicea, len nutezi ben' quie Jesús chan' binubè'yaquè' nè'èdi'. ² Re'enda' biyeyatiyaquè' idyè'èyaquè' itu ituyaquè' gacayaquè' tuzi. Re'enda' cue' chizi laxta'oyaquè' nun quie babzioñe' Diuzi leyaquè' cabè' rguixogue' di'idza' nagachi' quiené' de que rguixogue'n quie Cristo. ³ Naca Cristo ben' rioñe'e yugulute. Biyeyudyi yedu yela' rioñe'e quiené'. ⁴ Lena' rnía' le'e tacuenda bigalele quie yaca ben' ru'e di'idza' huezi' yè'. ⁵ Ba'ala'cazi bizèlia' le'e, pero rdèbida' quiele chi bi raza quiele. Redaohueda' rue quiele ta yu'u ni'a xnezi, birdzebile inaole xneza Cristo.

⁶ Quie lena', dan' bazo'i'le xneza Cristo, reya'ala' tale cabè' rda ben' nacalè Cristo tuze. ⁷ Ca quie tu yaga huala yu'u luanan garè', lècana' reya'ala' huele quie xneza Cristo, reya'ala' sèle len huala, biinaole udeudela neza. Tuzi neza quie Cristo reya'ala' inaole, na' hue quiele cabè' unanè', cabè' psèdindo' le'e. Biusanle yèbile Diuzi diuxcalelo' yugu dza.

Baben Cristo yela' neban cubi quiero

⁸ Ulegapa cuidado. Bihue'le lato si' benè' le'e yè', ben' rnè di'idza' dachi, di'idza' huezi' yè'. Birueyaquè' dyabè' inao benè' xneza Cristo, den'

rueyaquë' dyabë' inao yaca benë' ca naca costumbre quieyaquë'. Rueyaquë' dyabë' inao yaca benë' ca naca pensari quie yaca ben' nita' lao yedyi layu.

⁹ Dužete cabë' naca Diuzi, cabë' na' nacarë Cristo. ¹⁰ Quie lena' yugulu ta de nacan quiele dan' nacalële Cristo tuže. Lëbë' rnabë'ranë' lao yugulu yaca ben' rnabë'. ¹¹ Lëscan' dan' nacalële Cristo tuže, quie lena' nacan quiele ca quie ben' bzu tu xëdyidao' cuine. Pues como dan' babeyërile lao Diuzi, bira rnabë' ta rnazin quiele le'e, lena' nacan quiele ca quie tu xëdyidao' bzu Cristo le'e, cala xëdyidao' bzu benë' le'e. ¹² Lëscan' caora uyu'ule nisa gucale bautismo, cana' guca quiele ca quie ben' gutilë Cristo, ben' uyu'u lu'u yëroba, ben' bebanlë Cristo tatula. Cana' naca quiele na'a nun quie rue quiele quie yela' huaca quie Diuzi, ben' pseban Cristo. ¹³ Tu ta baodele dza na' cati binehue quiele quie Diuzi, baodele guca quiele ca quie ben' huati de lao Diuzi. Pues por nun quie dula' xquia quiele, bineyërile lao Diuzi. Pero na'a baben Diuzi le'e yela' naban tuzioli nun quie banacalële Cristo tuže, bezi'ženë' dula' xquia quiele. ¹⁴ Beguba Diuzi tu ta žuba le'e xquia, tu ta nudze'de'na le'e de acuerdo con cabë' na ley quienë'. Lena' apsula Diuzi caora guti Cristo lë'e yaga cruzo. ¹⁵ Cana' bë Cristo gan begubanë' yela' rnabë' quie yaca bichi be xi'ibi' caora cati gutiguë' lë'e yaga cruzo. Paxonë' leyacan zaca'lao lao yaca los demás ben' nita' guibá. Bzunë' leyacan preso ca rue nu rey ruzunë' preso ben' naca enemigo quienë'.

Ulehue cuenda tu ta naca quie guibá

¹⁶ Quie lena' nitu nitu bireya'ala' inabižoyaquë' le'e quie ta bi gaole, len ta bi yo'ole. Bireya'ala' inabižoyaquë' le'e quie bi dza huele lani, chi dza bezë' biu' re'ene, o chi dza tula. Lëscan' bireya'ala' inabižoyaquë' le'e quie bi dza huele dza huezila'adyi'. ¹⁷ Chi yela' huao, chi lani, chi dza huezila'adyi', lao yunaten rguixogue'n quie tu ben' zaza'ra. Rguixogue'n quie Cristo, ben' naca tali quie Diuzi. ¹⁸ Bihue'le lato si' yaca ben' rionla'adyi' yaca ángel le'e yë'. Bihue'le lato cubayaquë' ta pcueza Diuzi para le'e guibá. Rueyaquë' ca quie ben' gaxo gula, pero bë' rueziaquë'. Nayaquë' uxusayaquë' blë'ëyaquë' ta naca tali quie Diuzi, pero bë' naziyaquë'. Rueyaquë' cuinyaquë' ben' že, pero ta racazi la'adyi'yaquë' rueyaquë' cana'. ¹⁹ Bira ruelëyaquë' Cristo tuže. Ca gaoro ta gue'eniro suro dya'a, cana' naca quie Cristo, ruzioñe'enë' ra'o cabë' naca pensari quie Diuzi tacuenda suro dya'a laohuë' con cabë' re'en Diuzi naca quiero.

²⁰ Le'e nacale ca quie ben' huati, ben' gutilë Cristo. Bira nacale cuenda quie benë' ta inao'le huele quie pensari quieyaquë'. ¿Bixquien' nenaole neruele quie pensari quie yaca benë' cati bira nacale cuenda quieyaquë'? ²¹ Layaquë' inayaquë' cani: "Biselo' ta ni, bigaolo' ta na', bitzaquilo'n na'alo'." Cana' naca pensari quie benë'. ²² Pero hueyudyi' huedu quienan como dan' nacan puro pensarizi quie benë'. ²³ Parece tali na' huacalën ra'o chi inaoro huero pensari quie benë', porque ruen dyabë' quiero huero quie idao', gacaro ben' gaxo, gaparo cuidado len cuerpo quiero. Pero bë' ruezin binacan cana'. Bibi sirve inaoro huero pensari quie benë', porque bigacalën ra'o ta bihuero ta rnazin quiero.

3

¹ Le'e naca quiele ca quie ben' baguti babebanlë Cristo. Quie lena' huele cuenda tu ta naca quie guibá ga re' Cristo zaquë' yebë quie Diuzi. ² Nacaran belao huele pensari cabë' naca Diuzi zu guibá. Bihuele puro pensari cabë' raca lao yedyi layu. ³ Le'e naca quiele ca quie ben' bagutilë Cristo. Quie lena' nazi'tzao' Cristo yela' naban quiele tuzioli nun quie dan' nacalë Cristo len

Diuzi tuže. ⁴ Naca Cristo ben' run yela' naban quiero tuzioli. Caora yeguida Cristo lao yedyi layu, huazulëronë' tuzioli. Huenë' mandado inabë'ro len lëbë'.

Ni rnan quie yela' neban gula len yela' neban cubi

⁵ Quie lena' rnial' le'e, bira huele cuenda ca tu tamala ina bë'ëla' zuba' quiele huele. Banaca quiele ca quie banati bë'ëla' zuba' quiele, yela' na' bira huele cuenda quien. Biutzagale nigula binaca žgulale. Bihuele ta naca bayatza. Bihuele ta rnazin quiele. Bisa'la'adyi'le dumi. Ca nacan mala tzionla'adyi'ro ídolo, cana' mala nacan sa'la'adyi'ro dumi. ⁶ Cana' rue yaca ben' bire'en hue quie con cabë' rna Diuzi. Quie lena' huadyin dza hue Diuzi leyaquë' castigo. ⁷ Lëscan' le'e, cana' bële le'e dza na', dza binenaole xneza Cristo. ⁸ Pero na'a ulesan bira huele tamala. Biuhuin'le benë'. Biyezë'le benë'. Biutasi biuniye benë'. Biulidzale benë' di'idza' lëë. ⁹ Bisi'le itu itule yë', como dan' apca'nle tzala'la cabë' bële dza na'. ¹⁰ Pues banacale ca quie ben' cubi, bayu'ule pensari cubi ta bdze' Diuzi lu'u guicho laxta'ole. Yugu dza racalë Diuzi le'e ta galele huele con cabë' rna pensari cubi yu'u lu'u guicho laxta'ole tacuenda tzioñe'erale mazara quie pensari quie Diuzi. ¹¹ Ra'o, ben' nao xneza Cristo, lao Diuzi bira nacaro zë cue' benë'. Nacaro tuzi cue' benë', la'achi ben' griego, la'achi ben' Israel, la'achi ben' zu seña xëdyidao', la'achi ben' bizu seña xëdyidao', la'achi ben' za' yedyi ga'ala', la'achi ben' za' yedyi zitu', la'achi ben' nada'o, la'achi ben' libre. Zëlë Cristo yugulu ben' nao xnezë'. Naquë' ben' belaora lao yugulute.

¹² Nadyë'ë Diuzi le'e. Ulionë' le'e bënë' le'e ben' yëri laohuë'. Tana' reya'ala' yeyëchi'la'adyi'le benë', reya'ala' gacalële benë', reya'ala' gapala'nle benë', reya'ala' hue'lële benë' di'idza' žela'adyi'. Bireya'ala' huele že cuinle. ¹³ Ulehue'lë laguedyile di'idza' žela'adyi' itu itule. Ulesi'že quie laguedyile itu itule. Cabë' bë Cristo bezi'ženë' quiele, cana' huelële laguedyile. ¹⁴ Tu ta nacan belao huele, reya'ala' idyë'ëtzeguele itu itu laguedyile. Dan' huele cana', lena' gacalën le'e hue quiele duže con cabë' rna pensari cubi bdze' Diuzi lu'u guicho laxta'ole. Cana' gacale tuzi len pensari quie Diuzi. ¹⁵ Rulidza' Diuzi cuëchinë' chizi laxta'ole, porque por lena' ulionë' le'e re'ennë' gacale tuzi cue' ben' quienë'. Bigala'adyi'le yëbile Diuzi diuxcalelo'.

¹⁶ Hue'le lato yega'n di'idza' quie Cristo lu'u guicho laxta'ole dyë'ëdi. Ulesëdi hue'le di'idza' žela'adyi' conlë itu itule conlë yela' rioñe'e quie Diuzi. Gulale nu Salmo, nu himno, nu alabanza la'iya. Yëbile Diuzi diuxcalelo' du guicho du la'adyi'le. ¹⁷ Yugulu ta huele, yugulu ta inale, uzëtole lao Jesús, ben' belao quiero. Caora cati yëbile Xuziro Diuzi diuxcalelo', lao na'a Jesús yëbilenë' diuxcalelo'.

Rusëdi Pablo ta yu'u ni'a xnezi hue yaca ben' nao xneza Cristo

¹⁸ Na'ra le'e yaca nigula, cani rnial' le'e: Galele quie be'mbyu quiele. Cana' reya'ala' huele, dan' banacale ben' nao xneza Cristo. ¹⁹ Lëscan' rnial' le'e yaca be'mbyu: Gaquele idyë'ële nigula quiele. Bihuele snia conlë lëbë'. ²⁰ Lëscan' rnial' le'e yaca xcuidi': Uzule di'idza' dyë'ëdi quie xuzi žna'le, como cana' re'en Diuzi huele. ²¹ Lëscan' rnial' le'e xuzi xcuidi': Biquilole idza' xcuidi' quiele, dan' chi huele cana' huadëbibi' biuzubi' di'idza' quiele du guicho du la'adyi'bi'. ²² Lëscan' rnial' le'e yaca ben' nada'o: Uzule di'idza' quie xa'nle, ben' naguixo dyin lao yedyi layu. Bisi'le xa'nle yë'. Huele dyin dya'a, la'achi zënë' ina'në' le'e, la'achi bizënë' ina'në' le'e. Tuz ca huele dyin quienë' du guicho du la'adyi'le. Cana' reya'ala' huele, dan' nacale ben' rapala'n Diuzi. ²³ Yugulu ta ruele, huelen du guicho du la'adyi'le como ca dyin quie Diuzi

ruele, quele dyin quie benè'. ²⁴ Baonezile baben Diuzi le'e yela' neban tuzioli ta yeyole guiba dan' rzudyi'ilèle Cristo, ben' naca Señor quiero. ²⁵ Pero nu ben' rue tamedian, hue Diuzi lèbè' castigo con cabè' naca tamala bènè'. Tuzcazi ca rue Diuzi, cana' ruenè' conlè yugulu benè'.

4

¹ Lëscan' rnìa' le'e yaca ben' naca xa'n yaca ben' nada'o: Huele ta yu'u ni'a xnezi conlè yaca ben' nada'o. Bigala'adyi'le lëscan' le'e zurèle lao Diuzi zu guibá, ben' naca xa'nle.

² Cana'ra rnìa' le'e, ben' bicha': Biusanle ulidzale Diuzi yugu dza. Bi-ulidzalenè' con ganzi, pero yëbilenè' diuxcalelo'. ³ Lëscan' ulidzale Diuzi por nêto' tacuenda isaloguè' xnezando' saque'ndo' tzatixogue'ndo' benè' di'idza' la'ia quienè' yëbindo'yaquè' quie Cristo ta biunezi yaca ben' unita' tiempote. Tanun quie dan' rguixogui'a quie Cristo, quie lena' dia' lu'u dyiguiba niga. ⁴ Ulidzale Diuzi ta gacalènè' nê'èdi' ta quixogui'a di'idza' la'ia quienè' cabè' reya'ala' quixogui'a.

⁵ Uleta dya'a lao yaca ben' binenao xneza Cristo tzala neru'en lato huero dyin quie Diuzi. ⁶ Puro di'idza' dya'a, di'idza' zaca'n lao Diuzi, reya'ala' hue'lèle benè' tacuenda na' inezile ta yequèbile quie ben' binenao xneza Cristo.

Ga rugapayaquè' laguediyaquè' diuzi

⁷ Huida Tíquico idetixogue'nè' le'e cabè' raca quia'. Naquè' ben' nadyè'ëro, ben' bichiro. Lènè' gualènè' nê'èdi'. Dula'adyi'nè' bëlènè' nê'èdi' dyin quie Diuzi. ⁸ Quie lena' ise'ela' lèbè' ta inanè' le'e bi raca quiendo' ta uxela'adyi'nè' le'e. ⁹ Huidarè Onésimo conlè Tíquico. Lëscan' naca Onésimo ben' nadyè'ëro, ben' bichiro, ben' yedyi quiele. Leyaquè' quixogue'yaquè' le'e yugulu ca raca quiendo' niga.

¹⁰ Aristarco, ben' delè nê'èdi' dyiguiba, rugapanè' le'e diuzi. Lëscan' Moisés, ben' bichi Bernabé, rugaparenè' le'e diuzi. Baonia' le'e cabè' re'enda' huele quie Marcos. Chi za'nè' ideyubinè' le'e, ulezi'nè' dyè'èdi. ¹¹ Lëscan' rugapa Jesús, ben' laorè Justo, le'e diuzi. Entre lado yaca ben' nao xneza Cristo, ben' nacarè ben' Israel, tuzi leyaquè' gualèyaquè' nê'èdi' udixogue'ndo' benè' xti'idza' Diuzi. Lega pxela'adyi'yaquè' nê'èdi'. ¹² Lëscana' rugapa Epafra le'e diuzi. Nacarènè' ben' rue dyin quie Cristo, ben' yedyi quiele. Lènè' lega rulidzanè' Diuzi por le'e tacuenda uzalale zule puesto huele ca re'en Diuzi huele. ¹³ Blè'èda' ca rue Epafra ta gaca dya'a quiele. Lèzi cana' re'ennè' gaca dya'a quie ben' nita' ciudad Laodicea, len ben' nita' ciudad Hierápolis. ¹⁴ Rugapa Lucas le'e diuzi. Naca Lucas ben' rue remedio, ben' nadyè'ëro. Lëscan' rugapa Demas le'e diuzi.

¹⁵ Ugapale yaca ben' bichiro, ben' nao xneza Jesús, ben' nita' ciudad Laodicea, diuzi. Lëscana' ugapale Ninfas, len yaca los demás ben' redupa žan yu'u quienè', diuzi. ¹⁶ Bè' abeyudyi ablabale guichi bia' ni, ulese'ela'n ciudad Laodicea tacuenda ulaba yaca ben' nao xneza Jesús nita' na' len. Lëscan' ulelaba guichi ta yese'ela'yaquè' laole. ¹⁷ Uleyèbi Arquipo ta uzunè' di'idza' dyè'èdi ca naca dyin bè' Diuzi lènè' huenè'.

¹⁸ Nê'èdi', Pablo, conlè na'a rua' letra ga iyudyi guichi ni ta inezile tali guichi quia' na'. Rugapa' le'e diuzi lè'è guichi niga. Uleulidza Diuzi por nê'èdi', dan' dia' lu'u dyiguiba. Rulidza' Diuzi ta huela'iyane' le'e. Amén.

GUICHI NĒRO BĒ SAN PABLO APÓSTOL, USE'ELA'NĒ'N LAO CIUDAD TESALONICA

Guichi ni use'ela' Pablo lao yaca ben' nao xneza Jesús, yaca ben' nita' ciudad Tesalónica

¹ Nĕ'ēdi', Pablo, len Silas len Timoteo, bĕndo' guichi ni, use'ela'ndo'n laole ga nita'le ciudad Tesalónica. Nacale tuže len Xuziro Diuzi len Señor quiero Jesucristo. Rulidzando' Diuzi lĕnĕ' Señor quiero Jesucristo ta huela'iyaquĕ' le'e cuĕchiyaquĕ' chizi lu'u guicho laxta'ole.

Tadya'a bĕ yaca ben' nao xneza Jesús, yaca ben' nita' ciudad Tesalónica

² Yugo dza rulidzando' Diuzi rĕbindo'nĕ' diuxcalelo' por nun quiele. ³ Yugu dza reza'la'adyi'ndo' le'e cabĕ' ruele, ruele tadya'a rnaole xneza Jesús, nedyĕ'ĕle laguedyile. Tantozi zudyi'lĕle Señor quiero Jesucristo du guicho du la'adyi'le, birdzebile chi rusaca yaca benĕ' le'e bizinaquezi. ⁴ Bicha', nedyĕ'ĕ Diuzi le'e. Nezindo' ulionĕ' le'e ta gacale ben' quienĕ'. ⁵ Cala ta racazi la'adyi'ndo' udixogue'ndo' le'e xti'idza' Diuzi dza na', den' con yela' huaca quie Bichi Be quie Diuzi. Dyĕ'ēdi nezindo' di'idza' li unando' le'e. Dyĕ'ēdi nezile cabĕ' bĕndo', bĕndo' huen entre le'e dza na' beguilondo' modo ta gata' tahuen quiele.

⁶ Na'ra le'e, por tu parte quiele, ruele cabĕ' ruendo', lĕscan' ruele cabĕ' bĕ Señor quiero. Pues lao na'a Bichi Be quie Diuzi rue quiele xti'idza' Diuzi zule contento, ba'ala'cazi psaca' yaca benĕ' le'e bizinaquezi. ⁷ Quie lena' nezi yaca ben' nao xneza Jesús nita' yaca ciudad nebaba Macedonia, len yaca ben' nao xneza Jesús nita' yaca ciudad nebaba Acaya cabĕ' ruele, ruele tadya'a. ⁸ Quie lena' yaca ben' nita' yaca ciudad nebaba Macedonia, len yaca ben' nita' yaca ciudad nebaba Acaya, rezila'adyi'yaquĕ' xti'idza' Diuzi, pero lĕscan' yaca ben' nita' zĕ yedyi tula, rezila'adyi'rĕyaquĕ' xti'idza' Diuzi. Tanto rue quiele xti'idza' Diuzi, birnaban yĕbiroyaquĕ' ca ruele, ⁹ porque cuinyaquĕ' rĕbiyaquĕ' laguedyiyaquĕ' cabĕ' bĕle dza na', uyezila'adyi'le nĕto'. Lĕscan' rĕbiyaquĕ' laguedyiyaquĕ' cabĕ' bĕle psanla'adyi'le yaca ídolo quiele, banaole tuzi Diuzi zu guibá, ben' neban tuzioli. ¹⁰ Lĕscan' rĕbiyaquĕ' laguedyiyaquĕ' cabĕ' rbezale yeguida ži'inĕ' Jesús zeza'nĕ' guibá yeguidanĕ' lao yedyi layu tatula. Naquĕ' ben' aguti, pero pseban Diuzi lĕbĕ'. Naquĕ' ben' ute usela ra'o ta bigata' castigo quiero dza zaza'ra, dza gaca juicio lao yedyi layu.

2

Ca guca cati uda Pablo ciudad Tesalónica

¹ Banezile, bicha', biuden cana'zi bidando' udixogue'ndo' le'e xti'idza' Diuzi dza na'. ² Lĕscan' nezile cabĕ' bĕ yaca ben' ciudad Filipos len nĕto'. Ptasi bnioyaquĕ' nĕto'. Psacayaquĕ' nĕto' bizinaquezi. Pues ba'ala'cazi psaca yaca ben' na' nĕto' bizinaquezi, ba'ala'cazi guca zĕdi gula, udixogue'ndo' le'e xti'idza' Diuzi du guicho du la'adyi'ndo'. ³ Cala di'idza' huizi' yĕ' udixogue'ndo' le'e. Biudixogue'ndo' le'e xti'idza' Diuzi con ganzi. Nitu nitu buizi'ndo' le'e yĕ'. ⁴ Ulio Diuzi nĕto' ta udixogue'ndo' le'e di'idza' la'iya quienĕ'. Cala rguilondo' modo ta hue yaca benĕ' nĕto' ben' ze. Rbezando' hue Diuzi nĕto' ben' ze, porque nezi Diuzi cabĕ' naca pensari quiendo'. ⁵ Dyĕ'ēdi nezile cala di'idza' bibizaca', cala di'idza' huizi' yĕ', udixogue'ndo'

le'e dza na'. Dyè'èdi nezile quele re'enndo' ta de quiele. Naca Diuzi testigo cala yè' rzi'a. ⁶ Cala za'ndo' rguilondo' ben' hue nètò' ben' ze, la'achi le'e, la'achi ben' tula. ⁷ Ba'ala'cazi de yela' r nabè' quiendo', como nacando' ben' use'ela' Cristo, bibèlèndo' le'e zèdi bi cosa re'enndo' huele. Ca quie zi'indo' bèlèndo' le'e dza na'. Gucalèndo' le'e ca quie zna'le racalènè' zi'inè'. ⁸ Pues tantozi nadyè'lèndo' le'e, cala udixogue'zindo' le'e di'idza' la'ia quie Diuzi, den' lèscan' uzundo' dispuesto gatindo' lao lazale chi bi re'en yaca benè' hueyaquè' quiele. ⁹ Bicha', bigalala'adyi'le cabè' bèndo', bèndo' dyin du dza, du yèla, ta bibi gasto huele ta de quiele para nètò' caora cati udando' udixogue'ndo' le'e xti'idza' Diuzi.

¹⁰ Le'e len Diuzi, nacale testigo quiendo' cabè' bèndo'. Dyè'èdi nezile cabè' bèndo' lèndo' le'e dza na'. Bèndo' tahuen, bèndo' tali, bèndo' ta gabi causa gata' quiendo' conlè le'e. ¹¹ Lèscan' nezile cabè' unando' le'e di'idza' zela'adyi' cabè' rue benè' lènè' zi'inè'. ¹² Pues pxi'idze'ndo' le'e de que reya'ala' huele tadya'a como ben' nao xneza Diuzi, porque lèbè' ulionè' le'e ta yeyole tzezulèle lèbè' guibá ga re'nè' r nabè'nè'.

¹³ Quie lena' rulidzando' Diuzi diuxcalelo' nun quie uyèzila'adyi'le xti'idza' Diuzi udixogue'ndo' le'e dza na'. Gucabè'le di'idza' li xti'idza' Diuzi, binacan di'idza' quie benè'zi. Pues lèdi'idza' na' ruxi'idze'n le'e cabè' reya'ala' huele tadya'a nun quie dan' nacale ben' nao xneza Jesús. ¹⁴ Bicha', cati rue yaca benè' le'e bizinaquezi, bigala'adyi'le lèscan' gucarè quie yaca ben' nao xneza Cristo, yaca ben' nita' yaca yedyi nababa estado Judea. Lèzi psaca yaca ben' yedyi quiejè' leyaquè' bizinaquezi. ¹⁵ Lèben' Israel bètियाquè' Señor quiero Jesús. Lèzi bètirèyaquè' yaca ben' bida bedetixogue' leyaquè' xti'idza' Diuzi dza na'te. Pues belaoyaquè' nètò' berondo' yaca yedyi quiejè'. Biraxe Diuzi ca ruejè', dan' ruejè' condre yugulu benè'. ¹⁶ Pues bza'agayaquè' nètò' caora cati gu'unndo' quixogue'ndo' ben' binaca ben' Israel xti'idza' Diuzi, porque bigu'unyaquè' galeyauquè' gata' yela' neban quieyaquè' tuzioli. Quie lena' nayèra xquia quieyaquè'. Quie lena' abdyin hora hue Diuzi lèjè' castigo huala gula.

Gu'un Pablo tzionè' tatula ciudad Tesalónica ta tzeyubinè' yaca ben' nao xneza Jesús

¹⁷ Azio zidza beza'ndo' ciudad quiele. Ba'ala'cazi bira zulèndo' le'e yedyi quiele, biralala'adyi'ndo' le'e. Lega re'enndo' ideyubindo' le'e. ¹⁸ Zè lasa gu'unndo' ideyubindo' le'e hasta agu'unda' guida' cuinza', pero bza'aga xan' taxi'ibi' nètò'. ¹⁹ ¿Bixquien' redaohuendo' zundo' gusto, zundo' contento rbezando' yeguida Jesús? Dan' rue quiele xti'idza' Diuzi nacale ben' nao xneza Jesús, quie lena' redaohuendo' zundo' gusto, zundo' contento rbezando' yeguida Señor quiero Jesucristo. ²⁰ Le'e, sí, dan' naole xneza Jesús, quie lena' redaohuendo' zundo' gusto.

3

¹ Caora bira uzuendo' cuezando' idena'ndo' le'e, bèndo' pensari bega'nndo' rupando' ciudad Atenas, ² na' use'ela'ndo' Timoteo bedeyubinè' le'e. Naca Timoteo ben' rale, ben' racalè nètò' ruendo' dyin quie Diuzi rguixogue'ndo' benè' cabè' bè Cristo, bènè' tahuen quiero. Use'ela' lèbi' ideyubinè' le'e ta inè' le'e di'idza' zela'adyi' ta biidzebile hue quiele xti'idza' Diuzi. ³ Cana' huenè' galcalènè' le'e biyehuèdile inaole xneza Jesús ba'ala'cazi raca zèdi quiele. Dyè'èdi nezile usacacazi yaca benè' ra'o bizinaquezi. ⁴ Pues caora nita'lèndo' le'e dza na', dyè'èdi unando' le'e huata' tazèdi quiele. Dyè'èdi nezile gucan

laga con cabè' unando' le'e dza na'. ⁵ Quie lena', caora bira uzueda' cueza' mazara para inezida' bi raca quiele, caora na' use'ela' Timoteo ta guidè' inezinè' bi raca quiele chi nenaole xneza Jesús. Bdzeba' chi babè xan' taxi'ibi' le'e gan, aozi'na le'e yè', baoden cana'zi dyin quie Diuzi bēndo' entre le'e.

⁶ Na'ra abela' Timoteo niga, zeyu'anè' di'idza' nenaole xneza Jesús, nadyè'èle laguedyile. Lēscana' zeyu'anè' di'idza' reza'la'adyi'le nedyè'èle nēto', re'enle guidale idena'le nēto'. Lēscan' nēto' re'enndo' idena'ndo' le'e. ⁷ Quie lena', bicha', biraquendo' bayèchi' ba'ala'cazi rsaca benè' nēto' bizinaquezi, porque nezindo' le'e birusanla'adyi'le xneza Jesús, nerue quiele xti'idza' Diuzi. Cana' ruxela'adyi'le nēto'. ⁸ Legazi yedaohuendo' nezindo' birdzebile nernaole xneza Jesús. ⁹ Quie lena' rulidzando' Diuzi rēbindo'nè' diuxcalelo' tu mila gayuhua lasa. Na'ra por nun quie nenaole neruele quie Diuzi, redaohuetzeguendo'. ¹⁰ Pues du dza, du yela, rulidzando' Diuzi chi bigunnè' lato guidando' idena'ndo' le'e tacuenda usēdindo' le'e ga zu racale falta ta inaorale xneza Jesús dya'ara.

¹¹ Pues siempre rnabando' lao Xuziro Diuzi lēnè' Señor quiero Jesucristo ta gacalēyaquè' nēto' guidando' idena'ndo' le'e. ¹² Lēscana' rnabando' lao Diuzi chi bigacalēnè' le'e ta idyè'èle mazara ben' bichile, ben' nao xneza Jesús. Lēzi cala tuzi ben' nao xneza Jesús reya'ala' idyè'èle, reya'ala' idyè'èle yugulu benè' como cabè' nadyè'ēndo' le'e. ¹³ Chi huele cana', lena' ulu'en nacale ben' laxta'o yēri, bibi causa gata' quiele lao Xuziro Diuzi dza zeza' Señor quiero Jesús lēnè' yaca ben' quienè'.

4

Ni nan cabè' re'en Diuzi huero

¹ Na'ra, bicha', lao Señor quiero Jesucristo, rnabayèchi'ndo' huendo' le'e mandado biusanle huele tadya'a con cabè' baruele, con cabè' psēdindo' le'e tacuenda yedaohue Diuzi cabè' ruele.

² Dyè'ēdi nezile conlè yela' rnabè' quie Señor quiero Jesucristo, udixogue'ndo' le'e xti'idzè'. ³ Pues re'en Diuzi gacaro ben' laxta'o yēri. Quie lena' nitu nitu nunu reya'ala' gatalēnè' nigula tula, nigula binaca zgulè'. Lēscan' yaca nigula bireya'ala' gatalēnè' be'mbyu tula. ⁴ Lēscan' tahuen na' chi si'le nigula quiele, pero bihuele bizinaquezi lēle nigula quiele. Huelēlenè' tadya'a gapala'nlenè'. ⁵ Bihuele ca rue ben' binezi xti'idza' Diuzi. Rzi'jè' nigula ta usacajè' leyaquè' cabè' rnazin pensari mala quiejè'. ⁶ Bire'en Diuzi si'le bichile yè'. Hue Diuzi castigo quie yaca ben' hue cana' laga como bagudyindo' le'e dza na'. ⁷ Calá ulio Diuzi le'e ta huele tabayatza. Ulioguè' le'e ta gacale ben' laxta'o yēri. ⁸ Nacan dyabè' yele cabè' rnando' le'e. Chi nu le'e biraxele hue quiele cabè' nando' le'e, cala nēto'zi birue quiele, lēscan' lente Diuzi birue quiele. Naca Diuzi ben' rudze' Bichi Be quiè' lu'u guicho laxta'oro.

⁹ Na'ra biraoyentica ise'ela'ndo' guichi laole ta inando' le'e cabè' reya'ala' huele idyè'èle ben' bichile, ben' nao xneza Jesús, porque cuin Diuzi abzioñe'enè' le'e bi huelèle ben' bichile. ¹⁰ Cana' banadyè'èle ben' bichile, ben' nao xneza Jesús, ben' nita' yaca yedyi nehaba Macedonia. Pero, bicha', re'enndo' huele mazara, re'enndo' idyè'ēleyaquè' dyè'ēdi. ¹¹ Reya'ala' tzu'ulèle laguedyile dyè'ēdi, bihuelèle laguedyile zēdi. Pues tahuen na' chi huele dyin quiezile como bagudyindo' le'e dza na'. ¹² Chi huele cana', hasta ben' binao xneza Jesús, hualè'ēyaquè' le'e ben' dya'a, ni tule bibi idzioguele.

Ni nan cabè' gaca dza yeguida Jesucristo lao yedyi layu

¹³ Bicha', re'enndo' inezile cabè' gaca quie yaca bichiro, ben' nao xneza Jesús, yaca ben' baguti. Reya'ala' inezile tacuenda bigaquele bayèchi' quieyaquè' ca bayèchi' naca quie yaca ben' birbeza yeguida Jesús. ¹⁴ Pues como neziro aguti Jesús beseban Diuzi lèbè', lèscana' reya'ala' ineziro useban Diuzi yaca ben' rale, yaca ben' unao xneza Jesús dza udajè' lao yedyi layu.

¹⁵ Quie lena' rnando' le'e con cabè' una Jesús de que ra'o, ben' nenaban, bicuialaoro lao ben' baguti, bicuialaoro laojè' dza yeyoro guibá, dza yeguida Jesús lao yedyi layu. ¹⁶ Cati abdyin dza yeguida Jesucristo za'nè' guibá, caora na' huanè' zidzo yeyèzinè' ben' quienè' ta yedupayaquè' yedyinyaquè' ga zènè' ladza. Lèscan' huanè' tu xan' ángel zidzo rucuedyinè' trompeta quie Diuzi. Hora na', useban Diuzi yaca ben' quienè', yaca ben' baguti, ben' unao xnezè' dza udajè' lao yedyi layu. Huebèyaquè' hueyojè' ga zè Jesús ladza. ¹⁷ Te yeyudyi na', ra'o, ben' quienè', ben' nenaban, ben' nenita' lao yedyi layu, huebèro yedyinrèro ga bedyin ben' zeyo tanèro, ga re' beo, ga zè Jesús ladza. ¹⁸ Pues cana' tzazulèro Jesucristo tuzioli. Con cabè' baonia' le'e, huelèle ben' bichiro di'idza' zela'adyi'.

5

¹ Na'ra, bicha', biraoyentica ise'ela'ndo' guichi laole ta quixogue'n le'e bi hora, bi dza, yeguida Jesús lao yedyi layu, ² porque banezile dyè'èdi cabè' gaca dza yeguida Jesucristo. Pues caora raque yaca benè' bibi gaca quiejè', caora na' bigacabè'jè', pero tu sasazi idyin dza yeguida Jesús. Pues idyin dza na' tu sasazi ca quie tu sasazi guida ben' uban du rèla du rasi xan' yu'u, raquenè' bibi gaca quienè'. Cana' gaca cati idyin dza yeguida Jesús. ³ Pues caora na' ina yaca benè' cani: “Nita'ro dya'a na', bibi gaca quiero”, pues caora na' tu sasazi cuiagui'yaquè'. Gabi cule quieyaquè' de ta bicuiagui'yaquè' caora yeguida Jesús. Laga cana' gaca quieyaquè' ca quie nigula rla abdyin hora su xcuidi' quie, gabi cule de quienè' ta biilanè'. ⁴ Pero le'e, bicha', binacale ben' rda lao lato lao chula. Quie lena' bireya'ala' idzebile dza yeguida Jesucristo cabè' rdzebi ben' uban chi yela' xan' yu'u tu sasazi. ⁵ Pues yugulule nacale ben' rda lao lato lao xni'. Binacaro ben' rda lao lato lao chula. ⁶ Bihuero ca rue ben' rasi, ben' bibi pensari yu'u. Pero ra'o, reya'ala' suro listo, reya'ala' huero pensari. ⁷ Ben' rue gusi, denè' gusi rtze'. Lèscan' ben' rue hue'e, rdanè' hue'e rtze'. ⁸ Pero ra'o, bihuero cana', porque nacaro ben' rda lao lato lao xni'. Bihuero ca quie ben' rasi, bihuero ca quie ben' žudyi. Gaparo cuidado, zudyi'ilèro Diuzi du guicho du la'adyi'ro, idyè'lèro laguedyiro, cuezaro dyè'èdi yezi' Jesús ra'o, ⁹ porque cala ulio Diuzi ra'o ta huenè' ra'o castigo dza gaca juicio, pero ulionè' ra'o ta gata' yela' neban quiero tuzioli lao na'a Jesucristo. ¹⁰ Pues lèbè' agutiè' lè'è yaga cruzo para ra'o ta sulèro lèbè' dza yeguidè' para tuzioli, la'achi baguti, la'achi nenabanro. ¹¹ Biusanle huelèle ben' bichiro, ben' nao xneza Jesús, di'idza' zela'adyi', tal como baruelèleyaquè' na'a.

Unèye Pablo yaca ben' nao xneza Jesús

¹² Bicha', rnando' le'e gapala'nle nu ben' napa dyin quie Diuzi entre le'e. Lao na'a Señor quiero rnèyueyaquè' rna'yaquè' le'e. ¹³ Reya'ala' gapala'nle idyè'lè lèjè' nun quie ruejè' dyin quie Diuzi. Yugulule reya'ala' inita'lèle laguedyile dyè'èdi, bitilalèle laguedyile.

¹⁴ Na'ra, bicha', yèbile yaca ben' huèdi ta huejè' dyin, bira yehuèdijè'. Lèscan' hue'lèle yaca ben' raca bayèchi' quie di'idza' zela'adyi'. Gacalèle yaca ben' binetziõe'e xti'idza' Diuzi dyè'èdi. Huezela'adyi'le quie lao yugulutejè'.

¹⁵ Gapale cuidado biyeyuele laohue chi rusaca yaca benë' le'e bizinaquezi. Pero inaocazile huele tadya'a lële yugulu benë', la'acazi entre le'ezi, la'acazi entre yaca los demás ben' nita' lao yedyi layu.

¹⁶ Reya'ala' sule contento yugo dza. ¹⁷ Reya'ala' hue'lële Diuzi di'idza' yugo dza. ¹⁸ Chi bi raca quiele, reya'ala' yëbile Diuzi diuxcalelo', porque cana' re'en Diuzi huele como nacale ben' nao xneza Cristo Jesús.

¹⁹ Bihuele yeladyi'. Huele cabë' re'en Bichi Be quie Diuzi huele. ²⁰ Biyežë'le di'idza' quie ben' rna lao na'a Bichi Be quie Diuzi. ²¹ Ina'le dyë'ëdi bi rue yaca benë', chi nacan dya'a, chi binacan dya'a. Yela' na' ilë'ële huerële tadya'a.

²² Reya'ala' usebi'le yugulu tamedian.

²³ Rulidzando' Diuzi ta huenë' le'e ben' laxta'o yëri. Rulidzando'në' ta gapanë' yela' neban quiele, len bichi be quiele, len alma quiele len cuerpo quiele, yela' na' bibi causa gata' quiele dza yeguida Señor quiero Jesucristo.

²⁴ Naca Diuzi ben' ulio le'e. Huecazinë' con cabë' unanë' huenë' quiele.

Udapa Pablo leyaquë' diuzi

²⁵ Bicha', hue'lële Diuzi di'idza' por nëto'.

²⁶ Ugapale ben' bichiro diuzi, gaole situ xagayaquë'.

²⁷ Rua' le'e mandado conlë yela' rnanë' quie Jesucristo ta ulabale guichi ni lao yaca los demás ben' nao xneza Jesús.

²⁸ Rulidzando' Señor quiero Jesucristo ta huela'iyane' le'e. Amén.

GUICHI URUPE BÈ SAN PABLO APÓSTOL USE'ELA'NÈ'N LAO CIUDAD TESALONICA

Pablo lènè' compañero quienè' bējè' guichi ni.

¹ Nè'èdi', Pablo, len Silas, len Timoteo, bēndo' guichi ni, use'ela'ndo'n laole ga nita'le ciudad Tesalónica. Nacale tuže len Xuziro Diuzi len Señor quiero Jesucristo. ² Rulidzando' Xuziro Diuzi lènè' Señor quiero Jesucristo ta huela'iyaquè' le'e cuèchiyaquè' chizi lu'u guicho laxta'ole.

Hue Diuzi castigo yaca ben' mala dza cati yeguida Cristo

³ Bicha', rulidzando' Diuzi rēbindo'nè' diuxcalelo' por le'e. Tadya'acazi yēbiro Diuzi cana', porque yugo dza zudyi'ilēle Diuzi, nedyē'ēle laguedyile mazara. ⁴ Quie lena' redaohuendo' ga redupando' yēbindo' yaca los demás bichiro, ben' nao xneza Jesús, cabizi raca quiele, porque ba'ala'cazi rusaca yaca benè' le'e bizinaquezi redzagalaole, pero birdzebile birusanla'adyi'le xneza Jesús. ⁵ Lena' rulu'en ta yu'u ni'a xnezi bē Diuzi pensari bē' ulionè' le'e ta tzirole ga zuè' tu dza zaza'ra. Quie lēzin rusaca benè' le'e bizinaquezi.

⁶ Pues tali na' hue Diuzi castigo yaca ben' psacayaquè' le'e bizinaquezi. ⁷ Lēscan' tali na' dza yeguida Jesucristo hue Diuzi mandado ta iyudyi yedza-galaole tazēdi raca quiele tal como tazēdi raca quiendo'. Dza na' huelè'ēro Jesús zeza'nē guibá, nu'anè' tu gui' ze, zequiè'nè' yaca ángel quienè', ben' rue yela' huaca quienè'. ⁸ Zeza'nè' ta huenè' castigo yugo ben' bibè quie xti'idza' Diuzi, ben' biunao xnezè'. ⁹ Na' castigo hue Diuzi leyaquè' nacan de tzasasazi, bira yeyulan. Huaru'un Diuzi lējè' zitu' ga yega'nyaquè' tuzioli, ga bizu Jesucristo, ben' de yela' huaca quie, ben' de yela' rñabè' quie. ¹⁰ Cati yeguida Jesucristo, caora na' hue yaca ben' quienè' lēbè' ben' ze, gapala'ntzegueyaquè' lēbè'. Lēscan', le'e, huazurēle conlè lēbè', porque bē quiele xti'idza' Diuzi udixogue'ndo' le'e dza na'.

¹¹ Quie lena' yugo dza ruendo' orar por le'e rulidzando' Diuzi quiero ta ilē'ēnè' le'e ben' zaca'cazi ulionè' le'e. Lēscan' rulidzando' Diuzi ta huenè' mandado gaca quiele ca re'ennè' gaca quiele, lēscan' ta gacalēnè' le'e ta huele tadya'a ca re'enle huele, lēscan' ta huele dyin quie Diuzi ca re'enle huele.

¹² Chi huele cana', cana' gaca gapala'n yaca benè' Señor quiero Jesucristo. Lēscan' gapala'n Jesucristo le'e conforme yela' ben' huen quie Diuzi lènè' Señor quiero Jesucristo.

2

Huida tu ben' hue contra Cristo

¹⁻² Bicha', quie dza cati zeza' Jesucristo ta utupanè' ra'o, rñabayèchi'ndo' le'e biutza'le pensari quiele bihue'le lato utēbi yaca benè' le'e, chan' nayaquè' babida Cristo. Bigalele quieyaquè' ba'ala'cazi inajè' Diuzi gudyi lējè' cana'. Bigalele quieyaquè' ba'ala'cazi inayaquè' cana' nan lē'è guichi use'ela'ndo' laole. ³ Pues bihue'le lato si' yaca benè' le'e yē'. Dza yeguidara Cristo, decazide idyin tiempo huadilalē ja ben' nita' lao yedyi layu Diuzi. Caora na' guida tu ben' hue contra Cristo. Pero lēben' na', banezi Diuzi bi huenè' quienè', udyiagui'nè' lēbè'. ⁴ Lēben' na' naquè' enemigo quie Diuzi. Huenè' contra yaca ta rionela'adyi' yaca benè', huenè' contra ta najè' naca diuzi quiejè'. Huanè' rñabè'ranè' ca Diuzi zu guibá. Huayu'unè' tzaque'nè' lu'u yu'u idao' rñabè'ra quie Diuzi ta si'nè' benè' yē' gaqueyaquè' Diuzi naquè'.

⁵ Nezda' rezala'adyi'le con cabè' unia' le'e dza na', dza uzèlia' le'e unia' le'e cabè' gaca dza zaza'ra. ⁶ Dyè'èdi nezile nuquien' ruza'aga ta biguida ben' hue contra Cristo. Decazide guida ben' hue contra Cristo, però bè' idyin hora cabè' psaquè' Diuzi guidè'. ⁷ Pues baozulaonè' ruenè' contra Cristo, però lè'èti'zi. Però huazulaonè' huenè' mazara caora idyin dza bira zu ben' ruza'aga lèbè'. ⁸ Cana' gaca caora idyin dza guida lèben' mala gula, ben' rue contra Cristo. Però guti Jesucristo lèbè'. Conlè bezi rero ru'anè' gutinè' ben' na', yeguidanè' nica gacabè'zinè'. Cana' hue Jesucristo dza cati yeguidanè' hualè'e yaca benè' ca naca yela' huaca quienè'. ⁹ Mandado hue xan' taxi'ibi' Satanàs guida ben' hue contra Cristo. Bade yela' huaca quien ta ulu'en benè' ta yebanayaquè', però bè' huezin na' ta si'zin benè' yè'. ¹⁰ Tamala gula huen ta si'n benè' yè', yaca ben' bire'en inao xneza Jesús, yaca ben' bire'en gata' yela' neban quie tuzioli. ¹¹ Quie lena' usanla'adyi' Diuzi leyaquè' tacuenda si' ben' na' lèjè' yè'. Lena' galeyaquè' ta binaca tali. ¹² Hue Diuzi lèjè' castigo, dan' bibè quieyaquè' di'idza' quienè', yaxerayaquè' inaoayaquè' hueyaquè' tamala quiejè'.

Aolio Diuzi yaca ben' gaca yèri laxta'ohue

¹³ Rulidzando' Diuzi diuxcalelo' por le'e, bicha', ben' nedyè'èndo'. Rulidzando' Diuzi diuxcalelo', dan' zagata'ra yedyi layu, ulio Diuzi le'e ta gacale ben' nêro, ben' gata' yela' neban quie tuzioli lao na'a Bichi Be quienè' lènè' xti'idza'nè' ta barue quiele. ¹⁴ Quie lena' ulio Diuzi le'e por nun quie xti'idzè' udixogue'ndo' le'e ta gaca tu parte quiele quie yela' huaca quie Jesucristo, ben' naca Señor quiero.

¹⁵ Bicha', bigala'adyi'le ca ta psèdindo' le'e, la'achi di'idza' bè'lèndo' le'e, la'achi di'idza' bzundo' lè'è guichi use'ela'ndo'n laole. ¹⁶⁻¹⁷ Naca Señor quiero Jesucristo lènè' Xuziro Diuzi ben' huen gula, nedyè'èyaquè' ra'o, racalèyaquè' ra'o tuzioli. Por nun quieyaquè' naca huen quiero rbezaro dza yeguida Jesucristo. Rulidzando'yaquè' por le'e ta xela'adyi'yaquè' le'e, lèscan' ta gapayaquè' le'e dyè'èdi, na' biusanle xneza Diuzi inaole huele puro tadya'a.

3

Re'en Pablo ulidzayaquè' Diuzi por lèbè' lènè' compañero quienè'

¹ Na'ra, bicha' ulidzale Diuzi por nêto' tacuenda idyin xti'idza' Diuzi yedu yedyi layu, hue yaca benè' quieyaquen cabè' ruele le'e, barue quiele xti'idza' Diuzi. ² Lèscan' ulidzale Diuzi por nêto' tacuenda te ilando' bigaca quiendo' cabè' re'en yaca ben' mala, ben' re'en usaca nêto' bizinaquezi, porque siempre nita' ben' binao xneza Jesús. ³ Biusanla'adyi' Diuzi le'e. Rapanè' le'e dyè'èdi. Ucuasa ucu'onè' le'e bi tamala za' gaca quiele le'e. ⁴ Barzela'adyi'ndo' inaole ruele cabè' psèdindo' le'e biusanla'adyi'lèna. ⁵ Rulidzando' Diuzi ta gacalènè' le'e ta idyè'èle Diuzi ca nadyè'ènè' le'e, lèscan' ta gacale ben' zela'adyi' cabè' ben' zela'adyi' naca Cristo.

Reya'ala' huero dyin yuguluro

⁶ Na'ra, bicha', lao na'a Señor quiero Jesucristo, rnando' le'e chi zu ben' nao xneza Jesús, però bire'ennè' huenè' dyin, ulesan quienè' bira huele lèbè' tzaže. ⁷⁻⁸ Dyè'èdi nezile cabè' bèndo' dza uzulèndo' le'e. Cala ure'zindo' conlè le'e, cala unabando' ta gaondo' cana'zi, den' udizondo' quie ta udaondo'. Dyin huala bèndo' yugo dza ta hue'endo' ta udaondo' ta bibi gasto bèle. ⁹ Ba'ala'cazi napando' derecho inabando' ugaole nêto', però biunabando'n. Cana' blu'endo' le'e cabè' reya'ala' huele. ¹⁰ Nu ben' bire'en hue dyin, bihue'le laze ta gaonè'. Cana' psèdindo' le'e caora uzulèndo' le'e dza na'.

¹¹ Banezindo' balale bire'enle huele dyin, na' rdazile pasiale yugo dza ru'elële laguedyile di'idza' bizu, bireyula'adyi'le huele dyin. ¹² Quie leyaquë' ruendo' mandado ta huejë' dyin ta biidzioguejë' ta gaojë', lëscan' ta bira huejë' laguedyijë' zëdi inabajë' lëjë' ta gaojë'. Lao na'a Señor quiero Jesucristo ruendo' le'e mandado de que reya'ala' hue yaca benë' dyin ta gata' ta gaojë'.

¹³ Bicha', biyehuëdile huele tadya'a. ¹⁴ Chi nita' ben' bichiro, ben' birue quie cabë' na di'idza' dyia lë'ë guichi niga, ina'le dyë'ëdi nu yaca ben' rue yaca cana'. Ulesan quieyaquë' tacuenda gata' yela' stu' quieyaquë'.

¹⁵ Biudze'la'adyi'le leyaquë', den' inëyuele quiejë' como ca bichiro.

Ni beyudyi di'idza' use'ela' Pablo lao yaca ben' nita' ciudad Tesalónica

¹⁶ Rlidzando' Señor quiero ta cuëchinë' chizi lu'u guicho laxta'ole con bitezi gaca quiele con gatezi tzirole yugulule.

¹⁷ Në'ëdi', Pablo, rugapa' le'e diuži lë'ë guichi niga. Conlë na'a rua' letra con ga iyudyi carta niga tacuenda inezile tali carta quia' na'. Cana' rua' yugo carta quia'. ¹⁸ Rulidzando' Diuzi por le'e ta huela'iya Señor quiero Jesucristo yugulule. Amén.

GUICHI NĒRO BĒ SAN PABLO APÓSTOL USE'ELA'NĒ'N LAO TIMOTEO

Use'ela' Pablo guichi ni lao Timoteo

¹ Nē'ēdi', Pablo, naca' apóstol quie Jesucristo. Use'ela' Diuzi lēnē' Señor quiero Jesucristo nē'ēdi'. Naca Diuzi ben' ute usela ra'o. Lēscana' naca Jesucristo ben' rbezaro yeguida idezi' ra'o. ² Timoteo, bia' guichi niga pse'ela'n laolo' nun quie naco' ca ži'ina', ben' naorē xneza Jesucristo. Rulidza' Xuziro Diuzi lēnē' Señor quiero Jesucristo ta huela'iaquē' luē', yeyēchi'la'adyi'iaquē' luē', cuēchiyaquē' chizi laxta'olo'.

Rnē Pablo quie yaca ben' rusēdi ta binaca tali

³ Como cabē' agudya' luē' dza beza' uya'a yaca yedyi nebaba Macedonia, re'enda' yega'nlo' ciudad Efeso ta huegadyo' nu ben' rusēdi ta binaca tali ta usanjē' bira huejē' cana'. ⁴ Re'enda' yēbo'iaquē' ta bihuejē' tazēdi quie cuento historia quie xuxixta'oyaquē' cabē' guca quieyaquē'. Por nun quie tazēdi na', huata' huenē quieyaquē', bibi cule de huen quieyaquē' ta hue quieyaquē' xti'idza' Diuzi galeyauquē' quien.

⁵ Ca ta reya'ala' huero, reya'ala' idyē'ēro laguedyiro como ca ben' laxta'o yēri, como ca ben' baoyu'u gracia, como ca ben' nao xneza Jesús du guicho du la'adyi'. ⁶ Pero nita' bala yaca benē' birueyaquē' bala. Biyu'uyaquē' gracia, baoniti pensari quieyaquē', rnējē' puro di'idza' bibi zaca'. ⁷ Re'enyaquē' gacayaquē' ca ben' rusēdi guichi ley quie Diuzi, pero nica neziaquē' con cabē' rnan lē'ēna nica neziaquē' bidan' rusēdiyaquē'.

⁸ Neziro guichi ley quie Diuzi na' nacan dya'a chi inaoron según re'en Diuzi inaoron. ⁹ Bigala'adyo' biudixu Diuzi ley quienē' para yaca ben' bibi tamedian nueja. Pero udixo Diuzi ley quienē' tacuenda gata' castigo quie yaca ben' mala, ben' bire'en gale xti'idzē', ben' rue contra lēbē', ben' de dula' xquia quie, ben' guti xuzi žnē'ē, ben' guti nutezi benē', ¹⁰ lente ben' rasilē nigula binaca žgule, lente ben' rasilē laguedyiro byunē' ca nigula, lente ben' rban benē', lente ben' huizi' yē', lente ben' rgunte Diuzi de huizi' yē'. Quie lena' udixo Diuzi guichi ley na' tacuenda gata' castigo quie yugulu ben' birue quiejē' quie ta naca tali quie Diuzi. ¹¹ Na'ra ta naca tali quie Diuzi rdzelan lē'ē guichi la'ia quienē' ga rguixogue'n ca ruenē' gunnē' yela' neban quiero tuzioli. Lēdi'idza' quienē' na' bdē' Diuzi nē'ēdi' ta quixogui'a yaca benē'.

Redaohue Pablo beyēchi'la'adyi' Diuzi lēbē'

¹² Rēpa' Señor quiero Jesucristo diuxcalelo' nun quie rlē'ēnē' nē'ēdi' ben' rale rue ca mandado re'ennē' hua', uda'nē' bēnnē' nē'ēdi' fuerza valor ta hua' ca dyin re'ennē' hua'. ¹³ Pero dza na'te ptasi bnioga' Jesucristo, udilalia' yaca ben' quienē', psacayaquē' bizinaquezi. Ba'ala'cazi bia' cana', beyēchi'la'adyi' Diuzi nē'ēdi', porque binezda' bin bia', binenaohua' xneza Jesús caora na'. ¹⁴ Cana' taže gula beyēchi'la'adyi' Señor quiero nē'ēdi'. Cana' bēnē' quia' ta inahua' xneza Jesucristo, ta idyē'ēda' benē' ca nadyē'ē yaca ben' nao xneza Jesús yaca benē'.

¹⁵ Nacan tabala bida Cristo Jesús lao yedyi layu ta ute uselanē' yaca ben' de dula' xquia quie ta gata' yela' neban quieyaquē' tuzioli. Na'ra lēscan' nē'ēdi', de dula' xquia že quia' dza na', ¹⁶ pero beyēchi'la'adyi' Diuzi nē'ēdi' tacuenda ulu'en naca Cristo Jesús ben' žela'adyi'. Ca guca quia' nacan tu ejemplo

para yaca ben' huanao xneza Jesús dza zaza'ra gata' yela' neban quieyaquë' tuzioli. ¹⁷ Cana' tuzioli reya'ala' gapala'nro Diuzi, ben' zu tuzioli, ben' neban tuzioli, ben' biilë'ëro. Tuzi lëbë' naquë' Diuzi, ganura Diuzi zu. Amén.

¹⁸ Timoteo, raqueda' luë' ca zi'ina', rnia' luë' huelo' dyin quie Diuzi du guicho du la'adyo', bë quio' xti'idza' Diuzi, bë quio' quie pensari bdze' Diuzi lu'u guicho' con ca una yaca ben' bë quie xti'idza' Diuzi dza na'. Lao na'a Diuzi unayaquë' cabë' reya'ala' huelo'. ¹⁹ Na'ra nita' yaca benë' bibë quiejë' quie pensari bdze' Diuzi lu'u guichoyaquë'. Quie lena' aodyiagui' pensari quieyaquë' psanla'adyi'yaquë' xneza Jesús. ²⁰ Cana' guca quie Himeneo len Alejandro. Pero babebioga' lëjë', banacayaquë' cuenda quie xan' taxi'ibi' Satanás tacuenda ineziyaquë' bireya'ala' utasi unioyaquë' Diuzi.

2

Rnë Pablo cabë' reya'ala' hue'lëro Diuzi di'idza'

¹ Ta nacaran belao rnia' luë', reya'ala' hue'lële Diuzi di'idza' por yugulu benë'. Reya'ala' inabo' Diuzi gunnë' ta rdzioguelo'. Reya'ala' inabo' Diuzi chi bigacalënë' yaca ben' raca zëdi quie. Reya'ala' yëbo'në' diuxcalelo'. ² Hue'lële Diuzi di'idza' por yaca ben' naca gobierno, lente yugulu ben' napa dyin tacuenda gaca huen quiero suro chizi, bibi zëdi gata' quiero. Cana' inita'ro dya'a tzionla'adyi'ro Diuzi, gapala'n benë' ra'o. ³ Tahuen na' huero cana'. Lena' huetzaxe Diuzi, ben' run benë' yela' neban tuzioli. ⁴ Re'en Diuzi gata' yela' neban tuzioli quie yugulu benë'. Lëzi re'en Diuzi inezi yugu benë' di'idza' la'iya quienë'. ⁵ Tuzi Diuzi naca, ganura diuzi zu. Lëzi tuzi Jesucristo naquë' ben' nuelë ra'o tuze conlë Diuzi, ganura ben' tula zu. ⁶ Lëbë' psedyinnë' cuinnë' lao na'a yaca benë' bëti lëbë'. Cana' guca guti Jesucristo lao laza yugulu benë', udižuguë' quie dula' xquia quieyaquë' ta gata' yela' neban tuzioli quie yaca benë' conforme con ca una Diuzi tiempote. ⁷ Lena' ulio Diuzi në'ëdi' naca' apóstol use'ela' Diuzi në'ëdi' ta quixogui'a ben' binaca ben' Israel xti'idza'në', lëscan' ta usëdia'yaquë' inaoyaquë' xneza Jesús, na' hue quieyaquë' di'idza' li quie Diuzi. Tali rnia', cala yë' rzi'a.

⁸ Cana' re'enda', re'enda' hue'lë yaca benë' Diuzi di'idza', ben' baneyëri laxta'ohue con gatezi zuyaquë'. Bireya'ala' idza'jë' tilalëyaquë' laguedyijë'. ⁹ Lëscan' re'enda' gaco yaca nigula la'ari' sencilla ta binaca beya beza' adorno. Tahuen na' uzutza'oyaquë' cuinyaquë', pero cala conlë la'ari' tzao', ni oro, ni yo tzao', nica upa'ayaquë' guichoyaquë' taže. ¹⁰ Reya'ala' hueyaquë' tadya'a como ca rue yaca nigula naca la'iya, yaca nigula nao xneza Jesús. ¹¹ Reya'ala' cue' yaca nigula chizi uzëmagayaquë' dyë'ëdi caora rusëdi benë' leyaquë'. ¹² Bihua' lato usëdi yaca nigula benë' ga redupa yaca ben' nao xneza Jesús. Lëscan' bihua' lato inabë' nigula yaca be'mbyu. Reya'ala' inita' yaca nigula chizi, ¹³ porque bzalo Diuzi Adán primero, na'tera bzaloguë' Eva. ¹⁴ Quele Adán uzi' xan' taxi'ibi' yë', den' nigula quielanë' uzi' xan' taxi'ibi' yë' bënë' dula' xquia. ¹⁵ Huela'iya Diuzi yaca nigula chi usegulayaquë' zi'iyaquë' dyë'ëdi. Lëscan' huela'iya Diuzi leyaquë', chi yu'uyaquë' pensari huen, chi biusanyaquë' inaoyaquë' xneza Jesús, chi idyë'ëyaquë' laguedyiaquë', chi nayëri laxta'oyaquë' lao Diuzi.

3

Rnë Pablo cabë' reya'ala' hue yaca ben' napa dyin quie Diuzi

¹ Nacan tali ca rnia'. Chi nu ben' re'en gapa dyin quie Diuzi rapanë' yaca ben' nao xneza Jesús, na'ra dyin dya'a na' re'ennë' huenë'. ² Nu ben' napa

dyin cana', reya'ala' gaca quienë' tantozi rdanë' lao benë' dyë'ëdi gula, nitu nitu gao lëbë' xquia. Reya'ala' sulënë' tuzi nigula quienë'. Bireya'ala' huenë' ta nrazin quienë'. Reya'ala' tzu'unë' pensari huen, reya'ala' huenë' bala'ana. Reya'ala' gapachi'në' ben' rdyin zan yu'u quienë' dyë'ëdi. Reya'ala' nezinë' usëdinë' benë'. ³ Bireya'ala' xudyinë'. Bireya'ala' quilonë' dila. Bireya'ala' sa'la'adyi'në' dumi. Reya'ala' gacalënë' yaca benë'. Reya'ala' tzu'ulënë' laguedyinë' dya'a. ⁴ Reya'ala' usëdinë' ben' nita' zan yu'u quienë' dyë'ëdi. Reya'ala' gale zi'inë' quienë'. Reya'ala' gapala'n zi'inë' yaca benë'. ⁵ Chi biracanë' usëdinë' yaca ben' nita' zan yu'u quienë', lena' ulu'en quienë' bigacanë' usëdinë' yaca ben' nao xneza Jesús. ⁶ Lëscana' nu ben' zaazulao inao xneza Jesús, bireya'ala' gapanë' dyin quie Diuzi, porque chan' iyaquë' yežë'në' laguedyinë', na' huen žudyi gata' castigo quienë' ca castigo guta' quie xan' taxi'ibi'. ⁷ Lëscan' yaca ben' binao xneza Jesús, reya'ala' ilë'ëyaquë' lëbë' ben' huen, porque chi biilë'ëyaquë' lëbë' ben' huen, huanëyaquë' quienë', huata' huedila huenë, huen žudyi hue xan' taxi'ibi' gan uza'agan dyin quie Diuzi.

Rnë Pablo cabë' reya'ala' hue yaca ben' racalë yaca ben' nao xneza Jesús

⁸ Lëscan' nu yaca ben' racalë ben' nao xneza Jesús, reya'ala' tajë' gapajë' bala'ana. Bireya'ala' huejë' di'idza' chopa ru'a. Bireya'ala' xudyiyaquë'. Bireya'ala' sa'la'adyi'yaquë' dumi. ⁹ Reya'ala' tzu'uyaquë' pensari dya'a. Reya'ala' galeyauquë' du guicho du la'adyi'yaquë' quie ta naca tali quie Diuzi pca'nnë' lao na'aro. ¹⁰ Pero zareya'ala' ina'le dyë'ëdi quieyaquë', chi lagazu rquixiyaquë', na'ra huazaque' gacayaquë' ben' racalë ben' nao xneza Jesús. ¹¹ Lëscan' nigula quieyaquë', reya'ala' tajë' gapajë' bala'ana. Bireya'ala' hue'lëyaquë' yaca benë' di'idza' bižu. Reya'ala' tzu'uyaquë' pensari huen. Lëscan' biti'tezi dyin napayaquë', reya'ala' hueyaquë'n du guicho du la'adyi'yaquë'. ¹² Nu ben' racalë yaca ben' quie Jesús, reya'ala' sulënë' tuzi nigula quienë'. Reya'ala' gale zi'inë' quienë' dyë'ëdi lente yaca los demás familia quienë'. ¹³ Chi ruenë' dya'a ca dyin napë', huapala'n yaca benë' lëbë', gacaranë' mazara yexi'idze'ne' yaca benë', dan' zionë' naonë' xneza Cristo Jesús.

Rnë Pablo quie ta naca tali quie Diuzi

¹⁴ Re'enda' laguidatia' ideyuba' luë', ¹⁵ pero chan' bisaque' guidatia', rua' guichi ni ta inezilo' cabë' reya'ala' hue yaca ben' nao xneza Jesús. Yugulu ben' nao xneza Jesús nacayaquë' ca quie tu cue' benë'. Nacayaquë' familia quie Diuzi, ben' neban tuzioli. Lëyaquë' quixogue'yaquë' hueyaquë' defender ta naca tali quie Diuzi. ¹⁶ Dula'adyi'ro naca xti'idza' Diuzi di'idza' binezi yaca benë', di'idza' yebantzegueyaquë'. Lëdi'idza' na' rnën caniga: Golo Jesucristo lao yedyi layu cabë' ralo benë'. Blë'ë yaca benë' lëbë'. Udixogue' Bichi Be quie Diuzi unë' bibi dula' xquia de quienë'. Una' yaca ángel lëbë'. Udixogue' benë' xti'idza'ne' lao yedyi layu. Unao yaca ben' nita' lao yedyi layu xnezë'. Bezi' Diuzi lëbë' guibá ga naquë' ben' rnabë' lao yugulute. Cana' rnën lë'ë guichi la'iya quie Diuzi.

4

Rnë Pablo quie ben' bira hue bala quie xneza Jesús

¹ Dyë'edicazi unë Bichi Be quie Diuzi huadyin dza bira hue yaca benë' bala quie xneza Jesús. Galeyauquë' quie yaca bichi be xi'ibi' caora cati si'yacan lëjë' yë', na' yëbiyacan lëjë' di'idza' huizi' yë'. ² Lëscana' hue quieyauquë' di'idza' cabë' di'idza' ina yaca ben' huizi' yë', yaca ben' ru'elë Diuzi di'idza' ladzazi. Yaca ben' na', bibi bayëchi' raqueyauquë' dan' rueyauquë' tamedian. ³ Huanayaquë' binacan dya'a utzagana' yaca benë'. Lëscan' huanayaquë' binacan dya'a gao benë' bë'ëla'. Cana' inayaquë' la'acazi Diuzi biunë' cana'. Bë Diuzi yela' huao ta gao yaca ben' quienë', ben' tziõe'e di'idza' li quienë'. ⁴ Yugulu ta bë Diuzi ta gaoro, nacan huen gaoron. Reya'ala' gaoro ta de, bireya'ala' inaro bigaoro ta de. Reya'ala' yëbiri Diuzi diuxcalelo' na' gaoron. ⁵ Porque cati rëbiri Diuzi diuxcalelo', na' ruela'iya Diuzi ta raoro, hora na' nacan huen gaoron.

Rnë Pablo cabë' reya'ala' hue yaca ben' rue dyin quie Jesucristo

⁶ Chi usëdio' yaca bichiro, ben' nao xneza Jesús, cabë' rnia' ni, chi uzioñe'elo'yaquë' xti'idza' Diuzi, chi usëdio'yaquë' inaoyaquë' xneza Jesús con cabë' ruelo' rnaolo' xnezë', cana' naco' ben' huen, ben' rue dyin quie Jesucristo. ⁷ Bigalelo' quie yaca cuento rnëzi benë' de pensari tondozi. Du guicho du la'adyo' gaco' ben' rionla'adyi' Diuzi. ⁸ Huacalën ra'o huero ejercicio, pero huacalën ra'o mazara chi du guicho du la'adyi'ro gacaro ben' rionla'adyi' Diuzi. Chi huero cana', lena' gacalen ra'o dza rdaro lao yedyi layu lente dza sulëro Diuzi guibá. ⁹ Nacan tali ca rnia' niga. Reya'ala' gale yugulu benë' cabë' nia' niga. ¹⁰ Quie lena' ruero dyin quie Diuzi yugu dza. Quie lena' redzagalaoro rutasi runio yaca benë' ra'o. Pero sudyi'ilëro Diuzi, ben' naban tuzioli. Naca Diuzi ben' ute usela yaca ben' nita' lao yedyi layu ta gata' yela' neban quieyauquë' tuzioli. Bapte psela Diuzi ra'o, ben' nao xneza Jesús, baguta' yela' neban quiero tuzioli.

¹¹ Cabë' nia' niga, lena' reya'ala' usëdio' yaca benë' huelo'jë' mandado huejë'. ¹² Bihuelo' lato uzë' yaca benë' luë' dan' binetze iza quio'. Nacalan huen gaco' tu ejemplo para yaca los demás ben' nao xneza Jesús. Cana' reya'ala' hue'lao' benë' di'idza' dya'a. Reya'ala' inita'lao' yaca benë' dya'a. Reya'ala' idyë'ëlo' laguedyo'. Reya'ala' hue quio' xti'idza' Diuzi du guicho du la'adyo'. Reya'alo' huelo' puro tahuen. ¹³ Tu raza guida' quio', ulabo' di'idza' la'iya quie Diuzi lao yaca los demás ben' nao xneza Jesús ga redupayaquë'. Hue'lao'yaquë' di'idza' zela'adyi', uzioñe'elo'yaquë' xti'idza' Diuzi. ¹⁴ Bigalala'adyo' huelo' según ca ta banegunne Diuzi luë' caora cati du yu'ulo' Bichi Be quie Diuzi, na'ayaquë' guicholo' dza na'.

¹⁵ Gapo' cuidado huelo' cabë' baonia' luë' cuenda ilë'e yaca benë' aracaralo' mazara usëdio' benë' xti'idza' Diuzi cabë' rnën. ¹⁶ Gapo' cuidado tuzi ca pensari quie Diuzi huelo'. Lëscana' gapo' cuidado tuzi ca di'idza' quie Diuzi usëdio' benë'. Lena' huelo' tzutzu. Chi huelo' cana', huela'iya Diuzi luë'. Lëscan' huela'iya Diuzi yaca ben' ruzënaga quio' cabë' usëdio'jë'.

5

Ni nan cabë' reya'ala' hue Timoteo len yaca los demás ben' nao xneza Jesús

¹ Timoteo, bitilalëlo' yaca ben' gula. Huenla hue'lao'yaquë' di'idza' dya'a cabë' di'idza' ru'elëro xuziuro. Lëscana' yaca bi'byu cuidi', reya'ala' hue'lao'yacabi' di'idza' dya'a cabë' di'idza' ru'elëro bichiro. ² Lëscana' yaca nigula huaca, reya'ala' hue'lao'yaquë' di'idza' dya'a cabë' di'idza' ru'elëro zna'ro. Lëscana' yaca nigula cuidi', reya'ala' hue'lao'yacabi' di'idza' dya'a cabë' di'idza' ru'elëro zanro. Reya'ala' tzu'ulao'jabi' dya'a.

³ Reya'ala' gacalëlo' yaca nigula aguti xquiuhue, nigula abide quie. ⁴ Pero chi nita' zi'ijë', o chi nita' zi'isubajë', lëjabì' naca cuenda quiejabi' gacalëjabì' leyaquë' como apsegulë' leyacabi'. Chi hueyacabi' cabë' nia', na' hueyula'adyi' Diuzi cabë' rueyacabi'. ⁵ Pero ben' nati xquiuhue, ben' ganu familia quie' nita', tali naquë' ben' tu litza'. Lëbë' sí, reya'ala' sunë' rbezanë' gacalë Diuzi lëbë'. Reya'ala' ulidzanë' Diuzi yugu dza, yugu yela. ⁶ Na' quie tu nigula nati xquiuhue, chi ruenë' ta rnazin quienë', naca quienë' lao Diuzi ca quie ben' anati, dan' bira rue quienë' xti'idza' Diuzi. ⁷ Ruen dyabë' yëbo'jë' cabë' nia' ni cuenda bibi causa gata' quieyaquë'. ⁸ Chi nita' nu ben' nao xneza Jesús, pero bire'ennë' gacalënnë' ben' naca diadza quienë', chi bire'ennë' gapanë' familia quienë', lena' nacan mala. Nacarë' mazara ben' mala cabë' ben' birue quie xti'idza' Diuzi.

⁹⁻¹⁰ Reya'ala' huelo' tu lista quie yaca ben' aguti xquiuhue. Pero nia' luë' biuzulo' lao yaca ben' binesu tzona galo iza. Lëscan' biuzulo' laojë' chi birlë'ë yaca benë' leyaquë' dya'a. Reya'ala' uzulo' laojë' chi uzulëjë' tuzi xquiujë', chi psegulajë' zi'ijë' dyë'ëdi, chi gapachi'jë' dya'a ben' rdyin zan yu'u quieyaquë', chi racalëjë' du guichi du la'adyi'jë' ben' nao xneza Jesús, chi reyëchi'la'adyi'në' ben' redzagalao. Chi bëjë' cana', bëjë' tadya'a. Reya'ala' uzulo' laoyaquë' lao lista.

¹¹ Biuzulo' lao yaca ben' binetze iza quie, porque ruen žudyi inan quieyaquë' yezi'yaquë' ben' tula, caora na' ruen žudyi usanla'adyi'jë' xneza Cristo ta yezulëyaquë' be'mbyu tatula. ¹² Cana' gata' causa quieyaquë', porque bibzujë' di'idza' cabë' unajë' huejë', huejë' puro dyin quie Diuzi. ¹³ Ruen žudyi tayaquë' tu yu'u tu yu'u quie benë', dan' gabi dyin ruejë'. Ruen žudyi tayaquë' hue'yaquë' di'idza' bižu bi raca quie yaca benë' ta bireya'ala' hue'yaquë'. ¹⁴ Quie lena' nia' huenla yezi' nigula nenaca cuidi', ben' baguti xquiuhue, be'mbyu tula. Huenla su xcuidi' quieyaquë' cuenda gacajë' ben' familia gapajë' xcuidi'. Cana' bibi causa gata' quieyaquë' lao na'a enemigo quiero. ¹⁵ Pero bala yaca nigula, ben' nati xquiuhue, apsanla'adyi'yaquë' xneza Jesús, banaoyaquë' xneza xan' taxi'ibi' Satanás.

¹⁶ Yaca ben' nao xneza Jesús, reya'ala' gacalëyaquë' yaca nigula, ben' nati xquiuhue, ben' tali bazu cuinze. Quie lena', chi nita' yaca nigula, ben' nati xquiuhue, pero nenita' familia quieyaquë', reya'ala' gacalë familia quieyaquë' leyaquë'. Binacan cuenda quie ben' nao xneza Jesús gapajë' lëjë' chi nenita' familia quieyaquë'. Pero nacan cuenda quie ben' nao xneza Jesús ta gacalëjë' ja nigula tali bazu cuinze.

¹⁷ Yaca ben' napa dyin quie Diuzi, chi rueyaquë' quie dyin napajë' du guicho du la'adyi'jë', reya'ala' hue yaca ben' nao xneza Jesús leyaquë' bala'ana. Lëscan' nacan belao hueyaquë' ben' rguixogue' xti'idza' Diuzi bala'ana. ¹⁸ Cani na lë'ë guichi la'iya quie Diuzi: "Bireya'ala' udze'ro du ru'a bëdyihuaga caora rdaba' rutzutzu rulioba' bdyigo' quie trigo ta iro bini quien. Pero dan' rueba' dyin, reya'ala' hue'roba' lato gaoba' tu rdaba' hueba' dyin." Lëscan' narë guichi la'iya quie Diuzi de ga tula: "Ben' rue dyin, napë' derecho si'në' xlažugë'."

¹⁹ Timoteo, bigalelo' quie yaca ben' rao ben' napa dyin quie Diuzi xquia, chi binita' chop'a tzona ben' naca testigo. ²⁰ Chi nita' ben' napa dyin quie Diuzi, pero birusanyaquë' huejë' dula' xquia, reya'ala' tilalao'yaquë' delante lao yaca los demás ben' nao xneza Jesús cuenda idzebijë' bihuejë' dula' xquia. ²¹ Rnabi'a luë' lao Diuzi len lao Jesucristo, len lao yaca ángel quienë' ta uzulo' di'idza' huelo' cabë' nia' ni. Tuzi ca huelo', huelo' mandado gale yaca

ben' nao xneza Jesús cabè' nia' ni. ²²Reya'ala' yeni'lo' dyè'èdi nu ben' udè'lo', ben' gapa dyin quie Diuzi, porque ruen zudyi gata' dula' quio' chi hue ben' bdè'lo' bizinaquezi. Pero luè', nia', puro tadya'a huelo'.

²³Lëscan' como racatzegue lè'èlo', reya'ala' yo'olo' ledao' vino tacuenda yeyaca lè'èlo'. Bira yo'olo' puro nisa.

²⁴Quie bala ben' rue xquia, ulu'elaonan luegozi zagaca juicio quieyaquè'. Pero quie ibala ben' rue xquia, biulu'elaonan luegozi sino que bè' gacara juicio. ²⁵Lëscan' quie yaca ben' rue tadya'a, ulu'elaonan luegozi. Pero chi biulu'elaonan luegozi, bitzënan ulu'elaonan.

6

¹Quie nu yaca ben' nao xneza Jesús, chi ben' nada'o nacayaquè', na' reya'ala' gapala'nyaquè' xa'nyaquè' dyè'èdi cuenda bigata' causa quiejè' biinè' xa'nyaquè' condre Diuzi len condre xti'idza'nè' ca ta rguixogue'ro benè'. ²Lëscan' chi nacarè xa'nyaquè' ben' nao xneza Jesús, reya'ala' gapayaquè' xa'nyaquè' bala'ana dyè'èdi gula como dan' nacarè xa'nyaquè' ben' nao xneza Jesús. Pues mazara reya'ala' gapayaquè' leyaquè' bala'ana, porque nacayaquè' ben' rale, ben' bichiro, ben' nedyé'ëro.

Gaparo cuidado bisa'la'adyi'ro dumi

³Ca di'idza' nia' ni, lena' re'enda' quixogue'lo' yaca benè' huelo' mandado galeyauquè' quien. Chi rguixogue' nu ben' di'idza' falso, di'idza' ta binaca lèbi ca di'idza' una Señor quiero Jesucristo lente con cabè' rna xti'idza' Diuzi rnaoro, quie lena' rulu'en ⁴nacayaquè' benè' zè' bineziyaquè' bi rnèyaquè'. Tanto ru'uyaquè' huedila huenè, raca quieyaquè' ca quie ben' raca zhue'. Lena' za'n ruen quiejè' yela' zè'la. Lena' za'n ruen quieyaquè' yela' utasi unio laguedyi. Pues delaohue raca quiejè' si'jè' yè'. ⁵Yaca ben' rue cana', bire'enyauquè' yeyudyi huedila huenè, abzino pensari quieyaquè'. Bineziyaquè' ca naca tali quie Diuzi. Raqueyaquè' chi xneza Jesús naoyaquè', huèyaquè' gan dumi ze. Nu yaca ben' ruè cana', bitzu'ulao'jè' tuze. ⁶Pues tali na' chi naoro xneza Jesús huero gan suro contento. ⁷Pues bibi nu'aro dza goloro lao yedyi layu. Lëscana' quele hueyu'aro bi cosa bè' gatiro. ⁸Quie lena' con chi rde rlaro quie ta gaoro, con chi rde rlaro quie zabaro, conlè lëzin reya'ala' zuro gusto. ⁹Pero nita' yaca ben' rza'la'adyi' dumi. Rueyaquè' bitezi ta idzeleyaquè' dumi, ba'ala'cazi huenan bizinaquezi quieyaquè'. Yela' rza'la'adyi' dumi quieyaquè', rudyiagui'yaquè' cuinyaquè'. ¹⁰Binacan huen sa'la'adyi'ro dumi. Por nun quie rza'la'adyi' yaca benè' dumi, tana' rueyaquè' bitezi tamala, hasta rusanla'adyi'yaquè' xneza Jesús redzagalaoyaquè', pero dula' quieziyaquè'.

Reya'ala' hue quiero xti'idza' Diuzi du guicho du la'adyi'ro

¹¹Pero luè', Timoteo, bireya'ala' huelo' ca rue yaca ben' na', dan' naco' ben' quie Diuzi. Reya'ala' huelo' puro tadya'a tzionla'adyo' Diuzi du guicho du la'adyo'. Reya'ala' galelo' quie Diuzi, na' idyè'èlo' laguedyo'. Reya'ala' suelo' bitezi gaca quio'. Reya'ala' tzu'ulao' talèlo' laguedyo' gaco' ben' gaxo. ¹²Du guicho du la'adyo' galelo' quie Diuzi huelo' cabè' dyin bdè' Diuzi luè' huelo'. Inaolo' xneza Jesús biusanlo'n, na' gata' yela' neban quio' tuzioli. Pues por lena' ulio Diuzi luè' bequèbo' lao yaca benè' de que naco' ben' quie Jesús, ben' nao xnezè'. ¹³⁻¹⁴Rnia' luè': Bzu di'idza' quia' cabè' unia' luè' hasta idyinte dza yeguida Señor quiero Jesucristo cuenda bihue yaca benè' causa quio' gaojè' luè' xquia. Lena' rnia' luè' delante lao Diuzi, ben' run yela' neban yugulu ta de. Lëscan' rnia' luè' delante lao Jesucristo, ben' bequèbi naquè'

zi'i Diuzi lao Poncio Pilato. ¹⁵ Cati psaque' Diuzi abdyin hora, caora na' il'ë'e yaca benë' Señor quiero Jesucristo. Cana' hue Diuzi quiero, porque tuzi lëbë' naquë' Diuzi, ganura Diuzi tula zu. Tuzi lëbë' rnabë'ranë'. Ganura zu rnabë' ca lëbë'. Tuzi lëbë' nacaré' ben' ze. Ganura zu naca ca lëbë'. ¹⁶ Tuzi Diuzi naquë' ben' biyeyudyi yedu quie. Re' xni' ze ga'n zuë'. Nitu nunu saque' ibiga' ga'ala' ga'n zuë'. Nitu nitu ben' nita' yedyi layu bisaque'jë' il'ë'ëj'ë' lëbë'. Reya'ala' gapala'n yugulu benë' lëbë' tuzioli. Biyeyudyi yedu yela' rnabë' quienë'. Amén.

¹⁷ Yaca ben' de dumi quie lao yedyi layu, reya'ala' yëbo'jë' ta biuxa'ajë'. Lëscan' yëbo'jë' ta biuxela'adyi'jë' cuinjë' dan' nacajë' ben' uña'a, porque huade quie yela' uña'a quiejë'. Huenla uxela'adyi'yaquë' Diuzi, ben' naban tuzioli, ben' run ta rdzioguero suro dyë'ëdi. ¹⁸ Yëbo'jë' huejë' tadya'a, pero yugu dza quele batazi. Reya'ala' yeyëchi'la'adyi'yaquë' laguediyayaquë'. Reya'ala' suyaquë' dispuesto si'jë' ta de quieyaquë' hue'yaquë'n ben' yëchi'. ¹⁹ Cana' gata' dugalo yela' uña'a quieyaquë' guibá dza zaza'ra. Cana' gata' yela' neban quieyaquë' tuzioli.

Ga iyudyi di'idza' use'ela' Pablo lao Timoteo

²⁰ Timoteo, reya'ala' uzulo' di'idza' huelo' yugulu cabë' baonia' luë' quie Diuzi. Biuzënego' quie di'idza' ru'ëzi yaca benë', di'idza' bë' nazijë', di'idza' bibi zaca'. Lëscan' bitzu'ulo' huenë conlë yaca ben' rue cuine ben' rioñe'e, den' bë' nazijë' najë' rioñe'eyaquë', pero birioñe'eyaquë'. ²¹ Cana' bë' bala ja ben' unita' dza na'. Unayaquë' rioñe'eyaquë', pero bë' naziyaquë', como dan' psanla'adyi'yaquë' xneza Jesús. Ni yeyudyi quie di'idza' unia' luë'. Rulidza' Señor quiero ta huela'iyane' luë'. Amén.

GUICHI URUPE BĚ SAN PABLO APÓSTOL USE'ELA'NĚ'N LAO TIMOTEO

Use'ela' Pablo guichi ni lao Timoteo

¹ NĚ'ĕdi', Pablo, naca' apóstol quie Jesucristo con cabĕ' ulio Diuzi nĚ'ĕdi' conforme con ca una Diuzi hue'nĕ' yela' naban tuzioli nutezi ben' hue tuze len Jesucristo. ² Timoteo, bia' guichi niga pse'ela'n laolo'. Nezilo' nadyĕ'ĕda' luĕ', raqueda' luĕ' ca zi'ina'. Rulidza' Xuzirol Diuzi lĕnĕ' Señor quiero Jesucristo ta huela'iyaquĕ' yeyĕchi'la'adyi'yaquĕ' luĕ' cuĕchiyaquĕ' chizi lu'u guicho laxta'olo'.

Reya'ala' quixogue' Timoteo yaca benĕ' di'idza' quie Cristo

³ Yugo dza, yugo yĕla, rulidza' Diuzi rĕpa'nĕ' diuxcalelo' por luĕ'. Lĕscan', por tu parte quia' nĚ'ĕdi', rua' dyin quie Diuzi birao pensari quia' nĚ'ĕdi' xquia. Cana' bĕrĕ xuzixta'ohua', bĕyaquĕ' dyin quie Diuzi, biudao pensari quieyaquĕ' leyaquĕ' xquia. ⁴ Na'ra rezala'adya' cabĕ' guquelo' bayĕchi' caora unia' luĕ' bazeya'a. Lena' re'enda' guida' ideyuba' luĕ' tatula, porque lega redaohueda' sulia' luĕ'. ⁵ Nezda' cabĕ' ruelo' rnaolo' xneza Jesús du guicho du la'adyo'. Tanĕro unao zna'gulo' Loida len zna'lo' Eunice xneza Jesús. Reyula'adya' lĕscan' luĕ' naolo' xneza Jesús ca leyaquĕ'.

⁶ Quie lena' rnĭa' luĕ': Reya'ala' huelo' bala ca ta banegunne Diuzi luĕ' caora uxuba' na'a guicholo' bdĕ' Diuzi luĕ'. ⁷ Bire'en Diuzi idzebiro, re'ennĕ' huero tzutzu huala laxta'oro, re'ennĕ' idyĕ'ero laguedyiro, re'ennĕ' tzu'uro pensari dya'a. ⁸ Biyedue'lo' inĕlo' cule quie Señor quiero. Lĕscan' biyedue'lo' dan' dia' lu'u dyiguiba por nun quie dan' naohua' xneza Cristo cabĕ' luĕ'. Lĕscan' biidzebo' cati huĕlĕ benĕ' luĕ' bizinaquezi. Siempre gun Diuzi fuerza valor quio' ta suelo' sulo' chizi chi bitti'tezi ta usaca benĕ' luĕ' porque dan' rguixogue'lo' xti'idza' Diuzi. ⁹ Ulio Diuzi ra'o beguibinĕ' laxta'oro, porque re'ennĕ' gacaro ben' la'iya quienĕ'. Cala yela' ben' huen quiero ulio Diuzi ra'o, dechan' ulionĕ' ra'o bĕnnĕ' cule quiero, porque cana' re'ennĕ' huenĕ' quiero nedyĕ'ĕnĕ' ra'o ca nedyĕ'ĕrĕ Jesucristo ra'o. Tu binegata' yedyi layu, tu na' zu Diuzi nadyĕ'ĕnĕ' ra'o. ¹⁰ Tali blu'e Diuzi nadyĕ'ĕnĕ' ra'o, porque use'ela'nĕ' Señor quiero Jesucristo ta yeyudyi yedu quie yela' guti quiero. Lĕscan' lao na'anĕ' guta' yela' neban quiero tuzioli por nun quie xti'idza' Diuzi.

¹¹ Bĕ Diuzi nĚ'ĕdi' nombrado ta tzetixogui'a benĕ' xti'idza' Diuzi. Quie lena' use'ela'nĕ' nĚ'ĕdi' naca' apóstol, naca' maestro. ¹² Quie lena' redzagalaohua', pero biredue'da' porque nuebĕ'da' Cristo, naohua' xnezĕ'. Nezda' naca Cristo ben' de yela' huaca quie, rna'nĕ' nĚ'ĕdi' tu lala zua' yedyi layu hasta idyin dza gaca juicio lao yedyi layu.

¹³ Biusanla'adyo' inaolo' cabĕ' psĕdia' luĕ' quie xti'idza' Diuzi. Unao xneza Jesús du guicho du la'adyo', idyĕ'ĕlo' laguedyo' nun quie dan' naco' tuze len Cristo Jesús. ¹⁴ Lao na'a Bichi Be quie Diuzi, ben' yu'u lu'u guicho laxta'oro, gapo' cuidado bigala'adyo' uzulo' xti'idza' Diuzi ca ta bdĕ'nĕ' luĕ'.

¹⁵ Luĕ' nezilo' apsanla'adyi' yaca ben' nita' yaca ciudad nebaba Asia nĚ'ĕdi'. Cana' apsanla'adyi' Figelo len Hermógenes nĚ'ĕdi'. ¹⁶ Rulidza' huela'iya Diuzi familia quie Onesiforo, porque zĕ lasa pxela'adyi'nĕ' nĚ'ĕdi'. Biredue'nĕ' quia' naca' preso dia' lu'u dyiguiba. ¹⁷ Cati bedyinnĕ' ciudad Roma udanĕ' beguilonĕ' nĚ'ĕdi' hasta bedzelenĕ' nĚ'ĕdi'. ¹⁸ Rulidza' Diuzi

yeza'la'adyi'nè' quienè' dza gaca juicio lao yedyi layu. Dyè'èdi nezilo' taze gualènè' ra'o dza udaro ciudad Efeso.

2

Naca ben' nao xneza Jesús ca quie soldado dya'a

¹ Luè' naco' ca quie zi'ina'. Tana' nia' luè' huelo' bala ca tu ta banegunne Cristo Jesús luè'. ² Na'ra cabè' di'idza' apsèdia' luè', re'enda' usèdio' ben' tula, pero ben' nezo' uzu di'idza', ben' nezo' usèdi dyè'èdi. Huelo' mandado usèdijè' yaca benè' cabè' di'idza' apsèdia' luè'.

³ Reya'ala' sèlo' tzutzu huala ca quie soldado dya'a quie Jesús cati rusaca benè' luè' bizinaquezi. ⁴ Bireya'ala' hue soldado dyin tula cati ruenè' servicio quienè'. Reya'ala' huenè' puro ca mandado rue xa'ne cuenda yeyula'adyi' xa'ne lèbè'. ⁵ Lèscana' nacaré quio' ca quie ben' rguitulè pelota, bihuenè' gan chi bihuenè' cabè' na reglamento quien. ⁶ Lèscana' nacaré quio' ca quie ben' guza na quie, ben' rue dyin guixi', napanè' derecho si'nè' usecho quien. ⁷ Huu' pensari cabè' nia' luè', na'tera huacalè Diuzi luè' ta tzioñe'elo'n.

⁸ Bigalala'adyo' Jesucristo, zi'isuba' rey David. Naquè' ben' aguti, na' bebannè' tatula aberoguè' gan' yu'u ja ben' huati. Lena' rguixogui'a benè'. ⁹ Nun quie rguixogui'a benè' xti'idza' Diuzi, redzagalaohua' pquioyaquè' ni'a na'a cadén. Ca quie ben' bè tamala, bëyaquè' quia'. Pero bisaque'yaquè' uquioyaquè' xti'idza' Diuzi. ¹⁰ Pues rzueda' con biti'tezi tamala raca quia' cuenda yega'nnan dya'a quie yaca ben' ulio Diuzi, na' gata' yela' neban quieyaquè' tuzioli tzasulèyaquè' Cristo Jesús tuze.

¹¹ Tali nacan de que:

Chi zuro puesto inaoronè' ba'ala'cazi ruen žudyi guti benè' ra'o, na'tera huezi'nè' ra'o huetzasulèronè' tuzioli.

¹² Chi suero cati rue ja ben' quiero bizinaquezi, na'tera gunnè' lato quiero inabè'ro conlè lèbè'.

Chi usebi'ro lèbè', lèscana' usebi'nè' ra'o.

¹³ Ba'ala'cazi birue quiero xti'idza' Diuzi, lèbè' sí, ruecazi quienè' xti'idzè', porque bisaque' birue quienè' xti'idzè'.

Reya'ala' huero ta yeyula'adyi' Diuzi

¹⁴ Gacalao' yaca ben' nao xneza Jesús ta bigalala'adyi'yaquè' cabè' nia' niga. Lèscan' huegadyo'yaquè' ta bihuejè' cuenda quie yaca ben' raxe tzu'u huenè rdilayaquè' quie bi di'idza' rnèn lè'è guichi ley quie Diuzi. Pues bibi zaca'n tzu'uyaquè' huenè' conlè leyaquè'. Tuzi ca huen quieyaquè', huatondo pensari quiejè' chan' uzè'nagajè' quiejè'. ¹⁵ Bè quio' xti'idza' Diuzi du guicho du la'adyo' cuenda ilè'è Diuzi cabè' ruelo' tanun quienè' naco' ben' rue dyin dya'a, ben' rguixogue' di'idza' li quienè' ta yu'u ni'a xnezi. Chi huelo' cana', na' huario dyin quio' dya'a, bigata' yela' stu' quio' lao Diuzi. ¹⁶ Bihuu' cuenda quie yaca ben' rna di'idza' bibi zaca'n, di'idza' dachizi, porque yaca ben' rna cana', tu dza, tu dza, ziojè' ruejè' mazara tamala. ¹⁷ Naca di'idza' quiejè' ca quie hue' baru'udzo'. Cana' naca quie Himeneo len Fileto. ¹⁸ Uquixiyaquè' nayaquè' biyeban yaca ben' huati. Cana' aptondoje' pensari quie bala ben' nao xneza Jesús. ¹⁹ Pero bisaque' te cana'zi ta bè Diuzi, yega'nnan tuzioli. Pues cani nan lè'è guichi la'iya quie Diuzi: “Nezi Diuzi nu ben' naca ben' quienè’.” Lèscan' nan: “Yugulu ben' nao xneza Jesús, reya'ala' usanjè' tamala.”

²⁰ Uzècara nago' ta inia' luè' tu di'idza'. Lu'u yu'u quie ben' uña'a de zè cue' taza. De taza de oro, len de plata, len de yaga, len de yu. Na'ra nu taza de oro o de plata zaca'n za'ala'. Pero yaca taza de yaga o de yu, lè'èti'zi zaca'n. Lèscana'

ra'0, ben' nao xneza Jesús, naca quiero ca quie zë cue' taza. ²¹ Naca quiero ca quie nu taza zaca'n za'ala', zaca'ro lao Diuzi, huero dyin quienë'. Ruen dyabë' quiero bihuero tamala, na'ra baneyë'iro huero dyin dya'a, huero dyin quie Diuzi.

²² Pues gapo' cuidado, bihuelo' ca rue bala bi' ru'abe, porque rguiloyacabi' ga huejabi' tamedian. Mejorla huelo' ta yeyula'adyi' Diuzi, sudyi'ilëlo'në' mazara, idyë'ëlo' laguedyo', huelo' cue' chizi laxta'olo', porque cana' rue ben' rulidza Diuzi du guicho du la'adyi', ben' nayëri laxta'ohue. ²³ Bihuelo' cuenda quie ben' rnë di'idza' bižu, porque dyë'ëdi nezo' huaca dila yaca benë'. ²⁴ Nacaro ben' rue cabë' re'en Diuzi. Quie lena' bireya'ala' tzu'ulëro benë' huenë. Reya'ala' gapala'nro yugulu benë'. Reya'ala' suro puesto usëdiro laguedyiro. Reya'ala' huezela'adyi'ro lëro laguedyiro. ²⁵ Lëscan' reya'ala' hue'lëro ben' rdza' ra'0 di'idza' dya'a ulidzaro Diuzi gacalë Diuzi lëjë' utza'jë' pensari quiejë' hue quieyaquë' xti'idza' Diuzi. ²⁶ Cana' re'ennan cuenda sujë' listo yerojë' lu'u trampa ga bdze' xan' taxi'ibi' lëjë' nacajë' preso ga hue xan' taxi'ibi' ta rnazin quiena conlë lëjë'.

3

Ni nan cabë' gaca quie yaca benë' caora bayeyudyi quie yedyi layu

¹ Reya'ala' inezo' dyë'ëdi cabë' gaca caora bayeguida Jesucristo, porque huata' tu zëdi ze gula lao yedyi layu. ² Yaca ben' inita' dza na', huejë' cuinjë' ben' ze, huaza'la'adyi'yaquë' dumi, uzë'yaquë' benë', utasi unioyaquë' Diuzi, bigaleyaquë' quie xuziyaquë', bibi bala'ana gapayaquë' chi nu benë' yeyëchi'la'adyi'në' leyaquë', bitzionla'adyi'yaquë' Diuzi. ³ Binadyë'ëyaquë' benë', bisi'zëyaquë' quie benë', gaoyaquë' benë' xquia rnayaquë' di'idza' falso, hueyaquë' con ta rnazin quieyaquë', hueyaquë' snia, bitzaxeyaquë' tadya'a. ⁴ Huazi'yaquë' bichiyaquë' yë', hueyaquë' con ganzi, rueyaquë' ben' huen cuinyaquë', huatzaxejë' huejë' ta rnazin quiejë', bitzaxeyaquë' ta re'en Diuzi hueyaquë'. ⁵ Rionla'adyi'jë' Diuzi najë', pero bë' nazijë', dan' birueyaquë' ca re'en Diuzi hueyaquë'.

Pues yaca ben' rue cana', bitzu'ulao'jë' tuze

⁶ Entre leyaquë' nita' ben' tzu'u lu'u yu'u quie benë' ga zu nigula rue median, ga zu nigula yu'u pensari mala. Raxe yaca nigula na' cabë' di'idza' falso na yaca ben' na'. ⁷ Tu rnabaziyaquë' ta ineziyaquë' chi nacan tali, pero bë' ruezijë' bire'enjë' inezijë' tali. ⁸ Birue quieyaquë' ta naca tali. Bitzu'uyaquë' pensari dya'a. Bë' nazijë' inajë' naojë' xneza Diuzi. Hueyaquë' cabë' bë chopo ben' brujo dza na', tu ben' lao Janes len itu ben' lao Jambres. Leyaquë' biguleyaquë' quie Moisés caora uzuyaquë' tiempote. ⁹ Pero yaca ben' inita' dza zaza'ra, lë'ëti'zi hueyaquë' gan si'jë' benë' yë', porque huacabë' yaca benë' nacajë' ben' tondo. Gaca quieyaquë' cabë' guca quie Janes len Jambres dza na'. Gucabë' yaca benë' uzu tiempote naca Janes len Jambres ben' tondo.

Ni rguixogüe' Pablo mazara Timoteo

¹⁰ Pero luë', dyë'ëdi banaolo' ruelo' cabë' ta psëdia' luë'. Lëscan' ablë'ëlo' cabë' rua', rua' tadya'a, zudyi'ilia' Jesús, rua' ca re'en Diuzi hua' tacuenda gale ja benë' con cabë' rna xti'idza'në'. Nezo' cabë' naca', naca' ben' zela'adyi', nadyë'ëda' benë'. Nezo' cabë' raca quia' redzagalaohua', pero birusanla'adya'. ¹¹ Dyë'ëdi nezilo' cabë' psaca benë' në'ëdi' bizinaquezi. Nezilo' cabë' guca quia' ciudad Antioquía, len ciudad Iconio, len ciudad Listra. Tahuala gula bedzagalaohua', pero gucalë Jesús në'ëdi' cabë' tamala gu'un yaca benë' huejë' quia'. ¹² Tana' nia' luë' yedzagalaocazi yaca ben'

re'en enao xneza Jesús. Usacacazi ben'è lèjè' bizinaquezi. ¹³ Pero yaca ben' mala len yaca ben' huizi' yè', tu dza tu dza ziojè' ruejè' mazara tamala. Rzi'yaquè' yè', riogueyaquè' yè'.

¹⁴ Pero luè', bicha', bē quio' yugulute ca ta bapsèdio', porque anezo' nacan tali, nuebè'lo' nu ben' psèdi luè'. ¹⁵ Nenacatio' xcuidi' uzulaolo' rusèdio' guichi la'ya quie Diuzi. Caora na' bzioñe'e Diuzi luè' cabè' reya'ala' huero sudyi'ilèro Jesús tachuenda gata' yela' neban quiero tuzioli. ¹⁶ Lao na'a Bichi Be quie Diuzi bènè' mandado bzu yaca ben' unita' tiempote xti'idzè' lè'è guichi. Tana' nacan huen isèdiro xti'idza' Diuzi cuenda na' tera usèdiro ben' tula quien, tilarojè' chi bihuejè' tadya'a, uzioñe'erojè' ca re'en Diuzi tajè' huejè' puro ta yu'u ni'a xnezi ¹⁷ cuenda gaca yaca ben' nao xneza Jesús ben' laxta'o yèri, ben' raca rue yugulu tadya'a.

4

¹ Delante lao Xuzi Diuzi lènè' zi'inè' Jesucristo, ben' yeguida lao yedyi layu como ca rey ta huenè' juicio quie ja ben' naban, len quie ja ben' aguti, rua' luè' mandado ² ta quixogue'lo' yaca benè' xti'idza' Diuzi la'achi yeyula'adyi'jè', la'achi biyeyula'adyi'jè'. Uzioñe'elo'jè', tilo'jè', usèdio'jè' ca ben' rue zela'adyi'. ³ Can' huelo', porque dan' huadyin dza bigue'en yaca benè' yejè' ta naca tali, pero huaguilo'yaquè' nu yaca ben' usèdi lèjè' puro ca ta re'enjè' yejè'. ⁴ Huasebi'yaquè' di'idza' li quie Diuzi. Gue'enyaguè' uzènegayaquè' cabè' naca cuento quie benè'zi. ⁵ Pero luè', reya'ala' talao' tuzi ca pensari dya'a. Bigalelo' cati hue benè' luè' bizinaquezi. Du guicho du la'adyo' tzetixogue'lo' benè' xti'idza' Diuzi. Uzulo' di'idza' cabè' dyin ben' Diuzi ruolo'.

⁶ Bagazi idyin dza gatia' yeya'a tzazua' ga zu Diuzi. ⁷ Ca dyin ben' Diuzi bia', bia' tadya'a quien bareyudyin. Bipsanla'adya' xneza Jesús. ⁸ Caora na' udyia Señor quiero, ben' rhugobè' tali, tu coron guichoga'. Na' quele tuzi nè'èdi' udyia Señor quiero coron guichoga', lèscan' udyianè' coron guicho yugulu ben' rbeza yeguida Cristo, ben' nadyè'è lèbè'.

Rnaba Pablo ta cule lao Timoteo

⁹ Huelo' dyabè' guido' idena'lo' nè'èdi'. ¹⁰ Apsanla'adyi' Demas nè'èdi', zeyonè' ciudad Tesalónica. Raxeranè' gaca quienè' ta de lao yedyi layu cala ca ta yega'nlènè' nè'èdi' niga. Na' Crescentè zionè' tu mandado yu nebaba Galacia. Lèzi cana' ziorè Tito tu mandado yu nebaba Dalmacia. ¹¹ Ituzi Lucas abega'nlènè' nè'èdi' niga. Chi huu' cule, tzio' tzeguedyo' Marcos ta gidualao'nè' niga, porque re'enda' gacalènè' nè'èdi'. ¹² Abia' mandado zio Tíquico ciudad Efeso. ¹³ Bè' bazao' ga zua' niga, yedelo' ciudad Troas tza'ziu' gaban quia' ta nuca'na' lidyí Carpo. Lèzi re'enda' tza'ziu' libro quia', pero racara purari tza'ziu' documento quia'.

¹⁴ Alejandro, ben' rue dyin conlè guíba, lega psaquenè' nè'èdi' bizinaquezi. Pues hue Diuzi lèbè' castigo. ¹⁵ Gapo' cuidado conlè lèbè', porque lega ruenè' contra xti'idza' Diuzi rguxogue'ro benè'.

¹⁶ Caora tanèro bia' defender cuina' lao yaca ben' rnabè', nunu gualè nè'èdi'. Yugojè' psanla'adyi'yaquè' nè'èdi' niga. Rulidza' Diuzi si'zenè' quieyaquè'. ¹⁷ Pero gualè Cristo nè'èdi', bènè' fuerza valor quia'. Bia' gan uidxogui'a yaca ben' binaca ben' Israel xti'idza' Diuzi. Yugojè' bzènegajè' xti'idza' Diuzi uidxogui'yaquè'. Cana' gualè Cristo nè'èdi' zè lasa caora cati guca zèdi quia'. ¹⁸ Pues huacalècazi Cristo nè'èdi' con biti'tezi tamala gaca quia'. Nezda' gapanè' nè'èdi' hasta dza huetzazulia' lèbè' guibá ga rnabè'nè'. Huero Diuzi ben' ze tuzioli. Amén.

Ni reyudyi di'idza' use'ela' Pablo lao Timoteo

¹⁹ Ugapo' diuzi Prisca, lënë' Aquilo, len familia quie Onesíforo. ²⁰ Nia' luë' napca'na' Trófilo ciudad Mileto dan' raca zhue'në'. Lëzi bega'nrë Erasto ciudad Corinto. ²¹ Huelo' dyabë' guido' na'a zatzu'uraro biu' ruen zaga. Lëscan' rugapa Eubulo, len Pudente, len Lino, len Claudio, len yaca los demás ben' nao xneza Jesús, luë' diuzi.

²² Rulidza' Señor quiero Jesucristo ta sulënë' luë' yugu dza. Lëscan' rulidza' Diuzi ta huela'iyané' yugulule. Amén.

GUICHI BÈ SAN PABLO APÓSTOL USE'ELA'NÈN LAO TITO

Ga rzulao guichi bè Pablo

¹ Nè'èdi', Pablo, naca' ben' rue dyin quie Diuzi. Lëscan' naca' apóstol quie Jesucristo, use'ela'nè' nè'èdi' ta gacalia' yaca ben' ulio Diuzi ta ineziaquë' ca naca tali quie xneza Jesús. ² Según ca naca xneza Jesús rbezaro idyin dza tzazulëro Diuzi gata' yela' neban quiero tuzioli. Tu binecue' yedyi layu una Diuzi gunnë' yela' neban quiero ra'o, yaca ben' nao xneza Jesús. Nacan tali ca unë', porque tali unanë' como binaca Diuzi ben' rzi' yè'. ³ Na'ra una Diuzi abdyn hora ineziro quie xti'idza'nè' por nun quie ben' rguixogue' len. Lëscan' Diuzi, ben' pte psela ra'o, ulionë' nè'èdi' ta tzetixogui'a xti'idza'nè' según cabë' mandado bënne' nè'èdi'. ⁴ Na'ra bia' guichi ni use'ela'n laolo' luë', Tito. Naco' ca zi'ina', dan' rnaorëlo' xneza Jesús cabë' nè'èdi'. Rulidza' Xuziro Diuzi lënë' Jesucristo, ben' pte psela ra'o, ta huela'iaquë' luë' cuëchiaquë' chizi lu'u guicho laxta'olo'.

Ni nan cabë' re'en Pablo hue Tito cati zunë' yaca yedyi nebaba Creta

⁵ Na'ra pca'na' luë' isla Creta ta useyudyo' quie asunto bega'n dza na'. Re'enda' huu' nombrar yaca ben' gapa dyin quie Diuzi tu tu yedyi cabë' di'idza' unia' luë' dza na'. ⁶ Pues yaca ben' gapa dyin quie Diuzi, bireya'ala' hueyaquë' bizinaquezi. Reya'ala' sulëjè' tuzi nigula quie quieyaquë'. Reya'ala' uzioñe'ejè' zi'iaquë' ta bihueyacabi' tamedian, lëscan' ta inaoyacabi' xneza Jesús dyë'èdi. Lëscana' reya'ala' uzioñe'ejè' zi'ijè' ta uzujabi' di'idza' quie xuziyacabi' len zna'yacabi'. ⁷ Lëscan' yaca ben' gapa dyin quie Diuzi, reya'ala' huejè' dya'a dyin quie Diuzi rueyaquë'. Bireya'ala' inabë'jè' ca cuendazi. Reya'ala' gacajè' ben' zela'adyi'. Bireya'ala' laidza'teyaquë'. Lëscan' bireya'ala' tajè' xudyiaquë' quilojè' dila. Bireya'ala' cuanjè' quie benë'. ⁸ Reya'ala' gapachi'jè' dyë'èdi ben' rdyin zan yu'u quieyaquë'. Bireya'ala' hueyaquë' tamedian. Reya'ala' tzu'uayaquë' pensari dya'a, gacajè' ben' huen, ben' bihue ta rnazin quie. ⁹ Reya'ala' inaoyaquë' du guicho du la'adyi'jè' xti'idza' Diuzi ca ta psëdindo' leyaquë'. Reya'ala' gacajè' benë' zela'adyi'. Reya'ala' usëdiyaquë' uzioñe'eyaquë' yaca ben' birnao xneza Jesús, yaca ben' rusebi' xti'idza' Diuzi rnayaquë' binacan tali con cabë' rnën.

¹⁰ Cana' re'ennan huero, porque nita' zë yaca ben' birale quie xti'idza' Diuzi, ben' rnë di'idza' tondo, ben' rzi' yè'. Nita' zë ben' Israel rueja cana'.

¹¹ Lëben' na' yebol'jè' cue'jè' chizi bira huejè' cana', porque ben' zë aptondojè' pensari quie, hasta yugu ben' naca tu cue' familia aptondojè' pensari quie. Rusëdiyaquë' benë' ta bireya'ala' usëdiyaquë' cuenda huejè' gan dumí, pero tamala ruejè'.

¹² Uzu tu ben' isla Creta tiempote unë' cani: "Ben' huëdi, ben' mala, naca ben' yedyi quia', ben' isla Creta. Rzi'yaquë' yè', raotzegueyaquë'." ¹³ Cana' unë' quie laguedyinë', pero tabalacazi unë' cana'. Quie lena' reya'ala' tilo'yaquë' dyë'èdi gula cuenda galejè' quie xti'idza' Diuzi ca reya'ala' galejè'.

¹⁴ Lëscan' yëbol'jè' ta bihuejè' cuenda quie cuento ta rnazi yaca ben' Israel de pensarizi quieyaquë'. Lëscan' yëbol'jè' bigalejè' quie ben' psebi'n di'idza' li quie Diuzi.

¹⁵ Yaca ben' nayëri laxta'ohue, rguiloayaquë' tadya'a, pero yaca ben' birnao xneza Jesús, yaca ben' binayëri laxta'ohue, rguiloayaquë' tamala. Lente

pensari yu'uyaquë' nacan pensari bayatza. ¹⁶ Nayaquë' raleyaquë' quie Diuzi, pero bē' nazijē' como dan' birueyaquë' tadya'a cabē' tadya'a re'en Diuzi hueyaquë'. Pues ratza Diuzi quieyaquë', dan' bire'enyaquë' hue quieyaquë' xti'idzē'. Nica nezijē' bi huejē' chan' re'enjē' huejē' tadya'a.

2

Yaca ben' quie Jesús, reya'ala' hue quieyaquë' xti'idza' Diuzi

¹ Ca ta usēdio' benē' reya'ala' inēn lēbizi conlē xti'idza' Diuzi. ² Yēbo' yaca be'mbyu gula de que reya'ala' yu'uyaquë' gracia, bitondoyaquë', gapajē' bala'ana, huejē' pensari. Reya'ala' inaojē' xneza Jesús du guicho du la'adyi'yaquë'. Reya'ala' idyē'ēyaquë' laguedyiaquë'. Reya'ala' sueyaquë' cati bi tu tazēdi de quieyaquë'. ³ Lēscan' yēbo' yaca nigula gula ta tayaquë' gapajē' Diuzi bala'ana. Yēbo'jē' ta bihue'lēyaquë' laguedyiaquë' di'idza' bižu, nica tayaquë' hue'e. La'acazi tajē', pero huejē' tadya'a. ⁴ Reya'ala' inēyueyaquë' ja nigula cuidi' ta hueyacabi' tadya'a, lēscan' ta idyē'ēyacabi' be'mbyu quieyacabi' len zi'iyacabi', ⁵ lēscan' ta tzu'uyacabi' pensari dya'a, lēscan' ta bigasilēyacabi' be'mbyu tula. Na' yēbo'yacabi' ta sulēyacabi' be'mbyu quieyacabi' dyē'ēdi, lēscan' ta usegulayacabi' zi'iyacabi' dyē'ēdi, lēscan' ta gacalēyacabi' laguedyiyacabi'. Pues ruen dyabē' uzuyacabi' di'idza' ca mandado rue be'mbyu quieyacabi' cuenda bibi dula' gata' quieyacabi' ina benē' condre xti'idza' Diuzi.

⁶ Lēscan' yēbo' yaca bi'byu cuidi' ta yu'uyacabi' gracia bitondoyacabi'. ⁷ Lēscan', luē', la'acazi tao', pero huelo' puro tahuen. Ca ben' yu'u gracia, ca ben' laxta'o yēri, cana' reya'ala' usēdio' yaca bi'byu cuidi'. ⁸ Reya'ala' hue'lēlo' benē' puro di'idza' dya'a tacuenda bigata' causa quio' gao benē' luē' xquia. Cana' huata'yela' stu' quie yaca ben' rue condre ra'o, porque yedue'yaquë' inajē' quiero nacaro ben' mala.

⁹ Lēscan' yēbo' yaca ben' nada'o de que reya'ala' galejē' quie xa'njē'. Yēbo'jē' bireya'ala' yeyēchojē' yedilalējē' xa'njē'. ¹⁰ Lēscan' yēbo'jē' ta bicuanyaquë' ta de quie xa'nyaquë'. Reya'ala' huerajē' huen gapachi'jē' ta de quie xa'njē' cuenda na' ilē'ē xa'nyaquë' leyaquë' ben' huen gula, ben' rue quie xti'idza' Diuzi.

¹¹ Pues bablu'e Diuzi ra'o naquë' ben' huen gula, rbezē' ute uselanē' nutezi ben' re'en inao xneza Jesús. ¹² Yela' ben' huen quienē' abzioñe'enē' ra'o ca re'ennē' usanro tamala, re'ennē' bira huero ta rnazin quiero. Bzioñe'enē' ra'o ca re'ennē' tzu'uro pensari huen, re'ennē' huero tadya'a, re'ennē' tzionla'adyi'ronē' dula'adyi'ro, re'ennē' inao xnezē' dza rdaro nabanro lao yedyi layu. ¹³ Lēscan' bzioñe'enē' ra'o ca re'ennē' cuezaro dza yeguida Jesucristo. Pues cuezaro yedaohuero dza cati uzu Diuzi di'idza' quienē' ca unē' huenē' quiero. Lēdza zaza'ra na' yeguida Diuzi quiero lēnē' zi'inē' Jesucristo, ben' pte psela ra'o. ¹⁴ Pues dza na'te, dza baode, psedyin Jesús cuinnē' lao na'a yaca benē' bēti lēbē'. Cana' bēnē' gutinē' ta gata' tahuen quiero. Cana' bēnē' pte pselanē' quiero ta bihue Diuzi ra'o castigo quie yela' mala quiero. Lēscan' udibinē' laxta'oro cuenda gacaro ben' laxta'o yēri, gacaro ben' quienē', tziro inao ro huero tahuen.

¹⁵ Cana' re'enda' usēdio' yaca los demás ben' quie Jesús. Reya'ala' ux-ela'adyo'jē' cati ruejē' tahuen, lēscan' reya'ala' tilo'jē' dyē'ēdi cati ruejē' tamala. Huu' dyabē' uzēnagajē' quio' cabē' yēbo'yaquë'.

3

Ni nan cabē' reya'ala' hue ja ben' nao xneza Jesús

¹ Yëbo' yaca ben' quie Jesús reya'ala' galejè' quie yaca ben' quie gobierno, ben' napa dyin, len quie ben' rnabè' quie yaca yedyi quieyaquè'. Reya'ala' sujè' dispuesto huejè' dyin dya'a ca mandado rue yaca ben' rnabè' quiejè'. ² Bireya'ala' udze'la'adyi'yaquè' benè'. Reya'ala' inita'lèjè' laguedy-ijè' dyè'èdi huejè' tadya'a gapala'njè' benè'.

³ Bigala'adyo' cabè' guca quiero dza na'. Gucaro ben' yaladyi', bigulero quie Diuzi. Guca bayèchi' gula quiero, bèro puro ta rnazin quiero. Beyula'adyi'ro bèro puro tamala, biuneziro huero tadya'a. Bežè'ro laguedyiro, bdiero laguedyiro, lëscan' bdieyaquè' ra'o. ⁴ Pero naca Diuzi ben' huen gula reyèchi'la'adyi'nè' nedyè'ènè' ben' nita' lao yedyi layu. ⁵ Bireya'ala' huero pensari chi pte psela Diuzi ra'o por nun quie dan' chi bèro tadya'a. Quele por nun quie dan' chi bèro tadya'a pte pselanè' ra'o, den' yela' ben' huen quienè' beyèchi'la'adyi'nè' ra'o pte pselanè' ra'o. Conlè nisa udibinè' laxta'oro becubinè'n. Lao na'a Bichi Be quienè' bènnè' quiero yela' neban cubi. ⁶ Lèzi lao na'a Señor quiero Jesucristo yu'u Bichi Be quie Diuzi lu'u guicho laxta'oro. ⁷ Cana' rue Diuzi quiero. Te beyudyi beži'ženè' quie dula' xquia quiero, na'tera gunnè' yela' naban quiero tuzioli. Lena' rbezaro gaca quiero.

⁸ Cabè' rnìa' ni nacan tali. Lena' re'enda' yëbo' yaca ben' quie Jesús huejè' dyabè' galeyauquè' quia' can' rnìa' cuenda huejè' tadya'a. Cabè' rnìa' ni nacan huen gacalèn le'e yugulule. ⁹ Bitzu'ulo' huedila huenè conlè yaca ben' rnè di'idza' tondo, ben' tzu'u huedila huenè quie yaca ben' unita' tiempote. Lëscan' bitzu'ulo' huedila huenè quie guichi ley pca'n Diuzi lao na'a Moisés. Huanitio' tiempo bibi zaca'n tzu'ulo' huedila huenè conlè leyaquè'.

¹⁰ Chi za' ben' re'en cuèchi ja partido entre yaca ben' nao xneza Jesús, reya'ala' tilo'jè' yëbo'jè' tu chopà lasa ta usanjè' bihuejè' cana'. Chi bi-ralejè' quio', bihue'lo'jè' lato guidayaquè' gan' rdupale ruele culto. ¹¹ Claro gula nacan aoquixiyaquè', huanao xquia banapajè' lèjè', huachugubè'na quieyaquè' lao Diuzi.

Rnaba Pablo tu cule lao Tito

¹² Na' ise'ela' Artemas o Tíquico ga zulo'. Caora abla'nè' ga zulo', huelo' dyabè' yeza'lo' yeguido' yedilaro ciudad Nicópolis, porque abia' pensari yega'na' ciudad Nicópolis biu' zaga. ¹³ Reya'ala' gacalao' Zenas, ben' sëlè benè', len Apolos chi bi ta idziogueyaquè' ta tzu'uyaquè' neza. ¹⁴ Tahuen na' hue yaca ben' bichiro, ben' nao xneza Jesús, tadya'a gacalèyaquè' ben' bibi de quie. Cana' biten cana'zi dza rdayaquè' lao yedyi layu.

Rugapa Pablo Tito diuzi

¹⁵ Yugulu ben' nita'lè nè'èdi' niga, rugapayaquè' luè' diuzi. Lëscan' ugapo' duizi yaca ben' zulè luè'. Nacayaquè' amigo quiero, ben' bichiro, ben' nao xneza Jesús. Rulidza' Diuzi huela'iyane' yugulule. Amén.

GUICHI NI BÈ ŞAN PABLO APÓSTOL USE'ELA'NÈ'N LAO FILEMÓN

Use'ela' Pablo guichi ni lao Filemón

¹ Nè'èdi', Pablo, dia' lu'u dyiguiba dan' bire'en yaca benè' quixogui'a di'idza' quie Cristo Jesús. Nè'èdi'lia' bichiro Timoteo use'ela'ndo' guichi ni laolo' luè', Filemón. Naco' tuzi len nètò', ben' rue dyin quie Diuzi. Nedyè'èndo' luè' ca ben' bichindo'. Lëscan' guichi ni use'ela'ndo' lao zanro Apia ² lente lao yugulu ben' redupa zan yu'u quio', ben' nao xneza Jesús. Lëscan' use'ela'ndo' guichi ni lao Arquipo. Nacarè Arquipo tuzi len ra'o, ben' rguixogue' di'idza' quie Diuzi. ³ Rulidza' Xuziro Diuzi lènè' Señor quiero Jesucristo ta huela'iaquè' le'e, cuèchiyaquè' chizi lu'u guicho laxta'ole.

Filemón rzudyi'ilènè' Diuzi nadyè'ènè' benè'

⁴ Yugo dza rëpa' Diuzi diuxcalenè' ⁵ nun quie na yaca benè' cabè' ruelo' naolo' du guicho du la'adyo' xneza Señor quiero Jesús nedyè'èlo' yaca los demás ben' quienè'. ⁶ Rulidza' Diuzi ta uzioñe'enè' luè' dyè'èdi ta inezo' cabè' tadya'a gula gata' quiero nun quie nacaro ben' quienè'. ⁷ Lega redaohuet-zegueda' zua' contento cabè' ruelo' nedyè'èlo' benè'. Xcalelo', bicha', dan' por nun quio' bare' chizi lu'u guicho laxta'o yaca ben' nao xneza Jesús.

Unaba Pablo tu cule lao Filemón

⁸ Dan' naca' apóstol quie Cristo, quie lena' napa' derecho hua' luè' mandado bi huelo', pero bihua' cana'. ⁹ Raxerada' inaba' tu cule laolo' nun quie nedyè'èlo' nè'èdi', lëscan' nedyè'èda' luè'.

Na'ra nè'èdi', Pablo, anaca' ben' gula dia' lu'u dyiguiba por nun quie dan' bire'en yaca benè' quixogui'a di'idza' quie Cristo Jesús, ¹⁰ rnaba' luè' huu' tu cule para Onésimo. Pues ca naca quie Onésimo ni, raqueda'nè' ca zi'ina', ben' rue quie xti'idza' Diuzi ta udixogui'anè' lu'u dyiguiba gan' dendo' niga. Lëlena' inaba' tu cule laolo' ta yezi'lo'nè' de criado quio' tatula.

¹¹ Biži dza na'la guca Onésimo ben' bibi zaca' len luè', pero na'a naquè' ben' zaca' len luè' len nè'èdi'. ¹² Biži na'a rese'ela'nè' tatula gan' quio' yeziu'nè' conlè ca nè'èdi'. ¹³ Gu'unda' yega'nnè' gacalènè' nè'èdi' lao lazo' dia' lu'u dyiguiba por nun quie dan' bire'en yaca benè' quixogui'a di'idza' la'ia quie Diuzi. ¹⁴ Pero chi bizulo' de acuerdo, bibi zucazi bi inia' ta yese'ela'nè' laolo' la fuerza. Re'enda' de gusto yeziu'nè'. ¹⁵ Huazaque' inaro beza' Onésimo lidyo' tu chi'zi tacuenda na'a yezulènè' luè' tuzioli. ¹⁶ Pero cala de criadozi yeziu'nè'. Reya'ala' yeziu'nè' ca ben' bicho', ben' nedyè'èlo'. Lega nedyè'èda'nè'. Lëscan' luè', reya'ala' idyè'èrèlo'nè' mazara ca nè'èdi'. Biidyè'èlo'nè' con ganzi, idyè'èlo'nè' ca nu ben' bicho', ben' nao xneza Jesucristo.

¹⁷ Ca naca na'a, chi luè' nuelo' nè'èdi' tuzi, bezi'nè' cabè' beziu' nè'èdi'.

¹⁸ Chi bizinaquezi babènè' lènè' luè', o chi reya'ala'nè' quio', nè'èdi' yeguižuga'n.

¹⁹ Nè'èdi', Pablo, bzua' letra lè'è guichi ni conlè na'a ta xela'adyo' huaguižuga'n. Bigala'adyo' ca cule bia' quio' udixogui'a luè' xti'idza' Diuzi. ²⁰ Bicha' huu' tu cule, rnaba' luè' como ca ben' rnaorè xneza Jesús, yeyuežela'adyo' nè'èdi' como ca ben' bicha', ben' quie Cristo.

²¹ Rse'ela' guichi ni laolo' dan' nezda' huu' cabë' inia' luë' huelo' quia'. Pues nezda' huelo' mazara cabë' inia' huelo'. ²² Dera re'enda' huelo' quia', chi huu' cule, ucuezo' posada quia', porque rbeza' dza ise'ela' Diuzi në'ëdi' ideyuba' le'e con cabë' rnabale quia' lao Diuzi.

Yaca ben' laguedyi Pablo, rugapayaquë' diuzi Filemón

²³ Epafra, ben' derë lu'u dyiguiba len në'ëdi' nun quie dan' rguixogue'ndo' xti'idza' Diuzi, rugaparënë' luë' diuzi. ²⁴ Lëscan' Marcos, len Aristarco, len Demas, len Lucas, rugaparëyaquë' luë' diuzi. Dyë'ëdi' racalëyaquë' në'ëdi' rua' dyin quie Diuzi. ²⁵ Rulidza' Señor quiero Jesucristo ta huela'iyänë' le'e. Amén.

DI'IDZA' LA'IYA QUIE DIUZI TA USE'ELA'YAQUË' LAO BEN' HEBREO

Use'ela' Diuzi zi'inë' ta quixogue'në' ra'o

¹ Tazë lasa, tazë modo, use'ela' Diuzi tiempote ben' naca profeta ta quixogue'jë' xuzixta'oro quie pensari quienë'. ² Pero dza na'a, dza reyudyi quie tiempo gula, use'elë' zi'inë' ta quixogue'në' ra'o quie pensari quienë'. Conlë zi'inë' bzalonë' duze yedyi layu, apca'nnë' yugulu ta de lao na'a zi'inë'. ³ Cabë' naca Diuzi ben' ze, ben' la'iya, cabë' na' nacaré zi'inë' ben' ze, ben' la'iya. Tuzi ca naca Diuzi lënë' zi'inë'. Lëzi'inë' na' r nabë'në' lao yugulu ta dyia guibá len yugulu ta de lao dyilayu conlë fuerza valor quie di'idza' quienë'. Bë' beyudyi udubanë' dula' xquia quiero, cana' bedyinnë' yere'në' r nabë'në' zaca' yebë ga zu Diuzi guibá.

Nacara zi'i Diuzi ben' r nabë'ra ca yaca ángel

⁴ Quie lena' nacara zi'i Diuzi ben' r nabë'ra ca yaca ángel. Pca'n Diuzi lëbë' re'në' ga nacatera belao ca yaca ángel. ⁵ Porque ni tu lasa bigudyi Diuzi tu ángel ca unë' gudyinë' Cristo cani:

Luë' naco' zi'ina'.

Abdyin dza ulu'ena' yaca ben' nita' lao yedyi layu luë' zi'ina'.

Lëscan' ni tu yaca ángel bigudyi Diuzi lëbë' ca unë' quie Cristo cani:

Në'ëdi' naca' Xuzinë'.

Lëbë' naquë' zi'ina'.

⁶ Pero cati use'elë' zi'inë' bidanë' lao yedyi layu, naquë' ben' bazucazi cati binecue' yedyi layu, cana' unë' cani:

Re'enda' yugulu yaca ángel gapajë' lëbë' bala'ana.

⁷ Quie yaca ángel una Diuzi cani:

Rse'ela' ja ángel quia' cabë' rse'ela'be.

Rua' mandado ja ben' rue dyin quia' cabë' rua' mandado gui' ta ženan.

⁸ Pero quie zi'inë' una Diuzi cani:

Luë', Diuzi, inabë'lo' tuzioli.

Puro ta yu'u ni'a xnezi ruelo' inabë'lo'.

⁹ Puro ta naca tali raxelo' huelo'.

Rudielo' ta binaca tali.

Quie lena' në'ëdi', Diuzi quio', bia' tuzo' luë' ben' r nabë'ra ca ben' tula.

¹⁰ Lëscan' una Diuzi rëbinë' zi'inë' cani:

Luë', Señor, bzalolo' uduxulo' yedyi layu dza na'te.

Dyin bëlo' len ni'a na'alo' bëlo' guibá.

¹¹ Ca naca yedyi layu len guibá, hueyudyi huedu quien, huagulan ca quie la'ari'.

Pero luë', biyeyudyi yedu quio'.

¹² Cabë' ruzapa benë' gaban quiejë', cana' uzapalo' yedyi layu len guibá dza zaza'ra.

Cabë' rutza' benë' zabajë', cana' utza'lo' yedyi layu len guibá dza zaza'ra.

Pero luë', tuzicazi ca naco' tuzioli, biyeyudyi yedu yela' neban quio'.

Cana' una Diuzi. ¹³ Lëscan' ni tu lasa bigudyi Diuzi tu ángel ca unë' gudyinë' Cristo cani:

Ure' cuëta' zaquë' yebë niga, hasta idyin dza cuëcha' xni'alo' yaca ben' rudie luë'.

Cana' una Diuzi. ¹⁴ Na'ra naca yaca ángel bichi bezi, ben' rue ca mandado rue Diuzi. Rse'ela' Diuzi lějě' ta gacalějě' ben' de yela' neban quie tuzioli.

2

Reya'ala' hue quiero ca na Diuzi

¹ Quie lena' reya'ala' hue quiero xti'idza' Diuzi ta babero cuenda biu-sanla'adyi'ro inaoro xneza Cristo. ² Nacan tali ca na xti'idza' Diuzi ta udixogue' yaca ángel dza na'te. Bě Diuzi castigo nu ben' bē dula' xquia bigulejě' quie xti'idzě'. Bě Diuzi lějě' tu castigo cabě' reya'ala' gaca quiejě'. ³ ¿Bizi huero ta bihue Diuzi ra'o castigo chi caora cati bēnně' ra'o yela' neban tuzioli, na'ra bihue quiero di'idza' quieně'? Pues taněro udixogue' cuin Jesús cabě' rue Diuzi uselaně' beně' yeyojě' guibá. Na'tera quie ben' bzēnaga cabě' udixogue'ně', gucabě'yaquě' nacan tali, na'tera lějě' udixogue'jě' ra'o. ⁴ Lěscan' Diuzi, zē lasa bēnē' yela' milagro quieně', bēnē' seña, bēnē' ta beban ja beně' tacuenda ineziyaquě' nacan tali di'idza' unaně'. Tazē modo bēnē' use'elē' Bichi Be quieně' ta gacalēnē' ra'o con ca raxe Diuzi hueně' quiero.

Guca Jesucristo beně' cabě' naca beně', ben' nao xnezě'

⁵ Lěscan' bibě' Diuzi yela' r nabě' quieně' yaca ángel ta inabě'jě' lao yedyi layu cubi ta zaza'ra. Quie lěyedyi na' rnando'. ⁶ Na'ra zu tu parte lě'ě guichi la'iya quie Diuzi ga rnan cani:

¿Cabiži naca quie yaca ben' rda lao yedyi layu, chi luě' Diuzi, reyěchi'la'adyo' leyaquě'?

¿Cabiži naca quie yaca ben' nita' lao yedyi layu, chi luě' Diuzi, raquelo' bi raca quieyaquě'?

⁷ Dyin bēlo' luě' bzulo' ja beně' ledao'zi menosra ca ja ángel, pero tu chi'zi. Pero udapo' lějě' bala'ana.

⁸ Bēlo'jě' mandado inabě'jě' lao yugulute ta de lao yedyi layu.

Cana' rnan lě'ě guichi la'iya quie Diuzi. Na'ra cati bē Diuzi mandado inabě' ja beně' lao yugulute ta de lao yedyi layu, bipca'nně' tzala'la ni tu ta bigalen quiejě'. Pero neziro binedyin dza ta galen quiejě' yugulu ta de lao yedyi layu.

⁹ Lěscan' neziro cabě' bē Diuzi conlě Jesús. Bēnē' mandado gaca Jesús ledao'zi menosra ca yaca ángel, pero tu chi'zi. Yela' nedyě'ě quie Diuzi bēnē' mandado guti Jesús lao laza yugulu beně'. Na'ra nue Diuzi lěbē' ben' belaoratzegue, ben' bala'ana gula nun quie dan' bedzagalaoně' gutině' lě'ě yaga cruzo.

¹⁰ Yugulu ta de bē bzalo Diuzi naque quieně'. Re'en Diuzi yeyo yugulu ben' nao xnezě' guibá ga zuě'. Quie lena' bēnē' mandado bedzagalao Jesucristo cuenda ulu'en dyě'ēdi naca Cristo ben' bide dula' xquia quie, huazueně' gatině' lě'ě yaga cruzo ta uselaně' yaca beněchi'. ¹¹ Porque Cristo len ben' nao xnezě', naca tuzi Xuzijě'. Nacajě' ben' la'iya nun quie dan' bēla'iya Cristo lějě'. Quie lena' biredue' zi'i Diuzi yēbině' ra'o: "Nacale ben' bicha'." ¹² Lena' rnēn lě'ě guichi la'iya quie Diuzi cani:

Huěpa' ja ben' bicha' cabě' ben' ze gula naca Diuzi.

Gula' ja himno quieně' ga redupa ja beně'.

¹³ Lěscan' rnēn cani lě'ě guichi la'iya:

Ně'ēdi' rzudyi'ilia' Diuzi.

Lěscan' rnēn cani:

Ni zulia' ben' bicha', ben' nao xneza', ben' ben Diuzi nē'ēdi'.

¹⁴ Cabě' naca quie ben' nao xneza Cristo, nacajě' beně' yudzujě' ren nacajě' bē'ēla' žuba', lěscan' nacarē quie Jesús. Lěbē' guquě' beně', yudzureně' ren nacareně' bē'ēla' žuba' cuenda gatině' lě'ě yaga cruzo ta udyiaguině' ben'

rudiyagui' benëchi', ta inaro, xan' taxi'ibi'. ¹⁵ Dyin bē Cristo naca ben' nao xnezē' libre. Bira rdzebijē' gatijē'. Catī dza rdajē' lao yedyi layu, cana' bdzebijē' gatijē', guca quiejē' ca quie ben' zu lao xa'ne mala gula tu lala dza zujē' lao yedyi layu. ¹⁶ Pues bibida Cristo lao yedyi layu ta gacalēnē' yaca āngel, dechan' bidē' ta gacalēnē' yaca ben' naca zi'isuba Abraham, ta inaro, ben' nao xnezē'. ¹⁷ Quie lena' ben' zi guque' benē' cabē' naca benē', ben' nao xnezē', ben' bichinē'. Cana' saque' gapē' dyin gaquē' pxuzi r nabē'ra lao Diuzi. Cana' uzucazinē' di'idza' una Diuzi huenē'. Cana' saque' yeyēchi'la'adyi'nē' dyē'ēdi yaca benēchi'. Cana' saque' cubanē' dula' xquia quiejē'. Cana' saque' hueljē' Diuzi tuže. ¹⁸ Nun quie bedzagalao Cristo guquē' prueba bipsannē' bēnē' cabē' mandado bē Diuzi huenē'. Cana' huazaque'nē' gacalēnē' dyē'ēdi nu ben' nao xnezē', ben' raca prueba.

3

Naca Jesús ben' r nabē'ra ca Moisés

¹ Na'ra, bicha', nacale ben' la'iya. Lena' rnia' le'e como dan' ulio Diuzi le'e gacale ben' quienē'. Quie lena' reya'ala' huele pensari dyē'ēdi cabē' naca quie Cristo Jesús. Naquē' ben' use'ela' Diuzi. Naquē' pxuzi r nabē'ra quiero ra'o ben' nao xnezē'. Cana' naquē' quiero. Cana' naca cabē' rue quiero quienē' yuguluro, naca tuzi cabē' rue quiero quienē'. ² Bdē' Diuzi Jesús use'elē' lēbē' gaquē' pxuzi r nabē'ra quiero. Bzucazi Jesús di'idza' ca di'idza' gudyi Diuzi lēbē' huenē'. Lēscan' Moisés, bzurēcazinē' di'idza' ca di'idza' gudyi Diuzi lēbē' ta gacalēnē' ben' quie Diuzi unita' dza na', ta inaro, yaca ben' Israel, ben' naca familia quie Diuzi. ³ Pero nacara Jesús ben' r nabē'ra ca Moisés. Ca quie nacara ben' uzulao rue familia ben' r nabē'ra ca zi'inē', cana' nacara Jesús ben' r nabē'ra ca Moisés. ⁴ Quie yugulu familia unita' ben' uzulao bē ta unita' zi'inē'. Pero Diuzi uzulaonē' bēnē' yugulu ta de. ⁵ Quie lena' Moisés, como ben' rue mandado quie Diuzi, bzucazinē' di'idza' ca di'idza' gudyi Diuzi lēbē' gacalēnē' ben' quie Diuzi unita' dza na', ta inaro, yaca ben' Israel, ben' naca familia quie Diuzi. Guca dyin quie Moisés udixogue'nē' lējē' ca di'idza' una Diuzi cabē' ta gaca dza zaza'ra. ⁶ Lēscan' bzucazi Cristo di'idza' ca di'idza' gudyi Diuzi lēbē'. Pero netza' cabē' naca quie Cristo, porque nun quie naquē' zi'i Diuzi racalēnē' ra'o, ben' nao xnezē' nacaro familia quie Diuzi. Cana' naca quiero chi inaooro xnezē' du guicho du la'adyi'ro, chi biusanla'adyi'ro sudyi'lēro lēbē', chi suro gusto cuezaro dyē'ēdi hasta dza gatiro.

Cabē' una Diuzi quie ben' quienē', ben' yeyo ga zuē' yezila'adyi'nē'.

⁷ Quie lena' naca quiero cabē' una Bichi Be quie Diuzi dza na'. Lena' rnēn lē'ē guichi la'iya quie Diuzi cani:

Na'adza, chi tali rele bi na Diuzi le'e,

⁸ bigacale ben' laxta'o zidi, cabē' bē bala ben' unita' dza na' ptza'jē' Diuzi.

Bējē' Diuzi zēdi hasta beyudyi paciencia quienē', cati dza udajē' lao lato dachi.

Lena' una Bichi Be quie Diuzi gudyinē' lējē' cani:

⁹ Lao lato na' bē xuzixta'ole nē'ēdi' zēdi hasta beyudyi paciencia quia'.

Cana' bējē' la'acazi blē'ējē' cabē' tahuen bia' quiejē' lao chopa galo iza.

¹⁰ Quie lena' bdzē'ēda' lējē', gucha' jē': "La'acazi nezile ca re'enda' huele, pero bire'enle huele ca re'enda'. Bire'enle huebē'le xneza'."

¹¹ Quie lena' bdzē'ēda' lējē' uchugulia' quiejē' bzētoga' laohua' unia': "Bigu-idajē' ga zua' yezila'adyi'jē'."

Cana' una Bichi Be quie Diuzi dza na'.

¹² Bicha', gapale cuidado bigacale ben' laxta'o yaladyi' usanla'adyi'le xneza Diuzi nun quie dan' bihue quiele quienë'. ¹³ Mejorla hue'lële laguedy-ile di'idza' zela'adyi' yugu dza tu nede lato. Cana' reya'ala' huele cuenda bihue dula' xquia quiele le'e gan, na' huele condre Diuzi. ¹⁴ Porque chi inaoro xneza Cristo biidzebiro biusanla'adyi'ro sudyi'ilëronë' dyë'ëdi, na'ra nacaro ben' quienë'. Cabë' bëro tanëro cati uzulaoro unaoro xnezë', cana' re'ennë' huero hasta dza cati gatiro. ¹⁵ Lena' rnën lë'ë guichi la'iya quie Diuzi cani:

Na'adza, chi tali rele bi na Diuzi le'e, bigacale ben' laxta'o zidi cabë' bë bala ben' unita' dza na' ptza'jë' Diuzi.

Cana' rnën lë'ë guichi la'iya quie Diuzi. ¹⁶ Na' inaba' le'e tu di'idza'. ¿Nuži ja ben' bzënaga xti'idza' Diuzi, na' ude beyudyi bzënegajë' xti'idzë', caora na' ptza'jë' lëbë'? Pues yaca ben' yedyi quie Moisés, ben' Israel, ben' uliogüë' nación Egipto, lëjë' bëjë' cana'. ¹⁷ Lëscan' inaba' le'e: ¿Nuži ja ben' bdza' Diuzi lao chopo galo iza? Pues yaca ben' bë dula' xquia. Quie lena' bdza' Diuzi lëjë' gutijë' lao lato dachi. ¹⁸ Lëscan', ¿nuži ja ben' uchuguli Diuzi quie, bzëtoguë' laohuë' unë' biguidajë' ga zuë' yezila'adyi'jë'? Pues yaca ben' bibë quie quie Diuzi, lëjë' uchugulinë'. ¹⁹ Na'ra blë'ëro cabë' guca quiejë' biuzaque' yeyojë' ga zu Diuzi como dan' bibë quiejë' quie Diuzi.

4

¹ Quie lena' tu raca neregänlë Diuzi ra'o di'idza' ta yeyoro ga zuë' yezila'adyi'ro, reya'ala' gapale cuidado ta hue quiele quie Diuzi, yela' na' yeyole ga zunë' yezila'adyi'le. ² Porque cabë' udixoguë' Diuzi yaca ben' unita' tiempote cabë' bënë' quiejë' ta yeyojë' guibá, lëscan' udixoguë'rënë' ra'o. Pero para lëjë' biben sirve bzënegajë' xti'idza' Diuzi, porque tu bzënegazijë'n bibëjë' casa hue quiejë' xti'idza' Diuzi. ³ Pero ra'o, ben' nao xneza Cristo, hueyoro ga zu Diuzi ta yezila'adyi'ro dza gatiro. Bigaca quiero cabë' una Diuzi lë'ë guichi la'iya quienë' cani:

Quie lena' bdzë'ëda' lëjë', uchugulia' quiejë' bzëtoga' laohua' unia' biguidajë' ga zua' yezila'adyi'jë'.

Cana' una Diuzi dza na'te. Pero cala bibë Diuzi ga guidajë' yezila'adyi'jë', como dan' nugaohue Diuzi dyin quienë' bënë' dza cati udixunë' yedyi layu.

⁴ Zu ga rguixogue'n ra'o lë'ë guichi la'iya quie Diuzi cabë' bë Diuzi quie dza gadyi. Rnën cani:

Pseyudyi Diuzi dyin quienë' lao xopa dza.

Na'ra dza gadyi bezila'adyi'në'.

⁵ Lëscan' zu ga rnën lë'ë guichi la'iya quie Diuzi cani:

Biguidajë' ga zua' yezila'adyi'jë'.

Cana' una Diuzi dza na'. ⁶ Pero neracara falta yaca ben' yeyo yezila'adyi' ga zu Diuzi. Na'ra yaca ben' unita' tiempote, ben' bzënaga xti'idza' Diuzi ca unë' gudyinë' lëjë' cabë' bënë' quiejë' ta yeyojë' guibá, pero bibë quiejë' xti'idza' Diuzi, na' biuyojë' ga zu Diuzi ta yezila'adyi'jë'. ⁷ Quie lena' bzu Diuzi itu tiempo cati reya'ala' hue quiero quie xti'idza'në'. Lëtiempo na' nacan na'adza. Cana' nacan cabë' una rey David dza na'te, dza unita' ben' unita' ja tiempote. Cabë' una Diuzi, cana' una rey David con ca rguixogue'n ra'o lë'ë guichi la'iya quie Diuzi cani:

Na'adza, chi rele bi na Diuzi le'e, bigacale ben' laxta'o zidi.

Cana' una Diuzi dza na'. ⁸ Chi tali lao na'a Josué uyo yaca ben' unita' tiempote guibá bezila'adyi'jë', na' biina Diuzi quie tiempo zaza'ra. ⁹ Lena' neziro

neza'ra dza yeyo yaca ben' nao xneza Jesús guibá yezila'adyi'jè'. ¹⁰ Na'ra cati yeyoro ga zu Diuzi yezila'adyi'ro, bira sacazi'ro huero dyin. Gaca quiero yezila'adyi'ro cabè' bezila'adyi' Diuzi dza na' cati beyudyi bzalonè' yedyi layu. ¹¹ Quie lena' reya'ala' inaoro xneza Cristo du guicho du la'adyi'ro ta yeyoro ga zuè' yezila'adyi'ro. Reya'ala' gaparo cuidado nu nu hue cabè' bè ja ben' unita' tiempote, bibè quieyaquè' xti'idza' Diuzi.

¹² Cabè' naca Diuzi ben' zu neban tuzioli, cabè' na' nacaré xti'idzè'. Cabè' naca Diuzi ben' de yela' huaca quie, cabè' na' nacaré xti'idzè'. Tzu'ura xti'idzè' guicho laxta'oro zitu'ra ca tu espada neduchi'n rupalaona. Tzu'uteran ra'o zitu' ga yu'u bichi be quiero. Tzu'uteran ra'o zitu' ga zelaozi ga yu'u pensari quiero. Rulu'en ca naca pensari yu'u lu'u guicho laxta'oro, chi pensari huen, chi pensari mala. ¹³ Ni tu ta bè Diuzi bisaque' ucachi'laona lao Diuzi. Rlè'è Diuzi yugulu ca ruero. Bisaque' igachi' ca naca quiero laohué'. Lao lèbè' yezacalao yugulu cabè' babèro, chi bèro tahuen, chi bèro tamala.

Naca Jesús pxuzi r nabè'ra quiero

¹⁴ Jesús, zi'i Diuzi, naquè' pxuzi r nabè'ra quiero, baziyoguè' guibá ga zu Diuzi. Quie lena' reya'ala' huero seguir biyehuèdiro inaoro xneza Cristo. ¹⁵ Na'ra Cristo racanè' reyèchi'la'adyi'nè' ra'o como dan' lèbè' cuinnè' guquè' prueba dza na', chi huenè' tamala, chi bihuenè' tamala, cabè' raca quiero racaro prueba, pero lèbè' bibè'nè' tamala. ¹⁶ Quie lena' reya'ala' hue quiero xti'idza' Diuzi du guicho du la'adyi'ro, biidzebiro hue'lèro lèbè' di'idza' nun quie zunè' dispuesto gacalènè' ra'o, re'nè' xlatonè' guibá ga r nabè'teranè' ra'o. Chi huero cana', yeyèchi'la'adyi'nè' ra'o gacalènè' ra'o hora cati raca zèdi quiero.

5

¹ Rbio yaca benè' nu ben' gaca pxuzi r nabè'ra quiejè' de entre laguedyijè' ta tzesènè' lao Diuzi lao lazajè'. Lèscan' nacan dyin quienè' gutinè' yaca bia naca gun quie Diuzi udyianè'ba' lao ru'aba cuenda yezi'ze Diuzi dula' xquia quiejè'. ² Na'ra como benè'zi naca pxuzi r nabè'ra, derè dula' xquia quienè'. Quie lena' nezinè' yeyèchi'la'adyi'nè' ben' binenezi, ben' birue quie xti'idza' Diuzi. ³ Lèscan' nun quie derè dula' xquia quienè', tanèro ruen zi gutinè' tu bia udyianè'ba' lao ru'aba cuenda yezi'ze Diuzi dula' xquia quienè' cuinnè', na'tera huazaquè' udyianè' ituba' lao ru'aba cuenda yezi'ze Diuzi dula' xquia quie ja ben' yedyi quienè'.

⁴ Nitu nitu bisaque'nè' huenè' cuinnè' pxuzi r nabè'ra. Dechan' Diuzi cuioguè' nu ben' huenè' bala'ana, huenè' pxuzi r nabè'ra. Cabè' bè Diuzi tiempote ulioguè' Aarón pxuzi r nabè'ra, cana' cuio Diuzi nu ben' gaca pxuzi r nabè'ra. ⁵ Lèscanarè' guca quie Cristo. Quele ulionè' cuinnè' pxuzi r nabè'ra, dechan' Diuzi udapè' lèbè' bala'ana, ulionè' lèbè' naquè' pxuzi r nabè'ra con ca una Diuzi caniga:

Luè' naco' zi'ina', abdyin dza inezi ja benèchi' zi'ina' luè'.

⁶ Lèscan' zurè itu parte lè'è guichi la'iya quie Diuzi ga una Diuzi rèbinè' lèbè': Luè' naco' pxuzi tuzioli, ca pxuzi guca Melquisedec tiempote, cana' naco' pxuzi.

⁷ Cana' una Diuzi. Na'ra dza uda Cristo lao yedyi layu, caora na' unè' zidzo blidzanè' Diuzi uredyinè' unabànè' Diuzi ta gacalènè' lèbè', como dan' naca Diuzi ben' napa poder ta ucuasa ucuionè' lèbè', biguti ja benè' lèbè'. Na' como zu Cristo dispuesto ta huenè' ca re'en Diuzi huenè', benè' lèbè' cati blidzanè' lèbè' gualènè' lèbè'. ⁸ La'acazi naca Cristo zi'i Diuzi, ben zi bedzagalaonè' cuenda ulu'en quienè' huazuenè' hue quienè' xti'idza' Diuzi

la'acazi raca zëdi gula quienë'. ⁹ Cati bablu'en quienë' huazuenë', na'ra guquë' ben' run yela' neban tuzioli quie ja ben' nao xnezë'. ¹⁰ Bde' Diuzi lëbë' pxuzi rnabë'ra quiero. Ca pxuzi guca Melquisedec tiempote, cana' naquë' pxuzi.

Nacan zudyi usanla'adyi'ro bira inaoro xneza Cristo

¹¹ Di'idza' zëra de ta inando' le'e cabë' naca quie Cristo, pero zëdi nacan ta uxi'idze'ndo' le'e, porque canezi rioñe'ele. ¹² Como baziote tiempo banez-cazile cabë' una Diuzi, lena' reya'ala' uxi'idze'le yaca ben' tula cabë' unanë'. Pero neruen zi quiele yexi'idze'ndo' le'e tatula ta nacan yalo quie xti'idza' Diuzi. Abeyaca quiele ca quie xcuidi'. Puro ta nacan yalo quie xti'idza' Diuzi re'enle uxi'idze' benë' le'e. Binegacale uxi'idze' benë' le'e ta naca zëdi quie xti'idza' Diuzi. ¹³ Yaca ben' binegaca tzioñe'le ta naca zëdi quie xti'idza' Diuzi, nacajë' ca quie xcuidi' nera'adyi'. Binetzu'ulaojë' hue quieyaquë' dyë'ëdi quie xti'idza' Diuzi. ¹⁴ Pero ta naca zëdi quie xti'idza' Diuzi, nacan para ben' huaca, ben' bayulao rue quie xti'idza' Diuzi, como dan' banezinë' rnaonë' tahuen, birnaonë' tamala.

6

¹ Quie lena' huero seguir usëdiro ta tzioñe'ero mazara cabë' reya'ala' tzioñe'ero ta hue quiero xti'idza' Diuzi mazara. Bira usëdiro puro ta baoyoñe'ero dza na' cati uzulaoro unaoro xneza Cristo. Banezile cabë' rguixogue' xti'idza' Diuzi, rguixogue'n cabë' reya'ala' utza'ro pensari quiero bira huero xquia, rguixogue'n cabë' reya'ala' hue quiero xti'idza' Diuzi, ² rguixogue'n quie bautismo, rguixogue'n cabë' huero uquichiro na'aro lao guicho ben' nao xneza Cristo, ben' gapa dyin cati dza sulaonë' gapanë' dyin. Lëscan' rguixogue'n cabë' naca quie ben' huati huebanjë', rguixogue'n quie dza gaca juicio. ³ Pues huero seguir usëdiro tzioñe'ero mazara como cana' re'en Diuzi huero.

⁴ Cana' reya'ala' huero, porque chi babeyue Diuzi ra'o ben' cubi, chi baozulaoro si'ro ca ta run Diuzi ra'o, chi bayu'uro Bichi Be quienë', ⁵ chi baozulaoro usëdiro tzioñe'ero cabë' na di'idza' quienë', chi baozulaoro usëdiro tzioñe'ero quie yela' huaca gata' quiero dza cati taro lao dyila yu cubi ta zaza'ra, ⁶ chi chu'unro tzala'la ca una Diuzi, chi bira inaoro xnezë', na'ra bisaque' yeyue Diuzi ra'o ben' cubi tatula yetza'ro pensari quiero tatula. Chi huero cana', naca quiero ca quie ben' uda' zi'i Diuzi lë'e yaga cruzo tatula, utitoronë' zaquë'lao lao ja benë'. ⁷ Chi huero cana', naca quiero ca quie layu ri'on nisa cati ruen nisayo. Chi hue'n usecho huen quie ben' raza ra'n laona, na'ra layu dya'a na', huela'iya Diuzi len. ⁸ Pero chi hue'n puro guixi', nacan layu mala bibi zaca'n. Ruen zudyi udze'de' Diuzi len, hueyudyi huedu quien tzeina.

Naca seguro quiero lao Diuzi

⁹ La' acazi inando' le'e cana', le'e bicha', ben' nedyë'ëda', quie le'e nužela'adyi'ndo' huela'iya Diuzi le'e, rnaole neza ta yeyole guibá. ¹⁰ Naca Diuzi ben' rue puro ta yu'u ni'a xnezi. Bigala'adyi'në' cabë' bële dza na' blu'ele cabë' nedyë'ële gucalële ja ben' bichiro, ben' nao xneza Cristo. Lëscan' nezi Diuzi neruele na'a cabë' bële dza na'. ¹¹ Na'ra nëto' re'enndo' huele seguir yugulule inaole xneza Cristo du guicho du la'adyi'le hasta dza cati gatile nužela'adyi'le gun Diuzi le'e ca ta rbezale gunnë' le'e. ¹² Bire'enndo' yehuëdile, re'enndo' huele seguir huele cabë' rue yaca los demás ben' nao xneza Cristo. Nun quie rue quiejë' ca na Diuzi, redaohuejë' rbezajë' dyë'ëdi dza hue' Diuzi lëjë' cabë' di'idza' bega'nlënë' lëjë'. ¹³ Na'ra quie dza cati bega'nlë Diuzi Abraham di'idza', bgunte Diuzi cuinnë' huenë' ca unë' huenë',

como dan' ganura ben' tula zu nacara ben' r nabē'ra ca lēbē' ta uguntēnē' laohue. ¹⁴ Na'ra unē' rēbinē' Abraham: “Talicazi inia' luē', huela'ia' luē' taže, hueže ži'isubo'.” Cana' una Diuzi gudyinē' lēbē'. ¹⁵ Pues dyē'ēdi uleza Abraham dza hue Diuzi cabē' unanē' huenē' quienē'. Na'ra cati bdyin dza, bēcazi Diuzi cabē' unanē' huenē' quienē'. ¹⁶ Cati rugunte ja benē', ruguntejē' lao Diuzi. Cati raca dila binaca lēbi ca rnajē' lao ben' r nabē', na'ra ruguntejē' lao Diuzi nacan tali ca rnajē'. ¹⁷ Lēscan' Diuzi, bgu'untēnē' dza na' laohuē' cuinnē' unē' nacan tali ca unanē'. Gu'unnē' blu'enē' dyē'ēdi zuē' dispuesto uzunē' di'idza' ca di'idza' unē', bibetza'nē' ca unē' huenē'. Quie ben' bega'nlē Diuzi di'idza', lēben' na' ablu'e Diuzi seguro na' huenē' ca unē' huenē'. ¹⁸ Naca chopa ta rue Diuzi bisaque' itza'n. Bisaque' itza'n ca unē' huenē'. Lēscan' bisaque' itza'n ca bgu'untēnē' laohuē' cuinnē' huenē'. Bisi' Diuzi yē'. Dan' cana' rue Diuzi, lena' uxela'adyi'n ra'o taže. Cana' raca quiero, ben' rnaba lao Diuzi, ta huia ina'nē' ra'o. Cana' raca quiero, ben' rzudyi'ile Diuzi, nužela'adyi'ro hue Diuzi quiero cabē' unē' huenē' quiero. ¹⁹ Naca seguro quiero lao Diuzi cabē' naca seguro quie nu barco nerio len tu guība naca ži'i gula, bisaque' udyiga be len tzala'la. Cana' naca quiero huazaque' yeyu'utero hasta ga zu Diuzi guibá. ²⁰ Lēgan' na' naca ga uyu'u Jesús, psalonē' neza quiero cuenda saque' yeyu'urēro ga beyu'unē' guibá. Cana' naca quie Jesús, naquē' pxuzi r nabē'ra quiero tuzioli cabē' pxuzi guca Melquisedec dza na'.

7

Naca Jesús pxuzi ca pxuzi guca Melquisedec

¹ Lēben' lao Melquisedec guquē' rey quie ciudad Salem. Lēscan' guquē' pxuzi, ben' rue mandado quie Diuzi quiero, ben' zu sibi. Na' cati bedyin Abraham, uyoguē' lao dila, bēnē' gan lao yaca rey. Caora na' bro Melquisedec ptilē' lēbē' bēla'ianē' lēbē'. ² Na' bē' Abraham Melquisedec tu cue'na quie lao chi cue' yugulu ta bēnē' gan uyoguē' lao dila. Na'ra cabē' laohuē', laohuē' Melquisedec, ta inaro xti'idza'ro: “Ben' naca rey, ben' rue ta yu'u ni'a xnezi.” Lēscan' como guquē' rey quie ciudad Salem, ta inaro xti'idza'ro: “Yela' ruela'ia quie Diuzi”, quie lena' rnērē' laohuē' xti'idza'ro: “Ben' naca rey, ben' rue yela' ruela'ia quie Diuzi.” ³ Lē'ē guichi la'ia quie Diuzi birguixogue'n ra'o quie xuzi žna'nē', ni quie xuzixta'onē'. Birguixogue'n quie dza golonē', ni quie dza gutinē'. Naquē' ca que ži'i Diuzi, naquē' pxuzi tuzioli.

⁴ Na'ra ulehuecara pensari ca tu ben' belao naca Melquisedec. Pues hasta cuin xuzixta'oro Abraham bē'nē' lēbē' tu cue'na quie lao chi cue' yugulu ta bēnē' gan uyoguē' lao dila. ⁵ Na'ra cabē' na lē'ē guichi ley pca'n Diuzi lao na'a Moisés dza na'te, rguixogue'n quie yaca pxuzi, ben' naca familia quie xuzixta'oro Leví. Ruen mandado ta uquižujē' yaca ben' Israel tu cue'na quie lao chi cue' quie ta de quiejē', ba'ala'cazi ben' yedyi quiejē', ba'ala'cazi ben' naca ži'suba Abraham cabē' lējē'. ⁶ Pero Melquisedec, ba'ala'cazi binaquē' familia quie xuzixta'oro Leví, bē' Abraham lēbē' tu cue'na quie lao chi cue' ta de quienē'. Na' bēla'ia Melquisedec Abraham, ben' bega'nlē Diuzi di'idza' ta yeže ži'isubanē'. ⁷ Na'ra tabalacazi na' nacara belao ben' ruela'ia quele ca ben' raca la'ia. ⁸ Pues ca naca quie yaca pxuzi, ben' napa dyin uquižujē' tu cue'na quie lao chi cue' ta de quie ben' Israel, cati beyudyi dza quiejē' gutijē'. Pero ca naca quie Melquisedec, rnēn quienē' lē'ē guichi la'ia quie Diuzi ca quie ben' nezu bineyudyi dza quie. ⁹ Lēscan' quie Leví, ben' pquīžu tu cue' quie lao chi cue'na ta de quie ben' Israel dza na',

ba'ala'cazi binesuè' lao yedyi layu caora uzu Melquisedec, huazaque' inaro bē'rēnē' Melquisedec tu cue' quie lao chi cue'na ta de quienē' caora bedila xuzixta'onē' Abraham Melquisedec tu neza, na' bē'nē' lēbē' tu cue' quie lao chi cue'na ta de quienē'. ¹⁰ Cana' huazaque' inaro como dan' caora na' cati bedila Abraham Melquisedec tu neza, nenu'a Abraham Leví lu'u cuerpo quienē', nenaca Leví forma quie bini lu'u cuerpo quie Abraham, ta inaro nenaca Leví ben' zagalora, ben' gaca ži'suba Abraham dza zaza'ra.

¹¹ Lao na'a yaca pxuzi, ben' naca familia quie Leví, uži' yaca ben' Israel ley quie Diuzi. Lēyaca pxuzi na' nacajē' ži'suba xuzixta'oro Aarōn. Na'ra chi tali huaca hue yaca pxuzi na' ta bigata' dula' xquia quie ja ben' nao ley pca'n Diuzi lao na'a Moisés, na'ra birnaban guida ben' tula, ben' gaca pxuzi cabē' pxuzi gaca Melquisedec. ¹² Cati yetza' quie pxuzi, lēscan'rē decazide yetza'n quie ley pca'n Diuzi lao na'a Moisés. ¹³ Na'ra quie Señor quiero, rnēn lē'ē guichi la'iya quie Diuzi naquē' pxuzi ca guca Melquisedec pxuzi. Pero binaca Señor quiero familia quie xuzixta'oro Leví. Naquē' familia quie ni tu ben' biguca pxuzi. ¹⁴ Dyē'ēdi neziro naca Señor quiero familia quie xuzixta'oro Judá. Na' biuna Moisés gaca pxuzi ben' naca familia quie Judá.

¹⁵ Lena' reya'ala' tzioñe'ero dyē'ēdi cati ineziro babida tu pxuzi cubi, ben' naca pxuzi cabē' pxuzi guca Melquisedec. ¹⁶ Binaca Jesús pxuzi nun quie ley quie Moisés ga rguixogue'n nu familia quie ben' Israel reya'ala' gaca pxuzi, dechan' naca Jesús pxuzi nun quie biyeyudyi yedu yela' huaca quienē', tuzioli sunē'. ¹⁷ Porque cani una Diuzi rēbinē' Jesús:

Luē' naco' pxuzi tuzioli, ca guca Melquisedec pxuzi, cana' naco' pxuzi.

Cana' una Diuzi dza na'. ¹⁸ Quie lena' beyula mandamiento uduxu Diuzi dza na' como dan' bira ben dyin. ¹⁹ Pues binapa ley pca'n Diuzi lao na'a Moisés fuerza valor ta gaohue quiero cuenda saque' huelē Diuzi ra'o tuže. Pero lao laza ley na', dera ta nacara dya'a quiero. Pues nacara dya'a quiero chi sudyi'ilēro Cristo ta gaohue quiero cuenda saque' huelē Diuzi ra'o tuže.

²⁰ Bgunte Diuzi cuinnē' dza cati bdē'nē' Cristo gaquē' pxuzi. ²¹ Cati bdē' Diuzi ben' gaca pxuzi dza na'te, bibguntēnē' cuinnē' ta gaca ben' bdē'nē' pxuzi. Pero cati bdē' Cristo gaquē' pxuzi, bguntēnē' cuinnē' unē' quie Cristo cabē' rnēn lē'ē guichi la'iya cani:

Bgunte Diuzi cuinnē', bibetza'nē', huenē' ca unē' huenē', unē':

“Luē' naco' pxuzi tuzioli, ca guca Melquisedec pxuzi, cana' naco' pxuzi.”

Cana' una Diuzi. ²² Nun quie bgunte Diuzi cana', quie lena' naca cuenda quie Cristo ta uzunē' di'idza' huenē' cabē' di'idza' bega'ntza'olē Diuzi ra'o tacubi. Lēdi'idza' na' nacaran huen ca di'idza' bega'ntza'olēnē' ben' unita' tiempote.

²³ Ben' zē gucajē' pxuzi quie ben' Israel tiempote, pero cati bdyin dza quiejē' gutijē', bega'n ben' tula lao lazajē'. ²⁴ Pero como bigati Jesús, tuzioli naquē' pxuzi, ganura yega'n gaca pxuzi lao lazanē'. ²⁵ Quie lena' huazaque' uselanē' ra'o yeyoro guibá tuzioli. Nacaro ben' nuelē Diuzi tuže nun quie rue quiero quie Cristo. Lena' nacan tali, como dan' tuzioli neban Cristo tu ulidzē' Diuzi tanun quiero.

²⁶ Cani naca quie Jesús: Naquē' pxuzi rnabē'ra quiero, naquē' ben' la'iya, bide ni tu dula' xquia quienē'. Netza' quienē', binaca quienē' ca naca quie ben' rue dula' xquia. Žuē' guibá ga naquē' ben' bala'anatzegue. ²⁷ Binaca quie Cristo cabē' naca quie yaca los demás pxuzi rnabē'ra. Yugu dza rnaban gutijē' yaca bia guixi' udyiajē'ba' lao ru'aba nacaba' gun quie Diuzi. Tanēro rnaban gutijē' tuba' udyiajē'ba' lao ru'aba ta yeži dula' xquia quiejē' cuinjē'. Na'tera gutijē' ituba' udyiajē'ba' lao ru'aba ta yeži dula' xquia quie ja ben' Israel. Pero netza' cabē' bē Cristo. Tu lasazi gutinē' guquē' cuinnē' gun quie

Diuzi ta yezi dula' xquia quie yaca benëchi'. ²⁸ Con ca naca ley pca'n Diuzi lao na'a Moisés, bdë' Diuzi ben' gaca pxuzi rnabë'ra. Pero como nacajë' benë'zi, decazi dula' xquia quiejë'. Pero netza' cabë' bë Diuzi cati bdë'në' zi'inë' gaquë' pxuzi. Beyudyi pca'nnë' ley quienë' lao na'a Moisés, na'ra bguntënë' cuinnë' bdë'në' zi'inë' gaquë' pxuzi rnabë'ra. Naca zi'inë' pxuzi rnabë'ra, ben' lila'adyi' tuzioli.

8

Naca Jesús ben' zëlë ra'o lao Diuzi

¹ Pero ta nacaran belao inando' le'e, nacan caniga: Zu tu pxuzi rnabë'ra quiero. Lëbë' re'në' zaquë' yebë ga re' Diuzi guibá. ² Ga ruenë' dyin quie pxuzi lu'u idao' zu guibá nacan dugalo ta bë Diuzi, quele ta bë ja benë'. ³ Na' bdë' Diuzi ja ben' gaca pxuzi rnabë'ra cuenda gutijë' yaca bia guixi' udyiajë'ba' lao ru'aba gacaba' gun quie Diuzi. Na' quie Jesucristo guquë' cuinnë' gun quie Diuzi. Guca quienë' ca quie ben' bdyia cuine lao ru'aba gaca gun quie Diuzi dza cati gutinë' lë'ë yaga cruzo. ⁴ Chi lëbë' nezuë' lao yedyi layu, bihuenë' dyin cabë' dyin rue pxuzi como dan' zu ben' naca pxuzi, ben' rudyia gun quie Diuzi lao ru'aba como ca rnën lë'ë guichi ley pca'n Diuzi lao na'a Moisés. ⁵ Pero cabë' ruejë', ruejë' dyin quie pxuzi, cabë' na' naca quiejë' ca quie tu copia ta ulu'ezin quie idao' ta zu guibá. Neziro naca quiejë' ca quie copia como dan' cati ilë'ëti'zi rdziogue sulao Moisés huenë' idao' de la'ari', caora na' una Diuzi gudyinë' lëbë': "Una' dyë'ëdi, bë idao' de la'ari' con ca blu'ena' luë' dza na' cati ptla' luë' lao ya'a." Cana'una Diuzi gudyinë' Moisés. ⁶ Pero Cristo, ben' naca pxuzi rnabë'ra quiero, nacaran belao dyin quie pxuzi ruenë', como dan' naquë' ben' zëlë ra'o, ben' rute di'idza' quiero lao Diuzi con ca bega'ntza'olë Diuzi ra'o tacubi ta nacaran huenra.

⁷ Cana' naca quiero como dan' chi tali birdziogue gaohue cabë' bega'ntza'olë Diuzi ben' unita' tiempote, na'ra biben zi dza na' yega'ntza'olë Diuzi ra'o tacubi. ⁸ Pero blë'ë Diuzi bibë quieyaquë' di'idza' bega'ntza'olë Diuzi lëjë'. Quie lena' rnën quiejë' lë'ë guichi la'íya quie Diuzi caniga:

Cani una Diuzi:

Huadyin dza yega'ntza'olia' yaca ben' Israel len ben' laguediyjë' ben' Judá tacubi.

⁹ Huetza' cabë' di'idza' bega'ntza'olia' xuzixta'ojë' dza na' cati gualia' uliogá' xuzixta'ojë' nación Egipto ga užacazi'yaquë'.

Bibë quie xuzixta'ojë' di'idza' ca di'idza' bega'ntza'olia' lëjë'.

Quie lena' apsanla'adya' lëjë'.

¹⁰ Cani naca di'idza' yega'ntza'olia' ben' Israel tacubi cati idyin dza bira usanla'adya' xuzixta'ojë':

Udzi'ajë' pensari quia' lu'u guicho laxta'ojë'.

Na'ra në'ëdi' gaca' Diuzi quiejë', na' lëjë' gacajë' ben' quia'.

¹¹ Bira inaban uxi'idze'jë' quie quiejë' ca naca quia'.

Ni laguediyjë', ni bichijë', bira inaban uxi'idze'jë' lëjë' cuenda huebë'jë' në'ëdi', como dan' yugulujë' huebë'jë' në'ëdi' desde ben' gula hasta xcuidi'.

¹² Huezi'zia' dula' xquia quiejë', bira yeza'la'adya' quie dula' xquia quiejë'.

Cana'una Diuzi. ¹³ Na' cati una Diuzi yega'ntza'olënë' ra'o tacubi, cana'unë' como dan' bira hue dyin cabë' bega'ntza'olënë' ben' unita' tiempote. Na'ra tu ta bira huen dyin banacan tagula, baruen bago yeyudyi yedu quien.

9

Ni rnên quie tu idao' zu lao yedyi layu, len itun zu guibá

¹ Na'ra cabè' naca di'idza' bega'ntza'olè Diuzi xuzixta'oro dza na', unènan cabè' re'en Diuzi hue ja pxuzi lu'u tu idao' de la'ari' ta zu lao yedyi layu ga uyonla'adyi'jè' lèbè'. ² Lèidao' na' nacan caniga. Tanèro zu tu cuarto laonan Lato Naca La'ia. Lèlu'unan na' zu tu candelero. Na' zèrè tu mesa ga dyia yèta xtila naca la'ia. ³ Ga beyudyi tu cuarto zu tanèro, na' zè itu la'ari'. Na' xcu'udzu la'ari' na' zu itu cuarto laona Lato Naca La'iyatzegue. ⁴ Na'ra lèlu'u cuarto na' zu tu mesa dao' ga ruzejjè' yalo. Lèscan' zu tu caja ga yu'u di'idza'ca di'idza' bega'ntza'olè Diuzi xuzixta'oro. Lècaja na' dužete lè'èn zu ta naca belaozi oro. Na' lu'u caja na' zu tu yeso' de oro ga yu'u yèta xtila laona maná. Lèzi lu'u caja na' yu'u xaga quie Aarón ta bebe'zi'ine. Lèzi lu'u caja na' yu'u tu yo ta'a gan' bzu Diuzi chi mandamiento quienè'. ⁵ Na'ra lao caja zu chopa figura quie ángel laojè' querubines. Gatzto lao' ga zè ángel, na' raca titi' cabè' raca titi' ga zu Diuzi. Na'ra rzè ángel xilajè' lao caja na' ga bzio pxuzi rnabè'ra ren quie bia naca gun quie Diuzi cuenda yezi'ze Diuzi dula' xquia quie ben' Israel. Pero dena'zi, bihue'ro di'idza' zè cabè' ta guca lu'u idao' de la'ari' dza na'.

⁶ Pues cana' bèjè' quie lu'u idao' de la'ari'. Yugu dza uyu'u ben' naca pxuzi lu'u cuarto nèro quie idao' de la'ari' ta huenè' dyin ca naca dyin quie pxuzi de quienè' huenè'. ⁷ Na'ra cuarto urupe lu'u idao' de la'ari', na' ru'u tuzi ben' naca pxuzi rnabè'ra tu lasazi tu iza. Bè' tzu'unè' lu'u cuarto urupe, na' ruen zi quienè' hua'anè' ren quie bia guixi' naca gun quie Diuzi ta bzioquè'n lao caja ga yu'u tu yo ta'a gan' bzu Diuzi chi mandamiento quienè' cuenda yezi'ze Diuzi dula' xquia quienè' cuinnè'. Na'tera bziorè'nè' ren tatula quie itu bia guixi' ta yezi'ze Diuzi dula' xquia quie ben' yedyi quienè'. ⁸ Na' como cana' bèjè', lena' nacan ta bzioñe'e Bichi Be quie Diuzi ra'o de que tu raca nezu idao' de la'ari' naca chopa cuarto, bisaque' tzu'u ja benè' lu'u cuarto naca la'iyatzegue, ta inaro bisaque' tzu'uro ga zu Diuzi. ⁹ Yugu cabè' ta bèjè' lu'u idao' de la'ari' nacan tu ejemplo ta uzioñe'en ra'o cabè' naca quiero na'a. La'acazi bétijè' bia guixi' nacaba' gun quie Diuzi, la'acazi bziojè' ren quieba' lao ru'aba, biuzaque' yecubin pensari quiejè' ta tzu'ujè' pensari ca pensari re'en Diuzi tzu'u ben' rionla'adyi' lèbè'. ¹⁰ Cabè' naca quie yaca bia guixi' naca gun quie Diuzi bèti ja pxuzi, lena' rguixogue'n quie ta gaoro len ta yo'oro. Rguixogue'n quie ta huero yèri cuinro lao Diuzi conlè nisa. Yugu len rguixogue'n quie bè'èla' zuba' quiero cabè' rnabè'n ra'o hasta dza cati yetza' Diuzi len.

¹¹ Pero na'a babida Cristo. Naquè' pxuzi rnabè'ra quiero. Bènè' quiero guca tahuen quiero con cabè' baraca quiero na'a. Ca naca lu'u idao' ga zu Cristo guibá ruenè' dyin quie pxuzi, nacaran huenra, nacaran dugalo idao'. Binaca idao' bè benè', ta inaro binaca idao' zu lao yedyi layu. ¹² Na'ra cati uyu'u Cristo lu'u cuarto urupe ga naca la'iyatzegue, cala bi'anè' ren quie chibo ni ren quie bèdyihuagadao', dechan' ren quienè' cuinnè' bi'anè'. Cana' bènè' quiero yuguluro, uyu'unè' tu lasazi lu'u cuarto urupe ga naca la'iyatzegue, bènè' gan gata' yela' neban quiero tuzioli. ¹³ Na'ra tali na' de fuerza valor quie ren quie bèdyihuaga len ren quie chibo ta uzio ja pxuzi len ta yeyuen yèri lao Diuzi yaca ben' uditulè ta naca zudyi. Lèscan' de fuerza valor quie de quie tu bèdyihuagadao', bia bzejjè' lao ru'aba ta uziojè'n lao benè' ta yeyuen lèjè' yèri lao Diuzi. Pero quie bè'èla' zuba'zi quiejè' huazuen huen lèjè' yèri lao Diuzi. Biuzaque'n yeyuen yèri pensari quiejè' lao Diuzi.

¹⁴ Pero dera mazara fuerza valor quie ren quie Cristo. Du racalè Bichi Be quie

Diuzi lëbë', psedyinnë' cuinnë' guquë' tu gun quie Diuzi ca naca bia guixi' guti ja pxuzi gun quie Diuzi. Pero naca Cristo gun quie Diuzi ta dya'atzegue, ta bidyia ni tu nidyi'. De fuerza valor quie ren quienë' yeyuen yëri pensari quiero lao Diuzi ta bira inao dula' xquia quiero ra'o, na' tzionla'adyi'ro lëbë', ben' neban tuzioli.

¹⁵ Quie lena' naca Cristo ben' zëlë ra'o, ben' rute di'idza' quiero lao Diuzi con cabë' naca di'idza' bega'ntza'olë Diuzi ra'o tacubi. Nun quie guti Cristo lë'ë yaga cruzo, de lato ta yezi'ze Diuzi dula' xquia quie ja ben' unita' dza na', ben' xuzixta'oro, ben' bega'ntza'olë Diuzi tanëro. Lëscan' nun quie guti Cristo lë'ë yaga cruzo, de lato ta hue' Diuzi lëjë' yela' neban tuzioli, ta inaro ben' bdë'në' gaca ben' quienë'. Hue' Diuzi lëjë' yela' neban tuzioli con cabë' bega'nlnë' lëjë' di'idza' dza na'. ¹⁶ Caora de tu acta de cancelación, solamente cati gatira ben' ulisa acta, na'tera hue dyin acta na'. ¹⁷ Tu neneban ben' ulisa acta, bisaque' quisi ben' tula ta de quienë'. Pero cati agutinë', na'ra huazaque' quisijë' ta de quienë' según cabë' nan lë'ë guichi. ¹⁸ Pues lente di'idza' bega'ntza'olë Diuzi xuzixta'oro tanëro, ben zi ulatojë' ren ta ulu'en rue di'idza' na' lëjë' mandado. ¹⁹ Dza na' udixogue' Moisés lao ja ben' Israel cabë' naca yugu mandamiento pca'n Diuzi lao na'anë'. Na'tera ude beyudyi na', uzi'në' tu zi'ila' zna len tu taca' yaga laona hisopo, na' psebisane' len lu'u nisa nequixi ren quie bëdyihuagadao' len ren quie chibo. Na'ra bzionë'n lao guichi ley quie Diuzi. Lëscan' bzionë'n lao ja ben' Israel. ²⁰ Caora na' una Moisés gudyinë' lëjë': "Lëren niga nacan ta ulu'en ra'o de que di'idza' na' ruen ra'o mandado. Nacan di'idza' bega'ntza'olë Diuzi ra'o." ²¹ Lëscan' bziorë Moisés ren lu'u idao' de la'ari' lente ta de lu'una. ²² Según cabë' na lë'ë guichi ley quie Diuzi, casi yugu ta de quiejë', bisaque' gacan yëri lao Diuzi chi bibzio pxuzi ren laona. Pues ta yezi'ze Diuzi dula' xquia quiejë', ruen zi ilato ren.

Naca Cristo gun quie Diuzi gutinë' udubanë' dula' xquia quie ja benë'

²³ Ben zi dza na' guti ja pxuzi yaca bia guixi' udyiajë'ba' lao ru'aba ca gun quie Diuzi cuenda yeyuen yëri idao' de la'ari' len ta de lu'una. Lena' nacan ca quie copia quie ta de guibá ga zu Diuzi. Pero tacuenda saque' yeyo benë' guibá ga zu Diuzi, ruen zi gati tu ta zaca' mazara ca yaca bia guixi'. ²⁴ Biuyu'u Cristo lu'u idao' de la'ari' ta bë ja benë' ta nacan copia quie tu idao' dugalo zu guibá, dechan' uyu'unë' ga zu cuin Diuzi guibá. Na' beyu'unë' zuë' naquë' ben' zëlë ra'o, ben' rute di'idza' quiero lao Diuzi cuenda gacalënë' ra'o. ²⁵ Na' dza na' uyu'u pxuzi rnabë'ra quie ben' Israel lu'u cuarto naca la'iyatzegue tu lasazi lao tu iza ta bzionë' ren binaca ren quienë' lao caja ga yu'u ley quie Diuzi. Pero bibë Cristo cana'. Tu lasazi para tuzioli guquë' gun quie Diuzi gutinë' lë'ë yaga cruzo. ²⁶ Chan' bë Cristo cabë' bë pxuzi na', na'ra ruen zi gati Cristo tazë lasa desde dza cati udxu Diuzi yedyi layu. Pero binacan cana'. Cani nacan na'adza dza ruen bago iyudyi yedu quie yedyi layu: Babida Cristo lao yedyi layu guquë' gun quie Diuzi gutinë' lë'ë yaga cruzo tu lasazi para tuzioli ta udubanë' dula' xquia quie yugulu benëchi'. ²⁷ Porque cabë' una Diuzi huenë' quie ja benë', unë' tanëro idyin dza gatijë', pero tu lasazi, na'tera ichuguli Diuzi quiejë'. ²⁸ Lëscan' quie Cristo, tanëro guquë' gun quie Diuzi gutinë' lë'ë yaga cruzo, pero tu lasazi gutinë', na' udubanë' dula' xquia quie ben' zë gula. Na'tera yeguidë' tatula, pero cala ta cubanë' dula' xquia quie ja benë', den' ta uselanë' nu ben' rbeza ja lëbë' yeguidë'.

10

¹ Porque naca ley pca'n Diuzi lao na'a Moisés tiempote ca quie tu ta ulu'en ra'o cabë' una Diuzi bi huenë' ta huenë' dya'a quiero dza zaza'ra. Binaca

ley na' mero tadya'a re'en Diuzi huenè' quiero. Derla tadya'a re'en Diuzi huenè' quiero. Bide fuerza valor quie ley na' ta yeyuen benè' yèri lao Diuzi, ba'ala'cazi bêtijè' bia guixi', bia naca gun quienè', bziojè' ren quieba' lao ru'aba lao tu iza huio. ² Chi tali huaca yeyuejè' cuinjè' yèri lao Diuzi nun quie dan' bêtijè' tu bia guixi', bia naca gun quie Diuzi, bira inaban gutijè' bia tula. Pues chi tali abeduba dula' xquia quiejè' tuzioli, bira idèbijè' chi napajè' dula' xquia. ³ Pero cati bêtijè' bia guixi', bia naca gun quie Diuzi, bziojè' ren quieba' lao ru'aba lao tu iza huio, lena' nacan ta yeza'la'adyi'jè' napajè' dula' xquia. ⁴ Cana' nacan como dan' bisaque' yeduba dula' xquia quie benè' conlè ren quie bèdyihuaga, o conlè ren quie chibo.

⁵ Quie lena' cati bida Cristo lao yedyi layu unè' gudyinè' Diuzi: Bisulo' gusto caora cati guti ja benè' bia guixi', bia naca gun quio', udyiajè'ba' lao ru'aba, chi bihue quiejè' cabè' nao'. Pero babzalolo' benlo' tu cuerpo quia' ta ta' lao yedyi layu hue quia' cabè' nao'.

⁶ Biraxelo' ca ruejè' gutijè' bia guixi' naca gun quio', udyiajè'ba' lao ru'aba uzejè'ba' cuenda yeduba dula' xquia quiejè', chi bihue quieyaquè' cabè' nao'.

⁷ Quie lena' agudya' luè' dza na': "Ni zua', zua' dispuesto hue quia' cabè' re'enlo' luè', Diuzi. Cabè' rguixogue'n quia' nè'èdi' lè'è guichi la'ia quio', cana' hua', hue quia' di'idza' quio'."

Cana' una Cristo dza na'. ⁸ Tanèro rguixogue'n quie Diuzi de que biraxenè' hue' ja benè' tu gun quienè', nica raxenè' gutijè' bia guixi' gaca gun quienè', nica raxenè' udyiajè' bia guixi' lao ru'aba uzejè'ba' cuenda yeduba dula' xquia quiejè', chi bihue quieyaquè' xti'idzè'. Biraxe Diuzi huejè' cana', ba'ala'cazi cana' rnabè'n lè'è guichi ley quie Diuzi ta huejè'. ⁹ Quie lena' rnèn rnan cani: "Ni zua', zua' dispuesto hue quia' cabè' re'enlo' luè', Diuzi." Cana' udxoguenè' ra'o bira naca cabè' bè ja ben' unita' tiempote bêtijè' bdyiajè' bia guixi' lao ru'aba. Lao laza lena' udxu Diuzi ta naca tacubi cati guti Cristo lè'è yaga cruzo, guquè' gun quie Diuzi, bè quienè' xti'idza' Diuzi.

¹⁰ Banuela'ia Diuzi ra'o nun quie bzu Jesucristo di'idza' ca mandado una Diuzi huenè' caora cati psedyinnè' cuinnè', guquè' gun quie Diuzi, gutiè' lè'è yaga cruzo tu lasazi para tuzioli.

¹¹ Yugu dza rzè yaca pxuzi quie ben' Israel ruejè' cabè' dyin napajè' quie idao'. Yugu dza rutijè' bia guixi' rudyiajè'ba' lao ru'aba ruzejè'ba', la'acazi conlè lèba' biyeduba dula' xquia quie ben' Israel. ¹² Pero Jesucristo guquè' gun quie Diuzi gutinè' lè'è yaga cruzo ta yeduba dula' xquia quie ja benè' tu lasazi para tuzioli. Na'tera yere'nè' zaquè' yebè ga re' Diuzi guibá. ¹³ Na' zuè' rbezanè' dza cati hue Diuzi castigo yugulu ben' rudie lèbè'. ¹⁴ Porque dan' guquè' gun quie Diuzi, gutinè' lè'è yaga cruzo, cana' beyuenè' yèri para tuzioli ja ben' bdè' Diuzi gaca ben' quienè'. ¹⁵ Pues nuxela'adyi' Bichi Be quie Diuzi ra'o de que nacan tali con cabè' unanè', con cabè' rnan lè'è guichi la'ia cani:

¹⁶ Cani naca di'idza' yega'ntza'olia' ben' Israel tacubi cati idyin dza bira usanla'adya' xuzixta'ojè'.

Udzi'a pensari quia' lu'u guicho laxta'ojè'.

¹⁷ Biyeza'la' adya' ca naca dula' xquia quiejè', nica ca naca tamala babèjè'. Cana' una Bichi Be quie Diuzi dza na'. ¹⁸ Pues cani nacan: Cati abezi'ze Diuzi dula' xquia quiero, bira ruen zi guti ja pxuzi ja bia guixi' ta naca gun quie Diuzi ta yezi'zenè' dula' xquia quiero tatula.

Reya'ala' tzionla'adyi'ro Diuzi du guicho du la'adyi'ro

¹⁹ Quie lena', bicha', huazaque' yeyoro ga naca la'iyatzegue ga zu Diuzi biidzebiro, porque guti Jesucristo lè'è yaga cruzo ulato ren quienè'. ²⁰ Huero seguir inaoro neza cubi quiero, porque chi inaoron, cana' gata' yela' neban quiero tuzioli. Cabè' uyo pxuzi xcu'udzu la'ari' ga naca la'iyatzegue dza na', cana' huazaque' yeyoro ga zu Diuzi nun quie psalo Cristo neza cubi quiero cati gutinè' lè'è yaga cruzo. ²¹ Naca Jesús pxuzi rnabè'ra quiero. Naquè' ben' rnabè'ra lao yugulu ja ben' nao xnezè'. ²² Quie lena' reya'ala' tzionla'adyi'ro Diuzi du guicho du la'adyi'ro sudyi'ilèroguè' yugo dza. Lèbè' beyuenè' yèri guicho laxta'oro. Cana' neziro dyè'èdi baozi'zenè' quie dula' xquia quiero, gabira dula' xquia quiero de. Nacaro yèri lao Diuzi ca quie ben' bagozo yao len nisa yèri gula. ²³ Huero seguir biusanla'adyi'ro hue quiero quie Diuzi, rbezaro dyè'èdi dza cati hue Diuzi quiero cabè' unè' huenè' quiero, como dan' uzucazi Diuzi di'idza' cabè' di'idza' bega'nlènè' ra'o. ²⁴ Reya'ala' hue'lèro laguedyiro, ben' nao xneza Cristo, di'idza' žela'adyi' ta gacalèrojè' ta idyè'èjè' benè' huejè' puro ta yu'u ni'a xnezi. ²⁵ Bireya'ala' usantro yeduparo tzionla'adyi'ro Diuzi cabè' naca costumbre quie bala ja benè', bapsanjè' bira guidajè' dza cati yeduparo. Reya'ala' hue'lèrojè' di'idza' žela'adyi' ta biyeyatijè' como dan' baruen bago idyin dza cati yeguida Cristo lao yedyi layu tatula.

²⁶ Porque cati baneziro con cabè' rna di'idza' li quie Diuzi, pero chi huero seguir huero tamala, na' bisaque' inaro bineziro tamala. Chi huero cana', huero seguir huero tamala, na'tera bira bide bi hue Diuzi ta yezi'ženè' dula' xquia quiero. ²⁷ Tuz ta huenè', huenè' castigo huala gula nu ben' rue cana', tzejijè' lao gui' ta ra'ala' batzani' gula ga cuiagui' ben' rue condre Diuzi. ²⁸ Na'ra dza tiempote cati uzu nu ben' uru'un tzala'la di'idza' ley pca'n Diuzi lao na'a Moisés, chi uzu nu chopa o nu tzona ben' guca testigo, ben' nezi tali bè ben' na' tamala, caora na' uchuguli yaca ben' rnabè' quienè' ta gutijè' lèbè', bibeyèchi'la'adyi'jè' biuzi'žejè' quienè'. ²⁹ Pues ¿bica inale quie ben' reru'un tzala'la ži'i Diuzi? ¿Bica inale quie ben' rutitu lèbè' inajè': "Bibi zaca' dan' gutinè' lè'è yaga cruzo ulato ren quienè'"? Nedyè'è Bichi Be quie Diuzi yugulu benè', na'ra ¿bica inale quie ben' rutasi runio Bichi Be quienè'? ¿Quele mazara castigo huala gula reya'ala' gaca quiejè'? Pues bira raxejè' tu ta beyue lèjè' yèri lao Diuzi dza na'. Pues nun quie guti Cristo lè'è yaga cruzo ulato ren quienè', lena' nezcapiro nacan tali hue Diuzi quiero cabè' tadya'a unè' huenè' quiero. Pues bira raxejè' tu ta beyuen lèjè' yèri lao Diuzi dza na'. ³⁰ Dyè'èdi neziro Diuzi na' unè' caniga: "Cuenda quia' na' hua' benè' castigo. Huaguizuga'jè' quie tamala bèjè'." Lèscan' una Diuzi: "Nè'èdi' ichugulia' quie yaca ben' nao xneza'." ³¹ Nacan ta idzebitzegue ja benè' cati hue Diuzi lèjè' castigo.

³² Pero bigala'adyi'le cabè' guca quiele dza na', dza cati zaozulaole unaole xneza Cristo. Dyè'èdi uzuele bèle gan cabè' tazèdi gula guca quiele bedza-galaotzeguele. ³³ Pues dza na' ptasi bnio ja benè' le'e. Psacajè' bala le'e bizinaquezi zaca'lao lao ja ben' yedyi quiele. Lèscan' ibala le'e guca quiele bedzagalaole cabè' bedzagalao laguedyile. ³⁴ Dyè'èdi beyèchi'la'adyi'le laguedyile, ben' nao xneza Cristo, ben' de lu'u dyiguiba. Lèscan' hasta uzule gusto uzuele bè' uduba ja benè' ta de quiele, como dan' nezile dera ta de quiele guibá ta nacara huen gula ta biyeyudyi yedu quie. ³⁵ Biusanle sudyi'ilèle Diuzi, porque huata' tadya'a gula guibá quie ben' rzudyi'ilè lèbè'. ³⁶ Pues le'e bireya'ala' yeyatile huele ca re'en Diuzi huele. Cana' idyin dza hue Diuzi tadya'a quiele cabè' unè' huenè' quiele. ³⁷ Lena' rnèn lè'è guichi la'ia quie Diuzi cani:

lledao'zi idyin dza cati guida ben' guida, pero bitzenè' guidanè'.

³⁸ Nu ben' rzudyi'ilè nè'èdi', gata' yela' neban quienè' tuzioli.

Pero chi usannè' bira inaonè' xneza', bisua' gusto conlè lèbè'.

Cana' una Diuzi. ³⁹ Pero ra'o binacaro ben' usan, ben' bira inao xneza Diuzi. Binacaro ben' cuiagui' tuzioli. Dugalo nacaro ben' rue quie quie Diuzi. Nacaro ben' sue hue gan gata' yela' neban quie tuzioli.

11

Cabè' naca quie ben' rzudyi'ilè Diuzi

¹ Cati sudyi'ilèro Diuzi neziro du guicho du la'adyi'ro huenè' tadya'a quiero cabè' rbezaro huenè' quiero. Lèscan' cati sudyi'ilèro Diuzi nužela'adyi'ro nacan tali zuè' rnabè'nè' la'acazi bisaque' ilè'èroguè'. ² Yaca xuzixta'oro, ben' unita' tiempote, uzu Diuzi gusto conlè lèjè' nun quie bē quieyaquè' quienè'.

³ Nun quie dan' rzudyi'ilèro Diuzi neziro dyin bē Diuzi bzalonè' bènè' yugulu ta de žan guibá tiempote. Conlè fuerza valor quie xti'idza'nè', cana' guta'n. Conlè ta bisaque' ilè'èro, bènè' bzaloguè' tu ta ilè'èro na'a.

⁴ Nun quie uzudyi'ilè Abel Diuzi, bē'nè' Diuzi tu gun nacara dya'ara, quele cabè' naca gun ta bē' bichinè' Caín Diuzi. Quie lena' blè'è Diuzi Abel ben' laxta'o yēri, uzi'nè' gun quienè'. Na'ra la'acazi aguti Abel, nenacquè' tu ejemplo cabè' reya'ala' huero, reya'ala' sudyi'ilèro Diuzi cabè' uzudyi'ilè Abel Diuzi.

⁵ Nun quie dan' uzudyi'ilè Enoc Diuzi, bezi' Diuzi lèbè' zeyoguè' guibá bigutinè'. Nun quie bezi' Diuzi lèbè', bira bedzele yaca benè' lèbè'. Rnèn lè'è guichi la'iya quie Diuzi de que tu binesi' Diuzi lèbè', lega yaxe Diuzi lèbè' cabè' bènè'. ⁶ Chi bisudyi'ilèro Diuzi, bisaque' tzaxe Diuzi ra'o cabè' ruero, porque ta tzionla'adyi'ro Diuzi, ruen zi galero zunè', ruen zi galero huenè' tahuen quie nu ben' nao xnezè'.

⁷ Nun quie dan' uzudyi'ilè Noé Diuzi, bzunè' di'idza' ca di'idza' gudyi Diuzi lèbè', bènè' tu barco ze gula cuenda te ilanè' len yaca familia quienè' como dan' gudyi Diuzi lèbè' huaca juicio lao yedyi layu, huaca juicio ca juicio ta binelè'èjè'. Nun quie dan' uzudyi'ilè Noé Diuzi, uidxogue'nè' yaca ben' unita' dza tiempote hue Diuzi lèjè' castigo. Cana' blè'è Diuzi Noé ben' laxta'o yēri nun quie uzudyi'ilènè' Diuzi.

⁸ Nun quie dan' uzudyi'ilè Abraham Diuzi, bzunè' di'idza' dza cati gudyi Diuzi lèbè' ta uzè'è yedyi quienè' zioquè' ga tula ga de layu hue' Diuzi lèbè' gague quienè'. Ba'ala'cazi binenezinè' ga ise'ela' Diuzi lèbè', pero uzè'è zioquè'. ⁹ Nun quie dan' uzudyi'ilè Abraham Diuzi, uzunè' ga de layu una Diuzi hue'nè' quienè', pero uzunè' na' ca quie binaquen quienè', ca quie ben' zu yedyi binaca yedyi quie. Puro lu'yu' de la'ari'zi uzunè'. Lèscan' cabè' bē Abraham, cana' bère ži'inè' Isaac, cana' bère ži'isubanè' Jacob. Lèscan' conlè lèjè' bega'nè' Diuzi lèjè' di'idza' huadyin dza hue'nè' lèjè' gague quiejè' layu ga zujè'. ¹⁰ Cana' bē Abraham, porque ulezanè' dza cati yeyoguè' ga zu Diuzi, ga zu tu yedyi ta biyeyudyi yedu quie, yedyi ta bē cuin Diuzi.

¹¹ Lèscan', hasta nigula quienè' Sara, nun quie dan' uzudyi'ilènè' Diuzi, bē' Diuzi lèbè' fuerza gucanè' žna' bdao', la'acazi abgulanè' aode tiempo quienè' ta hua'anè' bdao'. Bzucazi Diuzi di'idza' ca di'idza' bega'nènè' lèbè', gualènè' lèbè' ta ila' tu xcuidi' byu quienè'. ¹² Lèscan' Abraham, ba'ala'cazi abgulè' banapè' zē iza, ba'ala'cazi ganu ži'inè' uzu, pero bdyincazi dza golo tu ži'inè', bi' inita' ži'isube zē gula. Quie lena' uzu di'idza' unita' ži'isubanè' tazē gula. Nita'jè' ca quie bēlo dyia guibá, nita'jè' ca quie yožo re' ru'a yao že, bisaque' ulabaron. Cana' nita' ži'isuba Abraham.

13 Na'ra lëben' uzudyi'ilë Diuzi agutijë' yugulujë'. Binehue Diuzi quiejë' cabë' unanë' huenë' quiejë', pero como uzudyi'ilëjë' Diuzi, cana' nužela'adyi'jë' idyincazi dza hue Diuzi quiejë' cabë' unanë' huenë' quiejë'. Cana' bedaohuejë' unajë' ca naca pensari quiejë', unezije' bisujë' lao yedyi layu tuzioli. 14 Quie yaca ben' una cana', rulu'en quiejë' dyë'ëdi rbezajë' yeyojë' sujë' ga naca quiejë'. 15 Pero bibdëbijë' quie layu ga brojë' uza'jë', porque chi bdëbijë' quie layu na', bebi'jë' bedyinjë' ga uza'jë'. 16 Pero gu'unjë' tziojë' tzesujë' ga nacatera dya'a, ta inaro gu'unjë' tziojë' tzesujë' guibá ga zu Diuzi. Quie lena' redaohue Diuzi cati inajë' naquë' Diuzi quiejë'. Pues banuetza'o Diuzi tu ciudad guibá ga sujë'.

17 Nun quie uzudyi'ilë Abraham Diuzi, uquië'në' zi'inë' Isaac ta gutinë'bi' udyianë'bi' lao ru'aba ca gun quie Diuzi dza cati bë Diuzi lëbë' tu prueba chi tali hue quienë' ca una Diuzi lëbë'. Uzunë' dispuesto ta gutinë' tu litza' zi'inë' Isaac, la'acazi bega'nle Diuzi lëbë' di'idza' dza na' cati unë' gudyinë' lëbë' cani: 18 "Lao na'a zi'ilo' Isaac huanita' ja zi'isubo'." 19 Na'ra gule Abraham napa Diuzi poder ta yesebannë' ben' huati. Huazaque' inaro guca quie Abraham len zi'inë' como si fuera beseban Diuzi zi'i Abraham caora bezi'në' zi'inë' tatula nebambi'.

20 Nun quie dan' uzudyi'ilë Isaac Diuzi, bëla'ya Isaac zi'inë' Jacob len zi'inë' Esau gudyinë' lëjë' cabë' gaca quiejë' dza zaza'ra. 21 Lëscan' nun quie dan' uzudyi'ilë Jacob Diuzi, bëla'ya Jacob ja zi'i José dza cati anapë' iza baruen bago gatinë', uyonla'adyi'në' Diuzi pquichinë' xaga quienë' layu ta gualën lënë' ta zënë'. 22 Nun quie dan' uzudyi'ilë José Diuzi, udixogue'në' ben' Israel idyincazi dza yerojë' sa'jë' nación Egipto, bënë' lëjë' mandado cuiojë' chita quienë' hua'ajë'n dza cati sa'jë'. Cana' udixogue' José lëjë' dza cati baruen bago gatinë'.

23 Nun quie dan' uzudyi'ilë xuzi žna' Moisés Diuzi, pcachi'jë' lëbi' tzona biu' dza cati golobi', como dan' blë'ëjë' naca bdao' na' badan gula. Na'ra bibdzebije' rey quie ben' Egipto, como dan' bë rey na' mandado gati yugulu bdao' byu quie ben' Israel. 24 Nun quie dan' uzudyi'ilë Moisés Diuzi, bigu'unne' ilë'ë ja benë' lëbë' ca zi'i nigula, ben' naca zi'i rey quie ben' Egipto cati bgulanë' guquë' ben' huaca. 25 Quie lena' uzunë' dispuesto ta yedza-galaonë' gacalënë' ben' yedyi quienë' tuže. Uzunë' dispuesto yedzagalaonë', bigu'unne' inaohuë' neza mala quie ben' Egipto. 26 Unezinë' nacaran huenra yedzagalaonë' cabë' bedzagalao Cristo, ta inaro uzunë' dispuesto hue ja benë' lëbë' bizinaquezi cuenda gacalënë' ben' Israel, bigu'unne' gaca quienë' yela' uña'a ta de quie ben' Egipto. Quie lena' bigulenë' quie ben' Egipto, como dan' unezinë' cabë' tahuenra de ta hue' Diuzi lëbë'. 27 Nun quie dan' uzudyi'ilë Moisés Diuzi, bzunonë' nación Egipto, pero bibdzebinë' bdza' rey quie ben' Egipto lëbë'. Uzuene' como nuebë'në' Diuzi, ben' birzaque' ilë'ëro.

28 Nun quie dan' uzudyi'ilë Moisés Diuzi, udixonë' lani pascua bënë' mandado bzio ben' Israel ren quie beco' zi'ila' ru'a yu'u quie žan yu'u quie quiejë', como dan' use'ela' Diuzi tu angel ta gutinë' xcuidi' byu nëro quie nu ben' bibzio ren ru'a yu'u quie. 29 Nun quie dan' uzudyi'ilë ben' Israel Diuzi dza na', udejë' ga de nisadao' laona Nisadao' Žna dza na'te. Uyalo tu neza ga udejë' lu'u nisa beyacan layu bidyi. Na'ra cati gu'un ja benë' Egipto terëjë' cabë' ude ben' Israel, bedaco' nisa lëjë' gutijë'.

30 Nun quie dan' uzudyi'ilë ben' Israel Diuzi dza na', byala ja besu ta naca sibi ta neyëcho ru'a ciudad Jericó caora cati beyudyi uyëchojë' ru'a lao ciudad lao gadyi dza cabë' mandado bë Diuzi huejë'. 31 Lëscan' tu nigula bëti' gusto quie, ben' lao Rahab, nun quie dan' uzudyi'ilënë' Diuzi, bigutinë' dza na'

caora cati bdyiagui' ben' Israel ben' yedyi quienè', ben' bigu'un hue quie cabè' una Diuzi. Biguti nigula na' nun quie gucalènè' chopa ben' Israel, ben' uyo balarazi ta yena'jè' ca naca ciudad Jericó.

³² ¿Ca bizira ta inia' le'e? Bide tiempo ta inia' le'e quie Gedeón, quie Barac, quie Sansón, quie Jefe't, quie rey David, quie Samuel, quie yaca profeta, ben' udixogue' xti'idza' Diuzi tiempote. ³³ Nun quie dan' uzudyi'ilèjè' Diuzi, bèjè' gan bètijè' yaca enemigo quiejè' cati udilalèjè' lèjè', bèjè' gan unabè'jè' lao ja yedyi quiejè', bèjè' gan gucalè Diuzi lèjè' cabè' una Diuzi huenè' quiejè', bèjè' gan bibi guca quiejè' cati gu'un yaca león qui'imba' lèjè', ³⁴ bèjè' gan besulajè' gui' ta raca gui' bela, bèjè' gan ulajè' lao na'a ben' re'en guti lèjè' conlè espada. Lèscan' yaca ben' bdzebi dza na', bibedzebijè' cati gucadilalèjè' ja soldado quie ben' yedyi tula. ³⁵ Lèscan' guca quie bala nigula unita' dza na' bezi'jè' ben' huati quiejè' tatula nebanjè'.

Pero unita' ja ben' tula guticazijè'. Udi benè' lèjè' hasta gutijè', pero bipsanjè' unaojè' xneza Diuzi cabè' gu'un ben' udi lèjè'. Cana' gutijè', pero unezijè' huadyin dza useban Diuzi lèjè' sujè' guibá ga nacaran huen gula. ³⁶ Na'ra balajè' ptitu ja benè' lèjè'. Ibalajè' udi ja benè' lèjè' guidi. Ibalajè' pquio ja benè' lèjè' cadén, bdze'jè' lèjè' lu'u dyiguiba. ³⁷ Ibalajè' bèti ja benè' lèjè' con yo. Ibalajè' uchugu ja benè' lèjè' conlè serucho gucajè' chopa yo'o. Ibalajè' bèjè' lèjè' bizinaquezi cuenda usanjè' bira inaojè' xneza Diuzi, na' bètijè' lèjè' con espada. Ibalajè' udajè' ni'nizi, gucojè' zaba beco' zi'ila', gucojè' zaba chibo. Bibi guta' quiejè', guca zèdi gula quiejè'. Psaca benè' lèjè' bizinaquezi. ³⁸ Bibizaca' ja ben' nita' lao yedyi ta inita'lèjè' lèjè' tuze. Cana' guca quiejè' udajè' ni'nizi ga naca lato dachi, udajè' ni'nizi lao ya'a, udajè' ni'nizi ga zu beló. ³⁹ Na'ra lèjè', ba'ala'cazi uzudyi'ilèjè' Diuzi, lèscan' ba'ala'cazi uzu Diuzi gusto cabè' bèjè' dza na', biuzi'jè' quiejè' yugulu cabè' tadya'a unè Diuzi hue'nè' quiejè'. ⁴⁰ Nerdziogue hue Diuzi tadya'a quiejè', porque unanè' huenè' tadya'a quiejè' tuze len ra'o, ben' laxta'o yèri, ben' la'iya, ben' bide dula' xquia quie. Lena' nacaran huen hue Diuzi tadya'a quiero tuze len lèjè' guibá ga zuè'.

12

Reya'ala' inaoro xneza Cristo du guicho du la'adyi'ro

¹ Quie lena' como nita' ben' zè gula, ben' bablu'e ra'o cabè' uzudyi'ilèjè' Diuzi dza na', reya'ala' usanla'adyi'ro yugu ta rudzun ra'o inaoro xneza Cristo. Lèscan' reya'ala' usanla'adyi'ro bira huero tamala cabè' nequionan ra'o bire'ennan huero tahuen. Reya'ala' inaoro xneza Cristo du guicho du la'adyi'ro, biyeyatiro huero ca udixu Diuzi quiero huero. ² Reya'ala' huero cuenda cabè' re'en Jesús huero. Naca Jesús ben' naca ejemplo belaotera quiero cabè' reya'ala'huero sudyi'ilèro Diuzi. Ganura zu ben' uzudyi'ilè Diuzi ca lèbè'. Bibdèbinè' nacan yela' stu' quie ben' gati lè'è yaga cruzo. Uzuè' dispuesto bedzagalaonè' gutinè' lè'è yaga cruzo, como dan' nezinè' caora cati beyudyi bedzagalaonè', huapala'n Diuzi lèbè' tzeque'nè' zaquè' yebè ga re' Diuzi guibá.

³ Reya'ala' huele pensari cabè' bè Jesús uzuenè' cabè' tamala psacayudyi ben' mala lèbè'. Lena' gacalèn le'e ta biyehuèdile biyeyatille inaole xnezè'.

⁴ Pues le'e, nica guti ja benè' le'e nun quie rnaole xneza Cristo. Nica guti ja benè' le'e nun quie bira re'enle huele tamala cabè' lèjè'. ⁵ ¿Quele agula'adyi'le cabè' rnèyue Diuzi le'e nacale ca zi'inè'? Lena' rnèn lè'è guichi la'iya quie Diuzi caniga:

Zi'ina', bihuele pensari chi bibi zaca'n caora cati rdila Diuzi luë'.

Biyeyatile caora cati hue Diuzi luë' castigo.

⁶ Porque rdila Diuzi nu ben' nedyë'ënë', rdila Diuzi yugu ben' naca zi'inë', huenë' lëjë' castigo cati biralejë' quienë'.

Cana' una Diuzi dza na'. ⁷ Na'ra rnía' le'e biidza'le bë' rue Diuzi le'e castigo cati biralele quienë', como dan' ca zi'inë' ruelënë' le'e. ¿Binezile bizu xcuidi' birue xuzibi' lëbi' castigo cati biralebi' quienë'? ⁸ Pero chi birdila Diuzi le'e cabë' rdila Diuzi yugu ben' naca zi'inë', lena' ulu'en nacale ca quie xcuidi' tu yo, binezibi' nu naca xuzibi'. ⁹ Cati nenacaro xcuidi', caora na' udila xuziuro ra'o gulero quienë' udaparonë' bala'ana. Quie lena', ¿quele rnabë'ran quiero galero cabë' na Xuziuro Diuzi zu guibá cuenda gata' yela' neban quiero tuzioli? ¹⁰ Cati bigulero quie xuziuro dza na', udilanë' ra'o según ca guquenë' nacan huen quiero, pero tuzi dza nenacaro xcuidi' udilanë' ra'o. Pero Diuzi rdilanë' ra'o cati biralero quienë' yugu dza rdaro lao yedyi layu cuenda tali gaca huen quiero, gacaro ben' la'iya ca naquë' ben' la'iya. ¹¹ Tali na' bisuro gusto cati racaro castigo, raquero zi' ca nacan. Pero ude beyudyi gucararo castigo, chi tali aoyoñe'ero, bira huero cabë' tamala bëro. Lena' gacalën ra'o huero puro ta yu'u ni'a xnezi suro gusto.

Nacan zudyi chu'unro tzala'la cabë' rna Diuzi ra'o

¹² Quie lena' biyehuëdile huele fuerza ni'a na'ale. ¹³ Huele lucha ta unaole neza li quie Cristo. Cana' yezi' fuerza ni'a na'ale tale dyë'ëdi.

¹⁴ Huele bala ta sulële yugulu benë' dyë'ëdi. Lëscan' huele bala ta gacale ben' rue quie quie Diuzi, como dan' chi bihue quie quie Diuzi, bisaque' ilë'ële Cristo tzesulëlenë' tuze. ¹⁵ Gapale cuidado cuenda ni tule bigaca quiele bihuela'iya Diuzi le'e nun quie binaole xnezë' du guicho du la'adyi'le. Lëscan' gapale cuidado bihuele lato su nu ben' bire'en usan dula' xquia quie ladole, porque huenë' quiele ca rue tu guixi' naca veneno, udyiaguinë' yaca los demás ben' nao xneza Cristo. ¹⁶ Lëscan' ni tu le'e, bireya'ala' gasilële nigula binaca nigula quiele. Lëscan' bireya'ala' utitole huele pensari bibi zaca' ta naca la'iya quie Diuzi. Cana' bë Esaú tiempote guquenë' bibizaca' ca naca derecho quienë' naquë' bi' nëro. Pues ta udaonë' tu lasazi caora bdzioguenë' ta gaohuë', bë'në' derecho quienë' bi' bichinë'. ¹⁷ Dyë'ëdi nezile cabë' guca quie Esaú dza na'. Cati unabanë' huela'iya xuzinë' lëbë', bira gu'un xuzinë' huela'iyane' lëbë'. Pues la'acazi guquenë' bayëchi' uredyitzeguenë', bira uzaque' huela'iya xuzinë' lëbë'. Bira ubinnë' bi huenë' ta huela'iya xuzinë' lëbë'.

¹⁸ Na'ra bihuele cabë' bë xuzixta'oro ben' Israel dza na'. Lëjë' ubiga'jë' ga'ala' ga zu tu ya'a ga bireya'ala' uliojë'. Lë'ë ya'a na' lega uya'ala'n gui', guca chula, uda tu be bedun' fuerte. ¹⁹ Lëjë' bejë' bgüedyi trompeta, bejë' rchi' Diuzi cati unë' bë'lënë' lëjë' di'idza'. Lëben' na' unabayëchi'jë' Diuzi ta bira hue'lë Diuzi lëjë' di'idza'. ²⁰ Cana' gudyijë' Diuzi, como dan' tantozi bdzebijë' yejë' cati una Diuzi gudyinë' lëjë' cani: "Chi babbio tu benë' lë'ë ya'a ni, ulegutinë' conlë yo o conlë lanza, la'achi benë', la'achi bia guixi'." ²¹ Tantozi bdzebijë' cabë' blë'ëjë' dza na', hasta cuin Moisés unë' rëbinë' lëjë': "Lega rzizida' rdzeba'."

²² Pero quie le'e, anacan cuenda quiele tziole lë'ë ya'a laona ya'a Sión ga de ciudad quie Diuzi, ben' zu tuzioli. Anacan cuenda quiele tziole ciudad Jerusalén zu guibá ga nita' zë mila ángel, ben' negu'udi' ta tzionla'adyi'jë' Diuzi. ²³ Anacan cuenda quiele tziole ga regu'udi' yaca ben' naca zi'i Diuzi, ben' zu laohue lao lista quie Diuzi. Anacan cuenda quiele tziole ga zu Diuzi, ben' naca jueza quie yuguluro. Anacan cuenda quiele tziole ga regu'udi'

yaca ben' huen, ben' laxta'o yëri. ²⁴ Anacan cuenda quiele tziole ga zu Jesús, ben' zëlë ra'o lao Diuzi rutenë' di'idza' ca di'idza' bega'ntza'olë Diuzi ra'o tacubi. Lëscan' naca cuenda quiele yeyëri'le lao Diuzi nun quie ulato ren quie Jesús. Quie lena' gacaran huen quiele ulato ren quie Jesús, cala ca ren quie Abel.

²⁵ Quie lena' reya'ala' gapale cuidado bichu'unle tzala'la ca na Diuzi, ben' ru'elë le'e di'idza'. Pues biula yaca ben' unita' tiempote, ben' uru'un tzala'la ca una Diuzi dza cati beyëzinë' lao yedyi layu bël'ënë' lëjë' di'idza'. Lëscan' ra'o, biilaro hue Diuzi ra'o castigo chi chu'unro tzala'la ca rnanë' ru'elënë' ra'o di'idza' desde guibá. ²⁶ Dyin quie rchi' Diuzi psisi lao yedyi layu dza na', dza cati bël'ë Diuzi Moisés di'idza' lë'ë ya'a Sinaí. Pero cani rna Diuzi na'a: "Itu lasazi usisia' lao yedyi layu, pero quele tuzi yedyi layuzi, lëscan' usisiria' lente guibá." ²⁷ Caora una Diuzi "itu lasazi", lena' reya'ala' tzioñë'ero hueyudyi huedu quie ta usisinë'n, pero biyeyudyi yedu quie ta bisaque' usisi yaca benë'. ²⁸ Quie lena' reya'ala' yëbïro Diuzi diuxcalelo', como dan' bënne' lato quiero tzioro ga zuë' rna'bë'në', pero biisisin biyeyudyi yedu ga rna'bë'në'. Reya'ala' tzionla'adyi'ro Diuzi du guicho du la'adyi'ro cabë' re'ennë' huero quienë'. ²⁹ Naca Diuzi quiero ca quie tu gui' ze ta tzei ben' reru'un lëbë' tzala'la.

13

Cani re'en Diuzi hue yaca ben' nao xneza Jesús

¹ Biusanle idyë'ële ben' bichile, ben' nao xneza Jesús. ² Lëscan' bi-gala'adyi'le cabë' reya'ala' huele sule dispuesto gapachí'le dyë'ëdi nu ben' za' zan yu'u quiele, como dan' nu ben' rue cana', hasta ben' naca ángel baozi'jë' zan yu'u quiejë', nica bezaquejë' chi ben' naca ángel na'.

³ Lëscan' reya'ala' yeyëchi'la'adyi'le nu ben' naca preso yu'u lu'u dyiguiba. Reya'ala' yeyëchi'la'adyi'lejë' ca quie le'e cuinle yu'ulële lëjë' tuze lu'u dyiguiba. Reya'ala' yeyëchi'la'adyi'le nu ben' raca zëdi quie, rusaca ja benë' lëjë' bizinaquezi. Reya'ala' yeyëchi'la'adyi'lejë' ca quie le'e cuinle raca zëdi quiele, rusaca ja benë' le'e bizinaquezi.

⁴ Yugulule reya'ala' huelële laguedyile puro tahuen. La'acazi bazulële laguedyile, la'acazi binesulële laguedyile, bihuele ta naca yela' stu' quiele, porque hue Diuzi castigo nu ben' cuidi', chi rasilëbi' laguedyibi' binesi'bi' lëbi'. Lëscan' hue Diuzi castigo nu ben' bazulë laguedyi, chi rasilënë' ben' tula.

⁵ Bisa'la'adyi'le dumi, pero sule contento conlë bi ta de quiele, porque cani rna Diuzi: "Con bitezi gaca quiele, biusanla'adyi'caza' le'e." ⁶ Quie lena' huazaque' inaro nužela'adyi'ro nacan tali:

Naca Diuzi ben' racalë ra'o, biidzebiro chi bi re'en ja benë' huejë'ra'o.

Cana' rnën lë'ë guichi la'iya quie Diuzi. ⁷ Bigala'adyi'le quie ben' napa dyin entre le'e, ben' uidxogue' le'e xti'idza' Diuzi dza na'. Huele pensari cabë' bëjë' gulejë' quie Diuzi, cana' inaole huele cabë' bëjë'.

⁸ Tuzi ca naca Jesucristo, biyetza'në'. Cabë' nacacazë' tiempote, cana' naquë' na'a, cana' nacacazë' tuzioli. ⁹ Gapale cuidado bigalele quie ben' re'en inaole cabë' rnajë', rnajë' ta binacan tuzi ca na Cristo. Tažë netza'n cabë' rnajë', rnajë' di'idza' zë. Mejorla inabaro Diuzi ta gacalënë' ra'o gunnë' fuerza valor quiero inaoro xneza Cristo. Pero chi gaoro bi cosa, o chi bigaoro bi cosa, lena' bigacalën ra'o inaoro xneza Cristo. Pues hasta yaca ben' unao dyë'ëdi ca naca quie yela' huao dza na', bigucalën lëjë' ta inaojë' quie Diuzi.

¹⁰ Pues netza' ca naca quiero ben' nao xneza Cristo. Guti Cristo lë'ë yaga cruzo guquë' gun quie Diuzi. Pero quie yaca ben' nena cabë' bë yaca pxuzi

quie xuzixta'oro lu'u idao' de la'ari' tiempote, chi nenaøjè' ruejè' cabè' bē ja ben' na', na'ra bisaque' inaorējè' xneza Cristo. ¹¹ Pues tiempote bzio pxuzi rnabè'ra quie xuzixta'oro ren quie bia guixi' lu'u idao' de la'ari' ga naca la'iyatzegue. Bzionè'n como ca gun quie Diuzi cuenda yeduba Diuzi dula' xquia quie ja ben' Israel. Pero quie yaca bia guixi', bia bêtijè', tzala'la ru'a yedyi bzejjè' cuerpo quieyacaba'. ¹² Lëscan', Cristo, tzala'la ru'a ciudad Jerusalén bedzagalaonè' gutinè' lè'è yaga cruzo cuenda yezinè' dula' xquia quie ben' nao xnezè'. Cana' guca quienè' ulato ren quienè' dza na'. ¹³ Quie lena' tziro inaoro huero quie Cristo, la'acazi yedzagalaoro usaca benè' ra'o bizinaquezi cabè' guca quie Cristo dza na'. ¹⁴ Pues bizu yedyi quiero lao yedyi layu niga ta biyeyudyi yedu quie. Pero rbezaro dza zaza'ra tziro tu yedyi zu guibà. ¹⁵ Quie lena' reya'ala' tzionla'adyi'ro Diuzi lao na'a Jesucristo tuzioli. Lena' cati tzionla'adyi'ronè' nacan gun quienè' ta hue'ronè', ta inaro, ulidzaronè' hueronè' ben' ze. ¹⁶ Bigala'adyi'le huele tahuen. Bigala'adyi'le gacalè ben' rdziogue quie con ta de quiele, porque cana' re'en Diuzi huele, cana' naca gun quie Diuzi reya'ala' hue'lenè'.

¹⁷ Lëscan' galele uzule di'idza' quie ben' napa dyin quiele, ben' rue dyin quie Diuzi. Naca cuenda quiejè' gapajè' le'e dyè'èdi, gacalèjè' le'e inaole xneza Cristo. Nezijè' huadyin dza yedejè' cuenda lao Diuzi cabè' bējè' udapajè' le'e. Huele dyabè' ta sujè' gusto cabè' naca dyin napajè'. Bihuele quiejè' ta bisujè' gusto, como dan' chī huele cana', bihuena huen quiele.

¹⁸ Ulidzale Diuzi ta gacalènè' nètò'. Pues nužela'adyi'ndo' puro pensari huen yu'undo', puro tahuen re'enndo' huendo' con bitezi ta huendo'.

¹⁹ Huele orar por nè'èdi' cuenda gacalè Diuzi nè'èdi' laguidatia' ideyuba' le'e tatula.

Blidzanè' Diuzi ta gacalènè' lējè'

²⁰⁻²¹ Rulidza' Diuzi, ben' cuèchi chizi laxta'oro, ta gacalènè' le'e dyè'èdi ta huele ca re'en Diuzi huele. Naca Diuzi ben' pseban Señor quiero Jesucristo, ben' rapa ra'o ca quie ben' rapa beco' zi'ila', ulato ren quienè' lè'è yaga cruzo cuenda gaca seguro para tuzioli cabè' di'idza' bega'ntza'olè Diuzi yaca benèchi'. Lëscana' rulidza' Diuzi ta gacalènè' yuguluro ta galero quienè' du guicho du la'adyi'ro, huero puro ca re'ennè' huero nun quie dan' nacaro ben' quie Jesucristo. ¡Huero Cristo ben' ze tuzioli! Amén.

²² Bicha', rnaba' cule laole ta uzè nagale dyè'èdi cabè' naca di'idza' unia' le'e niga runa' le'e consejo. Pues quele di'idza' zè bzua' lè'è guichi pse'ela'n laole.

²³ Lëscana' rguixogui'a le'e abero ben' bichiro Timoteo lu'u dyiguiba. Na'ra chi abela'nezanè', na' huaqui'anè' guidando' ta ideyubindo' le'e.

²⁴ Lëscana' gapale diuzi ben' napa dyin quiele, ben' rue dyin quie Diuzi. Lëscan' gapale diuzi yugulu ben' bichiro, ben' nao xneza Cristo ga zule. Rgapa ben' yedyi Italia le'e diuzi.

²⁵ Rulidza' Diuzi huela'iyànè' le'e yugulule. Amén.

DI'IDZA' LA'IYA BZU SANTIAGO APÓSTOL LÈ'È GUICHI

Use'ela' Santiago carta ni lao ben' nao xneza Cristo, ben' nita' tu tu yedyi

¹ Nè'èdi', Santiago, naca' ben' ruzu di'idza' ca mandado rue Diuzi lènè' xa'nro Jesucristo. Rgapa' le'e diuzi, le'e ben' naca chipchopa cue' ben' Israel, le'e ben' nao xneza Cristo, le'e ben' rdale duže yedyi layu.

Naca Diuzi ta uzioñe'enè' ra'o

² Bicha', reya'ala' yedaohuele cati hue Diuzi le'e biti'tezi prueba ta ulu'en chi rnaole xnezè' du guicho du la'adyi'le. ³ Baquezi nezile caora hue Diuzi le'e prueba, lena' nacan ta gacalèn le'e suele dyè'èdi biusanla'adyi'le xnezè' cati gaca zèdi quiele. ⁴ Quie lena' reya'ala' huele purari suele dyè'èdi bi tazèdi gaca quiele dan' rnaole xneza Cristo cuenda gacale ben' nao xnezè' du guicho du la'adyi', gacale ben' bigapa falta.

⁵ Chi nu le'e binezile cabè' reya'ala' huele, ruen zi inabale lao Diuzi gacalènè' le'e ta inezile ca reya'ala' huele. Diuzi sí, huacalènè' le'e ta inezile. Biidza' Diuzi le'e dan' inabalenè' ta inezile ca reya'ala' huele. ⁶ Pero cati inabale Diuzi gacalènè' le'e, bihuele pensari chi usanla'adyi'nè' le'e, huacalècazè' le'e. Chi huele pensari usanla'adyi'nè' le'e, lena' naca pensari quiele ca quie nisa yao že ru'a be len, reru'unnan len tzala' huio lao yu bidyi. ⁷ Nu ben' naca cana', bireya'ala' huenè' pensari hue' Diuzi lèbè' ca ta inabanè' Diuzi. ⁸ Cana' naca quie yaca ben' rue cana', como dan' chi racajè' chopa pensari, zèdi nacan quiejè', na' biruejè' pensari inaojè' tuzi xneza Diuzi.

⁹ Na'ra nia' le'e, bicha', ben' yèchi', ben' bi de quie: Reya'ala' yedaohuele sule gusto cabè' tahuen gula babè Diuzi quiele sunè' dispuesto ta yezi'nè' le'e guibá. ¹⁰ Lèscan' rnia' le'e, bicha', ben' uña'a, ben' bibi rdziogue: Reya'ala' yedaohuele sule contento cati rue benè' le'e bizinaquezi redzagalaole nun quie naole xneza Cristo. Cana' reya'ala' huele como dan' tzadica'zi za'le lao yedyi layu. Naca quiele ca quie tu yo guixi' bisun zidza. ¹¹ Cati rna' oba zi' rbe' tala, cana' ibidyi guixi' iguino yo quien, cana' rniti yela' badan quien. Lèscana' nacarè quie yaca ben' uña'a. Tu chopa dzazi rdajè' ruejè' negocio, caora na' laratitejè'.

Hue Diuzi ra'o prueba chi tali naoro xnezè'

¹² Huela'iya Diuzi nu ben' sue dyè'èdi cabè' prueba hue Diuzi lèbè', porque caora banaquè' prueba, na'ra gaca quienè' ca quie ben' nuzu coron ca coron nuzu rey. Hue' Diuzi lèbè' yela' neban tuzioli cabè' unè' huenè' quie ben' nadyè'è lèbè'. ¹³ Cati racaro pensari huero tamala, bigacaro pensari chi Diuzi rudze'nè' ra'o pensari mala, porque Diuzi biyu'unè' pensari ta huenè' tamala, lèscan' birudze'nè' ra'o pensari huero tamala. ¹⁴ Pero cani nacan: Pensari quieziro ruenan ra'o mandado huero ta rnazin quiero huero tamala. ¹⁵ Nun quie pensari mala yu'uro, lena' inèn ra'o huero tamala cuèchin dula' xquia quiero. Na'ra cati baoyè dula' xquia quiero, barnabè'n ra'o, caora na' udyiagui'n ra'o.

¹⁶ Bicha', ben' nedyè'èda', rnia' le'e bisi'le cuinle yè'. ¹⁷ Puro ta naca huen gula za' guibá gun Diuzi ra'o. Lèbè' nabèchinè' xni' guibá. Tuzi ca naca Diuzi tuzioli, bibetza'nè'. ¹⁸ Según ca una Diuzi huenè' quiero dza na'te, cana' bènè' na'. Use'elè' di'idza' la'iya quienè' cuenda hue quiero quienè' gata' yela' neban quiero tuzioli. Naca quiero ca quie usecho nèro ta yezi' Diuzi.

Ni rguixogue'n ca re'en Diuzi huero inaoro xnezè' dyè'èdi

¹⁹ Quie lena', bicha', rnia' le'e reya'ala' ye uzè'nagale dyè'èdi huele cuenda xti'idza' Diuzi. Reya'ala' huele pensari biinèle con ganzi. Reya'ala' gacale benè' zela'adyi', bigacale ben' huin'. ²⁰ Porque chi rdza'ro rdilalèro laguedyiro, bisaque' huero tadya'a cabè' re'en Diuzi huero. ²¹ Quie lena' bira inaole huele ca tamala gula rue yaca benè'. Reya'ala' inaole huele ca naca di'idza' la'ia quie Diuzi ta bayu'u guicho laxta'ole, bihuele cuinle ben' ze. Pues fuerza valor nu'a di'idza' la'ia quie Diuzi ta gacalèn ra'o yedyinro guibá.

²² Quie lena' uzule di'idza' huele mandado cabè' mandado rue di'idza' la'ia quie Diuzi. Biinaro tu yezilen, tu ina'zilen, porque chi tu yezilen, tu ina'zilen, cana' si'le cuinle yè'. ²³ Chi yeziro ina'ziro biuzuro di'idza' huero ca mandado rue xti'idza' Diuzi, naca quiero ca quie tu ben' rna' laohue lao huan. ²⁴ Tzadica'zi baona'nè' laohuè' lao huan, na'ra bagula'adyi'nè' bi naque laohuè'. Cana' naca quie ben' yezi ina'zi xti'idza' Diuzi. Tu rezinè' rna'zinè', na'ra bagula'adyi'nè' len. ²⁵ Pero nu ben' re rna' dyè'èdi xti'idza' Diuzi, bireza'la'adyi'nè'n ruzunè' di'idza' ca na xti'idza' Diuzi, na'ra huella'ia Diuzi lèbè' cabè' ruenè'. Naca xti'idza' Diuzi di'idza' dya'atzegue. Ruen ra'o mandado chi hue quiero len gacaro ben' libre, suro contento cabè' ruero.

²⁶ Chi ina nu ben' naquè' ben' quie Diuzi, pero binezinè' hue'lènè' benè' di'idza' zela'adyi', rnènè' di'idza' yaladyi' rulidzè' benè', na'ra rzi'nè' cuinnè' yè'. Binaquè' sirve para gaquè' ben' quie Diuzi. ²⁷ Pero cani re'en Xuziro Diuzi huero inaoro dyè'èdi xnezè', re'ennè' gacalèro xcuidi' huezèbi, re'ennè' gacalèro nigula baguti xquiuhue ta rzioyuenè', re'ennè' taro dyè'èdi bi-inaoro neza mala cabè' tamala de lao yedyi layu.

2

Reya'ala' huero tuzi ca huelèro benè'

¹ Bicha', le'e ben' nao xneza Señor quiero Jesucristo, reya'ala' huele tuzi ca huelèle benè'. ² Por ejemplo, chi za' ben' uña'a ga regu'udi'le, ben' yu'u tu anillo de oro zbenè', chi za'nè' nacuè' tu la'ari' dya'a, lèscan' chi za' tu ben' yèchi' nacuè' tu la'ari' gula, ³ chi rapale bala'ana dyè'èdi ben' uña'a rëbilenè': "Ure' gan' ni ga naca dya'a", pero chan' na' ben' yèchi' rëbilenè': "Ude uzuli na'la", o chi rëbilenè': "Ure' layu", cala tadya'a ruele dan' ruele cana'. ⁴ Chi biruele tuzi ca ruelèle benè', biruele tahuen. Barulu'ena quiele biyu'ule pensari dya'a.

⁵ Bicha', ben' nedyè'èda', uzè'nagale dyè'èdi cabè' rnia': Entre yaca ben' nita' lao yedyi layu, ulio Diuzi yaca ben' yèchi' tacuenda gaca huen gula quiejè' inaojè' xneza Cristo yedyinjè' guibá ga rnabè' Diuzi cabè' una Diuzi huenè' quie ben' nadyè'è lèbè'. ⁶ Pero le'e baruele yela' stu' quie yaca ben' yèchi'. lèBinezile ben' uña'a, ben' si' le'e yè', lèjè' cuanjè' ta de quiele hasta rehua'ajè'. lè'e lao ben' rnabè'? ⁷ ¿Binezile leyaquè' rnëbizoyaquè' quie Cristo, ben' naca Señor quiero, ben' rzëtoro laohue?

⁸ Chi tali uzule di'idza' ca mandado rue ley rnabè'ra quie Diuzi, baruele huen. Lèley na' rguixogue'n cani: "Idyè'èle laguedyile ca idyè'èle cuinle."

⁹ Pero chi biruele tuzi ca ruelèle benè', cana' ruele xquia quiele, napale dula' biruzule di'idza' ca mandado rue Cristo ra'o. ¹⁰ Chi uzuro di'idza' con cabè' na lao ley pca'n Diuzi lao na'a Moisés, pero na'a chi baoquixiro tun cabè' mandado ruen ra'o, na'ra de dula' quiero ca quie ben' baoquixi yugulu mandado ruen. ¹¹ Pues dza na' una Diuzi rëbinè' ra'o: "Bireya'ala' talèle

nigula binaca žgulale”, pero lëscan' una Diuzi: “Bireya'ala' gutile benë'.” Quie lena' la'acazi birdalële nigula binaca žgulale, pero chi babëtile benë', naca quiele ca quie ben' biruzu ni tu di'idza' con cabë' rna lao ley quie Diuzi. ¹² Reya'ala' huele pensari dyë'ëdi tale du guicho du la'adyi'le como ben' hue cuenda lao Cristo chi bë quiele cabë' unanë' huele ta gacale ben' libre. ¹³ Pues con nu ben' biyeyëchi'la'adyi' benë', lëscan' biyeyëchi'la'adyi' Diuzi lëbë' dza gaca juicio. Pero con nu ben' beyëchi'la'adyi' benë', huenë' gan yeyëchi'la'adyi' Diuzi lëbë' dza gaca juicio.

Bireya'ala' tu yeziro xti'idza' Diuzi

¹⁴ Na' rnia' le'e bicha': ¿Ga rue dyin dan' inale rnaole xneza Cristo, chi biruzule di'idza' quienë' yeyëchi'la'adyi'le benë' ca mandado bënë' quiero? Chi huele cana', lena' rulu'en quiele binaole xneza Cristo, na' biyezi' Diuzi le'e yedyinle guibá. ¹⁵ Inaro chi zu nu bichiro, o nu zanro, ben' naorë xneza Cristo, pero rdzioguenë' zabanë', rdzioguenë' ta gaonë', ¹⁶ na'ra chi nu le'e inale rëbile ben' rdziogue, ben' bibi de quie: “Beyo dyë'ëdi. Utaco' cuino' quie tazaga. Udao dyë'ëdi”, pero bibi bënë' ta idaconë' quie tazaga, bibi bënë' ta gaonë', chi cana' bële, ¿bizi bële ta gacalële ben' rdziogue, bële cana'? ¹⁷ Cani nacan: Chi biuzuro di'idza' ca mandado bë Cristo ra'o, lena' rulu'en quiero binaoro xneza Cristo, lena' rulu'en quiero di'idza' dachi rnëro inaro naoro xneza Cristo.

¹⁸ Pero bala le'e inale biruen zi uzuro di'idza' ca mandado bë Cristo. Inale tu neziziro bidë' gutië' lë'e yaga cruzo, quie lëzin yedyinro guibá. Pero nënë' rnia' le'e, ruecazin zi uzuro di'idza' ca mandado bë Cristo, porque chi biuzuro di'idza' ca mandado bë Cristo, lena' rulu'en quiero binaoro xnezë'. ¹⁹ Pues banezile dyë'ëdi tuzi Diuzi zu. Tahuen na' banezile cana'. Pero bigala'adyi'le banezirë yaca taxi'ibi' tuzi Diuzi zu. Pues hasta tu rziziyacan rdzebiyacan quie Diuzi. Pero la'acazi neziyacan tuzi Diuzi zu, biyezi' Diuzi leyacan yeyoyacan guibá. ²⁰ Pero pensari tondo yu'ule. ¿Binezile di'idza' dachi rnëro chi inaro naoro xneza Cristo, na' biuzuro di'idza' ca mandado bënë' ra'o? ²¹ Na'ra blë'ë Diuzi xuzixta'oro Abraham ben' laxta'o yëri nun quie dan' bzu Abraham ca di'idza' bë'lë Diuzi lëbë'. Bzunë' ži'inë' Isaac lao ru'aba ca quie gun quie Diuzi lao laza bia guixi'. ²² Pues claro nacan cabë' bë'lë Diuzi Abraham. Nun quie dan' bzu Abraham di'idza' ca mandado bë Diuzi lëbë', cana' blu'en quie Abraham talicazi uzudyi'ilënë' Diuzi. ²³ Cana' uzu di'idza' con cabë' rna lë'ë guichi la'iya quie Diuzi cani: “Como dan' uzudyi'ilë Abraham Diuzi, quie lena' blë'ë Diuzi lëbë' ben' laxta'o yëri.” Cana' guca una Diuzi rëbinë' Abraham: “Nacaro amigo.”

²⁴ Lëscan', claro nacan cala tu neziziro zu Diuzi, na' ilë'ënë' ra'o ben' laxta'o yëri, yezi'në' ra'o. Pero lëscan' ruen zi uzuro di'idza' ca mandado ruenë' ra'o. ²⁵ Cana' bë'lë Diuzi tu nigula guti' gusto quie lao Rahab dza na'te. Pues lënigula na' gucalënë' chopa ben' Israel, ben' bida balarazi dena' ca naca yedyi quienë'. Caora na' bë'ne' lëjë' posada quiejë'. Blu'enë' leyaquë' ga zu neza ta yežunoyaquë' lao yedyi yezal'jë' balarazi, porque gu'un rey quie yedyi na' gutinë' lëjë'. Na' caora guca dilalë ben' yedyi quie nigula na', len ben' Israel, caora na' pte psela Diuzi nigula na' len familia quienë', bigutiyaquë'. ²⁶ Pues cani nacan: Cati babero bichi be quiero lu'u cuerpo quiero, cana' banati cuerpo quiero, bira bisirve. Lëscan' ra'o, chi biuzuro di'idza' huero ca mandado rue Cristo ra'o, nacaro ca quie ben' huati, bibi sirve inaro rnaoro xneza Cristo.

3

Reya'ala' gaparo cuidado cabë' di'idza' hue'lëro benë'

¹ Bicha', gapale cuidado cabë' ruele usëdile benë' xti'idza' Diuzi, porque nezile cabë' hue Diuzi quie ra'o ben' rusëdi. Nezile cati yezi' Diuzi cuenda quiero, na'tera inaba Diuzi ra'o chi bëro cuinro cabë' psëdiro benë' tula, cabë' psëdirojë' reya'ala' hueyaquë'. ² Yuguluro rquixiro, biru'elëro benë' puro di'idza' dya'a. Chi zu tu ben' birquixi, ben' biru'elë benë' di'idza' mala, naquë' ben' laxta'o li, nezinë' inabë'në' cuinnë'. ³ Na' inia' le'e chopa ejemplo. Cati rudze'ro freno ru'a caballo, cana' ucaxoroba' ta tzahua'aba' ra'o gan' re'enro tzioro. ⁴ Lëscan' ulehue pensari ca naca quie yaca barco. La'acazi nacan barco yela, la'acazi be fuerte rudyigan len, huaca usa' ben' rusa' len con tuzi yaga ta'a dao' ta tziolënë'n ga re'ennë' tzioguë'. ⁵ Cana' nacarë' quie ludyiro. Nacan tu parte dao' bicu' cuerpo quiero, pero ruenan tazëla quiero. Lëscan' cana' nacarën quie tu gui' dao'. La'acazi nacan gui' dao'zi, taže guixi' yaga uzeinan. ⁶ Naca ludyiro ca quie gui' re' gabila. Tanto ruelëro ludyiro tamala udyiagu'ro benë', cana' udyiagu'ro cuinro. Nun quie lena' quilon tazëdi gula quiero dza rdao' lao yedyi layu. ⁷ Huazaque' ucaxoro nutezi bia guixi', nutezi bguini, nutezi bëla. Pues hasta yaca bia yu'u lu'u nisa huazaque' ucaxoroba'. ⁸ Pero nunu saque' ucaxo ludyinë'. Bicueza ludyiro quilon tamala quiero. Naca ludyiro ca quie lei bëla ta yudzu veneno ta udyiagu' benë'. ⁹ Con tuzi ludyiro tzionla'adyi'ro Xuziro Diuzi, na' udze'de'ro laguedyiro, ben' bzalo Diuzi ca naquë' cuinnë'. ¹⁰ Tuzi ru'aro rero di'idza' huen tzionla'adyi'ro Diuzi, na' reron di'idza' mala udze'de'ro benë'. Bicha' bireya'ala' huele cana'. ¹¹ ¿Binezile ca naca ga ralo nisa? ¿Binezile biralo chopa cue' nisa gacan nisa zixi, na' gacan nisa sla'? ¹² Bicha', rnia' le'e: ¿Huazaque' cuia yaga hui tazëxi tula? Pues bisaque'. Lëscan', rnia' le'e: ¿Huazaque' cuia lao luba bedzuli' hui? Pues bisaque'. Lëscan' ga ralo nisa, bisaque' gacan nisa zna'a, na' gacan nisa zixi.

Ca reya'ala' huero chi tali rioñe'ero quie xneza Cristo

¹³ Ca naca le'e, chi tali rioñe'ele quie xneza Cristo, reya'ala' huele tahuen cuenda ulu'en quie tali barioñe'ele. Reya'ala' huele ca rue ben' rioñe'e, bihuele cuinle ben' ze. ¹⁴ Chi racazë'le laguedyile, na' naca laxta'ole yaladyi'. Chi puro cuinzile re'enle gaca tahuen quiele, na' biinale rioñe'ele quie xneza Cristo, porque yë' rzi'le binaca tali ca nale. ¹⁵ Chi huele cana', cala pensari quie Diuzi yu'ule, den' pensari quie benë', pensari quie xan' taxi'ibi'. ¹⁶ Porque cati racazë' benë' laguedyiaquë', cati re'enyaguë' puro cuinziaquë' gaca tahuen, quie lena' gaca tazëdi huaca dilayaquë', gaca zë cue' tamala. ¹⁷ Pero yaca ben' rioñe'e dyë'ëdi quie xneza Cristo, lëjë' sí, rnaoyaquë' tuzi xneza Cristo, biyu'ujë' pensari mala. Nacayaquë' ben' gaxo, ben' huen, ben' yu'u pensari, ben' reyëchi'la'adyi' laguedyi, ben' rguixogue' dyë'ëdi ca nacan, ben' rda du guicho du la'adyi'. ¹⁸ Con nu ben' rguilo ta cuëchi laxta'o benë' chizi, huaca huen quiejë' lao Diuzi, ruejë' ca re'en Diuzi huejë'.

4

Bireya'ala' taro cabë' rda yaca ben' nita' lao yedyi layu

¹ ¿Gaži za' ralo yela' huedila quiele? Pues za' ralon nun quie pensari mala yu'u lu'u guicho laxta'ole. Lena' runën le'e lu'u guicho laxta'ole rdale rdilalële laguedyile. ² Le'e re'enle ta de quie laguedyile, pero como binacan quiele, na'ra rutile laguedyile cuenda si'le ta de quienë'. Rza'la'adyi'le ta de quie laguedyile, pero como biden quiele, na'ra rzulaole rdilale. Bide ta rdzioguele como dan' birnabalen lao Diuzi. ³ Chi inabalen lao Diuzi, bibi

gunnë' le'e, porque dan' biyu'ule pensari dya'a inabalen. Yu'ule pensari ta huele ta rnazin quiele. ⁴ Le'e bire'enle inaole tuzi xneza Diuzi. ¿Binezile chi huelële tuže ben' rudie xneza Diuzi, na' nacale enemigo quie Diuzi? Nutezi ben' re'en huelë tuže ben' rudie xneza Diuzi, na'ra banaca ben' na' enemigo quie Diuzi. ⁵ Quie lena' rnën lë'ë guichi la'iya quie Diuzi cani: “Lega nedye'ë Diuzi Bichi Be quienë', bdze'në' lënë' lu'u guicho laxta'oro.” ⁶ Cana' taze racalë Diuzi ra'o. Lena' rguixogue'n lë'ë guichi la'iya quie Diuzi caniga: “Bire'en Diuzi ca rue ben' rue že cuine, pero reyëchi'la'adyi' Diuzi yaca ben' nao xnezë' du guicho du la'adyi'.” ⁷ Quie lena' reya'ala' uzule di'idza' dyë'ëdi ca na Diuzi le'e. Chi bihue'le lato inabë' xan' taxi'ibi' le'e, cana' usanla'adyi'n le'e yežunona. ⁸ Ulehuelë Diuzi tuže, cana' huelë Diuzi le'e tuže. Le'e, ben' napa dula' xquia, reya'ala' usanla'adyi'le pensari mala quiele. Le'e, ben' re'en inao chopa neza, ulehue pensari bi neza inaole. ⁹ Huele pensari ca bayëchi' raca quiele nun quie dula' xquia quiele. Biužidyile ca ruele. Pues reya'ala' cuedyile gacale bayëchi'. Bisule alegre. Pues reya'ala' cue'le chizi yeyuele pensari cabë' raca quiele. ¹⁰ Ulequitzu žibile lao Diuzi, na'ra huenë' le'e ben' že.

Bireya'ala' inëbızoro quie laguedyiro

¹¹ Bicha', bireya'ala' inëbızole mala quie laguedyile. Chi inëbızole quie laguedyile, ruen quiele rnëbızole quie ley pca'n Diuzi lao na'a Moisés. Chi inëbızole quie ley na', na' babële cuinle ben' rnabë'ra quie lao ley na'. Pero cabë' reya'ala' huele, reya'ala' uzule di'idza' cabë' rna lao ley na', ¹² porque tuzi ben' zu, ben' pca'n ley, ben' naca ben' rnabë'. Lëlëbë' ute uselanë' benë', o chi ise'elë' benë' lao gui' gabila. ¿Pero nuži naca le'e re'enle inëbızole quie laguedyile?

Bineziro bi ta za' gaca quiero uxe

¹³ Ulezënaga le'e ben' rnë: “Na'a, uxe, sa'ro tziro yedyi tula tzasuro tu iza huero negocio huero gan.” ¹⁴ Pero nica nezile bi ta za' gaca quiele uxe. Quie lena' inaba' le'e, ¿cabizi naca quiero dza rdaro lao yedyi layu? Pues naca quiero ca quie tu beo lasi tzadica' reyulan. ¹⁵ Pero reya'ala' inale cani: “Chica re'en Diuzi, huazuro lao yedyi layu, huero bi dyin re'enro huero.” ¹⁶ Pero le'e, lega raxele huele cuinle ben' že cabë' rnële. Binacan huen ca ruele ruele cuinle ben' že. ¹⁷ Chi le'e nezile huele tahuen, na' biruelen, lena' nacan xquia quiele.

5

Ni rguixogue'n cabë' naca quie ben' uña'a

¹ ¿Ulezënaga dyë'ëdi cabë' naca quie ben' uña'a! Reya'ala' cuedyiya'yaquë' quie tamala za' quieyaquë' yedzagalaoyaquë'. ² Ca naca yela' uña'a quieyaquë', huabiagui'n gudzon itabon. Lëscana' nu zabajë' dya'a, huatabon gao biazidzo len. ³ Lëscana' oro plata quiejë', huabiagui'na gaca ditoguen. Ulu'en ca tamala bëjë' bëlëjë' ben' yëchi'. Lena' huen quiejë' ca quie ben' žuba lagui', uzeinan leyaquë'. Baptupajë' yela' uña'a quiejë' na'adza cati baruen bago iyudyi yedu quie yedyi layu. ⁴ ¡Le'e ulezënaga! Rbedyi yaca ben' rue dyin quiejë', porque rezi'jë' cosecha quieyaquë', na' racayaquë' zi', pero birguizuyaquë' leyaquë'. Lena' raona leyaquë' xquia lao Diuzi. Na'ra Diuzi rnabë'në' guibá, rnabë'në' lao yedyi layu, banezinë' cabë' rusaca ben' uña'a yaca ben' rue dyin quieyaquë'. ⁵ Gan' ni lao yedyi layu, puro de lujo re'enyaquë'. Rza'la'adyi'yaquë' tuz ta rnan quie cuerpo quiejë'. Ruejë' baneza cuinziyaquë'. Ruzëni' cuinyaquë' cabë' re'eni bëdyihuaga.

Baruen bago dza hue Diuzi leyaquë' castigo gatiyaquë' ca rati bëdyihuaga. ⁶ Mandado quiejë' aochuguli yaca ben' r nabë' ta gutijë' ben' bibi tamala bë, ben' birzaque' hue defender cuine.

Reya'ala' cuezaro dyë'ëdi dza yeguida Cristo, hue'lëro Diuzi di'idza'

⁷ Pero le'e bicha', reya'ala' cuezale dyë'ëdi dza cati yeguida Cristo lao yedyi layu. Naca quiero ca quie ben' rue dyin guixi'. Rbezanë' yela' nisa yo, na'ra gazanë' rbezanë' dyë'ëdi yezi'në' cosecha ca naca ta rdzioguenë'. ⁸ Lëscan' le'e, reya'ala' cuezale dyë'ëdi huele tuzi pensari, porque baruen bago dza yeguida Jesucristo lao yedyi layu. ⁹ Bicha', biinële contra laguedyile, porque huachugubë' Diuzi le'e chi inële contra laguedyile. Naca Diuzi ben' ichugubë' quiero yuguluro. Ilë'ëti'zi nerdziogue idyin dza huenë' juicio lao yedyi layu.

¹⁰ Bicha', cabë' bë ben' profeta, ben' ulio Diuzi, ben' udixogue' xti'idzë' dza na'te, bezueyaquë' bedzagalaoyaquë', cana' reya'ala' huele le'e. ¹¹ Pues neziro huela'ia Diuzi nu ben' rzue redzagalao, ben' biusan xneza Cristo. Babele cabë' bë Job, ben' unita' tiempote. Dyë'ëdi uzuenë' bedzagalaonë'. Lëscan' nezile cabë' gualë Diuzi lëbë', bro quienë' huen. Lena' rulu'en reyëchi'la'adyi' Diuzi benë', re'ennë' gacalënë' ra'o.

¹² Nacan belao cabë' rnia' le'e ni, bicha'. Biugunle ta dyia guibá, biugunle ta de lao yedyi layu. Biugunle Diuzi con ganzi. Bisi'le benë' yë'. Dula'adyi'le inale: "Huazaque'", dula'adyi'le inale: "Bisaque'". Na'ra bihue Diuzi xquia quiele.

¹³ Chi nu le'e redzagalaole, reya'ala' ulidzale Diuzi hue'lënë' di'idza'. Chi nu le'e sule contento, reya'ala' gulale alabanza. ¹⁴ Chi nu le'e raca zhue'le, reya'ala' guëzile guida ben' napa dyin quie ben' nao xneza Cristo ta ulidzajë' Diuzi ga dele ilëpiyaquë' le'e aceite rzëtoryaquë' lao Jesucristo. ¹⁵ Na'ra cati ulidzayaquë' Diuzi hue'lëyaquë' lëbë' di'idza' du guicho du la'adyi'yaquë', caora na' iyacale yeyue Diuzi le'e. Chi bële xquia, huezi'ze Diuzi dula' xquia quiele. ¹⁶ Quie lena' reya'ala' ixubalëpile lao laguedyile, ben' nao xneza Cristo, chi bële xquia. Lëscan' reya'ala' ulidzale Diuzi inabalenë' gacalënë' laguedyile, ben' nao xneza Cristo, cuenda sule huen. Huacalëcazi Diuzi nu ben' huen, ben' hue'lë lëbë' di'idza' du guicho du la'adyi'. ¹⁷ Bigala'adyi'le ca guca quie ben' profeta Elías. Guquë' benë' ca ra'o. Pero caora unabané' Diuzi du guicho du la'adyi'në' ta bihuen nisayo, na'ra tzona iza yu gatzo biben nisayo. ¹⁸ Ude na' benabanë' lao Diuzi ta huen nisayo, na'ra bela' nisayo, bezi'yaquë' cosecha quieyaquë'.

¹⁹ Na'ra rnia' le'e bicha'. Chi nu laguedyile, ben' nao xneza Cristo, bapsanla'adyi'në' xneza Cristo, reya'ala' gacalënë' ta yenaohuë' xneza Cristo tatula. ²⁰ Reya'ala' inezile chi gacalë ben' psanla'adyi' xneza Cristo ta yenaohuë' xneza Cristo tatula, babële tahuen ta bicuiagui'në' bira inahue' neza tula, neza zio gabila. Lëscan' nun quie gacalënë', huazi'ze Diuzi dula' xquia quie ben' na', la'acazi napë' xquia ze. Amén.

GUICHI NĒRO BĒ SAN PEDRO APÓSTOL

Bē Pedro tu guichi ni, use'ela'nē'n lao yaca ben' nao xneza Jesús, yaca ben' abdzatza uza' yedyi quie

¹ Nē'ēdi', Pedro, naca' apóstol quie Jesucristo. Bia' guichi ni use'ela'n laole le'e ben' abdzatza uza' yedyi quie ziole yedyi tula, ziole yaca yedyi nebaba Ponto, len yaca yedyi nebaba Galacia, len yaca yedyi nebaba Capadocia, len yaca yedyi nebaba Asia, len yaca yedyi nebaba Bitinia. ² Ulio Xuzi Diuzi desde tiempote gacale ben' quienē' según ca unanē' huenē' quiele. Lao na'a Bichi Be quienē' ulionē' le'e tacuenda inaole xneza Jesucristo yeyēri guicho laxta'ole por nun quie gutinē' lē'ē yaga cruzo ulato ren quienē'. Rulidza' Diuzi ta huela'iyane' le'e cuēchinē' chizi lu'u guicho laxta'ole.

Rbezaro dza yeyoro guibá

³ Huero Diuzi, ben' naca Xuzi Señor quiero Jesucristo, ben' ze. Beyēchi'la'adyi'nē' ra'o, banaca quiero ca quie ben' bagolo tacubi. Lena' rbezaro dza yezinē' ra'o gata' yela' neban quiero tuzioli cabē' bēnē' quie Jesucristo, psebannē' lēbē'. ⁴ Cana' yega'nnan quiele ca ta pcueza Diuzi guibá gunnē'n quiele. Ca ta gun Diuzi nacan huen gula, binaquixin ni tu tamala. Biyeyudyi yedu yeyulan tuzioli. ⁵ Nun quie naole xneza Jesús, nacui'o Diuzi le'e conlē yela' huaca quienē' hasta dza yeyudyi yedu quie dyilayu bade yela' neban quiele tuzioli. Hora na', hora yeyudyi yedu dyilayu, ulu'e Diuzi le'e ca tadya'a gula bapcuezē' quiele guibá.

⁶ Quie lena' redaohuele ba'ala'cazi rnaban yedzagalaole taže tu tiempo dao' tacuenda ilē'ē Diuzi chi du guicho du la'adyi'le naole xnezē'. ⁷ Rnaban udze'ro yo lagui' ta racan ca oro ta gaca prueba chi tali nacan oro. Lēscan' le'e, rnaban gacale prueba ilē'ē Diuzi chi du guicho du la'adyi'le naole xnezē'. Na' chi biusanle xneza Jesús, lena' zaca'ran ca zaca' oro. Lena' yeyula'adyi' Diuzi le'e yēbinē' bēle huen, yeron dya'a quiele laonē' dza yeguida Jesucristo.

⁸ Le'e nedyē'ēle Jesucristo ba'ala'cazi binelē'ēlenē'. Caora na' nun quie naole xnezē' ba'ala'cazi binelē'ēlenē', zudyi'ilēlenē'. Tantozi redaohuele, birdzelele di'idza' inale cabē' naca yela' redaohue quiele. ⁹ Cuenda quie naole xneza Jesucristo, cana' biiniti bichi be quiele, cana' bade yela' neban quiele tuzioli.

¹⁰ Yaca ben' unita' tiempote, ben' psēdi guichi quie Diuzi, psēdijē' ca cule hue Diuzi quiele gata' yela' neban quiele tuzioli, na' unajē' quie tadya'a gula de quie Diuzi gunnē' quiele. ¹¹ Dza na' use'ela' Cristo Bichi Be quienē' ta uzioñe'enē' yaca ben' psēdi guichi quie Diuzi tiempote. Bzioñe'enē' lējē' tu ta binegaca quie Cristo. Bzioñe'enē' lējē' cabē' yedzagalao Cristo, pero caora yeyudyi yedzagalaonē', gapala'n yaca benē' lēbē' taže gula. Psēdijē' ca ta bzioñe'e Bichi Be quie Cristo lējē'. Bējē' pensari nu guida. Bējē' pensari bata gaca cana'. ¹² Pero bzioñe'e Diuzi lējē' de que cabē' bedzelejē' psēdijē' bigucan para lējē', gucacazin para ra'o. Desde guibá use'ela' Diuzi Bichi Be quienē' ta gacalēnē' yaca ben' rguixogue' xti'idza' Diuzi ta pxi'idze'jē' le'e con cabē' una ja ben' unita' tiempote. Pues lente ja ángel re'enjē' isēdijē' con cabē' una yaca ben' unita' tiempote.

Re'en Diuzi gacaro ben' laxta'o yēri

¹³ Quie lena' sule listo tzu'ule gracia. Sudyi'ilēle Diuzi cuezale dyē'ēdi ca tadya'a gula gaca quiele dza yeguida Jesucristo. ¹⁴ Ca rale ži'iro quiero,

cana' reya'ala' galele quie Diuzi. Bihuele ta rnazin quiele cabë' bële dza na', dza caora binenaole xneza Jesús. ¹⁵ Ta reya'ala' huele, reya'ala' gacale ben' laxta'o yëri, porque Diuzi, ben' ulionë' le'e, naquë' ben' laxta'o yëri gula. ¹⁶ Porque rnën lë'ë guichi la'ia quie Diuzi cani: "Gacale ben' laxta'o yëri, porque naca Diuzi ben' laxta'o yëri gula."

¹⁷ Chi ulidzaro Diuzi yëbironë': "Xuzindo' luë'", tana' reya'ala' gaparo cuidado bibi huero tu lala rdaro lao yedyi layu, porque nezi Diuzi nu ra'o rue tahuen, nu ra'o rue tamala. Tuzi ca nezi Diuzi quiero. ¹⁸ Pues bapte psela Diuzi ra'o. Babecubinë' pensari quiero ta bira huero tamala ca ta mala bë xuzixta'oro. Ta bë Diuzi quiero ruenan ca quie ben' ya'ohue ra'o. Pero dyë'ëdi nezile quele con ta yeyudyi yedu quie como ca oro o plata ya'ohue Diuzi ra'o, ¹⁹ pero conlë ren quie Cristo ya'ohue Diuzi ra'o. Lëbë' gutiguë' lë'ë yaga cruzo ca gun quie Diuzi ulato ren quienë'. Naquë' ca quie tu beco' zi'ila' dya'a gula ta hue'ro Diuzi. ²⁰ Tu binegata' yedyi layu una Diuzi ise'elë' Cristo lao yedyi layu. Na'ra tiempo quiero, tiempo rdaro lao yedyi layu, bapse'ela' Diuzi Cristo bidanë' bënë' tadya'a quiero. ²¹ Lao na'a Cristo naoro xneza Diuzi. Pseban Diuzi Cristo, bënë' lëbë' ben' ze. Por nun quie dan' zudyi'ilëro Diuzi, cana' rbezaro dza yezi'në' ra'o.

²² Na'ra le'e, barue quiele di'idza' li quie Diuzi, baneyëri guicho laxta'ole lao Diuzi tacuenda idyë'ële yaca ben' bichiro. Du baneyëri lao Diuzi, cana' du guicho du la'adyi'le reya'ala' idyë'ële ben' bichiro, yaca ben' nao xneza Jesús. ²³ Banaca quiele ca quie ben' bagolo tacubi, pero quele por nun quie xuzile zna'le, den' por nun quie xti'idza' Diuzi. Pues quie xti'idza' Diuzi, biyeyudyi yedu quien, nebannan tuzioli. ²⁴ Cana' rnën lë'ë guichi la'ia quie Diuzi cani:

Yugo benë' naca quiejë' ca quie guizi, como tu chopa dzazi yeyudyi yedu quiejë'.

Lëscan' nacarë ta de quiejë' ca quie yo guixi', como lëzirë tu chopa dzazi yeyudyi yedu quien.

²⁵ Pero xti'idza' Diuzi, tuzioli biyeyudyi biyedu quien.

Rguixogue'n quie yela' neban tuzioli. Lëdi'idza' na', di'idza' la'ia quie Diuzi, lena' baodixogue' yaca benë' le'e.

2

¹ Quie lena' bireya'ala' huele ni lë'ëti' tamedian. Bisi'le benë' yë', biinaole chopa neza, biyezë'le benë', bihue'lële benë' di'idza' bižu. ² Ca bdao' zagolo are'embi' ga'adyibi' ta si'bi' fuerza, cana' reya'ala' gue'enle isëdile xti'idza' Diuzi ta si'le fuerza inaorale mazara xneza Jesús, inita'le dya'a laohuë'.

³ Cana' re'ennan huele chi tali aoyoñe'ele naca Señor quiero ben' la'ia.

Naca Cristo ca quie yo naban zaca'n taze

⁴ Ulenao Cristo, ben' naca ca quie tu yo naban zaca'n taze, pero uru'un yaca benë' len tzala'la. Pero Diuzi sí, bezi'në' lëbë' rlë'ënë' lëbë' ca quie tu yo naban zaca'n taze. ⁵ Cana' ruerë Diuzi conlë le'e. Rlë'ënë' le'e ca quie tu yo naban, ben' rue quie lëbë'. Rlë'ënë' le'e ca quie tu idao' ga zu Bichi Be quienë'. Rlë'ënë' le'e ca quie yaca pxuzi la'ia, ben' rudya gun quienë' lao ru'aba por nun quie Jesucristo, lega reyunla'adyi' Diuzi len. ⁶ Quie lena' rnën lë'ë guichi la'ia quie Diuzi cani:

Ise'ela' zi'ina' ciudad Sión, naquë' ca quie yo belao, yo zaca' taze. Nutezi sudyi'ilë lëbë', huaron dya'a quienë' laohua'.

⁷ Para ra'o, ben' nao xnezë', naca Jesús ca quie tu yo zaca'n taze. Pero para ben' binao xnezë', naca Jesús ca quie tu yo ta bibi zaca', na' aoru'unyaquë'

lëbë'tzala'la. Quie lena' naca quieyaquë' con cabë' rnën lë'ë guichi la'ia quie Diuzi cani:

Aoru'un yaca benë' tzala'la yo belao, yo zaca'n taže, pero Diuzi babezi'në' yo belao ta uru'un benë', bezunë'n xlaton.

⁸ Lëscan' ga tula rnën lë'ë guichi la'ia quie Diuzi cani:

Naquë' ca quie tu yo ruxitin yaca benë'.

Cana' rnën lë'ë guichi la'ia quie Diuzi. Pues uxitin leyaquë' huabiagui'jë' nun quie bibë'jë' casa quie xti'idza' Diuzi. Cana' una Diuzi gaca quiejë'.

Ta huero dyin quie Diuzi suro lao yedyi layu

⁹ Pero le'e, ulio Diuzi le'e, nacale familia quienë'. Lëscan' naca quiele ca quie yaca pxuzi ruzu di'idza' quie nu rey. Nacale ben' nayëri laxta'ohue lao Diuzi. Nacale ladyina'a Diuzi. Cana' naca quiele cuenda quixogue'le benë' cabë' rue Diuzi, ruenë' tahuen gulatzegue. Lëbë' ulionë' le'e ga uyu'ule udale lao lato lao chula, pero na'a aberole rdale lao lato lao xni'. ¹⁰ Dza na'te binacale ladyina'a Diuzi, pero na'a sí, banacale ladyina'anë'. Dza na'te biyëchi'la'adyi' Diuzi le'e, pero na'a sí, abeyechi'la'adyi'në' le'e.

Rnë Pedro cabë' reya'ala' hue yaca ben' nao xneza Jesús

¹¹ Bicha', nedyë'ëda' le'e, rnabayëcha' laole como ben' naca ladyina'a Diuzi, como ben' zu lao yedyi layu tu chi'zi, biinaole neza mala huele ta rnazin quiele, porque dan' chi huele cana', ruen žudyi yega'nle mala lao Diuzi.

¹² Reya'ala' tzirole neza dya'a lao yaca ben' birue quie xti'idza' Diuzi. Yela' na' ba'ala'cazi chi rudyalala'adyi'jë' le'e inayaquë' ben' mala le'e, hualë'ëcazi'jë' ziole neza dya'a. Cana' cati idyin dza gaca juicio, ba'ala'cazi bire'enjë', decazide huejë' Diuzi ben' že.

¹³ Por nun quie Señor quiero, reya'ala' galele quie yugulu ja ben' rnabë' nita' lao yedyi layu. Reya'ala' galele quiejë' la'achi ben' rnabë'ra, ben' rey,

¹⁴ la'achi ben' rnabë'tica, ben' rue castigo yaca ben' rue xquia, o chi ben' rue bala'ana yaca ben' rue tahuen. ¹⁵ Porque re'en Diuzi huele tahuen ta bigata' causa quiele inë yaca ben' binezi, yaca ben' tondo, condre le'e.

¹⁶ Ca ben' libre reya'ala' huele, pero bihuele pensari ru'en lato huele tamala dan' nacale ben' libre. Nacalan dya'a huele tahuen ca reya'ala' hue yaca ben' quie Diuzi. ¹⁷ Reya'ala' gapala'nle yugulu benë'. Reya'ala' idyë'ële ben' bichiro, ben' nao xneza Jesús. Reya'ala' tzionla'adyi'le Diuzi. Reya'ala' gapala'nle yaca ben' rnabë'.

Reya'ala' huerëro cabë' bë Jesús

¹⁸ Le'e ben' nada'ro, ulegale quie xa'nle, la'acazi ben' rue tahuen quiele, la'alacazi ben' rue tamala quiele. ¹⁹ Porque tahuen na' chi suero huežela'adyi'ro biidza'ro caora cati racaro castigo dula' quie ben' tula, cala dula' quiero. Pues suero biidza'ro, porque nacaro ben' rue bala ca bala pca'n Diuzi lao na'aro. ²⁰ Pero chi racaro castigo, dan' tabala bëro mala, bireya'ala' huero pensari nacaro ben' huen, la'acazi suero huežela'adyi'ro biidza'ro quie castigo quiero. Pues cana' reya'ala' huero como cuinziro naparo dula'. Pero chi racaro castigo ba'ala'cazi bëro tadya'a, chi bidza'ro huežela'adyi'ro castigo quiero, lena' nacan huen lao Diuzi. ²¹ Quie lena' ulio Diuzi le'e guca Jesús castigo dula' quiero, pero uzuenë' bežela'adyi'në' blu'enë' le'e cabë' reya'ala' huele inaole xnezë'. ²² Ni tu bibi tamala bë Cristo, ni tu nunu uži'në' yë'. ²³ Caora ptasi bnio yaca benë' lëbë', biguca lënë' leyaquë' lëbi. Caora psaca benë' lëbë' bizinaquezi, bibžëgadyinë' quieyaquë', den' ulezanë' hue Diuzi juicio. ²⁴ Lëbë' gutinë' lë'ë yaga cruzo aodižuguë' quie xquia quiero. Guta' castigo quienë' tacuenda bigata' castigo quiero, na' bira inao dula'

xquia quiero ra'o. Yela' guti quienë' guta' yela' naban quiero tuzioli. ²⁵ Dza na'te bëro ta rnazin quiero, guca quiero ca quie tu beco' zi'ila' aoniti tu neza. Pero na'a rnaoro xneza Cristo. Rapa Cristo ra'o ca quie beco' zi'ila' bia rapa xa'ne lëba'.

3

Cabë' reya'ala' hue yaca ben' aozì'ja laguedyi

¹⁻² Na'ra le'e yaca nigula bazu ben' quie, re'enda' inia' le'e tu di'idza'. Reya'ala' galele dyë'ëdi quie be'mbyu quiele. Chi rdale neza huen galele quie be'mbyu quiele, pero binao be'mbyu quiele xneza Jesús, gala' inaonë' xneza Jesús nun quie blë'ënë' rdale neza huen, rapala'nle Diuzi. ³ Lëscan' nia' le'e bireya'ala' upa'ale guichole taže. Bireya'ala' uzutza'ole cuinle conlë la'ari' tza'o', o conlë oro. ⁴ Ta reya'ala' huele, inaole cabë' rnën pensari quie Diuzi yu'u lu'u guicho laxta'ole. Huele gaxo, bihuele ru'be. Lena' zaca'n lao Diuzi. Hueyudyi quie tatza'o', pero tu ta zaca'n lao Diuzi biyeyudyin. ⁵ Cana' bë ja nigula unita' dza na'te, yaca nigula bë quie xti'idza' Diuzi. Uzudyi'ilëjë' Diuzi, udapala'një' be'mbyu quiejë'. ⁶ Cana' bë Sara dza na'te, udapala'nnë' be'mbyu quienë', Abraham. Udapanë' lëbë' bala'ana ca xan' yu'u. Chi huele tahuen sudyi'ilële Diuzi, cana' gaca quiele ca quie zi'isuba Sara.

⁷ Na'ra le'e yaca be'mbyu bazu ben' quie, re'enda' inia' le'e tu di'idza'. Reya'ala' tzi'ule dya'a conlë nigula quiele. Reya'ala' gapala'nleyaquë' huezela'adyi'leyaquë', porque binapajë' fuerza cabë' le'e. Cana' reya'ala' huele, porque bega'nle Diuzi lëjë' di'idza' gata' yela' neban' quiejë' tuzioli tuzi ca bega'nle Diuzi le'e di'idza'. Ulehue cabë' nia', porque chi bihuele cabë' nia' ni, bibi zaca' rulidzale Diuzi.

Cati rue yaca ben' mala ra'o bizinaquezi, bigacalërojë' lëbi

⁸ Reya'ala' tuzi pensari huele. Reya'ala' sulële yaca ben' bichile, ben' nao xneza Jesús dya'a. Reya'ala' yeyëchi'la'adyi'lejë', huele gaxo conlë lëjë'. ⁹ Chi rue yaca ben' mala len le'e bizinaquezi, chi rutasi runiojë' le'e, bigacalëlejë' lëbi. Nacalan huen huele tadya'a quiejë', porque cati ulio Diuzi le'e bënë' tadya'a quiele. ¹⁰ Cana' reya'ala' huele, porque rnën lë'ë guichi la'iya quie Diuzi cani:

Nu ben' re'en inita' dya'a, ben' re'en su contento, bireya'ala' udyiala'adyi'jë' si'jë' benë' yë'.

¹¹ Reya'ala' usanjë' tamala, na' huejë' tahuen. Reya'ala' cue'jë' chizi lëjë' benë'.

¹² Cana' re'ennan, porque rapa Xuziro Diuzi ben' nayëri laxta'ohue, renë' caora rulidzajë' lëbë', pero huaguizu Diuzi castigo quie ben' mala.

¹³ Na' rnaba' le'e tu pregunta: ¿Nuži sue huejë' tamala quiele chi huele puro tadya'a quiejë'? ¹⁴ Chi rue yaca benë' tamala quiele, la'acazi ruele tahuen quiejë', huela'iyatzegue Diuzi le'e. Biidzebile bigalele quie yaca ben' rue tamala quiele. ¹⁵ Reya'ala' gapala'nle Cristo du guicho du la'adyi'le como ben' naca xa'nro. Reya'ala' isëdile huele pensari ta iquëbile dyë'ëdi chi nu ben' inaba le'e bixquien' naole xneza Jesús. ¹⁶ Reya'ala' tzu'ule neza dya'a ta su chizi laxta'ole. Chi huele cana', gata' yela' stu' quie yaca ben' rao le'e xquia. Yedue'jë' cabë' rnëjë' cati ilë'ëjë' naole neza dya'a, ralele quie Cristo. ¹⁷ Zaca'n lao Diuzi huezela'adyi'le yedzagalaole ba'ala'cazi bële tahuen, chi cana' re'en Diuzi, pero bizaca'n lao Diuzi, chi dula' quiezile yedzagalaole bële tamala.

¹⁸ Guti Cristo lë'ë yaga cruzo ta yeži dula' xquia quiero de tzalasagazi. Ni tu xquia binuenë', pero gutinë' lao laza ra'o, ben' napa dula' xquia,

tacuenda tzu'ulëro Diuzi tuže, na' gacaro ben' quienë'. Dyin quie yaca benë' gutinë', pero lao na'a Bichi Be quie Diuzi bebannë' tatula. ¹⁹ Pero tu gutinë' binebannë' uyonë' yetixogue'në' di'idza' quienë' lao ja bichi be quie yaca ben' gutija cana'te, yaca ben' naca preso rbezajë' gata' castigo quiejë'. ²⁰ Bigulejë' quie Diuzi caora unita'jë' tiempo aode cana'te, tiempo caora uzu tu ben' lao Noé. Uzu Diuzi ulezë' utza'yaquë' pensari quiejë' tu lala zu Noé ruenë' barco, pero biptza'jë' pensari quiejë'. Quie lena' udyiagui'jë' gutijë' lu'u nisa. Xunayaquë' bega'n, bigutijë' lu'u nisa. ²¹ Lena' nacan ca quie bautismo quie ja ben' nao xneza Cristo. Cabë' guca quieyaquë' ulayaquë' lao nisa, cana' nacarë quiero, apsela Diuzi ra'o. Bibi dyin hue bautismo ta tzëri cuerpo quiero, pero hue bautismo dyin caora aonabaro Diuzi si'zenë' quie xquia quiero. Caora na' gun Diuzi yela' neban tuzioli quiero nun quie guti beban Jesucristo. ²² Naca Jesucristo ben' beyëpi zeyo guibá. Zunë' zaquë' yebë quie Diuzi ga rnabë'në' lao ja ángel len lao ja yugulute ben' rnabë' yu'uja guibá.

4

Reya'ala' hue quiero xti'idza' Diuzi du guicho du la'adyi'ro

¹ Como bedzagalao Jesucristo, gutinë' lë'ë yaga cruzo, lëscan' le'e, reya'ala' sule dispuesto yedzagalaole. Porque chan' yedzagalaole, lena' gacalën le'e ta biinan quiele huele xquia. ² Lëscan' huacalën le'e inaole tadya'a huele cabë' re'en Diuzi huele dza rdale lao yedyi layu. ³ Zi'tela abële tamala cana'te. Abële tamala ca yaca ben' binezi quie Diuzi. Abële tamala cabë' unan quiele. Udale hue'e, uzudyile, bële lani, bële ru'be, uyonla'adyi'le yaca ídolo quiele ta naca bayatza gula. ⁴ Pero na'ra yaca ben' binezi quie Diuzi rdza'jë' le'e, porque bira tzu'ulëlejë' tuže yela' mala quiejë'. Quie lena' rudyiala'adyi'jë' le'e. ⁵ Pero huadyincazi dza gaca juicio quiejë' lao Señor quiero Jesucristo, ben' ichugubë' quie len yaca ben' aguti, yaca ben' naban. ⁶ Quie lena' uyo yaca benë' yetixogue'jë' xti'idza' Diuzi lao yaca ben' unita' tiempote cuenda gata' yela' neban quiejë' tuzioli lao na'a Bichi Be quie Diuzi, ba'ala'cazi cati bdyin dza quiejë' gutiyaquë' cabë' gaca quie yugulu benë'. ⁷ Baidyin dza yeyudyi yedu quie dyila yu. Quie lena' tzu'ule pensari huen ulidzale Diuzi du guicho du la'adyi'le. ⁸ Pero ta nacara belao idyë'ële laguedyile, porque lena' gacalën le'e si'zele quiejë' caora rapajë' falta. ⁹ Reya'ala' gapachi'le laguedyile zan yu'u quiele dyë'ëdi, bitilale leyaquë'. ¹⁰ Como ben' napa dyin quie Diuzi, gacalële laguedyile según ca banegun Diuzi quie quiele. ¹¹ Yaca ben' bë' Diuzi laze quixogue'jë' xti'idza'në', reya'ala' quixogue'jë'n ca ben' rnë quie Diuzi. Lëscan', yaca ben' bë' Diuzi laze gacalëjë' laguedyijë', reya'ala' gacalëjë' lëjë' conlë fuerza valor ru'e Diuzi lëjë'. Yugulu ta ruele, huelen lao na'a Jesucristo tacuenda hue yaca benë' Diuzi bala'ana. Naca Jesucristo ben' zecazi, ben' de yela' huaca quie tuzioli. Amén.

Biidzebiro yedzagalaoro inaoro xneza Jesús

¹² Bicha', ben' nadyë'ëda', caora raca zëdi quiele nun quie rue Diuzi le'e prueba, bidëbile bihuele pensari tamala raca quiele. ¹³ Mejorla yedaohuele caora rusaca benë' le'e tamala nun quie naole xneza Cristo, porque tahuen gula yega'nnan quiele yedaohuetzeguele caora yeguida Jesucristo ilë'ë yaca benë' naquë' ben' zecazi. ¹⁴ Chi rutasi runio yaca benë' le'e nun quie naole xneza Cristo, reya'ala' yedaohuele, porque lena' rulu'en yu'ule Bichi Be quie Diuzi lu'u guicho laxta'ole. Rutasi runio yaca benë' Cristo, pero le'e reya'ala' ruelenë' ben' ze. ¹⁵ Chi redzagalaole nun quie bëtile benë', o chi ulanle

quie benë', o chi bële tamala, o chi bda' quiele ta bireya'ala' uda' quiele, reya'ala' yedue'le. ¹⁶ Pero chi redzagalaole nun quie naole xneza Cristo, na' bireya'ala' yedue'le, reya'ala' yedaohuele. ¹⁷ Aruen bago dza gaca juicio quie lao yugulu benë'. Huazulaona len ra'o, ben' nao xneza Jesús. Pero chi sulaona len ra'o, ben' nao xneza Jesús, bayëchi' gula gaca quie yaca ben' bibë quie xti'idza' Diuzi. ¹⁸ Lena' rnën lë'ë guichi la'iya quie Diuzi cani: Chi canezi ula yaca ben' laxta'o yëri, ¿bizi gaca quie yaca ben' mala?

¹⁹ Tana', chi rusaca yaca benë' le'e bizinaque nun quie naole xneza Cristo cabë' re'en Diuzi, biusanla'adyi'le huele tahuen sudyi'ilële Diuzi, ben' bzalo ra'o. Uzucazi Diuzi di'idza' quienë' cabë' unë' huenë'.

5

Bë' Pedro tu consejo quieyaquë'

¹ Le'e ben' napa dyin quie Diuzi, re'enda' guna' le'e tu consejo. Në'ëdi' nacaria' ben' napa dyin quie Diuzi. Naca' testigo blë'ëda' bedzagalao Cristo gutinë' lë'ë yaga cruzo. Lëscan' conlë yaca los demás ben' napa dyin quie Diuzi, huazulia' Cristo bë' yeguidë' ulu'enë' yela' huaca quienë'. ² Ca ben' rapa beco' zi'ila' quie, cana' reya'ala' gapale ben' nao xneza Jesús, ben' naca cuenda quiele. Pero lëscana' du guicho du la'adyi'le huele bala quiele ca re'en Diuzi huele, bihuele ben' zuzile gan, ben' rza'la'adyi' len. ³ Biinabë'le zi'laza ben' naca cuenda quiele como si fuera nacale xa'nyaquë', pero tzu'ule neza dya'a usëdilejë' inaojë' neza ca neza rnaole le'e. ⁴ Cana' cati yeguida ben' naca pastor belao, huega'n tadya'a quiele lao Diuzi tuzioli.

⁵ Lëscan' le'e, ben' ru'abe, re'enda' guna' le'e tu consejo. Reya'ala' galele quie yaca ben' napa dyin quie Diuzi. Yugulule reya'ala' galale gacale gaxo conlë laguedyile, ben' nao xneza Jesús, porque cana' rnën lë'ë guichi la'iya quie Diuzi cani:

Biraxe Diuzi ben' rue že cuine, pero racalë Diuzi ben' naca gaxo.

⁶ Reya'ala' gacale ben' gaxo lao Diuzi, porque idyin dza gue'en Diuzi, caora na' huenë' le'e ben' ze. ⁷ Bidëbile chi bi tu ta raca quiele. Usedyinle tazëdi quiele lao Diuzi como dan' zu Diuzi rapanë' le'e. ⁸ Gapale cuidado quie xan' taxi'ibi', porque rdanan re'ennan udyiagui'nan benë'. Ca rue león bë' rueba' snia, rdaba' rguiloba' ta gaoba', cana' rda xan' taxi'ibi' reguilonan benë'.

⁹ Bigalele quienan, galele quie Diuzi. Bigala'adyi'le rdanan duze yedyi layu ruanan ta yedzagalao yaca los demás ben' bichiro, ben' nao xneza Jesús, lëscan' ca le'e. ¹⁰ Te yeyudyi yedzagalaole ilë'ëti'zi, caora na' Diuzi huenë' le'e ben' laxta'o yëri, ben' rue quie xti'idzë', ben' rzudyi'ilë lëbë', ben' tzazulë lëbë' tuzioli. Tantozi nedyë'ë Diuzi ra'o, ulionë' ra'o cuenda nuelëro Jesús tuze, yeyoro guibá sulëronë' tuzioli. ¹¹ Naca Jesucristo ben' de yela' huaca quie tuzioli. Amén.

Rugapa Pedro lëjë' diuzi

¹² Bia' guichi dao' ni use'ela'n laole lao na'a Silvano ta guna' le'e yaca consejo. Naca Silvano ben' bichiro, ben' nao xneza Jesús, ben' zudyi'ilëro. Lëscan' bia' guichi ni ta nuxela'adya' le'e inezile nadyë'ë Diuzi le'e. Naca prueba nedyë'ënë' le'e bëla'iyänë' le'e taze. Ulenao xnezë', biyehuëdile.

¹³ Na'ra yaca ben' nao xneza Jesús, ben' nita' ciudad Babilonia, ben' uliorë Diuzi lëscan' ca le'e, rugapajë' le'e diuzi. Lëzi Marcos, ben' naca ca zi'ina', rugapanë' le'e diuzi. ¹⁴ Ugapale yaca ben' bichiro, ben' nao xneza Jesús, diuzi. Como ben' bichiro gaole tu situ xagajë'. Rulidza' Diuzi cuëchinë' chizi lu'u guicho laxta'ole yugulule. Amén.

GUICHI URUPE BÈ SAN PEDRO APÓSTOL

Bè Pedro guichi ni, use'ela'nè'n lao yaca ben' nao xneza Jesús

¹ Nè'èdi', Simón Pedro, naca' ben' rue mandado quie Jesucristo. Naca' apóstol quienè'. Bia' guichi ni use'ela'n lao le'e, yaca ben' rnaorè xneza Jesucristo cabè' nao nètò' xnezanè'. Yela' ben' justo quie Xuziro Diuzi Jesucristo rlè'ènè' tuzi ca rlè'ènè' ra'o. ² Rulidza' Diuzi ta huela'iyane' le'e taže cuèchinè' chizi lu'u guicho laxta'ole como dan' rioñe'ele ruele tuže conlè Diuzi lènè' Señor quiero Jesús.

Rnè Pedro cabè' reya'ala' hue yaca ben' nao xneza Jesús

³ Conlè yela' huaca quienè', banegun Diuzi fuerza valor quiero ta inaoro xnezè' dza rdaro lao yedyi layu, na' gacaro ben' laxta'o yèri. Cana' bènè' quiero caora cati gualènè' ra'o ta tzioñe'ero galero quie Cristo, ben' ulio ra'o, ben' ze gula, ben' rue puro ta yu'u ni'a xnezi. ⁴ Cana' bè Diuzi quiero bega'n lènè' ra'o di'idza' ta gacalènè' ra'o ute uselanè' ra'o quie tamala de lao yedyi layu, na' gacaro ben' yèri cabè' nayèri Diuzi. Cana' biudyiagui'n ta rnazín quiero ra'o. ⁵ Quie lena' ruen dyabè' galele quie Diuzi du guicho du la'adyi'le tale neza dya'a. Lèscan' ruen dyabè' tzioñe'ele huele cabè' na Diuzi ⁶ gapale cuidado bihue'le lato inabè' ta rnazin quiele le'e huele tamala. Lèscan' ruen dyabè' ⁷ yeyèchi'la'adyi'le ben' bichiro, ben' nao xneza Jesús, idyè'ele yugulu benè'.

⁸ Chi tzirole huele cana', na' biten cana'zi dza rdale lao yedyi layu, biten cana'zi unaole xneza Jesucristo, ben' naca Señor quiero. ⁹ Pero chi bitzirole huele cana', nacale ca quie tu ben' laochula, ben' birlè'è dya'a, porque agula'adyi'le cabè' bè Diuzi quiele uzi'zenè' quie dula' xquia quiele ta bèle tiempote. ¹⁰ Quie lena', bicha', nun quie bè Diuzi nombrar le'e, huele dyabè' hue quiele ca nia' niga. Chi huele cana', na' biiquixile inaole xneza Jesús dyè'èdi gula. ¹¹ Chi huele cana', na' huesalo Diuzi puerta guibá ta tzetzu'ule tzesule tziuzioli ga rnabè' Señor quiero Jesucristo, ben' pte psela ra'o.

¹² Quie lena' biusana' inia' le'e ta bigalala'adyi'le cabè' reya'ala' huele, ba'ala'cazi banezile dyè'èdi barue quiele di'idza' li quie Diuzi. ¹³ Tu lala rda' lao yedyi layu, nacan bala quia' guna' le'e consejo ca consejo bēna' le'e niga. ¹⁴ Baona Señor quiero Jesucristo nē'èdi' de que ruen bago dza gatia'. ¹⁵ Quie lena' pca'na' di'idza' quia' laole cuenda bigala'adyi'le cabè' consejo bēna' le'e dza uda' lao yedyi layu.

Ni nan quie yela' huaca quie Jesús

¹⁶ Caora unando' bzioñe'endo' le'e quie yela' huaca quie Señor quiero Jesucristo, quele cuento ulio ben' rzi' yè' bzioñe'endo' le'e, porque nètò' blè'èndo' yela' huaca quienè'. ¹⁷ Lèzi blè'èndo'nè' caora bè Diuzi lèbè' ben' ze. Bendo' rchi' Diuzi caora unènè' dyè'èdi nanè' nètò': "Zi'ina' ben' niga. Lega nedyè'èda'bi' raxeda' ca ruebi'." ¹⁸ Bendo' rchi' Diuzi za'n guibá caora nita'lèndo' Jesús lao ya'a ga betza' žabanè' gucan bezèri di raca titi'.

¹⁹ Quie lena' nacan bala cabè' una yaca ben' unita' tiempo, yaca ben' udixogue' xti'idza' Diuzi. Napale razón ruele cuenda cabè' unajè', porque naca di'idza' unajè' ca quie xni' gui' rseni'na ga naca chula cuenda ilè'èro ga zioro hasta yeguidara Jesucristo huenè' gaca yeni' gula lu'u guicho laxta'oro.

²⁰ Re'enda' inia' le'e tu di'idza' naca belao. Nunu saque' tzioñe'e di'idza' la'iya quie Diuzi según pensari quieziyaquè', dechan' según cabè' rna Bichi

Be quie Diuzi tzioñe'eyaquë'n. ²¹ Pues yaca ben' na', ben' unita' tiempote, quele bzujë' di'idza' lë'ë guichi ta racazi la'adyi'lë', pero como nacajë' ben' la'iya quie Diuzi, bzujë' di'idza' lë'ë guichi cabë' mandado bë Bichi Be quie Diuzi quieyaquë'.

2

Ni nan cabë' rue ja ben' huezi' yë' (Judas 4-13)

¹ Lao ja ben' Israel, uyu'urë ben' huezi' yë'. Unajë' quie Diuzi najë', pero bë' nazijë' uzi'jë' yë'. Lëzi cana' le'e, huayu'urë ben' naca maestro si'jë' yë' laole. Balarazi ruzioñe'ejë' benë' di'idza' huizi' yë', inajë' di'idza' li ruzioñe'ejë'. Cana' huejë' si'jë' yë' udyiagui'jë' benë' huejë' condre Cristo, ben' udižu xquia quie yugulu benë'. Quie lena' tu sasazi udyiagui' Diuzi lëjë'. ² Huanao ben' zë neza mala quiejë' huejë' ta rnazin quiejë'. Dula' quiejë' ina yaca benë' binaca dya'a xneza Jesús. ³ Yela' rza'la'adyi' dumi quiejë' rzi'jë' le'e yë' inajë' le'e di'idza' huezi' yë'. Pero udyiagui' Diuzi lëjë', biilajë'. Desde cana'te banucueza Diuzi castigo quiejë'.

⁴ Caora cati bë bala ja ángel xquia dza na'te, biuzi'ze Diuzi quie xquia bëjë'. Pues na' bë Diuzi mandado tzu'ujë' ga naca chula tziojë' lagui' gabila iriojë' caden cuenda cuezajë' dza gaca juicio quiejë'. ⁵ Lëzi cana' biuzi'ze Diuzi quie xquia bë yaca ben' unita' cana'te. Bënë' mandado gaca nisayo yusiu' lao chopo galo dza cuenda yedza'jë' nisa gatijë'. Nun quie tamala bëjë', bdyiagui' Diuzi lëjë'. Tuzi ben' lao Noé lënë' igadyi familia quienë' bega'një' psela Diuzi lëjë'. Pero gudyi Noé ja ben' unita' tiempo de quie re'en Diuzi inaojë' xnezë' huejë' tadya'a, pero bigulejë' quie Noé. ⁶ Lëzi cana' bë Diuzi juicio lao yaca ben' nita' ciudad Sodoma len yaca ben' nita' ciudad Gomorra. Bzei Diuzi lëjë', dan' bëjë' puro tamala. Lente ciudad quiejë' bzei Diuzi len bega'nnan gucan puro de. Cana' bë Diuzi quie ja ben' na' ta ilë'ë ja ben' zaza' de que bire'en Diuzi huejë' cabë' bë ja ben' na'. ⁷ Pero tu ben' lao Lot, bibdyiagui' Diuzi lëbë', ba'ala'cazi naquë' ben' ciudad Sodoma, dan' naca Lot ben' bë quie xti'idza' Diuzi. Guque Lot bayëchi' bë' blë'ënë' cabë' ta bayatza gula bë ja ben' ciudad quienë'. ⁸ Cana' uzu laxta'ohuë' bayëchi' gula yugu dza caora blë'ënë' cabë' bë ja ben' yedyi quienë'. Puro tabayatza ta biraxe Diuzi bëjë'. ⁹ Pero nezi Diuzi bi huenë' ta uselanë' yaca ben' nao xnezë' caora re'en xan' taxi'ibi' si'n lëjë' yë' huejë' xquia. Lëzi nezi Diuzi bi huenë' huenë' castigo yaca ben' mala hasta dza gaca juicio quiejë'.

¹⁰ Con yugulu ben' rue tabayatza ta rnazin quie, ben' ružidyi ja xti'idza' Diuzi, hue Diuzi lëjë' tu castigo huala gula. Pues yaca ben' na' ruejë' ze cuinjë', nacajë' ben' zidi, birdzebijë' rutasi runiojë' ben' rnabë', chi ben' zu guibá, chi ben' zu dylayu. ¹¹ Na'ra ba'ala'cazi nacara yaca ángel ben' rnabë' ca yaca ben' na', birutasi runio yaca ángel yaca ben' na' caora rao yaca ángel xquia yaca ben' na' lao Diuzi.

¹² Pero yaca ben' na', yela' bayatza quiejë' ruejë' huabiagui'jë'. Biyu'ujë' pensari. Ruejë' ca rue bia guixi'. Puro ta rnazin quiejë' ruejë'. Con bitezi ta birioñe'ejë', na' rudyiala'adyi'lë'n. Yela' naca quiejë', na' yeyula yenitijë' lao Diuzi. ¹³ Huanao xquia quiejë' lëjë'. Lente tedza ruejë' ta rnazin quiejë' huejë' tabayatza. Anaca quiejë' ca quie nidyi' azun lë'ë la'ari' dya'a. Raxejë' gaolëjë' le'e tuže gacalejë' amigo, pero ta si'jë' le'e yë', tana' ruejë' cana'.

¹⁴ Tuzi ca pensari ruejë', re'enjë' gasilëjë' nigula binaca quiejë'. Binezijë' bi modo huejë' ta usanjë' tamala quiejë'. Rzi'jë' yë' yaca ben' zaonao xneza

Jesús. Puro dumi rza'la'adyi'jè'. Pero babdze'de' Diuzi lèjè'. ¹⁵ Aoru'unjè' tzala'la xneza Jesús, banaojè' neza mala. Aruejè' cabè' bè tu ben' lao Balaam, zi'i Beor, ben' unita' cana'te. Ta huenè' gan dumi bènè' tatondo. ¹⁶ Pero bè Diuzi mandado udila tu burro lèbè'. Unè burro ca rnè benè'. Bè'lèba' lènè' di'idza' udilaba' lèbè' cuenda usannè' bira huenè' tatondo quienè'.

¹⁷ Pero yaca ben' na', ben' rzi' yè', naca quiejè' ca quie yasa babeyu'en nisa. Naca quiejè' ca quie nisayo gupa'dao' ru'azi be bedun' len, bira bisirvejè'. Hue Diuzi mandado tziojè' gui' gabila ga naca chula tuzioli. ¹⁸ Badan gula ruejè' rnèjè' zidzo, pero bè' ruezijè', yè' rzi'jè'. Na'ra najè' nacaro libre huero ca tabayatza rnan quiero huero, pero yè' rzi'jè'. Rguilojè' nu ben' si' di'idza' quiejè', ben' zapsan neza mala quie. ¹⁹ Najè' nacajè' libre ru'en lato huejè' con biti'tezi raxejè' huejè', pero yè' rzi'jè' najè' cana', dan' puro tamala ruejè'. Biru'e yela' mala quiejè' lato huejè' tahuen. Chi huero tamala, naca yela' mala quiero ca quie xa'nro, binacaro ben' libre. ²⁰ Pues chi apsanro neza mala quiero banaoro xneza Señor quiero Jesucristo, pero na' chi yeyu'uro neza mala quiero tatula, chi usanro xneza Cristo bira tzioro inaoron, hueran mazara mala quiero. ²¹ Huen mala quiero chi biinaoro xneza Jesús, pero hueran mazara mala quiero chi barue quiero di'idza' la'iya quie Diuzi, na' usanron yenaoro neza mala quiero tatula. ²² Chi banaoro xneza Jesús, na' usanron, lena' ruen quiero ca rnèn lè'è guichi cani: “Areyao beco' ta babeyèbiba'. Lèscan' quie yaca cuchi, ba'ala'cazi zabgazoroba' yao, pero hueyu'ucaziba' gun' tatula.”

3

Ni nan cabè' gaca cati yeguida Jesús

¹ Na'ra bicha', taurupe na' bia' guichi ni use'ela'n laole, porque re'enda' guna' le'e consejo tacuenda huele pensari ta yu'u ni'a xnezi. ² Bigala'adyi'le cabè' una yaca ben' la'iya quie Diuzi, yaca ben' uidxogue' xti'idza' Diuzi tiempote. Lèscan' bigala'adyi'le di'idza' belao quie Señor quiero Jesucristo, ben' pte psela ra'o. Lèdi'idza' belao na' bzioñe'e yaca apóstol le'e.

³ Nacan belao ta inezile cabè' hue yaca benè' caora idyin dza yeyudyi yedu quie yedyi layu. Ružidyijè' utitujè' xti'idza' Diuzi. Huejè' cabè' ta rnazin quiejè'. ⁴ Lèscana' utitujè' benè' nao xneza Jesús yèbijè' lèjè': “¿Biži raca quie Cristo? ¿Quele unè' guidè', na' bineguidè'? ¿Biquien' con rbezale, na' biguidè'? Desde dza cati guti xuzixta'oro, tuzicazi ca nacan cabè' guta' dyilayu tiempote.” Cana' inajè'. ⁵ Bigue'enjè' galejè' dyin quie Diuzi guta' guibá tiempote. Lèzi bigalejè' mandado quienè' guta' xneza nisa cuenda bebidyi layu cue' nisadao' xlaton. ⁶ Lèscan' bigalejè' mandado quie Diuzi guca nisayo yusiu' lao chopa galo dza tiempote guti yugulute ja ben' unita', aodyiaguì' yugulute ta de lao yedyi layu. Cana' bè Diuzi juicio quieyaquè'. ⁷ Pero cati idyin dza hue Diuzi juicio tatula, huayei yugulute ta de lao yedyi layu lente yugulute ta de guibá. Huachugubè' Diuzi yugulu ben' biunao xneza Jesús.

⁸ Lèscan', bicha', bigala'adyi'le ruen quie Diuzi ca quie tu dzazi tu mila iza. Lèscan' tu mila iza ruen quienè' ca quie tu dzazi. ⁹ Bitzè Señor quiero con ca rna bala benè', den' uzunè' di'idza' quie' ca unè' huenè'. Naquè' ben' de paciencia rbezanè' bire'ennè' cuiaguì' yaca benè'. Re'ennè' inaojè' xneza Jesús.

¹⁰ Cati guida Jesús, tu sasazi guidè' cati guidè'. Guidè' caora raque yaca benè' biguidè'. Guidè' ca guida tu ben' uban caora raque benè' nunu ben' uban guida. Caora na' huabiaguì' ladza. Huenan ca rue be bedun' ze gula

bë' rudze' rchi'nan cati baza'n. Lëscan' ta dyia guibá, hueyalan quie tala quie gui'. Huayei yugulu ta de lao yedyi layu. Hue Diuzi juicio lao düzetén.

¹¹ Nun quie huabiagui' yugulu ta de lao yedyi layu, ruen dyabë' inaole xneza Jesús gacale ben' laxta'o yëri. ¹² Reya'ala' tzu'ule yedaohuele cuezale dyë'ëdi dza cati yeguida Jesús lao yedyi layu. Huele ca ta reya'ala' huele cuenda yeguidanezë'. Dza cati yeguidë', dza na' tzei ta dyia guibá, hueyalan quie tala quie gui'. ¹³ Pues ra'o niga rbezaro yeguixo Diuzi yedyi layu cubi, yeyuenë' guibá cubi como cana' unanë' huenë'. Na'ra quie dyilayu cubi len guibá cubi, bira gata'n tamala, bira gata'n tabayatza.

¹⁴ Quie lena' bicha', tu lala rbezale hue Diuzi cana', reya'ala' hue quiele xti'idza' Diuzi du guicho du la'adyi'le cuenda cue' chizi laxta'ole binapale dula' xquia hora cati yeguida Jesús lao yedyi layu. ¹⁵ Bigala'adyi'le naca Diuzi ben' zela'adyi' gula. Zunë' rbezanë' ulidza ja benë' lëbë' inabajë' si'zenë' quie dula' xquia quiejë' gata' yela' naban quiejë' tuzioli. Cabë' rnën lë'ë guichi bia', lëscan'rë rnën lë'ë guichi bë ben' bichiro Pablo ta use'ela'në' laole. Ca ta bzioñe'e Diuzi lëbë', lena' bzunë' lë'ë guichi use'ela'në'n laole. ¹⁶ Pues lë'ë yugulu guichi bë Pablo rguixogue'n ra'o cabë' reya'ala' hue quiero xti'idza' Diuzi du guicho du la'adyi'ro, dan' baza' dza yeyudyi yedu quie yedyi layu. Pero bala di'idza' bzunë' lë'ë guichi nacan zëdi bitzioñe'eron. Quie lena' bala ben' binezi, ben' binetzioñe'e xti'idza' Diuzi dyë'ëdi, rueyaquë' zidi uzëguichola rnëjë' retza'yaquë' xti'idza' Pablo. Hasta xti'idza' Diuzi uzëguichola rnëjë' retza'yaquë'n. Nun quie ruejë' cana', huayojë' lao gui' gabila.

¹⁷ Quie lena', bicha', como anezile cabë' gaca dza zaza'ra, gapale cuidado biiquixile bihue'le lato si' yaca ben' mala le'e yë'. Gapale cuidado ta biiquixile, porque reya'ala' inaole xneza Jesús du guicho du la'adyi'le. ¹⁸ Lëscan' reya'ala' huebë'le mazara Señor quiero Jesucristo, ben' pte psela ra'o. Lëscan' reya'ala' idyë'ële lëbë' mazara. Cabë' rueronë' ben' ze, cana' hueronë' ben' ze tuzioli. Amén.

GUICHI NĒRO BĒ SAN JUAN APÓSTOL

Biyeyudyi yedu quie xti'idza' Cristo

¹⁻³ Bēndo' guichi ni use'ela'ndo'n laole rguixogue'n quie tu ben' uzu cati binegata' dylayu. Nēto' ablē'ēndo'nē', una'ndo'nē', bendo' cabē' di'idza' unē', uda' tacando' lēbē'. Rnēndo' quie xti'idza' ben' na', ben' run yela' naban quiero, pero biyeyudyi yedu yela' neban runnē' quiero. Rnēndo' quie Jesucristo. Rnēndo' cabē' blē'ēndo' cuenda na' gacale tuže len nēto', len Xuziro Diuzi, lēnē' ži'inē' Jesucristo. Bida Jesucristo detē'ē lao yedyi layu ablē'ēndo'nē'. Ga zu Diuzi uza'nē' bidē' ga yu'undo' blē'ēndo'nē'. ⁴ Lena' use'ela'ndo' guichi ni laole cuenda na' sule gusto len nēto'.

Yeni' gula naca ga zu Diuzi

⁵ Niga rnēndo' le'e cabē' di'idza' una Jesucristo nēto'. Naca Diuzi ben' laxta'o yēri gula. Ni tu pensari mala biyu'u laxta'o Diuzi. Yeni' gula naca ga zu Diuzi. Ni lē'ētī' binaca chula ga zuē'. ⁶ Chi inēro nacalēro Diuzi tuže, pero ruero pensari mala quiero, lena' rulu'en rzi'ro yē' ca ta inaro, rquixiro ca ta ruero. ⁷ Pero chi naca laxta'oro yēri gula como naca laxta'o Diuzi, lena rulu'en nacalēro Diuzi tuže. Lēscan', nun quie guti ži'inē' Jesucristo lē'ē yaga cruzo ulato ren quienē', zuē' dispuesto si'ženē' quie bitezi xquia naparo.

⁸ Chi inaro binaparo xquia, tzioguero yē' inaro can', birnēro tali. ⁹ Pero chi uxubalēpiro lao Diuzi inaro naparo xquia, nacan tabala hue Diuzi quiero cabē' unē' huenē' quiero, na' huazi'ženē' quiero yebionē' yugulu pensari mala yu'u lu'u laxta'oro, na' iyacan yēri gula. ¹⁰ Pero chi inaro binaparo xquia, lena' inaro quie Diuzi rzi'nē' yē', biruero cuenda con cabē' rna xti'idza' Diuzi.

2

Naca Cristo ben' sēlē ra'o lao Diuzi

¹ Raqueda' le'e ca quie ži'ina'. Guichi ni bia' use'ela'n laole ta gacalēn le'e ta bihuele tamedian. Pero chi huele tamedian, naca Jesucristo ben' huen gula, ben' sēlē ra'o lao Xuziro Diuzi. ² Lēbē' aodižuguē' quie xquia quiero cati gutinē' lē'ē yaga cruzo lao lazaro. Pero quele quie ra'ozi udižunē', lēscan' udižunē' quie yugulu benē'.

³ Chi hue quiero ca una Cristo, lena' neziro tali nacaro ben' quienē'. ⁴ Chi inaro nacaro ben' quienē', na' bihue quiero cabē' unē', na' rzi'ro yē', birnēro tali. ⁵ Pero chi hue quiero ca unē', lena' rlu'en nedyē'ēro Diuzi du guicho du la'adyi'ro, xela'adyi'ro nacaro ben' quienē'. ⁶ Chi inaro naoro xneza Cristo, na' reya'ala' taro cabē' udanē'.

Udixogue' Juan tu di'idza' naca belao

⁷ Bicha', quele di'idza' cubi rnia' le'e niga. Rnia' le'e ca di'idza' abele desde cana'te caora uzulaole rnaole xneza Cristo. ⁸ Pero lēscan' ta rnia' le'e niga, nacan ca quie tu di'idza' cubi. Tantozi naca di'idza' belao, ruen dyabē' inia' le'e tatula. Di'idza' li rnia' niga. Rnia' quie Cristo, lēscan' rnia' quie le'e. Rnia' le'e areyudyi rda yaca benē' lao lato lao chula. Barseni'n gui' quie xti'idza' Diuzi lu'u guicho laxta'o yaca benē'.

⁹ Chi inaro rseni'n gui' quie xti'idza' Diuzi lu'u guicho laxta'oro, pero rudiero ben' bichiro, ben' nao xneza Jesús, yē' rzi'ro rnēro can'. Quele rseni'n gui' quie xti'idza' Diuzi lu'u guicho laxta'oro, nechan' nechula lu'u guicho

laxta'oro. ¹⁰ Chi nedyë'ëro ben' bichiro, ben' nao xneza Jesús, lena' ulu'en rsenin'gui' quie xti'idza' Diuzi lu'u guicho laxta'oro. Birue xti'idza' Diuzi ra'o mandado huero tamala. ¹¹ Chi rudiero bichiro ben' nao xneza Jesús, naca quiero ca quie ben' rda ga naca chula, birlë'ëro ga zioro. Anaca quiero ca quie ben' laochula, ben' birlë'ë.

¹² Raqueda' le'e ca quie zi'ina'. Quie lena' bia' guichi niga use'ela'n laole, porque lao na'a Jesucristo aozì'ze Diuzi quie xquia quiele. ¹³ Lëscan' bia' guichi ni, use'ela'n laole le'e, ben' naca ja xuzi familia, porque nuebë'le Cristo, ben' uzu tu binegata' dyilayu.

Lëscan' bia' guichi ni, use'ela'n laole le'e bi' ru'abe, porque rnaole xneza Jesús, bira naole neza mala. ¹⁴ Bia' guichi ni, use'ela'n laole le'e, zi'ina', porque nuebë'le Xuziro Diuzi. Lëscan' bia' guichi ni use'ela'n laole le'e, ben' naca ja xuzi familia, porque nuebë'le Cristo, ben' uzu tu binegata' dyila yu. Bia' guichi ni, use'ela'n laole le'e, bi' ru'abe, porque tzutzu huala rnaole xneza Cristo, aoyu'u laxta'ole xti'idza' Diuzi, bira naole neza mala.

¹⁵ Bireya'ala' sa'la'adyi'ro ta de lao yedyi layu. Chi sa'la'adyi'ro ta de lao yedyi layu, lena' rulu'en binadyë'ëro Diuzi. ¹⁶ Yaca ben' nita' lao yedyi layu, ruejè' ta rnazin quiejè', rza'la'adyi'jè' ta de lao yedyi layu. Yela' uña'a quiejè', ruejè' cuinjè' ben' ze, rezë'yaquë' laguediyaquë'. Pero quele tanun quie Diuzi ruejè' cana', dechan' ta racazi la'adyi'jè' ruejè' cana'. ¹⁷ Bareyudyi redu quie dyilayu len quie yaca ben' rueja ta rnazin quie. Yaca ben' rue quie ca re'en Diuzi, huata' yela' neban quiejè' tuzioli.

Huida ben' huetzague condre Cristo

¹⁸ Rnia' le'e, zi'ina', ilë'ëti'zi yeyudyi yedu quie yedyi layu. Abele huida tu ben' huetzague condre Cristo. Pues hora na'a anita' zë yaca ben' rue condre Cristo. Tana' neziro baza' dza yeyudyi yedu quie yedyi layu. ¹⁹ Yaca ben' rue condre Cristo, gualëjè' ra'o tuze dza na', pero apsanla'adyi'jè' ra'o na'a. Chi dula'adyi'jè' gualëjè' ra'o tuze dza na', bipsanla'adyi'jè' ra'o. Pero guca cana' tacuenda ulu'en dyë'ëdi bë' bëziyaquë', dan' gualëjè' ra'o tuze.

²⁰ Pero le'e, babdze' Diuzi Bichi Be quienë' lu'u guicho laxta'ole cuenda gacale ben' rionë'e. ²¹ Bia' guichi ni use'ela'n laole, porque quele binezile con cabë' rna xti'idza' Diuzi, dechan' nezicazile con cabë' rnan. Dyë'ëdi nezile birnë xti'idza' Diuzi di'idza' huizi' yë'.

²² Yë' rzi' benë' bë' nayaquë' binaca Jesús ben' use'ela' Diuzi ta ute uselanë' benë'. Nu yaca ben' rnë cana', rudyiala'adyi'yaquë' Cristo. Rusebi'yaquë' Xuziro Diuzi lënë' zi'inë' Jesucristo. ²³ Chi rusebi' yaca benë' zi'i Diuzi, lente Diuzi rusebi'yaquë'. Chi rnëyaquë' cule quie zi'i Diuzi, lente Diuzi rnëyaquë' cule.

²⁴ Quie lena' bigala'adyi'le cabë' di'idza' uyu'u lu'u guicho laxta'ole hora uzulaole rnaole xneza Jesús. Porque chi yega'n di'idza' bele cana'te lu'u guicho laxta'ole, na' biyeyudyi nacalële Xuziro Diuzi lënë' zi'inë' tuzi. ²⁵ Una Jesucristo gunnë' yela' neban quiero tuzioli. Cana' bega'nlnënë' ra'o di'idza'.

²⁶ Guichi bia' niga, nacan ta quixogue'n le'e cabë' hue yaca ben' re'en si' le'e yë'. ²⁷ Na' abdze' Jesucristo Bichi Be quienë' lu'u guicho laxta'ole. Abega'nnë' yu'unë' lu'u laxta'ole ruzioñe'enë' le'e di'idza' li quie Diuzi. Cana' inezile chi inë yaca benë' tuzi ca rnën len xti'idza' Diuzi, o chi birnëyaquë' tuzi. Puro di'idza' li rna Bichi Be quienë', birnënë' di'idza' huezi' yë'. Biyehuëdile nacalële Cristo tuze conforme con ca bzioñe'e Bichi Be quienë' le'e.

²⁸ Lena', zi'ina', rnia' le'e tatula, biyehuëdiro nacalëro Cristo tuze cuenda bigata' yela' stu' quiero cati dza yeguidë'. ²⁹ Nezile naca Diuzi ben' rue ta yu'u

ni'a xnezi. Lëscan' reya'ala' inezile yugulu yaca ben' rue ta yu'u ni'a xnezi, nacayaquë' zi'i Diuzi.

3

Zi'i Diuzi nacaro

¹ Tanto nedyë'ë Xuziro Diuzi ra'o ulionë' ra'o nacaro zi'inë'. Quie lena' binacalë yaca ben' nita' lao yedyi layu tuzi len ra'o, porque binacalëjë' tuzi len Diuzi. ² Le'e bicha', nadyë'ëda' le'e. Rnia' le'e nacaro zi'i Diuzi. Binelu'e Diuzi ra'o cabë' gaca quiero bë' azulëronë' guibá, pero neziro huaca quiero cabë' naca quie Cristo cati yeguidë'. Porque cati yeguidë', dyë'ëdi ilë'ëronë' tal cabë' naquë'. ³ Chi du la'adyi'ro rbezaro yeguida Cristo, bihue'ro lato gaca laxta'oro besu. Reya'ala' gaca laxta'oro yëri cabë' yëri naca laxta'o Jesucristo.

⁴ Yugulu ben' rue xquia, tamala ruejë'. Nacan mala huero xquia. ⁵ Dyë'ëdi nezile abida Jesucristo lao yedyi layu begubanë' xquia yu'u lu'u laxta'oro, pero ni tu xquia biyu'u lu'u guicho laxta'onë'. ⁶ Chi nacalëro Cristo tuzi, biru'en lato inaoro neza mala huero xquia. Pero yugulu ben' rnao neza mala, birue quieyaquë' xti'idza'në', binuebë'yaquë' lëbë'. ⁷ Na'ra le'e, zi'ina', bihue'le lato si' benë' le'e yë'. Tali rnia' le'e: Chi nacaro ben' laxta'o yëri ca naca Cristo ben' laxta'o yëri, bide lato inaoro neza mala. ⁸ Chi naoro neza mala, binacaro ben' quie Diuzi, dechan' ben' quie taxi'ibi', porque tu binegata' dyilayu unao xan' taxi'ibi' neza mala. Quie lena' bida zi'i Diuzi lao yedyi layu besulanë' dyin quie xan' taxi'ibi'.

⁹ Yaca ben' naca zi'i Diuzi, bide lato inaoyaquë' neza mala, porque babë' Diuzi yela' naban quiejë' tuzioli, anacajë' zi'i Diuzi. Quie lena', como bibi tamedian rue Diuzi, lëscan' ra'o, chi tali nacaro zi'i Diuzi, bireya'ala' huero tamedian. ¹⁰ Lena' ulu'en chi tali nacaro zi'i Diuzi, o chi nacaro zi'i xan' taxi'ibi'. Chi huero tamedian rudiero benë', binacaro zi'i Diuzi.

Nacan zi hue quiero idyë'ëro tu ituro

¹¹ Ni rnia' le'e tatula ca di'idza' babele dza na'te, dza uzulaole rnaole xneza Jesús: Reya'ala' idyë'ëro tu ituro. ¹² Bireya'ala' gacaro cabë' guca ben' lao Cain caora uzunë' dyila yu. Gulenë' quie xan' taxi'ibi' bëtinë' bi' bichinë', porque unao bi' bichinë' neza dya'a, pero lënë' unaonë' neza mala quie xan' taxi'ibi'.

¹³ Bicha', biyebanle cati rudie benë' le'e. ¹⁴ Guca quiero ca quie ben' aguti dza na', dza unaoro neza mala quie xan' taxi'ibi'. Pero na'ra banaca quiero ca quie ben' abeban nun quie anaoro neza dya'a quie Jesús. Neziro naoro xneza Jesús chi nadyë'ëro tu ituro. Chi binadyë'ëro itu ituro, naca quiero ca quie ben' baguti, ben' biyezi' Diuzi. ¹⁵ Chi rudiero tu ituro, naca quiero ca quie ben' bëti benë'. Na'ra nezile dyë'ëdi cabë' gaca quie ben' bëti benë'. Bigata' yela' neban quieyaquë' tuzioli. ¹⁶ Tantozi nadyë'ë Cristo ra'o, gutinë' lë'ë yaga cruzo ta gata' tadya'a quiero. Lëscan', ra'o, reya'ala' idyë'ëro itu ituro, hasta suro dispuesto gatiro ta gata' tadya'a quie ben' bichiro. ¹⁷ Chi nacaro ben' uña'a, pero biyëchi'la'adyi'ro ben' bichiro, ben' bide quie, na'tera bisaque' inaro nadyë'ërojë' cabë' nadyë'ë Diuzi lëjë'. ¹⁸ Zi'ina', bireya'ala' idyë'ëro ben' bichiro de di'idza'zi, pero reya'ala' idyë'ërojë' du guicho du la'adyi'ro.

Cabë' reya'ala' huero ta cue' laxta'oro chizi lao Diuzi

¹⁹ Chi huero cana', huaneziro tali na' naoro xneza Jesús, tali na' huabe' chizi laxta'oro. ²⁰ Pero chi bicue' chizi laxta'oro, chi rao pensari quiero ra'o xquia, na' huacalë Diuzi ra'o yegubanë' chi tamala yu'u lu'u laxta'oro tacuenda cue'n chizi. Cana' hue Diuzi, dan' naquë' ben' ze, nezinë' yugulu

cabè' ruero, cabè' pensari yu'uro. ²¹ Pues cani nacan, ben' bicha': Chi birao pensari quiero ra'o xquia, lena' du la'adyi'ro huabe' chizi laxta'oro. ²² Gun Diuzi yugulu ca ta inabaronè' por nun quie rue quiero xti'idzè', ruero ca ta re'ennè' huero. ²³ Na' ta hue quiero xti'idzè', re'ennè' inaoro xneza zi'inè' Jesucristo, re'ennè' idyè'ëro tu ituro cabè' unè'. ²⁴ Porque chi hue quiero xti'idza' Diuzi, lena' rulu'ena nacalèronè' tuze, lèscan' nacalè'nè' ra'o tuze. Neziro nacalèronè' tuze, porque yu'u Bichi Be quienè' lu'u guicho laxta'oro.

4

Ni rnèn quie ben' yu'u Bichi Be quie Diuzi, len quie ben' yu'u bichi be quie taxi'ibi'

¹ Bicha', bigalele quie yugulu ben' naja tanun quie Diuzi rnajè', dan' bineziro chi balejè' rnajè' quie Diuzi. Reya'ala' uzè'nagaro quiejè' dyè'èdi chi rnajè' tuzi ca rna di'idza' quie Diuzi, o chi birnajè' tuzi. Porque nita' ben' zè rnaja tanun quie Diuzi rnajè', pero bè' nazijè', yè' rzi'jè'. ² Chi rnajè' bida Jesucristo lao yedyi layu guquè' benè', cana' ineziro nacajè' ben' quie Diuzi, aoyu'u Bichi Be quienè' lèjè'. ³ Pero chi rnajè' bibida Jesucristo lao yedyi layu, biguquè' benè', cana' ineziro binacajè' ben' quie Diuzi, biyu'u Bichi Be quie Diuzi lèjè', pero yu'ujè' bichi be xi'ibi'. Na' bichi be yu'ujè' rdyiala'adyi'n Cristo. Abele huida bichi be xi'ibi' rue cana' lao yedyi layu. Ni rnìa' le'le babidan na'a.

⁴ Zi'ina', nacaro ben' quie Diuzi. Quie lena' yaca ben' birna tuzi con cabè' rna xti'idza' Diuzi, bihuejè' ra'o gan si'jè' ra'o yè', porque napara fuerza Bichi Be quie Diuzi yu'uro, quele ca fuerza napa bichi be quie xan' taxi'ibi' yu'ujè'. ⁵ Nacajè' ben' quie xan' taxi'ibi', binacajè' ben' quie Diuzi. Quie lena' rnajè' tuzi ca rna xan' taxi'ibi'. Quie lena' gale yaca ben' nao neza quie xan' taxi'ibi' ca di'idza' inajè'. ⁶ Pero ra'o, nacaro ben' quie Diuzi. Nu ben' gale quiero, nacarèjè' ben' quie Diuzi. Cana' neziro nula yu'u Bichi Be quie Diuzi, nula yu'u bichi be quie taxi'ibi'.

Nadyè'ë Diuzi yugulute benè'

⁷ Bicha', reya'ala' idyè'ëro ben' bichiro, ben' nao xneza Jesús. Cana' re'en Diuzi huero, porque nadyè'ë Diuzi yugulute benè'. Chi nadyè'ëro yugulute benè', nacalèro Diuzi tuze, na' du la'adyi'ro nacaro zi'inè'. ⁸ Chi binadyè'ëro yugulute benè', na' binacalèro Diuzi tuze, porque nadyè'ë Diuzi yugulute benè'. ⁹ Tantozi nadyè'ë Diuzi ra'o, na' use'elè' tu litza' zi'inè' lao yedyi layu. Lao na'a zi'inè' guta' yela' naban quiero tuzioli. Cana' neziro nadyè'ë Diuzi ra'o. ¹⁰ Tanto nadyè'ë Diuzi ra'o, ba'ala'cazi binegue'enro Diuzi caora na', use'elè' zi'inè' lao yedyi layu gutinè' lè'ë yaga cruzo, udi'zuguè' dula' xquia quiero cuenda yezì'ze Diuzi quiero.

¹¹ Bicha', nun quie nadyè'ë Diuzi ra'o, reya'ala' edyè'ëro itu ituro. ¹² Ba'ala'cazi ni tu nunu blè'ë Diuzi, pero chi nadyè'ëro itu ituro, na' yu'u Bichi Be quienè' lu'u guicho laxta'oro, na' bitecazi nadyè'ë Diuzi ra'o. ¹³ Nun quie nudze' Diuzi Bichi Be quienè' lu'u guicho laxta'oro, na' ineziro nacalèronè' tuze. ¹⁴ Nèto' blè'èndo' nacando' testigo cabè' bè Xuzi Diuzi lènè' zi'inè'. Use'elè' lèbè' lao yedyi layu tacuenda ute uselanè' nutezi ben' re'en nao xnezè'. ¹⁵ Nutezi ben' gale chi zi'i Diuzi Jesucristo, lèben' na' nuenè' Diuzi bala'ana, lèscan' nue Diuzi lèben' na' bala'ana.

¹⁶ Cana' neziro nadyè'ë Diuzi ra'o lente yugulute benè'. Lèscan', ra'o, chi edyè'ëro tu ituro, na' nuero Diuzi bala'ana, lèscan' nue Diuzi ra'o bala'ana.

¹⁷ Cana' hue quiero idyè'ëro Diuzi du guicho du la'adyi'ro, biidzebiro dza

gaca juicio, porque bdyë'ëro Diuzi dza udaro lao yedyi layu cabë' bdyë'ë Jesucristo Diuzi. ¹⁸ Chi neziro nadyë'e Diuzi ra'o, biidzebironë'. Chi du la'adyi'ro nadyë'ëro Diuzi biidzëbironë' ni lë'ëti'. Pero chi rdzebiro Diuzi, lena' rulu'en bineneziro chi tali nadyë'ë Diuzi ra'o.

¹⁹ Nadyë'ëro Diuzi porque tanëro bdyë'ë Diuzi ra'o. ²⁰ Chi inaro nadyë'ëro Diuzi, pero rudiero yaca benë', yë' rzi'ro inaro nadyë'ëro Diuzi. Chi binadyë'ëro yaca benë', ben' rlë'ëro, yë' rzi'ro inaro nadyë'ëro Diuzi, ben' birlë'ëro. ²¹ Chi nadyë'ëro Diuzi, nacan zi hue quiero idyë'ëro yaca benë'. Cana' naca mandamiento udxu Jesucristo para ra'o.

5

Cabë' reya'ala' huero ta huero gan lao tamala de lao yedyi layu

¹ Chi galero use'ela' Diuzi Jesús, chi galero bidë' lao yedyi layu ta ute uselanë' ra'o, na' nacaro zi'i Diuzi. Chi nadyë'ëro Xuzi Diuzi, nacan zi hue quiero idyë'ëro ben' bichiro, ben' naca zi'i Diuzi. ² Chi nadyë'ëro Diuzi huero cabë' mandado ruenë', cana' ineziro tali na' nadyë'ëro yaca ben' bichiro, ben' naca zi'i Diuzi. ³ Bisaque' inaro nadyë'ëro Diuzi chi biruero ca mandado ruenë'. Binaca zi'i mandado quienë'. Mandado dya'a ruenë'. ⁴ Babë yugulu ben' naca zi'i Diuzi gan lao tamala de lao yedyi layu. Nun quie rzudyi'ilëro Jesús abëro gan. ⁵ Chi bisudyi'ilëro quie Jesús inaro zi'i Diuzi lëbë', bisaque' huero gan lao tamala de lao dyila yu.

Cabë' una Diuzi quie zi'inë'

⁶ Caora bida Jesucristo lao yedyi layu, caora na' uyu'unë' lu'u nisa, ulato ren quienë' gutinë' lë'ë yaga cruzo. Quele uyu'uzinë' lu'u nisa, pero lëscan' guticazinë' lë'ë yaga cruzo ulato ren quienë'. Naca Bichi Be quie Diuzi testigo con cabë' guca quie Jesucristo. Puro tali rna Bichi Be quie Diuzi, birzi'në' yë'. ⁷ Tzona cue' testigo naca ta de guibá rguixogue'n quie Jesucristo. Rguixogue' Xuzi Diuzi, lënë' di'idza' quienë', lënë' Bichi Be quienë'. Tuzi ca rguixogue'jë' quie Jesucristo. ⁸ Lëscan' tzona cue' testigo nacarë ta de lao yedyi layu rguixogue'n quie Jesucristo. Rguixogue' Bichi Be quie Diuzi. Lëscan' caora uyu'u Jesucristo lu'u nisa, lena' rguixogue'n quienë'. Lëscan' cati gutinë' lë'ë yaga cruzo, ulato ren quienë', lena' rguixogue'rënan quienë'. Tuzi ca rguixogue'n lao yunaten quie Jesucristo. ⁹ Chi ralero quie benë' cabë' inajë' ra'o, reya'ala'cazi galero quie Diuzi cabë' unë', porque zaca'ra cabë' una Diuzi quie zi'inë'. ¹⁰ Chi hue quiero di'idza' quie zi'i Diuzi, cana' ineziro tali nacan di'idza' quienë' cabë' unë'. Pero chi bihue quiero di'idza' quie zi'i Diuzi, lena' inaro naca Diuzi ben' huizi' yë', porque biralero tali nacan cabë' unë' quie zi'inë'. ¹¹ Na'ra con cabë' una Diuzi, unë' babënnë' yela' neban quiero ta biyeyudyi yedu quië. Lëscan' unë' babënnë' quiero len lao na'a zi'inë'. ¹² Nu ben' rale quie zi'inë', banapë' yela' neban ta biyeyudyi yedu quie. Pero nu ben' birale quie zi'inë', binapë' yela' naban ta biyeyudyi yedu quie.

Ni yeyudyi di'idza' bzu Juan lë'ë guichi

¹³ Bia' guichi ni use'ela'n laole le'e, ben' rale quie zi'i Diuzi, ta inezile banapale yela' neban ta biyeyudyi yedu quie.

¹⁴ Quie lena' du la'adyi'ro reya'ala' ulidzaro Diuzi, porque neziro renë' quiero chi inabaronë' ca ta ugunnë' gunnë' quiero. ¹⁵ Como cana' neziro re Diuzi quiero cati ulidzaronë', lëscan' ineziro babënnë' quiero ta unabaronë'.

¹⁶ Chi rlë'ëro rnao tu ben' bichiro neza mala ruenë' xquia, pero binacan xquia ta udyiagui' Diuzi lëbë', reya'ala' ulidzaro Diuzi inabaronë' chi biga-calë Diuzi lëbë' ta usannë' neza mala quienë' yenaonë' xneza Diuzi tatula. De tu cue' xquia nacan ta udyiagui' Diuzi ra'o. Biinia' le'e reya'ala' ulidzaro Diuzi por nu ben' napa xquia nacan ta udyiagui' Diuzi lëbë'. ¹⁷ Yugulu xquia ruero nacan mala, però de tu cue' xquia nacan ta udyiagui' Diuzi ra'o.

¹⁸ Neziro yugulu ben' naca ži'i Diuzi binaojë' huejë' xquia, porque rapa ži'i Diuzi lëjë'. Bisaque' xan' taxi'ibi' huelën lëjë'.

¹⁹ Neziro nacaro ben' quie Diuzi. Lëscan' neziro rue yaca los demás ben' nita' lao yedyi layu ca mandado re'en xan' taxi'ibi' huejë'. ²⁰ Lëscan' neziro babida ži'i Diuzi lao yedyi layu bzioñe'enë' ra'o nuebë'ro tuzi Diuzi zu guibá, neziro nunura Diuzi zu. Nacalëronë' tuže, ta inaro, nacalëro ži'inë' Jesucristo tuže. Tuzi lëbë' naquë' Diuzi, tuzi lëbë' gunnë' yela' naban quiero ta biyeyudyi yedu quie. ²¹ Ži'ina', gapale cuidado ta birionla'adyi'le ta binaca Diuzi. Amén.

GUICHI URUPE BÈ SAN JUAN APÓSTOL

Nacan zi hue quiero idyë'ëro yugulu laguedyiro

¹ Nè'èdi', ben' gula, bia' guichi ni, use'ela'n laolo' luë' dan' naco' luë' nigula ulio Diuzi. Lëscan' use'ela' guichi ni lao ja zi'ilo'. Nadyë'ëda' le'e du guicho du la'adya'. Pero cala tuza' nè'èdi', lëscan' nadyë'ë yaca los demás ben' nao xneza Jesús le'e. ² Nadyë'ëda' le'e por nun quie di'idza' li quie Diuzi yu'un lu'u laxta'oro. Lëdi'idza' na' biyeyudyi yedu fuerza valor quien. ³ Rulidza' Xuzi Diuzi lënë' zi'inë' Jesucristo ta huela'iyajë' yeyëchi'la'adyi'jë' le'e, cuëchijë' chizi guicho laxta'ole. Tabalacazi nedyë'ë Xuzi Diuzi lënë' zi'inë' le'e.

⁴ Redaohueda' cabë' rue bala ja zi'ilo', barue quieyaquë' di'idza' li quie Diuzi, barueyaquë' ca mandado re'en Xuzi Diuzi huero. ⁵ Na'ra zana', quele mandamiento cubi inia' le'e lë'ë guichi ni, dechan' mandamiento gula ca ta unë Jesús nêto' desde dza na'te. Rnia' le'e nacan zi hue quiero idyë'ëro yugulu laguedyiro. ⁶ Nacan tali nadyë'ëro yugulu laguedyiro, chi barue quiero xti'idza' Diuzi. Banezile desde dza na'te cabë' re'en Diuzi huero, re'ennë' idyë'ëro yugulu laguedyiro.

Nita' ben' zë, ben' huezi' yë' lao yedyi layu

⁷ Na'ra nita' ben' zë, ben' huezi' yë', ben' rnë biguca Jesucristo benë' cati bidë' lao yedyi layu. Pero yë' rzi'jë', rudyiala'adyi'jë' Cristo rnëjë' cana'. ⁸ Gapale cuidado ta bisi'jë' le'e yë', na' te cana'zi dyin quie Diuzi ta ziole ruele. Hue quiele xti'idza' Diuzi tacienda gata'cazi quiele duzete ca ta pcueza Diuzi gunnë' le'e dza zaza'ra.

⁹ Nutezi ben' rnë di'idza' quie Cristo rguixogue'në', pero cabë' rguixogue'në' binacan lëbi con cabë' una Cristo, binubë'në' Diuzi, binaquë' ben' quie Diuzi. Pero chi rguixogue'në' lëbi con cabë' una Cristo, nubë'në' Xuzi Diuzi lënë' zi'inë'. ¹⁰ Chi guida ben' birguixogue' lëbi con cabë' una Cristo, bisi'lenë' zan yu'u quiele, biugapalenë' diuzi, ¹¹ porque chi ugapalenë' diuzi, huen quiele ca quie ben' rue tamala len leyaquë'.

Niga yeyudyi di'idza' bzu Juan lë'ë guichi

¹² Zë di'idza' re'enda' inia' le'e, pero bire'enda' hua' zë guichi. Mejorla naguidala' zan yu'u quiele ta hue'ro di'idza' dyë'ëdi, yedaohuero suro gusto.

¹³ Yaca zi'i bi' zilo', ben' uliorë Diuzi, rugapajë' luë' diuzi. Amén.

GUICHI UYUNE BĚ SAN JUAN APÓSTOL

Use'ela' Juan guichi ni lao tu ben' lao Gayo

¹ Nĕ'ĕdi', ben' gula, bia' guichi ni use'ela'n laolo' luĕ', Gayo. Naco' amigo quia', tabalacazi nadyĕ'ĕda' luĕ'.

² Bicha', rulidza' Diuzi ta icuasa icui'o tamala ta bibi gaca quio' sulo' huen. Cabĕ' ruelo' naolo' xneza Jesús dyĕ'ĕdi, cana' re'enda' sulo' dya'a tuzioli.

³ Bedaohueda' caora bla' chopa tzone ben' bichiro, ben' nao xneza Jesús, unajĕ' nĕ'ĕdi' cabĕ' ruelo' rnaolo' xneza Jesús du guicho du la'adyo'. ⁴ Lega redaohueda' bĕ' beda' nenaŋ yaca ben' quie Jesús xnezanĕ' du guicho du la'adyi'jĕ'. Raqueda'yaquĕ' ca ži'ina'.

⁵ Bicha', tahuen na' huelo' caora gacalao' ben' bichiro, ben' nao xneza Jesús. Tahuen gula huelo' gacalao' yaca ben' za' yedyi tula. ⁶ Unajĕ' rĕbijĕ' yaca los demás ben' bichiro cabĕ' ruelo' nadyĕ'ĕlo' lĕjĕ'. Chi huu' cule, gacalĕlo'jĕ' tzu'ujĕ' neza dyĕ'ĕdi, como lĕzi lĕjĕ' rguixogue'rĕjĕ' xti'idza' Diuzi.

⁷ Mandado quie Jesucristo aoyu'ujĕ' neza. Birnabajĕ' ben' binao xneza Jesús ta gasijĕ' len ta gaojĕ'. ⁸ Nacan cuenda quiero hue'rojĕ' ga gasijĕ', hue'rojĕ' ta gaojĕ', gacalĕrojĕ' tzu'ujĕ' neza tziojĕ' tzetixogue'jĕ' benĕ' xti'idza' Diuzi.

Rnĕ Juan quie tu ben' lao Diótrefes, ben' rudyiala'adyi' lĕbĕ'

⁹ Aose'ela' tu guichi laole dza na' ta inezile cabĕ' reya'ala' huele. Pero bigule Diótrefes quiendo'. Re'ennĕ' inabĕ'nĕ' cuinzinĕ'. ¹⁰ Lena' hua' di'idza' len le'e cati guida' cabĕ' ruenĕ', porque rudyiala'adyi'nĕ' nĕto'. Bire'ennĕ' gapachi'nĕ' ben' bichiro žan yu'u quienĕ'. Lĕscan' ruzegadyinĕ' yaca ben' re'en gapachi' ben' bichiro žan yu'u quie. Biru'enĕ' lato yedupalĕjĕ' ben' bichiro bĕ' rueyaquĕ' culto.

¹¹ Bicha', biinaole huele ca rue ben' mala. Reya'ala' huele ca rue ben' huen. Chi huero tadya'a, lena' rulu'en nubĕ'ro Diuzi. Chi huero tamala, lena' rulu'en binubĕ'ro Diuzi.

Rnĕ Juan naca Demetrio ben' huen

¹² Naca Demetrio ben' huen, cana' na yaca benĕ' yugulujĕ'. Talicazi nacan con cabĕ' najĕ' quienĕ' najĕ' naquĕ' ben' huen. Lĕscan' nĕto', nezirĕndo' naquĕ' ben' huen. Luĕ' nezilo' di'idza' li rnĕndo'.

Ni yeyudyi di'idza' bzu Juan lĕ'ĕ guichi

¹³⁻¹⁴ Zĕ di'idza' re'enda' inia' luĕ', pero bire'enda' hua' zĕ guichi. Mejorla naguidala' žan yu'u quio' ta hue'ro di'idza' dyĕ'ĕdi cabĕ' nacan.

¹⁵ Rulidza' Diuzi cuĕchinĕ' chizi guicho laxta'olo'. Yaca amigo quio', ben' zulia' tuže gan' ni, rugapayaquĕ' luĕ' diuzi. Ugapalo' diuzi yugulu amigo quia', ben' nita'lao' tuže. Amĕn.

GUICHI NI BÈ SAN JUDAS APÓSTOL

Guichi ni bè Judas use'ela'nè'n lao yaca ben' nao xneza Jesús

¹ Nè'èdi', Judas, naca' ben' rue mandado quie Jesucristo. Naca' bicha' Santiago. Guichi ni bia' use'ela'n laole le'e, ben' ulio Diuzi. Nadyè'è Xuziro Diuzi le'e, zunè' rna'nè' le'e. ² Rulidza' Diuzi ta yeyèchi'la'adyi'nè' le'e dyè'èdi, lèscan' ta cuèchinè' chizi laxta'ole idyè'ènè' le'e taže.

Rnè Judas quie yaca ben' huezi' yè'
(2 Pedro 2.1-17)

³ Bicha', lega re'enda' ise'ela' tu guichi laole ta inia' le'e mazara cabè' bè Diuzi bènne' yela' neban quiero tuzioli. Ruen dyabè' ise'ela' tu guichi laole ta inia' le'e cabè' reya'ala' huele, reya'ala' gapale cuidado ta bisi' benè' le'e yè'. Reya'ala' hue quiele xti'idza' Diuzi ca di'idza' pca'n Diuzi lao na'a yaca ben' quienè'. ⁴ Cana' nia', porque balarazi aoyu'u ben' huezi' yè' ladole. Yaca ben' na' najè' bibi huena chi huero tabayatza cabè' rnan quiero. Najè' bihue Diuzi ra'o castigo, porque dan' nadyè'ènè' ra'o. Pero bè' nazijè' yè' rzijè' binacan cana'. Nacajè' ben' mala, ben' rudyiala'adyi' Jesucristo. Tuzi Jesucristo naquè' xca'nro, ben' Señor quiero. Pero lèjè' rnajè' bibi zaca'nè'. Pues desde cana'te rnèn lè'è guichi la'iya quie Diuzi bi gaca quie ben' rna cana'. Rnèn huachugubè' Diuzi lèjè' dza gaca juicio.

⁵ Anezile dyè'èdi cabè' bè Diuzi cana'te, pero decazide re'enda' yeza'la'adyi'le tatula. Bigala'adyi'le cabè' guca caora unita' yaca ben' Israel nación Egipto. Psaca ben' Egipto ben' Israel bizinaquezi, pero pte psela Diuzi lèjè', uchugubè'cazi Diuzi quie balajè'. Uchugubè'nè' quie yaca ben' bigule quienè' cabè' unè'. ⁶ Lèzi bigala'adyi'le cabè' guca quie bala ángel. Bigulejè' cabè' una Diuzi, na' berojè' ga banaca xlatojè'. Caora na' bè Diuzi mandado uyu'ujè' ga naca chula ta iriojè' caden para bira yerojè'. Na' yu'ujè' rbezajè' dza gaca juicio. ⁷ Lèzi quie ja ben' ciudad Sodoma, len ja ben' ciudad Gomorra, len ja ben' yedyi re' ga'ala', bigala'adyi'le cabè' ta užacajè'. Bigulejè' quie Diuzi cabè' bigule ja ángel dza na'. Bèjè' bizinaque, gusilèjè' nigula binaca zgulajè', hasta gusilèjè' laguedy byujè' ca nigula. Pues lente be'mbyu lente nigula bèjè' bizinaquezi. Quie lena' uchugubè' Diuzi quiejè', aoyejè' tzalasagazi cuenda na' inezi yaca benè' de que ratza Diuzi cabè' tamala bèjè'.

⁸ Cabè' bè ja ben' unita' tiempo, cana' ruerè ben' huezi' yè' uyu'u ladole. Ca ben' xusa, ruelèjè' cuinjè' tabayatza. Biralejè' quie Diuzi. Rutasi runiojè' yaca ben' rnabè' zu guibá. ⁹ Bigala'adyi'le cabè' bè xan' ángel laohué' Miguel. Lao cuerpo quie Moisés bèlènè' xan' taxi'ibi' huenè. Pero yela' ben' huen quienè', biptasi bnionè' xan' taxi'ibi'. Lèzi biudaonè' xan' taxi'ibi' xquia. Pero unè xan' ángel rëbinè' xan' taxi'ibi': "Hua Jesucristo luè' xquia." ¹⁰ Na'ra yaca ben' na', ben' huezi' yè' uyu'u ladole, ta birioñe'ejè' na' rudyiala'adyi'jè'. Nacajè' ca bia guixi', biyu'ujè' pensari. Dula' napajè' cuinzijè' gata' castigo quiejè' tuzioli.

¹¹ Gaca bayèchi' gula quiejè' nun quie naojè' ruejè' cabè' bè Caín. Yela' rza'la'adyi' dumi quiejè', ruejè' cabè' bè Balaam cana'te. Huacarè bayèchi' quiejè' cabè' guca quie tu ben' lao Coré cana'te. Guca quie Coré uchugubè' Diuzi lèbè', como dan' bdyiala'adyi'nè' Diuzi. ¹² Naca yela' stu' quiele, como dan' raolèle lèjè' tuže ga redupale ruele culto len ben' bichile, ben' nao

xneza Jesús. Dan' rudyiala'adyi'jè' Diuzi, bireya'ala' gaolële lëjè' tuže. Puro quiezijè' re'enjè' gata'. Naca quiejè' ca quie beo bidyi ru'unan be bedun'. Lëzi naca quiejè' ca quie yaga gu'udzo na' reyalan, birbian tazixi. Cana' naca quiejè', como dan' biralejè' quie Diuzi. ¹³ Naca quieyaquè' ca quie bdyin' ta rzè ru'a yao ze dupen bëbi. Rdayaquè' rnëtzegueyaquè', pero yè' rzi'jè'. Naca quieyaquè' ca tu bélo bizun xlaton. Bire'enjè' inaojè' xneza Jesús. Quie lena' uđixu Diuzi tu lato chula ga yu'ujè' tuzioli.

¹⁴ Bigala'adyi'le quie tu ži'isuba Adán, ben' uzu tiempote laohuè' Enoc. Tanun quie Diuzi unènè' quie ja ben' rdyiala'adyi' Diuzi caora unènè' gudyinè' laguedyiné' cani: “Huadyin dza cati guida Xuzi Diuzi lènè' yugulute yaca ángel quienè'. ¹⁵ Caora na' huenè' juicio quie lao yugulute ja benè' rue xquia, ja ben' rdyiala'adyi' lëbè'. Huenè' lëjè' castigo nun quie unèjè' di'idza' bayatza bdyiala'adyi'jè' Diuzi.” Cana' una Enoc gudyinè' laguedyiné' cana'te. ¹⁶ Na'ra yaca ben' rdyiala'adyi' Diuzi, puro huao xquia laguedyi ruejè'. Puro ta rnazin quiejè' ruejè'. Ruejè' cuinjè' ze. Cuenda huejè' gan ta de quie benè', lena' ru'elëjè' benè' di'idza' dya'a, pero bè' rnazijè'.

Consejo dya'a ru'e apóstol Judas yaca ben' nao xneza Jesús

¹⁷ Pero le'e, bicha', bigala'adyi'le con cabè' una yaca apóstol quie Señor quiero Jesucristo cana'te. ¹⁸ Cani unajè' gudyijè' laguedyijè': “Za' yeyudyi quie yedyi layu ga ržidyicala ja benè' quie xti'idza' Diuzi, ga ruejè' ta rnazin quiejè', ga birapajè' Diuzi bala'ana.” Cana' una yaca apóstol dza na', unayaquè' ca hue ben' na'. ¹⁹ Lëzi quie ben' na' rnia' de que raxejè' tzu'ujè' huedila cuenda huejè' laguedyijè' chopa cue'. Biyu'u Bichi Be quie Diuzi lu'u guicho laxta'ojè'.

²⁰ Pero le'e, bicha', huele tzutzu biyehuèdile inaole xneza Jesús. Ulenaba Bichi Be quie Diuzi ta gacalènè' le'e ta hue'lële Diuzi di'idza'. ²¹ Yugu dza reya'ala' yeza'la'adyi'ro Diuzi cabè' ruenè' nadyè'ënè' ra'o. Reya'ala' cuezaro dyè'èdi dza yezi' Señor quiero Jesucristo ra'o, dza yeyèchi'la'adyi'nè' ra'o gunnè' yela' naban quiero ta biyeyudyi yedu.

²² Reya'ala' uxi'idze'ro dyè'èdi ben' binenezi, ben' nerue pensari chi naojè', chi biinaojè' xneza Jesús. ²³ Reya'ala' yëbiro benè' ta bihuejè' xquia, porque chi huejè' xquia, huabiagui'jè' cabè' rbiagui' ta yu'u lagui' reina. Reya'ala' yeyèchi'la'adyi'ro ben' rue xquia, porque naca bayèchi' gula quiejè'. Reya'ala' gacalërojè' ta usanjè' bira huejè' tamala. Pero con cuidado gacalërojè' tacuenda bitzu'uro pensari huerëro xquia cabè' rue lëjè'.

Ga iyudyi guichi ni, bë Judas Diuzi ben' ze

²⁴⁻²⁵ Naca Diuzi ben' racalè ra'o ta bira inaoro huero tamedian. Dyin quienè' nacaro ben' laxta'o yèri, binaparo xquia yedaohuero yedyinro laohuè'. Tuzi Diuzi naquè' ben' bala'ana quie lao yugulutero. Tuzi lëbè' rnabè'nè' quie lao dužete. Tuzi lëbè' reya'ala' gapala'n yugu benè'. Tuzi lëbè' rute ruselanè' ra'o tanun quie ži'inè' Jesucristo. Tuzioli naca Diuzi ben' žera, la'acazi dza na'la, la'acazi na'a, la'acazi dza zaza'ra. Amén.

DI'IDZA' TABELAO TA UDXOGUE' JESUCRISTO SAN JUAN APÓSTOL

Di'idza' tabelao ta udxogue' Jesucristo San Juan apóstol

¹ Lèdi'idza' niga nacan di'idza' tabelao ta gudyi Diuzi Jesucristo tacuenda quixogue'nè' ja ben' nao xnezè' ta inezijè' cabè' baza' gaca dza zaza'ra. Use'ela' Jesucristo tu ángel ta gacalènè' nè'èdi' ta inezida' nè'èdi', Juan, naca' ben' nao xneza Cristo. ² Tali rnìa' cabè' blè'èda'. Naca' testigo nacan tali con cabè' rna xti'idza' Diuzi. Naca' testigo nacan tali con cabè' una Cristo.

³ Huela'ia Diuzi huaca huen gula quie nu ben' rulaba di'idza' lè'è guichi ni, nu ben' ruzénaga con cabè' rnan. Lèscan' huela'ia Diuzi huaca huen gula quie nu ben' rue quie cabè' rnèn lè'è guichi ni, como dan' baidyin dza gaca con cabè' rnèn lè'è guichi ni.

Use'ela' Juan guichi ni lao gadyi ciudad

⁴ Nè'èdi', Juan, bia' guichi niga use'ela'n lao le'e, ben' nao xneza Cristo lao gadyi ciudad ga nita'le yu nebaba Asia. Rnaba' lao Diuzi, ben' zu tuzioli, ta huela'iyane' le'e tacuenda su laxta'ole gusto bidèbile. Lèscan' lena' rnaba' lao ben' naca ca gadyi bichi be, ben' zu zaca'lao lao Diuzi ga naca xlatonè'.

⁵ Lèscan' lena' rnaba' lao Jesucristo, ben' naca testigo dya'a quie Diuzi. Naquè' ben' nèro, ben' pseban Diuzi para tuzioli. Lèbè' rnabè'nè' yugulu ben' naca rey, ben' nita' lao yedyi layu. Nedyè'è Cristo ra'o udubanè' dula' xquia quiero cati ulato ren quienè' gutinè' lè'è yaga cruzo. ⁶ Ulonè' ra'o nacaro rey, nacaro pxuzi ta huero ca mandado re'en Xuzinè' Diuzi huero. Ben' bala'ana naquè' tuzioli. Ben' napa yela' rnabè' naquè' tuzioli. Amén.

⁷ Uzè nagale quia' dyè'èdi. Baidyin dza guida Cristo lao beo. Hualè'è yugulu benè' lèbè'. Hasta ben' psaca lèbè' bizinaquezi hualè'èjè' lèbè'. Huabedyi yugulu ben' nita' lao yedyi layu cati ilè'èjè' lèbè'. Nacan tali can' gaca.

⁸ Na'ra una Diuzi: "Lao na'a uzulaohua' ulècha' yedyi layu. Lèscan' lao na'a yeyudyi yedu quie yedyi layu. Naca' ca quie letra A len letra Z quie abecedario." Cana' una Diuzi, ben' de yugulu yela' rnabè' quie, ben' zu tuzioli.

Blu'e Bichi Be quie Diuzi Juan ca naca Cristo

⁹ Nè'èdi', Juan, naca' ben' bichile, ben' nao xneza Jesús. Nacalia' le'e tuze nun quie redzagalaoro naoro xneza Cristo. Lèscan' nacalia' le'e tuze nun quie dan' nacaro ben' nao quie yela' rnabè' quie Diuzi. Lèscan' nacalia' le'e tuze nun quie racalè Jesucristo ra'o ta suero dyè'èdi. Na'ra guca' preso dza na' ga de yu bidyi lu'u nisadao' laona Patmos nun quie dan' udxogui'a benè' xti'idza' Diuzi gucha'jè' cabè' bè Jesucristo. ¹⁰ Na'ra cani guca' quia' tu dza quie Señor quiero. Guca' quia' blu'e Bichi Be quie Diuzi nè'èdi' cabè' baza' gaca dza zaza'ra. Beda' dzido gula unè tu benè' xcu'udza'. Como ca rchi' trompeta unènè'. ¹¹ Na'ra una ben' na' rëbinè' nè'èdi':

—Lao na'a uzulaohua' ulècha' yedyi layu. Lèscan' lao na'a yeyudyi yedu quie yedyi layu. Naca' ca quie letra A len letra Z quie abecedario. Cabè' ilè'èlo' ni, uzulo' di'idza' lè'è guichi, huelo' tu libro ise'elo'n lao gadyi ciudad ga nita' ben' nao xneza' yu nebaba Asia. Ise'elo'n lao ciudad Efeso, len lao ciudad Esmirna, len lao ciudad Pérgamo, len lao ciudad Tiatira, len lao ciudad Sardis, len lao ciudad Filadelfia, len lao ciudad Laodicea.

¹² Na'ra beyëchoga' una'a blë'ëda' nuži ben' unë në'ëdi'. Na'ra cati beyëchoga', una'a blë'ëda' gadyi candelero de oro. ¹³ Lao tao' candelero na', blë'ëda' tu ben' naca ca be'mbyu. Naconë' tu la'ari' tona zun xcu'udzu labatenë'. Na'ra ru'achu'u la'ari' naconë', yu'un tu cinta ta naca de oro. ¹⁴ Na'ra guitza' guichonë' nacan ta bezëri cabë' naca žaba beco' ži'ila' bezëri, lëscan' cabë' naca yelo bezëri. Na' rna' yulaonë' ca rna' xni' gui'. ¹⁵ Lëscan' labanë' rna'n raca titi' cabë' rna' guíba bronce yëri gula ta bro lao gui'. Lëscan' rchi'në' rnan zidzo gula ca rchi' tu yao že gula. ¹⁶ Na'ra zënë' gadyi bélo na'anë' zaquë' yebë. Lëscan' bro tu ta naca ca quie tu espada neduchi'n rupala'n lu'u ru'anë'. Lëscan' rna' laonë' cabë' rna' lao ubidza raca titi' cati rna' oba fuerte gula.

¹⁷ Na'ra cati blë'ëda' cana', byala' xni'anë' guca quia' ca quie ben' baguti. Pero lëbë' bda'në' na'anë' yebë në'ëdi'. Na'ra unë në'ëdi':

—Bidzebo'. Lao na'a uzulaohua' ulëcha' yedyi layu. Lëscan' lao na'a yeyudyi yedu quie yedyi layu. ¹⁸ Naca' ben' de yela' neban quie tuzioli. Ba'ala'cazi agutia', pero bebana' zua' tuzioli. Në'ëdi' rnabi'a lao yela' guti len lao gui' gabila. ¹⁹ Na'ra bzu di'idza' lë'ë guichi cabë' bablë'ëlo'. Lëscan' bzu di'idza' cabë' rlë'ëlo' raca na'a, len cabë' ilë'ëlo' baza' gaca. ²⁰ Na'ra cani naca di'idza' ta rguixogue'n quie gadyi bélo zia' zaquë' na'a yebë ta bablë'ëlo'. Lëscan' cani naca di'idza' ta rguixogue'n quie gadyi candelero de oro ta bablë'ëlo'. Na'ra quie gadyi bélo, leyacan rguixogue'n quie gadyi ben' quixogue' xti'idza' Diuzi lao gadyi ciudad ga nita' ben' nao xneza'. Lëscan' quie gadyi candelero, leyacan rguixogue'n quie gadyi ciudad na'.

2

Use'ela' Juan di'idza' lao gadyi ciudad: Di'idza' niga use'ela'në' lao ciudad Efeso

¹ Na'ra una Jesús gudyinë' në'ëdi':

—Bzu di'idza' niga lë'ë guichi ise'elo'n lao ben' nao xneza', ben' zu rguixogue' xti'idza' Diuzi ciudad Efeso. Na' yëbo'jë': “Cani rna ben' zë gadyi bélo zaquë' na'anë' yebë, ben' rda lao tao' candelero na': ² Nezda' yugulu cabë' ruele. Nezda' cabë' ruele dyin quia' du guicho du la'adyi'le. Nezda' biusanla'adyi'le huele dyin quia'. Nezda' bihue'le lato gacalë ben' mala le'e tuže. Nezda' bële prueba quie ben' na nacajë' apóstol, pero bë' nazijë' binacajë' apóstol. Nezda' banezile ben' huizi' yë' nacajë'. ³ Nezda' cabë' ruele rnaole xneza' dyë'ëdi. Nezda' lega bedzagalaole tanun quie dan' naole xneza'. Nezda' bële dyin quia' biruhuëdile. ⁴ Pero de tu ta ruele biraxeda'. Bira nedyë'ële në'ëdi' cabë' bdyë'ële në'ëdi' dza na', dza uzulaole inale xneza'. ⁵ Quie lena' reya'ala' yeza'la'adyi'le cabë' bële dza na'. Reya'ala' yetza'le pensari quiele huele tatula cabë' bële dza na'. Chi bihuele ca nia', laguidatia' huaguba' le'e ga zule, bira gacale ca quie candelero quia' chi biyetza'le pensari quiele. ⁶ Pero tahuen na' cabë' pensari ruele rudiele ca rue ja ben' nicolaítas, ben' rionla'adyi' yaca idolo. Lëscan' në'ëdi', rudieda' cabë' ruejë'. ⁷ Ulezënaga dyë'ëdi cabë' na Bichi Be quie Diuzi rëbinë' yaca ben' nao xneza'. Nu yaca ben' sue biusanla'adyi' xneza', huayojë' guibá ta gaojë' tazixi ta dyia tu yaga ta zu na'. Lëtažixi na' ru'en yela' neban.” —Cana' una Jesús dza na'.

Di'idza' niga use'ela' Juan lao ciudad Esmirna

⁸ Na'ra una Jesús gudyinë' në'ëdi':

—Lëscan' bzu di'idza' niga lë'ë guichi ta ise'elo'n lao ben' rguixogue' xti'idza' Diuzi, ben' zu ciudad Esmirna. Na' yëbo'jê': "Cani na ben' una lao nê'ë uzulao cuëchi yedyi layu, ben' una lao nê'ë yeyudyi yedu quie yedyi layu, ben' baguti beban, ben' bazu tuzioli: ⁹ Banezda' yugulu cabê' ruele. Banezda' cabê' redzagalaole. Banezda' nacale ben' yêchi', pero huadyin dza gacale ben' uña'a como dan' huaguižu Diuzi le'e quie dyin quienê' ruele. Banezda' cabê' rudie ja benê' le'e, ben' na nacajê' ben' Israel, pero nacajê' ben' nao rue cabê' mandado rue Satanás. ¹⁰ Na'ra biidzebile cabê' baza' gaca quiele yedzagalaole. Biidzebile ba'ala'cazi dyin quie xan' taxi'ibi' baza' gaca quiele udze' ja benê' bala le'e lu'u dyiguiba cuenda gacale prueba chi tali naole xneza' biusanla'adyi'len. Na'ra baba dzazi baza' yedzagalaole. Pero suele dyê'ëdi inaole xneza' ba'ala'cazi guti ja benê' le'e. Na'ra guna' yela' neban quiele tuzioli. ¹¹ Ulezënaga dyê'ëdi cabê' na Bichi Be quie Diuzi rêbinê' yaca ben' nao xneza'. Nu yaca ben' sue biusanla'adyi' xneza', bibi tamala gaca quiejê', ude beyudyi gutijê', bitziojê' lao gui' gabila." —Cana' una Jesús dza na'.

Di'idza' niga use'ela' Juan lao ciudad Pérgamo

¹² Na'ra una Jesús gudyinê' nê'ëdi':

—Na'ra bzu di'idza' niga lë'ë guichi ise'elo'n lao ben' rguixogue' xti'idza' Diuzi, ben' zu ciudad Pérgamo. Na' yëbo'nê': "Cani rna ben' zê espada neduchi' rupalao: ¹³ Nê'ëdi' nezda' yugulu ca ruele. Nezda' zule ciudad ga lega nao ja benê' ca mandado rue Satanás. Pero ba'ala'cazi zule ciudad na', birusanla'adyi'le inaole xneza'. Bipsanla'adyi'le inaole xneza' la'acazi bëti ja benê' Antipas, ben' naca testigo quia'. Bëtijê' lëbê' yedyi quiele ga rna bê' Satanás. ¹⁴ Pero de tu ta ruele biraxeda'. Biraxeda' ru'ele lato cabê' rue ben' zu ladole, ben' nenaon nerue cabê' consejo bdze' tu ben' lao Balaam len itu ben' lao Balac dza na'. Bdze'nê' Balac consejo ta yëbinê' ben' Israel ta gaojê' bê'ëla' ta bdyia ja ben' lao ru'aba ga zu ídolo. Lëscan' bdze'nê' Balac consejo ta yëbinê' ben' Israel ta huejê' tamala gatiljê' nigula tula, nigula binaca žgulajê'. ¹⁵ Lëscan' biraxeda' ru'ele lato cabê' rue ben' zu ladole, ben' nenaon nerue cabê' consejo rudze' ben' nicolaítas. Pero rudieda' cabê' consejo rudze'jê' leyaquê'. ¹⁶ Quie lena' ruen dyabê' yetza'le pensari quiele, como dan' chi biyetza'le pensari quiele, laguidatia' ga zule tilalia' lëjê' conlê espada ta rero ru'a. ¹⁷ Ulezënaga dyê'ëdi cabê' na Bichi Be quie Diuzi rêbinê' yaca ben' nao xneza'. Nu yaca ben' sue biusanla'adyi' xneza', hual'jê' yêta xtila laona maná ta gaojê', pero yêta xtila ta negachi'n na'. Lëscan' hual'jê' tu huio yo bezêri quie quiejê'. Na' lë'ë yo na' zun tu laojê' cubi ta binezi ja ben' tula. Tuzi ben' si' len nezinê' nu laohue zun." —Cana' una Jesús dza na'.

Di'idza' ni use'ela' Juan lao ciudad Tiatira

¹⁸ Na'ra una Jesús gudyinê' nê'ëdi':

—Na'ra bzu di'idza' niga lë'ë guichi ise'elo'n lao ben' zu rguixogue' xti'idza' Diuzi ciudad Tiatira. Na' yëbo'nê': "Cani rna ben' naca ži'i Diuzi, ben' yu'u laohue ca yu'u xni' gui', ben' rna' labe ca rna' guibá bronce yêri gula: ¹⁹ Na'ra nezda' yugulu cabê' ruele. Nezda' cabê' nedyê'ële nê'ëdi'. Nezda' cabê' rnaole xneza'. Nezda' ruele cabê' mandado re'enda' huele. Nezda' rzuele birusanla'adyi'le inaole xneza'. Nezda' arnaorale xneza' dya'ara ca dza uzulaole inaole xneza'. ²⁰ Pero de tu ta ruele biraxeda'. Biraxeda' ru'ele lato zu tu nigula, ben' lao Jezabel, ladole. Rnanê' nun quie Diuzi rnanê', pero yê'zi rzi'nê', como dan' rudze'nê' ja ben' nao xneza' consejo ta huejê' tamala. Rudze'nê' lëjê' consejo ta gasiljê' yaca nigula binaca žgulajê'. Lëscan' rudze'nê' lëjê' consejo gaojê' bê'ëla' ta bdyia ja benê' lao

ru'aba ga zu ídolo. ²¹ Na'ra në'èdi' abi'anè' lato ta yetza'nè' pensari quienè', pero bire'ennè' usanla'adyi'nè' tamala quienè' rasilènè' con nutezi be'mbyu. ²² Pero në'èdi' hua'nè' castigo gaca zhue'nè' gatanè' lao cama na'. Lèscan' hua' castigo ja ben' ruelè' lèbè' tamala chi biusanla'adyi'jè' cabè' tamala ruelèjè' lèbè'. ²³ Na'ra cati gutia' ja ben' nao nigula na', caora na' huanezi yugulu ben' nao xneza' de que nezda' duzete ca naca pensari yu'u lu'u guicho laxta'o benè'. Caora na' guna' le'e tu premio chi bële tahuen, pero hua' le'e tu castigo chi bële tamala. ²⁴ Pero le'e, ben' nao xneza', ben' zu ciudad Tiatira, le'e ben' binao birue cabè' consejo rudze' nigula na', le'e ben' binezi cabè' di'idza' rnajè', rnajè' di'idza' negachi' quie Satanás, na' në'èdi' rnìa' le'e, tuzi ca re'enda' huele, re'enda' inaole xneza'. ²⁵ Huele seguir inaole xneza' dyè'èdi hasta dza cati yeguida'. ²⁶ Na'ra quie ben' rzue birusanla'adyi' xneza', quie ben' rue ca mandado re'enda' huejè' hasta dza gatijè', hua'jè' lato inabè'jè' lao yedyi layu. ²⁷ Cabè' lato bèn Xuza' në'èdi' rnabi'a, cana' hua'jè' lato inabè'jè'. Conlè tu xaga' de guíba inabè'jè' lao yedyi layu. Chi tilalè ja benè' lèjè', udyiagu' yaca ben' nao xneza' lèjè' uzuzyuquè' lèjè' como si fuera nacajè' yeso' yu. ²⁸ Hua'jè' lato sulèjè' në'èdi', ben' naca ca bélo quie bala. ²⁹ Ulezènaga dyè'èdi cabè' na Bichi Be quie Diuzi rëbinè' yaca ben' nao xneza'." —Cana' una Jesús dza na'.

3

Di'idza' niga use'ela' Juan lao ciudad Sardis

¹ Na'ra una Jesús gudyinè' në'èdi':

—Na'ra bzu di'idza' niga lè'è guichi ise'elo'n lao ben' rguixogue' xti'idza' Diuzi, ben' zu ciudad Sardis. Na' yèbo'jè': "Cani rna ben' yu'u Bichi Be quie Diuzi naca ca gadyi bichi be, ben' zè gadyi bélo: Nezda' yugulu cabè' ruele. Nezda' binaca huen quiele, naca quiele ca quie ben' baguti ba'ala'cazi nezule nebanle. ² Ulehue pensari cabè' raca quiele. Gapale cuidado biusanla'adyi'le ca tu tadao' bícu' rnaole xneza'. Pues ilè'èti'zi bipsanla'adyi'le xneza'. Blè'èda' cabè' naole xneza', binegaolen dya'a cabè' re'enda'. ³ Na'ra bigala'adyi'le cabè' bë quiele quie xti'idza' Diuzi dza na'. Reya'ala' inaole dyè'èdi hue quiele quie xti'idza' Diuzi tatula. Reya'ala' utza'le pensari quiele, como dan' chi bihue quiele cabè' rnìa' le'e, na'ra guida' binezile bi hora idechugulia' quiele. Cabè' guida ben' uban, binezile bi hora guidè', cana' guida'. ⁴ Pero zu bala ben' zu ladole ciudad Sardis, ben' binaca žabajè' besu, ta inaro, tuzi xneza' rnaojè'. Na'ra hua'jè' la'ari' bezèri ta gacojè', huazulia' lèjè' tuze, como dan' cana' zaca'jè' gaca quiejè'. ⁵ Nu yaca ben' rzue biusanla'adyi' xneza', hua'jè' la'ari' bezèri ta gacojè', biusula' laojè' zu lè'è guichi naca libro ga naca lista bi lao ben' gata' yela' neban quie tuzioli. Huèpa' Xuza' len yaca ángel quienè': "Ben' ni nacajè' ben' quia'." ⁶ Ulezènaga dyè'èdi cabè' na Bichi Be quie Diuzi rëbinè' yaca ben' nao xneza'." —Cana' una Jesús dza na'.

Di'idza' niga use'ela' Juan lao ciudad Filadelfia

⁷ Na'ra una Jesús gudyinè' në'èdi':

—Na'ra bzu di'idza' niga lè'è guichi ise'elo'n lao ben' rguixogue' xti'idza' Diuzi, ben' zu ciudad Filadelfia. Na' yèbo'jè': "Cani rna ben' naca la'ia, ben' rnè tali, ben' rnabè' lao ciudad quie rey David, ben' rsalo puerta nunu saque' usio len, ben' rsio puerta nunu saque' isalo len: ⁸ Nezda' yugulu cabè' ruele. Para le'e apsaloga' puerta quie guibá, nunu saque' usio len. Cana' bia' quiele como dan' rnaole xneza', rue quiele quie xti'idza', birusebi'le në'èdi'.

⁹ Cani hua' quiele: Ulaohua' yaca ben' nao xneza Satanás, ben' huizi' yě', ben' na nacajě' ben' Israel, pero binaojě' xneza'. Hua' mandado quitzujě' zibijě' laole ta inezijě' nedyě'ěda' le'e. ¹⁰ Lěscan', como dan' rue quiele quie xti'idza', rzuele bipsanla'adyi'le xneza', quie lena' ucuasa ucuio'ga' le'e dza zaza'ra cati gaca tazědi gula lao dužete yedyi layu. Na' gaca tazědi gula lao yedyi layu ta ulu'en quie yaca ben' nita' na' cabě' ben' mala nacajě'. ¹¹ Laguidatia'. Quie lena' biusanla'adyi'le cabě' baběle naole xneza' cuenda bigaca quiele bigata' premio quiele guibá. ¹² Nu yaca ben' hue gan lao tamala, hua'jě' fuerza valor cuenda gaca quiejě' ca quie tu pilare zu lu'u yu'u quie Xuza'. Na' huega'njě' lu'u yu'u na' tuzioli. Uzua' lě'ě laxta'ojě' laohua', len lao Xuza', len lao ciudad quieně', ciudad Jerusalén cubi yeyězi guibá yedyinnan lao yedyi layu. ¹³ Ulezēnaga dyě'ědi cabě' na Bichi Be quie Diuzi rēbině' yaca ben' nao xneza'." —Cana' una Jesús dza na'.

Di'idza' niga use'ela' Juan lao ciudad Laodicea

¹⁴ Na'ra una Jesús gudyině' nē'ědi':

—Bzu di'idza' niga lě'ě guichi ise'elo'n lao ben' rguixogue' xti'idza' Diuzi, ben' zu ciudad Laodicea. Na' yěbo'jě': "Cani rna ben' rna puro tali, ben' naca testigo dya'a, ben' birzi' yě', ben' zulě Diuzi tuže cati uzulao Diuzi bzaloguě' yugulu ta de: ¹⁵ Nezda' yugulu ca ruele. Nezda' nica naole xneza' du guicho du la'adyi'le, nica rusebi'le nē'ědi'. Chi bire'enle inaole xneza' du guicho du la'adyi'le, mejorla usebi'le nē'ědi'. ¹⁶ Pero como binaole xneza' du guicho du la'adyi'le, lena' bizua' gusto cabě' ruele. ¹⁷ Na'ra nale nacale ben' uña'a. Nale raka huen quiele. Nale lega raxe Diuzi ca ruele. Nale gabi rdzioguele. Pero nica nezile ca tamala raca quiele. Nica nezile araca quiele ca quie ben' yěchi', ca quie ben' laochula, ca quie ben' rda žan guidi. ¹⁸ Quie lena' guna' le'e tu consejo. Reya'ala' inabale nē'ědi' chi biguti'a quiele ta naca puro oro cuenda gacale dugalo ben' uña'a. Reya'ala' inabale nē'ědi' chi biguti'a quiele la'ari' bezěri ta gacole cuenda ucachi'n cuerpo quiele, na' bigaca yela' stu' quiele. Reya'ala' inabale nē'ědi' chi biguti'a quiele huento ta udze'le yulaole cuenda yelě'ěle. ¹⁹ Rdila' ruegadya' yugu ben' nedyě'ěda'. Quie lena' reya'ala' inaole xneza' du guicho du la'adyi'le. Reya'ala' utza'le pensari quiele uzēnagale quia'. ²⁰ Naca quia' ca quie tu ben' zě ru'a yu'u, ben' rulidza le'e. Chi nu ben' be quia' inaně' nē'ědi': Uda lu'u yu'u, caora na' tzu'a lu'u yu'u quieně' gaolia'ně' tuže, na' gaolēně' nē'ědi' tuže. ²¹ Nu ben' hue gan lao tamala, hua'ně' lato cue'lēně' nē'ědi' cuěta' ga ri'a xlatoga'. Cana' hua' quieně' con cabě' bia' nē'ědi', bia' gan lao tamala, ben Xuza' nē'ědi' lato cui'a cuěta'ně' ga re'ně' xlatoně'. ²² Ulezēnaga dyě'ědi cabě' na Bichi Be quie Diuzi rēbině' yaca ben' nao xneza'." —Cana' una Jesús dza na'.

4

Cabě' rionla'adyi'jě' Diuzi guibá

¹ Na'ra ude beyudyi cana', blě'ěda' neyalo puerta guibá beda' uně ben' uně nē'ědi' taněro, ben' yu'u rchi' ca yu'u rchi' trompeta. Na'ra unaně' nē'ědi' caniga:

—Ūyēpicara niga. Ulu'ena' luě' cabě' ta baza' gaca.

² Cana' bē Bichi Be quie Diuzi blu'eně' nē'ědi' ta baza' gaca. Na'ra blě'ěda' ga cue' tu beně' ta zu guibá. Lěscan' blě'ěda' re' tu beně' laonan. ³ Lēben' na', ben' re' laonan, raca titi'ně' ca raca titi' yo jaspe o ca raca titi' yo cornalina. Lěscan' blě'ěda' ru'alao ga re'ně', neyēchon byeta' ta raca titi'n ca raca titi' yo esmeralda. ⁴ Lěscan' blě'ěda' ru'alao ga re' ben' na', zura igalobetapa ga cue'ra beně'. Blě'ěda' na' ure' galobetapa ben' gula, ben' rnabě'ja. Lēben' na' nacojě'

la'ari' bezëri, yu'u coron de oro guichojë'. ⁵ Ga re' ben' na', rguino rëpiyesa, ratzo bdyito huiziu'. Na' zaca'lao ga re' ben' na', zu gadyi lámpara ra'ala'n gui'. Lëlámpara na' nacan bichi be quie Diuzi ta naca gadyi. ⁶ Zaca'lao ga re' ben' na', blë'ëda' tu ta naca ca nisadao', pero rna'n ca yaohuan yení' gula.

Lëscan' blë'ëda' lao tao' tu la'a huio, zaca' ga re' ben' na', zu tapa ben' naca forma ca bia guixi'. Na' yu'u yulaojë' duzetejë' xcu'udzujë' len laojë'. ⁷ Na'ra blë'ëda' ben' nëro, naquë' ca tu bëdyi guixi', na' ben' urupe, naquë' ca tu bëdyihuaga, na' ben' uyune, zu laohuë' ca zu lao benë', na' ben' udape, naquë' ca psia bia rzë. ⁸ Blë'ëda' zu tzona huio xilajë' tzala' tzala'jë'. Lëscan' dyia yulaojë' duzete xilajë' rupala'n. Na'ra du dza, du yela, birusanjë' rnajë' cani: Ben' la'ia naco', ben' la'ia naco', ben' la'ia naco'.

Naco' Diuzi, ben' de yugulute yela' rnabë' quie, ben' zu tuzioli.

⁹ Na'ra cati rapala'një' ben' re' lao xlatogue, ben' neban tuzioli, ¹⁰ caora na' uditzu žibi galobetapa ben' gula, ben' rnabë'ja, lao ben' re' na'. Cana' rionla'adyi'jë' ben' neban tuzioli. Lëscan' blë'ëda' bdyiajë' coron quiejë' lao xlato ben' na'. Na'ra unajë' rëbijë' lëbë' cani:

¹¹ Señor, luë' naco' Diuzi quiendo'.

Luë' zaca'lo' hue ja benë' luë' ben' že.

Luë' zaca'lo' hue ja benë' luë' ben' bala'ana.

Luë' zaca'lo' hue ja benë' luë' ben' de yela' rnabë' quie.

Cana' zaca'lo', como dan' luë' bëlo' yugulute ta de.

Lao na'alo' bzalo'yan.

5

Ni rnan quie tu libro len tu ben' naca ca quie tu beco' ži'ila'

¹ Na'ra blë'ëda' ben' re' xlatogue zënë' tu libro zaquë' na'anë' yebë. Blë'ëda' naca libro forma ca rollo. Yu'u letra laonan len xcu'udzun. Blë'ëda' gadyi cue' nerioranan. ² Lëscan' blë'ëda' tu ángel, ben' de yela' rnabë' quie. Blë'ëda' unënë' zidzo unanë' cani:

—ŽNu ben' zaca' ta ichipa ta nerio libro na' ta ixëdyinë'n?

³ Na' blë'ëda' ganu ben' zu, ben' zaca' ixëdyi libro na', ni ta ulabanë'n bisaque'. Blë'ëda' ganu ben' rdzele, ni guibá, ni yedyi layu, ni ga yu'u ben' huati. ⁴ Na'ra uredyitzaya'a nun quie dan' ganu ben' nedzele zaca' ixëdyi libro na', ni ta ulabanë'n bisaque'. ⁵ Na'ra unë tu ben' gula, ben' rnabë', unanë' në'ëdi' caniga:

—Bira cuedyo' como dan' bazaca' Jesús, ben' naca ben' rnabë' quie familia quie Judá, ben' naca ži'isuba rey David, bazaca'në' ichipanë' gadyi cue' ta nerio libro ixëdyinë'n.

⁶ Lao tao' ga re' ben' na' xlatogue, ga zu tapa ben' naca ca forma bia guixi', len galobetapa ben' gula, ben' rnabë'ja, na' blë'ëda' Jesús, ben' naca ca quie beco' ži'ila'. Zënë' na' ba'ala'cazi naquë' hue' nun quie bëti ja benë' lëbë'. Na' blë'ëda' dyia gadyi luzu beco' ži'ila'. Lëscan' yu'u gadyi yulaoba'. Na'ra naca gadyi yulaoba' ca gadyi bichi be quie Diuzi ta use'elë' duzete yedyi layu. ⁷ Lëscan' blë'ëda' uyo lëben' naca ca quie beco' ži'ila' na', yexi'në' libro zë ben' re' xlatogue na' zaquë' na'anë' yebë. ⁸ Cati baoži' ben' naca ca quie beco' ži'ila' libro na', na'ra uditzu žibi tapa ben' naca forma ca bia guixi', len galobetapa ja ben' gula, ben' rnabë'ja, lao ben' naca ca quie beco' ži'ila'. Na'ra ja ben' gula, ben' rnabë'ja na', zëjë' tu huio arpa, zëjë' tu huio copa de oro yu'un yalo. Naca yalo na' ca quie di'idza' ru'elë yaca ben' rue quie xti'idza' Diuzi lëbë'. ⁹ Na'ra rulajë' tu tacubi rnajë' caniga: Luë' na' zaco' si'lo' libro na', ichipo' ta nerionan.

Luë' zaco', como dan' bëti ja benë' luë', ulato ren quio'.

Cana' udižulo' quie dula' xquia quie ja benë' cuenda gacajë' ben' quie Diuzi. Udižulo' quie dula' xquia quie ben' naca con nutezi ja raza, con nutezi ja di'idza', con bitezi ja yedyi, con bitezi ja nación.

¹⁰ Uliolo' lëjë' gacajë' rey, gacajë' pxuzi quie Diuzi quiero.

Na'ra inabë'jë' lao yedyi layu.

¹¹ Caora na' una'a beda' ja ángel zë gula. Neyëchojë' ru'alao xlatu ben' na', len ben' naca ca forma bia guixi', len ben' gula, ben' r nabë'ja. Zë million naca ja ángel. ¹² Na' unëjë' zidzo unajë' caniga:

Ben' naca ca quie beco' ži'ila', bëti ja benë' lëbë', zaca'në' tzionla'adyi' ja benë' lëbë'.

Zaca'në' yëbijë' lëbë' caniga:

Luë' naco' ben' de yela' r nabë' quie.

Luë' naco' xa'n yugulute ta de.

Luë' naco' ben' rionë'e yugulute.

Luë' naco' ben' de yela' huaca quie.

Luë' naco' ben' bala'ana, ben' belatzeque.

Luë' naco' ben' huendo' ben' ze.

¹³ Na'ra beda' unë yugulu ta bë Diuzi, ta inaro, yugulu ta zu guibá, len yugulu ta zu lao yedyi layu, len yugulu ta zu ga yu'u ben' huati, len yugulu ta zu lu'u nisadao', len yugulute ta de. Beda' unëjan unajan caniga:

Ben' re' xlatogue, len ben' naca ca quie beco' ži'ila', nacajë' ben' huendo' ben' ze.

Nacajë' ben' bala'ana, ben' belatzeque. Nacajë' ben' de yela' r nabë' quie.

Cana' naca quiejë' tuzioli.

¹⁴ Na'ra una tapa ben' naca forma ca bia guixi' caniga:

—Can' gaca.

Lëscan' uditzu žibi galobetapa ben' gula, ben' r nabë'ja, uyonla'adyi'jë' ben' zu tuzioli.

6

Ni rguixogue'n quie xopa ta nerio libro na'

¹ Na'ra blë'ëda' cati pchipa ben' naca ca quie beco' ži'ila' ta nerio libro na' tanëro lao gadyi ta nerionan. Beda' rchi' tu ben' nëro, ben' naca quie lao tapa ben' naca forma ca bia guixi'. Beda' rchi'në' ca rchi' bdyito hueziu'. Na' unanë' në'ëdi':

—jUdacara ilë'ëlo'!

² Na'ra cati una'a blë'ëda' tu caballo bezëri. Lëscan' blë'ëda' dyia tu benë' xcu'udzuba'. Lëben' na' zënë' tu ta chu'un flecha. Na' bëjë' lebë' tu coron. Lëscan' bëjë' lëbë' yela' r nabë'. Na' uza'në' zionë' ta sueranë' hueranë' gan tilalënë' yaca ben' naca enemigo quienë'.

³ Cati pchipa ben' naca ca quie beco' ži'ila' ta nerio libro na' taurupe, caora na' beda' cati unë ben' urupe, ben' naca quie lao tapa ben' naca forma ca bia guixi'. Unanë' në'ëdi':

—jUdacara ilë'ëlo'!

⁴ Na'ra cati una'a blë'ëda' bro itu caballo žna dyia tu benë' xcu'udzuba'. Na'ra ben' dyia xcu'udzuba' na', napë' yela' r nabë' ta uxenë' dila lao yedyi layu ta guti ja benë' laguedyijë'. Caora na' bëjë' lëbë' tu espada že gula.

⁵ Na'ra cati pchipa ben' naca ca quie beco' ži'ila' tauyune nerio libro na', caora na' unë ben' uyune, ben' naca quie lao tapa ben' naca forma ca bia guixi'. Na' unanë' në'ëdi':

—jUdacara ilë'ëlo'!

Na' cati una'a blē'ēda' itu caballo gaso dyia benē' xcu'udzuba'. Blē'ēda' ben' dyia xcu'udzuba' zēnē' tu ziga' de onza. ⁶ Caora na' beda' cati unē ben' uyune, ben' naca quie lao tapa ben' naca forma ca bia guixi', rēbinē' ben' dyia xcu'udzu caballo:

—Lažo quie ben' rue dyin tu dza, cana' saca' tu kilo trigo, cana' saca' tzona kilo cebada. Pero biudyiagui'lo' yaga olivo ta cuio ja benē' aceite. Lēscan' biudyiagui'lo' luba bedzuli' ta cuio ja benē' vino.

⁷ Na'ra cati pchipa ben' naca ca quie beco' zi'ila' taudape ga nerio libro na', caora na' beda' unē ben' udape, ben' naca quie lao tapa ben' naca forma ca bia guixi'. Unēnē' unanē' nē'ēdi':

—Udacara ilē'ēlo'!

⁸ Na'ra cati una'a blē'ēda' bro itu caballo gachi, bia dyia tu benē' xcu'udzuba'. Na' ben' dyia lēba' na' laohuē' Yela' Guti. Lēscan' blē'ēda' xcu'udzunē' zenao itu ben' laohuē' Yero Ba Ga Yu'u Ben' Huati. Bē' Diuzi lējē' lato ta gutijē' tu naga quie ja ben' nita' lao yedyi layu. Bē'nē' lato gutijē' lējē' conlē huedila, conlē ubin, conlē yela' huē', conlē ja bia guixi' mala gula, bia zu lao yedyi layu.

⁹ Na'ra cati pchipa ben' naca ca quie beco' zi'ila' taga'yo' ga nerio libro na', caora na' una'a blē'ēda' zan ru'aba ta zu guibá, blē'ēda' zu ja bichi be quie ja ben' guti nun quie udixogue'jē' xti'idza' Diuzi. Ta bē yaca ben' nita' lao yedyi layu bētijē' lējē' nun quie dan' udixogue'jē' xti'idza' Diuzi. ¹⁰ Na'ra beda' unē ja ben' zu zan ru'aba ta zu guibá, beda' rnējē' zidzo gula rnajē' caniga:

—Señor, ben' la'iya luē'. Luē' uzulo' di'idza' ca unao' huelo'. ¿Bata ichugulilo' huelo' castigo ja ben' nita' lao yedyi layu, ja ben' bēti nēto'?

¹¹ Na'ra bē' Diuzi lējē' tu huio zabajē' bezēri ta gucojē'. Caora na' una Diuzi rēbinē' lējē':

—Ulecueza itu tiempo cuenda gacale completo, porque nezu ben' nerdziogue, ben' nuelē le'e tuže, ben' rue ca mandado rue Cristo. Binedyin dza guti ja benē' lējē' cabē' bētijē' le'e.

¹² Na'ra cati pchipa ben' naca ca quie beco' zi'ila' taxopa ga nerio libro na', caora na' guca tu užu' huala gula, na' beyaca ubidza chula ca tu la'ari' gaso gula. Lēscan' beyaca biu' rna'n ca ren. ¹³ Caora na' bguino bēlo gusi'jan lao dyilayu. Guca quie bēlo cabē' raca quie yaga higo cati rda tu be bedun' fuerte gula, rguino ja higo ya'a quienen rasi'jan layu. ¹⁴ Na'ra bedubi ladza cabē' retubiro guichi, bira ilē'ēron. Lēscan' bzisi ja ya'a, len ga de yu bidyi lu'u nisadao' ga zujan naca xlaton. ¹⁵ Caora na' pcachi'lao ja ben' naca ja rey nita' lao yedyi layu. Pcachi'laorē ja ben' naca ben' belao quiejē', len ja ben' uña'a, len ja ben' naca comandante, len ja ben' de yela' rnabē' quie. La'acazi ben' nada'o, la'acazi ben' libre, pcachi'laojē' zan beló, pcachi'laojē' zan yo yela.

¹⁶ Na'ra unajē' rēbijē' ya'a len yo yela:

—Ulecachi' nēto' cuenda bira ilē'ē ben' re' xlatogue guibá nēto' ta bigaca quiendo' ca castigo huala gula rue ben' naca ca quie beco' zi'ila' nēto'.

¹⁷ Pues abdyin dza hue Diuzi castigo lao yedyi layu. ¿Ca nuži ben' sue, ben' gacaja ca castigo huenē'?

7

Ni rguixogue'n quie ja ben' Israel, ben' neguichi' sello quie Diuzi

¹ Na'ra ude beyudyi na', blē'ēda' tapa ángel zējē' tu huiojē' lao dapa squin yedyi layu. Zējē' ruza'agajē' ta bita lao dapate be rda lao yedyi layu. Cana' bējē' tacuenda bita be lao yedyi layu, ni lao nisadao', ni ta utan yaca yaga.

² Na'ra lēscan' blē'ēda' za' itu ángel zaca' ni ga rlē ubidza, zēnē' tu sello

quie Diuzi, ben' zu neban tuzioli. Na'ra léángel na' urediya'nè' zidzo gula blidzanè' tapa ángel. Na' bè' Diuzi tapa ángel yela' r nabè' ta udyiagui'jè' yedyi layu len nisadao'. Na'ra una ángel na' rëbinè' tapa ja ángel na' caniga:

³ —Tu raca na' nerdzioguen cuiobè'ro uquichiro sello žga ja ben' quie Diuzi, biudyiagui'le yedyi layu, biudyiagui'le nisadao', biudyiagui'le ja yaga.

⁴ Na'ra beda' tu cani naca ja ben' neguichi' sello, ben' naca ja familia quie ben' Israel. Beda' tu gayuhua chopo galo tapa mila nacajè'. ⁵ Chipchopa mila naca ja ben' familia quie Judá, na' chipchopa mila naca ja ben' familia quie Rubén, na' chipchopa mila naca ja ben' familia quie Gad, ⁶ na' chipchopa mila naca ja ben' familia quie Aser, na' chipchopa mila naca ja ben' familia quie Neftalí, na' chipchopa mila naca ja ben' familia quie Manasés, ⁷ na' chipchopa mila naca ja ben' familia quie Simeón, na' chipchopa mila naca ja ben' familia quie Leví, na' chipchopa mila naca ja ben' familia quie Isacar, ⁸ na' chipchopa mila naca ja ben' familia quie Zabulón, na' chipchopa mila naca ja ben' familia quie José, na' chipchopa mila naca ja ben' familia quie Benjamín. Cana' naca lista quie ja ben' neguichi' sello.

Ni rguixogue'n quie ben' zè gula, ben' naco la'ari' bezèri

⁹ Na'ra ude beyudyi na', cati una'a blè'èda' negu'udi' ben' zè gula. Negu'udi' ben' quie yugulute nación, len ben' quie yugulute ren, len ben' quie yugulute cue' di'ida', len ben' quie yugulute yedyi. Na'ra blè'èda' neyèchojè' ru'alao gan' re' ben' re' xlatogue, len gan' zè ben' naca ca quie beco' ži'ila'. Na'ra ben' neyècho na', nacajè' ben' zè gula. Nitu ganu sue ulaba lèjè'. Nacajè' yugulutejè' la'ari' bezèri, zèjè' la'aga' zin. ¹⁰ Lëscan' yugulujè' urediya'jè' zidzo gula unajè' caniga:

Diuzi quiero, ben' re' xlatogue, len ben' naca ca quie beco' ži'ila', lèjè' bapselajè' nètò'.

¹¹ Na'ra yugute ja ángel na' neyèchojè' ru'alao gan' re' ben' re' xlatogue, len gan' re' ben' gula, ben' r nabè'ja, len gan' zè yaca ben' naca forma ca bia guixi'. Caora na' byècho ja ángel, bda' ru'ajè' layu gan' re' ben' re' xlatogue, uyonla'adyi'jè' lèbè'. ¹² Na' unajè' cani:

Cani nacan quie Diuzi quiero.

Naca Diuzi ben' tzionla'adyi'ro, ben' huero ben' že.

Naca Diuzi ben' rioñe'e yugulute, ben' yëbiro diuxcalelo'.

Naca Diuzi ben' bala'ana, ben' de yela' r nabè' quie, ben' de yela' huaca quie. Cana' nacan quie Diuzi quiero tuzioli. Amén.

¹³ Na'ra tu ben' gula, ben' r nabè' na', unabané' nè'èdi' caniga:

—¿Nuži ja ben' niga, ben' naco ja la'ari' bezèri? ¿Gaži uza'jè'?

¹⁴ Na'ra gucha'nè' caniga:

—Señor, luè' nezo'.

Na' unè' rëbinè' nè'èdi':

—Lèja ben' niga uza'jè' ga guca zèdi gula lao yedyi layu. Abeyacajè' ben' laxta'o yëri lao Diuzi nun quie dan' unaojè' xneza ben' naca ca quie beco' ži'ila'. Na' nacojè' la'ari' bezèri ta uyërin conlè ren quienè'. ¹⁵ Quie lena' nita'jè' zaquè'lao ga re' Diuzi ga naca xlatonè'. Rionla'adyi'jè' Diuzi du dza, du yela, ga zu idao' quienè' guibá. Na'ra rapa Diuzi lèjè' ta gabi gaca quiejè'. ¹⁶ Bira yedzagalaojè', bira idzioguejè' ta gaojè' ta yo'ojè'. Bira udyiagui' oba lèjè', nicara gacajè' žla quien. ¹⁷ Cana' gaca quiejè' como dan' bazè ben' naca ca quie beco' ži'ila' zaca'lao ga re' Diuzi xlatoguè'. Rapa ben' naca ca quie beco' ži'ila' lèjè' ca quie ben' rapa beco' ži'ila' quie. Rehua'anè' lèjè' ga zu

nisa ta ri'ojè' ta ru'en lèjè' yela' neban quiejè' tuzioli. Bira cuedyijè', porque barapa Diuzi lèjè'.

8

Ruchipa ben' naca ca quie beco' zi'ila' tagadyi ta nerio libro na'

¹ Na'ra cati pchipa ben' naca ca quie beco' zi'ila' na' tagadyi ta nerio libro na', caora na' ure' chizi guibá ca du gatzo hora. ² Caora na' blè'èda' igadyi ángel nita'jè' zaquè'lao ga zu Diuzi. Na'ra bè' Diuzi lèjè' gadyi trompeta. ³ Beyudyi ude na', blè'èda' itu ángel zènè' tu ye'n yalo de oro. Na' zunè' zaquè'lao lao ru'aba bè'jè' lèbè' yalo zè gula ta bdyianè' lao ru'aba ca gun quie Diuzi ta tzèpi dzen quien ga zu Diuzi tuze conlè di'idza' ru'elè ben' rue quie xti'idza' Diuzi lèbè'. Na' lèru'aba na' nacan de oro, zun zaca'lao ga re' Diuzi. ⁴ Na'ra lao na'a ángel na' uyèpi dzen quie ye'n yalo tuze len di'idza' ru'elè ben' rue quie xti'idza' Diuzi lèbè' ta bdyinnan ga re' Diuzi. ⁵ Caora na' uzi' ángel ye'n yalo na' psedza'nè'n bao' ure'n gui' ta dyia lao ru'aba uzi'nè'n uru'unnè'n lao yedyi layu. Cana' guca uyèpi yesa, gotzo bdyito hueziu', guca uzu' lao yedyi layu.

Rucuedyi ja ángel ja trompeta quiejè'

⁶ Na'ra lao gadyi ja ángel, ben' zè ja gadyi trompeta na', ulisajè' trompeta quiejè' ta ucuedyijè'n.

⁷ Na'ra cati pcuedyi ángel nêro trompeta quienè', caora na' bguino yo hueziu' len gui' dupen ta naca ca ren lao yedyi layu. Dyin quie len, uyei tu cue' quie lao tzona cue' yedyi layu, lèscan' uyei tu cue' quie lao tzona cue' yaga, lèscan' uyei tu cue' quie lao tzona cue' guixi' ya'.

⁸ Na'ra cati pcuedyi ángel urupe trompeta quienè', caora na' bguino tu ta naca ca tu ya'a ra'ala'n gui' lu'u nisadao'. Guca tu cue' quie lao tzona cue' nisadao' ca ren. ⁹ Lèscan' guti tu cue' quie lao tzona cue' bia yu'u lu'u nisadao', lèscan' udyiagui' tu cue' quie lao tzona cue' ja barco rda lao nisadao'.

¹⁰ Na'ra cati pcuedyi ángel uyune trompeta quienè', caora na' bguino tu bélo zè gula lao yedyi layu ra'ala'n gui'. Dyin quie len udyiagui' tu cue' quie lao tzona cue' yao, lèscan' udyiagui' tu cue' quie lao tzona cue' ga rlè nisa.

¹¹ Lèbélo na' lao bélo sla' gula. Dyin quie len beyaca tu cue' quie lao tzona cue' nisa sla' gula. Aguti ben' zè nun quie dan' hue'ejè' nisa na', como dan' sla' gula beyacan.

¹² Na'ra cati pcuedyi ángel udape trompeta quienè', caora na' udyiagui' tu cue' quie lao tzona cue' ubidza, lèscan' udyiagui' tu cue' quie lao tzona cue' biu', lèscan' udyiagui' tu cue' quie lao tzona cue' bélo. Quie lena' bega'n tu cue' quie lao tzona cue'jan lato chula. Na'ra bipseni' xni' ubidza tu cue' quie lao tzona cue' quie dza. Lèscan' bipseni' xni' biu', bipseni' xni' bélo. Tu cue' quie lao tzona cue' quie yela bipseni'yacan.

¹³ Caora na' una'a beda' cati unè tu ángel rzènè' ladza gatzo guibá. Rnènè' zidzo rnanè' caniga:

—iBayèchi' gula nacan quie ja ben' nita' lao yedyi layu cati ucuedyi itzona ángel trompeta quiejè'!

9

¹ Na'ra cati pcuedyi ángel ga'yo' trompeta quienè', blè'èda' tu ta naca ca bélo uyèzin guibá bdyinnan lao yedyi layu beyacan ángel. Na' bè' Diuzi ángel na' tu zi'guiba quie tu poso zitu' gula. ² Na'ra psalo ángel na' ru'a poso zitu' gula. Caora na' lu'u poso na' bro dzen cabè' dzen rero ru'a horno. Nun quie rero

dzen na', bechula xni' ubidza, lëscan' bechula ladza. ³ Na'ra lu'u dzen na' bro ja bëchi'zu rdajaba' rzëjaba' lao yedyi layu. Bë' Diuzi lato quiejaba' ta qui'idiy'jaba' ja benë' cabë' rgu'i'idiy' xuni'. ⁴ Pero bibë' Diuzi lëjaba' lato ta udyiagui'jaba' guixi' ni ta udyiagui'jaba' ta raza ja benë', ni ta udyiagui'jaba' ja yaga. Pero bë Diuzi lëjaba' mandado ta qui'idiy'jaba' ja ben' bida' žga sello quie Diuzi. ⁵ Bibë' Diuzi lëjaba' lato ta gutijaba' ja benë', pero solamente ta qui'idiy'jaba' lëjë' ilajë' lao ga'yo' biu'. Na'ra cabë' rla nu benë' cati rgu'i'idiy' xuni' lëjë', cana' ulajë'. ⁶ Na'ra lëdza cati gaca quie ja ben' nita' lao yedyi layu cana', lega gue'enjë' gatijë', pero bigatijë'. Ba'ala'cazi gue'enjë' iyudy yedu quiejë', bisi' yela' guti quiejë' lëjë'.

⁷ Na'ra lëja bëchi'zu na' nacakaba' forma ca caballo, bia listo ta rio lao dila. Zun guichojaba' tu ta naca ca coron de oro. Pero zu laojaba' ca zu lao benë'. ⁸ Naca guitza' guichojaba' ca guitza' guicho nigula. Lëscan' dyia leijaba' ca dyia lei león. ⁹ Na'ra lëbëchi'zu na', yu'u ru'achu'uba' tu ta naca de guíba. Lëscan' xilaba' ruen ru'be cabë' ru'be rue zë carreta ta rguba ja caballo cati yu'ujaba' be tziojaba' lao dila. ¹⁰ Lëscan' zu žbamba' ca zu žbam xuni'. Zurën yëchi' ca zu žbam xuni'. Napa žbanjaba' fuerza ta qui'idiy'jaba' ja ben' nita' lao yedyi layu lao ga'yo' biu'. ¹¹ Na'ra zu tu ben' naca xa'n bëchi'zu. Lëben' na' naquë' ángel, naquë' ben' rnabë' lu'u poso zitu' gula. Na' di'idza' hebreo lao ángel na' Abadón. Lëscan' di'idza' griego lao ángel na' Apolión, ta inaro xti'idza'ro, ben' rudyiagui' ja benë'.

¹² Cana' guca aode tu ta naca bayëchi' gula, pero neracara falta gaca ichopan.

¹³ Quie lena' cati pcuedyí ángel xopa trompeta quienë', caora na' beda' bro tu rchi' benë' lao dapa squin ru'aba de oro ta zu zaquë'lao ga zu Diuzi guibá.

¹⁴ Lëscan' beda' rchi' ben' na' rëbinë' ángel xopa, ben' zë trompeta quie unë' caniga:

—Ulexëdyi dapa ángel, ben' nerio ru'a yao že Eufrates.

¹⁵ Cana' pxëdyijë' dapa ángel na' ta gutijë' tu cue' quie lao tzona cue' ja benë' nita' lao yedyi layu. Dyin bë Diuzi bega'një' neriojë' hasta idyin hora, hasta idyin dza, hasta idyin biu', hasta idyin iza ixëdyijë' ja ángel na'. ¹⁶ Na'ra beda' anaca soldado quiejë' chopa gayuhua million, ben' dyia ja caballo.

¹⁷ Na'ra guca quia' ca quie ben' uxusa, blë'ëda' caballo na'. Lëscan' blë'ëda' ben' dyia lëba' yu'u guíba ru'achu'ujë' ta naca culuri žna, len culuri azul, len culuri gachi. Na'ra naca guicho caballo na' ca guicho león. Lëscan' ru'a caballo na' reron gui' len dzen len ta ra'ala' gui' laona azufre. ¹⁸ Na'ra guti tu cue' lao tzona cue' ja benë' nita' lao yedyi layu. Dyin quie tzona cue' castigo ta bro ru'a caballo bdyiagui'nän lëjë', ta inaro, bdyiagui' gui' lëjë', lëscan' bdyiagui' dzen lëjë', tu ta ra'ala' gui' laona azufre lëjë'. ¹⁹ Na'ra lu'u ru'a ja caballo yu'u fuerza quiejaba' ta udyiagui'jaba' ja benë'. Lëscan' de fuerza quie žbanjaba'. Naca žbanjaba' ca bëla zë. Na'ra conlë bëla naca žban ja caballo bëjaba' hue' ja benë'.

²⁰ Na'ra ja ben' bega'n, ben' biguti nun quie ja castigo, biptza'jë' pensari quiejë' ta usanjë' cabë' ruejë'. Lëscan' bipsanjë' cabë' ruejë' rionla'adyi'jë' taxi'ihui', bipsanjë' cabë' ruejë' rionla'adyi'jë' ja ídolo ta naca de oro, len ja ídolo ta naca de plata, len ja ídolo ta naca de bronce, len ja ídolo ta naca de yo, len ja ídolo ta naca de yaga. Pues yaca ídolo na' birlë'n, birena, birza'n.

²¹ Na'ra lëscan' biptza'jë' pensari quiejë' ta usanjë' bira gutijë' benë', bira huejë' brujo, bira gasilëjë' ja nigula binaca žgulajë', bira cuanjë' quie benë'.

10

Ni ru'en di'idza' quie tu ángel, ben' zē tu guichi naca rollo

¹ Na'ra blē'ēda' itu ángel, ben' lega de yela' huaca quie. Uyēzinē' guibá dubinē' beo bdyinnē' lao yedyi layu. Na'ra guichonē' zunan tu byeta'. Lēscan' laohuē' rna'n raca titi' ca rna' ubidza. Naca sunnē' ca plare ta rna' ca gui'.

² Lēscan' blē'ēda' zēnē' tu guichi naca rollo nasalonē'n. Blē'ēda' ni'anē' yebē blionē' lao nisadao'. Lēscan' itzala' ni'anē' yega' blionē' lao yu bidyi. ³ Na'ra uredyiya' ángel na', caora na' unē gadyi hueziu'. Na'ra beda' cabē' unajan.

⁴ Cati ude beyudyi beda' cabē' una gadyi hueziu' na', na'ra gue'enda' uzua'n lē'ē guichi ca unajan. Pero caora na' beda' tu rchi' ben' unē nē'ēdi' guibá. Na' unē' rēbinē' nē'ēdi' cani:

—Pcachi' cabē' una gadyi hueziu' na' luē'. Biuzulo'n lē'ē guichi.

⁵ Na'ra lēángel na', ben' blē'ēda' nulio lao nisadao' len yu bidyi, caora na' ulisanē' ladza na'anē' yebē ⁶ bguntenē' ben' zu tuzioli, ben' bzalo guibá, len dyilayu, len nisadao', len yugulute ta de. Na'ra unē' caniga:

—Abdyin hora na'a. Bira de tiempo. ⁷ Na'ra bē' idyin tiempo sulao ángel gadyi ta ucuedyinē' trompeta quienē', caora na' su di'idza' gaca cabē' di'idza' belao udixogue' Diuzi ja ben' quienē', ben' udixogue' xti'idzē' dza na'.

⁸ Na'ra tatula beda' unē ángel, ben' unē nē'ēdi' guibá. Na' unē' rēbinē' nē'ēdi' cani:

—Uyo yexi' guichi naca rollo nayalo ta zē ángel na', ben' nulio lao nisadao' len yu bidyi.

⁹ Na'ra uya' gan' zē ángel na', unaba'nē' ta gunnē'n nē'ēdi'. Na'ra unē' rēbinē' nē'ēdi' caniga:

—Uzi'n, udaona. Bē' gaolo'n hueyacan zixi gula ca bdyin'dao' lu'u ru'alo'. Pero bē' baodēbo'n baoyēzin lu'u lē'ēlo', na'ra hueyacan sla' gula.

¹⁰ Na'ra ben' ángel na' nē'ēdi' guichi naca rollo. Bē' udaohua'n beyacan zixi gula ca bdyin'dao' lu'u ru'a. Pero bē' baodēba'n baoyēzin lu'u lē'ēna', na'ra beyacan sla' gula. ¹¹ Na'ra unajē' nē'ēdi' caniga:

—Tatula reya'ala' quixogue'lo' benē' cabē' una Diuzi cabē' ta baza' gaca quie yedyi zē, len quie nación zē, len quie zē cue' di'idza', len quie zē cue' ben' naca rey.

11

Ni ru'en di'idza' quie chopa ben' naca testigo quie Diuzi

¹ Na'ra benjē' nē'ēdi' tu huenixi' ta naca ca yaga ta rzējē' rurixijē'. Na'ra beda' tu rchi' benē' unanē' nē'ēdi' caniga:

—Uyo yerixi bala zicho naca idao' quia' len ru'aba quien. Lēscan' ulabo' bala naca ben' rionla'adyi' nē'ēdi' na'. ² Pero biurixo' lali'a quie idao' nun quie dan' na' rda ja ben' yedyi tula, ben' binaca ja ben' Israel. Pues lēben' na' huadyinjē' tajē' bigapajē' bala'ana ciudad Jerusalén, ciudad naca la'iya. Cana' huejē' lao chopa galo chopu biu'. ³ Na'ra nē'ēdi' ise'ela' chopu ben' naca testigo quia', nacojē' la'ari' ca la'ari' ta naco ja ben' guti familia quie. Huaguixogue'jē' benē' tanun quia' nē'ēdi' lao tu mila chopu gayuhua tzona galo dza. —Cana' unanē' nē'ēdi'.

⁴ Na'ra lēchopa ja ben' naca testigo quie Diuzi, nacayaquē' ca quie chopu yaga olivo. Lēscan' nacajē' ca quie chopu candelero ta zu lao Diuzi, ben' naca xan' yedyi layu. ⁵ Na'ra chi nu ben' re'en udyiagui' ben' naca testigo quie Diuzi, huario gui' lu'u ru'ajē' ta uzejē' ben' re'en udyiagui' lējē'. Cana'

gati nutezi ben' re'en udyiagui' lějě'. ⁶ Na'ra bade yela' rñabě' quiejě' ta huejě' mandado bihuen nisayo lao yedyi layu dza rdajě' rguixogue'jě' ja beně' tanun quie Diuzi. Lěscan' bade yela' rñabě' quiejě' yeyuejě' nisa iyacan žna ca ren. Lěscan' bade yela' rñabě' quiejě' ta uxejě' ta lega yedzagalao ja ben' nita' lao yedyi layu, lěscan' ta uxejě' zě cue' ta udyiagui' beně'. Con bala cue' ta re'enjě' gata' ta udyiagui' ja beně', cana' huejě' mandado gaca. ⁷ Pero bě' iyudyi huejě' ca mandado re'en Diuzi huejě', na'ra tilalě tu bia guixi' mala gula lějě', bia bro lu'u pozo zitu' gula. Na'ra hueba' lějě' gan, gutiba' lějě', ⁸ uca'mba' cuerpo quiejě' lěciudad na' ga bda'jě' Señor quiero lě'ě yaga cruzo. Biucachi'yaquě' leyaquě', pero yega'n cuerpo quieyaquě' la callezi. Quie lěciudad na' huazaque' inaro nacan ca quie ciudad Sodoma, ciudad mala gula. Lěscan' nacan ca quie nación Egipto. ⁹ Ben' za' zě yedyi tula, ben' nacaja ren tula, ben' racaja zě cue' di'idza' tula, ben' za' zě nación tula, hualě'ějě' cuerpo quiejě' lao tzona dza yugatzo, pero bihue'jě' lato ucachi'jě' cuerpo quiejě'. ¹⁰ Na'ra lega yedaohue ja ben' nita' lao yedyi layu sujě' gusto dan' guti ja ben' na'. Tantozi sujě' gusto, ise'ela'jě' regalo quie quie laguedyijě'. Lega raxejě' aguti ja ben' na', como dan' lega rdza'jě' ben' rguixogue' tanun quie Diuzi. ¹¹ Na'ra ude guca lao tzona dza yugatzo, useban Diuzi lějě' yeyasajě' tatula. Caora na' yugulu ben' blě'ě cabě' guca quiejě', lega bdzebijě'. ¹² Caora na' chopa ben' naca testigo, bejě' rchi' tu ben' uně zidzo guibá uně' rěbině' lějě' caniga:

—Uleyěpi niga.

Caora na' beyěpijě' lao beo zeyojě' guibá blě'ě ja ben' naca enemigo quiejě' lějě'. ¹³ Ude na', lagucate tu užu' fuerte gula, byala tu cue' yu'u quie lao chi cue' yu'u quie ja ben' ciudad na'. Lěscan' nun quie užu' guti gadyi milajě'. Caora na', ben' bega'nja bigutija, lega bdzebijě' unajě' naca Diuzi ben' de yela' huaca quie.

¹⁴ Cana' ude taorupe ta naca bayěchi' gula, pero taoyune laza'te gaca ta naca bayěchi' gula.

Pcuedyi ángel gadyi trompeta quieně'

¹⁵ Na'ra pcuedyi ángel gadyi trompeta quieně'. Caora na' uně ja ben' zulě Diuzi guibá zidzo unajě' cani:

Diuzi len ži'ině' Cristo, ben' use'elě' lao yedyi layu, abdyin dza inabě'jě' lao yugulu ben' rñabě', ben' nita' lao yedyi layu.

Biyeyudyi biyedu inabě'jě'.

¹⁶ Na'ra lěgalobetapa ja ben' gula, ben' rñabě'ja re'ja lao xlatojě' zaquě'lao ga re' Diuzi guibá, lějě' gutajě' guzuru'ala layu uyonla'adyi'jě' Diuzi. ¹⁷ Cani unajě' rěbijě' Diuzi:

Rnando' luě' diuxcalelo', Señor.

Luě' naco' Diuzi, ben' de yugulute yela' rñabě' quie tuzioli.

Zulo' nebanlo' tuzioli.

Abdyin hora huelo' mandado ta hue ja beně' ca re'enlo' huejě'.

Abdyin hora inabě'lo' lao yedyi layu.

¹⁸ Abdza' ja ben' nita' lao yedyi layu luě'.

Pero na'ra abdyin dza huelo'jě' castigo, abdyin dza ichugulilo' quie ja ben' huati.

Abdyin dza quizulo' ben' uidxogue' di'idza' quio', ben' naca ben' la'iya quio', ben' udapa luě' bala'ana.

Abdyin dza quizulo'jě' yugulujě'.

Abdyin dza udyiagui'lo' ben' rudyiagui' yedyi layu.

¹⁹ Na'ra uyaló ga rionla'adyi'jè' Diuzi guibá. Caora na' blè'èjè' tu caja ga yu'u di'idza' bega'ntza'olè Diuzi ja ben' unita' tiempote. Cati uyalon, na'ra uyèpi yesa, gotzo bdyito hueziu', lèscan' guca užu', bguino yo hueziu' dužeten.

12

Ni rnèn quie tu nigula len tu bia guixi' snia gula nacaba' ca bèla

¹ Na'ra guca tu seña guibá. Bla' tu nigula nedubinè' xni' ubidza. Naconè'n nacan ca quie zabanè'. Lèscan' xni'anè' zu biu'. Lèscan' zu tu coron guichonè' ga dyia chipchopa bélo. ² Nu'anè' bdao' rbedyiya'nè' bedzagalaonè' len bdao'. Ruen zhue'nè' ta su bdao' quienè'. ³ Na'ra guca itu seña guibá. Bla' tu bia guixi' snia gula nacaba' ca bèla, nacaba' culuri žna. Naca gadyi guichoba'. Dyia chi luzuba'. Lèscan' zu tu huio coron lao gadyi guichoba'. ⁴ Conlè zbamba' pquinoba' tu cue' quie lao tzona cue' bélo lao yedyi layu. Caora na' uzèba' lao nigula, ben' su bdao' quie, cuenda gaoba' bdao' quienè' bè' subi'. ⁵ Caora na' uzu tu bdao' byu quie nigula na'. Lèbdao' na', cati banacabi' ben' huaca, huanabè'nè' lao yedyi layu ta yu'u ni'a xnezi. Na'ra labezi'te Diuzi bdao' na', zeyu'anè'bi' yesannè'bi' ga re'nè' lao xlatoguè'. ⁶ Lèscan' bzuno nigula na', zionè' lao lato ga bidyia yu'u. Lèlato na' nacan ga pcueza Diuzi ta gao nigula na' lao tu mila chopa gayuhua tzona galo dza.

⁷ Cati ude beyudyi na', guca tu dila guibá. Na'ra ángel Miguel len ja ángel quienè', udilalèjè' lèbia guixi' snia gula len ángel quieba'. ⁸ Pero biužaque'ba' huelèba' ángel quieba' gan. Cana' abeyudyi tiempo quieba' len ángel quieba'. Bira saque' sulèba' ángel quieba' guibá. ⁹ Cana' guca uliojè' lèba' guibá. Na'ra lèbia guixi' snia gula laoba' xan' taxi'ihui'. Lèscan' laoba' Satanás. Lèba' rzi'ba' yè' ja ben' nita' lao yedyi layu. Cana' guca uru'unjè'ba' lao yedyi layu len ja ángel quieba'.

¹⁰ Na'ra beda' tu rchi' benè' unènè' zidzo guibá unanè' cani:

—Babdyin dza ute usela Diuzi yaca ben' quienè'. Barnabè' Diuzi quiero len ben' naca Cristo quienè' lao yedyi layu. Baoru'unjè' ben' udao xquia yaca ben' nao xneza Jesús. Du dza, du yela, udao Satanás lèjè' xquia lao Diuzi. ¹¹ Bèjè' gan lao taxi'ibi' nun quie guti Cristo, ben' naca ca quie beco' ži'ila', bia naca gun quie Diuzi. Bèjè' gan nun quie bibdzebijè' udixogue'jè' xti'idza' Diuzi. Bibdzebijè' chi guti ja benè' lèjè', na' uzujè' dispuesto gati'jè'. ¹² Pues yedaohuele le'e, ben' zu guibá. Pero bayèchi' gula nacan quiele le'e, ben' nita' lao yedyi layu, la'acazi zule yu bidyi, la'acazi zule lao nisadao'. Naca bayèchi' gula quiele como dan' baoyèzi xan' taxi'ibi' yedyi layu ga nita'le. Lega bdza'nè' nun quie dan' nezinè' baruen bago dza yeyudyi yedu quienè'. —Cana' una ben' na'.

¹³ Na'ra cati blè'è lèbia guixi' snia gula cabè' bèjè' quieba', uliojè'ba' guibá, pquinojè'ba' lao yedyi layu, caora na' uza'ba' zioba' unaoba' nigula, ben' baouz bdao' quie. ¹⁴ Pero bè' Diuzi nigula na' chopa xila yela ca xila psia cuenda sènè' ladza tzionè' lao lato ga bidyia yu'u, ga nacan zitu'. Lènigula na' bèjè' ta udaonè' lao tzona iza yugatzo. ¹⁵ Na'ra bro nisa lu'u ru'a bia guixi' snia gula na', udixoba' tu yao že cuenda idyinnan ga zu nigula gatinè' lu'u nisa. ¹⁶ Pero gualè layu nigula na', uxa'ana' ru'an hue'enan nisa bro ru'a bia guixi' snia gula. ¹⁷ Quie lena' lega bdza'ba' nigula na' zioba' tzetilalèba' yaca ži'isuba nigula na', yaca ben' ruzu rue cabè' mandado rue Diuzi, yaca ben' rnao con cabè' rna xti'idza' Jesucristo du guicho du la'adyi'.

13

Ni ru'en di'idza' quie chopa bia guixi' bayatza gula

¹ Na'ra uzua' ru'a nisadao' ga naca layu bidyi, caora na' blè'èda' bro itu bia guixi' bayatza gula lu'u nisadao'. Blè'èda' naca gadyi guichoba'. Lëscan' blè'èda' dyia chi luzuba'. Na' tu huio lao luzuba' zun tu huio coron. Lëscan' lè'è gadyi guichobaba' zu laojaba' quie quie ca laojaba'. Pero ca naca laojaba' nacan ta utasi unioyacan Diuzi. ² Na'ra lëbia guixi' bayatza gula, bia blè'èda', nacaba' forma ca bëdyi. Naca ni'aba' ca ni'a oso. Zu ru'aba' ca zu ru'a león. Caora na' lëbia guixi' snia gula nacaba' ca bëla, bë'ba' xlato bia guixi' bayatza gula ga cue'ba'. Lëscan' bë'ba' lëba' yela' rnabè' ta inabè'ba' lao yedyi layu. ³ Na'ra tu guichoba' zun tu hue' ta gutin lëba', pero beyaca hue' na'. Quie lena' lega beban ja ben' nita' lao yedyi layu unaojè'ba'. ⁴ Na'ra uyonla'adyi'jè' bia guixi' snia gula, como dan' bë'ba' bia guixi' bayatza gula yela' rnabè' quieba'. Lëscan' uyonla'adyi'jè' bia guixi' bayatza gula. Na' unajè' caniga:

—Ganura zu naca ca lëba'. Nunu sue tilalè lëba'.

⁵ Na'ra bia guixi' snia gula bë'ba' bia guixi' bayatza gula lato ta hueba' ze cuimba' ta utasi unioaba' Diuzi. Lëscan' bë'ba' lëba' lato ta inabè'ba' ca tu re'emba' inabè'ba' chopa galo chopu biu'. ⁶ Na'ra tamalatzague bë bia guixi' bayatza gula unëba' contra Diuzi. Lega ptasi bnioba' lëbè'. Lëscan' ptasi bnioba' ga zu Diuzi guibá. Lëscan' ptasi bnioba' ja ben' zulènè' na'. ⁷ Caora na' lëbia guixi' snia gula bë'ba' bia guixi' bayatza gula lato ta tilalëba' ja ben' quie Diuzi hasta hueba' lëjè' gan. ⁸ Na' yaca ben' nita' lao yedyi layu, yaca ben' bizu laojè' lè'è lista ta bë Diuzi tu binecuëchinè' yedyi layu, uyonla'adyi'jè' bia guixi' bayatza gula. Lëlista napa ben' naca ca quie beco' zi'ila', ben' guti dza na'. Rguixogue'n quie ben' de yela' naban quie tuzioli.

⁹ Chi zu ja ben' ruzënaga, reya'ala' uzënagajè' dyè'èdi ca rnia'. ¹⁰ Chi nu ben' hue yaca ben' quie Diuzi preso, lëscan' huadyin dza gacarèjè' preso. Chi nu ben' guti ben' quie Diuzi conlè espada, lëscan' conlè espada gatrirèjè'. Quie lena', reya'ala' sue ben' quie Diuzi sudyi'ilèjè' Diuzi dyè'èdi.

¹¹ Na'ra ude na', blè'èda' itu bia guixi' bayatza gula ta broba' lu'u yu. Dyia chopu luzuba' ca luzu beco' zi'ila', pero unëba' zidzo gula. ¹² Na'ra ca de yela' rnabè' quie bia guixi' bayatza gula, bia blè'èda' tanëro, lëscan' derè yela' rnabè' quie bia guixi' bayatza gula, bia blè'èda' taorupe. Pues con ca mandado re'en bia nëro hue bia urupe, cana' ruecaziba'. Caora na' bë bia urupe mandado tzionla'adyi' yugulu ben' nita' lao yedyi layu bia nëro, bia beyaca hue' zu guichogue ta guti lëba'. ¹³ Lëscan' bëba' yela' milagro quieba' hasta ruquinoba' gui' guibá rguinon lao yedyi layu ta ilè'è ja benè' len. ¹⁴ Na'ra nun quie yela' milagro bë bia urupe zaquè'lao bia nëro, cana' uzi'ba' yè' ja ben' nita' lao yedyi layu. Cana' bëba' mandado hue ja benè' tu ta naca forma quie bia nëro, bia zu hue' ga uchugu espada guichoba', pero beyacaba' zuba'. ¹⁵ Na'ra bia urupe bëba' yela' milagro quieba', bëba' mandado ta inè tu ta naca forma quie bia nëro ta huanan mandado gati ja ben' birionla'adyi' lënan. ¹⁶ Lëscan' bëba' itu mandado ta uzu tu sello quieba' zaquè' na'a yebè ja benè', o zaquè' zgajè', la'acazi xcuidi', la'acazi ben' huaca, la'acazi ben' uña'a, la'acazi ben' yèchi', la'acazi ben' nada'o, la'acazi ben' libre. ¹⁷ Lëscan', chi nu ja ben' bizu sello quieba', o chi bizu laoba', o chi bizu número quie laoba', na'ra bisaque' ga'ojè' bi cosa, bisaque' yeyuti'jè' bi cosa. ¹⁸ Reya'ala' inèzi nu ben' rioñe'e cabè' nan niga. Chi nacale ben' rioñe'e, ulelaba ca naca número quie lëbia guixi' bayatza gula. Lënúmero na' nacan número quie tu be'mbyu. Cani naca número quieba': Xopa gayuhua tzona galo xopa naca número quieba'.

14

Rula tu gayuhua chopa galo tapa mila benë' tu canto cubi

¹ Na'ra ude na', una'a blë'ëda' ben' naca ca quie beco' zi'ila'. Zënë' ga zu tu ya'a laona ya'a Sión. Zëlënë' tu gayuhua chopa galo tapa mila benë'. Blë'ëda' žga ja ben' na' zu lao ben' naca ca quie beco' zi'ila', lëscan' zu lao xuzinë'.

² Na'ra beda' ca tu rchi' yao že gula uyëzin guibá. Naca rchi'n ca tu rchi' yesa cati rëpin ratzon fuerte gula. Lëscan' naca rchi'n ca rchi' zë ja ben' ruxidyí ja arpa. ³ Caora na' beda' rula ja ben' na' tu canto cubi. Zëjë' zaquë'lao lao xlato Diuzi ga zu yaca ben' naca ca forma bia guixi' len ja ben' gula. Ni tu ja ben' tula biraca gula ca tacubi rula ja ben' na'. Tuzi ja ben' naca tu gayuhua chopa galo tapa mila, ja ben' psela Diuzi de entre ja ben' nita' lao yedyí layu, tuzi lëjë' racajë' rulajë' tu tacubi. ⁴ Ni tu lasa bigusilëjë' nigula binaca žgulajë'. Bibi xquia napajë'. Na'ra rnaojë' ben' naca ca quie beco' zi'ila' con gatezi zionë'. Psela Diuzi lëjë' de entre ja ben' nita' lao yedyí layu cuenda gacajë' ben' nëro, ben' naca gun quie Diuzi lënë' ben' naca ca quie beco' zi'ila'. ⁵ Ni tu di'idza' huizi' yë' biunajë'. Ni tu xquia binapajë' zëjë' zaquë'lao lao xlato Diuzi.

Ni rnan quie di'idza' udxogüe' tzona lao ángel ja benë'

⁶ Na'ra blë'ëda' itu ángel rzënë' ladza gatzo guibá. Rguixogue'në' ben' nita' lao yedyí layu xti'idza' Diuzi. Lëdi'idza' na' nacan tali tuzioli. Rguixogue'në' ben' quie yugulute nación, len ben' quie yugulute ren, len ben' quie yugulute cue' di'idza', len ben' quie yugulute yedyí. ⁷ Caora na' una ángel na' zidzo gula unë' cani:

—Reya'ala' gapale Diuzi bala'ana huelënë' ben' že, como dan' abdyin hora huenë' juicio. Reya'ala' tzionla'adyi'le Diuzi, ben' bë guibá, len yedyí layu, len nisadao', len ga rlë nisa.

⁸ Na'ra una itu ángel unë' cani:

—Aoca quie Babilonia, aoca quie Babilonia, porque naca ciudad Babilonia ca quie tu nigula ru'e ben' nita' lao yedyí layu vino ta yo'ojë' izudyijë' hueljë' lëbë' tabayatza gula.

⁹ Na'ra una ángel uyune. Unë' zidzo gula unë' caniga:

—Con nu ben' tzionla'adyi' lëbia guixi' bayatza gula, o chi tzionla'adyi'jë' tu ta naca ca forma quieba', chan' hue'jë' lato su marca quieba' lao žgajë', o chi lao na'ajë', ¹⁰ caora na' hue Diuzi lëjë' tu castigo huala gula. Lega idza' Diuzi lëjë' biyeyëchi'la'adyi'në' lëjë'. Huayeyjë' conlë gui' len itu gui' ra'ala' laona azufre. Huayeyjë' zaca'lao lao ángel quie Diuzi len ben' naca ca quie beco' zi'ila'. ¹¹ Huayasa dzen ga tzejjë' tuzioli. Yugu dza, yugu yela, bide huezila'adyi' quie ben' uyonla'adyi' lëbia guixi' bayatza gula len ben' uyonla'adyi' tu ta naca ca forma quieba', ben' bë' lato uzu marca quieba' cabë' laoba'. ¹² Quie lena' nu ben' naca ben' quie Diuzi, ben' rue ca mandado ruenë', ben' nao xneza Jesús du guicho du la'adyi', reya'ala' cuezajë' dyë'ëdi, reya'ala' gacajë' ben' de paciencia.

¹³ Na'ra beda' tu rchi' benë' uyëzin guibá. Unë' në'ëdi' caniga:

—Bzu lë'ë guichi cabë' nia' caniga: “Huaca huen quie ben' baguti, ben' bë quie xti'idza' Diuzi. Desde na'a sulao huaca huen quiejë'.” Lëscan' una Bichi Be quie Diuzi cani: “Huaca huen quiejë'. Huezila'adyi'jë' abeyudyí cabë' dyin quie Diuzi bëjë'. Cabë' unaojë' quie Diuzi dza udajë' lao yedyí layu, lena' rulu'en nacajë' ben' quie Diuzi.”

Bezi' Diuzi cosecha quie yedyí layu

¹⁴ Na'ra una'a blë'ëda' tu beo bezëri. Lao beo na' ure' tu ben' naca bichi yugulu benëchi'. Zu tu corona de oro guichonë'. Zënë' tu espada leco ta neduchi'tzague. ¹⁵ Na'ra bero itu ángel ga zu Diuzi guibá. Unënë' zidzo rudizzanë' ben' re' lao beo unë' caniga:

—Conlë espada leco quio' ichugulo' yeziu' cosecha, como dan' abdyin hora bara cosecha de lao yedyi layu. ¹⁶ Na'ra conlë espada leco quie ben' re' lao beo, uchugunë' bezi'në' cosecha quienë' de lao yedyi layu.

¹⁷ Na'ra bero itu ángel ga zu Diuzi guibá. Zërënë' itu espada leco ta neduchi'tzague. ¹⁸ Na'ra bero itu ángel ga zu ru'aba quie Diuzi guibá, ben' r nabë' quie gui'. Unënë' zidzo gula blidzanë' ben' zë espada leco ta neduchi'tzague rëbinë' lëbë' cani:

—Ichugo' ziza bedzuli' de lao yedyi layu como aranan.

¹⁹ Na'ra uchugo ángel na' ziza bedzuli' de lao yedyi layu. Uzi'në' cosecha ziza bedzuli' bdze'në'n lu'u pilo ta isinë' nisa quien. Cabë' guca quie ziza bedzuli', cana' hue Diuzi quie ja benë' dza huenë' juicio. ²⁰ Na'ra bzi ziza bedzuli' na' nisa quien ru'a yedyi na'. Caora na' bro ren zila gula ru'a pilo. Tanto bro ren ure'n tasibi ca tu sibi naca ru'a caballo. Cana' ure'n sibi tzona gayuhua kilómetro. Tu cana' ure'n yela' ze quien.

15

Nu'a ja ángel zelao gadyi castigo

¹ Na'ra blë'ëda' itu seña taže guibá ta naca ta yebanero: Blë'ëda' igadyi ángel nu'ajë' gadyi cue' castigo ta naca ga zelaozi gadyi castigo. Zelao na' iyudyi yela' rdza' quie Diuzi.

² Lëscan' blë'ëda' tu ta naca ca nisadao', pero rna'n ca yaohuan ta yu'u gui'. Blë'ëda' zë ja ben' lao nisadao' na', ja ben' uzue biuyonla'adyi'jë' lëbia guixi' bayatza gula. Lëscan' biuyonla'adyi'jë' tu ta naca ca forma quieba', bibëjë' lato sujë' número quieba' ta bigaca quieba' lëjë'. Napajë' arpa ta bë' Diuzi lëjë'. ³ Na'ra rulajë' tu ta bila Moisés dza na'. Lëscan' rularëjë' tu ta rula ben' naca ca quie beco' zi'ila' na'. Lena' rnan cani:

Yugulu ta bëlo' nacan tahuen gula, nacan ta yebanendo', Señor.

Diuzi quiendo' luë', naco' ben' de yugulute yela' huaca quie.

Puro tali, puro ta naca dugalo naca quio'.

Luë' r nabë'lo' yugulu nación.

⁴ Reya'ala' tzionla'adyi' yugulu ja benë' luë', Señor.

Reya'ala' hue yugulu ja benë' luë' ben' ze.

Tuzi luë' naco' ben' la'ia.

Huida yugulu ja ben' nita' lao yedyi layu ta tzionla'adyi'jë' luë', porque blë'ëjë' ruelo' puro ta naca tali.

⁵ Ude beyudyi na', una'a blë'ëda' neyalo idao' ga zu Diuzi guibá. Blë'ëda' ru'aba ga nudze'jë' tabla yo ga zu di'idza' ley quie Diuzi. ⁶ Lu'u idao' na' bro igadyi ángel. Nu'ajë' gadyi cue' castigo. Nacojë' la'ari' yëri gula ta raca titi'. Yu'u cinta de oro ru'achu'ujë'. ⁷ Na'ra blë'ëda' tu ben' naca forma ca bia guixi' bë'në' gadyi ángel tu huio copa de oro ta yudzu castigo huala gula ta hue Diuzi, ben' zu tuzioli. ⁸ Na'ra yela' huaca quie Diuzi bedza' dzen lu'u idao' quienë'. Na' nunu saque' tzu'u lu'u idao' na' tu bineyudyi hue Diuzi gadyi castigo ta nu'a gadyi ángel.

16

Ni rnën quie gadyi copa yudzo castigo

¹ Na'ra beda' rchi' tu benë' unënë' zidzo gula lu'u idao' na'. Unë' rëbinë' gadyi ángel cani:

—Uletzio uletzelato copa ta yudzo castigo huala gula quie Diuzi lao yedyi layu.

² Na'ra uyo ángel nëro yelatonë' copa quienë' lao yedyi layu. Caora na' yugulu ben' zu marca quie bia guixi' bayatza gula, ben' uyonla'adyi' tu ta naca forma quieba', ulë yëdzo' bërë' mala gula lëjë'. Lega castigo gula gucajë'.

³ Na'ra uyo ángel urupe yelatonë' copa quienë' lao nisadao'. Caora na' beyaca nisadao' na' ca ren quie ben' huati, lëscan' guti yugute bia yu'u neban lu'unan.

⁴ Na'ra uyo ángel uyune yelatonë' copa quienë' lu'u ja yao len ga rlë nisa lao yedyi layu. Caora na' beyaca nisa na' ca ren. ⁵ Lëscan' beda' unë itu ángel, ben' rnabë' nisa de lao yedyi layu unë' cani:

—Tahuen gula ruelo' rchugobë'lo' quie ja benë'. Luë' naco' Diuzi, ben' la'iya. Luë' naco' ben' azucazi desde tiempote. ⁶ Nacan ta yu'u ni'a xnezi babëlo' quiejë', como dan' bëtijë' blatojë' ren quie yaca ben' naca la'iya quio', blatojë' ren quie ben' uidxogue' xti'idzo' dza na'. Na'ra luë' bao' mandado yo'ojë' nisa ren na'a. Pues cana' reya'ala' gaca quiejë'.

⁷ Lëscan' beda' unë itu ben' zu ru'aba unë' caniga:

—Xuzindo' Diuzi. Luë' naco' ben' de yugulute yela' huaca quie. Nacan ta yu'u ni'a xnezi cabë' babëlo' baochugubë'lo' quiejë'.

⁸ Na'ra uyo ángel udape yelatonë' copa quienë' lao obidza. Caora na' bë' Diuzi lëbë' fuerza ta uzeinë' yaca ben' nita' lao yedyi layu. ⁹ Na'ra uyeitzaguejë', pero bibetza'jë' pensari quiejë', bibëjë' Diuzi ben' ze, den' ptasi bniolajë' Diuzi, ben' rue ca castigo raca quiejë'.

¹⁰ Na'ra uyo ángel ga'yo' yelatonë' copa quienë' lao xlato bia guixi' bayatza gula. Caora na' bega'n chula lato ga rnabë'ba', lëscan' udi'in ja benë' ludyijë' tanto ulajë'. ¹¹ Pero bibetza'jë' pensari quiejë' ta bira huejë' cabë' naca tamala ruejë', den' ptasi bniolajë' Diuzi, ben' zu guibá, nun quie dan' lega ulajë' uzujë' yedzo' bërë'.

¹² Na'ra uyo ángel xopa yelatonë' copa quienë' lu'u yao ze laona Eufrates. Caora na' beyu'e nisa quie yao na', beyacan layu bidyi cuenda uyalo tu neza ga ude ja soldado quie rey, ben' za' zaca' rlë ubidza.

¹³ Na'ra blë'ëda' bro tzona bichi be mala nacajan forma ca quië'dzo'. Brojaba' lu'u ru'a bia guixi' snia gula, bia naca Satanás. Lëscan' brojaba' lu'u ru'a bia guixi' bayatza gula. Lëscan' brojaba' lu'u ru'a ben' rguixogue' di'idza' huezi' yë'. ¹⁴ Na'ra lëja bichi be mala na', nacajan bichi be quie taxi'ihui'. Ruejan seña, ruejan yela' milagro. Na' riojan retupajan ja rey, ben' nita' lao yedyi layu, ta yedupajë' tu dza bzu Diuzi, dza belaoztégue, dza cati tilalëjë' Diuzi, ben' de yugulute yela' huaca quie.

¹⁵ Na'ra una Jesucristo: “Gapale cuidado, porque tu sasazi yeguida' ba'ala'cazi raquele biyeguida'. Huaca huen quie ben' zu rbeza në'ëdi' cati yeguida', porque ben' birbeza në'ëdi', naca quienë' ca quie ben' rasi, ben' biracabë' tu sasazi idyin ben' uban zan yu'u quienë'. Huele listo cuezale në'ëdi' dyë'ëdi cuenda bigaca yela' stu' quiele cati idyin hora yeguida'.” Cana' una Jesucristo. ¹⁶ Caora na' betupa ja bichi be mala quie ja rey nita' lao yedyi layu tu lugar ga Armagedón di'idza' hebreo.

¹⁷ Na'ra uyo ángel gadyi yelatonë' copa quienë' ladzazi. Caora na' desde lu'u idao' zu guibá ga zu xlato Diuzi, na'te bro tu rchi' bene' unanë' caniga:

—Aoca.

¹⁸ Caora na' uyëpi yesa, gotzo bdyito hueziu', lëscan' guca uzu' fuerte gula. Na' lega psisin yedyi layu. Ni tu lasa binežu' fuerte gula cabë' uzu' huala gula guca. Tu lala nita' ja benë' lao yedyi layu, binegacacazi cana'. ¹⁹ Aodyiagui' lëyedyi belaotera, na' gucan tzona cue'. Aozuri' ja ciudad de lao yedyi layu. Caora na' beza'la'adyi' Diuzi quie ciudad Babilonia, ciudad belaotera. Bë Diuzi castigo huala gula quie ben' ciudad Babilonia nun quie lega bdza'në' cabë' bë ja ben' ciudad na'. ²⁰ Lëscan' abeyula ga de yu bidyi lu'u nisadao', lëscan' abeyula yugulu ya'a. ²¹ Gusi' yo hueziu' yela gula guibá. Gusi'n lao ja ben' nita' lao yedyi layu. Naca yela' zi'i quien chopá galo kilo tu tun. Pero ptasi bniola ja benë' Diuzi nun quie dan' besi'në' yo hueziu' gucajë' tu castigo huala gula.

17

Bë Diuzi castigo tu nigula bayatza, nigula ruti' gusto quie

¹ Caora na' bida tu ángel, ben' naca gadyi ben' yelato gadyi copa unanë' në'ëdi' caniga:

—Uda, ulu'ena' luë' cabë' castigo gaca quie nigula bayatza gula, nigula ruti' gusto quie, ben' re' lao nisadao'. ² Na'ra ja rey na', ben' nita' lao yedyi layu, bëljë' lë'nigula na' tabayatza gula, ta bireya'ala' hueljë' lëbë'. Lëscan' ja ben' nita' lao yedyi layu, ahue'ejë' vino quienë' uzudyijë' bërëjë' tabayatza gula ta bireya'ala' hueljë' lëbë'.

³ Na'ra dyin quie Bichi Be quie Diuzi guca quia' ca ben' uxusa blë'ëda' tu ángel uquië'në' në'ëdi' tu lao lato ga bidyia yu'u. Na' blë'ëda' dyia tu nigula xcu'udzu tu bia guixi' nacaba' zna. Blë'ëda' dyia laoba' di'idza' ta rutasi runioba' lao Diuzi. Blë'ëda' zu gadyi guichoba', lëscan' dyia chi luzuba'.

⁴ Na'ra lë'nigula na' naconë' tu vestido naca culuri tamorado len tažna. Naca tza'onë' conlë oro, len yo tzao', len perla. Lëscan' zënë' tu copa de oro ta yudzu ta naca bayatza gula cabë' bëljë' ja be'mbyu. ⁵ Na'ra žga nigula na' zu letra rguixogue'n cabë' laohuë', pero negachi'zi naca laohuë'. Cani rnën lë'ë žganë': "Në'ëdi' laohua' Babilonia. Naca' zna' yugulu nigula bayatza, nigula ruti' gusto quie. Naca' zna' yugulu ta naca mala gula de lao yedyi layu." ⁶ Na'ra blë'ëda' raca tondo guicho nigula na' ca raca tondo guicho ben' žudyi. Raca tondo guichonë' nun quie dula' quienë' ulato ren quie ja ben' quie Diuzi, len ja ben' udixogue' xti'idza' Jesús. Pues dula' quienë' gutijë'. Caora blë'ëda' ca naca quienë', lega bebaneda'. ⁷ Na'ra unë ángel na' në'ëdi' cani:

—¿Bixquien' lega rebanelo'? Na' uzioñe'eda' luë' cabë' naca ta negachi' quie nigula na', len quie bia guixi', bia dyia nigula na', bia zu gadyi guichogue, bia naca chi luzu. ⁸ Lëbia guixi' blë'ëlo', nacaba' bia uzu dza na'te, pero bira zuba' na'a, pero huaroba' lu'u pozo zitu' gula ga yu'uba'. Bë' yeyudyi na', te quieba' tuzioli. Huebane ja ben' nita' lao yedyi layu, ja ben' bizu laohue lu'u libro ta naca lista quie ben' de yela' neban quie tuzioli. Desde dza cati ure' dylaylu biza laojë' lë'ë lista. Huebanejë' cati ilë'ëjë' lëbia guixi', bia uzu dza na'te, pero bira zuba' na'a, pero huaroba' yezuba' tatula.

⁹ 'Ni rnia' tu di'idza' para nu ben' tzioñe'e len. Rnia' lëgadyi guicho bia guixi' rnërën quie gadyi ya'a ga dyia nigula na'. ¹⁰ Lëscan' lëgadyi guichoba' rnërën quie gadyi rey. Na'ra quie ga'yo' rey na' abeyudyi bedu quiejë'. Itunë' rnabë'në' na'a. Itunë' nerdzioguera idyin dza inabë'në'. Catidyin dza inabë' zelao ben' gadyi, biinabë'në' zi dza. ¹¹ Na'ra lëbia guixi', bia uzu dza na'te, pero bira zuba' na'a, lëba' huaroba' gacaba' xuna rey. Entre laguedy gadyi ben' rey, huaroba' gacaba' rey xuna, pero bë' yeyudyi na', te quieba' tuzioli.

¹² 'Quie lao chi luzuba' ta blë'ëlo', lenan rnërën quie chi rey, ben' binesulao inabë'. Huacajë' rey, pero tu chi'zi inabë'jé' len lëbia guixi'. ¹³ Na'ra lao chi rey na' huazujé' de acuerdo ta hue'jé' lëbia guixi' na' yela' r nabë' quiejé' ta inabë'ba'. ¹⁴ Caora na' huadilalëjé' ben' naca ca quie beco' zi'ila', pero hue ben' naca ca quie beco' zi'ila' gan. Huenë' gan como dan' naquë' xan' yugulu ben' r nabë', lëscan' naquë' xan' yugulu ben' naca rey. Ulio Diuzi pserenë' yaca ben' naca ben' quienë'. Nacajë' ben' bipsan unao xnezë'.

¹⁵ Lëscan' una ángel na' në'ëdi' caniga:

—Nisadao' ta blë'ëlo' gan' dya nigula bayatza gula, nigula ruti' gusto quie, lena' rguixogue'n quie ja ciudad, len quie ja benë', len quie ja di'idza' len quie ja nación. ¹⁶ Na'ra quie chi luzu bia guixi' naca rey ta blë'ëlo', lëyaca rey na' udiejé' nigula bayatza gula, nigula ruti' gusto quie. Usanla'adyi'jé' lëbë'. Hualëchojé' žabanë' ta tanë' du ga'ala' guidinë'. Lëscan' gaojé' bë'ëla' žuba' quienë', na' uzejjé' cuerpo quienë'. ¹⁷ Cabë' re'en Diuzi gaca, cana' udze'në' pensari lu'u guicho laxta'oje' ta huejé' quienë' cabë' re'ennë', la'acazi bira-cabë'jé' chi Diuzi hue quiejé' cana'. Quie lena' huazujé' de acuerdo hue'jé' yela' r nabë' quiejé' lao na'a bia guixi' ta gacaba' rey inabë'ba' lëjé'. Cana' gaca quiejé' hasta izu di'idza' cabë' una Diuzi. ¹⁸ Na'ra lënigula na' blë'ëlo', naquë' lëyedyi belaotera ga r nabë'jé' ja rey nita' lao yedyi layu.

18

Aoca quie ciudad Babilonia

¹ Na'ra ude beyudyi na', blë'ëda' itu ángel, ben' detzague yela' r nabë' quie, uyëzinë' guibá. Na'ra tantozi naquë' raca titi', uyu'u xni' quienë' lao yedyi layu. ² Caora na' unë ángel na' zidzo unanë' caniga:

—Aoca quie Babilonia, aoca quie Babilonia. Naca Babilonia ciudad belaotera, pero abeyacan ciudad ga rda ja taxi'ihui'. Abeyacan ca beló ga yu'u yugu cue' bichi be mala. Abeyacan lidyí ja bia mala gula, bia rzë ladza, bia naca bayatza gula. ³ Cana' guca quie Babilonia, como dan' naca ciudad Babilonia ca quie tu nigula mala, nigula ruti' gusto quie. Ahue'e ben' quie yugulu nación vino quienë'. Bëljëjé' lëbë' tabayatza, ta bireya'ala' hueljëjé' nigula. Lëscan' ja rey nita' lao yedyi layu, bëljëjé' lëbë' tabayatza gula, ta bireya'ala' hueljëjé' nigula. Lëscan' ja ben' yu'u huëti', ben' nita' lao yedyi layu, beyacajë' ben' uña'a gula nun quie dan' bërëljëjé' nigula na' tabayatza gula, ta bireya'ala' hueljëjé' nigula.

⁴ Na'ra beda' tu rchi' itu ben' zu guibá. Unanë' cani:

—Le'e ben' naca ben' quia'. Ulero ciudad na' tacuenda bihuerële cabë' dula' xquia ruejé', ta bigaca quiele cabë' castigo gacajë'. ⁵ Tantozi baoye dula' xquia quiejé', una Diuzi abdyin dza huenë' lëjé' castigo. ⁶ Abdyin dza gaca nigula na' castigo lëbi ca castigo bënë' ja ben' tula. Chopa tantola huele nigula na' castigo quie cabë' tamala bënë'. Hue'le nigula na' ta yo'onë' chopa tantola ta naca sla' cabë' ta bënë' hue'e ja ben' tula. ⁷ Lëbizi ca bënë', bënë' cuinnë' ben' ze, lëbizi ca guquë' ben' uña'a nun quie bënë' tabayatza, cana' huele nigula na' castigo ta yedzagalaotzeguenë'. Cani rna nigula na' lu'u guicho laxta'onë': "Ni ri'a. Naca' ben' r nabë'. Binaca' nigula guti xquiuhue. Bisaca'yudyicaza'." Cana' rnanë'. ⁸ Quie lena' tu sasazi gata' castigo quienë'. Tu sasazi gata' yela' guti quienë'. Tu sasazi gata' yela' rla quienë'. Tu sasazi gata' yela' rdue quienë'. Na' huayeinë' conle gui' como dan' naca Diuzi ben' de yela' huaca quie baochugulinë' quienë'.

⁹ Huabedyi ja rey, ben' nita' lao yedyi layu, ben' bëlë lëbë' tabayatza. Huabedyiya'jê' cati ilë'ëjê' rasa dzen ga reinë'. ¹⁰ Na'ra yega'n ja rey na' zitu' nun quie rdzebijê' cabê' castigo raca nigula na' inajê' caniga:

—¡Ay! ¡Bayêchi' gula raca quie ben' ciudad Babilonia! Ciudad že, ciudad belaotera naca ciudad Babilonia, pero tu sasazi bla' castigo quiejê'.

¹¹ Lëscan' huabedyi ja ben' yu'u huëti', ben' nita' lao yedyi layu. Huabedyi-jê' nun quie aodyiagui' lëciudad na'. Huabedyiya'jê' como dan' bira nita' nu ja ben' ga'o ta nu'ajê' ruti'jê' ¹² ta nu'ajê' oro, ta nu'ajê' plata, ta nu'ajê' yo tzao', ta nu'ajê' perla, ta nu'ajê' la'ari' fino gula taculuri morado len taculuri žna. Lëscan' bira nita' nu ja ben' ga'o ta nu'ajê' yugu cue' ja yaga rla' žixi žeo, ta nu'ajê' marfil, ta nu'ajê' yaga fino, ta nu'ajê' bronce, ta nu'ajê' guibá, ta nu'ajê' mármol. ¹³ Lëscan' bira nita' nu ja ben' ga'o ta nu'ajê' canela, ta nu'ajê' rchinlaza, ta nu'ajê' yalo, ta nu'ajê' aceite mirra len aceite tula ta rla' badan gula, ta nu'ajê' vino, ta nu'ajê' aceite olivo, ta nu'ajê' yezo fino, ta nu'ajê' trigo. Lëscan' nequië'jê' bia ru'a yua', nequië'jê' beco' ži'ila', nequië'jê' caballo, nusa'jê' carreta, hasta nequië'jê' benë' ta yeyuti'jê'. ¹⁴ Na'ra cani ina yaca ben' huëti' rëbijê' yaca ben' ciudad na'.

—Bira de tazixi cabê' tazixi lega yaxele dza na'. Aode quie yela' uña'a quiele, aode quie tafino ta de quiele dza na'.

¹⁵ Na'ra ja ben' ruti'ja tana', ben' guca ben' uña'a nun quie bějê' huëti' ciudad na', bira tziojê' ga'ala' ga re' ciudad na'. Huega'njê' zitu' nun quie rdzebijê' quie castigo raca ja ben' ciudad na'. Huabedyijê' huaquejê' bayêchi'. ¹⁶ Cani inajê':

—¡Ay! ¡Bayêchi' gula raca quie ciudad na'! Guca ciudad na' ca quie tu nigula naco tu la'ari' fino de culuri morado len culuri žna. Guca ciudad na' ca quie tu nigula naca tzao' con oro, len yo tzao', len perlas. ¹⁷ Pero tu sasazi aoniti yela' uña'a quienë'.

Na'ra yugulu ben' naca xan' barco, len ben' naca pasajero quiejê', len ben' rue dyin quie barco, len ben' huëti', ben' rse'ela' ja yua' quie ta tzion yedyi tula, caora na' bira tziojê' ciudad na' huega'njê' zitu'. ¹⁸ Cati ilë'ëjê' rasa dzen rei ciudad na', na'ra huabedyiya'jê' inajê' caniga:

—¡Bira de ciudad belaotera ca ciudad niga!

¹⁹ Na'ra udze'jê' yu guichojê', huabedyijê' gaquejê' bayêchi', cuedyiya'jê', inajê' caniga:

—¡Ay! Bayêchi' gula raca quie ciudad na'. Conlë yela' uña'a quie ciudad na' beyaca ben' naca xan' barco ben' uña'a. Pero na'a tu sasazi aode quie ciudad na'.

²⁰ Pero le'e ben' zu guibá, len le'e ben' naca apóstol, len le'e ben' rguixogue' xti'idza' Diuzi, len le'e yugulu ben' naque quie Diuzi, reya'ala' yedaohuele cabê' guca quie ciudad na', como dan' castigo bē Diuzi ciudad na'. Cana' appquizu Diuzi lëjê' cabê' tamala bějê' quiele.

²¹ Na'ra blë'ëda' ulisa tu ángel hua'ala' tu yo ta naca ca yo že cabê' ta rutujê' zuba'. Blë'ëda' uru'unnë'n lu'u nisadao'. Na' unë' cani:

—Lëbizi cabê' guca quie yo že, cana' gaca quie ciudad Babilonia. Tu sasazi te quien, bira ilë'ë yaca benë' len. ²² Bira uxidyi ja benë' arpa, bira ucuedyi ja benë' flauta, bira ucuedyi ja benë' trompeta, bira huejê' música lao calle ciudad na'. Nitu nitu ben' hue dyin, bira inita'jê' ciudad na'. Bira gutu molino yo, ²³ bira useni' lámpara gui', bira gaca ru'be lani quie huetzagana' ciudad na'. Cana' gaca quie ciudad na' la'acazi ben' yu'u huëti' quie ciudad na', gucajê' ben' belaoira lao yaca ben' nita' lao yedyi layu, pero uži'jê' ben' quie yugulu nación yê' conlë yela' brujo quiejê'.

²⁴ Na'ra lëciudad na' nacan ciudad ga bëtijë' blatojë' ren quie ben' udixogue' xti'idza' Diuzi len yaca los demás ben' naque quienë'. Blatojë' ren quie yugulu ben' unao xneza Cristo.

19

¹ Na'ra ude beyudyi na' beda' rchi' ja ben' zë, ben' zu guibá, unëjë' zidzo gula caniga:

Naca Diuzi ben' ze.

Tuzi Diuzi quiero uselanë' ra'o.

Tuzi Diuzi quiero de yela' bala'ana quienë'.

Tuzi Diuzi quiero de yela' rnabë' quienë'.

² Cana' naca quienë', como dan' rhugulinë' ta yu'u ni'a xnezi, rhugulinë' ta naca tali.

Pues aochugulinë' quie nigula bayatza gula, nigula ruti' gusto quië, nigula psëdi ja ben' nita' lao yedyi layu, na' bëjë' tabayatza gula cabë' psëdinë' lëjë'.

Bapquižu Diuzi lënigula na' cabë' bënë' bëtinë' ja ben' quie Diuzi.

³ Caora na' benajë' tatula:

—¡Naca Diuzi ben' ze! Tuzioli raca dzen ga rei nigula na'.

⁴ Na'ra galobetapa ja ben' gula, len tapa ben' naca forma quie bia guixi', gutajë' uzu ru'ala layu uyonla'adyi'jë' Diuzi, ben' re' lao xlatogue. Na'ra unajë' cani:

—¡Cana' nacan! ¡Naca Diuzi ben' ze!

⁵ Na'ra beda' itu rchi' benë', ben' zu cuëta xlato Diuzi, unënë' caniga:

Huele Diuzi ben' ze, yugulu le'e ben' rue ca mandado ruenë'.

Huele Diuzi ben' ze, yugulu le'e ben' rionla'adyi' lëbë', len le'e ben' cuidi', len le'e ben' huaca.

Ni rnën quie lani quie huetzagana' quie ben' naca ca quie beco' zi'ila'

⁶ Lëscan' beda' itu rchi' ja ben' zë. Unëyaquë' cabë' rnë ja yao ze, lëscan' cabë' rnë bdyito hueziu' fuerte. Unajë' caniga:

¡Naca Diuzi ben' ze!

Abdyin dza tuzi lëbë' rnabë'në'.

Naca Diuzi quiero ben' de yugulute yela' rnabë' quie.

⁷ Yedaohuetzeguero, suro gusto gula, hueronë' ben' ze, como dan' abdyin hora quie huetzagana' quie ben' naca ca quie beco' zi'ila'.

Azu nigula gaca žgulanë', rbezanë' utzagana'lënë' lëbë'.

⁸ Bë' Diuzi lëbë' la'ari' fino gula, la'ari' yëri gula, la'ari' raca titi' ta gaconë'.

Lëla'ari' fino gula rnën quie ben' naque quie Diuzi nun quie bë quiejë' ca re'en Diuzi huejë'.

⁹ Na'ra una ángel na' në'ëdi' caniga:

—Bzu di'idza' lë'ë guichi cani: “Tahuen gula nacan quie ja ben' guida lani quie huetzagana' quie ben' naca ca quie beco' zi'ila'.”

Lëscan' unë' në'ëdi' cani:

—Cabë' di'idza' rnia' luë' nacan di'idza' quie Diuzi.

¹⁰ Na'ra uditzoga' ziba' lao ángel na' ta tzionla'adya' lëbë', pero unë' në'ëdi' caniga:

—Bihuelo' cana'. Tuzi Diuzi reya'ala' tzionla'adyo'. Nacaria' ben' rue bi mandado hue Diuzi në'ëdi' cabë' ruelo' luë', len ja ben' bicho', ben' rguixogue' xti'idza' Jesús. Pues nu ben' rguixogue' xti'idza' Jesús, yu'ujë' Bichi Be ca Bichi Be uyu'u ja ben' udixogue' xti'idza' Diuzi tiempote.

Ni rnan quie tu ben' dyia caballo bezëri

¹¹ Na'ra blë'ëda' uyalo guibá, blë'ëda' tu caballo bezëri dyia benë' lëba'. Na'ra ben' dyia lëba' laonë' cani: "Ben' ruzu di'idza', ben' rue puro tali." Cana' laonë', como dan' puro ca re'en Diuzi huenë', cana' ruenë'. Cana' r nabë'në' rdilalënë' ben' raca condra Diuzi. ¹² Lëben' dyia caballo bezëri, na' yu'u yulaohuë' ca gui'. Yu'u guichonë' coron zë. Zu letra lë'ë coron quienë' cabë' laohuë', pero tuzi lëbë' nezinë' cabë' laonë'. ¹³ Na'ra naconë' tu la'ari' nela'o ren. Lëscan' laonë': "Xti'idza' Diuzi." ¹⁴ Na'ra unao yugulu ben' zu guibá ben' na'. Lëscan' nacojë' la'ari' fino gula, la'ari' yëri bezëri. Lëscan' dyiajë' ja caballo bezëri. ¹⁵ Bro tu espada neduchi' gula lu'u ru'a ben' na'. Conlë len rguinë' ja ben' quie ja nación nita' lao yedyi layu. Inabë'në' lëjë' zi'laza gula. Huachugulinë' quiejë' tali gula. Gaca quiejë' ca quie ziza bedzuli' ta blio ja benë' uzin. Yela' rdza' quie Diuzi, ben' de yugulute yela' huaca quie, huenë' lëjë' castigo huala gula. ¹⁶ Na'ra blë'ëda' zu letra lë'ë zabanë' len sunnë' ga rguixogue'n bi laonë'. Cani laonë': "Ben' r nabë'ra ca ja rey, ben' r nabë'ra ca ja ben' r nabë'."

¹⁷ Na'ra blë'ëda' tu ángel nulioguë' lao obidza uredyia'në' fuerte gula guzinë' yugulu bia rzë ladza. Unë' caniga:

—Uleda, idupale ta gaole rtze' quie Diuzi. ¹⁸ Uleda ta gaole bë'ëla' zuba' quie ja rey, len quie ja xan' soldado, len quie ja ben' naca tzutzu huala, len quie ja caballo, len quie ja soldado dyia caballo, len quie ja ben' zë. Gaole bë'ëla' zuba' quiejë', la'acazi ben' libre, la'acazi ben' nada'o, la'acazi ben' yëchi', la'acazi ben' belao.

¹⁹ Na'ra blë'ëda' lëbia guixi' bayatza gula, lëscan' blë'ëda' ja rey nita' lao yedyi layu len ja soldado quiejë'. Babedupajë' ta tilalëjë' ben' dyia caballo bezëri len ja ben' nao lëbë'. ²⁰ Na'ra ben' dyia caballo bezëri len ben' nao lëbë', bëjë' bia guixi' bayatza gula len ben' rguixogue' di'idza' huezi' yë' preso. Lëben' huezi' yë' naquë' ben' bë seña, bënë' yela' milagro uzi'në' yë' ja ben' bë lato uzu marca quie bia guixi' bayatza gula. Lëjë' uyonla'adyi'jë' tu ta naca ca forma quie bia guixi' bayatza gula. Na'ra ben' dyia caballo bezëri len ben' nao lëbë', uru'unjë' bia guixi' bayatza gula len ben' rguixogue' di'idza' huezi' yë' lu'u gui' ze naca ca lagun ga yu'u tu ta lao azufre ta lega ra'ala' gui'. Du nebanjë' aoru'unjë' lëjë' lu'u gui' na'. ²¹ Na'ra ben' dyia caballo bezëri bëtinë' ja ben' bega'n, ben' naca rey len soldado quiejë'. Conlë espada neduchi' bero ru'anë', conlë len bëtinë' lëjë'. Na'ra bla' ja bia rzë ladza udaojaba' bë'ëla' zuba' quiejë' belojoba'.

20

Ni rnan quie tu mila iz

¹ Ude beyudyi na' blë'ëda' uyëzi tu ángel guibá zënë' zi'guiba quie pozo zitu' gula, lëscan' zënë' tu caden reo. ² Na'ra bëxonë' lëbia snia gula, bia naca ca bëla, bia naca xan' taxi'ihui' lao Satanás. Pquio ángel na' lëbë' lao tu mila iza. ³ Baoru'un ángel na' lëbë' lu'u pozo zitu' gula gan' psioguë' lëbë', lëscan' bzunë' tu sello ru'a puerta quie pozo na' tacuenda bira si'në' ja ben' nita' lao yedyi layu yë' lao tu mila iza. Na'ra bë' aode lao tu mila iza, cana' yeguidë' itu chi'zi.

⁴ Caora na' blë'ëda' re' yaca benë' lao xlatojë'. De yela' r nabë' quiejë' ta huejë' justicia. Lëscan' blë'ëda' ja bichi be quie ja ben' guti dza na'. Aochugu benë' luba'jë' dza na' nun quie dan' unaojë' xneza Jesús uidxogue'jë' xti'idza' Diuzi. Biuyonla'adyi'jë' bia guixi' bayatza gula. Lëscan' biuyonla'adyi'jë' tu ta naca forma quieba'. Bibëjë' lato su marca quieba' žgajë'. Lëscan' bibëjë' lato su marca quieba' lao na'ajë'. Blë'ëda' beba ja ben' na' ta inabë'jë' tuze

len Cristo lao tu mila iza. ⁵ Pero ja los demás ben' huati, bibebanjè' hasta aode lao tu mila iza. ⁶ Naca huen gula quie ben' beban tanëro. Nacajè' ben' la'iya quie Diuzi. Tuzioli bigata' castigo quiejè', den' huacajè' pxuzi quie Diuzi len Cristo. Inabè'jè' tuze len Cristo lao tu mila iza.

⁷ Bè' aode tu mila iza, na'ra bero Satanás lu'u ga yu'unè' neyeyonè'. ⁸ Huaronè' ta tzexi'nè' yè' ja ben' nita' lao yedyi layu. Huazi'nè' ben' quie nación Gog len ben' quie nación Magog yè'. Huatupanè' lèjè' ta huejè' dila. Tantozi naca soldado quiejè' ben' zè gula, una'n ca quie yožo re' ru'a nisadao'. ⁹ Na'ra bedza'jè' lao yedyi layu, uyèchojè' ga negu'udi' ja ben' quie Diuzi, ta inaro uyèchojè' lèciudad nedyè'è Diuzi. Pero na'ra pchezi Diuzi gui' guibá ta bzeinan lèjè' beyudyi bedu. ¹⁰ Caora na' uru'un Diuzi xan' taxi'ihui', ben' uzi' yè', lu'u gui' ze naca ca lagun ga yu'u azufre ta lega ra'ala' gui'. Ga uru'un Diuzi lèbia bayatza gula, len lèben' udixogue' di'idza' huizi' yè', lègan' na' uru'un Diuzi xan' taxi'ihui'. Lègan' na' ilatzeguejè' du dza, du yela, tuzioli.

Ga rue Diuzi juicio quie ben' mala

¹¹ Na'ra blè'èda' xlatu Diuzi ta naca bezèri. Blè'èda' nu ben' re' laona. Nun quie re' ben' na' xlatoguè', aode quie ladza, aode quie dyilayu duzetan. Ni ilè'èti'n bira bega'n. ¹² Na'ra blè'èda' ja ben' huati, ben' huaca len ja xcuidi', zèjè' zaquè'lao lao Diuzi. Na'ra usalojè' ja libro len itu libro ga yu'u lista quie ben' de yela' neban quie tuzioli. Caora na' uchuguli Diuzi quie ja ben' huati cabè' bèjè' según ca rnèn lè'è ja libro na'. ¹³ Na'ra blè'èda' abedupa ben' zè, ben' huati. Abedupa ben' guti lu'u nisadao' len ben' guti con gati'tezi gan' zujè' rbezajè'. Uchuguli Diuzi quiejè' cabè' bèjè'. ¹⁴ Caora na' aode quie yela' guti, aode quie gui' gabila. Beyudyi bedu quien uyu'un lu'u gui' naca ca lagun. Na'ra quie nu ben' tzu'u lu'u gui' ze naca ca lagun, biyeyudyi yedu gaca castigo quiejè' tuzioli. ¹⁵ Uyu'u lu'u gui' naca ca lagun nu ben' bizu laoje lu'u libro ga yu'u lista quie ben' de yela' neban quie tuzioli.

21

Bade tu guibá cubi len tu dyilayu cubi

¹ Na'ra ude beyudyi na', blè'èda' bazè tu guibá cubi len tu dyilayu cubi. Abeyula guibá gula len dyilayu gula. Lèscan' bira de nisadao'. ² Nè'èdi', Juan, blè'èda' bayèzi tu ciudad la'iya, tu ciudad Jerusalén cubi. Bayèzin guibá ga zu Diuzi. Banaca ciudad na' dya'a gula cabè' dya'a gula naca la'ari' naco nigula caora idyin be'mbyu ta utzagana'lè'nè' lèbè'. ³ Na'ra beda' rchi' benè' guibá, rnènè' zidzo gula canì:

—Una'cara, bazu Diuzi ga nita' ja benè'. Huazunè' len lèjè' tuze. Huacajè' ben' quienè'. Cuin Diuzi huazunè' len lèjè' ta nacanè' Diuzi quiejè'. ⁴ Bihue Diuzi lato gaca tamala quiejè'. Bira gati'jè', bira cuedyi'jè', bira gaca bayèchi' quiejè', bira ilajè', como dan' aode quie yugulu tagula, babeyulan.

⁵ Na'ra una Diuzi, ben' re' lao xlatogue, unènè' canì:

—Una'cara, tacubi reyua' yugulu ta de.

Lèscan' unè' canì:

—Bzu di'idza' lè'è guichi cabè' rnia', como dan' cabè' rnia' nacan ta sudyi'ilèlo'.

⁶ Ude beyudyi na' unè' nè'èdi' canì:

—Babia' cabè' unia' hua'. Lao na'a uzulaohua' ulècha' yedyi layu. Lèscan' lao na'a yeyudyi yedu quie yedyi layu. Naca' ca quie letra A len letra Z quie abecedario. Con nu ben' rbili nisa, nè'èdi' hua'jè' nisa yo'ojè', bibi si'a quien. Nisa zila rlè ta hua'jè' yo'ojè'. Nu ben' yo'o nisa hua'jè', nebanjè' tuzioli.

⁷ Lëscan' nu yaca ben' sue biusanla'adyi' xneza', gaca quiejë' tadya'a gula cabë' unia' gaca quiejë'. Huaca' Diuzi quiejë', na' huacajë' zi'ina'. ⁸ Pero cabë' gaca quie ben' rdzebi inao xneza', ben' bibë quie xti'idza', len ben' bë tabayatza, len ben' bëti benë', len ben' udalë ja nigula binaca žgule, len ben' bë yela' brujo, len ben' uyonla'adyi' ja idolo, len yugulu ja ben' huezi' yë', lëjë' naca quiejë' tziojë' lu'u gui' naca ca lagun ga yu'u tu ta lao azufre ta lega ra'ala' gui'. Cana' gata' castigo quiejë' tuzioli.

Huayëzi tu ciudad Jerusalén cubi guibá

⁹ Na'ra bida tu ángel, ben' nacaja gadyi, ben' zë ja gadyi copa ta yudzo zelao gadyi castigo bë Diuzi dza na'. Na'ra unanë' në'ëdi' cani:

—Udacara, ulu'ena' luë' cabë' naca nigula, ben' utzagana'lë ben' naca ca quie beco' zi'ila'.

¹⁰ Na'ra dyin quie Bichi Be quie Diuzi, guca quia' ca quie ben' uxusa. Blë'ëda' tu ángel uquië'në' në'ëdi' tu lao ya'a že naca sibi gula. Na' blu'enë' në'ëdi' lëciudad že, ciudad naca la'iya, ciudad Jerusalén ta za' guibá ga zu Diuzi. ¹¹ Na' raca titi'n ca raca titi' ga zu Diuzi. Raca titi'n ca raca titi' yo tza'o' gula, ca raca titi' yo jaspe rna'n ca yaohuan. ¹² Ru'a lao ciudad na' zu tu besu že gula nacan tasibi ta dyian chipchopa puerta. Na'ra zu tu huio ángel ru'a ja puerta na'. Lëscan' lë'ë ja puerta na' zu letra cabë' lao tu huio ja ben' Israel quie chipchopa familiajë'. ¹³ Zu tzona puerta zaquë' ga rlë obidza. Lëscan' zu tzona puerta zaquë' norte, lëscan' zu itzonan zaquë' sur, lëscan' zu itzonan zaquë' ga reyen obidza. ¹⁴ Na'ra uzulao besu quie ciudad na' lao chipchopa yo nacan laga'. Lëscan' lë'ë yo na' zu tu huio lao ja apóstol quie lao chipchopajë', ben' naque quie ben' naca ca quie beco' zi'ila'.

¹⁵ Na'ra lëángel na', ben' bë'lënë' në'ëdi' di'idza', zënë' tu ta naca ca huenixi' de oro ta urixinë' ciudad na', len ja puerta quien, len ja besu quien. ¹⁶ Blë'ëda' lëciudad na' nacan cuadrado. Nacan yela' tona quien lëbizi len yela' laga' quien. Caora na' bixi ángel na' ciudad na' blë'ëda' nacan tu gayuhua legua. Tu lëbizi nacan yela' tona quien len yela' sibi quien len yela' laga' quien. ¹⁷ Lëscan' bixi ángel na' besu quien blë'ëda' tu gayuhua chopa galo tapa žicho yela' laga' quien, según ca rurixi ja benë' como dan' cana' bixi ángel na' len.

¹⁸ Blë'ëda' naca besu quien de yo jaspe. Lëscan' lëciudad na' nacan puro de oro rna'n ca yaohuan yëri gula. ¹⁹ Lë'ë yo naca laga' ga uzulao besu na', yu'un yugu cue' yo tza'o'. Na' yo laga' nëro, yu'un yo jaspe. Na' yo laga' urupe, yu'un yo safiro. Na' yo laga' uyune, yu'un yo ágata. Na' yo laga' udape, yu'un yo esmeralda. ²⁰ Na' yo laga' ga'yo', yu'un yo ónice. Na' yo laga' xopa, yu'un yo cornalina. Na' yo laga' gadyi, yu'un yo crisólito. Na' yo laga' xuna, yu'un yo berilo. Na' yo laga' ga, yu'un yo topacio. Na' yo laga' chi, yu'un yo crisoprasa. Na' yo laga' chiptu, yu'un yo jacinto. Na' yo laga' chipchopa, yu'un yo amatista. ²¹ Na'ra quie chipchopa puerta na' nacajan de tu huio perla quie quien. Lëscan' naca calle bëlao quie ciudad na' de oro puro. Rna'n ca yaohuan yëri gula.

²² Biblë'ëda' nitu idao' bizu lao ciudad na' como dan' cuin Diuzi, ben' de yugulute yela' huaca quie, zunë' lao ciudad na' len ben' naca ca quie beco' zi'ila'. ²³ Lëscan' birnaban tzu'un xni' obidza ni xni' biu' ciudad na', como dan' cuin Diuzi len ben' naca ca quie beco' zi'ila' rseni'jë' nacajë' gui' quien. ²⁴ Nun quie xni' quie ciudad na', hualë'ë ja ben' quie ja nación ta tajë' neza quiejë'. Huida ja rey lao ciudad na' ta gapala'një' Diuzi. ²⁵ Na'ra bireyeyo ja puerta quie ciudad na' te dza. Bira rala lao ciudad na'. ²⁶ Lëscan' huida ja benë' quie quie nación lao ciudad na' ta huejë' Diuzi ben' že gapala'një'

lëbë'. ²⁷ Pero yaca ben' mala, len yaca ben' bayatza, len yaca ben' huezi' yë', bisaque' tzu'ujë' lao ciudad na'. Tuzi ben' zu laohue lë'ë lista zu lu'u libro napa ben' naca ca quie beco' zi'ila', tuzi lëjë' huazaque' tzu'ujë' lao ciudad na'. Lëlibro na' nacan ga yu'u lao ja ben' de yela' neban quie tuzioli.

22

¹ Na'ra blu'e ángel na' në'ëdi' tu yao nacan nisa dya'a gula raca titi'n ca yaohuan yëri gula. Lënisa na' ru'en yela' neban. Na'ra rero nisa na' ga re' xlató Diuzi len ga re' xlató ben' naca ca quie beco' zi'ila'. ² Lëscan' lao tao' calle belao quie ciudad na', de tu yao yëri gula. Itzala' huio yao na', zu ja yaga ru'e yela' neban. Rbia ja yaga na' tazixi quien chipchopa lasa tu iza, ta inaro, tu lasa tu biu'. Lëxla'aga' ja yaga na' nacan remedio ta iyaca ja ben' quie ja nación. ³ Na'ra bira nudze'de' Diuzi nitu ben' zu lao ciudad na'. Lëscan' huazu xlató Diuzi len ben' naca ca quie beco' zi'ila' lao yedyi na'. Huayonla'adyi' yaca ben' quienë' lëbë'. ⁴ Hualë'ëjë' ru'alaó Diuzi. Badyia letra žgajë' cabë' lao Diuzi. ⁵ Na'ra bira rala lao ciudad na'. Lëscan' yaca ben' zu lao ciudad na', bira inaban useni'n gui' ta ilë'ëjë', bira inaban useni' ubidza gan' zujë', como dan' cuin Diuzi useni'në' gui' quiejë' ta ilë'ëjë'. Caora na' inabë'jë' tuzioli.

Baruen bago dza yeguida Cristo

⁶ Na'ra una ángel në'ëdi' caní:

—Nacan di'idza' li ta babeló'. Nacan ta sudyi'ilëlo'n. Caora na' use'ela' Diuzi tu ángel quienë' ta ulu'enë' ja ben' quienë' cabë' ta baza' gaca. Naca Diuzi ben' rudze' Bichi Be quienë' lu'u guicho laxta'o ja ben' rguixogue' xti'idzë' ta gacalënë' lëjë' cabë' inajë'.

⁷ Na'ra tanun quie Cristo una ángel caní:

—Baruen bago dza yeguida'.

—Huaca huen quie ja ben' ruzënaga cabë' di'idza' rguixogue' libro ni!

⁸ Në'ëdi', Juan, beda' blë'ëda' cabë' blu'e ángel na' në'ëdi'. Caora cati beyudyi beda' blë'ëda' cana', caora na' uditzoga' ziba' lao ángel na', ben' blu'e në'ëdi' cana', ta tzionla'adya' lëbë'. ⁹ Caora na' unë' në'ëdi' caní:

—Bihuelo' cana'. Nacaria' ben' rue mandado quie Diuzi cabë' luë', cabë' ben' bicho', ben' rguixogue' xti'idza' Diuzi, len yugulu ben' ruzënaga cabë' di'idza' zu lë'ë libro niga. Tuzi Diuzi reya'ala' tzionla'adyo'.

¹⁰ Lëscan' unë' në'ëdi' caniga:

—Biucacho' con cabë' rna di'idza' zu lë'ë libro niga, como dan' baruen bago dza su di'idza' gaca con cabë' rnan lë'ë libro ni. ¹¹ Psan quie ben' mala. Huegarajë' seguir huejë' cabë' tamala quiejë' ruejë'. Psan quie ben' rue tabayatza. Huegarajë' seguir huejë' cabë' tabayatza quiejë' ruejë'. Pero ben' rue tahuen, huegarajë' seguir huejë' tahuen. Lëscan' ben' naca la'ya, ben' quie Diuzi, huegarajë' seguir gaca la'iyarajë'.

Na'ra tatula una ángel tanun quie Cristo, unë' caní:

¹² —Tali na' baruen bago dza yeguida'. Huaguižuga' ja benë' cabë' naca ta bëjë'. ¹³ Naca' ben' zu tuzioli. Lao na'a uzulaohua' ulëcha' yedyi layu. Lëscan' lao na'a yeyudyi yedu quie yedyi layu. Naca' ca quie letra A len letra Z quie abecedario.

¹⁴ Huaca huen quie ben' rguibi zabe cuenda gata' derecho quiejë' ta gaojë' tazixi rbia yaga ru'e yela' neban. Cana' huazaque' tzu'ujë' lu'u ru'a puerta quie ciudad na'. ¹⁵ Pero bisaque' tzu'u ja ben' birue quie Diuzi, bisaque' tzu'u ja ben' rue yela' brujo, bisaque' tzu'u ja ben' rdalë' ja nigula binaca žgule, bisaque' tzu'u ja ben' ruti benë', bisaque' tzu'u ja ben' rionla'adyi' ja idolo, bisaque' tzu'u ja ben' raxe rue huezi' yë'.

¹⁶ —Ně'ēdi', Jesús, aose'ela' ángel quia' ta quixogue'ně' yugulu cabě' unia' niga lao ja ben' nao xneza'. Naca' ži'isuba rey David. Naca' ca bélo raca titi' quie bala.

¹⁷ Na'ra cani una Bichi Be quie Diuzi len nigula utzagana'lě ben' naca ca quie beco' ži'ila':

—Rbezando' yeguido', Señor Jesús.

Lěscana' cani una nu ben' ruzēnaga cabě' di'idza' zu lě'ě guichi ni:

—Rbezando' yeguido', Señor Jesús.

Lěscan' huen guida nu ben' rbili nisa, nu ben' re'en guida yo'o nisa ta ru'e yela' neban. Biquižuga'jě' ta yo'ojě'n.

¹⁸ Na'ra inia' le'e, ben' ruzēnaga cabě' di'idza' zu lě'ě libro ni: Chi utza' beně' di'idza' ni, huejě'n di'idza' falso, hue Diuzi lějě' ja castigo cabě' rguixogue'n lě'ě libro niga. ¹⁹ Lěscan' chi użěchi'jě' con cabě' rna di'idza' zu lě'ě libro niga, bihue' Diuzi lato si'jě' parte quiejě' quie yaga ru'e yela' neban. Lěscan' bihue'ně' lato tzu'ujě' lu'u ciudad naca la'iya cabě' rguixogue'n lě'ě libro niga.

²⁰ Na'ra Jesús, ben' naca testigo quie di'idza' zu lě'ě libro niga, unaně' cani:

—Baruen bago dza yeguida'.

Na'ra ně'ēdi', Juan, rnia' cani:

—Gaca cana'. ¡Rbezando' yeguido', Señor Jesús!

²¹ Rulidza' Señor quiero Jesucristo ta huela'iyane' le'e yugulule. Amén.